





Grimaldi



JOAN. BAPTISTÆ
BIANCHI

Med. Doct. & in Taurinensi Universitate Anatomiae
Professoris;

HISTORIA HEPATICA,

In hac tertiâ Editione, numeris tandem omnibus absoluta.

ſeu

THEORIA ac PRAXIS omnium Morborum HEPATIS, & BILIS, cum
ejusdem Visceris ANATOME pluribus in partibus novâ:

*Adjectis DISSERTATIONIBUS aliquot; AENEIS TABULIS;
accuratis earum Explicationibus, & ANIMADVERSIONIBUS
ad hocce explendum Opus facientibus; Amplisque omnium
rerum INDICIBUS.*

TOMUS PRIMUS.

THEORIAM, PRAXIM, & ANATOMEN complectens.



G E N E V A.

Apud **GABRIELEM DE TOURNES ET FILIOS.**

M. DCC. XXV.

B I A N C H I

D. NICOLA PENSA

ILLVSTRISIMIS DD. REVERENDISSIMIS

D. ABBATE MARIA FERREO

THEORIA PRAXIS

D. COMITTE NICOLA CORADINO

D. COMITTE GIOH. ROVANO

D. FRANCISCO DE AGUIRRE

REGIO ADVOCATO ET CENSOR

D. ABBATE ALEXIO DE RIVIS

RECTORIATORE SUPRA NUMERUM

D. AMBROSIO DE MELLAREDE

STUDII

IOHANNES DE VESINIS

AD GABRIELI BERNARDINI ET FILIO

M D C C X X V

AMPLISSIMO REI LITERARIÆ

CONSESSUI;

EXCELLENTISSIMO DOMINO

D. NICOLAO PENSABENE,

PRÆSIDI, ATQUE STUDIORUM CONSERVATORI;

ILLVSTRISSIMIS DD. REFORMATORIBVS;

D. ABBATI F. MARIA FERRERIO,

A LABRIANO;

D. COMITI NICOLAO COARDIO,

A QUARTO;

D. COMITI IOS. IOH. PROVANA,

A COLLEGIO;

D. FRANCISCO DE AGVIRRE,

REGIO ADVOCATO ET CENSORI;

D. ABBATI ALEXIO DE RVBEIS,

REFORMATORI SUPRA NUMERUM;

D. AMEDEO PHIL. DE MELLAREDE,

STUDIORUM RECTORI;

JOANNES BAPTISTA BIANCHI

felicitatem.



UÆ Typis eduntur literariæ res , cùm Viris
sapientiâ , & dignitate præstantibus meritò
nuncupari soleant ; haud diu mihi fuit am-
bigendum, PATRES AMPLISSIMI , quos
ad hanc meam de re medicâ , atque ana-
tomicâ conscriptam , novissimèque absolu-
tam Historiam , Fautores potissimum , atque Patronos
compararem. Vos enim obtutibus meis statim obversaba-
mini ; quorum etiam si cætera decora , atque ornamenta
sileantur , magnum illud profectò & præclarissimum est , à
providentissimò PRINCIPE, quò in præclariorum Virorum
meritis expendendis , æstimandisque neminem esse morta-
lium accuratiorem , prudentioremque dignovimus , ad-
lectos fuisse , eâque prærogativâ cohonestatos , ut exco-
lendis , augendisque literis præficeremini. Quare ut opus
hoc meum Vobis dedicarem ; Cùm satis fuisset me vo-
bis publicò hòc nomine obstrictum esse , tum maximè pri-
vata me studia hortabantur , atque impellebant. Ab hâc
enim Regiâ Universitate instauratâ quintus jam annus ex-
currit , ex quò me tantâ , ac singulari benevolentia fuistis
complexi , ut summopere gaudeam , optatissimam mihi
occasionem contigisse , quâ in hòc literariò munusculò
Vestra erga me beneficia commemorarem , Vobisque , &
probis omnibus palam facerem , me à perenni erga Vos
obsequiò ullo unquam tempore , neque distrahi , neque
divelli posse. Quòd si mihi Superi sic arriserint , ut has
vobis inscriptas lucubrationes æquis animis excipiat , non
illud tantum præstabitis , ut me insumpti laboris nequa-
quam

quam pœniteat ; Verùm etiam acriores stimulos ad ma-
jora quẽdam suscipienda adjicietis. Valet Taurinensis
Academiæ splendidissima lumina ; diutissimẽque Bonarum
Artium , ac Liberalium Disciplinarum incremento , tum
Vestrae , & omnium felicitati incolumes vivite.



* 3 **AUCTOR**



AUCTOR LECTORISUO.



Andem aliquando expeditam atque absolutam He-
paricam Historiam habes, Amice Lector; quam
ipse eâ fortè de causâ sollicitè præstolatus fueras,
quòd dudum ego pollicuus evulgationem, hanc
de anno in annum, interjectâ morâ, protraxis-
sem. Ita porro evenit, ut quæ ante septem hos-
ce postremos annos novæ hujus Editionis infederat cura, crebrò
vel ipsò plurium mensium, imò & annorum spatiò fuerit intermis-
sa: iis præcipuè temporibus, quibus ad Bononiensem Cathedram
evectus, dein ad hanc Taurinensem assumptus, pensis aliis gravis-
simis operam dare sum coactus: quare cum succisivas plerumque,
nec non à praxi atque Academiâ feriantes horas, impendere mi-
hi relictum esset, ferius id negotii perfecì, novissimarum usus op-
portunitate vacationum, quæ ut alieno commodo tantisper vacare
possem, effecerunt. En igitur promissam fidem exolvere, non exili,
ut puto, earum omnium induciarum usurâ, ubere scilicet Practi-
carum, Anatomicarum, atque Theoricarum Rerum; Apologetica-
rum præterea, aliorumque instituto facientium supellectile refusâ,
quam tibi sisto dicoque: Quòd si in tantâ disparium ferè disquisitio-
num congerie, à me candidè postulas, quæ illa sint, quibus re-

cau-

P R Æ F A T I O

cautiùs, atque diligentius admoventi conducatur; Laudo illico res practicas, ceterisque tutius antefero. Eoque lubentius practicis hisce lucubrationibus potissimum studium impendas velim, quod mihi pro re nata persuadeo, fore te intellecturum, reliquas hujusce Historiæ partes, ad hanc unam diligentius attingendam fuisse perductas, atque hanc nostram morborum Hepatis, & Bilis Therapeiam ab optimis fontibus, & accuratissimis observationibus esse derivatam. Noveram enim vel à Praxeos tirocinio recentiores propè omnes hujusmodi Facultatis Scriptores descivisse à sublimi illâ, solidâque majestate perfusâ, antiquorum Medicinæ Parentum, observandi ratione; omisisse, aut neglexisse principia, & fundamenta diagnoseos, ac prognoseos; rectamque curandi methodum, ad hæc pertinentem; atque valedictâ Rationalium doctrinâ in Methodicorum, seu *Hypotheticorum* classem incautè declinasse. Naturam nempe Medicinæ Parentem, & administram suis in officiis, ac viribus haudquaquam persequentes, aut attendentes; sed ad propria auctoranda commenta, pro innata libidine, distrahentes, ac veluti in alios mores cogentes. Ita noveram neque satis amplius prænosci morbos, neque eorum eventus, ac successiones prædici; non crisia molimina, non tempora, non circuitus diligenti operâ distingui; non sanitatis, aut necis prænuntios veteri illò studio perpendi; ut nihil, si superis placet, hoc ævò fallax magis & incertum à vulgò dijudicari videatur hocce Medentium judiciò, atque prognosi. Ita etiam dignoveram in Disciplinâ Medicâ, quæstus ex unâ parte gliscere, ex aliâ verò jacturas irrepere: Lucrari nos Theoreticos flores ab experimentalibus, & corpusculari Physicâ, ab Anatome, Chemicâque Arte decerptos; simulque constantes ex ægritudinum observatione fructus amittere, & deserere. His quidem meditationibus adductus, redeundum esse ad primos Medicinæ Legislatores, atque in primis ad Hippocratem, è limine meorum studiorum sanciebam; mihiq; idcirco ab Hippocrate scepticam illam cogitandi, observandique normam comparare constitui; quâ ille quidem è manifestis Humani corporis partibus abditiores Naturæ motus aperiens, Naturam medico cuilibet ratio-

cinio

cinio Magistrum adhibet. Quid enim dicenda forte essent *Paracelsica* illæ, *Helmontianæ*, *Sylvianæ*, *Willisianæ*, aliæque nuperæ Hypotheses, nisi tot diffidentium sectarum præjudicia, quibus quidem non morborum leges perpenduntur, ut firmior inde Theoria eruatur; sed prius in animo effingitur Theoria, ut inde quæ per praxim contingunt, eadem plurimò ingeni lusû ad eandem quomodolibet revocentur? Porro quid aliud est celebre illud, nostræque hâc ætate acceptissimum Mechanicorum Systema, nisi vetustissimum Thessali Methodicorum Principis placitum *stricti*, *laxique*?

Ante Hippocratis ætatem nihil medicis in rebus invaluit, quod scientiam reverà saperet. Remedia casu inventa, atque indiscriminatim usurpata: Nullum in causis ac successibus morborum ratiocinium aderat. Divinus verò Senex medicæ scientiæ fundamenta jacuit, eamque rationalem effecit. Atque cum talis tantusque Vir ex anatomicis disquisitionibus, pro temporum superstitione & incuriâ, vix quidpiam sibi comparasset, in practicâ stetit observatione; in quâ tam altè excelluit, ut nemo vel priscis illis ætatibus inficias iverit, medicam Disciplinam ab Hippocraticâ industriâ ad suæ perfectionis vicinitatem jam propè fuisse redactam. Et sanè si Coæ observandi scribendique solertiæ suam inde omnes adjecissent operam, minimèque aberrantes, insignia lumina ab humani corporis fabricâ improbis deinde laboribus elicitæ, cum illius ratione sedulò, candidèque contulissent, an nostris his diebus tam adhuc imperfecta jaceret hæc scientia, quæ cum nihil ab Hippocratis ævo ad nos usque profecerit; imò non modicum detrimentum sit passa, confusaque, & jactata maneat; nihil forsan à semet ipsâ depressius in orbe terrarum recognoscit? Quippe si successores Hippocratis super illa tam firmè jacta fundamenta solidum extulissent ædificium, atque ab his per similes observationum aditus Theoreticis quidem facibus illustratos, itum fuisset; quid jam superesset infectum?

Verum enim verò fatalis quædam propriæ æstimationis cupiditas Scriptorum animos plerumque adorta, atque ad famosiora venditanda commenta etiam atque etiam accendens, id fermè molita est,

P R Æ F A T I O

est, ut Theoricæ invalescentes doctrinæ, ad abstrusiora procreanda, erigendaque systemata abreptæ certatim fuerint: Ad quæ indè phænomenis omnibus ac singulis observationibus summâ vi quâdam contortis, atque devinctis, plerique Scriptorum, rationali deletâ scientiâ, methodicos inaniter se præstant, in nova duntaxat, ac veluti cardinalia extruenda morborum genera; eorum qui rem expenderant diligentius, interversis commentariis, studiisque pessumdatis, velis remisque nitentes. Ita non pauci singulos, aut potissimos morbos ad Hypochondriacæ passionis, aut Scorbuti familiam conantur redigere: Alii ad Convulsionem: Plurimi ad solas ventriculi cruditates, aut indignatum Archeum, aut torpidum, palantemve animale spiritum, liquidumve nerveum, aut glandularum peccata: Nonnulli demum quidquid præter naturam censendum est, id sanè à salivæ, bilis, succique pancreatici præliis, atque erroribus nancisci originem dictitarunt. Quid dicam de *Hypothesistis*, adaucti solidorum momenti, qui sanguini, aliisque animalibus liquidis actionem quamlibet adimunt, denegantque; de acidi, & alcalici semper depræliantium Patronis, aliisque similis farinæ Methodicis? Neque insuper in tam portentosa medicarum Hæresium multitudine defuere qui status omnes morbosos & salubres occultis quibusdam in quolibet animali latice nidulantibus vermiculis tribuerint. Sed pudeat innumera alia vigilantium insomnia recensere.

Quod si procul ab his fucis atque illusionibus, Ars nostra post auream illam Hippocraticam ætatem, quôquô indè sæculô per assiduas, nitidasque constantium Naturæ moruum Observationes, atque ab ipsis duntaxat diagnoseos, & prognoseos argumentis, & incrementis alita, solidè luculenterque adoluisse, an non à suâ illa felici infantiâ, in florentem postea juventutem traducta, jam propè maturitatis splendorem attingeret? Non ergo jurè transactorum Medicinæ, atque præsentium in primis temporum tenebras & infortunia non dolebimus; quibus nempe tam paucos Hippocraticæ Observationis sectatores deprehendimus, atque suspicimus, ut tota simul Europa vix aliquot hujusce ingenii Viros, rarisque non

* *

nisi

P R A E F A T I O

nisi intervallis annorum obtulerit: Italia Mercurialem, Martianum, atque Baglivium; Anglia Sydenhamium; Gallia Duquetum; Hispania Mercatum; Germania Cratonem?

Quam ob rem cum hac assidue ad ægrorum lectulos volutarem animo; diuque à morborum eventibus edocerer, necdum in scribentium codicibus genuinum illud prodiisse Systema, quod quidem universæ rei Practicæ commodam faciem præferre queat, (quum morbus quilibet sub unâ specie comprehensus, atque recognitus dissimilibus semper, juxta varios ægrotantium status, antecedentibus, comitantibus, ac insequentibus circumstantiis stipetur, disparemque idcirco observandi rationem inducat;) mecumque sollicitè reputarem, non solum Medico summo opere conducere, in Theoreticâ parte, exemplò Hippocratis systematum præjudiciis expertem esse; ac leges mechanicas, circuitus sanguinis, virium percussionis, elaterii aëris, & solidorum, tum reliquam medicæ cogitationis suppellectilem nudæ simplicique clinicæ observationi post habendas esse (quandoquidem absque hisce meditationibus Hippocrates, eique additiores Discipuli in adjuvanda ægrorum valetudine tam strenuè valere) verum etiam ad rectè enucleanda, discernendaque, Divini Senis more, morborum genera, ac retegenda, adhibendaque opportunè remedia, ad manifestas humorum classes, per morbos in humano corpore delinquentium, confugiendum esse.

Ad præcipuum igitur morborum eruendum fontem, seu ad Hepatis & Bilis morbos tam altè diligenterque ab Antiquis perpenso, atque descriptos, per accuratam diagnosim investigandos, à reliquarum partium, humorumque affectionibus discriminandos, saniori prognosi, ac remediorum administratione excipiendos, moderandosque, præsertim etiam à Nuperorum commentis vindicandos, improbo satis, diuturnoque labore me converti. Porro cum ejusmodi Praxim hujus voluminis caput, ac princeps institutum fecerim, theoreticas atque anatomicas disquisitiones, vel fictiori pede transigi, vel disjunctis, divulsisque veluti partibus subrogavi, ut firmè jam mihi plurimus sperandi locus sit, *Amice Lector*, fore

ut

P R Æ F A T I O

ut in variis hujus Operis partibus à memet ipso diversus tibi videar. In primâ videlicet, & alterâ Historiæ parte notabis forsitan juvenem Professore, animique fervore abreptum; in tertiâ verò maturiorem solidiorique usû rerum cogitantem, atque scribentem. Cum enim illæ partes ante hos quindecim annos cursim scriptæ, rapidèque compilatæ fuerint, consentaneum fuit, scribendi modum vividioris ætatis indoli, atque impatientiæ respondere. Hinc vitio mihi nequaquam vertendum duco, si, quòd à te nonnunquam argui possim inconstantie, facilem veniam deprecer.

Quâ verò fortunâ Hepaticorum hoc atque Biliarium morborum Opus expleverim tu ipse etiam videris, candidumque judicium proferes. Atque si me mihi blandiri datum sit, instauratam hanc biliariorum præcipuè morborum Doctrinam, atque constabilita Hippocratica de hujus principalis humoris erroribus fundamenta, inani illo Chemicorum superducto olim ædificio feliciter, si superis placeat, demolito, cordatis Practicis nequaquam improbandum confido. Præcipuè cum viderim, restitutam à cl. Musgravio Anglo lib. *de Arthritide symptomatice* Antiquorum Pituitæ ingentem in creberrimis morbis potestatem placuisse, plurimum, plurimumque sanctiorem Praxim adjuvasse. Sed & illud spero fore, ut Atræ bilis genuinæ affectiones in bonum lumen aliquando reddantur, accuratioribusque Recentiorum placitis aptè congruant: ad hæc sanguinis morborum pertractatio à Veterum scriptis minimè dissentiat: quo quidem pacto sanioris, feliciorisque Medicinæ prospectum Posteris tandem nostri revivant.

Totius Operis ordinem in apposito Elencho perspicias. Cur verò Prodromum Practicæ parti prætulero, deinde ab ejusdem instituto desciverim, in Præfatione, quæ quidem eidem Parti præponitur, omniumque practicarum rerum ordinem aperit, facile animadvertes. Initio ejusdem proloquii leges Hæc; *Ante hos tres annos, & quod excurrit, primas me Hepaticæ Historiæ ampliatas partes typis suis largitum*: Quæ quidem antea docearis velim; ea nimirum ante hos quatuor postremos annos à me conscripta fuisse typisque consignata. Fusam accuratamque Præclariissimi Guideti Dissertationem, Tertiæ

P R Æ F A T I O

hujus Partis caput esse perspicies, quam sanè Commentariis nostris per universam eandem partem perductis prolequi utile simul ac volupe fuit. Guidetus is est mei amantissimus, qui non tantum ornatissimo hoc Opere nostram ditabat Historiam, verum etiam in nostris *annotinis* biliosis Constitutionibus ordinandis, quum superiori anno propter Anatomici Cursus labores per nos haud assidue liceret, comem operam insumpsit; locupletem adhuc totius Operis indicem, quæ humanitas est, ac singularis in nos benevolentia, collegit, summôque studiô digestit.

De cætero ad edendas, ac ferè singulis nostrarum Iconum explanationibus interferendas, multiplicandas insuper, ac longius prætrahendas Animadversiones, non eò solum, Amice Lector, adductus sum, ut jacta in meam priorum editionum Hepaticam Historiam acerrima Censuræ jacula, veluti ex objectis veritatis clypeis repellerem, atque retunderem; sed maximè ut aliquibus locis pressè quidem nimium in prima Parte propositis supplementa aliquot adjicerem, iisque etiam planiora facerem. Cum autem mihi ut jam indicavi, è vestigio instituerim practicum opus complecti, & in hoc mihi publicæ utilitatis honestum propositum facere, idcirco non verbis, sed rebus studens, conatus sum genuinam illam simplicemque rationem Medici scriptoris attingere, tempore utens in colligendis illis, depromendisque observationibus, quibus Tirones nostri doctiores, ac peritiores evadant, non verò inutiliter projiciens in radendâ ab optimis Latinæ Linguae cultoribus sermonis illæ elegantia, quâ quidem disertior, atque eloquentior evaderem, aut saltem evasisse viderer. Quid enim hoc studium in medicis rebus præstare posset? An verbis curantur ægrotudines? An medici plerique Scriptores, qui seligendis vocibus tam avidè incumbunt, ut neque literulam scribere latinè audeant, quam in Calepinis, & Nizoliis (quos semper in manibus versant) non consuluerint, utiliora Posterorum memoriæ committunt? Cum enim Latinam linguam, quæ mortua jam dudum jacet, neminem funditus callere putandum sit, delibare autem ex ea quidpiam nemo valeat, nisi per diuturnas vigilas, & acerrimas antiquorum codicum pervestigationes,

P R Æ F A T I O

gationes, ut longâ tandem ac senescente patientiâ in locutionem Ciceronis, Cæsaris, Terentii, Livii, aut cujuslibet priscorum aurei sæculi eleganter loquentium inquirere, eamque imitari videatur; Quorsum nobis tantum istud ligandi verba artificium, tantique laboris longævitas? Quid mihi aut medicis Tironibus proficere posse censuissem, si quod studium Medicis disquisitionibus vertendum esse statueram, idem totum aut plurimum eliminandæ, volutandæque diutius elocutioni, ac seligendis oculis impendissem? Scripsi igitur Hepaticam Historiam calamo non quidem à Dictionariis libris, sed ab accurata mentis contentione perducto: Hinc Barbarismos, aliosque latini sermonis errores, quibus fortè quilibet in Philosophicis curriculum imbui facilè solet, in hanc ubertim irrepsisse non diffiteor. Atque cùm ante hos septem annos plurima Genevensium Bibliopolarum in primis hujus Historiæ recudendis partibus festinatio orta sit; Vix ad quædam earum amplianda solemnia loca me contuli: Nihil verò de perpoliendo sermone cogitavi: Fortè etiam invalescentem nostræ hujus ætatis pro latina elegantia pruriginem non adhuc satis adverteram. Hinc binæ istæ Partes, quæ quidem cum Tertia publici nunc juris evadunt, demissius adhuc, barbaræque loquuntur. Hujusce tamen meæ me modò non poenitet negligentia. Quippe cùm nobis in præsens incumbat pensum easdem has partes à Censoribus aliquot ante annos eruptis tueri, gavisus valde sum, easdem vel in ipsis orthographiæ mendis fuisse sibi religiosè relictas; ut hoc pacto loca ab Adversariis impugnata, neque immutata literulâ, recognosci undequaque possint; atque obtrudendi locus non sit, me voculas Historiæ mutando, sensa etiam quoquomodo immutasse. Sed demum luculentum animi solamen est, me quidem non fugere, Doctos, Cordatosque Viros, Medicorum Auctorum significationes, & ratiocinia, non verò stylum, atque grammaticas tricas attendere. Quamquam verò tertiam digerens Partem conferendis dictionibus nonnihil plus dederim; tanto interea inanique mancipio nunquam me adeò submittere valui, ut plurimi in adverbiiis, aliisque locutionis membris errores, præcipuè in hujus partis principium, non adhuc effugerint. Verumtamen est

**

3

errata

P R Æ F A T I O

errata aliqua, fortè etiam non pauca, per singulas hujus Historiæ partes dispersa referenda esse nostræ à Typorum loco absentia, atque distantia, ut eorum correctionibus commodus vacandi locus non fuerit. Ita de hujus generis erratis ad calcem operis monitum haberi curavimus. Sed alterius generis errores, quorum quidam uberiores inesse copiam fatemur, tu ipse, si lubeat, operæque sit pretium, emendato. In hoc interea prolixo Opere ingenuum meum tibi totique medicæ juvandi Reipublicæ complectere animum, meisque in laboribus profice. Neque, deprecor, prehendam te amarulentia, atque vulgaris illa cacoëtes lacerandi ea, quæ in publicum commodum lucubrata, sunt & conscripta. Irrue, si lubet, in locutionem, quam imperfectam, imò ob varia scribendi tempora deformem iterum sanè condemno. (quandoque enim prudentiæ est, leve quidpiam & ferè inane detractioni, & invidiæ concedere, ut ab earum morsibus solidiora servantur,) Neque certè de hac tam dulci literatorum Hominum mentis ægritudine laborabo. Sed caveas ratiocinia nostra, Practicas, imò & Anatomicas observationes, aliaque ad Medicæ scientiæ illustrationem spectantia, adoriaris, & rodas. Vererer enim fædum illum tuum adversus artis nostræ Reipublicæque utilitatem pervicacem æstum latè nimium patere posse. Jamque in æternum vale, atque pro certo habeas, me eorum omnium, quæ in prima hujus Historiæ editione præfatus fueram, simulque pollicitus, memorem esse, & sollicitum. Dabimus enim aliquando, si me diligant Superi, universalem Humani corporis Historiam. Stationales Taurinensis cœli promissos morbos; in biliosis nostris plurium annorum Constitutionibus indicasse nunc satis existimo; quanquam in his biliales affectus consultò persequar, cursimque & obiter cæteros. Desponsas præterea cum theoreticas alias, tum practicas disquisitiones digerere tandem luculenter posse, & absolvere non diffido. Quandoquidem literaria Opera, quò plurimus provectis annis rerum usus invaluit, eò meliora fiunt, ac selectiora. Atque dictante Tulpio *Nihil consiliis medicis tam inimicum est, quàm Celeritas.*

ELENCHUS



ELENCHUS TOTIUS OPERIS.

HISTORIÆ HEPATICÆ

PARS PRIMA

Colligens quæ ad Hepatis Theoriam spectant.

C APUT PRIMUM. Necessitas naturalis in Animali secretionis humorum.	Pag. 1
Cap. II. Diversitas fluidorum, quæ secernuntur in Animali	3
Cap. III. Variæ secretionis Animalis Hypotheses	7
Cap. IV. Rejicitur opinio Fermentistarum	9
Cap. V. Confutatur Poristarum sententia	11
Cap. VI. Consideratur Hepar secundum partes externas	16
Cap. VII. Describuntur Vasa Hepatis lymphatica, & Nervi	18
Cap. VIII. Describuntur cætera Hepatis Vasa	22
Cap. IX. Describitur Hepatis structura interna, seu ejus Parenchima	28
Cap. X. Exponitur secretio liquidi à liquido in Inanimatis	32
Cap. XI. Secretio liquidi à liquido in Vegetabilibus	34
Cap. XII. Secretio liquidi à liquido in Animalibus in genere	40
Cap. XIII. Secretio in Animali liquidi biliosi in specie, & obiter de alio	

E L E N C H U S.

	aliorum liquidorum secretionibus	50
Cap. XIV.	Quid ideo bilis sit : quomodo fiat in animali : an in solo Hepate generetur : An prius in sanguine generata jam sit, & confecta?	71
Cap. XV.	An bilis ex se se tenuior sit toto sanguine simul sumpto; an æqualis consistentiæ; an crassior	78
Cap. XVI.	Bilis usus post ultimam à sanguine secretionem suam in hepate	85
Cap. XVII.	Exponitur structura, & usus cystis felleæ	99
Cap. XVIII.	Exponitur modus influxus bilis in cystim	102
Cap. XIX.	Exponitur modus effluxûs bilis ex cysti	106
Cap. XX.	Vasa cystis propria, eorumque usus	111
Cap. XXI.	Quantitas bilis, quæ in hominis hepate naturaliter ex-cernitur	116
Cap. XXII.	Alter hepatis usus præter secretionem bilis	120
Cap. XXIII.	Tertius hepatis usus	123

HISTORIÆ HEPATICÆ PARS SECUNDA

Complectens quæ ad Hepatis morbos pertinent.

C AP. I. & Præliminare. DIVISIO MORBORUM	125
Cap. II. Morbi Hepatis à toto solido	130
Cap. III. Morbi Hepatis à solido Vasculari	137
Cap. IV. Morbi Hepatis à solido Nerveo	140
Cap. V. Morbi Hepatis à fluido	143
Cap. VI. Morbi à secretionem Hepatis aucta	161
Cap. VII. Morbi à secretionem Hepatis diminuta	165
Cap. VIII. Morbi à secretionem Hepatis abolita	166
Cap. IX. Morbi à secretionem Hepatis depravata	167
Cap. X. Morbi à secretionem Hepatis ad alia etiam organa translata	179
Cap. XI. Morbi Hepatis à corpore extraneo	187
Cap. XII. Prodromus ad Praxim morborum biliariorum	195
	HISTO-

HISTORIÆ HEPATICÆ

P A R S T E R T I A

Aperiens ea, quæ morborum Hepatis, præcipuè biliariorum Therapeiam, seu curationem adimplent.

AUCTOR Lectori suo in hanc Partem introducendo Pag. 206

JO. THOMÆ L. GUIDETI de Biliosis Affectionibus, & præsertim de Biliosa Pleuritide Dissertatio Epistolaris ad Amplissimum Virum **JO. BAPTISTAM BIANCHI** 213

De vera inquirenda Medicina. Canones Practici 215

De Primis causarum internarum in morbis hominum generibus secundum sententiam Hippocraticam 218

De Febribus biliosis stationariis, acutis, & perniciosis, vulgò etiam malignis nuncupatis. Canones Practici 224

De vario Pleuritidis genere & signatim de biliosa Pleuritide Tractatus 232

De Tertianis Vernalibus. Canones Practici 277

De Ingressu Tertianæ Biliaris perniciosæ, ejusque indicatione. Canones Practici 280

De Bilis naturalis in febriferam mutatione. Canones Theoretico-Practici 290

De occasione Emetici in biliosis affectibus. Canones Practici 293

De occasione Fotuum in biliosis Affectibus. Canones Practici 295

De occasione haustuum diluentium in febribus biliosis, & insuper anodynorum, clysterum, cardiacorum, cucurbitularum, frictionum, sudoriferorum, diureticorum, & vesicantium. Canones Practici 298

Tractatus de morbis ex Bile in Hepate, aut extra Hepar particulatim. 311

De

E L E N C H U S.

De Ictero. Canones Practici	Pag. 313
De obstructione Hepatis, & obiter de Scirrho, aliisque in hoc viscere morboris congestionibus. Canones Practici	322
De Hepatis Phlegmone. Canones Practici	332
De Hepatis Abscessu, atque Ulcere: & primum de Abscessu. Canones Practici	355
Historiæ Abscessuum, & Vomicae Hepatis	367
Ulcus Hepatis. Canones Practici.	370
Historiæ hepaticæ exulcerationis secundi generis, morbis aliis copulatae	375
De Hepatitide. Canones Practici	377
Appendix ad Hepatitidem. De Hepaticis Hypochondriacis, seu Hypochondriacâ biliosa Passione, ab Hippocrate sub nomine Resiccatorii morbi descriptâ	417
De erysipellate Hepatis. Canones Practici	422
Historia Hepaticæ Phlegmonis non suppuratae, citiusque idcirco lethalis; seu Observatio LXIX Caroli Pisonis lib. de morbis à serosâ colluvie ortis	435
Dolor Hepatis spasmodicus, arthriticus, & flatuosus. Canones Practici	436
Hepatis Vulnus, ejusque contusio, & scissura. Canones Practici.	444
De fluxu Hepatico. Canones Practici	455
De felleæ Vesiculæ morbis Appendix, atque in hac Canones Practici	471
De Biliosâ Phrenitide, & Perfunctoriè de aliis Capitis pariter biliosis, seu à primogenio bilis vitio sympathicis Affectibus. Canones Practici.	492
Appendix de Bilioso Capitis dolore, seu Cephalalgia, Cephalæa, & Hemicraniâ biliosis; de biliosâ insuper vertigine, & tandem de Mania, quæ à bile est. Canones Practici.	506
De Bilioso Vomitu; & obiter de Ventriculi æstu, ardore, seu Sodâ, Cardialgiâ, Singultu, aliisque ejusdem morbis à Bile productis. Canones Practici	515
	De Bi-

De Biliosâ Diarrhoeâ. Canones Practici	Pag. 531
De Biliosâ Dysenteriaâ. Canones Practici	539
Historia Biliosæ Dysenteriaë à bile viridi è cysti manante, unde Ilei, & Coli intestini corruptio	561
De Bilioso Tenesmo. Canones Practici	562
De Biliosâ Colicâ Affectione. Canones Practici	565
Historia aliquot Biliosæ colicæ	585
De Colica Pictonum. Appendicula	592
De Cholera morbo. Canones Practici	595
Historia cujuslibet Cholericæ morbi speciei	612
Historia I. Legitimam ex flava, sed colorationi Bile cholericam passionem exhibens ex Hipp. V. Epid.	ibid.
Historia II. Cholera morbus porraceæ Bilis à veneno progenitus, & ab Authore feliciter curatus	613
Historia III. seu Observationes Choleraë morbi ab æruginosâ Bile	617
Historia IV. Cholera morbus ex Bile atra lethalis	ibid.
Historia V. Cholera mortifera Vitellinæ Bilis ab Hypercatharsi in Gravida	618
Historia VI. De Cholera humida, seu spuria, & VII. de Cholera siccâ	619
De Biliosa Lipyriâ. Canones Practici	621
Historia Biliosæ legitimæ Leipyriæ	627
Historia Biliosæ spuriaë, seu imperfectæ Leipyriæ	628
Scholia XXVIII. reliquis Guidetianæ Dissertationis numeris res- pondentia, quorum primum	631
ultimum	699
Historia aliquot Biliosarum Pleuritidum anni 1722. Emetico re- medio facillè curatarum, aut sine emetico lethalium.	682
Epidemicæ Biliosæ Constitutiones	709
Introductio ad Constitutiones epidemicas	711
Constitutio anni 1711.	717
Constitutio anni 1712.	718
Constitutio anni 1713.	720

E L E N C H U S.

Constitutio anni 1714.	722
Constitutio anni 1715.	724
Constitutio anni 1716.	731
Constitutio anni 1717.	734
Constitutio anni 1718.	736
Constitutio anni 1719.	757
Admonitio pro anno 1720.	759
Constitutio Pleuritica anni 1721.	ibid.
Constitutio anni 1722.	765
Constitutio anni 1723.	768
Appendix Constitutionis anni 1724. ad usque VERNUM ejus tem- pus	778
JACOBI VERCELLONI De Bile acutâ, & imminutâ ad Illust. Virum D. JO. BAPTISTAM BIANCHI	785
Scholium Auctoris, De bile hominum peste denatorum, aliorum- que ab aliis morbosis affectionibus correptorum	803
Epistola D. D. CAROLI RICHA ad Ampliss. AUCTOREM	807
De Impedimentis Circuitus sanguinis in genere, Epistolica cum fi- guris Dissertatio I. Auctoris ad Clar. D. Paulum Hierony- mum Bimium Mediolanensem	811
De Febris Natura & effectibus in genere, Epistolica Dissertatio II. cum figuris, sive Epistola Geometrico-practica Auctoris ad Amicissimum Virum D. Antonium Paterium Medicum atque Philosophum Præstantissimum	844
Ichnographia Hepatica novem Tabulis ad vivum incisa, Decimâ ad instituti complementum additâ Tabulâ	881
Ordo Tabularum Ichnographiæ Hepaticæ	882
Tabula Prima cum explicatione, Hepar gibbum, ejus Lympha- tica, ligamenta, Tunicam, partes, & principales habitudi- nes exhibens	883
Tabula II. cum explicatione, Hepar Cavum, ejus Vasa, & præcipuas habitudines ostendens	893
Animadversio I. ex hac Tabulâ elicita. De genuina trunci Portæ sede	

sede in Cavâ Jecoris regione	
Animadversio II. De loco trajectus venæ Cavæ, ejusque ramo-	
rum per hepatis substantiam.	900
Tabula III. Cavi hepatis lymphatica; Capsulam in situ, aliorum-	
que vasorum Hepatis, atque in primis minorum arteriarum	
habitudinem significans; cum explicatione	901
Animadversio I. ex hac Tabulâ elicitâ. De commercio Lympha-	
ticorum Hepatis cum conglobatis glandulis, ejus cavæ re-	
gioni ascititiis	912
Animadversio II. De Lymphaticorum origine in genere; atque de	
specialium Hepatis, & folliculi fellei itineribus	917
Animadversio III. De speciali lymphaticorum Ductuum per He-	
paris substantiam progressu.	922
Animadversio IV. De Arteriæ in Hepate habitudine, & ter-	
mino	925
Animadversio V. De ratione Glandularum Lumbarium cum chy-	
lari cisternâ in Homine	929
Tabula IV. Hepatis Nervos, eorumque Hepaticum Plexum de-	
monstrans; ejusdemque Tabulæ explicatio	930
Animadversio I. in hanc Tab. IV. de Hepaticorum nervorum di-	
stributione, atque cum finitimis aliis nervis consensu ex	
Willisio, & Vieussenio	933
Animadversio II. in Tab. IV. De ratione vascularis structuræ in	
Nervis	937
Tabula V. Vasa Hepatis biliaria, præsertim hepato-cystica, &	
cyst-hepatica complectens	940
Animadversio in Tabulam V. ubi evertuntur effectæ objectiones	
in expositos ductus Hepato-cysticos, & Cyst-hepaticos	
&c.	944
Tabula VI. Vasa hepato-cystica in Hepate morbofo, confirmans	
ex communicatione epistolica solertissimi Anatome Bono-	
nienfis Caietani Tacconi	962
Ejusdem Tab. VI. explicatio	966
Tabula VII. cum explicatione, Vesiculas aliquot felleas humanas	

E L E N C H U S.

- extra Hepar ad Tabulam appositas &c. exhibens, quibus
accedunt organa biliaria Salamandre aquatilis, atque insuper
Figura extra ordinem reticulata, ac *cellulosa* Hepatis fabricæ
Pag. 967
- Animadversio I. ad fig. I. Tab. VII. De variâ cysticæ cervicis,
cysticique ductus interiori superficie, atque habitudine, ejus-
que usu; tum de supposito felleæ vesicæ sphinctere 969
- Animadversio II. ad fig. III. ejusdem Tab. de genuina sede Mus-
cularis Tunicæ in Animalium Vesicis 980
- Animadversio III. ad figuras ejusdem Tab. De Bilis ab Hepatico
Ductu per cysticum in felleum folliculum Ingressu 990
- Animadversio IV. ad figuras ejusdem Tab. De caussa Bilis egres-
sus è propriâ Cysti 999
- Animadversio V. in omnes hujus Tab. VII. expositas figuras De
ratione fundi, cervicis, & colli in felleis folliculis &c. 1019
- Animadversio VI. ad eandem Tab. VII. De Bilis, in primis Cy-
sticæ functione, usuque in intestino; & obiter de ejusdem
principiis &c. 1026
- Tabula VIII. cum explicatione, exponens Truncum Portæ tribus
figuris à Jecoris Parenchymate expeditum, ut variæ ejusdem
habitudines diligentius ostendantur 1053
- Animadversio ad Fig. I. Tab. VIII. De Musculari Glissonianæ
capsulæ naturâ 1055
- Animadversio I. ad Fig. II. Tab. VIII. De variis venæ Portæ
per varia abdominis viscera distributionum modis 1067
- Animadversio II. ad Fig. II. Tab. VIII. de altera ex caussis secre-
tionis humorum in homine, & bilis nominatim; seu tardi-
tate in devchentibus vasis inducta 1069
- Animadversio III. ad Fig. II. Tab. VIII. De commentitia Bilis in
felleo folliculo secretione 1085
- Animadversio ad Fig. III. Tab. VIII. De vero in hac figurâ Au-
ctoris Bartholomæi Eustachii sensu 1098
- Tabula IX. Ultimò cogitabiles vasorum Portæ, Cavæ, & pori
biliarii per totam Jecoris substantiam concursus: Addito
Ani-

E L E N C H U S.

Animalis in genere secretionis schemate. Cum explicatione Tabulæ	Pag. 1101
Clarissimi Viri D. JOSEPHI ANTONII PATERII explicatio fi- guræ Secretionis in genere per Propositionem XVI. decerp- tam &c.	1107
Animadversio I. in figuras Tab. IX. De glandulosis Acinis Mal- pighii	1118
Animadversio II. in explicat. Tab. IX. Urinæ colorem à bile po- tissimum esse	1124
Animadversio III. In omnes figuras atque explicationes Tab. IX. quædam recolligens circa concursus Portæ, Cavæ, & bili- ferorum ductuum in Hepatico viscere; ac circa modum bi- liosæ Secretionis &c.	1129
Epistola D. Præsulis LANCISII ad Auctorem pro abigendis Dif- fentionibus inter Literatos Viros	1133
Animadversio ultima. In quædam loca Primæ, & Alterius Partis hujus Historiæ hepaticæ	1134
Epistola laudati Præsulis LANCISII quasdam Auctori exponens difficultates in hepaticam Historiam primæ editionis anni 1711.	1158
Tabula X. explicat in genere Impedimenta circuitus Sanguinis, at- que Febris naturam, & effectus	1158
Explicatio Figuræ extra ordinem ad VII. Tabulam positæ, atque Hepatis lobum, ejusque abditioem fabricam exprimentis	1159.



INDEX AUCTORUM

Quibus Historia Hepatica illustratur, sive, qui ad Operis institutum suis locis citantur.

A Brah. Georgi
Ægineta Paulus
Aëtius
Alexandrinus Julius
Amstelodamenses
Andry
Aquapendens
Aristoteles
Arnisaëus Henningus
Asselinæus Petrus
Auctor Diarii Gallici
Backius
Baco
Baglivius
Ballonius
Barbette
Barnerus
Bartholinus Th.
Bauhinus
de Beck David
Beckerus
Bellini
Benivenius
Bergerus
Bertinus

Bidlous
Bilsius
Binningerus
Binosquius
Blancardus
Blasius
Boerhaavius
Boirel
Bohnius
Bonetus
Bontius
Borelli
Borrichius
Boyle
Brasavolus
Brunnerus
Butler
Campolongus
Caldefius
Carceus
Cardanus
Celsus
Cesvin
Charletonus
Charriere

Char-

INDEX AUCTORUM.

Chartades
 Chefeldenius
 Citesius Pictaviensis
 Columbus Realdus
 Cokburn
 Cornelius Gemma
 Cornelius Thomas
 Costerus Samuel
 Cowperus
 Courtial Tolosanus
 Curtius
 Czascheliuss Tobias
 Davinus
 Democritus
 Desiderius
 Deusingius
 Diemerbroeck
 Dodoneus
 Drelincurtius
 Duretus
 Entius
 Ephemerid. Germ.
 Eraſtus
 Ettmullerus
 Eustachius
 Fallopius
 Fantonus Jo: Baptista
 Fantonus Joannes
 Fehr Jo: Mich.
 Fernelius
 Florentinus Nicolaus
 Fonseca Rodericus
 Fontanus Nicol.
 Forestus

Fortis Raym. Jo:
 Frantzenau
 Fribe Melchior
 Galenus
 Gemma
 Georgi Albiganensis
 Gerbesius
 Gladbachius
 Glandorpius
 Glissonius
 de Grad. Matth.
 Graaf Regnerus
 Grandi Jac.
 Greauime
 Greulichius
 Grewius Nehemias
 Guarinonius
 Harderus
 Hecquet
 Heisterus
 Helvetius
 Helvich.
 Henen
 Henningerus
 Hermannus
 Higmorus
 Hildanus
 Hippocrates
 Hoëferus
 Hoffmannus
 Hollerius
 Horstius
 Hovius
 Huldenreich

Jaco-

INDEX AUCTORUM.

- | | |
|----------------------|---|
| Jacotius | Morton |
| Janus de Burgo | Munnickius |
| Jasolinus | Musgravius |
| Jolivius | Needham |
| Jordanus Th. | Nenterus |
| Journal des Scavans | Newtonus |
| Junkenius | Nicolaus Florentinus |
| Kerkringius | Nuckius |
| Lamoniere | Offredi Carolus |
| Lancifius | Olaus Wormius |
| Lanzoni | Olligerus Jacobæus |
| Laurentius | Paifenius |
| Lentilius | Panarolus |
| Litrius | Papinius |
| Lospichlerus | Pareus |
| Loffius | Pawius |
| Malpighius | Pechlinus |
| Mangetus | Perault |
| Marchettus Petrus | Petrus à Castro |
| Marchettus Antonius | Pigreus |
| Martianus | Piso |
| Martius Jeremias | Pitcarnius |
| Matthæus de Gradibus | Platerus |
| Meeckren | Plempius |
| Menjotius | Protospatharius |
| Mercklinus | Pruttenius Daniel in Miscel. Cu-
rios. |
| Mercurialis | Raygerus |
| Mery | Reies |
| Mermannus | Riolanus |
| Michaelis Jo: | Riverius |
| Moëbius | Riverius reformatus à Calmette |
| Moinichen | Redulphus Camerarius |
| Montuus | Rudbeckius |

Ruel-

INDEX AUCTORUM.

Ruellius
 Ruyschius
 Rumlerus
 Sacchus
 Sala
 Salmuthus
 Salzmannus
 Saxonia
 Sbaralea
 Schelhammerus
 Schenkus
 Schneiderus
 Schraderus
 Schröckius
 Schuiltus
 Scultetus
 Segerus
 Seneca
 Sennertus
 Septalius
 Simoni
 Sinibaldus
 Sladus
 Slegelius
 Spigelius
 Steno
 Stierus
 Strigelius
 Swamerdamus
 Sylvius de le Boë.
 Tachenius
 Tackius
 Tavernierius
 Taury

Teichmeyerus
 Torti
 Tozzi
 Tulpus
 Valleriola
 Vallesius
 Vallisnerius
 Valsalva
 VanHorne
 Velschius
 Verheyenius
 Verna Jo: Baptista
 Vernerius Abrah.
 Verulamius
 Vesalius
 Veslingius
 Vieussenius
 Vogli Hyac.
 Volcherus
 Warthonus
 Wedelius
 Wierus
 Willis
 Wium Petr. Eduardus
 Woodwardus
 Wolfartius
 Wolfius
 Zacutus
 Zerbis
 Zodiacus medico Gallicus
 Præter alios eruditissimos Doctores,
 qui in Rerum Indice celebrantur.



HISTORIÆ HEPATICÆ

PARS PRIMÆ.

Colligens quæ ad Hepatis Theoriam spectant.

CAPUT PRIMUM.

Necessitas naturalis in Animali Secretionis humorum.

§. I.



ANIMAL est fabrica se ipsam movens, liquidis, mollibus, & duris partibus constructa. Liquidæ, & molles movent invicem, & moventur; Duræ, motus sustinent, & fulciunt. Motuum perennitas, vita est. Moventium, & morarum partium reciproca attritio absque mutua etiam deperditione non venit. Quoniam itaque per motuum vitalium necessitates continua fit per totum animal substantiæ integrantis jactura, continua etiam in animali reparatio deponitur. Reparari in animali, quod naturaliter deperditur, nutritio est. Reparans, alimentum dicitur. Cum ideo introduci in nutriendum animal alimentum debeat, hinc variè, ut variæ in eodem sunt nutriendæ partes, distribui patet jam naturalis in animali necessitas secretionis alibilium.

§. II.

Quoniam autem alimenta, quæ, ut ultimos adeant partium

A

nutrien-

nutriendarum sinus, reducuntur ad humoris naturam in organis animalis chilificantibus; inde per commune vehiculum, seu sanguinem, ad easdem omnes tranata, particulas non omnes suas deferunt in eundem sanguinem ad nutritionem conformes; tum quia earum plures reduci non possunt ad parvitatem, nutritionis operi idoneam; seu (quod idem est) in tantam exilitatem non veniunt, quanta exilitas fuerat in deperditis particulis; Tum quia earum plurimæ conformis naturæ non sunt cum partium animalis natura: sic jam constat ulterius naturalis in animali necessitas secretionis, non tantum alibilium humorum, sed & aliorum insuper; quos ideo ab hac nutriendi incongruitate, non alibiles vocamus, sed recrementitios, aut excrementitios: Primos adhuc utiles, alteros omnino inutiles.

§. III.

Rursus: Licet omnes alimenti chilificati particulæ congruæ forent nutritionis officio, extra dubium tamen est, earum non paucas sanguinis fluente innatantes variisque, per ejusdem cursus, solidorum, & liquidorum motibus impetitas, solutas, attritas, eis sensim exui figurâ, magnitudine, locatione, quas exigit nutritionis negotium. Cumque in horum motuum vigore vitæ jura servantur; patet jam, formari naturaliter debere in sanguine ex nutritiis corpusculis, corpuscula ad nutritionem inepta: Ea idcirco ex humoris nutritii, ejusque vehiculi, seu sanguinis gremio naturaliter repudianda. Et ecce nova necessitas secretionis fluidorum à sanguine.

§. IV.

Insuper, posthabitis hisce secretionis naturalis exigentiis, adhuc tamen alimentares massulæ congeri in sanguine possunt copiâ revera majori, quàm poscat hæmatoseos penus, & nutritionis; sicque ex renovatis perenniter congestionibus plus, magisque redundantes, & inutiles fieri: Hoc ideo vel solo nomine foras à massa abigendæ. Addite, concretas jam solidorum compaginem, exutâ liquoris formâ, per multas alimentarias partes, abradi in dies, eliquari, abripique à sanguine, earumdem partium aditus omnes trajiciente, & in ejus mixturam no-

viter reaffundi : Quæ tamen , tamquam supervacaneæ , vel nocuæ , ab ejus mixturâ removendæ sunt. Et jam confirmata necessitas naturalis in animali secretionis fluidorum à sanguine.

C A P. II.

Diversitas fluidorum , quæ secernuntur in animali.

§. I.

REi nostræ institutum recrementitiorum potius , quàm alibi-
lium humorum mentionem postulat. Duplicis familiæ sunt
hujus generis fluida , quæ dictis de causis separantur à sanguine :
Palpabilia prima , seu sensibilia , proprio humorum nomine insi-
gnita : Impalpabilia altera , seu insensibilia , quæ adhuc , à variis
acquisitæ tenuitatis gradibus , effluvia , fuligines , aut flatus non-
cupantur. Prima compararem cum cineribus à deflagrante cor-
pore residuis ; aut fecibus à variis liquoribus naturaliter subsi-
dentibus : Assimilarem altera cum halitibus à liquore aliquo
ebulliente , aut fuliginibus ab igne accenso , aut vaporibus à
simplici fluido , exhalantibus.

§. II.

Quia sanguis per vasa densis parietibus circumtexta pererrat
in animali ; Primi generis fluida ab ejus complexu secedere ne-
queunt ordinariò , nisi illis in partibus , ubi idem appellens cru-
or , ampliora , quàm sint per vasorum hætenus peragratorem
parietes , ostia reperit , molibus scilicet partium secernendarum
transcolandis conformia. Hæce partes parenchymata vocarunt
antiqui ; eodem indè ab eisdem extenso nomine ad alias om-
nes corporis animalis , quæ substantiâ molli , & non fibrosâ , seu
in se ipsam non contractili componuntur : Recentiores autem
inverso solùm vocabulo , non magis elucidatâ structurâ , glandu-
las , easque ordinariò conglomeratas appellant. Alterius generis
fluida secretorio hoc in partibus artificio non indigent : Et reve-
rà , quoniam corporaturâ dotantur ultrà conceptum omnem exi-

liffima, facile per insensibilia etiã tunicarum vasa cingentium spiracula fugiunt à massa communi; indèque per porosam undique partium omnium substantiam transmeando, breviores propriis excursibus comparant vias usquè ad secessum è corpore. Sic in sect. 3. anatomia nostræ generalis ostendam transpirationis insensilis materiem, glandularum cutanearum ministerio non fungi ad sui fugam è corpore; prò ut hæc glandularum hujusmodi eludens occurfus, per quameunque partium soliditatem exhalare potest. Nèc asserto deneganda fides; Dum certissima est, & decantata hujus etiã materiæ per pulmonis telas trajectio; ubi tamén nullis assidentibus glandulis, transmissionem per solidam ejusdem visceris substantiam celebrari, quisque fatebitur. Sic eodem privilegio flatus per omnes corporis tractus expatiantur, nullo secernentium glandularum commercio.

§. III.

Dixi, fluida sensibilia in glandulis, seu colatoriis, *ut aiunt*, à massa generali ordinariò ablegari, ac per diversas vias ferri. Assertio hæc non excludit, liquida alia etiã palpabilia sequestrari à sanguine, absque glandulari interventu. Succus nutritii ad alimoniam partium secedunt à sanguine per lateralem transudationem. Siquidem in animali quidquid est, liquidorum, & canalium complexus est: Quidquid ideò nutritur, paries canalis est. Sanguis igitur ad principem hanc viventium functionem aspirans fistulas omnes, molles, aut duras perfluit. In ultimis harum finibus patula sunt lateralia millena foraminula, succis alibilibus admittendis conformia. Ex hisce ad replendos loculos recta via est. Hinc in canalibus gracilescentibus investientes tunicæ paulatim deponuntur. In ultimis tractibus tenuissima solùm tunica, & tamquam araneorum tela, rara, & porosa circumvenit. Lympha etiã ab humorum volumine ubique in animali sejungitur absque organorum secernentium munere. Non loquor de aliis ulteriùs secretionibus, tum in statu naturali, tum in præternaturali; in quo ultimo varii secernuntur latices per simplices vasorum aperturas insensiles, absque glanduloso concursu; ut in seri depluviis per partes, seu fluxionibus, *ut aiunt communiter*:

Insuper

Insuper in orgasmo, in metastasi &c. sed de rebus morboſis non fuit hîc sermo.

§. IV.

Fluida in glandulis ſecerni ſolita, duplicis claffis occurrunt; Alia ſcilicet, quæ tenuioris ordinariò ſunt conſiſtentia, quàm ſit in vaſis maſſa ipſa communis; Alia, quæ craſſioris. Et equidém, quoniàm univerſus cruor non tantùm elementis componitur quamplurimis diverſiſſimè figuratis, & quantis; ſed inſupèr & totâ naturâ diſparibus, ità ut ex eis quædam congruis ab agentibus comminuta, & diviſa, ſi à dictis removeantur agentibus, inſito niſu vel intèr ſe ſe, vel cum attiguis aliis corporibus in mutuos amplexus redeant, & coaleſcant; non ſecùs ac impuræ naturalibus olei, aut mercurii particulæ; Alia autém in fragmentulis attrita, & diſſociata, facilè mancant in tali diſſolutione; non minùs ac in rebus ordinariis lapidum in pollinem attritorum portiunculæ: Quod patet in ſanguine ab animali extracto, & in aqua ſoluto, cujus particulæ aliquæ invicem in filamentula neſtuntur, aliis in totali liquamine diſgregatis; Hînc ſequitur, fluida poſt varias motuum ſanguinis actiones, ut ſuprà, collifa, & immutata, ideòque ab ejuſdem ſinu in colatoriis ſejuncta, ſpiſſiorem, ultrà ſanguinem totum, conſiſtentiam induere poſſe, quotieſcunque eorundem integrantia niſum ad mutuam inter ſe ſe, aut cum aliis corporibus adherentiam conſervent; non minùs ac ſub tenuioris texturæ ſpecie repræſentari, ſi componentia trahant contraria indole prædita.

§. V.

Adnumerantur inter liquida tenuia à ſanguinis alveo ſejuncta, Urina, Saliva, Succus pancreaticus, Sudor, Lacrimæ &c. quæ ex particulis coagmentantur tum ex cibariis ſanguificationi, & nutritioni incongruis, tum congruis quidem, ſed copioſioribus quàm deceat, tum præcipuè jam pridem omni calculo ſanguinis maſſæ idoneis, & utilibus, ſed à variis ſenſim machinæ motionibus, immutatis, & ineptis redditis, ut ſuprà; præcipuè tamen mutæ implicationi, & concretioni non facilibus. Veniunt inter craſſiora Bilis, Semen, Mucus inteſtinalis, naſa-

lis, faucialis &c. quæ componentibus extruuntur prædicto caractere præditis, sed præsertim intricabilibus invicem facillimè; quæque idèò ramosa communiter, seu viscida vocitantur.

§. VI.

Intèr secreta à sanguine crassiora fluida, alia sunt, quæ à causæ extrinsecæ actione fortius indè crassescunt, præter intimam suam ad crassescendum dispositionem; ut mucus narium, materia excreatûs &c. quæ licèt in secretionē mediocriter tenuia, concresecunt indè notabiliter ab aëris respiratorii contactu; vel quòd aër subtiliores rapiendo, mobilioreque particulas, in strictiori cæteras attiguitate relinquat; vel quòd nitrositate sua utraque figat, & vinciat: quod modò non est ad rem determinare. Alia autèm, quæ ob intimam habitudinem suam absquè causæ extrinsecæ concursu incrassantur; ut bilis, de qua impræsens, quæ jam crassiusculam notabiliter corporaturam ducit in vasis suis; quæque idèò implicabilibus, seu ramosis invicem partibus coadunari apud omnes decantatur. Sic Neoterici Chemicis vocabulis sanguinis principia indicantes, omnemque ramositatem plicabilem soli tribuentes sulphuri, bilem deprædicant: *Contextum quoddam ex duobus sulphureis, seu oleosis principiis, uno à sanguine, altero immediate ab alimento; Quibus salia lixiviosa, acidaque mediocria implicantur; & serum in massa veterascens pro vehiculo concurrit.* Quibus Principiis addit famigeratissimus inter modernos Professor, *Franciscus De le Boe Silvius, & spiritus volatilis, & terre portionem.*

§. VII.

Colligimus ex dictis liquida per varia corporis colatoria è sanguine in diem secreta, essentialia non esse ejusdem massæ constitutiva, seu ad cruoris substantiam propriâ naturâ, intimaque præsentia non adeò concurrere, ut sanguis non nisi mera congregatio sit ex eisdem particulis biliosis v. g., urinosi, salivalibus, pancreaticis &c. quæ indè specialibus in incerniculis ab eodem successivè transcolentur. Et equidèm ea idèò secerni vidimus, quia sanguini aut illicò, aut post moras in eo contractas informia; aut quia nimia, & redundantia, idèòque nec ad intimam ejus compositionem facientia. Loquor de partibus
humorum

humorum secretorum essentialibus ; per quas videlicet differunt inter se se , non de communi eorum vehiculo , seu sero , quod massæ sanguineæ naturale , & necessarium componens , sicque cribrationi in eadem jam forma prævium , illis indispensabiliter impertitur à sanguine ad debitam fluiditatem concinnandam. Obscurissimus autem omnium hucusque ætatum , & scholarum scopulus , modus est secretionis fluidorum hujusmodi à sanguine ; quæ tamen , quantum nostra dictitet tenuitas , dilucidè explicandus veniat super secretionis hepaticæ exemplum : Quod ut faciliter assequatur , perpendantur primò super hac re authorum placita.

C A P. III.

Varia Secretionis Animalis Hypotheses :

§. I.

Obsoletis jam , supra rectrices partium secernentium intelligentias , seu facultates inanibus veterum commentis , duas hodiè in sententias generales dirimitur moderniorum popellus circa causam secretionis fluidorum in glandulis. Primi Chemicis phasibus auscultantes , humanoque accommodantes corpori , liquida quædam tenuissima , summèque energetica in incerniculis corporis omnibus stabiliunt à vitæ primordiis insita ; fermentaque vocant , quæ innata inde vi fluida quædam specifica à sanguine ibidem præterfluente secernere possint continuò , & debeant. Sed in modo explicando dissentiant inter se se.

§. II.

Quidam per excentrationem fermentum agere autumant ; latentes scilicet , confusasque cum aliis particulas speciales è massa laxata extricando , & colligendo ; non minùs ac ignis humidus extrahat partes à ligno ; aut coagulum vitulinum lacti immersum caseosa præcipiter principia : hoc ritu asserunt Fautores biliosas , v. g. particulas cum humoribus cruoris cæteris strictè implicatas , intimèque

intimèque demersas, à fermentitiis substantiis hepatis inquilinis electivè impeti; à quibus ideò tanquàm textura difformibus in motum vindicatae, tali expansivo cieantur nixu, ut à massa communi divelli debeant, & extrudi, in se se invicem aglomeratae.

§. III.

*Sylvius De
le Boë.*

Alii per generationem, & assimilationem; partes scilicèt propriè sanguineas in diversæ naturæ alias convertendo, similes videlicèt sibi; non secùs ac vini cantharum infusum in dolio aceti, convertitur in acetum. Et hoc de nomine volunt, Bilem jàm in exemplum vsurpatam conflare ex sanguineis propriè partibus, quæ ad hepar delatae, ibidèmq; cum bile indigena commixtae, facilè in ejusdem naturæ fluidum transformantur.

§. IV.

*Glissonius.
Cokburn.
& alii.*

Plures tandèm per naturæ familiaritatem, & identitatem; partes scilicèt solùm eas electivè alliciendo, seque ipsis consociando; quæ totali similitudine congruunt; eisq; affines sunt in pondere, figura, consistentia &c. cæteras diversæ dotis abigendo. Sic bilem transcolari in hepate, quia simillima bile à primordiis intincto; non in renibus v. g. urinæ solùm secretioni destinatis, quia sola vrina omni tempore imbibitis; non secùs ac, factò experimento, paginæ chartaceæ dimidia, vrina priùs imbuta, urinam tantùm transmittit, non bilem; altera verò pars bile priùs madefacta, bili tantùm trajectionem permittit, non urinæ. Hosce omnes Fermentistas appello.

§. V.

Alteri autèm mechanicis in re vivente quaquaversum affectatis, varias corporis glandulas, ut totidem cribriformes machinulas respiciunt: Et sicuti commune cribri instrumentum corpora apposita varia inter se se seiungit, quia quibusdam determinatæ figuræ, & magnitudinis foraminulis pertusum, per eadem trajicit illa solùm corpora ex traditis in sinu suo quamplurimis, quæ magnitudine sua, & figura cum dictis foraminulis concernunt; cætera dictis de titulis improporcionata, à transitu prohibet: Sic cum ex particulis copiosissimis mole, & figura disparibus

bus confarcinetur & sanguis, eandem & proportionaliter varietatem stabiliunt in insensibilibus glandularum meatibus; qua de re appellens ad eos cruor, varias in eisdem instituat fluidorum secretiones; prò ut scilicet diversè in meatuum suorum textura excavata est glandula, aut congeries glandularum una, quàm sit alia; adeò ut magnitudo v. g. & figura meatuum in glandulis hepaticis, correspondens solùm sit biliosis moleculis trajiciendis, quæ sunt in ratione dictarum dispositionum conformi, non autem percolandis partibus v. g. urinosis, quæ sunt in ratione difformi. Sic vicissim dicendum de glandulis renalibus non ad biliosas, sed urinosas solùm partes quadrantibus. Et quia cribrorum communium operationem promovet admotum agens, ea, aut receptas secernendas substantias, aut utraque commovens; Eadem analogiâ suffulti asserunt, in cribris animalibus liquorum secretiones urgeri à circuitûs impulsu, fluida quatiente, dictasque impellente ad partes, concussas pariter. Nec hanc reciprocam magnitudinis, & figuræ consonantiam stabiliunt solùm inter fluidum secernendum, & solidum glandulosum secernens; sed insuper & inter massam sanguinis communem, & idem solidum; adeò ut qui residuus est in glandula à succi peculiaris secretionem sanguis, ibidemque ab arteriæ termino eructatus, per eandem figuræ & magnitudinis proportionem inter particulas suas, & solidi porulos, venæ orificio accommodari debeat, eamque ad circulum perennandum subire. Hos poristas nuncupor. Cæteræ aliæ de secretionem animali hucusque strepitantes hypotheses, ad binas hasce reducuntur omnes, licet apparentes ducant diversitates.

*C A P. IV.**Rejicitur opinio Fermentistarum.**§. I.*

SI leviter titillas fermentistarum sententiam, fugacem illicò sentis, aut fatuam. Et equidem solutio sanguinis, seu in
B ejusdem

eiusdem partibus cohaesionum mutatio, fermento glanduloso imputata, abundantius exequitur à motibus ordinariis ejusdem fluidi, & solidorum præcipue; à cordis impulsu validissimo; à vegeto arteriarum elatere, à vi partium omnium oscillatoria; ab aëre pulmonico, à textura canalium, variisque tandem potentiis eisdem circumpositis. Datâ cæterum in glandulis insiti fermenti operatione in obvium sanguinem, solutione scilicet, ejusdemque particularum secretionem, adhuc petitur in pororum conformatione varietas; per quos scilicet aliquos secretus à reliquis derivetur succus, per alios residuus cruor; quæ tamen pororum proportio in glandulis ad secretionem ineundas, confutabitur inferius.

§. I I.

Si specifica glandularum fermenta riganti eas sanguini non immiscentur, jam non exercetur secretio; Si autem miscentur, vi statim circuitûs ad omnes corporis partes eis tranari continget; Sicque non erunt amplius glandularum peculiarium indigena; eorumque sic actio secretoria instituetur per omnes indifferenter partes, ad quas promiscuè rapiuntur.

§. I I I.

Absurdissima est, quia legibus circuitûs ex diametro opposita stabilis mota, & immota in organis inhærentia, quam tribuunt fautores fermentis glandularum incolis. In fluidorum omnium motu locali, recto, curvo, circulari, aliove, vita animalis est: Hæc interim succorum fermentantium quies in partibus, & à circuitu divortium, necessario admittenda veniunt à fermentistis, à quibus immò & stabiliendum est, sanguinem ipsum circumeuntem in glandulis omninò morari, & stagnare, quousque ab insito alteretur fermento: Quæ omnia animale ideò veritatem ingravant magnopere.

§. I V.

Insuper glandularum substantia, ut solidarum partium omnium in animali, canalicularis est, per quam intimè, continuò, & rapidè trajiciens cruor, brevi abstergeret, & verreret liquidum ibidem fermenticium totum; cujus inde nova à sanguine
secretio

secretio, & ad eandem sedem restitutio secretionem jam fieri posse convinceret absque prævio fermento.

§. V.

Et ecquidem, cum fermenta non sint glandularum partes solidæ, sed & fluida nascente sanguine ab eodem secreta, ac in peculiaribus glandulosis substantiis tanquam congruentibus domiciliis locata, ecce jam secretionem succorum à sanguine absque iis præviis esse semel factam, & semper idcirco fieri posse, nullâ iis habitâ gratiâ. Quod si ad hanc fermenti secretionem aliud concurrere fermentum asserunt propugnatores, ecce jam decernendum fermenti fermentum ad usque infinitudinem fermentorum. Sed hæc, & consimilia quamplurima apertissimam fermentorum fallaciam exhibentia, apud recentiores non paucos videnda linquo: Tanta nos hâc attulimus, quæ demonstrare sufficerent fermentum in glandulis peculiare liquido secernendo simile, aut dissimile tanquam in promptuariis stabulari omnino non posse, multoque minus ad secretionis ibidem perpetrandum negotium appellentem in sanguinem agere. Abundè satis, ut fermentorum idola à sanctiori medicina exulent.

*Pitcairius
dissert. de
circul. sang.*

*Laur. Belli-
ni oper. de
ferment.*

C A P. V.

Confutatur Poristarum sententia.

§. I.

NEc firmiori stant talo, quæ de varietate pororum in glandulis decantantur, ad varias secretionum regulas explicandas. Hæc hypothesis licet communius accepta, quia fermentorum commento simplicior, naturalique ideò rerum ordini conformior, multiplici tamen involvitur, eaque indissolubili difficultate; quam variis in punctis divisam breviter exhibeo.

§. II.

Et ecquidem primò, cribrationis ratio stare solum potest re-

spectu ad corpora cribro adposita jam disiuncta inter se se, & solum liberè attigua, ut est ex. gr. tritici granorum, aliarumque simul rerum acervus, non autem ad partes intimè unitas, & implicatas, quales occurrunt in animali particulæ sanguinis; quo in statu adhuc restat inquirendum agens à cribro distinctum, hæc partes ab intima cohæsiōe sejungens. Sic v. g. humor quiscunque morbosus sanguini immixtus secerni à massa non potest in colatorium aliquod, licet pluries per diem varia in colatoria pertranseat, nisi prius vel sponte, vel per remediorum actionem solutus fuerit à massa [quod concoqui dicitur] quo statu unà cum sanguine per varia indè hæc colatoria trajiciens, in uno exinde eorum aut pluribus, corpulentia suæ omnino, aut aliquo modo proportionatis, derivatur à sanguine.

§ III.

Ex stabilita etiam in glandularum poris amplitudinis, & figuræ proportionem cum secernendorum corporum mole, & figura; non exinde plus lucis effulget medicis rebus, quàm ex implantata per antiquos in colatoriis singulis ignotæ virtutis præsentia, aut ex fermentorum peculiarium excubiis mox expositis, ad dictas partes, per modernos locatis. Latet omnibus adhuc post acceptam hujusmodi sententiam, specifica componentium cujusque fluidi configuratio; per consequens & peculiaris partium cujusvis colatorii structura; adeo ut toto hoc systemate, nec biliosarum v. g. particularum figuras genuinas & moles attingere unquam possimus, nec colatorii sui structuram intimam, ejusque meatuum habitudinem.

§ IV.

Præterea, sanguis, donec in animalis canalibus naturaliter oberrat, veram fluidi naturam servat in omnibus elementis suis: Et porro cum per minutissima, sensumque omnem longè effugientia vasculorum capillamenta liberè secundum se totum derivetur, cogita jam quàm incredibilis in singulis ejus partibus tenuitas sit; quænam super alia fluida naturalia excedens in se toto fluiditas? nulla igitur ejus, minutissima licet, pars, & quæcunque partium porositate minor excogitanda venit, quæ non sit fluida

fluida; pro ut fluidum omne legitimum tanquam infinita partium parvitate pollens censeretur debet, ita ut, licet partes sanguinis plurimæ naturalem trahant implicationis indolem, quousque tamen per orbitam animale tranantur, summe expeditæ sint inter se, & solutæ. Atqui perspicuum est (ut benè adnotat Clar. * modernus) fluida non deponere figuram ullam propriam, & constantem, cum ea cuivis figuræ accomodent se se, & in quodcunque orificium penetrent, modò vires impellentes eæ sint, quæ cohæsiōnem partium fluentium ad occursum orificiī superent (& hæc auspicantur facilè in animali à magno cordis impulsu) sequitur idcirco quod, si fluida omnia ab animalis sanguine in statu fluido secernuntur, ut venit de facto, necessaria non est peculiaris figura in orificio excipiente, seu poro secretorio.

* Citatus
Pitcar. eo-
dem loco.

§. V.

Sed datâ etiam in minimis sanguinis insitâ habitudine specificæ configurationis & magnitudinis, à quarum diversitate, detur & in eisdem varietas: licet facilimè concipiamus proportionem inter particulas succi alicujus secernendi sphericâ circumscriptas figurâ, ac sphericos itidem secernentis partis, seu colatorii meatus, facilemque inde secretionem; difficilimam tamen, immò penè impossibilem percipimus congruentiam eandem in datis diversæ figuræ aliis fluidorum particulis. Et siquidem suppositâ v. g. moleculâ cubicâ in quadratum meatûs glandulosi orificium intromittendâ, non tantum requiritur, ut particulæ diameter æqualis sit diametro orificiī, ejusdemque trajiciendi corpusculi sectio in axe per planum orificio parallellum facta, æqualis sit & similis figuræ orificiī; sed insuper exigitur precipuè, ut quo ad latera & angulos sint similiter & unitissimè posita orificium & particula: Sic si quadrato orificio cubica occurrat particula, latus non obvertens orificio simile & parallellum, similiterque positum, aded ut eorum latus lateri, angulusque angulo exactè non congruant, sed latus angulo diversè impingat, angulus lateri; aditu per dictum orificium non donabitur. Unico itaque tantum modo, unicoque tantum

Ex citato
Authore eo-
dem loco.

casu congruere possunt, & in justa locatione correspondere secer-
nenda particula, & porus secretorius; dum innumeris modis, &
casibus in prædicta improportione occurrent invicem, ut patet;
& consequenter per totidem innumeras vices applicabitur orificio
particula congruæ molis & figuræ; trajicienda; quæ tamen nul-
lomodò trajicietur. Quod de cubicis dicimus succi transcolandi
particulis, id & habere de aliter quomodocunque figuratis: Sic
à transitu per specificum incerniculi sui orificium prohibebitur
corpus figuræ v. g. oblongæ, ut cylindricæ, ac naturaliter &
solum per exactam cylindri sui basim, aut apicem permeabile,
quotiescunque ejusdem pori aperturæ diversâ offeratur positione;
quæ tamen longè frequentior esse potest, quàm ordinaria; ut
pariter patet.

§. VI.

*Ex eodem
citato loco.*

Immodò non tantum difficilimè, & rarissimè liquidorum figu-
ratæ particulæ loculos subibunt congrui colatorii sui; sed facilè,
& frequenter in aliud incongruum, diversæque figuratum trajici
poterunt, mutata solum leviter positione: Sic idem conus v. g.
pro diverso situ suo intrabit porum figuræ circularis, parabolicæ,
ellipticæ, hyperbolicæ, triangularis &c. Quippe sub eisdem,
aliisque innumeris figurarum modis diversis, & æque eidem faci-
libus offerri dictis orificiis potest; pro ut data posituræ mutatio-
ne, totidem figurarum species emergere possunt ex cono dati
sectionibus, plano orificiî parallellis.

§. VII.

Denique non tantum manifestè constat, corpuscula liquido-
rum circulantium cujuscunque sint figuræ & positionis in orifi-
ciis pororum sphæricis liberè trajici posse, si similibus gaudeant
utraq; diametris; sed insuper per cujuscunque figuræ orificia
transvehi debere quomodocunque positas succorum particulas,
quarum major diameter minor sit, aut saltem æqualis diametro
orificiî minori: seu, quod idem est, quarum figura diversa com-
prehenditur in figura particularum humoris ordinariò secreti;
seu earum talis sit diameter, ut major, minor sit, aut saltem
æqualis diametro minori partium liquidi, ordinariò secreti.

Hinc

Hinc sequitur variorum succorum secretiones per easdem glandulas fieri posse; præcipuè verò cujuscunque naturæ & habitudinis humores secerni debere in illis glandulis, quæ fluida crassiora ex naturali instituto sequestrantes à massa, grandioribus hoc de nomine ditantur poris secretoriis; Sic in hepate v. g. crassioris fluidi, seu bilis colatorio, cujuscunque & generis fluidorum particulas trajici debere, pro ut omnes bilis componentibus minores, aut saltem non majores; Sic per consequens partes liquidi nervei (si detur) urinosi, salivalis, pancreatici &c. per idem viscus naturaliter philtrari; Quod tamen omnimodè rei veritati repugnat. Dixi naturaliter; quia cæterum frequens est, & manifestum, in statu animalis præternaturali, fluida in glandulis variis secerni, cum quibus nullam habent molis & figuræ proportionem. Sic in febre v. g. acuta per glandulas sæpè cutaneas particulae variæ eliminantur morbosæ sub forma sudoris, quæ de facto à materia ibidem naturaliter excernenda differunt naturâ & texturâ.

§. VIII.

Nullum itaque stabile fundamentum concedi potest viscerum secernentium poris, ad tot ineundas fluidorum secretiones, licet pori hujusmodi, stabiles, & sibi semper æquales supponantur: Quid, si poros instabiles, & sibimet ipsis varios esse, seu figuras suppositas suas naturaliter non servantes demonstrari posset? Nec hoc difficile demonstratur. Colatoria molles sunt partes, seu carnes; non osseæ, non aliâ quacunque substantiâ, soliditatem intimam suam immutabiliter servante, efformata: Facillimè ideo flexilia, contractilia, diltractilia, uno verbo ad motus quoscunque mutabilia: Loculi insuper in colatoriis ad secretionis operam destinatis sunt molles membranulae, cuicunque motui cedentes. Creberrimæ autem, quin imo incessantes, naturaliter sunt causæ, quæ partes hujusmodi, & loca in eis secretoria immutant. Fiunt nempe, vel à corporis totius motionibus, & flexuris variis; vel à novitatibus, & varietatibus impulsuum, cursuum, & molium liquidorum; vel tandem à diversitate oscillationum, & momenti sistaltici in fibris motricibus innumeris, quæ

quæ intima omnia viscerum occupant, præcingunt, & pressuris alternis alterant. Ex tanta, & tam varia principiorum immutantium actione incessanti deducite jam, quàm sæpius per vitæ stadia cedentes colatoriorum configurationes intimæ mutari debent; quam ideo frequenter in figuris suis naturaliter novitatem inducent pori secretorii suppositi, ut nullam unquam servare possint constantem formam: Quàm vana in consequens, & instabilis fundatio stabilis officii secretorii super figuras pororum internorum viscerum, qui omni certè vitæ momento naturaliter mutabiles sunt.

§. IX.

Hæc omnia falsitatis ream arguunt poristarum sententiam, eorumque placita in miseris contradictionum absurdis projiciunt absque refugio. Sed exurgendo jam ex hac impugnationum divagatione, quam, ut penitus exuerem super hac re recentiorum præjudicia, sat extense protrahere operæ pretium duxi; Undè-nam hoc secretionis principium? Evidens, mirabile, & simplex vobis statim sub oculis objiciendum despondeo, si prius animalis colatorii compositionem aliquantisper perlustremus. Et quia in præsentanei laboris scopum hepar destinavimus; id ipsum in scenam prodeat: Cujus textura, ut exactius reluceat nobis, præfixo quoddam ordine exponenda. Primò itaque hepatis partes externas considerabimus; secundò, vasa ejusdem lymphatica, & nervos; tertio, vasa cætera; quarto, structuram ejus internam enucleabimus, seu propriè parenchima, sit igitur.

CAP. VI.

Consideratur Hepar secundum partes externas.

§. I.

HEpar igitur; quod tanquam colatorium in animali, facile princeps, in secretionis explicandæ prototypum hic meritò præponitur; ab omnium ætatum authoribus sedulè, varieque exaratum

exaratum venit. Venerantur hoc viscus antiqui, ut reipublicæ animalis præsidem supremum, tradito ei aimathoseos ministerio, pro ut ex meseraicis liquidum nutritium per portam indè ad eum immediatè deferri, in cruorem ibidem concoquendum, autument. (quem hepatis usum Nuperus adhuc quidam * frustraneis ^{* suvam.} ^{merlam.} licèt auspiciis patrocinator) sed licèt circa functionem decepti, quod pertinet ad ejus exteriora sat tamen exactè delinearunt. Et equidem ipsorum descriptionibus debemus duas regiones hujus visceris in dextro hypocondrio locati, gibbam scilicet seu convexam, & cavam seu concavam; Primam superiorem, & diaphragmati contiguam, alteram inferiorem, quæ ventriculo, aliisque abdominis visceribus obvertitur; membranofum indumentum à contermino peritoneo propagatum; quadruplicem connexionem cum attiguis partibus; superius scilicet cum septo transverso per validissimum suspensorium ligamentoso-membranaceum ejusdem visceris substantiam profundè penetrans; inferius cum umbilico per venam umbilicalem in foetibus pulmonalis venæ, & canalis insuper alimentarii vices suppletem; ideoque immediatè portæ truncum, & medio canali venoso ad portas hepatis producto cavam inosculantem; natis autem in ligamentum induratum. Dextrorsum cum ampla peritonei area per plura, ac brevissima stamina, in unum coadunata, ab ipsamet visceris succingente tunica producta: Nos connexionem hujusmodi, dextrum hepatis ligamentum vocamus, quod aliis brevius quidem est, sed latius; ac post tria alia hepatis ligamenta jam nota, quartum nominare ligamentum hujusmodi consultum duximus: Hoc cæterum ligamentum, in omnibus animalibus obvium, & necessarium, à nemine hucusque adnotatum legimus. Sinistrorsum cum xiphoide cartilagine medio robusto quodam ligamento. Adeo ut æqualibus, & sibi invicem oppositis circumquaque libratum retinaculis, superiori, inferiori, dextero, & sinistro, viscus tam grande, & ponderosum, ut super alia omnia viscera hepar est, de sede sua non deturbetur in variis corporis motionibus, posituris, & violentis plurium animalium cursibus, sed propriis in ponderibus immobiliter sedeat.

* *Protospatharius.*
* *Lobulus Spigellii.*

* *Glissonius.*

Fissuram insuper eius, in quam vena umbilicalis admittitur portam inosculatura, aliasque minoris momenti fissuras & sinulos; varias ejusdem extantias, totidem tanquam lobos representantes, quas à contracta similitudine mensam nominabant, gladium, unguem, portas; hasque ultimas in dexteram & sinistram à prædicta figura distinctas; vel apud * aliquos mutato nomine focum, mensam, cultrum, & aurigam; Lobulum insuper * eminentiorem ab aliis disjunctum, laudatæ fissuræ, & juxta portas adjacentem; Venas ulteriùs, cavam & portam eidem implantatas: Primam asseriebant ex convexa ejus parte pullulantem, subtiliorem ex eo sanguinem ad cor deferre; alteram ex concava exortam, crassiores sanguinem ad viscera abdominis deorsum vehere, eodemque alveo receptum ab intestinis nutritium laticem sursum ad hepar ferre. Hæc aliaque, hepatis propria exactè satis pro temporum caligine descripserunt; nosque hîc in levem solum acervulum conglobavimus, pro ut ab instituto nostro non nimis expetita. Castigatissima commentaria circa hepatis locationem, molem, figuram, connexionem, extensionem, partes, aliaque omnia ad organicam ejus constitutionem extrinsecam facientia, eorumque causas, & habitudines, relucet apud Virum inter saniores Modernos * celeberrimum; quæ ideò rursus, pro ut in aureo illius opere facilè obvia, libenter hîc omittuntur.

C A P. VII.

Describuntur vasa Hepatis lymphatica, & Nervi.

§. I.

Sed præclariore de rebus jecorariis notitias debemus recentiorum indagini. Quippe circa medietatem elapsi seculi, eodem anno, eodem laborum prætio, eodemque quasi superûm afflatu,

afflatu, quatuor meritissimi * Viri dissitarum regionum incolæ, ad eadem in hepate nobilia collimarunt inventa. In Brutis vi-
ventibus vel recenter strangulatis, simplici ligaturæ artificio, ru-
dimenta observarunt vasculorum quorundam, num. 5. 7. aliquo-
ties 10. immò, & interdum 20. ex hepatis cavo pullulantium;
indeque eorundem ad portæ, & ductus biliarii latera prore-
pentium, eisdemque canales tanquam annulatim amplexantium
progressus; tandem & insertionem per peritonei & mesenterii
duplicaturam & anfractus in chili cisternam, variè stipatis in
itinere ramis portæ, variisque superatis glandulis. In homine
conspicua etiam reddiderunt hæc vasa injectione aquæ per por-
tam, & cæliacam dextram, ope siphonis copiosius peracta; ea-
que à pellucido devedto naturaliter liquido, vasa hepatis limpha-
tica, seu aquosa noncuparunt. Dum autem majora clarissimi
homines in hujus visceris structura ruspantur, minora determi-
nant in ejus usu; adeò ut exploratâ tandem hepatis fervili pro-
sapiâ, proscriptoque roris chilosi commercio, eum è corporis
principatu deturbant, abolitâ ejusdem sanguificandi potestate;
cujus extinctæ functionis funera lepidâ satis inscriptione celebrat
inter eos principalior. *

* Th. Bar-
tholinus Da-
nus. Rud-
beck. Sue-
cus. Bilsius
Belga. Iolik
vius. Ank
glus.

* Th. Bar-
tholinus Hi-
stor. nova
limphaticor.

§. I I.

Clariora insuper hisce novitatibus superstruxit dexterrimus
inter Anatomicos Hollandos: Cultri siquidem sui diligentia præ-
tulit nobis vtramque hepatis faciem convexam, & concavam
numerossimis coronatam limphaticis, ita ut ad convexam solum
partem 300. ad minimum adnumeraverit: Ex hac autem regio-
ne exurgentia prosequens hæc vasa, propè ligamentum suspen-
sorium unita percipit, eumque decem, vel duodecim ramifica-
tionibus perreptantia, limphis hinc suis ad chili reservatorium
translatis. Præcipuè autem animadvertit limphæ-ductus cystifelleæ
à laudatis Authoribus adscriptos, ex hepatis substantia verè
egredi, ipsius tamen folliculi oram extimam superscandere,
glandulæque ad ejus collum locatæ in traiectione omnes incum-
bere tanquam fulcro. De intimiori insuper quam darent præ-
dicti novatores, in hepatis corpore limphaticorum origine effari

* Nuck. lib.
de inventis
novis.

* Courrial.
Tolosanus
lib. Obser-
vations sur
les os & au-
tres mala-
diés.

cæpit hic author; eandemque conjecturam jam antea allegaverant alii; Quod nuperrimè ampla observatione elucidatum fuit à Gallo quodam * Anatomico, qui vasa lymphatica in capsula Glissoniana contenta ad tres digitos intra hepatis substantiam ipsam insectatur; quorum inde ductuum in hepar penetrantium originem deducit à glandulis conglobatis ad tunicam internam pori biliarii per hepar diramati intertextis, ac microscopio patentibus in animali grandiori. Si accuratis super hac re tantorum hominum perquisitionibus superaddere licet aliquid nostrum, dicam in canibus majoribus post amplas comestiones strangulatis, ac in mactatis suis vasorum horumce habitudines circa viscera sæpius, & hepar præcipuè, attentissimè inquisivisse, Hinc.

§. I I I.

** Steno
Malpighius,
alii.

Observabam primò profundas satis in hepatis substantia origines agere aquæductus hujusmodi, pro ut scilicet non in capsula communi, sed supra ejus dorsum repentes per quinque aut sex digitos nec ulterius, insequerbar; cultri scilicet & visûs aciem eis indè omnino effugientibus: Qua de re jam elucebat mihi, nullimodè ex glandulis hepatis conglobatis ad ejus cavam sitis, muccosis per aliquos dictis, oriri seriffua hæc vasa, ut plurimorum * est assertio: Et revera præter diversum perspectum principium, patet de facto non in omnibus animalibus, immò nec in omnibus ejusdem speciei individuis ad hepatis concavum glandulas semper interni conglobatas: Cùm tamen in omnibus animalibus præsentia sint hepatis lymphatica: In quibus autem observabiles sunt hæ glandulæ, easdem solum superfcandi à lymphaticis, non intimè penetrari, manifestè adnotavimus.

§. I V.

* Courrial,
& ante eum
alii.

Constabat insuper nobis ex glandulis ipsis gracilibus in cavitate capsulæ à * quibusdam suppositis ortum non ducere hæc vasa; hocque tum autopsiâ, pro ut extimam solum ejusdem capsulæ superficiem perambulant, ut suprâ; tum ratione, eo quod scilicet nullum vas lymphaticum nascatur à glandula, sed ab ipsismet fibrillarum intervallis in Partibus animalis omnibus, (ut
fufius

fufius demonftrabimus in *Anatome noſtra generali ſect. 15.*) ideoque aſſerendum eſt ſeriflua vacula hepatis ſubſtantiam ſubeuntia, ex capsula declinando commiſſuris glandularum hepaticarum inoſculari, ibidemque liquidum ſuum exugere, foras indè à viſcere derivandum. Et equidem.

§. V.

Obſervabam tertio vafa huiusmodi omnia denſiſſimè ab hepatis cava illa parte prodire, in qua aperitur capsula ad portæ ingreſſum, exitumque ductûs biliferi; indeque tanquam viminum ramuli ex conſtricto faſciculo quaquaverſum erumpentes, in amplius ſpatium expandi, ac tanquam in duplex diſtinctum agmen collecta, chili in receptaculum excurrere per duplicem calcatam viam; unam ſcilicet per apicem quendam pancreatis verſus hepatis cavam inclinatum, eique mediâ membranulâ connexum; & ab hac pancreatis portione per attiguum meſenterium uſque ad dictam cifternam; alteram, per membranam quandam peritonei ſobolem, ab intestino duodeno uſque ad hepar inſtar iſthmi aut pontis protenſam, vafaque hepatis majora tum devehentia tum revehentia fulcientem; & ab hac etiam per doſum inteſtinorum & meſenterii uſque ad reſervatorium prædictum. Quæ autem numeroſa lymphatica ſuper convexam hepatis partem ſerpunt, ex ſola extimæ ejusdem membranæ ſubſtantia ortum trahunt, non minus ac copioſa ſunt in aliis omnibus corporis tunicis; eaque vere nuckianum iter ſuperius allatum per ſuſpenſorium nempe ligamentum attingunt uſque ad glandulas lumbaras. Quorum inſuper aliqua per latera ligamenti lati ſuſpenſorii aſcendentia, liquidum ſuum immediatè in cavam eructare etiam poſſunt; ut arridet Cl. *Reverhoſtio*, lymphæductus cypſis felleæ prædicti huic etiam categoriæ adnumerandi veniunt. Germanos cæterum hepatis lymphaticorum aliarumque partium icones exponam in *Curſu meo anatomico*; ubi etiam *ſect. 15.* lymphaticorum omnium in animali, ſicque & hepaticorum, eorumque liquoris uſum elucidabo.

§. VI.

Quod nervoſarum in hepate diramationum hiftoriâ pertinet, * *Vöillis Vieufens.* eam etiam duorum celebrium * Modernorum laboribus debemus.

mus. Sex ab eisdem graphicè describuntur fibræ nervæ à plexûs intercostalis semilunari, ad diaphragmatis perforationem diramatae; quarum tres vesiculæ felleæ ramisque ductûs biliarii impertiuntur, fistulisque eisdem concutiendis inservire asserunt; cæteræ arteriam hepaticam ad instar reticuli circumligant, motum laticis per eam excurrentis regentes tanquam habenæ. Ex harum indè ac fibrillarum octavi paris dextri concursu plexus efformatur hepaticus, ad totum indè jecur distributus, qui fibrarum fasciculis quaquaversum expansis, cum plexu lineari, mesenterico, aliisque abdominis communicat; præcipuè autem cum stomachico sursum circa pilorum, & orificium superius ventriculi, densis elatis propaginum turmis; ex quo invicem nervoso hepatis, & ventriculi commercio mutuum & horum viscerum consensum respectu ad affluxum bilis ex vomitu, & vomitum ex affluxu bilis, trahunt laudati authores. Sed de usu nervorum hepatis, non minus ac partium animalis aliarum omnium, fusius & rectius quàm hucusque decantatum fuit, forsan differemus in *Cursu nostro anatomico. sect. 22.*

CAP. VIII.

Describuntur cætera Hepatis vasa.

§. I.

* Glissonius.
Malpighius.
Kerkringius.

ALii * ad suæ quoque venatum gloriolæ, ulteriora hujus visceris excutientes, in intima ejus structura sub oculum exponenda insudarunt; cujus rei elucidationes assumpto nostro plus faciunt, quàm exposita prædicta. Dupliciter considerata venit intima hepatis figura, seu compositio; vel scilicet respectu ad distributiones & complicationes vasorum, quibus abundanter refer-tum est totum ejus corpus; vel respectu ad genuinam ejus substantiam, per quam hepar est; aliisque à visceribus distinguitur.

* Glissonius.

Primam super alios omnes dexterrimus * Anglus spartam exornavit; qui scilicet, jecoris complexu variis excarnandi modis, mi-
roque

roque dexteritatis exemplo, in minutissimas ductuum diramationes deruncinato, habitudines ultimò sensibiles, & itinera exporrigit vasorum ejusdem visceris specialium portæ, arteriæ, ductûs excretorii, & cavæ, Nonnulla post doctissimum virum adducenda incumbunt, circa hæc vasa.

§. II.

Venam Portæ ad arborem conferre, legitimè placuit antiquis. * *Galeno, & affectis.*
 * Et equidem conspicuam perhibet hoc vas radicum formam, in principiis suis per abdominis viscera longe, lateque dispersis; trunci notabilis structuram, amplo eo in sinu, quem ex coëuntibus invicem radicibus omnibus compositum ducit ad jecoris ingressum; ramorum tandem habitudinem, in quinque propagini- bus à dicto stipite ad varias hepatis regiones pullulantibus, surcu- lisque innumeris ab eisdem indè per substantiam visceris, quaquaver- sum dimissis. Retrogradam tamen distributionem portæ, de- scripsere majores nostri; positis scilicet in hepate radicibus; trun- co indè ex eis coalito in duos ramos insignes, disparilesque dif- fuso, ad instar primæ arborum divisionis, in venam scilicet mese- raicam & splenicam; ex quibus indè rami per viscera densissima distribuuntur: Et hanc revera dispositionem asserere in porta te- nebantur, qui ab hepate per eam ad alias abdominis partes san- guineum existimabant tranari profluens. Nos conscii, portam per capillamenta sua sanguinem totum viscerum naturalium residuum haurire, caudiceque indè collectum suo, superato hepatis cavo, per ejus penetralia deferre, bilioso ibidem immixto inquinamento spoliandum; præter expositam distributionis suæ translationem, eandem omni jure de officio atque dignitate arteriæ participan- tem decantare debemus; tanquam videlicet, ob vectionem san- guinis ad hoc viscus, venæ ordinariæ conditiones excellentem; sed à venarum numero prorsus adimenda tamen non est porta, quæ sanguinem ab arteriis in partes depositum ebibit aliarum ve- narum ritu; & ad circuitum revehit: Decernamus itaque inter- venas & arterias mediam seu, medietatem portæ proprio arteriæ munere fungi, medietatem aliam solum venæ officium exequi; inferiùs scilicet venam esse, superiùs arteriam. Porta siquidem à princi-

principiis suis usque ad truncum refert, & abducit sanguinem à partibus, à pancreate, ventriculo, epiploo, mesenterio, & intestinis, ut cava in aliis partibus; per radices suas in trunculos sensim majores colligit, & tandem in truncum refert: Postea ex trunco suo receptum sanguinem adducit, & defert ad partes per propagines ex trunco sensim gracilescentes, instar aortæ, aut pulmonalis arteriæ: Tum aliquid indè separatur à sanguine, per propagines suas ad partes devecto, qui postea ab vase venoso, seu vena cava excipitur; ut in aliis omnibus animalis partibus venit, respectu ad arteriosum sanguinem. Porta ulterius, qua ejus regione vices arteriæ adimplet, tunicas in arteriæ modum crassiores, & tanquam tendineas assumit. An etiam arteriarum in modum pulset, ut nonnullorum sententia est, nequaquam agnoscitur. Ligatâ etenim arteriâ hepaticâ, nullum amplius per hepar, aut portam vigere pulsum, in vivis canibus experti sumus. Insuper sanguis venæ portæ, colore, & consistentiâ valde discrepat à sanguine arterioso, & motu præsertim progressivo; ut levissima esse debeat portæ cum arteria comparatio. Sed melius de hisce omnibus inferiùs.

§. I I I.

Nec solùm resonarunt apud antiquos vena portæ ejusq; propagines, pro plastro sanguinis ab hepate ad viscera cætera in eorum alimoniam delati; Sed ulterius & pro communi dissimilium humorum emporio. Posuere nempe; quod ab intestinis ad hepar per hæc vicissim vasa deportaretur chylus, hæmorrhoidalem obeundus; succus gastricus per ejusdem venæ appendicem, seu vas breve, à liene in stomachum veheretur ad excitandam famem, melancholicus autem liquor per hæmorrhoidalem internam, ejusdem pariter sobolem, ac ordinario à ramo splenico pullulantem ab eodem liene ad anum in excretionem divergeret. Sed confusas hæc omnes succorum ambulationes in porta circulationis auctoritas delevit; edocens unanimiter ramos portæ collectum in cespite sanguinem ad hepar ducere; Sicque [ror jam chilofo per vias alias ad sanguinem translato] nec melancholici humoris florem à liene ad stomachum ferri per vas breve;
nec

§. IV.

D

 $\tau x,$

tæ, legitima huic visceri denegatur arteria, Et si quidem dexter cæliacæ ramus, pergrandis satis, & notabilis, jecoris cavum subit, ejusque ambitum omnem diramationibus perambulat suis: Hasce universas in vasa solum hepatis, seu potius in eorum involucra unicè impendi, ibidemque terminari, pluries ostendi in anatomicis administrationibus meis; insequutus per profundos hepatis tractus cæliacæ propagines, easque per solas grandiorum minutiorumque vasorum omnium tunicas, repentes observatus: Falsum est per consequens quod in vasis solum biliariis inserantur arteriosæ hæ soboles in jecore; ut arrisit * aliquibus. Per hæc igitur vasa devehitur competenter sanguis ad omnes hepatis partes, congruus nutritioni, aliisque muniis, quibus aptus natus non est venosus cruor portæ; Et sufficientem totius hepatis alimoniam ex sola arteriarum propagatione per ejusdem vasorum tunicas, concipies facile, si concipis nil alio donari jecoris corpus, præter vascularem texturam; quod inferius ostendemus.

§. V.

Ductus hepatis excretorius, seu porus biliarius, fluidum in hepate à sanguine secretum excipiens forasque à viscere derivans, non dissimili, ac porta gaudet divaricatione ramorum, qui ex omnibus hepatis partibus reducentes se se ad hepatis cavum, in ampliores jam sensim trunculos coaliti, unicum tandem ibidem conformant stipitem, ad duodeni indè finem, seu principium jejuni productum, ibidemque liquidum eructantem devehitum suum. Si glandulis disgregatis, aut congregatis scateat, aut non scateat, intima hujus canalis excretorii facies, aut media substantia, perito * cuidam anatomico inquirendum relinquo. Principaliora interea hîc non afferro, circa hujus vasis habitudinem, eadem in sequentibus satis expositurus.

§. V I.

Sanguis tandem per totum viscus effusus, & à biliosa secretionem residuus, per numerosissima venarum à portæ propaginibus distinctarum capillamenta devehitur usque ad aliquot ejusdem generis trunculos, plures aut pauciores, secundum diversa animalium genera, è quibus indè asportatur in truncum cavæ, trajicientis

cientis per hepatis foveam, ad hoc idè opus in regione ejus ima, & postica, expressè excavatam. Vasa hæc omnia prædictaque limphatica, & nervosa [exceptis venosis ductibus ab hepate ad cavam sanguinem deportantibus] non tantum pari passu, paribusque diramationibus excurrunt; strictaque invicem contiguitatis adhærentiâ perfruuntur per totum ramorum ac ramusculorum tractum usque ad ultima stamina; sed insuper communi tegmine, tanquam vaginâ quaquaversum involutâ, in dicta invicem connexionione firmantur. Indumentum hoc commune, ex tunica hepatis à peritoneo oriunda prognatum, primus detexit laudatus * Vir; Capsulamque idè communem hepatis vocavit; * *Glissonius.* quam rete musculari compositam volunt Moderniores aliqui. Imò legitimum musculus, ad omnes portæ, & ductûs fellei diramationes, itinera, & concursus elongatum, & advolutum; ut non tantum momentis fistalticis suis, sed & contractilibus muscularibus suppleret defectui pulsationis in porta; trusiones idè promovendo in concursibus, & canali excretorio, respectu ad liquida contenta, secreta, & per diversas hinc vias promovenda.

§. VII.

Quoniam autem introitus in hepar ramorum cavæ ad posticam, & superiorem ejusdem visceris faciem conspicitur; Ingressus autem portæ, ejusque propaginum ad ejus sinistrum latum, seu concavæ regionis centrum, eademque inde directionum proportionem in minutissima per totum organon diramationum stamina sobolescent hæc vasa; Sequitur necessariò, quod Cavæ radices in quacunque hepatici parenchymatis portione, cum ramis portæ ea habitudine concurrere debeant, ut se se invicem transversim, seu ad rectos Angulos, aut saltem in decussim quamdam intersecant: Quod pluries deglubatis exactè hujus visceris Canalibus observavimus; ac discipulorum litavimus curiositati: Quodque luculenter etiam habemus à commemorati * Authoris * *Glissonius.* paginis, & præcipuè ab ejusdem iconibus, nitidam horumce Canaliū distributionem in hepate excarnato repræsentantibus: Quibus, & alias apparenter diligentiores ad eandem demonstrationem nostram collimantes addidit recentior * *Anatomicus; ultimo* * *Kerkringius.*

timò nempe sensibiles hepaticarum diramationum minutias præ se ferens. Hæc dispositio, in hepate, ramorum Cavæ cum porta multum res nostras elucidabit; ut mox videbimus.

C A P. IX.

Describitur Hepatis structura interna, seu ejus parenchima.

§. I.

PERGO Jam ad alteram partem structuræ hepatis internæ, seu propriam hepatis, & principalem substantiam. Citatus ** Glissonius.* rerum hepaticarum ** indagator* ab ultimis Cavæ, Portæ, Pori biliarii, aliorumque vasorum in Hepate diramationibus mutuas inosculationes seu anastomoses absolutè rejicit; indeque medians inter horum Canaliculorum terminos, parenchima collocat, seu propriam hepatis substantiam, in quâ ideò immediatè stabilit biliaris secretionis organum, pro ut in eadem, à sanguine ramorum portæ attracta bilis, ductuum inde excernentium principia subeat ibidem contermina; residua interim ac defæcata Sanguinis portione, per illic etiam correspondentem radicem Cavæ, ad ejusdem truncum derivata; Ab intima hinc hepatica compositione, dictæque functionis modò exponendis se se suaviter eximit. Nec in hunc scopulum allidens, meliùs expedit se se Famigeratissimus apud Nationes omnes Doctor ** Bononiensis*, qui ab alio prætermissa prædicta nec majori elucidationis face donavit; lobulis licèt suis in medium adductis, totumque hepatis corpus complentibus, qui in acinos inde dispertiantur exagonos, conflatos tandem ex subovalibus glandulis, quas intrent omnis generis capillamenta vasorum. Et certè si mente præjudiciis libera res attentè perpenditur, jure omni judicabimus virum cæteroquin præclarissimum; nil in hepate innovasse præter novi vocabuli introductionem, glandulam scilicet appellando Colatorium bilis, quod hætenus sub parenchimatibus nomine accesserat; ut alibi annuimus.

§. II.

§. II.

Data solidorum omnium corporis animalis Canaliculari texturâ, adeò ut nulla assignari in eodem possit pars propriè (ut aiunt) continens, & durior, quæ ex tenuissimis, varieque productis vasculis aggregata non sit; ut acceptum est apud recentiores omnes; Sequitur, & partes omnes, quas glandulas vocitant, ex variè implicatis Canalibus Germanè confarcinari; Sicque, & hepatis parenchima glandulæ conglomeratæ nomine donatum nuper, non nisi ex vasorum Capillamentis glomeramen esse. Hæc vasculorum stamina glandulæ hepaticæ corpus intimum conglobantia, à tribus solum vasorum speciebus propagari possunt, Cavâ scilicet, portâ, & ductu excretorio. Et revera limphatica in hepate, non à glandularum substantia, sed ab earum interstitiis enasci, superius exhibuimus: Nervi nullam trahunt propriè Canalicularem structuram: Dextræque cæliacæ Soboles solas vasorum tunicas lambunt in hoc organo; Nec ulteriora in hepate vasorum genera.

§. III.

Quoniam autem, ut vidimus superius, Cavæ, & Portæ ramos, majores, mediocres, minores, & minimos in quocumque hepatis lobo, & lobulò transversè ordinariò concurrere, seu rectè intersecari, aut saltem decussari observabamus; eandemque, ut plurimum, habitudinem servari, quousque cultri indaginem visus acies insequitur; ideò est quod in primis editionibus Historiæ hujusmodi hepaticæ similem etiam concursum vascularem conjectabamus in insensilibus earundem venarum propaginibus & in ultimis quoque capillamentis; adeò ut deventa jam mens ad illam compositionem glandulæ, ubi sunt vasorum termini, suadere sibi non inutiliter potuerit, osculum principii Cavæ lateraliter concurrere cum fine ultimæ propaginis portæ; concipere in consequens cruorem à porta derivatum non fluere directè in Cavam, seu per duos meatus rectilineariter communicantes; sed per duas lineas angulo recto, aut saltem affini ad se se invicem productas; seu per duos hiatus aut transversè, aut quasi transversè oppositos.

Cum autem per partes animalis distributiones vasorum exactè unquam regulares non sint, seu certum ordinem castigatè servantes; In Hepate præcipuè, ubi diramationum multitudo earum etiam confusionibus manum præbere potest; ideò laudati concursus per ultima vasorum stamina variari etiam possunt. Revera, licèt per Hepatis partes trunci, & majores rami venarum portæ, & Cavæ in angulos, aut decussationes plerumque conveniant; minores tamen furculi, & insensiles præcipuè, variè forsan ludent in tractibus suis irregulariter inflexi aut modis millenis incurvati, ut indè sit, quod eorum sat plurimi in oppositum non veniant reciprocè, aut decussentur, ut alii; sed curvè, aut rectè incumbere, aut etiam in parallelismos quosdam componi, apti nati sint. Quas ideò promiscuas dispositiones si ad ultimas usque diramationes producamus, fines canalium sanguiniferorum Hepatis per varias etiam indiscriminatim habitudines concurrere posse, directè, transversè, ad angulos acutissimos, ad variè figuratas indifferenter flexuras, quis inficiabitur.

§. V.

Rami omnes pori biliarii, non minùs majores, quàm minores, & ultimò gracilescentes, variant habitudinem cum portæ ramis, nec ramorum Cavæ tractus æmulantur: Hi nempè portæ furculis inalterabiliter paralleli, communem directionem prosequuntur; pari passu, paribus divisionibus excurrunt; immediatè ubicumque accumbentes, communique cum eadem amictu per totum hepar arctè, & inseparabiliter devincti. Ideò eorundem principia ad acutissimos angulos, seu ultimas plicaturas ubique cum portæ finibus convenire verosimile est, nisi conjecturis in prima hujus historię editione productis suffulti asserere velimus, radicem ductûs excretorii hepatici per eandem lineam directam cum fine furculi portæ continuari posse, non obstante hoc eorum parallelismo; ut ideò succus à porta in excretorium derivatus, fluat per viam rectilineam, seu per meatus directè obvios; dummodo concipiatur, ramum quemcumque hujusmodi excretorium non cum socia sua, eumque indè insensibiliter comitante, portæ propa-

propagine inofculari, sed cum aliâ oppositæ directionis, seu ad oppositam hepatis partem excurrente, & cum alio canali excretorio sensibilibiter sociatâ.

§. VI.

Sed quid in nugis hujusmodi insistemus, diramationes, & concursus adducentium, & abducentium vasorum hepatis inaniter perquirentes? Præstat solum, reconditum illum concursum inferentium vasorum & referentium per viscera animalis, colatoria dicta, mente convenire, & supponere; seu locum illum communem, & trivium inferentis vasis, & duorum referentium. Quomodocumque jam loci hujusmodi figura, commensuratio aut capacitas stabiliantur, perindè est. Concurrent jam directè respectivè, & transversè vasa hujusmodi in glandulari recessu, ut spatium concursûs instar quadrati concipiatur; aut ad latera æquidistantia vasis hisce concurrentibus, interjectum commune spatium tanquam spherioideum supponi debeat; aut fistulæ hujusmodi glandulares in parallelismum positæ, acutissimè coëant inter se se, seu ad ultimam possibilem flexuram, adeò ut unionum communis locus formam oblongam retineat cum latere ad vasorum ostia opposito, incurvato. Concurrent mille aliis modis, mentis quacumque acie effingendis, glandulæ immissaria, & emissaria: Advocentur ad censum Ingeniosissimæ concursuum hujusmodi configurationes variæ a *Cl. Verheienio* excogitatæ, & depictæ; Repræsententur hinc animo possibiles omnes loculorum glandularium varietates, quibus directiones variæ, aut flexuræ ad cursus liquidorum segregabilium offerantur; Hæc omnia nihil prorsus ad secretionis negotium conducere, & absque tanta instrumentorum secernentium multiplicitate, imò absque hoc glandulari interventu, simpliciiori quodam ordine, & modulo secretiones omnes viventium fieri, demonstraturus jam sum; seu præviam jam esse ad quoscumque incerniculorum apparatus organicos, liquidi specialis secernendi secretionem; nec ideo liquidorum secretorum differentias à dissimilibus glandularum structuris auspicias.

§. VII.

Quamobrem, sicuti, quæcumque supponatur in glandulis intimæ configurationis, aut commensurationis proprietas, hanc speciales ex se sola elicere liquidorum secretiones non posse, sic etiam, quicumque supponantur in glandulis diversi vasorum concursus, hos non ad secretionem, sed ad meram secretionum jam laticum ulteriorem distributionem esse positos, inferendum venit. Accedamus ideò jam ad tantum opus, seu modum secretionis liquidorum animalium ejusque locum aperiendum; ut inde descendamus ad hepaticam enodandam secretionem; cui certè hujusmodi investigationes omnes collimant: Talo idcirco firmiori in imperviam huc-usque provinciam peragraturus, liceat primò secretionem liquidorum à liquidis in inanimatis non-nihil perpendere; postmodum in vegetabilibus; hinc genericè in animali; tandem speciatim in hepate, & obiter in aliis etiam visceribus.

C A P. X.

Exponitur secretio liquidi à liquido in inanimatis

§. I.

DUplex est in inanimatis secretio liquidi à liquido: Alia, quæ sponte venit in mixto, & ex interna potestate, absque interventu secernentis instrumenti extrinseci: Alia, quæ sponte non venit, seu per merum principium, mixtis secernendis intrinsecum, non fit; sed per vim extrinsecam, seu applicitum instrumentum secernens.

§. II.

Quæ sponte in mixto inanimato, & à momento eidem insito procuratur secretio, vel venit in liquidis jam pridem se-junctis in diversas moles, & dissimilibus, postea ab agente extrinseco simul confusis, & immixtis, quæ nec congeneres minimorum suorum superficies, nec similem cohesionum nisum gerentia,

gerentia, ablatâ confundente, & immiscente causâ, adeò segregantur per se se, ut in eodem recipienti liquida una alteris distinctè supernatent, & in diverso contactu locentur; ut venit in mixtura olei & aquæ communis: vel est in fluidis post longum tempus sociatis, & amicè ad unum individualiter mixtum intrinsecè compositis, sed ob mutatas in toto composito cohesiones, aut per motus quosdam novos introductos, aut alicujus turbantis intromissionem alteratis, & in degeneres contactus dispositis; Qua de re sponte etiam disjungantur; ut in musto, aliisque liquoribus fermentantibus.

§. III.

Quæ autem in liquoribus inanimatis per principium extrinsecum secretio principaliter venit, seu per interventum instrumenti secernentis, vel est in mixtis, quorum principia jam à prima compositione intimè inter se se unita, licèt diversæ naturæ sint, una tamen juxta alia, cognatis inter se se superficiebus locata, tacitè, tanquam in centrum commune cohesionis, quiescunt, nisi dissimilibus non exercitis: Hinc non nisi activiori secretorio instrumento disjungi invicem possunt: Ut mixta, quæ per ignem chemicum in liquida componentia sua sequestrantur: Vel est in succis, qui priùs disjuncti, postea immixti, licèt adhuc in particulis suis naturalem divisionem servant, communi tamen mixturæ accomodantur, nec diversarum cohesionum instinctus integros suscipiunt; Ideo à leviori admoto secernente artificio, facilè denuo separantur: Ut aqua vino commixta, quæ per vasorum ex lignis quibusdam specialibus constructorum porositate ab eadem secernitur; & oleum chemicum, & phlegma, post distillationem adhuc commixta, facilè invicem secernuntur per filtrationem in charta emporetica, aut alio simili incerniculo.

§. IV.

Frequentes hujusmodi, & oculo quotidie manifesti in liquidis inanimatis secretionum modi, species omnes secretionum possibiles continent, illas etiam, quæ in viventibus occultè celebrantur. Quamobrem, ut percipere possimus, quamnam hujus-

E

modi

modi secretionum speciem imitetur secretio liquidorum in animali; aut forsan si plures species comprehendat; accedamus jam primò ad liquidorum secretionem in viventibus minoribus, seu plantis; ad secretionem indè liquidorum in viventibus majoribus perrecturi.

CAP. XI.

Secretio liquidi à liquido in vegetabilibus

§. I.

Physicorum ejus ævi facilè Princeps Marcellus Malpighius, in accuratissima & per sæcula universa inimitabili plantarum Anatome, postquam ad unguem demonstraverit, structuram vegetabilium quamcumque integrè vascularem esse; addit insuper, vasa omnia in eis alimentaria ad anastomoses, plexus, reticula concurrere, undè obliquatæ reddantur succorum nutritionum trajectiones, nec per rectum eundem tubulum ligneum perpetuò ferantur: Latices idcirco nutritios per fistulas proprias in orbiculos dispositas indifferenter ascendere, descendere, transversaliter agi, proportionaliter ad canales lactiferos, seu succiferos, angulis variis, curvaturis, & contorsionibus, per totam plantam conformatos: utriculos transversales, seu horizontales inter se se communicantes, non minùs in foliis, quàm ligno, medulla, cortice, & radice aggerimè, & seriatim distributos, fibris, seu canalibus lactiferis curvatis appendi: In hosce utres reduci, concoqui, fermentari, exaltari, & reservari nutritios succos, præcipuè in foliis, cortice, & seriebus ligni transversis: ob hanc præcipuè succi alibilis custodiam, utriculorum hujusmodi summitates nodis implicari: seriebus utriculorum horizontalibus elegantes rectarum fistularum implicationes incru-
ciari: Fistulas aëreas quaquaversum hiantes, variè sitas, per plantam universam, obliquitatibus variis ac curiosissimis ligneorum fistularum interventibus distributas; plerasque earum circa
cen-

centrum serpentes, conflatas longâ falciâ in spiram complicatâ, & tenuissimis squammis veluti argenteis composita, undè tracheæ spirales respiratoriæ dicantur, analogæ tracheis animalium respiratoriis: Quin imo & aërem respiratorium, in plantis invenit & cor, & vasa quasi sanguinea, & circuitum, & naturales officinas, uteros, foetus, placentas, cotyledones, umbilicum, amnion, chorion; & similes cum animalibus analogas mirabiliter partes summâ sedulitate describens.

§. II.

Post has liquorum vias in plantis exaratas, & delineatas, quod eorundem liquorum distributiones spectat, in fine pronunciat: *Alimentitius itaque humor in radicibus percolatus, fistulas ligneas ingressus orbiculos hiantes invicem subit, ambientis aëris pondere sursum propulsus: Minima enim guttula probabiliter urgente non solum aëre externo, sed etiam concluso intra tracheas, sursum pellitur; & ex plano inclinato orbiculorum facile suspenditur, donec adveniente novo motu, & compressione in superiorem orbiculum protrudatur; vel in horizontales utriculorum ordines derivetur... Hujusmodi succus ab exaratis utriculis in peculiare vas reticulariter productum exprimitur, ita ut singulis partibus affundi possit.*

§. III.

Nullum autem ulterius succorum alibilium in plantas introductorum incerniculum exponit, Author præclarissimus, præter speciem quamdam cribri universalis, ad imos hiatus radicularum suppositi; cujus tamen potestati pro specialibus alimentorum distributionibus ad tot plantarum genera, & partes non nimis acquiescit: *Qua autem ratione (ait) alimentum radices subingredietur, meos adhuc sensus fallit. Ut probabiliter tamen conjectari liceat; Aquæ particula solutos sales, & reliqua mineralia per terram dispersa sibi associant, ac fluida reddunt; Appellensque hujusmodi heterogeneum corpus ad plantarum radículas, veluti per cribrum trajectum in ligæas fistulas exprimitur.... Quenam sint porta, seu hiantia orificia, qua propulsum fluidum cribrent, & determinatè admittant, adhuc dubium; circa tenellas radices pili copiosè luxuriant hinc, inde. Sunt autem pili candida fistula, & gracillima, minimis orbiculis invicem*

hiantibus coagmentata; unde horum orificiis determinata figura analogam fluidi partem ambientium vi expressam admittunt, & ligneis fistulis reddunt. In bulbosis autem aliisque simplicibus, ubi diversa radicum structura est, percolationem subingredientis liquoris in exteriori etiam ambiente cuticula immediatè ponit: unde ex hac in contiguos utriculos transitus succedat. Hucusque immortalis memoriæ Marcellus Malpighius; Cui etiam accedit Nehemias Grewius Anglus, rerum Botanicarum scriptor acerrimus.

§. I V.

Sed dubia primis aleis redditur cribri hujusmodi generalis ad plantæ radicem existentia, per observationem ramorum ex arboribus variis evulforum, qui terræ inversè inditi, seu eorum parte radices prius spectante superiùs positæ, aliâque ejus altiori ad solum infixæ, adhuc legitimè vegetant, succos hauriunt e sinu terræ, germinant, & in arbores adolescunt: Nec terram transiit, aut respicit rami inversi locus, cribro correspondens, per quod secernendus esset succus nutritius.

§. V.

Quin imo ex frequenti insitione plantarum diversi generis patet, succum terræ nutritium communem non secerni per radículas, sed per easdem integrum totum, ut venit è terræ gremio, & intactum transgredi; Ejus autem speciales secretiones fieri per totam plantæ structuram, independenter à radicibus. Arbos etenim una super aliam diversi generis insita, nux Ex. Gr. aut cerasus super cotoneum, è liquido jam per cotoneum traducto peculiarem elicit, & secernit succum, coalescendum indè in fructus, dissimiles à fructibus cotonei: Nec tamen secretiones has suas per cribra radicum instituit arbos insita, utpote radicibus suis expers, cotonei solum trunco, & radicibus perfruens.

§. VI.

Supponamus interim cribrum hujusmodi, plantarum radiculis positum: Demus etiam poris, & earum figuris potestatem aliquam in secretionibus vitalibus, quod tamen apertè superiùs refutavimus; verosimile tamen non est, quòd per tam simplices porositates fiant solemnes illæ, & spectabiles secretion-
nes

nes, per quas tot plantarum naturæ, & proprietates, mirabiliter variantur: Ut ideo per leve, & superficiale hujusmodi artificium arbor una ab eodem liquore generali, seu succo terræ nutritio succum oleagineum segreget, alia aqueum, illa amarum, hæc dulcem; Quædam rubescentem, altera viridem; ut inde ex variis hisce succis elicitis, Nux v. g. in ramorum suorum extremitatibus oleosum construat fructum, Pepo aqueum, Olea amarum, ficus dulcem, limonia acidum, quercus acerbum, Cerasus rubrum, Anguria virescentem; Citrus majusculum & fragrantem, Berberis inodorum & pusillum.

§. VII.

Demus insuper, insidere posse competens secretionis officium in peculiari conformatione oscillorum ad radículas plantæ, tamquam per cribrum generale; non per hoc tamen fieri poterunt tot secretiones speciales, quæ in unaquaque planta momentis omnibus celebrantur. Cogita jam quot partes diversæ naturæ, & habitudinis planta in se se comprehendat, gemmas, frondes, flores, folia, fructus, semina, & lignum; tot etiam diversas latum nutritiorum species expetere pro certo habeas, quibus nempe servantur partes in naturis dissimilibus suis, dissimiliter insuper augeant, & vivant, ut patet. Revera, diversa in genere nutrimenti portio tenellis partibus, & mollioribus convenit, solutior scilicet, & fluidior; & harum singulis ulterius varia; diversa trunco, Caulici, ramis, Cortici, medullæ, radicibus, solidior nempe, & magis, minusve concretescibilis. Ex fluido ideo generali in plantam per radices derivato tot fluida ulterius specialia segreganda veniunt: Hæque certò segregationes singulares non in radicibus fiunt, nec per positam ibidem pororum structuram, sed per omnes ejusdem plantæ regiones, ubi certè nova cribra non assident. Igitur cribratio in plantis, & introductio succi nutritii per oscula radicularum, analogia cribrationi, & introductioni chili per lactea in animalibus, linquit adhuc investigandum organum, tot variorum alibilium succorum multipliciter in eisdem plantis secretorium, analogum etiam operi multiplici secretorio in animalibus ad succorum nutritiorum depurationes

varias. Nec in cribrorum censum advocandi jam veniunt in plantis laudati horizontales utriculi, qui mera reservatoria sunt.

§. VIII.

Organum itaque in plantis secretorium hujusmodi in totius plantæ structura investigandum est: Cum autem ex placitis Malpighianis, & aliis omnibus, totius plantæ structura ad diversos canalium ordines, eorum longitudines varias, plexus multiplices, & anastomoses creberrimas integrè reducatur, nec, præter vasorum hujusmodi congeries, communia recipientia, & prementia momenta, ulla alia occurrant specialia incernicula, succos particulares ex communi latice separantia; inferendum jam venit, secretiones in plantis per varias Canaliculorum devehentium habitudines, & concursus simpliciter fieri; adeò ut, secundum varias eorum extensiones, curvitates, flexuras, & inosculationes liquida alibilia, ab aëris plantarii, elateribus variè impulsæ, impingentia, & laxata, in minimis suis, antea per terræ sinus disjunctis, mox in commune mixtum per eundem apparenter cohesionis nifum quietè compositis, denuo dissociantur: Hæc inde minima modis millenis soluta, per plurimas fistularum communicantium classes ad partes nutriendas transcoluntur.

§. IX.

Diversam in plantis structuram intimam, undè diversæ in singulis veniunt succorum specialium secretiones, & cursus, seu intimam diramationem vasorum sua etiam structura externa, & visibilis diramatio specialis comitatur; adeò ut genera omnia plantarum diversam objiciant ramorum suorum cum truncis, & trunculis suis habitudinem; Quæ in diversæ familiæ arboribus est adeò essentialis, ut dum in ejusdem generis plantis eosdem semper perlustres diramationum visibilium modos, duas non invenias disparis fructificationis arbores, quæ ordinem sensibilis suæ distributionis ramosæ eundem præ se ferant. Sic absque ulla fructuum, aut frondium, aut foliorum circumspectione (ut in hieme, quo tempore his omnibus plantæ exuuntur) per solam ramorum diversitatem, seu varias eorum divisiones, longitudines, flexuras, & angulos, statim in eodem campo noscitis, & distinguitis arborum

rum genera confusè invicem dispersa, Castaneam illico à quercu discriminas, persicam ab armeniaco.

§. X.

Luculenter itaque firmatur, succorum omnium in plantis ex succo communi secretiones & distributiones innumeras, extimè per visibiles ramorum, & ramusculorum divisiones varias, intimè per fistularum tractus insensiles, exequi; ut ideo per dispares hujusmodi sigillatim conformationes non solum plantæ variæ eodem etiam in horto, eademque in area consitæ, absque ulterioribus secretionis organis, seu colatoriis diversas ex eadem materia terrestri secretiones cieant. Sed ulterius; dum in eadem planta succi speciales secreti per directum quorundam canalium extensionem, ad extremitates ramorum excurrunt, in gemmas, folia, flores, fructus impendendi; alii per laterales fistulas ad arboris penitiora torqueantur ineundæ nutritionis negotio; reliqua communis succorum massa usibus hisce omnibus inepta ad terræ gremium reflectatur; Quod plantariæ circulationis modulus est, & institutum.

§. XI.

Restat, ut æquiparemus secretionem succorum in vegetabilibus cum primo genere secretionis fluidi à fluido in inanimatis, quæ etiam sine admoto secernente instrumento obtinetur. Revera liquida in plantarum compagem intrantia implent genus eorum, quæ prius divisa, & in diverso cohæsionum momento posita, postea coadunantur simul, suæque minima ad regularem attiguitatem, & seriem unanimem collocant, profundius tamen servatis instinctibus nifuum diversis; causa siquidem uniens in unum corpus valida est, & diu repetita; Hinc liquida hujusmodi in unum posita, nec non ad plantas introducta, non tam citò in nifus naturarum suarum dispares insurgunt, nec ideo tam facilè separantur, ac oleum v. g. commune aquæ recentè immixtum facilè, citòque ab eadem separatur; sed aliqua in eorum complexum novi motus introductio requiritur, quæ dissociationes disponat; ut venit in musto, aliisque liquoribus fermentantibus, positis superius ad secundum exemplum in secre-

secretione liquidorum inanimatorum, absque interventu fecer-
nentis instrumenti. Per hoc sapientissimè effatur Malpighius:
succum plantarum nutritium in utriculis concoqui, & fermentescere,
hinc ad partes nutriendas deferri. Analogia ad succos plantarum
secernendos, elicitæ ex mustaceis liquoribus, quorum secretio-
nibus præcedere debet nova quædam in minimis arctè attriguis,
& consociatis introductio motûs, eò plaudentior est, quò suc-
ci hujusmodi ipsæmet liquida plantarum sunt, à toto, & com-
muni succo in eisdem jam secreta, indeque ad novas speciales
cohæsiones in earum fructibus collecta.

CAP. XII.

Secretio liquidi à liquido in animalibus in genere.

§. I.

Vidimus hucusque secretiones plurimas liquidorum à liquidis
in inanimatis perfici, absque machina extrinseca fecer-
nente, seu colatorio, ut dicitur: Vidimus secretiones omnes
in vegetabilibus per solas vasarum dispositiones in actum duci,
absque ullo advocato colatorio. Sed cum in animalibus quæ-
dam partes occurrant, in quas introducta communis liquidorum
massa, postmodum egreditur in varios liquores disjuncta; Om-
nibus ideo inconcussum fuit, hisce partibus verè tradita fuisse
secretionum ministeria, & colatorii privilegia. Quid, si de-
monstrare jam possem, secretiones liquidorum à liquidis etiam
in animali eundem prorsus ordinem sequi, ac in inanimatis plu-
rimæ, in vegetabilibus omnes; fieri siquidem, aut absque co-
latorio, aut ante adventum in illas partes, quæ colatoria di-
cuntur?

§. II.

Revera, sicuti ipsæmet liquidorum secretiones, quæ in ina-
nimatis per adhibitum secernens extrinsecus fiunt, certè non
fierent, etiamsi tentandis hujusmodi secretionibus fortissima
adhi-

adhiberentur, aut artificiosissima instrumenta; si in junctis liquidorum segregabilium minimis inchoata non foret ex insito impulsu secretio quædam interna, quæ in mixtis chemicis, & aqua vino commixta, superius in exemplum positis, præviè suscipitur, aut conservatur; & prorsus deest v. g. in mercurio, qui ideo, ut ut liquidissimum corpus, in principia sua essentialia dissolvi numquam potest, etiamsi sub validissimis secernentibus potestatibus torqueatur; Ita etiam, quories massa liquidorum generalis in animali, appellens in colatorium quodcunque, susceptam jam sponte in componentibus suis secretionem secum non duceret; nullimode in eodem facefferet in partes, etiamsi pluries per diem per idem colatorium trajiceret, plenaque sederet, & tota in colatorio, secretionis machina specialis. Nullum siquidem momentum competens in quocunque excogitabili incerniculi artificio assignari posset, quod intimam, uniformem, & in minimis omnibus trajicientis celeriter sanguinis resistentem æqualiter cohæSIONem superare statim posset, & succos intimè adnexos ac in nexum nitentes extrahere, colligere, & sequestrare.

§. III.

Facile Ille concipit, insidere in sanguine nisus ad cohæSIONes varias multiplices in quibus liquidorum à liquidis secretionis principium fundatur, qui in mentem revocat; sanguinem aggeriem esse corporum, mole, figurâ, & cohæSIONe dissimilium, quæ, per alimentorum diversitates in eum introducuntur; eique disjuncta inter se se, & per solam attiguitatem quamplurima insident, plurima autem nonnihil cohærent, sed cum diversis specialis gravitatis momentis, seu viribus centripetis variis, undè nisus in contactum dissimiles. Ex his facile etiam concipit, nisus hujusmodi ad cohæSIONes varias perducere in actum non posse per illum cruoris gurgitem, ubi totius massæ motus progressivus celerrimus in eandem uniformiter directionem rapit cunctas promiscuè diversorum nisuum substantias. Ideo non difficile ulterius infert, per vasa grandiora sanguiduca, per arterias majores, pulmones, præcordia, ubi celerius devolvitur cruor, nisus

hujusmodi componentium liquidorum insitos exerceri non multum posse; exerceri magis, minusve jam posse, ubi sanguis à violenta illa per cordis, & majorum arteriarum embolo impressa celeritate uniformi plus, aut minus remittitur; scilicet in minoribus vasorum devehentium propagationibus, versus viscera, & partes, quas colatoria noncupamur. Itaque compertum jam venit; per vias productas ad loca secretionum supposita varios jam in sanguine speciales humorum coalitus, seu secretiones in animalibus, inchoari.

§. IV.

Facile insuper percipere quisque potest coalitus hujusmodi, qui callet; succos quamplurimos, sanguini per galaxiam traductos eâ mole, & figurâ non esse præditos, per quas cohærere intimè possint cum propriè cruorosis partibus, seu cum eis unum constituere; succos alios jampridem eisdem adnexos, sensim per varias causas liberari posse; alios insuper de novo emergere à variè perfractis, & solutis, per momenta naturalia, ramentis cruorosis, & globulis; succorum indè singularem horumce minima homogenea eâ superficierum, & molium cognatione donari, ut in nifum uniformem accedant, mutuosque in amplexus conveniant; hosce autem amplexus aut veteres esse repetitos, quos nempe jam habuerant ante solutiones stomachales, & intestinales; aut recentes, & novos à propria natura advocatos. Qui hæc omnia percipit, percipiet etiam, coalitus hujusmodi aptius fieri, ubi succi prædicti minus distracti fuerint à nifibus suis, ad ea videlicet proportionaliter loca, ubi cursus communis directio, & rapiditas cedent, ut suprà; seu in vasis minoribus, & adhuc minoribus; ut patet.

§. V.

Liquida igitur homogenea, quæ in communi massa cum particulis sanguinis, aliisque attiguis humoribus conformitatem non ducunt, facilemque ideo solutionem admittunt, si tenuiora sint, & subtilia, facilius venient in cohæsiones suas; hinc longo nimis per vias sanguineas tractu conducenda non erunt, ut suas à sanguine secretiones ineant. Quæ autem lentiora, & fixiora sunt,

sunt, non tam facilè à dissimilibus liquoribus aliis, per eundem alveum commixtis, expediri poterunt, & in univocos amplexus ruere: Hoc ideo longiùs à corde, tardiùsque in suas secretionem insurgent, seu vias longiores habebunt excurrendas, antequam integrè sequestrentur à sanguine: Et proportionaliter ad lentiores eorum consistentiam circularis cursùs majorem adhuc retardationem postulabunt, quâ nempe placidiùs, & commodius in lentas cohæsiones suas incurrant. Hinc non tantùm longiùs protractas à corde viarum suarum extensiones deposcent, sed insuper alias in eisdem viis habitudines, quæ augendæ summopere liquidi deVecti retardationi opitulentur; angustias videlicet, flexuras, curvitates, aliasque obicum appositiones, multiplices secundùm exigentiam, aut paucas. Indè est, quod liquidorum à sanguine segregabilium receptacula, seu colatoria, *ut dicunt*, alia longiùs distant à corde, & præcordiis; alia viciniora locantur. Quæ nempe liquidis tardioribus recipiendis destinata sunt, remotissima: Quæ tenuioribus, & subtilioribus, notabiliter proxima: Quæ mediocribus, proportionaliter distantia. Viæ insuper, seu vasculares productiones ad prima concurrentes non tantùm longissimæ sunt, sed etiam multipliciter angustæ, & deflexæ; ad altera productæ, breves non solùm, sed latæ ulteriùs, & directæ; Ad media, in omnibus mediocres.

§. VI.

Quod si firmiter constat, liquida à Cruoris compage per vias ad receptacula productas sensim excentrari, & novas consequenter cohæsiones amplecti, constat etiam, liquida hujusmodi in eisdem viis per vires eorum centripetas varias à sanguinis gremio magis, magisque removeri, & in proprios amplexus affigi, quod certè idem est: Constat ideo ulteriùs, liquida hujusmodi per easdem vias, ante adventum in intima reservatorii, non minùs ablegari à directione motùs totius massæ, quàm ab eadem secerni. Siquidem humor, qui venit in novam cohæsionem, venit etiam in diversam integrè gravitatem specificam, quæ idem est cum nisu cohæsionis. Quamobrem, datis in sanguine, & humore ab eodem se se extricante diversis gravitatibus, & diversis

earum centrīs, tanta jam veniet in ambobus mutua necessariò secessio; ut in eodem vase unus humor simpliciter juxta alium sit positus; seu unus ad alterius superficiem innatet, & in sejunctam molem superemineat, absque alia unione; seu quod idem est, massa liquidorum communis conflatur jam ex liquido universali, & particulari, invicem disgregatis. Et jam in hoc statu plenè habitam perspicimus determinatorum laticum à communi complexu secretionem in mera à corde ad reservatorium via, antequam liquida hujusmodi reservatorii intimiora perlustrent: Veniamus nunc ad completæ secretorum laticum secessionis causam, quæ certè in diversa cursûs suscepta ab ambobus directione consistit.

§. VII.

Humor, qui à massæ generalis cohæsione gradatim detrahitur, sensim etiam à centro ejusdem motûs recedit. Cùm autem motus ab embolicis animalis machinis impressus sanguini, in cursûs non interruptam directionem collimet; liquida, quæ sensim removeantur ab unione sanguinis, removebuntur etiam ab directione cursûs sui; nec certè removeri poterunt, nisi susceptâ directione aliâ oppositâ, seu laterali. Itaque, quò magis liquida determinata removebuntur à cohæsione sanguinis, eò magis gressûs sanguinis directionem amittent, & ad lateralem subsidentiam disponentur. Quo itaque momento sanguis, & liquidum secedendum, jam secreta inter se se, & diversè nitentia in colatorium accedent; cum appositâ pariter gressûs habitudine accedent. Sanguis reservatorium attingens, imminuto quidem cursûs gradu, sed intactâ, & servatâ directione, nisuque per totum uniformi, trajiciet ulteriùs & in circulum perenniter devolvetur: Liquidum per viam secretum, in ultimos reservatorii recessus adveniet cum penitus amissâ progressiva directione; Ideo toto jam ad cursum impulsu fraudatum ad visceris loculamenta eodem adventûs sui momento necessariò subsistet, quo sanguis ulteriùs delabitur. En ultimus secretionis animalis actus, seu ultima liquidi à liquido secessio.

§. VIII.

Revera viarum longitudines, & divaricationes ad quæcunque

que succorum specialium reservatoria, sunt in ratione reciproca ad habitudinem liquidi, quod per eas secerni debet, & remorari; seu illam proportionaliter mensuram servant, & rectitudinis conditionem, quæ pares sint ad integram liquidi determinati procurandam dimotionem ab adhæsiōe sanguinis, & impulsu. Desinunt itaque vasa devehentia, & in speciale reservatorium affiguntur in illo opportunè loci puncto, ubi devectora liquida integrè sejuncta jam sunt, & oppositis gressûs directionibus percita; ubi nempe prorsus jam desinit in liquido speciali secreto progressiva directio, persistens adhuc in sanguine; ut ideo organum ibidem apponi debeat, secretos latices diversè colligens, aut distribuens: liquidis tenuioribus in secessionis actum faciliùs incidentibus breviores & directiores vias dari, crassioribus ob oppositam rationem longiores, & magis implicatas, superiùs vidimus. Quantum autem valeat viarum hujusmodi longitudo, angustia, aut divaricatio ad contentorum laticum lentores fovendos, & promovendas lentiorum secretiones diffusiùs sequenti capite exponetur.

§. IX.

Secretionis principium hucusque expositum annuere videtur Perspicax sæpe Baglivius, cùm dixit: *separationem, ac derivationem inequaliter liquidorum per canales corporis mixtim fluentium fieri per compositionem duorum motuum, quorum alter moveat per longitudinem canalıs, alter eodem tempore quaquaversus ad latera.* Indicium dumtaxat à Baglivio secretionis animalis artificium, elucidavimus jam, & explicavimus.

§. X.

Secretionem spontaneam liquidorum à sanguine in vasis interaneis animalis per imminutos, ad gradum consistentiæ succi discernendi, gradus celeritatis circuitûs luculenter exhibet, & ad vivum delineat ipsamet spontanea extracti sanguinis, & vase externo collecti, secretio in componentia sua. Cruor abstractus ab agitatione, & tritu vasorum animalis, & otiosè effusus in patinam, minima sua omnia heterogenea in nisuum specialium momenta dimittit. Hæc ideo in disjunctas illico cohæsiōes ac-

cedunt: Ramosæ, reticulares particulæ primæ sunt, quæ se se invicemprehendant, in centrum specialis gravitatis corrugentur, & ad mensuram naturalis contractionis liquidiores intermixtas ab propriis adhæssionibus excutiant, exprimant, & segregent: Istæ reciprocè coadunantur, & cohærent: Sic consistentes plus, minùs aliæ, sic omnes; quæ ideo diversas locationes ineunt: Hinc aliæ aliis supernatant, aut præcipitantur, aut alio quocunque modo secedunt. Si sanguinem hujusmodi extractum agitamus, motum ideo conciliantes, analogum progressivo in vasis animali interaneis majoribus habito, proportionaliter secretionem hujusmodi impedimus, aut retardamus. Quod in sanguine extracto exponimus, confer jam respectivè cum sanguine, per animalis canales devecto; & totam habes, ac simplicem secretionis animalis naturam.

§. XI.

Confirmatur ex generali animalis structura, quòd in cursu sanguinis, magis, aut minùs per vasa tardigrado, secretionem omnes, & variæ proportionaliter fundentur. Equidem, vasa sanguinea in animalis continenti, seu ambitu corporis locata, directæ sunt, & sub potentiis muscularibus assiduè prementibus quaquaversum posita; gressum ideo devecti liquidi celerem, & liberum servantia, adeò ut confusæ cum toto, humorum segregabilium moleculæ, confuse rapi per cursûs impetum debeant, nec ideo extricari possint, & ad se se invicemprehendendum exire. Hinc ad ambitum corporis colatoria non adsunt: Adsunt autem dumtaxat ad illa animalis loca, ubi vasa eadem sanguiduca prolixius elongantur, contorta insuper notabiliter, sunt & divaricata, ac à prementibus momentis muscularibus majoribus, ut plurimum, dissita; tardiozem ideo in liquidis contentis progressionem necessariò constituentia; seu per intimas animalis partes; per viscera siquidem, ad totum corporis continens, vasorum, & membranarum interventu, pendulæ tamquam peninsulæ, alligata. Quod si ad externas partes, seu ambitum corporis, colatoria aliqua implantantur; ut salivales glandulæ superiores, aliæque; vasa ad eas appellentia variis adeò divisionibus,

bus ante introductionem suam, divaricantur; ut tarditas inde deducti liquidi ab hisce divaricationibus producta, correspondeat tarditati sanguinis, factæ per vasorum ad viscera conducentium divaricationes.

§. XII.

Confirmatur ulterius ex praxi, secretiones in animali liquidorum à liquidis per susceptas proportionaliter in vasis retardationes sanguinis, produci. Remedia siquidem, sanguinis cursum aliquantulum retardantia, movent alacrius secretiones varias liquorum tenuiorum, ut urinæ, sudoris &c. sic hypnotica omnia, & opiata, sudorifera sunt, & facile etiam diuretica. Flores papaveris rheados, ad unicum exemplum, impetum sanguinis eodem tempore retardant, ac urinas, & sudores movent &c.

§. XIII.

Ecquid ideo in colatorio vanè configurationes inquiremus, si in eum appellit secreta jam sine incerniculo, specialis liquoris particula? Jam ibidem necessario restitat, & remoratur? secretorium liquidorum animalium organum, vascularis via est; ut abundè vidimus; quæ ideo diversè conformatur, secundum diversas succorum secernendorum consistentias, & nifus insitos: Nec secretionis ratio ab hujusmodi viarum habitudine distinguitur. Partes, quas colatoria dicunt, succos jam secretos admittunt; Hasce ideo non colatoria, sed merè reservatoria noncupari visum est. Supponantur jam in hujusmodi reservatoriis concursuum vascularium determinatæ quomodocunque figuræ: Quomodocunque dispositi loculi intimiores concipiantur, res eadem perinde erit, idemque secretionem specialem quamcunque explicandi modus. Concipiamus solum, in receptaculo quocunque animali adesse loca determinata pro subsidentia secreti humoris; adesse vias liberas ad cursum ulteriorem sanguinis; adesse tandem vas, seu emissarium, liquida ex se se ibidem subsidentia ad alias longinquas Partes deflectens, & adsportans pro usibus variis animalis; totum jam habemus secretionis terminum, & complementum. Concipiantur jam, quocunque multiplici modo disposita inter se se, loca hujusmodi & Canales; secretiones ibidem
cujuscun-

cujuscunque generis speciales absolvendæ sunt, quia jam in via ad receptaculum susceptæ. Detur ad hæc omnia communia loca, quomodocunque velis configurata, id tandem, quod liquida jam secreta, & vias diversas affectantia, per hasce vias impellat, & urgeat.

§. XIV.

Adesse autem in reservatorio quocunque animalis, potentiam prementem hujusmodi, seu instrumentum liquidorum secretorum moles ad vias varias impellens; quinimo evidens, esse & multiplex, nemini ex Anatomicis latet. Primum est, ejusdem sanguinis directus, & uniformis adhuc impulsus, ut supra, in unico nempe nisu, unicâque cohæsione determinatus; Undè non tantum productio sui ad directionem itineris per venas ad circulum, sed & propulsio attiguum subsidendum liquorum ad laterales per excretoria distributiones; ut clarius videbimus sequenti capite. Secundum, & præcipuum est, vis perpetua muscoli, locis quibuscunque receptaculorum communibus, circumducti, undè competentes pressuræ, & trusiones. In colatoriis, seu reservatoriis, ubi tenacius est secretum liquidum ulterius derivandum, notabiles sunt potentiæ hujusmodi musculares intimæ, ad loca communia, seu vasorum omnium concursus quatiendos: sic in hepate ad bilem movendam conspicuè interni tegmen musculare, ad concursus omnes, & vasa excretoria distributum, capsam scilicet celebrem Glissonianam, variis locis effati sumus. Forasan etiam instrumenti prementis hujusmodi non infimam partem constituit allisio necessaria succorum in solida locorum communium latera; Ex qua ideo reflexiones quamplurimæ, & acquisita momenta veniunt ad liquidorum impingentium introductionem in canales novos. Addite specialibus hisce potentiis generales alias, & majores, per totum corpus extensas, ad liquorum omnium pressuras, & impulsus incessanter vigentes. Et totam habemus rationem ulterioris effluxus secretorum laticum ex reservatoriis quibuscunque.

§. XV.

Inquirenti ideo jam, quid sit in genere colatorium, seu reservatorium

vatorium organicum, per animalis regiones multiplex, diversis molibus, & figuris comprehensum: Respondeo, corpus esse, ex innumeris distributionibus, & propaginibus vasis deferentis, variè elongatis, & contortis, secundum exigentiam devectorum latices magis, aut minùs retardandi capax, omnibus sub eadem superficie collectis, compositum: devectora liquida in hisce distributionibus variè secerni secundum varios tarditatis, & allisionum susceptos gradus: Hasce autem distributiones vasis deferentis concurrere per totum reservatorii corpus in duo vasa referentia, seu emissaria sanguinis residui, & humoris secreti: Hosce omnes concursus musculis peculiaribus obtegi; & totam reservatorii fabricam tegmine communi, secundum exigentiam, muscolari, aut membranoso circumduci: Figuras, & magnitudines diversas in colatoriis variis præ se ferri, secundum diversas aggregatorum canalium in eorum propaginibus mensuras, tractus, & numerum. Nec aliud est animale colatorium.

§. XVI.

Cùm ideo secretio animalis quorumcunque liquidorum à liquidis aliis, indifferenter absque colatorii artificio celebretur, patet jam, animalem secretionem à secretionem vegetabili, nec imò ab inanimata essentialiter discriminari: Distingui autem inter se secretiones hujusmodi per respectus solum extrinsecos. Et siquidem, secretio non minùs vegetabilis, quàm animalis ab inanimata distinguuntur; quòd primæ, in vasis continentibus producantur, ulteriùs à loco secretionis elongatis, & variè efformatis; ultima autem in vasis, quæ nec in necessariam conformationis varietatem ponuntur, nec in ulteriorem productionem. Equidem, secreta in vegetabilibus, & animalibus fluida varia, à secretionem ulteriùs moveri debent de loco in locum, ad plantæ, aut animalis necessarios usus quamplurimos; qui certè in inanimatis non veniunt, in quibus nempe secreta liquida nec nutritionibus, nec officiis aliis destinantur; nec cursibus ideo ulterioribus ab expleta secretionem. Distinguitur autem per merum etiam respectum extrinsecum secretio animalis à secretionem vegetabili: Humores nempe in animalis sanguine secreti, & inutiles ad nutritionem,

tritionem, ad utilitates adhuc non paucas in animali obeundas retineri debent in corpore; hinc constituta, & erecta eisdem succis notabilia reservatoria sunt; undè ulteriùs ad loca utilitatum deriventur: In vegetabilibus, qui succi inutiles ad unicam horum viventium functionem, seu nutritionem (Generatio species nutritionis est) reperiuntur, nullum aliud in planta utile officium præstare possunt; hinc, liquidis hujusmodi ab alibilium consortio, & aptitudine ejectis nulla offeruntur reservatoria peculiariora, analogia visceribus animalis, colatoria noncupatis; sed prompta è vegetabili per truncum, & radices, aut transpirationem ablegatio intimatur. Succis dumtaxat nutritiis reservatoria collocantur in plantis, seu utres laterales laudati; qui ideo ad proportionem tot partium nutriendarum minores multò sunt, & copiosiores receptaculis humorum non alibilium in animali; Quamobrem, exceptis quibusdam accidentalibus circumstantiis, eadem est in inanimatis, vegetabilibus, & animalibus, naturâ, modo, & simplicitate secretio in genere: Quod probandum assumpsimus. Veniamus jam ad particularem in animali secretionem, seu liquidi specialiter biliosi; cui prolixa hæc omnia instituta fuerant.

C A P. XIII.

Secretio in Animali liquidi biliosi in specie; & obiter de aliorum liquidorum secretionibus.

§. I.

Hisce autem in genere de animali secretionem prælibatis reliquum est, ut Bilis naturam, tum viam ejusdem specialem à corde ad receptaculum suum, seu hepar, repetendo, modum secretionis suæ foeliciter noscamus. Bilis præcipuum, & essentielle principium ramosum est rigidiusculum, seu sulphureum, ut dicitur, & oleosum. Hoc certè conflant duplicis generis substantiæ: Primæ sunt, particulae recentes cibariæ plurimæ, in

in massam liquidorum generalem quotidie adventantes, impares ad se se assimilandum in componentia propriè cruorosa; quæ ideo purpureis sanguinis globulis non cohærentes, non junctæ, solum attriguæ, & juxtà positæ, seu simpliciter immixtæ, per motum circularem devolvuntur: Tanta est molendrini stomachalis efficacia; ut oleosas, pingues alimentitias partes terendo, & subigendo, intimè misceat, & confundat cum aliis quibuscunque particulis cibariis, cujuscunque fuerint texturæ, & generis; adeò ut particulæ subactæ hujusmodi, quietè per aliquod tempus jacere cum aliis possint, nisibus suis non habitis; Hinc liquor communis sanguineus ex immixtis omnibus promiscuè conflatus, per aliquod etiam temporis homogeneous, seu naturâ univocâ præditus compareat. Id itaque solutionis suscipiunt in ventriculo hominis oleosæ alimentitiæ partes, quod aut jam suscepere in ventriculis brutorum aut in ventriculo plantarum, seu terræ fermentantis gremio; ex quibus deductæ, in hominis alimoniam faceffunt. Alteræ sunt, partes variæ in sanguineos laudatos globulos, amissis pristinis cohæfionibus suis, jam pridem conversæ, & intimè cohærentes; postmodum, post circuitus varios, aliosque motus, coctionis, aut deflagrationis communiter dictos, seu per attritiones varias, in figuris suis, & nexibus susceptis immutata, incalescentiis repetitis tanquam sicciore factæ, ex molli, & levi consistentia in rigidiores conversæ; ut ideo novas inter se se cohæfiones possint successive affectare.

§. II.

Ex oleoso elemento partem bilis præcipuam constitui, nemo jam ambigit. Denotat amplissimè unctuositas, consistentia, deflagrabilitas bilis. Bili integrandæ salia aliqua alcalica, & acida intermisceri, seu potius oleosis bilis ramositatibus fortuito irretita lentiores eidem, & rigidiores consistentiam, aculeatum insuper saporem, & forsan etiam colorem procurare, compertissimum habeo. Refert mihi amicissimus æquè, ac omni titulo præclarissimus & colendus D. *Iacobus Cicognini* nunc ad regię sanitatis custodiam in Matre Regis nostri omni merito,

plausuque advocatus innotuisse præceptori quondam suo Bononiensi Bilem artificialem naturali simillimam fabricare ex multo oleo communi cum quadam portione cineris cujusdam, & quodam acido. Hujus compositionis modo depromendo hic locus non vacat. Sapo communis fit ex oleo, tamquam fundamentalis principio, & ex stricto lixivio herbæ kali, aut cujuscunque alterius fortioris alcalici, invicem coctis, & aquoso principio per ignem absumpto, in strictiorem compaginem condensatis. Nos saponariam facultatem in bile animadvertimus, quam noscunt etiam pictores, pro solvendis coloribus, & mulierculæ pro vestium abstergendis sordibus, bilem usurpando. Hanc ideo tamquam smegma animale per usus varios decernimus. Bili interim diluendæ, & in debitam liquiditatem servandæ quantitas phlegmatis veterascentis sanguinei proportionaliter conceditur; cujus nempe vehiculo, & interventu commodè per vias suas vehatur, & à concretionibus saponariis, aliisque similibus, per morbos interim varios creberrimis, impediatur. Forsan ideo traduntur bili salia lixiviosa, & diversi generis alia, ut eorum interpositione vehiculum aqueum cum oleosa bilis substantia intermisceri possit, eamque liquefcere: Quippe aqua in oleum introduci, ejusque partes solvere, & dilatare non potest sine interventu salis proportionati. Deductam bilis ex hisce adnotatis definitionem vide superius *cap. 2.*

§. III.

Cùm itaque principale bilis constitutivum oleosum sit, facillimè explicari posset ejusdem secretio à sanguine per aptissimam analogiam secretionis, superius expositæ, olei immixti cum aqua, aut liquido alio quocunque degeneri, in inanimatis; quotiescunque oleum biliosum principia solùm alimentitia conflarent, in sanguinem introducta, ejusque intimis partibus non cohærentia, sed solùm attigua, & juxta posita; Quæ ideo, ablata causâ immiscente, & confundente, seu impulsu circuitus, sponte à massa secederent, se se invicem coacervantia; ut oleum aquæ confusum, ablata causâ confundente, quassante, aut impellente, sponte ablegatur ab aqua, in se se coactum, & accumulatum.

tum. Sed cum viderimus, varia etiam principia in bilem facessere, quæ pristinam, & diuturnam cum cruorosis partibus unionem servaverant; quæ ideo emergere ex se se, & secerni tam facile non queunt, nisi prævia quædam concurrat, & paulatina ad secretionem præparatio; adducta jam analogia non sufficit. Alia itaque ex secretionibus aliis, per inanimata superius expositis, deducenda: ex secretionem v. g. oleorum in vegetabilibus, mineralibus, aut eisdem animalibus; quæ nempe olea, oleoso animali bilioso principio analogia, licet nixum in solas cohesiones suas perpetuum conservent, eum tamen, uti aliis in mixto vegetabili diversis principiis interpositis compressa, & disjuncta, exercere non possunt, & quasi exercere dediscunt; cohesionem ideo cum principiis aliis dissimilibus communem post longum tempus tranquillè servantia, prævias quasdam, longasque præparationes exigunt ad secretiones suas.

§. IV.

Veniamus primò ad oleum vegetabile. Et siquidem oleorum vegetabilium secretionem quod spectat; cuicunque ignis gradui subjiciatur, aut torqueatur vegetabile quodlibet, nec guttam olei sui dimittet à se se: Cremabitur potius, incinerabitur. Ut oleum hujusmodi vegetabile à principiorum aliorum compedibus expediri possit, extrahi, & secerni, prævia in vegetabile ad locum aliquem fixè subsidens introduci debet præparatio, seu fermentatio quædam, non violenta, non subita, non præceps, sed lenis, longa, & insensilis; per quam scilicet particule oleosæ lenim; suaviter, & tamquam per gradus eleventur ab aliarum pessundatione; à terreis, & salinis rigidioribus, ac gravioribus expédiantur; volatilibus & aqueis aliquot, subtilioribus oleo quoquomodo analogis, associantur, soluto communi nexu, & novo specialiter suscepto. Hæc lenis in vegetantibus, & insensilis præparatio adeò efficax est; ut oleum eorundem prius tenacissimum, fixissimum, insolubile, ponderosum, & crudum, in oleum liberrimum, subtile, agillimum, & leve evehatur;

seu spiritum plantarum ardentem, per leviolem ignis actionem à cæteris mixti substantiis segregabilem.

§. V.

Fermentatio apud plurimos sub antiquo adhuc conceptu recon-
ditur; multa in consequens, etiam apud modernos, involvit
figmenta. Qui dixit, *fermentationem motum esse intestinum particu-*
larum insensilium, in mixtum concurrentium, cum spontanea tendentia
ad recedendum à centro communis motûs, meliorem exposuit in ge-
nere fermentationis naturam; accedendo scilicet ad rerum na-
turalium omnium motum illum intestinum, admirabilem, qui,
ultra tot effectos, simplex est, validus, & univocus, partibus
omnibus materiæ proportionaliter inditus, & actum totum ma-
teriæ, nec non concentum stabiliens. Motus equidem liquidi, aut
solidi cujuscunque internus, insitus, & perennis, seu nîsus spon-
taneus duplex est. Primi generis nîsus hujusmodi corporibus om-
nibus univocè & generaliter insidet, ac ad unicum centrum gra-
vitatîs communis determinatur: Alterius generis nîsus, in variis
corporum componentibus varius est, & ad centra quædam deter-
minata, & distincta gravitatum quibuscunque specialium dirigi-
tur; seu nîsus est minimorum cujuscunque corporis in cohæsi-
ones homogeneas; qui cæterum in liquidis luculentius emicat, ob
dividuas magis, & leviores in eorum componentibus superficies.
Quibus in corporibus nîsus hujusmodi primi, & secundi generis
æquales sint, aut in quibus alteruter prævaleat, hîc inquirendum
non venit. In minimis communis massæ dissimilibus veniunt nîsus
secundi generis dissimiles; per quos videlicet minima congeneres
superficies habentia, seu, *ut dicitur communiter*, homogenea,
urgent per se se in mutuam cohærentiam, & in idem centrum
gravitatîs specificæ; seu vi eadem cientur centripeta speciali,
cum tentata exclusione dissimilis, seu heterogenei, eorum superfi-
ciebus intermediî, plus, aut minùs exercitâ, secundum majo-
rem, aut minorem dictorum intermediantium resistantiam. Ali-
qui nîsuum hujusmodi potestatem in minimis quibuscunque ma-
teriæ, explicant per vim in se se spontaneè contractilem, eisdem
singulis inditam, & tanquam corrugativam nîsus hujusmodi in
cohæ-

cohæſiones, & contactus, partibus materiæ ab ortu mundi proportionaliter impreſſus, à cauſis reſiſtentibus innumeris impediri quidem violenter poteſt in dies; auferri, aut minui non poteſt: In actum ideo ſuum indeficienter reſtituitur, ablatis, aut immi- nutis cauſis obſtantibus. Ex variis hiſce niſibus ſpontaneis, & perpetuis non minùs accedunt, per rerum naturalium univerſa- litatem, intimæ variæ motiones in ſolidis, quàm mutationes etiam innumeræ, & præcipuè ſecretiones in liquidis cujuſcunque gene- ris, viventibus, & non viventibus. Eorum inſuper transforma- tiones in corpora firmiora, & ſolida, non tantùm in inanimatis, ut in mineralibus, & lapidibus; ſed & in vegetabilibus, in folia, frutices, lignum &c. & in animalibus in fibras, membranas, oſſa, & ſimilia. Deſer jam ex his paucis legitimam fermentationis ideam.

§. VI.

In mixto quocunque liquido, ubi ſedeat arcta nimis compo- nentium minimorum diſſimilium interpoſitio, ſeu tanquam in- cruciatio, & veluti æquipondium reſiſtentiarum, & niſuum; ut niſus, & minima proportionaliter extricentur, mixto, tamquam tonicè quieſcenti, movens momentum aliquod ſuperaddendum eſt; incitamentum ſcilicet quodpiam, & concuſſivum, ſopitos elateres ſingulos partium, ſeu vires omnes urgentiæ ſpeciales centripetas ſuſcitans, & expediens. Excitabulum hujusmodi non tantùm ab introducto in mixtum motore novo procurari poteſt; ſed etiam ab agente extrinſecè poſito, allidente, & in ſpeciales mixti moleculas impellente; præcipuè autem à gradu quodam tarditatis, & moræ, fluentibus liquidis heterogeneis oblato. Re- vera, ſicuti motus liquidi totius, ſeu progreſſivus intimos inſen- ſiles motus, ſeu niſus ſpontaneos laudatos interturbat, diſtrahit, & impedit; ſic externa quies, & ſtatio anſam omnem motio- num inſenſilium porrigit. Muſtum, aut liquida vegetabilia alia, quæcunque ſint, nunquam fermentant, ſi motu progreſſivo, eo- que præſertim celeri, cieantur: fermentant ſolùm quiete poſita. Externæ liquidorum alliſiones quantùm eorum nexibus ſolven- dis valeant, cuicunque non later.

§. VII.

Sanguis igitur, per vitæ leges, liquidis non tantum tenuioribus, & leviter in se se, & cum principiis aliis, cohærentibus, sed & notabiliter intricatis è plexu suo segregandis, institutus, intimas etiam, & competentes difficiliorum secretionum præparationes habere debet in se se; per quas videlicet non solum minima homogenea secernendi liquoris ad nifus determinatos suos, & univocas cohæssiones vividius disponantur; sed alia etiam conjuncta heterogenea, seu dissimilium superficierum elementa, in naturas exercendas suas excitentur; seu in nifus specialium cohæssionum vegetius conspirent; ut ideo segregabilia succi determinati principia facilius expediantur ab eorum intertextu, et tamquam emoveantur à centro communis mixturæ. Quamobrem, cum massa cruoris, ad vitæ usus præcipuos, perpetuâ per animal rotatione rapiatur, patet jam, cursum hujusmodi præparationibus, & nifibus secretionum obstare omnimode, ut diximus superius; Ideoque feriaciones quasdam ab hoc cursu suo, aut notabiles saltem retardationes exigi in sanguine, majores, aut minores, secundum majorem, aut minorem exigitam præparationem, respectu ad majorem, aut minorem implicationem humoris segregandi, cum reliquis ad datum tempus non segregandis principiis. Dantur revera retardationes hujusmodi generaliter per orbitam sanguinis, & specialius ubi instituendæ sunt secretiones. Producentur retardationes exigite ex tot vasorum majorum, & minorum sanguinem per totum animal devehentium divisionibus, flexuris, curvaturis, angulositatibus, angustis, & distantis ab impulsûs principio: Per has omnes variè in progressionibus suis retusæ, remoratae, aut infirmatae moleculæ sanguineæ, nifibus insitis suis vacare liberiùs possunt. Dantur insuper per eandem orbitam innumeræ ad tot vasorum latera, & angulos, aliosque obices impingentiæ earundem molecularum, & allisiones; quo jure solutio ulterius, & mutua earum omnium excentratio abundè procuretur. Dantur tandem, ante quamcunque specialem humoris secretionem, suæ etiam speciales cursus sanguinis proportionaliter retardationes.

Canalis

Canalis ad determinatum reservatorium aliquod sanguinem totum unà cum humore segregabili conducens, ante adventum in intimiora reservatorii, per mille flexuosas angustias, diversas tamen secundum exigentiam secretionis, peculiariter distribuitur; ut ideo ad proportionem novæ retardationis circuitus, & novarum allisionum in conicis hujusmodi angustiis, & flexuris specialibus augeantur etiam, aut penitus excitentur in devectis confusè liquidis nisuum suorum momenta, & solutiones; ut consequenter, post præparationes secretionum generales per totum circuitum susceptas, cuicunque etiam secretioni sua præsidens determinata præparatio, integram præberet manum ad plenam ex aliorum complexu humoris determinati sequestrationem. Humor itaque plenariè præparatus, & secretus adveniens in reservatorium suum, omnimode ibidem sejungitur à massa præterlabente. Quæ autem ejusdem humoris portio præparata adhuc non fuit, nec inde secreta ante adventum in reservatorium suum, restat adhuc in sanguine, principiorum aliorum intertextu illaqueata, usque ad novas, post novos circuitus, integrasque præparationes generales, & speciales suas, plenamque ideo secretionem tandem ineundam.

§. VIII.

Sed bilis humor est, super alios omnes animales, tenax, intricabilis, lentus, viscidus, uno verbo sanguineus; difficillimè in consequens, super alios omnes, admittens solutionem sui à sodalibus principiis in sanguine: Ideo, præter præparatorium commune, exquisitiorem, super alias omnes, præparationem specialem suam oleum hujusmodi animale deposcebat. Nec certè augeri poterat præparatio specialis hæc sua, nisi viis à corde ad ejus reservatorium, super alias omnes, à cursûs impulsu recedentibus, & divaricatis seu in majores longitudes, angustias, distributiones, & tortuositates dispositis, quo nisu ad debitum secretionis apparatus promovendum, tarditas fluxûs devectis succis quàm maxima, & maxima etiam allisio procurarentur.

§. IX.

Non ideo per arteriam sanguis ad hepar devolvitur, qui
H bile

bile ibidem spoliandus est; ut per solam arteriam ad alia omnia animalis colatoria tranatur. Exigitæ sanguinis, ad hepar in secretionis officium confluentis, tarditati notabili non congrueret arteriæ ejusque diramationum habitudo; quarum directio, quæcunque sit, semper nimia, & momentum impulsûs vel mediocre, celeri succorum interfluentium traiectioni manum præbent. Quæ ideo præparatio secretionum per arterias celebratur, bili præparandæ non sufficiebat; tenuiorum dumtaxat laticum solutionibus, & secretionibus sufficiens. Vena hac de re nova extruitur, quæ sanguinem ex arteriis in viscera plurima deciduum, tardum ideo jam factum, fractumque in susceptis impulsibus resumat in se se, & in se se retardet ulteriùs multiplicatis, & elongatis divaricationibus; tardissimum tandem, & vix mobilem versùs hepar disponat, & deferat; ex quo tandem bile exutus contubernali, revehatur per cavam ad cordis impulsus. Cavæ ideo, aortæ superaddita hæc vena intermediat, vasaque hujusmodi communiter socia interventu suo disjungit, & longè distrahit; Quod certè alibi in animali non venit. Perpende jam ex venæ hujusmodi, rectioribus circuitûs viis interpositæ, seu portæ, longitudine, divaricatione, & distributione quàm maxima, quàm longissimum, & quàm tortuosum iter metiatur sanguis à corde ad hepar: Per arteriæ magnæ flexuras; hinc per flexuosissima mesenteraica; postmodum per solidorum intestinalium, aliorumque viscerum ambages; indè per tot arcus portæ, longosque meandros usque ad ejus truncum; rursus ab ejus trunco per novas, & longissimè protractas in ipso viscere ramorum divaricationes innumeras usque ad concursus communes. Quanta vascularis extensio: Quot ulnarum milliariis, vasa à corde ad hepar concurrentia longitudine æquiparanda? Non-ne dices, excurrentem hoc tramite ad hepar cruorem ibidemque tandem adventantem, remotissimè, super quamcunque aliam corporis partem, recessisse, & distare à circulationis motore?

§. X.

Perpende ulteriùs, quænam sit amplitudo venarum per intestinalia repentium, seu radicum portæ, respectu ad gracilitatem, & angustiam

angustiam diametri arteriarum meseraicarum, ex quibus devectus sanguis per hasce venas traducitur; & solo hoc de titulo percipis, quanta jam concilietur tarditas fluente sanguinis, ex hisce arteriis in hasce venas mediâ intestinorum substantiâ contrivato: nemini siquidem latet, quantum motûs sui progressivi deperdat liquidum illud, quod ex spatio angustiori in multò amplius derivatur. Nonne ideo tot de titulis illa erit à sanguine, ex corde ad hepar progrediente gressûs tarditas proportionaliter contrahenda, quæ bili ab aliorum componentium contextu lentiùs enodandæ, & commodiùs excentrandæ sufficiat? nonne inferes, secundò, ad tantos angulorum laterum vascularium, curvitarum, angustiarum occursum, in tanto itineris gyro, abundanter, & quantum ferat exigentia, illidi in radice liquidorum massam, & in componendis etiam intricatioribus expediri; Bilis ideo discriptionem admitti, exsolutionem, & liberatos nîsus in cohæsiorem univocam suam, & gravitatem specialem; Totum, uno verbo, præparatorium apponi biliosi crassaminis, seu olei animalis, analogum præparationi secretionis olei vegetabilis? siquidem proposita viæ longitudo & flexura, disponens sanguinem, per intimas concussionem expansivas, & collisiones externas, ad lentam eructationem, & solutionem olei sui, æquiparanda venit paulatinæ fermentationi vegetabilis, positi vel in fimo, vel in digestionem, vel liquore fermentante irrorati, & in se se accumulati, ad olei sui secretionem parandam. Portam interim, quæ per truncum suum, binis diramationibus interpositum, arboris structuram radicibus, trunco, & ramis compositam apprimè imitatur, animale arbori vocari etiam posse, existimamus: Eò præsertim, quòd, sicuti in arbore communi per solam structuram trunci, & duplicatæ diramationis laudatam, secretionem succorum vegetabilium celebrantur, absque alio colatorii adminiculo; ut superiùs demonstravimus; Ita etiam, in arbore animali, seu portâ per eandem trunci, & diramationum solam habitudinem secretionem liquidorum animalium, absque alio interventu, speciales fiunt.

§. XI.

Cætera ad bilis preparationem huiusmodi, & secretionem facientia

cientia abundè deduci possunt ex allatis generalibus præcedentis capitis. *V. Gr.* quòd idem sit, oleosas bilis homogeneas particulas, è gremio profundiori sanguinis sensim emergentes, solvi ab aliarum plexu, ac nifus statim reciproæ cohæſionis edere, & confluere in se se, instar guttularum aquæ, aut olei cujuscunque, quæ ex quadam distantia confluunt sponte in mutuas cohæſiones, hinc in se ipsis necessariò prehendi, & ex minoribus guttulis in guttas statim majores coalescere consueſcunt. Idem nempe inferendum in paulatinè excentratis à sanguine ejectamentis biliosis quæ in univocos inter se se coalitus, novaque centra gravitatis concurrentia, novum jam corpus efformant, distinctum à toto sanguine, ab eodem jam prorsus secretum ejusque superficiei dumtaxat attiguum, & innatans. Ad id solùm postulato reservatorio speciali, ut in eum tandem appulsâ liquidorum massâ, conflatâ ex liquido universali, & particulari, seu sanguine, & succo amandabili diversè positis in ejus bivium deventæ substantiæ dissimiles hujusmodi, integrè à se se ablegentur, per dispares vias corrivatæ. Expletam bilis secretionem à sanguine, etiam ante adventum suum in hepar, luculenter confirmat observatio Cl. *Glabachii* celebratissimi Professoris Germani, *notabilem in sanguine venæ portæ præ alio venoso degustantis amaritiem lividumque magis deprehendentis colorem in præcipitato ejus sero*: Idem observavit, & exposuit Cl. *Reverosthius* Professor Batavus: Idem celebratissimus *Thomas Cornelius* Professor Neapolitanus; ut in eorum codicibus videre est: Idem alii plurimi, & nos ipsi. Ejusdem insuper sanguinis portæ flavedo ab aliquibus distinctè perspecta fuit.

§. XII.

Patet insuper à præcedenter expositis, Hepar esse ad illum portæ terminum oportunè appositum, ubi deventæ biliosæ particulae, jam pridem à centro directionis motûs totius massæ disjunctæ, gradum omnem progressivi motûs deposuere, plenariam ad latera subsidendam solummodo affectantes; adeò ut in communibus visceris concursibus secedere prorsus debeant ex se se, & integrè emancipari à communi massa præterlabente, & gressûs sui directionem servante; cujus nempe principia
unitè

unitè omnia posita adhuc sunt sub impulsu emboli circularis. Fieri autem secessionem hujusmodi, etiam quâcunque suppositâ configuratione intimiori, amplitudine, commensuratione seu axe quolibet in dictis concursibus.

§. XIII.

Quod si biliares hujusmodi secretæ substantiæ, non minùs à massæ impulsu progressivo, quàm ab ejusdem cohæsiōe sejunctæ, lateraliter in loculis hepaticis dimittuntur à sanguine, directè per reductoria sua præterfluente: Petis jam, quonam impulsu quiescentia ex se se biliaria corpuscula expediri possint à visceris promptuariis hujusmodi, & per vias alias diffitas à sanguineis, & dissimiles amandari?

Respondeo, ejectamenta hæc biliaria in hepaticis concursibus deperdidisse quidem massæ communis impulsum totum directum; nec indè lateralem ex se ipsis servasse; sed tantum hujus ultimi incessanter assumere ab eodem fluente sanguinis, directè percurrente, ut satis removeri possint, ab eodem recedere, & in vias peculiare introduci. Hoc per commune exemplum elucido. Sint jam tres globuli, in lineam, & contactum positi, & quiescentes. Tunc quarto globo medium ex tribus lineariter positis directè impelle. Videbis, ex indito ad medium hunc globum directo impulsu, laterales binos globos, favore contactûs sui, tantum etiam suscipere deflexi, seu lateralis impulsûs, ut ambo ad latera quoquomodo diducantur. Cogita jam, per hepaticos concursus, lineam directam in componentibus sanguinis adhuc cohærentibus in se se. Cogita lineam transversam habitam ex unita hujusmodi tota cruoris substantia, & biliaris molibus, utrinque jam à tota massa sejunctis, sed in contactu adhuc positis; impulsu ideo embolicum circuitûs per lineam directam ab una ad aliam cohærentem particulam sanguinis successivè productum; reflexum autem super biliosa contigua corpuscula impressum ex hisce particulis massæ; seu momentum ejusdem impulsûs, in directionem contrariam, sive per lineam transversalem bili jam secretæ pertraditum: & totam habebis analogiam: Concludes siquidem, eam lateralis progressivi ni-

sus quantitatem bili jam sejunctæ, per hepatis intimiora loculamenta venire incessanter distributam per quam idem humor intrare sat possit in emissaria sua; ubi præsto etiam perennes sunt potentiæ aliæ ad remotiora trudentes: De his alio loco verba facimus.

§. XIV.

Constat tandem de intimo hepatis contextu, seu de parenchymatis, aut glandulæ hepaticæ natura. Concipe jam, in unum innumerabiliter multiplicatas, & strictè positas productiones venæ devehentis, & alterius revehentis, & ductus specialis excretorii, cum multiplicatis proportionaliter eorum concursibus; Concursum insuper varios aliorum vasorum, arteriosorum, limphaticorum, & nerveorum, ad alios usus facientium: Hosce singulos circumductos musculari peristaltico, & circumpulsivo tegmine, ad omnes ulterius ductus excretorii distributiones, in mensuram biliosi lentoris, validè propagato. Tractus omnes, & coalitus vasorum hujusmodi à communi præcingente tunica in sedibus suis collectos, & constrictos. Et elucescit jam tibi quid tota sit hepatis compositio. Quod dicimus de glandulæ hepaticæ structura, afferre proportionaliter poteris cæteris animalis glandulis, conglomeratis dictis, quæ omnes ex prædictis trium vasorum concursibus constantur; speciali tamen arteriâ, per viscera alia omnia, portæ hepaticæ munia obeunte. In omnibus hisce glandulis solus etiam viæ sanguinem devehentis apparatus varius secretionis dissimiles facit, non intima glandulæ configuratio, quam, ut in hepate, quomodocunque concipias perinde est. Maximum cæterum viscerum omnium & glandularum hepar est, proportionaliter ad copiosiores, & longiores in eo, super viscera alia, vasorum diramationes, propter exigentias prædictas. Quod autem non tantum hepar, sed & organa alia omnia animalis, quæ communiter colatoria vocantur, reservatoria solum noncupari lubeat; hoc ex eo deductum habeas, quod in eis omnibus liquida propriè non secernantur, sed deponantur simpliciter, jam per viam secreta; ut toties repetendum incubuit,

Venio

§. XV.

Venio nunc ad illam præparationem, quæ oleis per mixta mineralia, aut animalia adhuc illaqueatis inditur, ut per distillatorium instrumentum solvi possint, & segregari; descendendo in consequens ad alteram olei biliosi analogam præparationem in sanguine. Cum etenim oleosæ substantiæ in minerali corpore, aut animali nixus quidem suos in cohesiones individuas conseruent, sed ab eisdem in actum edendis impediuntur per interpositionem aliorum principiorum dissimilium in nixus diversos nitentium, quæ, tanquam cunei, inter partes solidi introducti, easdem violenter diducunt, & mutuam impediunt approximationem, prohibent à naturali complexu; sic ars didicit, prius abstrahere à mixto liquida huiusmodi diducuntia intermixta, ut inde sponte inter se se aproximas, & coeunt oleosas moleculas, ut restituuntur ad se se partes in solidis per ablationem cunei, facile extrahat, & segreget. Ideo, ante oleorum secretiones, & elevationes; in distillationibus chemicis mineralium, & vegetabilium, phlegmata prius extrahi debent à mixto; quæ, utpote in eisdem mixtis copiosiora principia, & insuper in principiis aliis elongandis satis efficacia, olea interspersa perfundendo, in laudatas disjunctiones cogeant. Nec nisi post totam prius abreptam, & sequestratam portionem phlegmaticam ex minerali, aut animali corpore, ignis torturæ subiecto, colliguntur simul oleosæ substantiæ, liberantur, secernuntur, & ascendunt.

§. XVI.

Eandem in oleo bilioso sanguinis violentam elongationis, & distractionis affectionem celebrari à copiosissimo, super alia omnia phlegmatico, principio, luce clarius est. Ut ideo bilis ad secretionem præparetur, debet è sanguine pars major extrahi cuneorum phlegmaticorum huiusmodi. Reuera serosa sanguinis multitudo ab eodem extrahitur, ante ejusdem introductionem in vias hepaticas. Respice, quàm magna phlegmatis quantitas per tot partes exhauriatur à sanguine ante ejusdem adventum in portam: Quanta ejusdem secretio, & distillatio in renibus, in
refer-

reservatoriis salivariis, in articularibus, & cutaneis regionibus ex massa generali; Quanta insuper ex massa particulari versus hepar tendente, in pancreate, mesenterio, ventriculo, meandris intestinalibus, aliisque visceribus naturalibus; quæ omnia non tantum refertissimis succorum liquidiorum sanguinis promptuariis glandulosis ditantur; sed tamquam unicam glandulam, uniformem, magnam componunt, in varias glandularum classes, seu reservatoriorum miriades distributam. Adnota præcipuè lymphatica innumera, ex hisce visceribus & ambitu speciatim hepatico, copias seri sanguinei aggerrimas corrivantia: & facile concipies, sanguinem, ante adventum in truncum portæ, & post adventum in ultimas diramationes ejusdem portæ ad hepar, per appensos aquosos ductus innumeros, & grandiores, notabiliter adeo dephlegmari; ut comparari sat possit cum mixtis vegetabilium, & mineralium dephlegmatis: comparari etiam in consequens debeat distillatio hæc sua naturalis cum artificiali illorum distillatione; ut indè olea in illis facile secernantur in alembico; oleum & suum in isto facile dimittatur per viam ad hepar.

§. XVII.

Bilis itaque illud est ejectamentum, seu recrementum sanguinis, quod post aliorum omnium humorum tenuiorum secretiones, in dato spatio temporis, unius v. g. integri circuitus sanguinis, postremò separatur ab eodem sanguine. Hoc venit ob indolem tenacissimam ejusdem liquidi, difficillimè idcirco ab aliorum succorum complexu solubilis. Pater autem, liquidiores cruoris latices, v. g. urinarios, multo prius transcolari in organis suis, quàm bilem in hepate, ut superius annuimus, ex longè celeriori, & directiori trajectu totius sanguinis per renes, undâque ejusdem ampliori; ita ideo, & reditu ejusdem massæ vigesies, trigesies, & amplius per hoc viscus repetito, ante unicum per hepar habitum dumtaxat circuitum: Hinc non tantum uberius in animali super alias omnes visibiles, secretio in renibus est, sed aliis omnibus titulo semper quocunque præcedens. Sic liquida epota, ante aliam quamcunque secretionem, primò per

per renes reddimus, copiosissime insuper, & liberrimè. Quod dicimus de secretionem urinaria respectu ad ejus prioritatem ad bilis secretionem in dato circuitus spatio, id etiam proportionaliter intelligendum venit de alia quacunque serosa secretionem tenuiori, ut salivali, pancreatica, diaphoretica &c. quæ certè etiam eodem de titulo biliosam semper, ad datum tempus, præcedunt.

§. XVIII.

Itaque ad datum tempus, integri v. g. unius generalis circuitus (quomodocunque eum concipias ex variis diversis partialibus circuitibus compositum) unà cum visco bilioso, qui, ut vidimus, ultimum in secretionum animalium serie segregabile purgamentum est, id simul omne secernitur à sanguine, quod restitat in massa, Æterogenei rationem assequutum, & solvi ab eadem potest. Intimior reverà, & radicalior secretio à sanguine lentiorum laticum illo tandem loco celebranda fuerat, ubi tantæ ad secretionem dispositiones præcessère. Cæterum expletis in sanguine tot successivis secretionibus, expletâ hâc postremâ hepaticâ; liquidioribus ideo, ac tenacioribus solutis sensim partibus exutus cruor, hepar transgreditur; cætera principia sua, sub una adhuc cohæsione per illud momentum posita, unitè ducens ad corda, & ad circulos. Circulis postea renovatis, partes denuo in eodem aliæ ad solutiones parantur, & realiter solvuntur, & novas affectant cohæsiones speciales: & renovantur in consequens secretionem per gradus suos; inchoantes scilicet ab humoribus tenuioribus ad mediocres, usque ad lentos, & lentiores; seu per vias breviores, directiores, & amplas, usque ad longas, longiores & magis divaricatas; ad ultimam tandem secretionem, seu hepaticam, terminantes.

§. XIX.

Confirmari cæterum potest præparatio ad olei biliosi intricati secretionem, quinimo & ipsamet ultima secretio, per retardationes Cursus sanguinis, & tanquam ejusdem stationem, & subsidentiam ad longos portæ recessus exemplis quamplurimis, petitis à rerum naturalium universalitate: ex quibus duo solum seligemus, nimiam disquisitionis prolixitatem declinaturi. Primum

fit in eisdem liquidis à vasis animalis extractis, alterum in fluminum phænomeno. Quò ad ipsamet liquida animalia: superius jam vidimus, sanguinem animalis extractum à gressu circuitus confusivo abreptum, & in recipientis cujuscunque moram, ac subsidentiam depositum, spontè in partes omnes dissimiles secedere, & ablegari; liquidioribus, & consistentibus nifus suos in contactus dissimiles concedere; hinc illas ulterius liquefcere, istas in tomentum constringi. Homogenea cuncta sociari, heterogenea disjungi: Alia idèò ad fundum vasis collecta, alia ad summitatem, alia ad latera. &c. Quinimò in variis hoc ritu eductis ab animali, & subsidentibus cruorum portionibus ipsemet biliosæ substantiæ, spontaneæ secretæ, massæ superstiti innatantes, & in distinctum agmen aglomeratæ, cum propria flavedine, & propria interdum amaritie, observantur. Alterum exemplum ex liquidis-met ipsis animalibus desumptum lac porrigit, quod extra animalis vasa quiescens, sponte in serosam, & butyrosam partem secedit. Butyrum pars lactis oleosa est, & ramosior; eoque magis cum bilis principio comparandum.

§. XX.

Flumen, ubi præceps, & rapidius decurrit, immixta omnia extranea, arbores, herbas, ligna, frutices, paleas, lapides, cadavera, arenas, festucas &c. confusim abripit per fluentum suum & directè devehit: Ubi remissiori jam gressu fluit, tenuiora, leviora, aut liberiora seponere videtur, arenas, festucas, paleas; graviora, & intricatiora secum adhuc conducit. Ubi à cursu suo ulterius remittit, crassiora, & ponderosiora dimittit ad latera, aut ad imum alvei relinquit, ligna, arbores, cadavera &c. cum autem ad minimam omnium velocitatem pervenerit, intricatiora tandem projicit è sinu suo: Ibi ideo luteæ lentiores partes concrefcunt; ibi herbacea ramosa varia, aut alia ejusdem naturæ corpora invicem concurrunt, & in distinctas moles, aut innatantes aquæ, aut ad fundum deciduas, aut lateraliter ad ripas depositas, colligantur. Hæc, & superiora cum sanguine, prius per vias majores generales suas motu celeri rotato, mox per vias speciales ad hepar, & præcipuè in secundis
propa-

propaginibus portæ lenefcente, & integram quasi feriatiorem suscipiente proportionaliter compara. Immersa flumini extranea corpora, sicuti à flumine cursum mutant, ita celerius deperdunt, quàm flumen; & totum amittunt, cùm ad ejus latera subsident; quo tempore flumen tantùm adhuc cursus conservat, ut fluat ulterius: Bilis ab sanguineo fluente impulsu affluens, mox magis, magisque ab eodem deflectens, totum tandem deperdit, quo momento modicus adhuc superest sanguini in hepaticos concursus admisto: Hinc bilis in eodem viscere subsidet; sanguis ulterius devolvitur.

§. XXI.

Comprobatur luculentiùs productio secretionis liquidi biliosi per vias ad reservatorium suum protensas ex eodem artificio in aliis liquidorum animalis secretionibus. Liquida, quæ solvi facillè possunt à complexu sanguinis, seu in nissus suos facillimè accedere propter insitam tenuitatem, & levitatem, hæc per viam brevissimam ad reservatoria sua, seu speciales glandulas conducuntur. Brevissima v. g. via est à corde ad renales glandulas, ac nullis penè flexuositatibus, angulisve, præter majusculum unum, emulgenti, & aortæ interpositum, externè divaricata: Internè autem, seu in visceris corpore compendiosa venit, & directà usque ad loca concursuum; ac vix in aliquot ramulos dispersita: Quod bene demonstrat ipsiusmet renis dissectio; & præcipuè parva ejusdem visceris moles respectu ad subeuntem arteriam. Idem proportionaliter video in viis sanguineis, salivares secernendas copias ad varia earundem reservatoria, pancreaticas, intestinales, aliasque inferiores, aut superiores glandulas salivarias devehentibus. In renibus autem deponendum venit subtile quoddam, facillè ex se se solubile, leviterque cum sanguine cohærens (ut vidimus cap. 2.) veterascens nempe, idcirco incongruum massæ totius serum, salibus attritis quamplurimis maritatum: In glandulis salivaribus omnibus ablegatur liquidum etiam subtile, leviter cohærens, & recens adhuc in massa, salibus minutioribus, & activioribus copulatum. Quamobrem, sicuti liquida hujusmodi urinosa, aut multipliciter salivalia, facillimè à toto cruore secedentia, breviorē longè secretio-

nis præparationem exigunt; ideo per brevissimam viam à corde ad peculiaria receptacula debita solum, non autem exuberans ultra exigentiam liquidorum hujusmodi quantitatis solutio præparatur; ita, ratione contrariorum, longissima omnium via paratur sanguini, à corde ad hepar excurrenti, ad longam, & prolixam ineundam liquidi secernendi biliosi præparationem, proportionaliter ad tenaciorem ejusdem liquidi conditionem: seu, uno verbo, hæc laticum in animali secernendorum quò ad consistentiam, & implicationem contrarietas, trahens etiam proportionaliter contrarietatem longitudinis, & divaricationis viarum devehentium usque ad determinata promptuaria satis comprobatur, diversorum hujusmodi liquorum secretiones præparari, & exequi per vias hujusmodi. Quod de urinaria, & salivari secretionem per dispares deducentes vias cum bilis secretoriis itineribus comparatur, cumulari ulterius potest per aliorum humorum secretiones alias omnes in animali; quibus scilicet proportionaliter ad majorem, aut minorem eorum cohesionem cum sanguine, & diversam in se se consistentiam, diversas in rectitudine, aut divaricatione, longitudine, aut brevitate offerri vias usque ad reservatoria destinata, quisque in anatomicis initiatus poterit manifestè perspicere.

§ XXII.

Urinam jam per viam suam ante appulsum in renes secerni, nostra hæc observatio confirmet. In cane vivente aperto arteriam statim emulgentem nodo ligabam multiplici, scilicet ad principium suum ex aorta, & ad insertiones, seu introitus suos in renes per triplicem jam factam diramationem: Eodemque tempore segmentum simile arteriæ unius cruralis dupliciter ligabam. Sanguis indè totus ex ligato emulgentium tractu, ad patinam extractus, & subsidens illicò separabatur in duplum quantitatis feri subflavescentis, proportionaliter ad feri copiam, in quam facebat sanguis, ex ligata, & aperta crurali collectus, & pariter effusus in patinam. Hic ultimus tardiùs ulterius, & difficiliùs in partes suas, cruorofam, & serosam separabatur. Serum insuper sanguinis cruralis limpidum erat, & diaphanum: serum sanguinis emulgentis lixivo colore saturatum; seu urinosum jam factum

factum. Confer tincturam hujusmodi & copiam urinosam in sanguine emulgentis cum flavo jam etiam colore, & amaro sapore sanguinis portæ, & præsertim secundarum ejusdem diramationum.

§. XXIII.

Secretio seminalis in animali principem tandem in hoc officio viarum liquida devehentium potestatem demonstrat. Arteriam spermaticam ad testes accedentem in mirificos notabiles plexus confirmari, eosque ulterius per testium substantiam prosequi, usque ad insertionem in proprios organi Canaliculos, nemini non latet. Per arteriæ hujusmodi divaricationes seminalis materiæ secretionem præparari, postea per canaliculos testium eandemmet secretionem fieri, omnibus etiam innotescit. Et sicuti, per fistulas hujusmodi spermaticas liquidum feminale jam fuit secretum à sanguine, absque ulteriori glandulari artificio; ita etiam in eisdem ductibus præterea perficitur, evehitur, & per novas eorumdem flexuositates, & meandros tandem derivatur ad receptaculum suum, absque alio cribriformi interventu; seu liquidi spermatici, liquorum in animali principis, præparatio ad secretionem, eademque ipsa secretio per vias simpliciter, & vasa peculiariter conductæ, divaricata, elongata, & inosculantia celebratur: curideò in secretionibus aliis, cur in bile ipsa segreganda diversum excogitabimus artificium?

§. XXIV.

Evincitur denique ex secretionum in animali morbosarum modo, secretiones in eodem naturales per ipsamet vasa convehentia celebrari. Reverà, sicuti vasorum circuitus flexuræ majores, elongationes, & angustiae ad centrum corporis, ubi humorum principalia reservatoria jacent, majores ibidem succorum retardationes procurant, quàm in ambitu, & exterioribus corporis, ubi per majorem vasorum rectitudinem celerius, & expeditius liquores rotantur; sic quoque ex hujusmodi vasorum sanguinis ad viscera pertinentium habitudine, frequentiores longè sunt in eisdem intimis partibus, quàm in externis, non tantum simplices fluidorum retardationes morbosæ, sed etiam secretiones, majores, aut minores: Hinc orgasmi, hinc methastases, quæ species sunt secretionis

cretionis morbosæ; obstructiones inſuper, exundationes, abceſſus, aliæque congeſtiones & ſequeſtrationes vitioſæ; quæ omnes, ut patet, à mera laticum retardatione præternaturali producuntur, abſque glandularis cribrationis interventu. Fiunt inſuper frequentius in illis internis partibus morboſæ huiusmodi ſecretiones, ubi majores lentoris ſuccorum occaſiones vigere poſſunt: crebriores ideo in pulmonibus, ubi cauſa etiam exterior promovendis lentoribus concurrit: crebriores in cerebro, ubi ſolidorum ſiſtaſis languidior eſt. Quæ itaque medicos in acutis, aliisſque morbis deterrent magis, aut exercent, organi ſunt, aut methaſtaſes aut ſecretiones aliæ morboſæ ad pectus, & ad caput.

§. XXV.

Porro, ſecretio in telis pulmonicis præpoſterà, per ſimplicem ad vaſa pneumonica appellentium ſuccorum retardationem morboſam, abſque ulla cribratione glanduloſa, firmiter ulterius elu-ceſcit in variis morbis pectoris, præſertim in pleuri-pneumonicis quamplurimis; in quibus non tantum copię ſeris ſecernuntur uberimæ, in cattarrhi formam expuendæ, aut inſenſiliter per reſpirationem tranſpirabiles; ſed inſuper bilis-met ipſa, ſeris huiusmodi involuta ſequeſtratur, ſapore ſuo, & colore conſpicua; ut alio loco expoſuimus. Nil interim in animali, præter bilem, amareſcere, & flavere, demonſtratum jam fuit: Tum pleuritides, peripneumonias, alioſque pulmonis morbos, calidos, aut frigidos ex liquidorum interfluentium congeſtionibus, aut torpiditatibus auſpicari, nemini jam latet. Ideo in pulmonicis huiusmodi infarctibus, quò lentior unda languinis eſt, eò copioſior adigitur ſeris morboſa ſecretio. In gravioribus hiſce morbis, & in morientibus, ſtertor, quî certà à ſecretione, & exundatione lympharum per veſiculas reſpiratorias ortum ducit, proportionaliter augeſcit, ſecundum gradus lentoris, aut ſeriationis circuitus.

§. XXVI.

Stet jam titulis omnibus demonſtrata, ſecretionis liquidorum à liquidis analogia, non ſolùm inter inanimata, & viventia, ſed præcipuè inter vegetabilia, & animalia: Hæcque non ſolùm ratione inſitorum niſuum in cohæſiones, ſeu in centra varia ſpecialia,

lia, qui liquidis omnibus, animatis, & inanimatis communes sunt; sed etiam ratione viarum, quas liquida secernenda perambulant in plantis, & animalibus; quæ scilicet in utrisque viventibus in varias diramationes, & capacitates conformantur respectu ad fluida, dissimilia, quæ per varias eorundem partes ad usus varios secerni debent, & distribui. Compara itaque jam diversas in arboreis generibus distributiones Canaliculorum, alio capite expositas, cum diversis vasorum convehentium distributionibus ad animalium colatoria quæcunque, seu potius reservatoria; variosque in illis succos terrestres secretos, cum variis in hisce liquidis separatis vitalibus; & amplè tandem deduces, quòd, sicuti in primis per meram ramorum, & ramusculorum habitudinem prædictam, diversitas secretionum emergit in ramorum progressu, aut extremitatibus, absque ulteriori incerniculo; sic in alteris per solam hujusmodi Canaliculorum, & Canaliculorum disseminatorem variam, diversæ etiam resultent liquorum separationes; etiamsi ejusdem supponerentur dispositionis, seu figuræ, & amplitudinis meatus in reservatoriis, secretorii suppositi.

C A P. XIV.

Quid ideo bilis sit : Quomodo fiat in animali: An in solo Hepate generetur : An præviè in sanguine generata jam sit, & confecta?

§. I.

B Illis igitur, in cujus secretionem explicanda, tantus profuit strepitus per Capita antecedentia: *Recrementum est massa sanguinea lentum, & viscidum, in ejusdem sinu paulatim genitum, congestum & secretum.* Vidimus ejusdem compositionem duplex agnoscere elementum in genere: Primum jam pridem in massa congruum, & utile; postmodum incongruum factum, & inutile: Alterum massæ quidem introductum, eique per tempus aliquod immixtum; sed nunquam inutile, congruumque componens redactum.

§. II.

§. II.

Reverà, variæ in fluidum generale introductæ pingues, oleosæ, & molli quadam, ac in omnem sensum cedenti structurâ præditæ cibariæ particulæ; subactæ indè, divisæ, & subtiliatæ, in ejusdem cruoris formam univocam vertuntur; Quæ postea per longum tempus, & circuitûs varios, motibus allisionum, caloris, & resiltionis quamplurimis quassatæ, sensim indurantur in sese, & obrigescent; semotisque intermixtis diversæ naturæ removementibus substantiis, emergunt, & approximantur; hinc doctem insitæ implicabilitatis recuperant, & in naturales occursum, & cohæsionum nisus suos restituuntur: Vndè ex tenuioribus in grandiores massulas spontè complexæ, susceptum jam pridem usum in sanguine deponunt, indutâ recrementi specie. Hanc bilis naturalis propriam, & legitimam speciem, tanquam oleum sanguinis coctum considero: Cum Willisianis dephlagratum sanguinem, aut melius incineratum sanguinis sulphur vocitare possem.

§. III.

Aliæ autem substantiæ ab alimentorum pansphermia suggeruntur naturaliter sanguini, quæ nec in ejus naturam unquam conveniunt, nec utiles in eodem sunt; Resinosæ variæ, silvestres, asperæ, striatæ; imo & salinæ, & terreæ, aliæque grossiores, omnes in genere non minùs irregulares, quàm implicabiles. Hæ omnes in cruoris gremium transfusæ, invincibiliter improporcionatæ, debitæ ejusdem suscipiendæ assimilationi obluantur. Hinc tam diu per alveum commune fluctuant, ut inter se se magis comprehensæ, & nitentes, segregandæ indè veniant à puriori humorum compage, tamquam graves, & incommodæ. Istæ omnes speciem bilis supernumerariam, & tamquam spuriam constituunt, quâ alteri speciei, seu legitimæ associatâ, ex utrisque per symbolum implicabilitatis nisum totum simul bilis corpus accumulatur. Sed hæc recrementorum geneses, & phases, in sanguine, jam tetigimus *Cap. 1.*

§. IV.

Utramque bilis speciem descriptam, veram, & veræ similem, non

non tantum formaliter insidere jam sanguini, cum junctæ jam simul sunt per propagines portæ, ante adventum in concursus hepatis; sed cum adhuc divisæ per massam rotantur, in cohæsionum suarum momenta accedentes, aut non adhuc accedentes, ex superioribus manifestum venit. Bilis siquidem natura fundatur in certo gradu coctionis, & cohæsionis olei nutritii, aut corporis alterius analogi, in sanguinem introducti; eique aut assimilati, aut non assimilati: Et hic gradus, per totum cruoris semper incalescentis orbem, molleculis quàmplurimis indeficienter concernit: Ut ideò inconcussè valeant generales assertiones: Bilis naturalis speciem quamcunque semper realiter affidere sanguini, ante omnimodam ejus sequestrationem in hepate: speciem bilis, quæ ex utilibus jampridem particulis sanguinis conflatur, reperiri in sanguine totâ bilis essentiâ indutam, saltem in viis sanguineis specialibus à corde ad hepar: Bilem autem inferiorem, à succis nutritiis nunquam in sanguinem assimilatis productam, formaliter jam volutari per vasa quæcunque languiduca, majora, minora, aut minima. Cum tamen Homines gravissimi per medicinæ ætates omnes, & moderniores præcipuè, surrexerint; asserentes bilem non in sanguine formaliter extantem, sed solum in hepate post ejus secretionem; ideo ad rei evidentiam, & complementum, quater eorum rationes decrevimus.

§. V.

Clar. *Verehienius*, inter fautores modernos biliosæ in solo hepate generationis vir summè spectabilis in *supplemento suo anatomico*, comprobare nititur per varia exempla communiter obvia, particulas felleas in massa sanguinis, principiis cæteris hîc illîc interspersas, indè per hepatis glandulosos meatus separatas, & simul colligatas, compositum novum, quale in massa priù non aderat, seu ipsammet bilem, illo actu secretionis, & colligationis, efficere. *Ex infusione*, inquit, *nucum Gallarum, & dissolutione vitrioli simul commixtis fit atramentum, seu tertium compositum quoddam, omnino à dictis duobus concurrentibus principiis in colore, consistentia, aliisque qualitatibus dissimile; humor scilicet spissus & nigerrimus ex duobus liquoribus, limpidis, & tenuis consistentia.*

K

phur

phur auratum conficitur ex scoris reguli antimonii; quibus scilicet coctis in aqua communi, factaque colatura, liquor emergit vulgari lixivio non absimilis; cui si acetum infundas, totum compositum redditur in momento instar mellis spissum, cum intensa flavedine, & fœtore intolerabili. Plumbum ustum aceto distillato infusum reddit illud brevi tempore instar sacchari dulce. Varia salium, & spirituum genera, non minus in totum promiscuum sanguinem, quam in solam albuminosam ejus partem per varia experimenta, introducta, novas quò ad consistentiam, colorem, & saporem, substantias procreare videntur. Aliaque plurima sensum hunc suum repandentia citato opere adducit Author celebratissimus.

§. VI.

Sed hujusmodi analogiæ non quadrant. Jam ad bilem producendam non concurrunt substantiæ disparatæ, necessariae, & æqualiter prædominantes; ut duæ, aut variæ concurrunt diverſi generis materiæ ad confectionem atramenti, sulphuris aurati antimonii, aut entium novorum in promiscuo sanguine, aut parte ejus determinata. Bilis integram naturam constituunt congenere particulæ; oleosæ scilicet, ad quemdam cocturæ gradum evectæ; seu tamquam veterascentes in sanguine. Hæ bilis principium prædominans, & essentialiale unice constituunt: Alia principia in bilis mixturam venientia, eidem essentialia non sunt, nec ad ejus naturam integrandam advocantur; molem solum commodiorem præbent; aut fortuito per implicabilitatis similitudinem in ejusdem complexu intricantur; ut toties per superiora demonstravimus, sic aquea pars ad bilis vehiculum merè introducitur; quæ ideò in variis bilis statibus aut exuberat, aut deficit; nec tamen bilis natura variatur. Alkali in bile modicum est, depressum, & famulans. Ideò per observationem ejusdem Cl. Verehienii bilis acidis immixta, nullimodè in effervescentiam insurgit. Acidum an fedeat in bile naturali, hucusque non bene perspectum. Sola oleositas, ejusque attributa omnia in bile prævalent, & emicant; eamque ideò constituunt.

§. VII.

Ubicunque igitur dentur per sanguinem stamina hæc oleosa,
ad

ad quemdam cocturæ gradum redacta, eique supernumeraria jam sint propter dispositiones superius expositas, quamquam à sanguine non adhuc bene secreta, ibidem profectò aderit forma bilis legitima; postea evidentiùs emergens, ex facta majori eorundem staminum aglomeratione, proportionaliter ad accessum sanguinis ad hepar per portas. Cum autem extent perpetuò per totum sanguinem massulæ hujusmodi staminosæ, peculiariter induratae, & concoctæ; extat etiam perpetuò per totum sanguinem bilis, in propriam naturam constituta. Demus, bilem non secretam adhuc in hepate, sed aliquando secernendam, sanguinique confusam, bilem imperfectam vocari posse; hæc tamen à bilis natura excludenda non erit. Demus bilem illam perfectam dicendam, quæ jam secreta à toto sanguine, vel in porta stabulatur ante contactum hepatis, vel jam per propria reservatoria confluit; stamineæ interim, ramosæ, veterascentes prædictæ partes, non adhuc per portam fluitantes, sed in vasis diffitis aliis sanguiducis, arteriosis, & venosis, ad portæ tamen secretionem dispositæ, genuina saltem bilis rudimenta appellandæ venient.

§. VIII.

Instat *Verehienius*: nil in sanguine amaricare, ante ejus adventum in hepate; ideoque nil bilis adesse in sanguine ante secretionem hepaticam. Nos facilè negamus, bilem in propriam naturam constitui per saporem amarum, ut nec per consistentiam quamdam. Bilis ordinariò amaricat; nec per hoc tamen à bilis natura dehiscit, quæ in infantum jecinoribus secreta, insipida est, & quasi subdulcis ut eam canes, aliaque animalia suavissimè lambant: sic quæ pariter insipida in ductu hepatico, & in folliculo suo apud cachecticos, aliosque infirmos offenditur, non tamen à bilis familia proscribitur. Idem dicendum de tenuiori, aut crassiori bile; pallidiori, aut colorationi; ut ideò hæ omnes differentiæ varias bilis adimpleant species, bilis naturam non deponant: Ut pateat, non ab extrinsecis proprietatibus, sed ab intrinsecis individualiter componentibus bilis naturam constitui.

Idem humor biliosus in eodem animali diversas saporis, coloris, & consistentiæ habitudines trahit, secundum diversam suam per varias partes agglomerationem; propriâ tamen bilis essentiâ ubicunque perfruens. Eadem idcirco bilis, quæ adhuc in Componentibus suis disjuncta, ac roridis multis, & insipidis substantiis adhuc intermixta, dilatata, & enervata, seu tamquam immatura, per propagines portæ sapido satis aculeo non potitur, ad imprimendam notabiliter amaritiem; strictius indè cohærens, & sincerior facta per hepatis parenchima, & ductus ejus excretorios, derivatis per vasa rorifera innumera limphis subtilibus intermixtis, amarior est, & magis consistens: Crassior indè, saturatior, & acrior in folliculo suo, & cistico ductu, ob auctum, per quietem, principiorum nexum, factas in eisdem majores moles, & exaltationes; inertioribus partibus cunctis exhalatis, & absumptis; seu tamquam ultimo coctionis, & maturitatis suæ accepto gradu. Nec ideo ad bilis naturam faciunt consistentia bilis ordinaria, color, aut sapor; adeo ut, non minùs biliosæ naturaliter particulæ vocari queant, quæ in ictericis plurimis serum sanguinis educti croceo intingunt colore, & lintea eodem imbuta similiter inficiunt, nec tamen amaritiei sensum linguæ gustanti communicant, ob enervatam earum cohæsionem; quam quæ per sanguinem portæ ad hepar accedentis oleosæ substantiæ, veram bilis essentiâ gestant; licet ob infirmam adhuc agglomerationem amaræ non percipiantur. Sed quid dicerent, quoties exhiberem, sanguinem portæ, sensibili jam amaritie prehensum ut superius exposuimus; & serum innatans sanguini, ab ictericis extracto, frequenter etiam notabiliter amaricans animadverti?

§. X.

In morbis innumeris, bilem, in suo esse nimium forsan constitutam, fluctuare per vasa, etiam ab hepate satis dissita, congeri in variis partibus, variasque anomalias edere, practicis, & medicantibus omnibus inconcussum est. Tota ideo praxis invertenda foret, si constaret aliquando, bilem non nisi in hepate generari, aut congeri. Respondent; dari quidem bilem in morbis per va-
fa

sa sanguifera, & partes ab hepate diffitas realem, & legitimam, sed jam pridem in hepate genitam, & secretam, hinc traductam per vasa ab hepate abducentia. Et ego assero; bilem in hepate secretam, densam adeo, & disparem supra totum sanguinem consistentiam & cohæſionem induere ob propriæ ramositatis triumphum, Quod toties jam vidimus, & ſequenti capite ulterius examinabimus; ut concipi haudquaquam poſſit, eamdem, ex reſervatorio ſuo per vasa excretoria ſemel ablegatam, reflecti in ſanguinem poſſe; Hinc bilis quæcunque morbos faciens, per ſanguinis alveum delinquens ſupponi potius debeat, tamquam adhuc per hepar non ſecreta; quin imo delinquere, quoniam ſecreta non fuerit. Sed quid amplius? non ne in morbis quibuſdam manifeſtatur, dari bilem realem in ſanguine ante ejus ſecretionem in hepate; dari autem cumulatiffimè in ſanguine, hinc ad partes varias transfundi, ob impeditam ejusdem ſegregationem in hepate? Omnium conſenſus eſt, regnare icteri ſpeciem, in qua opilatis meatibus hepatis, bilis luxuriat in ſanguine, & per varias partes exundat; cui ideò oportunè occurrimus, hepatis clauſtra reſerando; bilem ideò per alias partes indebitè vagantem, & deviam, ad curſus ordinarios, & diſtributiones ſuas invitando. Sed ad hæc bilis morboſæ diſquiſitiones alius nobis erit locus ampliffimus.

§. XI.

Bilem, tamquam ramoſam, & intricatam fluidorum animalium partem, abſque præparatione, ſeu quadam adaptatione ſecerni non poſſe, ut pote res ampliffimè à nobis demonſtrata, etiam apud contrarios fautores in dubium revocari non poteſt. Præparatio huiusmodi ſecretioni hepaticæ præcedanea eſt; fitque in ſanguine ante ejus diſtributionem in meatus ſecretorios hepatis, non autem in ipſomet hepate: Idem etenim viſcus traducti celeriter ſanguinis præparans eſſe non poſſet, eodemque puncto ſecernens. Cum itaque præparatio ad ſecretionem ſit quædam præparabilium excentratio, ideoque corpus præparabile jam præſupponat; præparatio in conſequens eſt inchoata ſecretio; adeo ut, & præviam eſſe bilem in ſanguine ante ſecretionem hepaticam

cam, & præviè jam à massa communi excentrationes suas eandem moliri, seu bilem in sanguine ante secretionem hepaticam formaliter præexistere, etiam apud eosdem adversarios valere debeat: Quæ jam titulis omnibus probavimus.

CAP. XV.

An bilis ex se se tenuior sit toto sanguine simul sumptio; an æqualis consistentiæ; an crassior.

§. I.

DEtritissimus per omne genus scientiarum, simulque humanissimus, Præsul Joannes Maria Lancisus per eruditam epistolam mihi, quantâ voluit benignitate, transmissam, & primas Historiæ hujus hepaticæ editiones collustrantem, duo ex assertis illis nostris principaliter declinat. Primò scilicet directæ inosculationes extremitatum portæ cum exordiis pori bilarii in parenchymate hepatico; transversæ autem cum rudimentis cavæ, Viro Præclarissimo non probantur; cui scilicet portæ, & ductus bilarii communes ubicumque per idem viscus invaginationes flexuram potius in eorum concursu acutissimam suggerunt; tum cavæ, & portæ dissimiles ubicunque divaricationes, & inclinationes diversos etiam in earum finibus indifferenter concursus imponunt. Secundò bilis, ante ultimas ad hepar sequestrationes suas, consistentiam ex se se totâ humorum massâ crassiorem nobiscum non admittit Præsul accuratissimus; tum quia in hoc casu sanguis etiam per bilis incernicula in naturæ statu perflueret; tum quia præcipuè, bilis motu interdum per cholidochum intercepto, hæc per eas se se vias insinuat; ad quas nullus in naturæ statu patet sanguini aditus; veluti per glandulas salivales in os, & fauces; per renum tubulos in vesicam; & præsertim intra membranam oculorum adnatam, seu conjunctivam.

§. II.

Ad primam Eruditissimi Præsulis agitatam difficultatem lubenter confideo; siquidem nec ultimorum in vasis hepaticis adduc-

centibus

centibus, & abducentibus concursuum modos, nobis hucusque, & forsan in perpetuum impervios, nec nisi mentis acie attingendos, meliori studio demonstrare me posse confido; nec insuper melior eorundem demonstratio jam petitur ad explicandam secretionem; quam nempe, quâcunque suppositâ concursuum configuratione dilucidè explicari, tot assertis superioribus jam vidimus. Ab hoc idè impostero excutiendo misterio me abstineam. Sed cum mihi bilis crassities naturalis ultra totum sanguinem demonstrari magis posse, quàm concursuum figura videatur; hinc placeat æstimatissimo Archiatro, ut leviuscula quædam novis hisce Historiæ nostræ Hepaticæ supplementis superducta Capituli etiam novi argumentum impleant. Hæc interim quomodocunque Vir Clarissimus, & Veneratissimus approbet, aut rejiciat, submissum me, & insectantem habebit.

§. III.

Sicuti valet assertio, humorem quemcunque, seu quæcunque principia, quæ degant, & rotentur per sanguinem absque ulla adhuc suscepta secretionis dispositione, jacere sub uniformi solutione universali; eodemque impulsu emboli, & vasorum collisionibus agi cum cæteris quibuscunque succis; ideoque in hoc statu nec crassiorem, nec tenuiorem super alias immixtas substantias consistentiam induere, sed eandem omnia inter se se & uniformem servare, proportionaliter ad uniformem in omnibus servatam divisionem; Ita etiam valet asserere, eadem liquida in quamcunque jam secretionis præparationem venientia, non quidem super alios immixtos humores attenuari; quin imo sensibilibiter incrassari, densioremque necessariò habitudinem suscipere. Reverà, sicuti præparatio secretionis in liquidis per majorem particularum componentium approximationem, & inchoatam cohæsiōem celebratur, sic etiam ipsamet actualis secretio tota est approximatio homogeneorum, & cohæsiō; ut idè secretionis præparatio, & actualis secretio directè opponantur attenuationi, quæ nempe in majori componentium dissociatione, mutuoque recessu consistit. Quamobrem, acceptabile sit, humorum secretiones, seu particulares quasdam liquidorum inter se se conformium collectiones, veras esse

esse eorundem incrassationes; majores, aut minores, secundum diversas eorum naturas; absolute autem majores supra consistentiam totius sanguinis, ex quo discedunt. Id autem non tantum de bile, quam de aliis etiam tenuioribus humoribus quibuscunque intelligendum proportionaliter venit.

§. IV.

Quod ideo rudimenta bilis, quousque sub uniformi totius sanguinis solutione, & dispersione degunt, eandem proportionaliter cum toto sanguine tenuitatem, & elongationem servant, omni procul dubio caret. Sed in hac dispersione bilis adhuc non adest, quæ certè ex rudimentorum hujusmodi collectione, & agglomeratione generatur. Qua de re, quotiescunque id, quod bilis in sanguine prius non erat, bilis jam fit, seu staminum quorundam oleosorum rudimenta, dispersa prius per sanguinem, ad quoddam cohæisionis principium accedunt, eodem etiam momento, id quod communem cum toto sanguine, & uniformem tenuitatem servabat, crassiores, proportionaliter ad majores, aut minores susceptas cohæisiones, habitudinem induit; ut nulla in consequens concipi possit gracilis quæcunque particula, in novam cohæisionem accedens, quæ consistentiam ex se se crassiorem toto sanguine non ducat. Reverà, recessio particularum bilis ab individua totius sanguinis tenuitate proportionalis est ad cohæisionis gradum in componentibus suis: Cum autem qualiscunque sit hujusmodi cohæisionis gradus, ab illa semper totius sanguinis uniformi divisione recedat, consequenter etiam à tenuitate cruoris communi liquidum cohærens declinat, novoque crassitiei gradu superducitur. Fieri autem agglomerationes hujusmodi & cohæisiones in sanguine, ad bilem necessariò parandam, inchoandam, & formandam, etiam ante absolutam secretionem hepaticam, luculenter demonstravimus.

§. V.

Principia in bilem convertibilia, & per alveum cruoris volutata, nec adhuc agglomerata inter se se nullam certè bilis apparentiam depromunt, per quamcunque corporis partem percurrant. Rudimenta bilis, seu ramenta sulphurea excocta, quæ quamdam
jam

jam umbratilem cohæſionem inire potuere, in primis hiſce cohæſionibus nullam etiam per partes bilis adhuc apparentiam deprimere poſſunt. Cum etenim bilis præſentiam non niſi ſpeciales ſuæ in colore, ſapore, & conſiſtentiâ habitudines teſtentur, patet, in inſenſilibus bilis inchoamentis hujusmodi, tantam non dari extensionis, ſeu collectæ jam in unum corpus materiæ, menſuram, ut hæ habitudines ſenſiles fiant. Fluent itaque minima hæc corpuscula, licet inchoativè bilioſa, inſenſiliter cum ſanguine, nulliſque in locis ſe ſe deprimunt: ut inviſibiles perfluunt confuſæ cum aqua forti particulæ metallicæ, ad illam molis parvitatem redactæ, per quam lucis radios ſenſibiliter non revehant, ſeu lucem poſſint eludere. Ideo quôcunque tranetur ſanguis, & ipſa ducentur inſenſilia bilioſa elementa, abſque ullo oblato eorum exiſtentiæ argumento, per vaſorum omnium capillamenta, per fibrarum interſtitia, per tunicas omnes, per ipſammet tunicarum ſubtiliſſimam oculorum *adnatam*; per quam nempè non minùs inſenſiliter præterlabentur, abſque ulla inflicta impreſſione coloris, aut alterius habitudinis ſuæ, quam ſanguis eorum ductor, in naturali conſtitutione poſitus per eandem trajiciatur, nihilo coloris, aut corpulentæ ſuæ in eadem relicto.

§. VI.

Detur jam, rudimenta hæc bilioſa aglomerari magis, & ſucceſſivè incrassari inter ſe ſe per ſanguinis orbem, & præcipuè per vias à corde ad hepar, huic operi deſtinatas: Detur jam, bilioſorum hujusmodi glomeraminum liberas per reſervatoria hepatica diſtributiones interceptas iri, aut imminutas; quæcunque ſit in hoc viſcere cauſa obſtruens, aut aliter impediens: Patet etiam, corpora bilioſa hujusmodi, per alveum ſanguinis ſe ſe accumulantiæ, eam jam molis menſuram attigiffe, qua bilis in colore, & conſiſtentiâ habitudines propriæ prodire in patulum poſſint. Eodem ritu, ac metallicæ ſubſtantiæ in majores jam moles, & agglomerationes per ſpatia menſtruorum ſuorum ſolventium accedentes, ſenſibiles tandem fiunt, & propriis ſoliditatibus, & figuris competentem opacitatem explicando, lucis radios ſatis retorquent, & habitudines ſuas integrè obverſantur. Ideò à ſanguine

guine excentratæ felleæ hujusmodi substantiæ, sicuti jam per portam consistentiam suam, colorem, & saporem-met ipsum præferunt, ut vidimus superius; ita etiam ab hepatis secretionem interdum retropulsæ, & reflexæ, ac in partes alias determinatas depositæ, naturalem flavedinem, & spissitudinem sensibilibiter explicabunt, & per easdem noscentur; eosdemque modos suos deproment, non solum in omni quacunque membrana, ubi consuecunt retrogradè à sanguine eructari; sed magis in subtilissima oculorum tunica, adnata dicta, tanquam scilicet illa, quæ super alias partium tunicas proprias, oculis adstantium immediatius comparet; quotiescunque in fistulas earundem tunicarum insensiles, & minutissimas traductæ, ab earundem angustis, ob naturalem tenacitatem, expediri non possint, nec ulterius unà cum toto sanguine, propter tenuitatem suam præterlabente, adsporiari.

§. VII.

Constat bilem, per varios morbos, aut impeditam suam per receptaculum suum derivationem, in membranis partium succingentibus variis, & præcipuè oculorum tunica adnata figi, & effundi; non certè ob tenuitatem ab eadem supra sanguinem totum contractam, sed ob naturalem, imo & ulterius superadditam crassitiem, propter quam scilicet in illis partibus remoretur, per quas sanguis consistentiâ tenuiori præditus insensibiliter præterlabitur, & expeditur. Reverà, ut adnatæ, tanquam visibilioris succingentis tunicæ exemplo utamur, in ophthalmiis, aliisque oculorum suffusionibus, sanguis crassior factus ultra statum naturalem, indeque lentescens, & stagnans, in eisdem adnatæ canaliculis concrecit, & restitat, ubi in ictero, siphilide, aliisque morbis bilem concrecibilem deponit, & stagnantem relinquit, servatâ in se se tenuitate suâ, motuque ideò ad ulteriora progressivo. In hisce ideò ocularium affectionum casibus sanguis concretus muricem suum, suamque aglomeratam molem præsefert; ut in aliis casibus flavedinem suam, & molem in eisdem vasorum alveolis bilis irrita ostendit. Non ideò interdum per morbos varios bilis cumulat in adnata, aliisque proportionaliter partium corporis interioribus

rioribus tunicis, quia *per eas se se vias insinuet, ad quas nullus in natura spatium patet aditus* sanguini; quin imò, quia per propriam, & superadditam crassitiem illaqueata, vasa illa transmeare non potest, & præterlabi, quæ facile transmeat, & præterlabitur sanguis totus, eandem idè ad dictas angustias convehens, & in eisdem relinquens.

§. VIII.

Sanguinem in suffusionibus, & ophthalmiis crassioresse esse ultra statum naturalem, ab omnibus cordatioribus admittitur. Comprobatur à natura morborum, in quibus frequentes sunt, contumaces, & chronici affectus oculorum hujusmodi; ut in lue venerea, Rheumatismo, chlorosi, suppressionibus menstruum, aliisque morbis fluxionariis, in quibus sanguinem crassitie extraordinaria fieri, ultra omne dubium est. Demonstratur insuper à sublevantibus remediis, quæ non nisi attenuantia sunt, & discutientia variis modis usurpata. Quamobrem, sicuti sanguis in ophthalmiis, & suffusionibus idè per adnatam manifestatur, quia vasa ejus exilissima, & ob exilitatem invisibilia, quæ prius insensibiliter trajiciebat, in propria idè invisibilitate relinquens; contractâ nunc crassitie extraordinariâ, hinc factâ improportionem molium suarum grandiorum cum exili eorum diametro, tum eadem ad latera sensibiliter extendit, sensibusque idè manifestat; tum in eisdem dilatatis lentescit, & remoratur; ut idè in hisce morbis vasa *adnatæ* turgefacta non tantum videamus, sed numerare etiam possimus; ita quoque bilis, quotiescunque per reservatoria sua derivari competenter possit à sanguine, aut majorem crassitie gradum adepta adhuc non fuerit, per laudatos tunicæ oculorum *adnatæ*, seu conjunctivæ canales insensibiliter trajiciet cum sanguine; secus autem in habitudine opposita. Quod si dicatur, bilem in ictero, aliisque morbis non per eadem vasa membranarum, & *adnatæ* præcipuè, concrecere, & aggregari, per quæ sanguis in effusionibus suis cumulatur, sed per totam indifferenter membranarum substantiam, & minores earundem intercapedines seu inter fibræ, & fibræ effundi: Respondeo, contrarium deduci ex facili in his morbis effusæ bilis restitutione ad circulum;

culum; cui certè tam facilè restitui ita non posse videtur, nisi vasa circuitûs adhuc occupasset; aut saltem nisi post novam tenuitatem adeptam; ut semper firmiori stet talo; præviam ejusdem crassitiem superadditam pro morbi fomite indicari.

§. I X.

Sed, non tantùm evincitur, bilem per eas vias trajici non posse, per quas non trajicitur sanguis; sed neque per omnes minores vias, per quas sanguis trajicitur: Ut ideò ejusdem crassities in statu naturali supra totum sanguinem simul sumptum ulteriùs confirmetur. Reverà, multipliciter per hanc totam historiam jam constat, bilem etiam sinceram, per chili vias, seu per galaxiam insinuari naturaliter non posse: Chilus autem toto sanguine crassior adhuc est: nam sicuti alibiles succi lacteorum oscilla non penetrant, nisi minima eorum reducta priùs fuerint per trituras naturales ad illam parvitatem, quæ est proportionalis ad parvitatem molecularum sanguinis, alimoniâ, transpiratione, aut secretionibus aliis deperditarum, quarum nempe supplementis illi præstosunt; sic in massam introducti, per tot motus obvios ulteriùs attenuantur, antequam naturam sanguini univocam suscipiant. Multò ideò minùs trajicitur bilis naturaliter per vias illas, per quas iidemmet succi, in sanguine tenuiores jam facti, ab eodem discedunt, & in partium alimoniam transponuntur. Cùm ideò succorum nutritiorum molleculis grandiores sint adeò bilis molleculæ naturales, ut voluminis improportione introduci naturaliter non possint, nec præterlabi per vias eorum ordinarias; fortiori de titulo molleculis propriè sanguineis erunt etiam naturaliter grossiores; ut ideò moles omnes liquidi biliosi superare debeant in genere, & in specie dimensiones molium omnium particularium sanguinis; eòque meliùs, quò biliosæ moleculæ, antequam in majores moles, seu in propriam bilis naturam coadunatæ forent, principiorum etiam grandiorum sanguinis magnitudinem jam æquabant: ut vidimus: Ideòque ultra abundantiam probati jam fuerimus: Bilem totam toto naturaliter sanguine crassiorem esse.

§. X.

Sed quid insuper? Liquidi biliosi supra totam cruoris substantiam

tiam crassities hujusmodi in animali naturalis, tantâ jam argumenti divagatione importuna, præter gravissima hæc practica, & anatomica testimonia, elucescit ulterius per staticum experimentum, pluries à nobis fæliciter tentatum. Extracta ab animali bilis quantitas, & cum equali volumine sanguinis statim à vivente extracti ad lancem comparata, decima sextâ ad minùs totius voluminis parte, & interdum majori, eodem ponderosior observabatur. Nec certè aliud est crassities unius, aut alterius corporis major, aut minor, quàm in uno, aut altero major sub æquali superficie, aut volumine quantitas partium. Ceterùm dari bilem toto sanguine præternaturaliter tenuiorem, seu bilem *Sylvii* spiritualisatam, per morbos varios, præcipuè ardentiores, aut acutiores obviam, non inficior. De hac in secunda hujus historiæ parte, & meliùs in tertia alloquemur.

C A P. XVI.

Bilis usus post ultimam à sanguine secretionem suam in hepate.

§. I.

JUvat ideò repetere, Bilem, jam foras omninò à sanguine exantlatam, & disjunctam in reservatorio hepatico: *Concretum esse ex resiniformi substantia, asperiorique aliquali salino-fixa, in sanguine inutilibus, sero ceterùm competenti eliquatis.* Sed cùm ille sit machinæ animalis ordo, ut liquida aliqua, sanguinis compositioni non amplius facientia, sicque ab eo per congruas partes rejecta, ad utilitates adhuc quasdam administrantur, antequam discedant è corpore; Bilis in horum censum accedit; stante quòd commodis adhuc animalis egregiis destinatur, post acceptam à sanguine secretionem. Eam ideò adnumeravimus inter humores recrementitios, quo nomine donamus liquida laudata; & à succis distinguimus, post suas à massa generali determinationes omni calculo inutilibus; quos propriè excrementitios noncupamus.

§. II.

Bili igitur jure gratulamur, ab injuria illa nostris temporibus

vindicatæ, qua ab medicinæ Proceribus inter secundæ coctionis quisquillas conscripta, statim à suo in intestina depluvio exulabat per alvum à corpore, turpis; omnique usu, præter desidendi proritationem, exauctorata. Eam tamen tanti non pendimus, ut cum *Bachio*, *Francisco de le Boe Sylvio*, aliisque recentibus, *corporis balsamum*, *sanguinis condimentum*, *incendii vitalis escam*, *spirituum materiem*, decantemus; ut vix in hepate, seu potius adnato folliculo genita bilis, statim per ductus bilarios, & cavam in gremium sanguinis restituatur, tamquam motuum suorum omnium, vitæque principium. Plures Moderniorum Doctissimi, *Malpighius*, *Needham*, *Bellini*, *Taunry*, alique, sententiis hujusmodi, naturali œconomix animalis normæ, humorumque cursui ordinario ex diametro repugnantibus solidissima opposcentes ratiocinia, & experimenta, eximunt nos ab hac disquisitione. Taceo *Fallopiz*, *Jasolini*, & plurimorum opiniones alias; de bile ab intestino obdescendentem ibidem chilum, in cystim felleam, tamquam in diverticulum, retrograda; de duplici, quò ad naturam, & quò ad originem diversa bile, hepaticâ scilicet, & cysticâ &c. prout satis à limpida horum temporum oculatione dissipatas.

§. III.

Ea est bili assignanda functio, quæ certa ex rerum variarum testimonio perhibetur. Et equidem, cum vitiatâ bilis ab hepate in intestinum transmissione ventris turbationes prodeant, nausæ, inappetentiæ, cruditates, icteritiæ, hydropes, prostrationes, tabes, aliaque vitiatæ primæ coctionis satellitia æquum est, ut eam ad chiloseos negotium apprimè facientem decernamus. Si autem obviantem in duodeno chilum fluidiorem, subtilioremque reddat, solutâ eiisdem partium cohæsione, tamquam vehiculum summè penetrans; aut defæcet à sordibus, & arceat à putredine, tamquam solvens menstruum, & balsamicum; vel per volatiliores suas partes motum impertiat molleculis ejusdem liquidi, easque maturet, & perficiat, crudo acore retuso; per oleagineam portionem suam uniat, & adaptet ejus principia; per salinam partem mucilagines abstergat, crassiores ejusdem chilosi laticis substantias scindat, tamquam totidem cuneis valentioribus armata, & com-

& comminuat, evehetque in alcali volatile; agiliores autem nimis obferatas extricer, & relever; fœces præcipitet; alcalino succi pancreatici ibidem etiam irrigui aciditate fermentationes exciter, chymi solutionibus collimantes; aliaque synonyma quamplurima Physiologis ruspatoribus, & innumeris codicibus decantanda relinquo. Nec minùs siquidem recentiorum ingenia detorquet turbida hujus phœnomeni de usu biliario explicatio, quàm celebris *Democriti* apud antiquos excusserit cerebrum, ex fixa nimis arduæ hujus rei venatione in desipientiam quasi projecti. Nos simpliciora amplectemur; Usunque bilis ibimus exposituri, qui rerum animalium concentui magis forsan accedat. Sed ut rem diligentius attingamus, expediet, quædam de functione ventriculi, & primis, ut dicitur, coctionum officinis, etiam proximiora præferre: Quin imò, ad eruditionis complementum, ex placito moderniorum super hisce opificiis curiosiori inchoare.

§. IV.

Actio ventriculi, (*asserunt*) pisturæ genus acerrimum est; ubi molarum momentum omne perficiunt diaphragma, abdominis muscoli, ventriculus, & adjacentia viscera; ubi scilicet quatitur alternè ventriculus, elevatur, deprimitur ab actione alterna diaphragmatis; pellitur, repellitur à potentiis etiam alternis musculorum abdominis; alternè ideò in solida adjacentia, hepar, lien, pancreas, aliasque attiguas partes impingit, alternè impingitur: Ut ideò in ventriculo, per rudes vicissim hujusmodi contactus jactato, commollantur etiam inter se se, quassentur, & solvantur introductæ alimentariæ substantiæ; non secus ac metallorum fragmenta, per longum saccum, ut artis est, sus, deque conjecta, & concussa, atteruntur inter se se, & attrita polliuntur.

§. V.

Hæc tamen solidorum alimentariorum trituratio, seu pistillatio in ventriculo, sinè liquidorum quorundam interventu non perficitur; Quæ scilicet attritas partes integræ solutioni disponant, laxando, & emolliendo. Sic in artificialibus solida alimentaria, vegetabilia, aut animalia, non dissolvimus pistillando, seu in emulsionem, ut dicitur, non reducimus; nisi per competentem
affusio;

affusionem aquæ in actu pistillationis. In trituris pariter solidorum non alimentitiorum, *exempli gratiâ*, in consecandis lapidibus, frequenti aquæ aspersione utuntur artifices; quæ nempe solutioni partium marmoris à serra procuratæ ultimam manum præbet. Eodem ritu, quæcunque sit triturationis facultas in solidis ventriculi, & partium adjacentium; exacta tamen solutio sine quadam liquidorum aspersione, & imbibitione celebrari minùs posset. Hinc stomachali molendrino præsto sunt ulteriùs irrorantes, & laxantes latices; salivæ scilicet multigenæ à tot fontibus extillantes, superiùs, inferiùs, ad latera.

§. VI.

Et sicuti corpora quæcunque alimentaria solida, pistillationi artificialiter subjecta, ac laticibus irrorata, & imbibita, in duas partes faceffunt; scilicet in succum albescentem lacteum, seu florem mixti, qui propriè emulsio est; & in aridam partem, seu exsuccam & duriores, residuam scilicet à liquido, & flore extracto; similis etiam in ventriculo res venit: Similis pistillatio; similis liquidorum in pistillatione irroratio: Similis ideò partium, liquidæ, & exsuccæ separatio: Emulsio scilicet per pistillationem, & liquidorum salivarium affusionem; quæ propriè chylus est; & restitans pars arida, & inutilis, seu intestinale excrementum. Et sicuti sine liquido adperso emulsio in artificialibus non fit, quodcunque sit triturationis momentum; sic etiam in naturalibus, chylusa emulsio non fieret, nisi adpersis, & immixtis salivis solventibus; quæcunque foret quassativa potentia ventriculi. Quamobrem, licet in functione ventriculi solventes salivæ materialis causæ naturam non excedant; ut eundem etiam merum materialem concursum trahunt liquida alia in prædictis artificialibus solventia; non minùs tamen necessariae sunt, quàm ipsæmet efficientes solidorum quassationes. Patet cæterùm in tritûs genio fundari stomachalem functionem; quia animalia voraciora, & magis digerentia lapidibus plurimis, tamquam multiplicatis atterentibus molis, in ventriculo assiduè degentibus, ditantur.

§. VII.

Trituratio alimentaria ab utre primo naturali inchoata profequitur

quitur successivè in omnibus solidorum corporis loculis majoribus, & minoribus; seu in utriculis partium omnium elasticarum, & oscillantium; ubi succi omnes, jam pridem in stomacho soluti, successivè appellant. In hisce novis recipientibus novam fieri succorum proportionaliter moram; hinc in eisdem solutionem renovari, mutato solùm pistillandi instrumento, probatur ex eorumdem succorum natura, & exigentia. Sinus omnes partium animalis sunt *tot veluti ventriculi, & tritus officinae*. Nam quos à stomacho recepere succos, subigendo elaborare pergunt. Igitur chilus è stomacho vasa subiens, dum omnia qualis, aut quantus sit, totus ingreditur, sic singula percurrit, ut molem quidem aut massam suam exuat, non naturam sunt verba Ingeniosissimi, & expertissimi D. Hecquet in libro suo: *De parganda medicina à curarum sordibus*.

§. VIII.

Siquidem, cum succi omnes à molis ventriculi soluti, divellantur violenter à naturalibus cohæsionibus suis; nifus ideò suos ad pristinas cohæsiones indefessè conservant, propter naturales figuras suas, quæ in solutis particulis non deperditur. Ut ideo impressam hujusmodi, ac necessariam per animalis corpus fluiditatem conservent soluta cibaria corpora, sub novis semper solutionibus reponi debent. Ideò, quotiescunque liquefacta violenter hæc solida aliquantulum removentur à tot solventibus per animale corpus successivis potentiis; seu ab utriculis cordis, arteriarum, & loculorum partium distrahuntur, vires statim centripetas suas repetunt, sensim in se se coadunata, & pristinas concretiones induentia. Hoc, sicuti in liquidis sanguineis extractis fit, sic etiam in loculis animalium interaneis, ubi trituratione feriatur: In quibus scilicet casibus, & locis, in fibras, & nexus, ante stomachalem eliquationem primò habitos, concrescunt alimentitiæ laudatæ substantiæ; seu in tomenta solida, extra animalis corpus; & in strias solidiusculas nutritias in ipsomet animali. Equidem, corpora omnia nobis nutritia in soliditatem naturalem quamdam nituntur, sint jam vegetabilia, sint animalia; Hanc oblatâ occasione, sibi denuo procurant ex se se. Ex dictis itaque, licet aures & ingenium bellè satisfaciat stomachalis tritura, ex solidis hucus-

M

que

que exposita; Ad opus tamen digestivum complendum salivarum potestati prima authoritas conferenda venit.

§. IX.

Salivam, primum esse chiloſeos menſtrum quicquid non negat, qui fragmenta alimentorum ſolidiora interdum iis caſu maſticando irretita, poſt tempus aliquod in componentibus ſuis ſoluta extrahit, & chiloſa albedine prædita, non minus ac ſi ſtomachi mora, & miniſterio fuiſſent potita. Hinc ſummè energeti- cam fateatur actionem in ſalivæ principiis, & eorundem panspher- miam, ſeu multiplicationem variam, qui tantorum generum ali- menta ab hoc latice, tanquam à menſtro univerſali, ſoluta conſiderat. Depluit jam continuò in ſtomachum, nobiſque etiam inſciis, hic liquor; ejusque in hoc recipiens ſuaviter extillantis actionem ſuſcipiunt alimenta, ſi ibidem interſint; aut ſucci qui- cunque peregrini per eundem hunc utrem fluitantes, aut ipſimet cavi viſceris parietes, indeque ſenſus ex tantæ actionis acumine injucundus, ſeu fames, ſi nudi ſint, alimentis ſcilicet, aut hu- moribus interaneis aliquilibus, non ſcatentes; hanc autem actio- nem nec ſuſcipiunt, nec ſentiunt, ſi crudo aliquo muccoſo, aut muriatico incruſtati: Sic digeſtis per noctem alimentis, & è ven- triculi ſinu elutriatis; factò inſuper per dictum tempus copioſo ſalivarum depluvio in eodem viſcere, hocque corporibus morbo- ſis non inſarcto, ſurgentes mane vegetam ſentimus famis mole- ſtiam. Quamobrem præter dictam alimenti, humoris, aut cru- ſtæ præſentiam, deficiente per caſus varios in ſcatebris ſuis ſali- va, eaque ſic ſtomachi non irrigua, inſallibilis etiam, & famis defectus accedit; imminuta ejusdem menſtrui copia naturali, im- minuitur & famis ſenſatio naturalis; variis autem modis deprava- ta ejusdem compoſitione, variæ & famis depravationes emer- gunt. Non ſolum autem in hiſce ſalivæ vitiis vitiatur fames, ſed & ipſamet chiloſis. Et reverà in ſalivæ defectu, ſuppri- mitur & digeſtionis functio in ventriculo; in ejusdem ſalivæ pe- nuria, multum & illa infirmatur; in variis autem illius deprava- tionibus, reciprochè & alteratur. Sic quoties activa ſalivæ prin- cipia vel deficiunt in liquido ſalivali, vel à viſcidis & crudis par- ticulis

ticulis aliis depressa jacent, obtusa & impedita; vel à nimia vehiculi aquositate disgregata & quasi submersa languescunt; nec tunc appetentia emicat ad cibos assumendos, nec facultas sufficiens ad assumptos digerendos. Sic post exorbitans jejunium perit famēs, assumptaque indè cibaria malè concoquuntur, prout sensim dissipatis sanguinis particulis activioribus, debita harum copia suggeri nequit salivæ; sic vappidum & hebes hoc fluidum, nec vellicativam in inani stomacho vim suam exercere potest, nec solutivam in haustis indè eduliis.

§. X.

Non minùs itaque succus est buccalis saliva, quàm gastricus; esurinus, quàm digestivus: solvit autem cibariam soliditatem per humidum suum instructum salino alcalico volatili principio, per cavatum corporis calorem ordinarium excitato & exaltato; non aliter ac aqua communis sale quoddam alkalico impregnata, & igne excalecta, frustra ossium in ea immersa apud Pharmacopolas mollescit, & solvit. Solvens autem alimenta digestorius liquor seu salivalis, non solvit tamen tunicas ventriculi, licet hæ præsentēs eidem sint semper, nec solidiores audiant variis brutorum partibus, quæ pro alimentis ingestæ, facilè eliquantur in ventriculo; imo & ejusdem sæpe compagis extant & naturæ, ac sint ipsæmet stomachales tunicæ. Hujus Phænomeni ratio est, quod alimentaria hæc corpora jam attrita fuere in oris molendino, & à corticibus suis, seu tunicis cingentibus discerpta, sicque penetrabilia reddita ad actionem in ventriculo solutivam; Quod patet ex eo quod, si alimenta aliqualia etiam satis ab igne culinario incocta, ut lentes v. g. à dentibus non rumpantur in corticibus suis seu tunicis cingentibus; nec in ventriculo solvi possunt, sed inalterata excernuntur cum fœcibus: Cum itaque interna ventriculi facies strictissimo muniatur tegmine, multiplicatis scilicet membranis suis, à solo principio, attrita jam in faucibus alimenta facilè solvente, solvi ipsa non poterit. Cæterum omnimoda etiam sitis natura à salivæ Phasibus dependet. Sed talia hic longiùs exponere, supervacaneum est.

Primum est itaque, & ultimum chilificationis instrumentum saliva in ore, ventriculo, & intestinis; quibus in partibus tanquam per gradus successive chilosis perficitur. Alimentorum solutionem raptim inchoat in ore, vegetius prosequitur in fundo stomachi, morâ ibidem contractâ; absolvit in intestino, potentiis ibidem auxiliaribus variis adjuta. Et reverà, dum ad solutionis terminum nititur, postremo hoc loco, saliva, abruptâ jam chilosarum partium cum inutilibus cohæfione totâ, subactam massam alimentariam quaquaversum perstringunt validæ musculorum intestinalium, diaphragmatis, abdominis adjacentes pressuræ, eamque veluti sub torculari positam magis magisque per inferiora protrudunt, expressâ ab ejus compage solutâ jam, chilosâ portione, & in lacteorum oscilla propulsa. Quoniam autem valida salivæ in ventriculo cum resistenti alimentorum tenacitate luctatio, vim forsan ejusdem delassare poterat & infringere, re-tusis aut fractis salium suorum spiculis; ut inde inermis, debilis, & à fonte suo jam nimis diffita, ad ultimum in intestino solutionis conflictum accederet, cum incompleti successûs discrimine; Hinc ad ejus suppetias recens salivæ scatebra, eaque sat grandis, intestini principio infra ventriculum apponitur, Pancreas scilicet, quod novas vegetæ limphæ copias, novoque acumine armatas, tanquam subsidiarias ad prælium roborandum ducens in actionis loco, totam adimplet concoctionis exigentiam, totamque ciborum solutionem accelerat. Quod autem Pancreas glandula sit inferioris subselii salivaria; Imò congeries glandularum salivalium, salivæ suæ rivum digestionis tempore in intestinum eructans, patet ex liquoris sui cum saliva propriè dicta quo ad saporem, colorem, consistentiam, aliasque circumstantias, identitate. Quod cæterum opportuna hæc sit glandulæ pancreaticæ locatio ad intestinorum exordia, & subter ventriculum; tum insuper summa utilitate plena vastitas molis hujusmodi suæ, evincitur ex comparisonem cum glandulis aliis salivaribus facta. Quemadmodum etenim, præter innumerabiles minutas glandulas ad primum tubi intestinalis immissarium, & per ipsammet oris cavitatem disper-
perlas

perlas, palatinas, labiales, buccales, fauciales, sublinguales &c. totidemque salivæ rivulos ibidem instillantes, aliæ multum grandiores & majusculæ longè ab hoc antro jacentes, ponuntur in situ, quo ab eisdemmet muscularibus masticationis instrumentis urgeri possint, ad liquidum suum eodem masticandi tempore copiosius corrivandum ad ora; quod scilicet par sit eluendis ingestorum copiis; adeò ut glomus hujus generis glandularum notabilis, seu parotis, extra oris limites ad masseteris attiguitatem locetur; alius autem, seu maxillaris inferior ad digastrici contactum; ex quibus indè musculis alternè in masticatione intumescantibus compressi, uberrimos tunc temporis præfundant salivæ manipulos: Sic ad lævum duodeni latus ingens proportionaliter disponitur glandularum salivalium cumulus, seu glandula prædictarum salivalium vicaria, pancreaticum videlicet viscus; quod indè ab eodemmet digestionis instrumento, seu superjacente immediate stomacho, ex alimentorum saturatione tumefacto, premitur adeò in digestionis actu, ut ad copiosorem, ultra consuetum, fluidi sui gurgitem in intestina exprimendum cogatur: Quam certè largiorem succi salivalis undam expostulabat memoratæ elaborationis complementum.

§. XII.

Sed postremus non est junctarum in intestinis hujusmodi salivarum usus laudatus: Alius adhuc restat animalis exigentiis non minus accomodus. Et siquidem, Quoniam guttulantes per intestina salivæ pancreaticæ & propriè dictæ non semper subeundam offendunt alimentorum massam; prout solum per interpolata temporis spatia exequitur digestio, sicque nec semper lacteos canales suos lambit, & perambulat chilis: in hisce concoctionis feriis sectantur passus chilos vestigia rivuli salivarum harumce superiores; per lacteorum nempe orificia introducti & imbibiti, totam percurrunt, & saturant galaxiam per lactea duplicis generis prædicta, glandulas lumbares, ductumque thoracicum usque ad sanguinem: ideò in chili absentia viæ hæ omnes lacteæ limpido solum liquore, hujusmodi videlicet salivari subtiliori, turgidulæ se se offerunt visui. Nec minoris est necessitatis hæc salivæ per

tubulos chiliferos assidua circulatio, quam sit ipsemet chili interpolatus per eosdem trajectus: Facile etenim exsicarentur & coalescerent fistulae tam minimae, & tantum non imperviae, nisi humido aliquo in suis cavitatibus transcolante madescerent continuo. Quod autem liquidum solum salivale vascula haec lactifera perenniter adimpleat & permeet, vel chilo immixtum, ei que ad vehiculum inserviens, vel etiam sincerum, & absque ejusdem connubio, constat ex ipsamet lacteorum habitudine: Cum etenim in cavo intestinali hient principio suo canales hujusmodi; alium certe humorem non excipient in sinu suo, quam per ipsamet intestina perfluentem, eumque tenuiorem; chilum itaque & salivam, primum interpolatè, alteram continuè; non limpham, cujus nulla est in intestinorum cavitate scaturigo; non bilem tantae vasculorum exilitati subeundae imparem prorsus, ut mox videbimus. Et ecce usus salivae primarius ad Chiloseos negotium; secundarius ad chilosorum ductuum amplitudinem servandam; indeque continuus ejusdem circuitus à sanguine per proprias glandulas, fistulas intestinales, & chiliferas, rursus ad sanguinem. Sed indignantem nimis salivam movet exuberans hic rerum salivalium sermo. Veniamus jam ad rem nostram; Ad bilis negotium. Ecquid jam igitur bilis in intestinum descendit? Hic cadentem expectabam. Attende.

§. XIII.

Quia à ventriculo ad intestina viscidam naturaliter trahit, & facillimè implicabilem consistentiam tota alimentorum massa, seu Chimus; ut monstrat autopsia; sequitur jam, quod in hac successiva traiectione ejusdem materiae partes proximiores parietibus intestinalis tubi, eisdem adglutinentur facile, crustamque tamquam amurcosam obliniant circumquaque: Ex hoc duplex jam sequitur incommodum. Primum quòd chimosae substantiae ad intestinorum superficiem affixae potentiarum praedictarum comprimentium actionem non satis auscultent; prout haec solum vividè cadit supra partes in centro cavitatis intestinalis positas; ideoque nec acriter ad debitas vias detrudi possint, nec bene ab eis exprimi chilosa portio, ut supra. Alterum, & notabilius, quod lacteorum

teorum oscilla offerciens, & obducens adventitius hic cortex, impedit ne liberè eadem subeant lactei rores, quantumlibet salivæ officio à grossioribus alimenti substantiis per omnes chilos officinas jam integrè soluti, & à muscularibus momentis expressi. Quamobrem sicuti colores super lapidem molentes, aut aromata in mortario tundentes Pictores, aut Pharmacopolæ, adhærentes saxo, aut æneo dictarum rerum portiones sæpiùs spatula abstergunt, & verrunt; ex qua indè operatione molita aut pistillata corpora meliùs cadunt sub actione molilis, aut pistilli; sic fluidum aliquod instillari debebat in intestinorum cavo, quod inter intestinorum faciem, chimumque inhærentem, immittens se se, simileque gerens absterfivum munus, integram hinc procuraret massæ totius alimentariæ exsolutionem, pressuram, consonasque per vias dispensationem: Liquidum autem petebatur oleagineum, prout oleosis interjectis substantiis, à variorum corporum implicatione res glutinosæ liberantur; lixiviosum insuper & saponarium; ad deterfionis opus alacriter exequendum. Et ecce bilis, in hac liquidi verrentis indigentia, opportunè descendens in intestina; bilis, inquam, quam ideò aptissimè vocant * nonnulli naturæ smegma, in cujus namque textura æquè eminet cum oleoso principio saponarium, & urinosum. Ecce uno verbo totus ejusdem usus; prout per ductum suum super intestini parietem depluens, eumque madidans, acredine inde sua ulteriorem super eum fusque deque semitam facilè fodiat sibi; adglutinatam hoc ritu divellens cibariam substantiam. Hac de causa copiosius digestionis tempore in intestinum vehitur activum hoc liquidum; ut infra videbimus.

* *Sbaralea*
à *Frid. Hel-*
vetio.

§. XIV.

Tanta hæc bilis absterfiva facultas constat in fervidæ temperaturæ subjectis, seu propriè biliosis & picrocholis; in quibus ex fellei humoris abundantia, & virtute, rarissimè mucosis infarctibus obsidetur ductus intestinalis; dum è contra ex ejusdem succi enervatione, aut penuria, in frigidis constitutionibus, in cachexia, Chlorosi &c. viscidis semper cacochiliis poluuntur intestina, & ventriculus. Et multò evidentius patet, si naturaliter per

* *Vesalius*

per ductum suum in ventriculi cavitatem eructetur recrementum hocce; celerrima namque inde venit ingestorum etiam solidorum distributio & discessus, summèque vegeta Chilosus. Sic in struthiocamelo, in quo bilis exoneratur immediatè in ventriculo, vis insidet celeriter adeò digestiva, ut tolerata quadam hyperbole dicatur ferrum devorare, & digerere: Sic ex Choledochi insertione in Remigis ventriculi fundo apud celebrem* Anatomicum summa in hoc viro aderat voracitas, & Chilosos promptitudo; Nec alius in hisce casibus bilis usus excogitandus, præter dictum; prout nulla ibidem & succi pancreatici affluentia, ad decantatam fermentationem alimentorum dissolutivam obeundam.

§. XV.

Liquidum autem biliosum in intestina dimissum, peracta ejus operatione, aut etiam non peracta; seu, vel in canali intestinali reperta massa chimosa verrenda in digestionis actu, vel non reperta in digestionis otio, semper ad excretionem alvinam disponitur, per intestina successivè crassiora, vel cum fœcibus confusum præcipitans se se in primo casu, vel sincerum in altero: in trajectu suo ulteriorem exercet functiunculam jam ab antiquis magnifictam: sensiles intestinorum tunicas proritat ad dejectionem acre suo; sic ordinariò in inedia aut victu exquisitè tenui, biliosæ solum substantiæ per secessum elutiantur. Nullimodè Chilum per lactea insequitur, ab eorum penetratione impeditum per insitam crassitiem suam: & siquidem chilifera hujusmodi vascula, vel succo lacteo dulci, nec unquam amaro satura conspiciuntur, vel claro & diaphano, nec unquam flavescente. Præcipuè quod in animalibus fame extinctis, licet intestina copiosa bile referta adnotentur, lactes tamen nil ejus absorbent, sed jejunæ potius, atque inanes permanent, quam ablegato jam ex alibilium humorum familia recremento hujusmodi conspurcentur. Multò minùs per venas meseraicas refugitur biliosus hic humor, ut inde per eas in portam derivatus, hinc per hepar rursus in ductum excretorium & intestina confluens, circulationem habeat & suam per viscera abdominis, æmulam expositæ salivariæ circulationi per viscera & sanguinem; quantum ferunt modernorum

rum * aliqualem infomnia; Nam præterquam quod in intestino-
rum cavitatem non hiant meseraicæ; nil contra circuitus leges, &
animalem machinam deformius excogitari potest bilioso hoc mo-
tu circulari; ut vel Medicinæ initiatis patet.

* Al. Borellæ
Nuck.
Reverhorst.

§. XVI.

Et sanè: Quamquam multæ in animali ejectionum sanguinis circulationes sint; circulent lymphæ; circulent seminales materiæ; circulent aliæ plurimæ; circulare præcipuè superiores, & inferiores salivas, jam sumus probati; Bilis tamen incessantem circuitum à sanguine portæ per hepar in intestina, & ab eisdem per venas meseraicas rursus in portæ sanguinem, & in hepar, & successivè; rationes omnes à fautoribus allatæ non probant. *Primum* eorum argumentum erigit amplitudo venarum meseraicarum, & sapor lymphæ dejecti per eas sanguinis amarus. Sed amplitudo hujusmodi auspicanda est à copia sanguinis intestinalis, quæ ad motus eorum varios exigitur; tum præcipuè ad ineundam in eodem sanguine retardationem notabilem, quæ nempe accedit in liquido ex angustiori vase in multò ampliùs derivato, ut vidimus superiùs: sapor amarus nostram duntaxat hypothesim confirmat. *Secundum* argumentum facit cursus venarum harumce diversus ab aliis venis. Sed probat hoc solum, portam fungi munere arteriæ ad secretionem hepaticam: Quid indè ad circuitum bilis? *Tertium*. Quantitas bilis, quæ singulis horis in hepate hominis ordinarii secernitur est ad 3 ss: aut saltem ad 3 iij; ut idè spatio diei naturalis ad ss j. aut saltem ad 3 ix. percoleatur in hepate; Quæ certè non tanta per alvum excernitur. Tanta bilis secretio negatur; ut saniori demonstratione palam fiet inferiùs. Fallax est ad probationem statim ab adversariis proposita secretionis biliaris in vivo cane; in quo videlicet violentæ, & spasmodicæ per vulnerum stimulos secretiones, possunt esse longè uberiores, quàm in statu tranquillo, & naturali. *Quartum*. Tanta bilis copia in fœtu per novem menses secreta, non excernitur; nec in solum meconium conglobari potest. Sed ratio hujusmodi est de subiecto non supponente. Meconium est tota, & integra collectio, ac induratio bilis secretæ fœtus, quæ in eodem

N

parcissi-

parcissimè secernitur. *Quintum.* Improportio gracilitatis arteriæ hepaticæ cum bile secreta. Conceditur. Quid indè? *Sextum.* Ampla meseraicarum porositas in intestina; & commercium flatus immissi ex eisdem in intestinorum cavum. Amplas hujusmodi porositates in folis avibus concedimus; nec aeris transitus etiam humoris viscidum trajectum comprobatur. *Septimum.* In plerisque pennatis chylus deferitur per meseraicas; Ergo & bilis. Nos negamus analogiam, & paritatem.

§. XVII.

Nec per lacteorum oscilla introduci bilem intestinalem posse, patet ex chyli in animalis cujuscunque fistulis lacteis, aut cisterna collecti, & examinati subdulci semper sapore, nullimodè amaro. Ea cæterum sapidissimi biliosi liquoris conditio est, ut ubicunque ejusdem guttula sedeat vel minima, proprio non inficere amarore non possit. Asserta nostra hæc insuper observatione dilucidius firmentur. Denatum olim hominem cellerrimè ex cholera morbo, illicò post obitum aperiebamus. Bilis tenuior, & diluta uberrimè per intestina exundabat: Sed lactea ubicunque vasa partim invisibilia jacebant, partim leviter occurrebant, limphâ limpidissimâ turgidula. Sed ad quosnam usus, amabo, supernumeraria hujusmodi circulatio bilis? Minima bilis quantitas, ut videbimus, per dies in hepar secreta, sufficit ad opificia intestinalia sua: major ultra ordinarium secreta quantitas morbum facit. Quid itaque dissonæ, non possibili, morbosæ insuper circulationi bilis insistendum?

§. XVIII.

Cæterum bilis, succique pancreatici in œconomia animali usus simplices assignati, commodi quidem sunt ad vitam, non autem necessarii; pro ut etiam absque salivæ pancreaticæ auxilio, solæ depluentes continuò ex superioribus glandulis salivæ totam alimentorum farraginem usque ad duodeni thalamum solvere sat possunt, & chilificare; non minus ac sine bilis concursu, spontè tandem, aut aliorum laticum alluvione abradi possunt per tempus aliquod ab intestinorum marginibus soluta alimenta, & disjungi, indeque per vias debitas promoveri. Et de facto abscisso
apud

apud præclarum* Authorem è canibus pancreate, optimè indè* *Brunne-*
convalescunt hæc bruta, & munia vitæ, imò & sanitatis consue-
ta recuperant integrè; Non minus ac ex forti obstructione, Scirrho,
aut alio vitio quocunque, jacente in animali jecore tamquam si
non adesset; seu impedita in eodem bilis secretionem, indèque &
dispensationem ad duodenum, affectos sæpè hoc ritu homines vi-
tam aliquandiù, imò apparentem & sanitatem protrahentes vide-
mus, & obstupescimus in praxi.

CAP. XVII.

Exponitur structura & usus cystis felleæ.

§. I.

Opportunum interim ministerium bilis ad primam digestio-
nem complendam ulteriùs manifestat ductus hepatis excre-
torii distributio: Et equidem licet ramuli omnes biliferi ex sin-
gulis hepatis concursibus glandulosis densissimè prodeuntes, in
maiores indè fistulas sensim coalescant, hæque omnes in unicum
concurrant & notabilem truncum, & hic directè in duodenum
descendens, acceptam hinc bilem totam per liberum hunc tra-
mitem corrivare posset; hoc tamen non advenit, sed tota pene
liquida in hunc tubum derivata, per emissarium quoddam diver-
tuntur à descensu in intestina. Hiat osculo sat amplo in tubi
biliferi basim emissarium hujusmodi canaliculare; indèque ab eo
quasi perpendiculariter propendens seu ductus cysticus, solùm non
rectilineus, sed aliquàlter, ad similitudinem colli Cigni, inflexus,
& incurvatus. Hic ideò tamquam vorago viam occupans, traji-
cientem ibidem placidè versus duodenum bilem, hujusque velu-
ti præcipitii nesciam deglutit, & per propriam cavitatem raptat:
Nec alius ab hoc lapsu incolumis iter suum usque ad intesti-
num prosequitur bilarius humor, quam qui inter oram hujus-
modi aperturæ, & lateralem ductus marginem, casu viam tenet;
qui sanè est paucus, & qui, ob causam inferius exponendam,

retroagi etiam potest ab intestinali insertione rursus usque ad emissarii principium, indeque & per eum derivari.

§. II.

Descendens jam à ductu hepatico canaliculare hoc diverticulum, ampliorem sensim acquirit cavitatem, usque quo in expansionem quamdam ampullosam, subrotundam & vesicularem destinat, quæ ideò à figura, humoreque recepto dicitur vesicula fellea, folliculus biliaris, seu cystis aut bursula choledocha. In hanc delapsa bilis tacitè stagnat; nullumque inde egressus aditum ordinarium invenit sibi, nisi per eandem decidentiae viam; à viscilicet competentis potentiae admota ad retrogradum inde ascensum suo tempore coacta; ut videbimus inferius. Insidet Pyriforme hoc bilis conceptaculum sub majori hepatis lobo, & intra imam ejus crepidinem, cui adnascitur interventu vasorum sanguinis, tunicae communis, & processus capsulae. Dividitur communiter in collum, cervicem, & fundum: Primum est emissarium praedictum, quod propriè dicitur ductus cysticus, à ductu hepatis excretorio exiens, & propendens; altera, ejusdem augescens ampliatio; tertium est, ultima-met ipsa ampliatio.

§. III.

Præter tunicam communem peritonei, tres super biliarem vesiculam proprias numerant diversi genii tunicas magnam partem
 * *Borrichius.* anatomici: Quatuor Industrius* quidam ex grandiorum animalium inspectione exponit. Necessaria autem est hæc ad liquorum promptuaria tunicarum involventium, & componentium pluralitas in animali: Quia etenim contractilibus villis contextæ sunt omnes animalis membranæ, earum sic multiplicitas applicata ad liquidi quiescentis receptaculum, multiplicata est potentia ad contentum inde liquidum per vias debitas urgendum: Et quia insuper strictissimum præ se ferunt rete in villis suis dictæ omnes tunicæ, earum inde multiplicatio ad vasa, multiplicatum est insuper cohæsionum momentum ad exedentem forsan, & penetrantem fluidi insidentis potestatem eludendam. Utriusque rationis exigentia competit receptaculo bilioso, ex quo per intervalla abigendus est collectus humor; isque acerrima irritabilitatis actione pollet,

pollet, tum ex natura sua, tum præcipuè ex contracta ibidem mora, ejusque sic potentioribus principiis liberè exaltatis. Et de facto bilis cystica spissitudinem, colorem, acorem, & amaritiem supra bilem purè hepaticam, longè intensiores ducit, præcipuè autem penetrabilitatem; adeò ut non obstante tanta tegminum faragine, tenuior ejusdem pars ex promptuario suo transludet ordinariò; attiguasque ventriculi, & coli partes intingat flavedine sua.

§. IV.

Ex cystis felleæ tunicis propriis extimam vasculosam & pingui-feram nominant moderniores; mediam muscularem volunt; intimam nerveam, rugosam, & villosam. Qui quartam addunt, inter nerveam & muscularem collocant, eamque glandulosam vocant, glandulis scilicet numerosissimis obsitam, per quas mucosum illud transcoletur, intimam indè hujus bursulæ faciem totam investiens. Bilem per hæc glandulas secerni, ridicula est aliquorum confabulatio. Sed de hisce omnibus, ut de connexion- ne, & vasis ejusdem partis quamplurimis, & variis cum jecore communibus, aliisque eam spectantibus ulteriora non affero, pro ut largissimè ab anatomes Historicis venditata; ideoque hîc supervacanea. Solùm addam, vix quidpiam muscularis naturæ ad hoc reservatorium percipi; pro ut nec ad bilis excretionem necessarium, ut videbimus. Quod si dicendum sit tunicam reverà carneam, assidere, ad instar muscoli cutanei, eam extimum inter tunicas proprias occupare locum assero, non medium; ut patet ex ejus colore super subjectas alias rubicundiori, & ex analogia aliarum animalis vesicarum, urinariæ nempe, & seminalis, quibus extimum est supra alia musculare indumentum; ut suo etiam loco demonstrabimus. Quod autem in membranarum harumce porositatibus machina sedeat (ut supra) secretoria bilis à sanguine, illuc per gastricas arterias delato, adeò ut per hanc cystim non solum condus promusque offeratur bili, sed etiam organum colatorium suum; non ne sunt vaniloquia, homini* ceterum venerando jam superiùs commemorato imparia? fabel- læ, inquam, ex se ipsis absque ulteriori oppugnatione cor- ruentes?

**Silvius De Le Boë*,

CAP. XVIII.

Exponitur modus influxus bilis in cystim.

§. I.

INdubitabilem allegavi, superiori capite, digressionem in cystim totius penè liquidi, ab hepate versus intestina per porum biliarium excurrentis. Manifestum hoc traxi ex naturali hepatis, ductus ejusdem excretorii, & ipsius folliculi positione. Gibbam partem suam ad superiora & anteriora abdominis obvertens jecur, ventriculo objicit cavam; ex qua indè prodiens ductus biferus, declivi nonnihil directione in annexum eidem duodenum implantatur. Folliculus imum cavæ regionis inhabitans perpendicularem situationem servat; cujus collum seù angustior cavitas superiùs ponitur; fundum seù amplior pars ad inferiora jacet. Sic in exenterato animali diductis visceribus hepatis perlustrationem impredientibus, absque majori cultri administratione, sub hepatis limbo aliqualis statim perspicitur ejus portio, seù summitas propendentis fundi, & protuberantis, dum reliqua folliculi extensio a superjacenti jecinoris corpore obvelatur. Producto hinc verticaliter à cervicis apice canali cystico; se potius eodem vesiculæ collo ad ductus fellei insertionem ascenso; patet, ut supra, bilem ex ductu hepatico ad hoc bivium deventam, faciliùs in ductum cysticum, longitudini perpendiculari proximum à gravitate sua deturbari posse, indèque potius per eum in vesiculam appellere, quàm per viam choledochi, horisontali affinem, in duodenum.

§. II.

Qua parte cystis cervix elatiore sui productione angustior est, & magis constricta, seu in ejus collo, valvulam insidere, olim à Bauhino descriptam, aliquando simplicem, aliquando duplicem, aut triplicem, figuræ plerumque semilunaris, & non rarò cochleæ in modum extensam, præpedientem ideò, quò minùs bilis ductus
hepa-

hepatici subintret reservatorium hujusmodi, hucusque nobis compertum non fuit. Clarissimus *Laurentius Heister*, in Universitate Altorfina Professor Famatissimus, Qui nuper elucubratissimum compendium suum anatomicum, ac vivacissimam Apologiam suam circa *cataraetam, glaucoma, & amaurosim*, unâ cum epistola candore plena dono mihi humanissimè trans mittebat; in duobus subjectis publicè dissectis cochleares, seu spirales prædictas valvulas ad collum cystis felleæ demonstrasse asserit. Hasce, valvulis per intestina Rajæ piscis, & leporum productis, vir acuratissimus assimilat: valvulas insuper alterius generis in cystium earumdem collis delineat. Ex valvularum hujusmodi obstaculo observabat, transmissionem styli per ductum cysticum ad folliculum iri impeditam. Habentur hæc omnia in observatione 38. *centuria 6^a. ephemeridum nostrarum nat. curios. anni novissimi 1717.*

§. III.

Sed cùm Author peritissimus de earum existentia in subjectis aliis dubitare videatur; asserendo eodem loco, stylum in aliis subjectis à ductu cystico in folliculum traduci: *Qualis aliàs facile transit*: Ideò probabiliter structura hujusmodi spiralis colli vesiculæ interni adnumeranda erit inter res extraordinarias, & raras; Ut etiam in rariorum censum arroganda est fabrica ab eodem cl. viro exposita ejusdem ductus cystici in primo ex dictis subjectis; in sinum nempe hucusque invisum efformata, & instar funiculi contorta; insuper appendix notabilis, hians per peculiare orificium in cystim, valvulâque lunatâ munita, quam pariter Professor laudatus describit. Præterea, spiralis structura ad parietes mediocris canalis insculpta impedire non posse effluxum, aut cursum contentorum ab una ad aliam directè, aut retrogradè canalis extremitatem videtur, quotiescunque causæ moventes cursum accedant. Medium etenim canalis patulum est, & liberum ab impedimento asperitatum spiraliū, lateribus dumtaxat insitum: Quod patet allato exemplo cavitatis intestinalis Rajæ piscis, & leporum. Quod si per valvulas hujusmodi, aut similes, eô limitaretur commercium cystis felleæ cum ductu hepatico, ut bilis solūm ex cysti in ductum corrivari posset, non ex ductu

in

in cystim ; Undè jam bilem accipient suam folliculi hujusmodi illorum animalium , de quibus inferius , qui per totum ambitum suum prorsus disterminantur ab hepate , ab illo longè assident , & bile intereà semper turgiduli observantur ?

§. IV.

Quod certum est ; Nos in cujuscunque generis animalium cysti fellea non nisi ad cervicis finem , & colli principium angustiam quamdam ab anulo musculari obvoluto productam vidimus ; in quo concurrimus cum *cl. Glissonio* , ab eodem celeberrimo *Heistero* citato ; qui nempe valvulas hujusmodi cysticas , propriè liquorum effluxus ex hepatico ductu in cystim inhibentes excludit. Nec unquam valvulam ibi quamcunque invenisse asserit , *Glissonius* præter fibrosum anulum dictum , seu sphincterem ; qui forsan anatomicis imposuit. Cæterùm curiosissimæ sunt , & summâ æstimatione excipiendæ Eruditissimi *Heisteri* observationes. Nobiliores aliæ in dies expectandæ ab indefesso , quàm maximæ expectationis , diligentissimo Viro , & in rebus anatomicis apprimè versato.

§. V.

Aliæ interim , hæque nervosissimæ observationes hanc bilis distributionem ex ductu hepatico in cystim convincunt , & I. obliqua ductûs biliferi in intestinum insertio , firmæ carunculæ circulo ad ejus osculum , tamquam sphinctere , armata , liberæ in intestinum bilis percolationi obluctatur ; Sicque hoc pacto facilè in canalem suum retroactus liquor , qui jam hiatûs cystici occursum evaserat , ad eundem subeundum compelli potest , & ad descensum in cystim : Huncque nullimodè vetat fibrosus anulus , ad ejusdem vesicæ felleæ fores circumductus ; qui per celeberrimi laudati *Glissonii* calculum , infirmiore multò resistantiam objicit , quàm dictæ insertionis in intestinum obliquitas. II. Apertâ duodeni cavitate in cadavere , absque ulla hepatis dimotione à situ suo , vix bilis vestigia deprehenduntur in intestini gremio , quo tempore turgida , ut plurimum , copioso hoc fluido occurrit vesicula. III. Ductus hepaticus in animalibus perfectis non solum per cysticum meatum , sed per plures alios minores à recentioribus perspectos , sæpe à me demonstratos ; nec non inferius exponendos commu-
nicat

nicat cum vesicula; quibus scilicet, tamquam totidem æqualiter rivulis, totum pene succi biliosi fluentum in dictam cystim transfundat; Quod indè ab eadem vesicula ex applicitis comprimentibus causis, per vices, undâ uberrimâ exprimitur, ut videbimus inferiùs. IV. In cane vivo dilaceratâ vesiculâ usque ad cervicem, non tantùm bilis ex angustiore cystico ductu per latiore cervicem turgescentiâ quadam, & copiâ eructatur; sed idem cysticus post injectum ipsi vinculum notabiliter intumescit. V. In animalibus in quibus deest folliculus felleus, appendices variæ saciformes visæ sunt, ductui hepatico per ductum peculiarem cystico analogum appensæ, ex eoque, absque alia hepatici visceris communicatione, succum biliarem, ex quo turgebant, excipientes. In homine felleâ vesiculâ destituto sacculum etiam hujusmodi, cystis vices implentem, & immediatè ab hepatico ductu per vas cystico simile bilem haurientem vidit *cl Petrus Wolfartius*; ut ex ejus observatione, & figurâ, principio centuriæ quintæ nat. curiosor. anni 1717. novissimè insertis. VI tandem in quibusdam animalibus, ut in viperis, & serpentibus variis vesicula ab hepate prorsus determinatur, multo intervallo ab eo diffita; ac solo meatûs sui cystici interventu, cum poro biliario communicans: Quæ tamen cùm, proportionaliter ad hepar, notabili fruatur magnitudine, ac bile semper turgidulâ occurrat, non tantùm manifestat bilem suam haurire per ductum cysticum ab eadem bile, quæ ductum totum hepaticum rigat, eâque impleri; sed & conjiciendum relinquit, totam penè ejusdem ductûs hepatici farcinam ad eandem vesiculam devehi, ibidem per aliquod temporis reservandam. Quod erat probandum.

§. VI.

Et si ad rei propositum confirmandum valet analogia ex partibus animalis aliis mutuata; Perlustra jam spermatica virilia; & eandem statim observas correspondentiam inter vas deferens, vesiculam seminalem, & urethram, quam tibi exporrigo inter porum hepaticum, vesiculam biliarem, & intestinum. Liquor seminalis per deferentem ductum immediatè in urethram transmitti potest, non minus ac bilis per ductum jecorarium in duodenum:

Uterque humbr viscidulus est, recrementitius Sanguini; sed usui principali & temporaneo destinatus; Hinc quia semen non semper in urethram derivari debet, sed solo coitûs momento; sic non solum vas deferens obliquè immergitur in urethræ tunicas, sed insuper ad vasis ejusdem osculum in urethræ sinum annulus jacet muscularis quidam, seu caruncula, continuam illius percolationem impediens: Quæ jam benè quadrant cum caruncula, & obliquitatis machina ad excursum & insertionem canalis hepatici in intestinum positis, ac nullo alio naturaliter, præterquàm chiloſeos tempore, bilioſæ ibidem quantitatis influxum permittentibus. Cùm autem semen à perenni in urethram distillatione impeditum, per collum cystis seminalis eidem vasi deferenti appensum in eandem cystim ad tempus deponatur; sic ex eadem temporaneæ reservationis necessitate comprobatur & manet officium insertionis ductûs cystici; ad influentiam scilicet bilis ex laudato ductu hepatico per eum in cystim suam; indèque & ad effluentiam, suo tempore, à cysti per eundem rursus in ductum hepaticum; non minùs ac accidat liquido seminali, ex vase deferenti per collum vesiculæ suæ, in eandem transmissio, suoque indè tempore per idem collum rursus à vesicula in deferens vas retrogrado. Et quia ex coalitu colli vesicæ seminariæ cum vase deferenti, tanquam ductus communis componitur, excurrentis indè, per urethræ tunicas obliquè usque ad ejus cavitatem; quem propriè ejaculatorium appellabant antiqui; eodem & ritu ex concursu colli vesicæ bilioſæ cum ductu hepatico efformatur ductus communis, in intestinales indè tunicas usquè ad earum cavum insertus, quem propriè cholidochum vocamus. Et sic à paritate probata ulterius assertio. De alio autem bilis in cystim ulteriori influxu dicemus *Capite sequenti xx.*

C A P. XIX.

Exponitur modus effluxûs bilis ex cysti.

S. I.

DEpositum autem in cysti sua humidum biliosum, tandiù convasatum moratur, donec ejus exitum & in intestina excursum

sum expostulet chilificationis opus. Quoniam autem per ductum verticaliter ascendentem celebrari debet hæc bilis emissio è vesicula, & per ductum respectu ad vesiculam notabiliter amplum, capacitati etenim pennæ gallinacæ æqualem, qualis est meatus cysticus; per quam reverà amplitudinem non pedetentim, & successivè vesiculæ exonerationem fieri, sed subito & impetu quodam, per leges mechanicas patet; Hinc jam inquirenda venit potentia per vices huic bilis folliculo, seu in chiloſeos occasione admota, quæ fluido tenaci & lento non solum contra gravitatem propriam, sed insuper cum quodam celeritatis impetu, sursum trudendo sufficiat: Et hæc ponderosa sanè conditio validissimi momenti potentiam exigit, quæ ideò in ipsomet solido vesiculæ membranoso non insidet; seu, quod idem est, ex ipsamet ejusdem tunicarum contractione venire non potest per varias rationes evidentissimas. Primò, quia villis contractilibus non esse sufficienter ditata reservatorii hujusmodi involucra, seu vix quidpiam muscularis proſapiæ eis advolutum, ac interpolatæ huic extrusioni opportunum, superiùs vidimus. Secundò, quia, ubi dari per vices potest superaddita contractio, vigere præcipuè debet continuò naturalis; hæc autem naturalis contractio necessariò exercetur, cum vacuata à contento liquore vesica, tollitur ejusdem actionis impedimentum: Sic videmus vesicam v. g. urinariam, exhausto ab ejus cavitate lotio, spontè adeò contrahi, ut latera ejus interiora mutuò se tangant penè: Cùm autem exinanita à liquore suo fellis vesica, in capacitatem non minorem quàm antea se contrahat; sed flacida restitent ejusdem latera, & æquè ac priùs à se se invicem diffita; inferenda jam remanet, ex nulla in hoc vase contractionis hujusmodi naturalis existentia, & impossibilitas superadditæ per vim propriam contractionis, ad liquidi contenti excretionem facientis. Tertiò, quòd, licet daretur in cysti sufficiens prædictæ contractionis possibilitas, assignabilis tamen causa non est, cur per vices, ac intervalla inæqualia in actum veniat; hocque potiùs momento quàm alio: Nec in petiti rationis censum adducenda est plena met ipsa, & ultima comprehensæ liquoris congregatio, seu saturationis punctum,

quod indè superadditum contractionis momentum potenter existimulet, ut potè quæ sæpè in apertis animalibus observatur completa saturatio, absque eo quod in se se exonerandi tentamen spontè surrexerit turgescens receptaculum; ut patet ex dictæ turgescentiæ persistentia.

§. II.

Quærenda igitur jam est ab extrinseco potentia hujusmodi, vesiculæ biliaris per vices admonenda; in parte scilicet adjacenti aliqua, quæ per vices validè eidem applicata, fortiterque premeus, contentum laticem foras extrudere possit, & per vias urgere suas: Nec aliam folliculo propriùs attiguam partem, huicque operi congruam invenio præter ventriculum-met ipsum; quem alimentariæ digestionis tempore cominùs considerans, dicta potestate præditum invenio. Cùm etenim stomachus in vitali ciborum coctura non solum ab eorum mole, sed ulterius à fermentativa rarefcentia quadam magis magisque distendatur; ejusque cæterum, supra alias partes, stricta sit ad cystim biliferam adjacentia, nonne patet hunc utrem, quò plùs grandiore turgescentiæ mensuram tetigerit, eò plùs validum pressionis nisum admoturum cysti, adedò ut coactis invicem hujus recipientis parietibus, ac notabiliter coarctatâ cavitate, comprehensa liquoris unda spatium sic arreptum sibi, quærere alicubi velociter debeat, per porum scilicet cysticum, & choledochum in intestini cavitatem, unâ cum bile hepatica in itinere adjuncta; Nec dicces tantæ trusionis urgentiæ obluçtari posse resistentias in via occurrentes, altitudinis scilicet colli vesicæ perpendicularis, gravitatis liquidi detrusi, annuli fibrosi ad cystis cervicem circumducti, insertionis choledochi obliquæ, firmæque tandem, & quasi muscularis carunculæ ad intestini ingressum; si leve machinularum simul harumcè omnium momentum cum amplissima prementis ineluctabiliter stomachalis potentiæ quantitate mensuras. Nec in medium adduces imaginarias quorundam * antiquorum valvulas colli & cervicis cavum in cysti fellea occupantes, sicque, & liberum hunc bilis prohibentes ascensum, si digito vesiculam leviter comprimis; quo casu bilem perspicis à cysti in choledochum

* *Andreas
Laurentius:
Aliique.*

chum per ductum cysticum fursum liberrimè , & deorsum adigi.

§. III.

Favent assertioni nostræ circa ventriculi actionem ad bilis bursulam , tres observationes conspicuæ. Prima est quòd in animalibus post longam inediam evisceratis , cum flacido & concidente ventriculo , exuperanti semper bilis copia turgescens & plena cystis offenditur ; in aliis autem post lautam ciborum ingestionem apertiis , cum tenso & prominente stomacho semiplenus observatur folliculus ; quod manifestè evincit bilem solùm quietè degere , & congeri , in conceptaculo suo , cùm tensio incumbentis stomachi eam non urget ad exitum ; & per hoc etiam in foetu humano ex parva inanis penè ventriculi ad eandem vesicam compressione , ea semper plena perspicitur. Secunda , quod Cervus , Equus , aliaque bruta , quæ per multas indefinenter horas pabuli devorationem protrahunt , imò , & penè continuò devorant , si eis finitur ; sicque & continuum penè exercent in intestino chilificatorium munus , fellis vesiculâ carent , pro ut perpetua stomachi turgescencia eam receptionis biliaris imparem , ideòque inutilem redderet ; dum cæterum ob ejus defectum profluit indefinenter per ductum hepaticum absquè diverticuli interruptione bilis ad intestinum , ibidem ad continuam penè functionem necessaria. Datur autem ruminantibus cystis , Ovibus , Bobus &c. quia longum in eisdem iter massæ chilacæ per ventriculos & ora , interpolatam facit chili fabricationem in intestino , sicque & interpolata venit biliosi affluxûs necessitas. Tertia , quod animalia voraciora , & vegetiùs chilificantia , sicque & copiosiore bilis penum exigentia , ut Vrsus , Lupus , &c. non tantùm ventriculum habent torosis fibrarum muscularium planis notabiliùs præcinctum , sed & fellis vesiculam proportionaliter grandiore , & attinguam magis eidem ventriculo ; adeò ut ex titulis hisce omnibus copiosior indè exprimatur bilis. Cæterum interpolatum hunc ventriculi tumorem ex attriguo reservatorio biliosos humores extrudentem comparo cum tumore arteriæ magnæ succos chilosos ex adjacenti eorum receptaculo exprimente : Sicuti etenim valida

extensio aortæ per alternas ejus dialtoles ad glandulas lumbares facta, impetit adeò cisternæ vicinæ parietes, ut liquida contenta nutritia per perpendiculares vias thoracicas, victis resistentiis quàm plurimis, superiùs propellat; sic etiam robusta stomachi per vices expansio, in prædictum folliculum tam nititur; ut contenta fluida verticaliter ascendere, variosque obices superare cogat. Ex diversis autem ductuum hujusmodi verticalium altitudine & diametro, jam concipis diversam celeritatis rationem in liquidis hujusmodi detrusis, & ascendentibus.

§. I V.

Cùm igitur à stomachi pressivo nisu feriatur felleum recipiens, liquidum in eo liberè congregatum non solum à prædicta hujus vasis positura prohibetur ab exitu; sed insuper & ab annulo fibroso laudato, qui potens ex se satis retinaculum est, quotiescunque à fortiori allata potentia non superetur. Perficitur interim quiescens bilis, & ad chiloideos operam præparatur, evectis, explicatis, ac nobiliùs fermentatis activioribus elementis suis. Sic ex solo ductu hepatico excepta bilis pallidior est, minùsque mordax & sapida, quàm quæ in folliculo aliquandiù resederit; ut jam diximus. Cùm autem ejus distributionem petit perficienda in duodeno alimentorum exsolutio; Tunc tantùm ejusdem exhauritur ex cysti ab instrumento chilificativo primario, seu stomacho, quantum ad dictam functionem requiritur. Et reverà, quia secundùm ingestorum copiam, majorem, aut minorem, plus aut minùs expanditur fundum ventriculi, sic ex majori aut minori ejusdem ampliacione plus etiam aut minùs compressus felleus folliculus, majorem aut minorem copiam liquoris sui in intestinum eructat; adeò ut ad intumescentiæ stomachalis gradum, gradus pressuræ cysticæ proportionetur; Sicque secundùm alimentaris massæ solvendam quantitatem, bilis proportionaliter & quantitas descendat opportunè in duodenum, eam debitis utilitatibus donatura: Quod bene quadrat cum animalis œconomix legibus. Patet itaque nunquam ex unica ventriculi actione bilem totam ex cysti sua exhauriri; rariùs ejusdem medietatem; ordinariò portionem minorem; pro ut nunquam expansus ventriculus totam implet

implet cystim tumore suo, rariùs ejusdem medietatem, ordinariò portionem ejusdem minorem.

CAP. XX.

Vasa cystis propria; eorumque usus.

§. I.

Licer, quæ in suo folliculo sensim colligitur bilis, magnam partem adveniat per porum cysticum; aliæ ulteriùs præter hoc immixtum se se manifestarunt scatebræ, nonnullam dicti liquoris quantitatem in hoc etiam receptaculum transportantes. Plures adnotantur vasculares tractus inæqualium inter se se cavitatum, fundum vesiculæ & cervicem inosculantes; quorum indè progressus in profundam hepatis substantiam immergitur. Per-
 specti jam dudum fuere ab antiquis * quàm plurimis speciales hujusmodi cystis biliaricæ siphunculi, radicum ejus, aut fibrarum nomine ab eisdem donati. Mox à * modernis atoma magis inspectione vestigati, detecti sunt notabiliter cavi, fluidoque bilioso saturati: Horum aliquales obliquè inter cystis tunicas inserti, sicut ureteres inter vesicæ membranas: hiantes insuper in cavum vesiculæ, quadam ad eorum terminum protuberantia ad instar fibrosæ annularis carunculæ, quemadmodum in intestinum deflunt ductus pancreaticus, & cholidochus: valvulis tamen, ut latea vasa, in cavitatibus suis non præditi (licet diversum sit aliquorum * judicium): multiplices autem in animalibus variis, sed non ejusdem in eis numeri: In duplicem manifestè classem præcipuè distincti; pro ut ex hisce canalibus aliqui immediatè cum ramis ductûs hepatici majoribus, post aliqualem eorum per hepar excursum, plenâ insertione communicantes, occurrunt; alii autem per ipsummet hepatis parenchima indefinitâ terminatione disperduntur: Inter hæc vasa majusculum unum & grandius notatum, exactèque jam à sæpiùs laudato * authore, aliisque descriptum, à ductu hepatico paululum antè cystici insertionem emergit; indeque vesicam ad posteriora cervicis propè collum subit, duplici

* Spigelius.

Iasolinus.

Bauhinus.

Riolanus.

Aliique.

* Glissonius.

nus.

Rudbeck

Blasius.

Blancard.

Sladus.

Bartolinus

Th. Perault.

Verbeien.

Aliique.

* Amstel-

damenses.

* Glissonius.

* *Perault.*
* *Verheyen,*

duplici ordinario insertione, per duos scilicet ramos, in quos propè vesicam disperitur ejusdem truncus. Horum omnium canalium usus ad unicam bilis in recipiens suum deportationem decantatus fuit; Hinc cyst-hepatici ab * aliquibus; ab * aliis autem hepato-cystici meliori omine noncupantur. In grandiorum animalium jecinore reperta primò fuere hæc vasa, ad humanum indè & hepar appropriata.

§. II.

Ipse patienti curiositate eadem vasa sæpiùs perscrutatus in animalibus quamplurimis, Bobus, Equis, Suibus, & etiam Molossis vix strangulatis, ductus primæ classis superiùs descriptos à cystis cervice aut fundo non difficilè insectabar usque ad insertionem in ramos trunci hepatici majores: difficiliùs originem alterius classis expositorum, seu ad ipsammet hepatis substantiam apparenter terminantium explorare poteram. Sed tandem, improbis laboribus non parcens; exactissimo, flatûs, cultri, oculi ministerio, & face clarescebat mihi, minutos etiam hosce ultimos canaliculos, non minùs ac priores, ex ipsismet pori biliaris ramis exoriri, sed minutioribus, magisque in hepatico recessu sepultis. Varium amborum canalium numerum in subjectis variis attingebam: In hepate suillo, quod erat ultimò præ manibus tantùm, fateor, vascula primi generis, seu grandiores pori biliaris ramos cum vesica amplè communicantes, observabam; duo autem solùm alterius generis, seu à vesicula usque ad remotiores, & minutiores ejusdem pori propagines progredientia, insequi poteram; licet numerosissimi esse debeant ad unamquamque cystim felleam hujus familiæ canales, sed ob exilitatem, inquirentium anatomicorum operam facilè eludentes. Quod autem præcipuè in ambabus harum fistularum speciebus attentius observabam, earum erat distributio. Et siquidem tam vasa hujusmodi ad ramos ductus hepatici majores, quàm ad minores tendentia ex ramis constant variis in unicum truncum coalescentibus: sed diversitas est, quòd vasa primi ordinis, seu à vesicula ad ipsammet ductum hepaticum, aut majores saltem ejusdem ramos inserta, truncum habent suum ad hunc ductum, diramationes autem qua

qua parte communicant cum vesicula ; in quam scilicet non unico trunco , ut in ductu , sed diversis intrant principiis , ostulisque , ac ad minùs duobus: Quæ autem à vesicula cum intioribus , & minoribus ductus bilarii surculis concurrunt ; seu secundi generis vasa , ramositates è contrà habent suas ad dictum cum poro bilario concursum , seu diversis , & ad minùs duobus principiis ex eo pullulant ; Quæ indè ramositates ante vesicæ contactum in cespitem coalitæ , eo indè unico in eam aperiuntur. Observabam insuper hæc solùm descripra secundi generis vasa obliquè in cystis tunicas inseri ; ac tuberculo ad eorum hiatum donari ; non autem primi generis alia. Sed hæc omnia meliùs lectori constabunt ex nitidis iconibus suis , suo tempore , ad anatomes utilitatem , exhibendis.

§. III.

Quoniam autem cursus liquidi crassioris , ut bilis est , infallibiliter à cavitatibus minoribus in majores dirigitur , seu à ramis in truncum , non autem è contrà ; ut luculenter à celeberrimo * * Viro demonstratur ; & manifestum est in motu bilis per porummet ipsum bilaricum , in cujus propaginibus agitur principium motus progressivi hujus liquidi , terminus autem in trunco ad intestinum protenso ; sicque ex hac bilis via majori , & regia , norma deducenda est ad minores alias. Idcirco ex perspecta canaliculorum cystis habitudine prædicta , absque ulla statim hæsitacione percepi , in vasis illis , quæ à vesicula pluribus sobolescunt principiis , compositis indè in unicum truncum ampliores ductus bilarii tubos subeuntem , motum bilis fieri à cysti ad ductum ; in aliis autem , quæ principiis è contrà variis è ductus ramis minutioribus emergunt ; indeque , in truncum conjuncta , vesicam ingrediuntur , bilis motum & è contrà fieri ; à ductu scilicet ad vesicam ; adeò ut omnia hæc specialia cystis vascula sint viæ communicationis genuinæ , & reciprocæ inter ductum hepaticum , & eandem vesiculam ; Quarum aliquæ fluidum biliosum ab illo ad hanc adferant ; aliæ è contrà ab hac auferant , & ad illum devehant. Ex curioso hoc vesicæ felleæ ductuumque biliariorum duplicato commercio maximam in animali machina utilitatem animadverto.

Bellini.

Quoniam etenim ad chiloſeos complementum derivatio poſtulat interpolata liquidi bilioſi à cyſti ſua per choledochum in inteſtina; ut vidimus ſuperiùs; Hęcque derivatio in duplici caſu impediri poteſt; vel ſcilicet cùm obſtructis (quęcunque ſit cauſa, ut materies limoſa, calculoſa, propriave craſſities aucta &c.) ramis ductus hepatici, ab eodem per conſequens deponi nequit in cyſtim bilis, nec inde ex ea in inteſtinum deferri; vel cum obſtructo meatu cyſtico, bilis ab hepatico in cyſtim deſcendere non poteſt; & præcipuè, ſi collecta jam pridem fuerit in veſica, ulterius tamen impar eſt ad tranſcolationem ex ea in cholidochum: Sic duplicibus hiſce communicationis viis duplici huic impedimento remedium apponitur. Et equidem demus interceptam eſſe, ob cauſam aliquam, cyſtici canalis permeationem, ſicque & præpeditum hic loci trajectum bilis ab hepate ad cyſtim, aut ab ea ad cholidochum; quotieſcunque ventriculus digeſtionis tempore veniet, ut ſupra, ad felleæ cyſtis preſſuram, liquidum in ea contentum, debitoque muneri præparatum, in ductus productos ab ea ad ramos majores hepaticos expreſſum, jam per hepaticum, & choledochum adhuc indè deſcendet in duodenum. Demus jam fortiter infarctos eſſe, aut compreſſos per occaſionem aliquam eis interaneam, aut extrinſecam ramos pori biliarii, ſicque per eos prohibitum bilis curſum ad truncum hepaticum, indeque ad cyſtim &c. non-nè per canales hepato-cyſticos, communicantes cum minutioribus ejusdem ductus propaginibus, ideòque ad locum infarctus ſuperioribus, adhuc bilis in cyſtim deportabitur, ad ulteriores indè fluxus ſuos per ſupradictam ſtomachi actionem determinanda? Ob hanc ideò rationem eſt, quod quæ cyſtis radices ab ea ad ductum hepaticum, ad occaſionem impedimenti meatus cyſtici, derivationi bilioſæ ſunt deſtinatæ, in majoribus ejusdem ductus diramationibus inferuntur, non longè ſupra inſertionem ejusdem cyſtici; ſeu minori quantum poſſibile ſit ab inteſtino diſtantia; ut indè bilis à cyſti in porum elutriata, devehi ſtatim poſſit ad inteſtina: Quæ autem radices à ductu hepatico ad cyſtim devehere aptæ natæ ſunt, in occaſione
impedi-

impedimenti ad ejusdem ductus progressum, minoribus ejusdem ductus propaginibus inosculantur; longius scilicet quantum possibile sit ab ejus fine in intestinum; in ejusdem nempe principiis, & radicibus; ut sic suprà impedimentum remaneat per easdem libertas bili ad transcolandum in cystim. Et ecce quod circa denominationem tubulorum hujusmodi cysticorum conciliare possumus authores * superius laudatos; cyst-hepaticos eos appellando, qui à cysti deferunt ad hepar; hepato-cysticos autem, qui ex hepate ad cystim transportant bilem. Et Nota ductus hepato-cysticos, etiam patula meatus cystici via, bilem semper in folliculum devehere, licet fluidi per hæc hepato-cystica devecti quantitas tantum sit minor quantitate fluidi per porum cysticum delati, quantum minor est illorum simul sumptorum cavitas istius cavitatis.

* *Pervault.*
Verheyen.

§. V.

Manifestum est igitur, dispersum hoc per hepatis substantiam minutorum diverticulorum commercium artificiosum, liberum bilis fluorem servare per porum hepaticum, cystim, & ductum cholidochum, vigentibus licet in hoc viscere partialibus obstructionibus variis. Quod si obstructio universalis sit per hoc organon, aut in ipsomet secretionis fonte, seu glandulosis concursibus defixa, ut in scirrho generali; aut in tota saltem eadem cysti, ut in pleno ejusdem infarctu calculoso; tanta non obstante providentia, actum est de bilis distributione per dicta vasa, & ab eis per intestina: Quod bene testantur succedentes inde res affectorum malæ. Assertis igitur, ad calcem capitis, in duo verba contractis, duo sunt ad cystim felleam liquidi sui immissaria, duo & emissaria: ex primis unum sunt ductus hepato-cystici; ex alteris unum ductus cyst-hepatici; ut mox vidimus; Utriusque autem officium gerit per vices meatus ipse cysticus; ut etiam vidimus *Capitibus duobus precedentibus*. Hujus in utroque instrumento duplicitatis commodum percepimus; ut scilicet in alterutro horum canalium genere una specie à munere suo feriata, & intercepta, congener suppleret altera. Nec minor circumscriptio usurpanda erat in organo, per quod fluidum per-

fuit sat lentore præditum, ut faciliè sibi ipsi vias obstruere possit; præcipuè quod partibus etiam aliis humani Corporis conspicuis, ac sola tenuiorum laticum turba irrigatis eadem applicetur cautela. Sic variæ observantur in cerebro, in medulla spinali, in utero, in osculationes, uniones, commercia, in arteriis, in sinibus, in venis; ut scilicet in aliquo ex hisce canalibus præpedito fluidorum cursu, per communicantes alios perennari posset: Sic ideò duo jacent ad lumbos renes; ut uno impedito, per alterum adhuc celebretur functio secretionis urinariæ.

CAP. XXI.

Quantitas bilis, quæ in hominis hepate naturaliter excernitur.

§. I.

EX eo, quòd sanguis bile spoliandus sua, notabiliter tardigradus sit per hepatis acinos; ut jam demonstravimus: Quòd insuper hepar, præter diaphragma, nullis circumsepiaitur potentiis muscularibus ejus moli proportionatis, quæ continuis indè pressionibus, aut alternis, ejus functionem accelerent: Quòd præterea tùm liquidum secretum, seu bilis, notabiliter lentum sit, & viscidum; tùm ejus emissaria, seu ductus excretorii ad cavam visceris regionem jacentes, sint extrà actionem tùm diaphragmatis, tùm alterius cujuscunque agentis extrinseci, quòd liquida contenta ad fluxus suos detrudat: Quòd denique naturalis horum ductuum biliferorum positura in visceris corpore, vel ad ascensum, vel ad planum, parùm ad declive succos comprehensos dirigat; ex his omnibus evincitur parum bilis respectivè ad totam humorum massam per datum tempus in hepatis colatorio secer-
 * *Glissonius.* ni: Sicque dato, per authoris * toties commemorati calculum, quod particula felleæ in massa existentes à sanguinearum copia plusquàm centies superentur; concludendum est, quòd datâ, ut est communiùs, quantitate sanguinis in homine ad lb. XX, quantitas bilis in massa non ascendat ad unc. ijss: indèque dato quòd

quòd spatio 24 horarum posset totum secerni in colatorio suo liquidum hocce, ac cibariis restaurari (quod tamen sublestæ est probabilitatis) remaneret quòd secretio bilis in hepate per datum dici tempus non transcenderet quantitatem allatam unciar. 2. ss: . Cùm autem in canibus per octiduum ab alimonia quacunque omnino prohibitis, sicque ex inedia denatis observaverimus vesiculam fellis, & vasa biliaria bilem adhuc continere; inferendum remanet totam bilis in sanguine existentis quantitatem spatio 24. horarum non transcolari in hepate: Sicque jam quantitas bilis, quæ singulis diebus naturaliter secernitur in hepate hominis, reducetur ad minorem quantitatem, quam communem illam assignatam unciar: ijss. . Nec obstat asserto experimentum, quo, ligatis poro bilario, choledocho, aut jejunio intestino in animali vivente, hi ductus bile satis turgidi observantur; eisque per inflictum vulnus apertis, permulta satis bilis quantitas recolligitur; hoc etenim non nisi post longum tempus accedit; & solum per hoc, quòd ex intensissimis doloris stimulis ab immani operatione excitatis per partium continentium, ipsiusque visceris lacerationes, distensiones, ligaturas &c. concitatur in experimenti martyre violentior multo, seu rapidior quàm naturaliter, fluidorum motus in hepate; fitque per consequens & violenta secretio; copiosior scilicet quàm in statu naturali.

§. II.

Quantitas autem mediocris bilis, quæ naturaliter in hominis hepate, & vesicula infidet, est ad unc. circiter sex, si experimento acquiescere possum, quo ex cysti fellea hominis benè constituti, & laqueo extincti bile tota diligenter extracta, indeque per repetitas syringationes aquæ tepidæ determinati ponderis, vasis hepatis biliferis universis exactè à bile absterfis; ex facta hinc ponderum aquæ, & bilis inde immixtæ collatione, prædictam bilis quantitatem in dicto jecore insidere animadvertēbam. Potest autem cum legibus motuum animalium, singulis hominis humoribus necessariò competentium, salvari existentia unciar. 6. bilis in hepate & cysti, & percolationis in eodem philtro unciar. tantum unius, aut alterius per spatium nycthe-

meri; eodem ritu ac salvatur, aquas maximi lacus sufficienter loco moveri per perennem ingressum, & egressum parvi fluminis: Unde sicuti dicimus aquas lacus, quæ ad mensuram exilis fluminis eas ingredientis, & egredientis, motu cientur lentissimo, tantum adhuc moveri in alveo suo, ut nullimodè putrescant, quamvis dictum flumen suum sit respectu ad earum quantitatem, in ratione multò minori, quàm unum ad mille; sic à fortiori affirmamus, totam hepatis bilem, quæ, ad mensuram modicæ quantitatis ei per datum tempus adjunctæ, tardissimo gradu per dictum viscus spatatur, constanter proprio in alveo loco moveri à minutioribus per grandiores ductus, quamquam diei spatio addita quantitas in hoc colatorio secreta, sit tertia, quarta, quinta, sexta, aut minor pars ejus, quod ibidem reperitur ordinariò. Ex hac floris biliosi tarditate in jecore, in ferè jam porri biliarii ramos non solum ductus esse ejusdem bilis, sed etiam, & aliquatenus receptacula. Et de facto in animalibus cysti destitutis, ut Columbis, Equis, Mulis, Cervis, Vitulis marinis, Delphinis &c. canales bilarii suppleant hanc vicem receptaculi; non secus, ac in avibus cloaca supplet vices vesicæ urinariæ &c.

§. III.

Cæterum assertis de quantitate ordinaria bilis tum in hepate insidentis, tum per diem integrum in hoc colatorio excretæ, multum repugnat Hypothesis acerrimi * in rebus mechanicis viri. Hic Mathematicus suppositâ æquali fluidi contenti turgentia in vena cava, & in ductibus biliaris; suppositis insuper cursu, & velocitate æqualibus in liquidis per cavam, & ductus laudatos excurrentibus; hinc facta collatione geometricâ orificiorum cavæ, & pororum biliariorum, invenit orificia circularia eorundem pororum superare ducentessimam vigesimam quintam orificii venæ cavæ; seu 225. partem amplitudinis orificii cavæ vix minorem esse tota amplitudine orificii communis horum ductuum; ad quam per consequens, & proportionem ducit effusos ex eisdem orificiis fluores eodem tempore: Facto indè calculo mediæ quantitatis sanguinis in homine ad lib. XX., indèque quantitatis circuitum totius sanguinis per cavam in 24. horis ad 384. vices

* Alph.
Borelli.

vices (suppositis scilicet quâque hora 16. circuitibus) infert, transire in dato tempore per venam cavam 7680. libras sanguinis; & per consequens eodem tempore unam ejus quadrigentesimam, 34. scilicet libras biliosi succi effundi debere per canales biliares ab hepate intrâ duodenum, sed clara nimis suppositorum falsitas hanc statim arithmetica diruit. Et equidem, quò ad primum; nulla ferri potest paritas inter repletionem cavæ, & ductuum biliariorum; Cum isti longè minùs turgeant succis suis, quàm cava contento sanguine; ut quotidiana autopsia docet: quò ad secundum, & principalius; nulla omnino dari potest similitudo inter velocitatem sanguinis cavam alluentis, & liquidi biliaris per ductus suos derivati, quando non minùs efficaces occurrunt causæ, in hoc tarditatem, quàm in illo velocitatem, per dicta sua vasa producentes; qua statim percipis, si refers tanta ad fluxum urgentia cavæ apposita momenta; vasis amplitudinem; brevem à motus impulsu distantiam; tunicarum elateres; perennes arteriæ sociæ vibrationes; muscularium potentiarum multiplicitates adjacentes; sanguinis contenti tenuitatem &c. cum nullis hujusmodi causis ad ductus biliares in hepatis concavo occurrentibus; nullis ibidem muscularibus potentiis; nulla competentem amplæ, & pulsantis arteriæ attiguitate; nulla tunicarum cingentium oscillatione, aut muscularium adjacentium, præter debilis capsulæ, pressura; alvei exilitate; maxima à motus impulsu recessione; (ut jam superiùs vidimus) notabili fluidi comprehensi lentore, & crassitie, &c. quæ imò omnia, additis fluxus impedimentis prædictis ad Coledochi terminum positis, contrarii effectus potissimæ sunt causæ; turpis scilicet otii respectu ad humorem interfluum. Adde quòd assertum hocce mathematicum damnant penitùs placida super hac re ulteriora, quæ idem-met author ex hisce præmissis deducit: Inventam scilicet sibi præ manibus tantam bilis quantitatem clariss. Vir nesciens indè, in quam occupatione eamdem exerceat; circulare facit, contra quemcunque œconomix naturalis ordinem, tanquàm per Pelicanum in abdomine appositum; asserendo eam ab hepate in duodenum percurrere; hinc à venis meseraicis, tanquàm ab hirudinibus

rudinibus exsuctam, per hasce, & per truncum portæ rursus in hepar; ut ibidem scilicet tantam secretionem perpetuet: Quam jam hypothesim superius refutavimus. Mitto vos ad legenda in ejus opere paradoxa hæc, aliaque medica, eorumdemque probationes; ut statim mecum subscribatis, intricatiora medicinæ Gordia per solas geometriæ subtilitates elucidari sufficienter non posse.

CAP. XXII.

Alter hepatis usus, præter secretionem bilis.

§ I.

Licet proportio magnitudinis hepaticæ, respectu ad magnitudinem trunci portæ ingredientis, & trunculorum cavæ egredientium, sit in ratione æquali, cum proportionem tarditatis fluidi per idem viscus excurrentis, & celeritatis ejusdem fluidi per dictos venosos truncos derivati, non minus ac, ob eandem rationem, lacus superius ad exemplum expositi extensio est in eadem proportionem cum alveis utriusque fluminis cum ingredientis, & egredientis; Sicque hepatis corpus tamquam exundatio duorum fluminum, cavæ, & portæ, in maximam respectu ad istarum cavitates amplitudinem expandi debeat, non minus, ac lacus respectu ad sua flumina; ex quibus jam pateat necessitas tam vastæ molis in hepate, licet tam parva in eodem celebretur secretio; Quia tamen eadem fieri poterat secretio in hoc viscere, cum multo minori ejusdem volumine, sicque, & majori animalis utilitate, ob minoratum ejusdem organi pondus, variorum motuum libertati repugnans; paucioribus scilicet in eo constructis concursibus glandulosis; quibus, & canalium biliferorum principiis, ac progressibus apposita simpliciter potentia aliqua muscularis fluidi contenti secretionem, & distributionem accelerans, non minorem institueret secretionem, quàm in multiplicibus: Igitur si hisce non obstantibus, tam grande viscus, cum tam modica

dica secretionē, homini datum fuit; hoc certē non nisi ob ulteriū aliquod commodum institutum; quod scilicet à tanta ipsamet visceris magnitudine accedat in homine. Quoniam autem hocce ex hepatis magnitudine commodum non cadit suprà aliquod intus actum in ipsomet viscere, ut patet ex dictis. Ergo suprà aliquod ei exterius, seu suprà partem adjacentem aliquam; idēque suprà Ventriculum; cui prae aliis attiguis partibus strictiū, & latius adhæret hepar; Ergo super ejus functionem.

§. II.

Et siquidem, quoniam actio principalis ventriculi ciborum est solidiorum exolutio; manifestē percipio ex pergrandis hepatici corporis ad stomachum accubitu hoc vasto, acriter adjuvari facultatem hujusmodi: Quod clarē ostensum vado per duo exempla mechanica, & familiaria, res solidissimas, ut sunt ossa duriora, in liquamen solutas exhibentia. Quod primum; modum edocent Curiosissimi * Authores grandiora cujuslibet Animalis * *Boyle. Papiniaz.* ossa in liquidam substantiam per mediocrem M. B. calorem brevi tempore elixatione solvendi; dummodò ea continens vas in tali occlusionē disponatur, ut tū igniculi in eum introducti, tū subtiliora ejusdem solvendæ substantiæ Corpuscula ab igniculis extricata, & commota, foras evolare nequeant: Sic vas hujusmodi Cilindricum Cooperculo striatim disposito arctissimē occluditur; quo ritu ignis Spicula per coctionem intromissa, Saliaque ossium contentorum volatilia à dissipatione impedita, in Elixæ materiei soliditatem retorqueantur; Sicque acriter sūque deque per totam ejusdem compagem rotantia, liquidumque aqueum immixtum, quāqua versum introducentia, eam tandem eliquent totam, & solvant. Simile, ob hepatis accubitu, accidit esculentis in ventriculum depositis; pro ut recipiens hic uter digestivæ elixationis tempore, jam in inferiori orificio à sphinctere, & mechanica tortuositate occlusus, in altero insuper, seu superiori orificio ab adjacentibus visceribus, sinistrorsum à lienis corpore, dextrorsum & præcipuē, à grandiori, & magis accumbente hepatis mole premitur aded, & constringitur, ut tamquam operculis strictē appositis occlusus, transpirare non sinat activiores menstrui salivaris particulas, à digestivo conflictu exaltatas, ac extri-

catos jam ipsius met massæ cibariæ spiritus; Quibus indè in digerendam massam reverberatis acuitur solutiva virtus; eique per universam ciborum congeriem liberior aperitur via. Alterum exemplum ex Pharmaceutica illa operatione desumitur, qua frustra cornu Cervi ità alembici summitati applicantur, ut continuò ascendentibus halitibus aqueis penetrata, emolliantur tandem, & à soliditate decidant sua; quod præparatum C. C. Philosophicum vocamus. Perspice jam parem actionem in stomacho à jecore peractam: Observa vastum hepatis corpus adjacens ventriculo; ordinariam ejus caliditatem considera ex tanta sanguinis copia, eum assiduè irrigante, lentoque passu lingente; & statim concipies copiosissimos & halitus calidos humidosque ex calido humidoque hoc viscere expirare continuò debere; qui indè in ventriculi Cavum penetrati, ad ciborum solidiorum eliquationem unà cum saliva faceffant. Dixi halitus Calidos, & humidos; quia Calidi, & sicci halitus dictæ non opitulantur solutioni, sed officiunt potius; majori scilicet in solvendo Corpore conciliata induratione. Simples idcirco ignis halitus calidi, & sicci collimant nullimodè ad solutionem C. C. in operatione prædicta: sic non malè effati sunt Prisci, Calidam nimis jecoris diathesim ad chilo-seos imbecillitatem conducere; prò ut ex tali habitudine, alimentum perassatio potius, quàm elixatio succedat; in qua ultima omni equidem jure, primæ digestionis naturam posuere. Constat itaque ex dictis usus hepatis ulterior præter secretionem bilis à sanguine; volumine scilicet suo pergrandi, ad ventriculum accumbente, chilificationis complemento ancillari: Quod etiam arrisit omnibus penè antiquorum Scholis, Chilificatorium aliquale, præter sanguificatorium munus integrum, hepatis moli assignantibus.

§. III.

Additur placitis vis, ex instituta observatione in animalibus voracioribus, sicque validiora Chiloseos instrumenta exigentibus; in hisce etenim multò majus quàm in Homine, proportionaliter ad alias partes, superbit hepar; ventriculum insuper strictius circumcingens; & multiplicatis lobulis, tanquam totidem digitis ad unguem complectens; Imò figuram, & molem suas ejusdem figuræ, & moli exactius accommodans. Sic in Mure maximum,

per

per collationem ad partes alias, sedet jecur, ventriculum tamquam in centro suo involvens, & recondens: in Cane fortius adhæret hepar ventriculo, eumque strictius, & amplius amplectitur, quàm in Homine: in Vipera, cujus summè energeticum est stomachi munus, hepar maximum est proportionaliter ad alias partes, non tantum suprà, & circà ventriculum protensum, sed usque ad duodenum; ad ultimam scilicet chylificationis opellam ibidem adjuvandam incubatu suo. Sed quid clarius illustrare potest partium fistulæ intestinali adjacentium munus ad digestorium opus humido earum calore fovendum, quàm omenti V. g. disjunctio à dicti canalis incubatu in variis morbofis casibus succedens, quam indè notabilis excipit indigestionis habitus? Usus itaque hepatis secundarius non est sola hypochondrii dextri impletio, ut quibusdam ex vetustioribus placet, ad solam indè corporis venustatem, post hæmatoseos officium, tam vastè efformatum hepar asserentibus; quorum vaniloquia hujusmodi, piget ulterius commemorare.

CAP. XXIII.

Tertius Hepatis usus.

§. I.

Cùm itaque molem præ se ferat hepar notabilem: præterea substantiæ distractilis sit, & expansilis; & tanquam peninsula in abdominis cavo propendens, primo aortæ emissario, coeliacæ scilicet appendatur: ac præcipuè totam ebibat sarcinam portæ, in cujus trunco, & diramationibus tertia circiter pars totius sanguinis in Homine existentis continuo residet; sicque amplissimis vasorum plexibus contextum audiat; sic Alium insuper revelat secundarium usum suum; sanguinis scilicet diverticulum esse unà cum liene, quotiescunque, vel copiâ, vel rarefactione auctus hic liquor ultra molem ordinariam, posteriores etiam, amplioresque vias exigit cursui suo; sicque ampliabiles fistularum hepatis cavitates dilatando, orbitam aperiens grandiore sibi. Hæc autem diverticulorum cautela necessaria erat in animali, in quo, vel ob alimentorum copiam aut qualitatem, vel ob exercitia for-

Q 2 tiora,

tiora, irregularia animi pathemata, suppressas evacuationes aliquas, aut alias causas sanguinis massam augescentes, aut rarefacientes turgescit hic liquor in vasis adeò, ut extra eorum aream exundare possit, & spatium sibi quærere in varias corporis cavitates, aut substantias, magis minùve principales, cum subita indè animalis nece, aut gravissimis saltem succedentibus morbis; Quod tamen, non obstante hoc diverticulorum beneficio, sæpè & accidit; cum scilicet sanguinis substantia enormiter, & ultra omnem mensuram, in suis canalibus inflatur, & augescit.

§. II.

Confirmatur hæc diverticuli, quò ad sanguinem, ratio in hepate, ex eo quòd in animalibus copiosiori sanguine præditis majus hepar est: Insuper in pinguioribus animalibus, in quibus sanguis partes suas divergit per totum corporis habitum ad pinguedinis fabricam, gracilius est hepar, quàm in macilentis, in quibus parva nutritio majus infert fluidorum volumen in vasis: Hepar ideò Caponis proportionaliter minus est quàm Galli. Firmat ulterius assertum, ingentius hepar in calidioribus animalibus, in quibus sanguis fortiorum motuum compos est; Sic animalium aquatiliùm hepata terrestrium jecinoribus sunt minora: Præterea grandius in foetu, & puero proportionaliter, quàm in adulto, prò ut in eis copiosior in diem viget succorum nutritiorum affluxus in sanguinem; hinc & in diem majoris diverticuli necessitas.

§. III.

Usum insuper hujusmodi hepaticum plenè demonstrant hæmorrhagiæ narium in levibus etiàm hepatis, & lienis obstructionibus ordinariò accedentes; quo casu per hæc viscera competenti sanguis non fruens spatio, sicque copiosius, usque ad eruptionem è vasis, exundans ad partes superiores, manifestum facit in hisce organis diverticulorum munus. Hoc hæmorrhagiæ narium symptoma, morbis hæc viscera infarciuntibus succedens, frequenter observo ad ægrorum thoros currenti hoc vere, quo tempore hæc scribo; Ubi febres penè omnes tam continuæ quàm intermittentes desinunt in depositiones hujusmodi ad hypochondria. Sed melius elucebit habitudo hæc hepatis diversoria ad sanguinem, in altera hujus tractatus parte, statum hujus visceris præternaturalem exponente; Quam statim aggredior.

HISTO-



HISTORIÆ HEPATICÆ

PARS SECUNDA.

Complectens quæ ad Hepatis morbos pertinent.

CAPUT PRIMUM.

Et Preliminare.

DIVISIO MORBORUM.

§. I.



Uficam in Apolline, Medicinæ connectere, res apud Poëtas plena iudicio fuit. Humanum Corpus per harmonicum partium suarum omnium nexum, suaves concentus edit, & concordēs; Vitiato hoc ordine partium, discordēs, & insuaves. Quemadmodum igitur Theoretica medicinæ pars ordinem rerum considerat, quæ statum objecti huius sui naturalem, seu sanitatem constituunt; Sic librat & Practica ordinem rerum, præternaturalem facientium, morbosum scilicet. Hisce modulis ordinem quemdam insecuti in Physiologica inspectione Hepatis, Anatome, Structura, functionibus, secretionis modo, aliisque ad eam spectantibus; non minorem in pathologica ejusdem visceris perquisitione amplectemur: ut Primæ manu ductione in alterius elucidationem conveniamus; facilius scilicet, quàm hactenùs fuerit, morbos Hepatis omnes internoscentes, inter se se, sedesque suas, differentias, & causas discriminantes; Saniùsque inde ad eorum curationem properantes: Cui certè instituto totæ diri-

guntur speculationes scientificæ; totique Anatomicorum labores. Sic loquens de Medico Ecclesiasticus: *Opera ejus sunt necessaria.*

§. II.

Morbus quid sit.

Divisio Generica partium humani Corporis.

Morbus; ille est corporis humani, aut partium ejus aliquarum status præternaturalis, in quo plurimæ ejusdem, functiones, aut aliqua solum, sensibilibiter læduntur. Mitto hîc loci statuum præternaturalium, morbi scilicet propriè dicti, morbi causæ, & Symptomatis varietatem; quæ ordinariò relativa solum est, non vera; pro ut idem status præternaturalis per diversos respectus considerari potest ut causa, ut morbus, ut symptoma. Duo summa sunt partium humani Corporis genera: fluidum, & firmum: seu liquidum, & durum: (quod semper est idem) seu humores, & Canales: Nec tertium datur, nisi ex utrorumque connubio: ut molle; quod ad alterutrum magis accedit, pro ut de alterutro magis participat. Mechanicè hîc, non Philosophicè fluidum, solidumque considero; fluidum à solido, & vicissim discrimino. Solidum hîc solum intelligimus, quod terminis suis consistens est; liquidum è contra: seu alia enunciandi formula; liquidum illud est, cujus adeò rupta est cohæsió partium, ob quarumcumque superficie lævitatem, ut invicem, & sejunctim moveri illæ possint per vias diversas: solidum è converso. Sic solo sensus judicio contenti, non indè ulterius inquirimus, si sensibilibiter fluida usque ad ultimum componens sint fluida, si sensibilibiter solida usque ad ultimam particulam sint solida. Exponendis mox rebus præponenda erat necessariò hæc adnotatio.

§. III.

Morborum Genera.

Morbi à fluido.

Morbi à solido.

Duo igitur jam veniunt primaria morborum genera in homine, pro ut dictæ hominis utræque partes in statum præternaturalem possunt aut simul, aut seorsum concedere. Morbus in fluido constituitur ex mala ejus habitudine in mixtura, aut in fluiditate, aut in mole, simul, aut seorsim; idest, vel ex ejusdem sorditie; vel lentore, aut tenuitate; vel exuberantia, aut defectu. Morbus in solido oritur ex mala ejus constitutione, aut in laxitate, aut tensione, aut solutione unitatis. Sicuti extra omne dubium est dari morbum in fluidis independentem à solidis; conceptibilem nempe absque solidorum concursu, ut ideo dicatur morbus in fluido

fluido ut fluidum; Sic morbum locari in solido independenter à fluido, ut morbus à solido ut solidum, nuncupari possit, conceptibilem videlicet absque concursu fluidi, manifestè evincimur contra multorum sententiam: & equidem, cùm solidum animale vim quandam habeat contractilem naturaliter, & ingenitam, eamque sensibilem absque interventu fluidi, quam tonum dicimus, quamque observamus in villo membraneo, aut muscolari ab animali avulso, qui ultra tensionem suam distractus; indeque suæ libertati permissus, sponte retrahitur ad statum naturalem, seu pristinum; imò vix unum invenias compositum, in quo spontanea non vigeat contractio; adsit in vitro, in metallis, in lapide, in duris omnibus, in aere ipso, in ipsa aqua, fluidisque cæteris; ut graphicè demonstrat *Bellini*; Sic, & independenter à fluido vis hæc spontaneè contractilis vel augeri potest ultra statum naturalem, quod est solidum in tensionem induci; vel diminui, quod est solidum in laxitatem cadere. Tensio, strictior est solidarum partium, inter se se contactus, dejecta magis minusve è loculis suis interposita fluorum substantia: Laxitas, è contrà. Comprobat tensionem solidi ultra statum naturalem à fluidi actione omnino independentem observatio in juvene mihi familiari; in quo cutis brachium dextrum præcingens strictissimam adeò præ se fert texturam, ut difficillimè ibidem lanceola pertundi possit subjecta vena; dùm non eadem res est in brachio altero. Evincit laxitatem solidi primariam quoque, & independentem observatio *Meeckren*, in milite illo hispano, cujus humeri cutis, mammæ, genuque dextrorum extensilis accedebat adeò, ut per levissimam applicatam vim in primis partibus, ad os accederet; in tertia ad ulnæ dimidiæ longitudinem elongaretur; retracta hinc statim, post remotam trahentem manum, ad naturalem textum, & laxitatem; & hoc nullimodè in cute lævas partes obtegente. Ossa quædam duriora non nè per casus varios in sano quodam cætera homine ad tantam redacta mollitiem visa sunt; ut, instar ceræ, versari facillimè possent in omnem sensum; in aliis autem indurata adeò, & rigida, ut, tanquàm vitrum fragilia, facillimè dissilirent in partes, vel leviter contrectata? Quid vitii in hisce casibus concurrenti ad omnes partes æqualiter fluido imputandum est, ubi reverà non adest?

Morbi à laxitate solidi.

Veniunt in animalis partibus à laxitate solidi præternaturali variorum affectionum species, in fontibus tamen fluidis. Undè etenim depluvia quædam lymphatica, seu fluxiones communiter dictæ in partibus quibusdam determinatis; in aliis aut vulneratis olim, aut aliter læsis frequentes dolores, congestiones, paralyse, & alia mala; ab intensi frigoris impressione Gangrenæ, & decidentiæ, nisi ex deperdito in eisdem partibus tono, nullo habito fluidorum respectu; seu indita eisdem laxitate, ex qua sufflamina oscillatio; extincta scilicet fluidum ad eas appellens repellendi aptitudo? Et equidem omnes hi morbi in partes speciales quædam accedunt communiter, dum fluida omnia indolenti redolent optimam. Occurrunt à solidi tensione præternaturali variorum

Morbi à solidi tensione.

species. Triplex est in solidis tensio. Prima flatuosa illa, quam convulsionem à repletionem dicebant antiqui, à flatuoso spiritu compagem solidi tumefaciente; quamque ab alkali elastico solidi sinulos omnes quaquaversum expandente deducunt ex recentioribus plurimi, & rigiditatem nuncupant, *Italicè Granchio*; facilis solutionis affectio; ut potè pura, & frigida ab Optimo *Sinibaldi Romano* curata, oleo ab Accurato *Georgi Albiganensi*. Altera est à stimulo artiguo, quæ propriè dicitur spasmus; ut violenta villorum retractio in ventriculo ad vomitum ciendum ex materia ibidem impacta. Tertia est ab inanitione; ut spasmus post hæmorrhagias obveniens, aliasque evacuationes immodicas; Ubi solidorum stamina, deductis fluidorum cuneolis per eorum intercapedines jacentibus; absquè ullo amplius impedimento strictius coeunt inter se se, seu contrahuntur, imminutis dimensionibus suis; non minùs ac eadem cieantur tensione fidium chordæ ab aere austrino, aut ignis vicinia fluidis suis incolis exuta. Prima Tensio à fluido reverà exoritur. Altera à solido primariò ut solidum; licet à fluidis tanquàm occasionaliter dependens. Tertia prorsus, & primariò à solido, nullimodè à liquidorum opere procedens; ut patet. Et hæc tanquàm digressionem quadam afferebam; ut morbos monstrarem verè, & primariò assignabiles in solido; independentes nempe à fluidorum concursu Affectiones aliæ, propriæ etiam solidorum, & essentielles quas scilicet concipere

pere in animali possum independenter à fluidis, accedent in sequenti Capite.

§. V.

Venio jam ad Hepatis morbos; eosque ideò, ex præmissis, in duplex statim genus dirimerem, in alios scilicet, qui ab Hepatis solido immediatè proficiscuntur; & alios, qui à fluidis per hepar excurrentibus. Sed tertium adhuc expetunt genus morbi quidam, non solùm in Hepate, sed cæteris etiam in humani Corporis partibus frequentes, qui ad neutrum ex dictis reducibiles audiunt; prout videlicet nec visceris solido, nec circuitibus ibidem fluidis originaliter imputandi. Et revera, cùm in omnibus hominis partibus accedant sæpè vermes, calculi, polypi, ossa adventitia, flatus, aliaque corpora extranea; ex quibus indè status præternaturalis, seu functionum ibidem sensibilis læsio, seu morbus accedat; nec propriè corpora hujusmodi supernumeraria duro partis, aut liquido referri debeant, pro ut eis in fontibus ordinariò, aut saltem persæpè vigentia; Sic triplici classe morbidas Hepatis affectiones comprehendemus; Primâ nempe morbos à solido, alterâ à fluido, tertiâ, & ultimâ morbos ejusdem ænophoros, seu ab utrisque diversos, quos ideò à corpore extraneo nuncupabimus. Quoniam indè tripliciter considerari potest hepatis solidum; vel scilicet ut totum ejus parenchima; vel ut pars ejus vascularis; vel ut portio ejusdem nervea; Sic triplici capite connectemus hepatis morbos à solido: Primo, morbos à toto solido; Altero, à solido vasculari; Tertio, à solido nerveo. Morbos autem à fluido tùm sanguineo, tùm limphatico unico capite comprehendemus; hoc inde observantes, quod, cùm notabilius hepatis fluidum sit bilis ab eo secreta; rectèque, aut delinquentes sint liquidorum per animalis organa secretorum dispositiones, secundùm quòd recta, aut mala est secretionis habitudo; Sic tot capita subnectemus ad Hepatis morbos à fluido, quot sunt vitiorum genera, quæ secretioni biliari competere possunt. Quibus omnibus pathologiam Hepaticam, Superis afflantibus, absolvemus. Hæc erant, quæ in altera hujus tractatus parte, tanquàm præliminaria, jure præmittenda fore existimaveram. Agé jam manus; in tabula.

Divisio morborum Hepatis.

R

CAP.

CAP. II.

Morbi Hepatis à toto solido.

§. I.

Quid sit
morbus, &
quid sit vi-
tium.

Hepatis vi-
tia.

In magnitu-
dine.

In numero.

AD morbos Hepatis perrecturi, necessum duximus in operis limine eos ab ejusdem vitiis distinguere. Morbus, illa est (ut supra) præter naturam affectio, quæ in animalis insidens parte, lædit ejusdem actionem: Vitium medicè sumptum illam affectionem nuncupant, quæ partis, quam occupat, actioni non nocet, licet præternaturam audiat. Varia sunt Hepatis vitia, secundum respectus varios, quibus à statu hoc viscus naturali alterari potest, absque læsione functionis suæ. Sic respectu ad magnitudinem, frequenter in inspectionibus vastissimæ molis offenditur hepar, duplæ scilicet, ultra naturalem, triplæ, quadruplæ, &c. inculpabili tamen undiquaque substantiâ contextum: cujus exemplum exhibet in puella *Carolus Offredi*. Simile apud *Schenkium*, *Moynichen*, *Stierum*, *Frankenau*, *Hildanum*, *Moëbium* &c. Hepar quatuordecim libras civiles pendens à *Ioanne frider. Hildenreich* observatum, extat apud *Ephemer. German. nat. curios.* Ingentissimum vidit in homine *Gemma*: & ad quadraginta librarum pondus in muliere, ut gravitationem mentiret *Bonetus* in sepulchreto suo; sæpiùsque nos in subjectis plurimis per varia morborum genera denatis demonstravimus auditoribus nostris. In molem enormem, naturalis tamen habitudinis (ut simplici vitio convenire diximus) grandescit hepar in pueris rachitide affectis; adeò ut totam frequenter epigastrii regionem occupet, & ipsum quoque sinistrum hypochondrium attingat; interdum impleat. Olim apud Romanos ars fuit anserem ita pascere, ut Hepar in immensum accrescens, totum prætereà corpus præponderaret; ex *Willisio*. Ad hanc vitii classem reducendi sunt tumores Hepatis quidam indolentes nullius in dies discriminis, qui species lupiarum audiunt ex *Zodiac. med. Gall. ann. 5*. Sic etiam hepatis hypersarcoses, aut fungi in vulnere

nere ejus aliquo, aut ulcere prognati. Quò ad numerum; duplex vidit Hepar *Schenkius*: nullum *Pawius*, *Bauhinus*, *Zacutus*. Quò ad figuram; humanum Hepar in lobos divisum observa- *In figura.* vit *Iac. Grandi*: globosum *Rumlerus*: Quadratum, Cilindriacum alii. Quò ad situm; Sinistro hypocondrio locatum jecur, dextro- *In situ.* que lienem stupentes offenderunt omnis ævi Anatomici; hujusque novitatis exemplar diligenter exponit *Mery* Chirurgus Parisiensis in homine, plusquam septuagenario; in quo ratione transpositionis Hepatis, omnia etiam abdominis, & pectoris viscera oppositas naturalibus locationes occupantia observavit: ut videre est observat. suâ editâ in lib. *Journal. des Sçavans* ann. 1689. Frequentem hanc etiam in quadrupedibus jecoris, & lienis transpositionem asserit *Aristoteles* in sua *animalium historia*. Sed esset à penso distrahi, cantumque Cuculi recanere, si hæc prolixius percurrerem. Morbi Hepatis pertractandi incumbunt nunc nobis; iique hîc solùm, quorum genesis satis concipitur ex solo structuræ organice defectu, independenter ab alluentium fluidorum concursu; seu morbi à solido ut solidum; illique in hoc Capite pertractandi, quorum præsentiam universo visceris solido referimus; quos ideo à toto solido vocamus.

§. II.

Quadrat rei nostræ divisio præternaturalium in animalis parti- *Divisio Morborum Hepatis à toto solido.* bus affectionum à vetustioribus instituta; in intemperiem scilicet, morbum organicum, & solutionem continui; & revera accomo- *Hepatis Intemperies.* datis moderniorum stylo hisce morborum classibus; seu ad ejusdem solidi varias considerationes relatis, nil exactius, nil clarius ordinari potest ad peculiare partium animalis solidarum pathologias completè delineandas. Et primò quò ad intemperiem spectat: nimis liberè præsentiam ejus in partibus animalis à fluidis independentem abjecerunt moderni, legibus circuitûs præventi. Varias antiqui intemperies distinguunt: alia apud eos ex variis qualitatibus [ut aiunt] primarum, caliditatis, frigiditatis, humiditatis, siccitatis excessibus: alia ex variis secundarum qualitatibus exorbitantiis, densitatis, raritatis, mollitiei, rigiditatis &c. alia ex tertiarum qualitatibus erroribus, in sapore, colore &c. alia

*Simplex.**Cum materia.**Morbi Hepatis à tota substantia.*

ex quartarum vitiis. Si licet vetustiorum idiomata loqui; fateor Hepatis in primis qualitatibus intemperiem, Calidam, frigidam, humidam, siccam, simplicem, vel complicatam ex liquidis ibidem transfluentibus, acribus, aut inertibus, copiosis, aut parcis, simpliciter, aut complicatè, auspicandam esse; sicque in hoc casu nullam in hoc viscere stabulari independentem à fluidis circum-euntibus hujus generis affectionem: Sed tantò certius assero in secundis qualitatibus intemperiem à solido visceris ut solidum exordiri primariò, fluidis nullimodè ad ejus originem in censum vocatis; quantò clariùs vidimus præcedenti capite solidum animale absque liquorum interventu, sponteque sua sub eis omnibus posse reduci statibus, qui densitas, raritas, rigiditas, mollities, tensum, & laxum dicuntur. Intemperiem Hepatis in qualitatibus tertiis rursus ab alluentibus eum fluidis emanare concedo; ut discrasia ejusdem acida, austera, pontica &c. Non est tamen, quòd primarum qualitatum intemperies à præsentia diathesis, seu intemperiei in secundis, advenire frequenter non possit in Hepate; dùm scilicet in hujus visceris præternaturali constrictione, seu intemperie in densitate, ineptior ibidem succedere potest succorum permeabilitas; eo quòd momentum sanguinis adventantis per portam tantum non est, ut superare possit auctam resistantiam solidi Hepatici altiùs constricti: sic ab imminuta hac traiectione succorum, intemperies sicca, & frigida, si quietè lentescant à libera affluentia impediti, paucique latices; vel sicca, & calida, si ibidem incalescant impediti &c. frequentius autem à strictiori solidi Hepatarii substantia, liquida variè impedita à fluxu suo obstructions ibidem, tumoresque variorum generum congerunt; illeque tunc morbi aspectus induitur, quem intemperiem cum materia nuncupabant majores nostri.

§. III.

Refero ad intemperiem Hepatis atoniam ejus, seu perfractam intimæ cohæsionis vim in solido suo; quam à tota substantia morbum dixerunt laudati vetustiores, seu corruptionem substantiæ, Innumerisque nubilarunt quæstionibus, & commentariis; ut videre est apud *Sennertum instit. med.* Ex vario atoniæ gradu, seu
 varia

varia cohæſionis debilitatione, variè & hujus generis affectionum ^{Flaciditas Hepatis, seu. imbecillitas.}
 Classes. Error in hoc ſtatu levior, flaciditas ſimpliciter dicitur, coincidentia, laxitas; & apud antiquos imbecillitas Hepatis; de qua exemplis ſpecialibus *Scultetus*, *Piſo*, Aliique: ex hoc jam affectu notabiliter imminuta veniunt ejusdem viſceris robur, oſcillatione, & reſiſtentia. Intenſior; vera eſt corporis jecorarii corruptio, ^{Gangrena & ſphacelus.} ſeu ejusdem interitus, & à vita divortium; quale eſt gangræna, ſideratio, & ſphacelus, obſervata in hac parte à *Dodoneo*, *Boneto*, *de Lamoniere*, *Jeremia Martio*, *Henningo Arnſæo* &c. Ultimus atoniæ, ſeu inſenſilis ſolutionis terminus eſt, completa putrilago; adeò ut viſcus hoc totum, eliquato partium ſuarum nexu, diffluat omninò in tabum; quem ideò ſtatum colliquationem appellat *Aetius*; ejusque exempla deferunt *Blankard de Morbis Hepatis*. *Ioh. Colliquatio.* *Heurnius* ad aphor 45. ſect. 7. *Tobias Czäſchelius* apud *Ephemerid. Germ. Curioſor. Georg. Abrah. Mercklinus*, *Dodoneus*, Aliique. Variæ cæterùm deducebantur olim ab Hepatis intemperie affectionum ſortes. Ex calida ſic ejus intemperie, immediatè, vel mediante intemperato ab ea ſanguine illa perebatur affectio, quæ ex labe viſcerum hypochondria adimplentium, hypochondriaca ^{Affectio Hypochondriaca.} ideò dicitur. Exponam alio opere morbum hujusmodi ſæpè primariò ſanguinis, hinc ſtomachi affectionem eſſe; ſepè primariò ſtomachi, hinc ſanguinis: à ſanguine cùm ab animi affectu v. g., aut morbi alterius præceſſione exorditur; à ſtomacho cùm ab errore in victûs genere, aut hæreditario ſtigmatè viſceribus indito. Affectiones cæterùm reliquorum viſcerum, Meſenterii, Pancreatis, Lienis, Uteri, præcipuè Hepatis &c. in hoc morbo complexè, aut diviſim occurrentes, ſimplices hujus morbi effectus eſſe ampliffimè evincam, non principia; licèt ſæpè in morbi promptuaria tranſmutabiles. Quod de Hepatis intemperie calida, indèque neceſſariò fæderata ventriculi frigida pluribus in morbis vocabat vetuſtas, nec obſoletum adhuc eſt à quorundam ratiocinio, id facilè cum politioris medicinæ ſermociniis conciliare poſſumus; perſpicientes ex bile naturaliter acriori variè chilificationem perverti poſſe, ut impar in hoc caſu functioni ſuæ videatur ſtomachus, & cruditatibus auſcultans.

Morbus Hepatis organicus.

Locatio morboſa.

Niſus in ventriculo.

Descendimus hinc ad alteram affectionis speciem ex ſolido, ſeu morbum organicum; quem tamen, ut tùm abundè, omnibuſque claſſibus ſuis ab omnium ætatum Profeſſoribus expoſitum, tùm ad alias categorias malorum reductum, ſicco quaſi pede trahiam. Sic numerum Hepatis auctum, extimamque vitiatam figuram ſuperiùs in ejus vitiis retulimus, non minùs ac auctam ſubſtantiæ laudabilis magnitudinem: hanc tamen præter naturam, ſeu morbidos tumores aliis capitibus trademus. Quò ad morbum Hepatis in ſitu, & connexione attinet; adnaſcentiam Hepatis cum diaphragmate morboſam exponunt *Bonetus*, *Paiſenius*, *Wedelius*; cum coſtis ſpuriis *Hollerius*; cum utriſque Alii. Jecur violenter ad diaphragma coactum *Henr. à Moinichen*, & *Ballonius*; ad hypochondrium uſque ſiniſtrum *Hildanus*, *Bartholin. Th.*, *Segerus*. Ambobus renibus ſtriſtiſſimè affixum *Bonetus in Sepulchreto*; Ventriculo arctè adnatum, indèque lethalis vomitus, *Bauhinus*, *Hermannus*; Pancreati firmiſſimè alligatum *Parvius*. Sed familiares ſat ſunt in authoribus hæ cantilenæ. In delinquentibus hiſce omnibus Hepatis ſedibus variè læditur reſpiratio, ex variè diſtracto, aliterve læſo primario hujus functionis instrumento, diaphragmate. Rarò, aut nunquàm imminutæ notabiliter magnitudini, ſeu notabili extenuationi, maraſmo, aut atrophix obnoxium jecur obſervarunt Practici, Secùs ac lienem v. g., pulmonem &c. cujus ratio Phænomeni petenda venit à longè ſolidiori ejusdem ſubſtantia, quàm condita ſint viſcera alia laudata: Præcipuè autem, quia totum hoc penè viſcus ex grandiorum Canaliũ ramis contexitur; quorum firmitas multò major eſt ſuprà parenchymatis compagem. Maxima, cæterùm, ſummèque ſic ponderoſa Hepatis moles attiguo ſepè ventriculo enormiter nititur adeò, ut eundem inferiùs uſque ad umbilicalem regionem cum maxima machinæ animalis pernicie detruſiſſe legamus apud *Bartholinum Th. & Saxoniam*; Præcipuè in obſervationibus anatomico-medicis v, & xxiv. Clar. *Iohann. Baptiſtæ Fantoni* Medici Regii, editis; & illuſtratis ab Amico *Iohann. Fantono* filio, apud Pedemontanos Anatomix Profeſſore, aulicoque medico; Eruditiſſimo viro;

Cujus

Cujus insudantem rursus sub prælo, & ampliata anatomem rotius expectat Europæ Plausus. Descensus Hepatis ex sede naturali sua ad abdominis inferiora, ejusdem prolapsus dicitur, seu luxatio. Rarior est in Hepate, quàm in liene, ventriculo, intestinis, & renibus hic morbus, ob robur, positionem, & numerum ligamentorum suorum; quorum omnium relaxationi debetur hæc affectio: Extant tamen exempla dislocationis Hepatis, tumorem ideò circa umbilicum producentis apud *Laurent. Wolff. Strigelium* in *Ephemerid. curiosior. Germanis*; apud *Fridericum Lossium, Aliosque.*

§. V.

Ultima morbi species ex solido adventans Hepati, est solutio continui, quam sensibilem intelligo, seu in partibus sensui occurrentibus factam, ad differentiam morbi superius descripti à tota Hepatis substantia, in qua continuitatis solutio insensibilis est, seu in partibus insensibilibus facta. Varias hujus solutionis species tum à causa interna, tum ab externa productas offerunt authores. A causa interna facta in Hepate hæc solutio continui, vel simplex est erosio, vel ulcus; à causa externa, vel contusio, vel vulnus; ab utraque, Hepatis rimæ notabiles, & fissuræ. Erosio simplex in Hepatis substantia à transfluentibus Succis naturaliter acrioribus, videnda venit apud *Honstium, Salmuthum.* Ulcus hepatis est, profunda, & purulenta in ejus partibus solutio, seu erosio, frequenter ab abscessus præcessione, hinc puris fodicatione, producta; Sæpè absque apostemate, ab actis solum acerrimorum ibidem commorantium laticum cuniculis. Admittimus *Benneto, Billonio, Foresto, Dodoneo, Brasavolo* inveterata Hepatis ulcera, fistulosa, Cancrofa; nec difficilis res est in tenero parenchymate: sed ex eorum exesione, non purulentam solum materiem, sed frustula carnis ejus per choledochum, in intestinum decidua, indeque per anum excreta, servatis sæpè ejusmodi affectis, negamus *Math. de Grad., Skenchio. Nic. Florentino, Julio Alexandrino, Herculi Saxonia.* Multò magis ridiculum est Hepatis substantiam vomitu rejectam esse; ut habet *Phil. Salmuth.* Bonam satis hujus rei enodationem scribit *Sennertus Praxeos lib. 3. cap. de ulceribus,*

Contusio.

Vulnus.

Fissura.

bus, & sphacelo Hepatis. Contusio, ictus est agentis extrinseci violentior in molle Hepatis corpus inflictus; ex quo subitanæ villorum componentium distorsiones, distractiones, & fracturæ; hinc cessante systasi partis, sanguis non repulsus ad circuitum, turpiter ibidem concrevit. Exemplum est apud *Salmuthum*. Vulnus est notabilis, & subitanea componentium perfractio pariter ab agente exteriori. In Hepatis vulneribus effusus à canalibus sanguis, facile per alvum derivatur, vectus per ductus biliferos in intestina; casum vide apud *Glissonium*, *anat. Hepat.* Vulnera Hepatis absque grandiorum vasorum laceratione sanabilia persæpè sunt: sic Hepatis frusta ex abdominis vulnere foras prodeuntia, indeque cum ægri curatione abscissa, afferunt *Fabr. Hildanus*, & *Blankardus*. Fissuras Hepatis, hiatus, & rimas ab utraque causa, externa, & interna auspicari debemus, si authorum observationibus credimus, eas tum ab externis percussionebus exhibentibus, tum ab interna dispositione; ut apud *Fernelium*, *Glissonium*. *Hessum*; præcipuè apud *Riolanum*, qui in hominibus marcore confectis majusculas sæpè scissuras illas ex exsiccato, aridoque Hepate productas, serumque copiosum, tamquam ex rupto vase, extillantes, vidisse affirmat in *Enchiridio suo anatomico*; quod tamen à *Tulpio*, *Moëbio*, omnibusque cordatioribus meritò refutatur.

§. VI.

Scissuram Hepatis lethalem ex casu, & percussione, undè ruptura portæ, & mors subita, ex Præclarissimo, Amicissimoque D. *Rosino Lentilio*, Archiatro Wurtembergico humanissimâ Epistolâ elapso biennio mihi transmissâ, relata habeo. Ante aliquot annos, scribit vir omni voto colendus, *Rusticus ebrius prope Stuttgardiam in via mortuus inventus est*; cujus corpus cum aperirem, cavitationem abdominis totam sanguine suffusam reperi; superiorem autem hepatis lobum, quo ventriculum contegit, in duas partes horizontaliter quasi cultro divisum. Memorabile erat, stomachum pane, comestisque farciminibus adeo fuisse distentum, ut nec digito pressus vel parum cederet. Suspicio hinc fuit Rusticum in terra prolapsum fortè fortuna eò loci, quò hepar sub cute clauditur, in lapidem offendisse, distento verò stomacho, & lapsui cedere nescio, fissum fuisse hepar, ruptam venam portæ,

porta, sanguinem in cavita'em abdominis effusum, secuta morte subitanea. Ulteriores morbos tribuebant antiqui genuinę hepatis substantiæ, ab ea, tamquam à sanguificationis fonte, dependentes; Lienteriam, fluxum hepaticum, Atrophiam, Cachexiam, omnis generis hydropes &c. Quæ alio loco principiis aliis conciliabimus.

CAP. III.

Morbi Hepatis à solido Vasculari.

§ I.

EA vocamus Hepatis vasa, quæ liquido palpabili devehendo apta nata sunt; quo jure nervos ab Hepatis arteriis, venis, lymphaticis, ductibusque biliferis libenter proscribimus. Eos vocamus Hepatis morbos à solido vasculari, qui nullimodè ab humorum interfluentium culpa auspicandi veniunt, sed à mala vasorum eorundem recipientium habitudine: cujus præsentia elucescit satis, dum, currentibus liquidis per plura ejusdem generis vasa, eadem substantiâ, eadem copiâ, eodem impetu, iisdem dispositionibus omnibus, vas unum tentatur vitio, non aliud. Distinguimus morbos Hepatis ex solido vasculari à morbis totius solidi; prò ut considerantur primi in vasis Hepatis sensibilibus malè habitis, iisque quibusdam solùm, aut unico; alteri in vasis insensibilibus, seu proprio parenchymate, iisque omnibus æquè vitiatis. Eædem affectiones competunt vasculari solido, quas solido in genere adscripsimus; tensio scilicet, & laxitas ultra statum naturæ, præter continui solutionem. Sed cum canalium tensio morbifica à nerveis productionibus, eisdem in modum telarum supertensis, propriè accedat; ut videbimus in sequenti Capite; sic sola canalium laxitas indebita, nec non unitatis solutio, examinandæ hîc veniunt. Peccantem in Hepate laxitatem vasorum infallibiliter prosequitur morbosa eorundem distractio ab interfluentibus succis, in eorum parietes cum victoria nitentibus. Variis veniunt nominibus præternaturales in hisce vasis distractiones

nes extrorsum, & fornices, secundum eorum varietatem. In Arteriis appellantur Aneurismata, Varices in venis; in lymphaticis Hidatides; in excretoriis ductibus peculiari vocabulo carent.

§. II.

*Aneurisma-
ta, & Va-
rices Hepa-
tis.*

Fornicant itaque in aneurismata, & varices arteriæ, & venæ; cum impedito, (quæcunque sit causa) magis, minusve, à vasis ad substantiam visceris, aut vicissim, fluxu sanguinis, aut refluxu; sicque copiosius per vasa met-ipsa congesto hoc latice, nativa eorum, aut, per casus varios adventitia jam pridem teneritudo texturæ, aut loricationis infirmitas impar est frenandæ ejus urgentiæ ad extrà, auctæque expansivæ potestati. Aneurismata ex simplici extensione, per frequentes cadaverum exenterationes interdum observavimus in hoc viscere; ut nuper dextræ cœliacæ propagines enormiter dilatatas demonstrabamus in extispicio hypochondriaci, molestissima ejusdem vasis pulsatione per longum tempus vexati. Alterius generis aneurismata, seu junctam in arteriarum tunicis cum notabili dilatatione & rupturam, non percepimus hucusque in jecinoribus defunctorum. Frequentiores sunt in hoc organo venarum morbosæ expansiones, seu varices, ab imbecilla cohæsiōe villorum in propaginibus cavæ, & portæ; cui multum opitulatur morbo, sanguinis per hæc vasa excurrentis momentum velocitatis minimum. Exempla varicum in ramis portæ vide apud Morton, Vesalium, & Guarinonium. A consimili in lymphaticis, ac in venis, arteriisque, contextentium villorum imbecillitate, & divulsione inter se se, Hidatides procreantur, seu fornices quædam per lymphaticorum tractus in modum folliculorum elevatæ - Hidatidis genesis, non minus ac Aneurismatis, & Varicis mechanicè In opere nostro anatomico, & Sect. 15. Exponemus. Familiaris est apud authores, ut Panarolum, Ruijschium &c. hidatidum Hepatis tunicas perreptantium expositio; præcipuè in hydropicis. Quod plurimis antiquis, & recentioribus imposuit, ut ascitem ab hydatidum Hepatis ruptura passim auspicarentur. Sed, licet & possibile sit hoc hydropis abdominosi principium; constat tamen, & inculpabili Hepatis quocunque aquæductu, hosce morbos accedere. Quod tùm au-

topia

Hidatides.

topsiâ probatur, ex inspectis absque ulla labe Hepatis lymphæductibus in hydropicis quampluribus; tum ratione, ex facili in quacunque parte lympharum colluvie, seu hydrope, à sola earundem solutione à sanguine per fibrarum interstitia; ut alibi demonstrabimus. Non omnes tamen, qui ex Hepatis involucro exsurgunt, eique appenduntur aquosi tumores, hydatides sunt: grandiores omnes ex lymphatico latice inter ejus substantiam, & tunicam effuso elevantur, infontibus lymphaticis. Imò & minutiores sæpè, totamque hydatidum naturam exhibentes, à lymphæductuum vitio non veniunt, quod patet ex nuperrima observatione mea hydropis vesicularis, facta in homine quadragenario; cujus viscera abdominis omnia, Hepar, Lien, Mesenterium, Pancreas, Renes, Vesica, Intestina, &c. non tantum innumeris penè utriculis sero turgidis, ac omnimodam hydatidum speciem representantibus obsita erant; sed hæc insuper suppositæ hydatides sibi invicem per 4. aut 5. plana densissime adeò superincumbebant, ut locum omnem adimerent, eas à lymphaticorum dilatatione deducendi: non etenim vasa lymphatica, una invicem ad alia superposita jacent in eadem parte: præcipuè, quod & in cavitate intestinorum met ipsa hæc offenderemus vesiculas, tanquam hydatides ipsissimas; dum cæterum in fistulæ intestinalis cavo nulla repant lymphatica. Quamobrem pustulas ad ciceris grana pergrandes, ac universo jecori superextensas à *Cardano* observatas, lymphaticorum vitiis non refero, sed dispersis cingentis tunicæ elevationibus, à subter effuso sero. Si autem quid est, quod genuinas hydatides à cæteris aquosis tumoribus discriminet, summa est earum pelluciditas, à summè tenui præcingente tegmine, summèque limpido liquore suo.

§. III.

Circà unitatis solutionem in Hepatis vasis, acquiescere sat possumus in expositis per caput superius, eaque & vasorum solutionibus appropriare. Hic solum addam, à bilis contentæ acredine notabiles frequenter exesiones, ulceraque pati vesiculam felleam (quam jurè meritò inter Hepatis vasa reponimus) ut adnotandum auditoribus exhibuimus in subjectis aliquibus. Illustrissimus

*Solutiones
continuitatis
vasorum
Hepatis.*

Pontificius Archiater, *Io. Mar. Lancijus* in aureo libro, & apud totum orbem acceptissimo, *de mortibus subitaneis* exponit cystim hominis, quinquagenario majoris non bile, sed pure refertam, internaque sui superficie variis ulceribus laceram. Quibus casibus si conspurcata hoc succo exotico bilis in prompruario suo, indeque ad intestinum perfluens, Chiloscas pervertat munus, Philiatris omnibus judicandum relinquo. Notabilis est ejusdem vesiculæ perruptio, indeque ad abdomineæ Cavitationis, viscerumque adjacentium abluvium, contentæ bilis effusio; quæ sæpè in cadaveribus occurrit, morbique genus peculiare constituit. Venit hæc vel à percussione, aut allisu violento baculi, alteriusve corporis externi, vesiculam per rixim frangente; ut exempla sunt apud *Bonetum*, *Hoffmannum*, *Benivenium*, *Salmuth*. vel à derivatione impedita insidentis ibidem, ac magis magisque in dies collectæ bilis, sicque vim in parietum cohætionem facientis: hocque impedimentum effluxûs, vel à ductûs Choledochi intus susceptione in cystim ipsam, exhibetur; ex quo dicti Canalis strangulatio, non minùs, ac in intususceptione unius intestini in alterum ad affectionem iliacam; Quem casum afferunt, *in observationibus suis Chirurgicis Iob. à Meeckren*, & *Fabr. Hildanus*; vel à calculis ductum opplentibus; ut apud *Bertinum*, aliosque. Hanc ordinariò vesiculæ rupturam mors sequitur, aut repentinè, aut post brevissimum intervallum accedens, dirisque comitata symptomatibus, immani cruciatu, & erosione viscerum, feбри, vomitu atroci, leipotymia, asphixia, &c. ut videre est apud laudatos authores.

CAP. IV.

Morbi Hepatis à solido Nerveo.

§. I.

SEntire per nervos in partibus suis omnibus animal, extrà omnem dubium est; sicque & partium earundem membranas, simplices

plices nervorum expansiones esse, tanquam nervosorum filaminum telas, pro certo habemus; prò ut minima cujuslibet membranæ in partibus portio, est sensilis. De Nervorum structura, & distributione, usibus insuper, seu motu, & sensu, uberrimus erit sermo in *Anatomes nostra sect. 22.* Quoniam eadem competunt solido nerveo affectiones, quas solido in genere tribuimus, tensio scilicet, & laxitas: Cùmque videamus quotidie in animalis partibus deperire sensum ex inducta laxitate in earum nervis, & consequenter eorum in productionibus, seu membranis, ut cadit in atonia, paralyfi, resolutione &c. inferre hinc debeo sensum naturalem in debita nervorum, ac membranarum tensione fundari, sicuti acriorem sensum, seu dolorem ab auctiori eorundem tensione ortum trahere; ut de se patet. Tensio nervearum partium dolorifera, vel est à causa eis externa, & attigua, distendente scilicet; seu tensio per distractionem; ex qua species doloris contundentis emanant, ulcerosi, gravativi, simpliciter tensivi, pulsativi, ac pungitivi; vel à causa eisdem nervis intrinseca, undè corrugatio, & crispatura; quæ ideò, tensio per contractionem dicitur; ex qua genus doloris lancinantis, proprièque spasmodici. Sed hæc alibi luculenter demonstrabimus.

Affectiones nervorum.

Dolor quid sit.

Doloris species.

§. II.

Frequens est in Hepate dolorifera nervosarum partium tensio, seu crispatura, ut aiunt; eaque non tantum in præcingente tunica, aut ligamentis; sed & in omnibus per ejus substantiam dispersis villis membranaceis; adeò ut coacto violenter viscere, & penè strangulatis ejusdem vasis, tum acerbissimo dolorum supplicio torqueatur æger, tum fluida omnia à cursibus notabiliter intercipientur suis. Sævit hæc interdum affectio in hypocondriacis, ictericis, hecticis, & in quibusdam obstructionibus. Observavit *Richard. Morton* in omnibus penè phtisi icterica denatis horrendum, & spasmodicum dolorem ab hypochondrio dextro per magnam abdominis partem productum, nullis remediis edomabilem; quibus post mortem apertis, Hepatis parenchima ultra tonum naturalem compressum, constrictum, & compactum, ac quasi coctum animadvertibat: ulteriusque patefacit laudatus

Dolor Hepatis.

Author tensivam hanc in nerveis Hepatis partibus affectionem per inspectos eodem tempore portæ ramulos in amplas varices distentos; impeditâ scilicet contenti sanguinis traiectione per Hepar à convulsiva diathesi. Hos omnes (addit Clar. Vir.) *hoc modo decumbentes, querelas cum magnis ejulationibus itâ attentè, & perpetuò facere observavi, ac si nullo alio symptomate afflicti essent.* Nec solus cruor ab inducta in Hepate densitate spasmodica præpeditur in propriis canalibus à fluxu suo, sed & secernendi humores biliosi in excretoriis ductibus: Hinc ordinariò dolores hos Hepatis icterus excipit; ut sæpiùs vidimus in praxi. Observabamus nuper in nobili muliere picrochola periodicos in plexu Hepatico dolores spasmodicos, cum nervorum origine conspirantes aded, ut, in insultûs præsentia, vel levi manus ad Hepatis regionem pressurâ, immanes statim, etiam cum mentis turbatione, insurgerent dolores Capitis, facilè tamen à dimota manu cessantes. Dolor Hepatis in ejus inflammatione, ac obstructionibus quibusdam, spasmodicus non est, sed gravativus, aut simpliciter tensivus; obtusus ordinariò, & sepultus. Periodici ex plexu Hepatico dolores communiter recrudescent ad noctem; frequenter cum aliis abdominis plexibus consentiunt.

§. III.

*Dolores ab
Hepate sim-
patrici.*

Cæterùm dolores Hepatis vehementes usquè ad claviculam, & jugulum propagari solent; idque ex violenta annexi diaphragmatis tractione à dicto viscere ei alligato, indeque per consequens, & divulsione tunicæ costas succingentis, cui superiùs alligatur diaphragma; quæ omnia venire nequeunt absque doloris consensu ad jugulum, ubi, tanquàm in puncto nixus, firmiter alligatur hæc tunica. Ad cervicem interdùm, scapulamve dexteram manifestatur hic dolor, ob arctam quoquè ad has partes colligationem pleuræ. Casum habeo in quodam ex ægris meis, dum hæc scribo. Qui dolores in Hepatis suspensorio eum cum ensiformi cartilagine vinciente contingunt, usquè ad sterni medium protenduntur solùm, ob continuatam usquè ibidem ligamenti expansionem: Spasmodici plerumquè sunt; quia nulla illuc causa exterior, partem eandem distrahens, assidet ordinariò.

CAP.

CAP. V.

Morbi Hepatis à fluido.

§. I.

TRia Hepar alluunt Fluida manifesta: Sanguis, Limpha, & recrementum speciale, seu bilis. Sicuti naturalis in organis laticum alluentium habitudo, in libera eorundem traiectione consistit, adeò ut, quò permeabiliore sint in partibus succi, eò melior ibidem vigeat sanitas; Sic morbosa conditio, in imminuta traiectione fundatur, seu imminuto, aut impedito eorum quomodocunque cursu ordinario, seu quodam, quicumque sit, lentore morbofo. Ut toties promissus ordo servetur, percurramus jam in singulis hisce fluidis lentores, peculiare suos; morbos hinc Hepatis ab eisdem oriundos considerando.

§. II.

Et primò, quò ad sanguinem: Per duplicem ad hoc viscus defertur semitam hic liquor; per Cœliacam, per Portam. Quoniam, ideò derogant à celeritate fluxus sui ordinaria, seu lentescunt in canalibus liquida, quia plurimæ eorundem particulæ non tantum in intimiorem, ac antea contactum simpliciter implicantur, sed cum nisu in eundem contactum, adeò ut molem grandiore constituant primo imparem motui; Sequitur jam, particularum liquidi sanguinei implicationes hujusmodi, fieri longè difficilius posse in cœliaca arteria, quàm in porta. Et reverà, implicationes hujusmodi, vel in devecto per canale fluidum, vel in canali devehente, vel in termino, cui devectum fluidum canalis dirigit, propitiam eis producendis habitudinem postulant. Quò ad primum; Sanguis per portæ fistulam tranatus in Hepar, longissimè distans à foco impulsus (*ut prima parte demonstratum*) motibusque suis per mollia abdominis viscera non minùs notabiliter exutus, quàm activioribus, roridisque partibus in eorum alimonias, aïosque usus dimissis, multò minùs per consequens solutus.

solutus est in partibus suis, quam Cruor Coeliacæ, cujus vicini cum fonte motus, nullaque adhuc componentium mobiliorum jactura, divisam adeo, vegetamque compaginem constituunt, ut multò difficilius ad se se invicem hærere possint ejusdem partes. Quò ad alterum; Canalis portæ ex trunco innumeris radicibus mæandris coalito, indèque in ambages ramorum innumeras rursus diffisso, in modum arboris compositus, ut alibi vidimus, liquidi derivati lentoribus multum contribuit, & siquidem sicuti in arteria coeliaca ramosa divaricatio, ob robusti motus, impetusque; præsentiam in vecto sanguine, ad eundem ulterius rumpendum inservit, funditusque attenuandum, illisum in ramorum angulos; Sic distributio hujusmodi in porta, ob notabilem jam comprehensi liquidi imminutionem motuum, juvat ad magis eundem implicandum, & retardandum à cursu suo: Adeo ut, inducta sensim gracilescencia in propagationibus coeliacæ, valeat ad sanguinem vividius impellendum usque in Hepatis substantiam, portæ autem diramationibus indita, ad idem fluidum magis, magisque remorandum in eadem substantia. Quò ad tertium; desinentia coeliacæ in solas Hepatis tunicas, (*ut prima etiam pars exposuit*) partes in majori, super alias, tensione positas, partes oscillantes spontè, & contractiles, indeque tum permeabiles magis, porisque rectitudinem suis sincerius servantes, tum in traditum eisdem laticem ad fluxus per cavæ principia reverberandum, insurgentes; multò minùs sanguinis otis auscultat, quàm terminus portæ in molle parenchima, laxum, incontractile, & intricatum: Præcipuè quòd multò brevioris percipis conferri viam sanguini à coeliaca in cavam, quàm à porta in eandem venam; considerans à primæ extremitatibus in cavæ exordia per partes visceris corticales, ut sunt membranosæ, elutriari hoc liquidum; ab alterius autem finibus per partes medullares, ut propriè sunt parenchimatossæ. Quòd si igitur longè frequentius delinquens est in lentoribus cruor portæ, eum in hac disquisitione solum insequemur.

Morbi
Hepatis à
sanguine.

§. III.

Quoniam autem lentori morboſo dispositus Cruor (quæcunque
fit

fit causa, ut fluidiorum partium defectus, aut crudiorum abundantia; desistens evacuatio aliqua ordinaria, aut exuberans; impressio frigoris, aut figentis miasmatis; flaccescens solidorum contractilitas, aut liquidorum crasis &c.) in illa canalis sui portione lentescit, quæ ambas huic morbo manus exporrigit; quæ scilicet vel minima adeo diametri altitudine polleat, ut leviter implicatae inter se se prædicto ritu particulæ sanguinis aliquæ, jam molem agglomerent amplitudine canalis majorem, sicque non permeabilem, sicque obstruentem; vel conica adeo habitudine gaudeat, ut ejus latera ad partes motus convergentia impingentes in se se liquidi particulas excipiant, sustentent, ac ad fornitem iter inficiantem, mutuò implicandam cogant; quod etiam est subsistere, & obstructionem facere: Itaque, cum conicam propriè structuram excludam ab animalis canalibus, qui nempe truncis solum suis gracilescent proportionaliter ad lateralem ramorum productionem, adeo ut ramorum suorum omnium diametri simul sumptæ, æquipolleant semper diametro majori trunci; patet jam subsistentiam sanguinis in porta fieri solum per primam causam, seu in angustiori ejusdem capacitare, seu capillamentis ultimis, in glandulosos concursus Hepatis finientibus: In qua certè exilitate postrema, nulla ferè liquidi est pars (*Ut solide differt Bellini*) quæ ejusdem canalis superficiei non occurrat, sicque & fortio rem superandum obicem, majoresque semper resistentias ad ejus fluxum inveniat. Lentores cæterum hosce sanguinis, seu subsistentias in vasis Hepatis insensibilibus, seu propriâ ejus substantiâ, & parenchimate, obstructiones à sanguine, easque veras vocamus, ab obstructionibus ejusdem liquidi in vasis sensibilibus, tanquam ab illegitimis, discriminantes; ut infra.

Obstructiones Hepatis legitime.

Obstructio Hepatis à sanguine.

§. IV.

Duplex venit obstructio à sanguine in parenchimate jecoris. Prima est, cum subsistentis sanguinis implicatae partes omnes uniformiter inter se se, ulteriorem ad motus intestinos validos aptitudinem non servant; sed solum non quiescentes penitus, nullo symptomatum strepitu morbum produnt. Dicimus tunc obstructionem sanguinis frigidam, lentorem cum frigore, seu discrasiam

*Obstructio
Levior.*

fiam sanguinis simpliciter viscidam: hanc, plethoram vocabant antiqui; hancque etiam recentiores indignant, retardationes sanguinis in Hepate, aliisque visceribus afferendo à turgentium nimis vasorum mutua inter se se compressione. Altera, cum in moles vastiores concretæ pergrandes moleculæ sanguinis, sicque proprio fluxui obistentes, adhuc tamen tenues aliæ, solutæ, mobiliioresque intertextæ, motus intestinos quosdam sejunctim exercent summè irregulares, & celeres; indèque acris perceptio caloris in parte; quorum indè accretio à superaffluente perenniter sanguine, arietante in obstructionis locum, & ab ulteriori permeatione impedito, trudens vasa violenter extrorsum, perhibet molestæ tensionis sensum, à violenta adjacentis diaphragmatis pressura, singultum, & tussim siccam; à repulsis in massam tumultuariè fluidis ibidem quietè appellentibus, febrim &c. Hunc affectum obstructionem sanguinis calidam appellamus, combustionem Hepatis, lentorem cum calore, seu inflammationem.

*Obstructio
gravior, seu
Inflammatio.*

§. V.

*Abscessus
Hepatis.*

Quia autem interdum, coercitæ inter partes sanguinis inflammatoriè lentescences, subtiliores particulæ impatientes compedum, ab eis se se expediunt, æqualique directione impetus in densum agmen collectæ omnes, cavitatem excavant in visceris substantia locationi suæ conformem; hinc Hepatis inflammationi succedit interdum abscessus: Collectio videlicet partium harumce, à vasis sanguiferis fugientium in parte visceris determinata. Concipis hinc facilè symptomatum omnium mitigationem in Hepatis inflammatione ad abscessum vergente, ex discessu harum partium impetuofarum à sinu sanguinis; super extensionem folliculi ad partes in abscessum coacervatas, ex ramosioribus portumculis in collectionis superficiem, tanquam in crustam implicatis; rupturam tandem apostematis non infrequentem, ex liquidi activissimi, acerrimèque fermentantis extensivo nisu superadjacens solidum ultra momentum cohæsionis suæ, vel subitanea, aut paulatina exesione. Non est tamen, quod purulentæ omnes collectiones Hepatis, seu abscessus, præviæ semper hujus partis inflammationi succedant: Frequentes sunt abscessus Hepatis ex vulnere ad hanc partem inflictio

fictio; Non rari, post morbos Chronicos varios cum nulla tamen præcessse inflammationis suspitione. Ter vidimus folliculatam collectionem puris in Hepate post hydropem universalem; semel post essentialem hecticam. Hos tamen spurios abscessus vocito; prò ut, nec puris conditione, nec periodo abscessibus phlegmonis filiis satis correspondentes; sed in utrisque lentiores. Notabilis est abscessus frequentia in Hepate post vulnus capitis cum effusione sub cranio, quod ab authorum admiratione adnotatum, vidimus & nos elapso nuper biennio in Capitaneo quodam à Tolonis expeditione reduce, post duos menses à capitis vulnere defuncto; in cujus cadavere abscessum Hepatis folliculatum ad pugni molem invenimus. Causæ hujus epigenesis à capite ad Hepar sat nervosè ab hominibus amplissimis eventilatæ videri possunt apud *Pigreum, Ballonium, Slegelium, Velschium, Pareum, Greauum, Binosquium, Mermannum, Petrum de Marchettis, Charriere, & Job. Meekeranum.* Si in tantis authorum synodiis suum & offerre votum liceret, dicerem, sat justum esse, quod, data imbibitione succi purulenti à sanguine in parte aliqua determinata, ut in Capite, vagans indè commune hoc fluidum per corporis partes omnes, majores puris hujusmodi portiones despumet in viscere omnium maximo, omnibusque considerabiliore, uti Hepar est, in quo longè majora quàm in aliis omnibus apponuntur vasa, longèque majores quàm in aliis partibus eorundem diramationes; in quo lentior quàm in aliis omnibus succorum omnium est cursus; in quo viscidius, quàm in aliis omnibus secernitur liquidum, quod idè ob similitudinem texturæ, purulentam secum materiem per idem colatorium allicere à sanguine potest; in quo denique nulla jacet ab extrinseco generalis muscularis potentia, quæ depositam, congestamque purulentiam repellat ad fluxum.

Abscessus hepatis post capitis vulnere frequens.

§. VI.

Abscessus hepatis memorabilis habetur in Jatromnematibus eruditissimi, & in societate Cæsarea Leopoldino Carolina Collegæ nostri *D. Rosini Lentilii* Consiliarii, & Archiatri Wurtembergici, quem ideo hîc referre, etiam ultra operis institutam brevitate

tatem, concernit. Cùm appulsem, scribit Cl. Lentilio medicus ordinarius, reperio Dominum Patientem 34. circiter annorum valde debilem, totum emaciatum, genis rubentibus, tussiculâ siccâ cum dyspnœa laborantem, siticulosum, nil appetentem, conquerentem de Epigastrii dolore, sine tamen rubore, vel humore, tunc quidem sensibili. Caput non dolebat: Extra lectum morari non poterat: Alvus parum secedebat, sputum erat viscidum, & viridescens, aliis cruentum reputatum; mihi non item, quòd nec fateret, nel in pelvim aquâ repletam immissum, fundum peteret. Febris jam ultra 4. septimanas deserviens, periodica, horrore, & æstu interpolata, castrensis primò reputata. Hinc omnia in deterius ruentia ... tumor Hypochondrii dextri, nunc demum sublatus abscessum in hepate prodidit: Diarrhœa hinc purulenta: Paucis autem post diebus æger expirabat. Factâ Cadaveris incisione, in conspectum venit hepar magnitudinis monstrosæ, cujus superior lobus ad os coxendicis exporrectus; idemque viscus sub hypochondrio dextro, mirum quantum protuberante, planè fastigiatum, notabilis cujusdam inflammationis, & sphaceli præbuit indicia; costis firmissimè adnatum, & octo librarum ponderis. In ipsa hepatis substantia, & quidem duplici lobo superiori partis convexæ quantitas materiæ purulentiæ virescentis, & pultiformis, non tamen fatida, mensuras duas exuperans, reperta fuit. Sub hoc viscere latitans vesicula biliaria, limphâ multâ, viscosâ, limpidâ, tincturâ omnis experte turgescibat, cujus quantitas effusa duarum ad minimum unciarum numerum transcendebat. In medio ventre pulmonum lobi toti quanti lividi, profunda inflammationis indices fuere &c. Tria sunt, quæ, super hunc casum, nobis animadvertenda offeruntur. Primum, tardam fuisse, & decollatis viribus diarrhœam purulentam, in vasta nimis suppuratione, ut satis hepatis abscessus expurgari per secessum non potuerit. Secundum, non tantum in suppuratis Hepatitidibus, quàm etiam in simplicibus, ad attiguum pulmonum lobum epigenesim celebrari; undè sputa idiopathica multigena, pituitosa, flava, sanguinea, puriformia, purulenta: Hæc hepatis cum pulmone commercia nonnihil vellicamus in problematibus practicis nostris. Tertium; crassiori, reticulari, seu præcipuâ portione oleosâ bilis per hepatis substantiam ab infarctibus variis irretita, & ab
ulteriori

ulteriori derivatione impeditâ, non præterlabi, & colligi in cystim, nisi solutiorem ejusdem partem, seu merum lymphaticum ejusdem vehiculum: Ut indè liquida hoc ritu cystica limpida sint, tenuia, & tamquam non biliosa. Quod in pluribus hepatis obstructionibus frequenter vidimus. Varia circa abscessus hepatis memoranda videri possunt apud decades varias ephemer. nostrarum *Germ. nat. curios. apud Schenkium, Bontium* in medicina Indorum, *Boirel* aliosque authores.

§. VII.

Hepatitis frequenter etiam in abscessum migrant. Hepatitis est *inflammatio hepatis, non exquisitè legitima; mixta scilicet, & producta ex calido sanguinis, & bilis lentore per visceris substantiam.* Hinc Hepatididi non ea solum accedunt symptomata, quæ meram Phlogosim comitantur; acuta febris, sitis, exæstuationes, genarum rubedo, & similia; sed insuper quæ torridiori per hepar bilis infarctui, seu calido ictero solent succedere; Linguae amaror, aut flavedo, flavedo etiam major, aut minor per totum corpus, nausæ, lassitudines, & hujus generis alia: febres præcipuè typhodes, seu hepaticæ periodis biliariis ordinariò alternantur; frigusculo, & æstu quotidie se se, cum periodica pariter symptomatum ingravescentia excipientibus. Dolor in Hepatitide, frequentius usque ad mammam protensus, facilè auspicandus ex prætumido viscere, fornicem diaphragmatis in altius elevante, cum inducta etiam passione in suspensorio ligamento: indè etiam venit respirationis angustia, pectoris affectum simulans. Pulsatio ad Hypochondrium, & epigastrium molesta, à cœliacæ dextræ sanguine, in obicem phlegmonosum impingente, directè impedito, lateraliter urgente, deducenda venit. Sed sputa per hepatitidem pulmonaria ejici, flava, pituitosa, sanguinea, purulenta, aut intermixta, pleuritidem ipsam affectantia, morbi scilicet contagium, usque ad correspondentem pulmonis lobum introductum, indicantia; id est, quod alio loco intimiùs explorabimus. En recens ad exemplum Hepatitis, à nobis anno superiori observata. Matrona quædam annorum 43., bilioso-serosæ constitutionis, animi curis, & mensium suppressionibus habita, dolore corripitur ad

dextrum hypochondrium pungitivo, ex epigastrio usque ad mam-
mam, & claviculam sensili, tussi sicca, difficili anhelitu, pulsu
parvo, & celeri, cum febre duplici tertiana. Tensio, & eleva-
tio ad regionem hepatis, & dolor, in dies crescentia, cum du-
ritie visceris circumscripta. Morbus primis diebus non cedens
phlebotomiis cubitalibus, à secta tamen saphena remissior. Ter-
tiâ die insolentior, cum symptomatum recrudescentia usque ad
nonam. Copiosa post quartam expuitio sanguinis livescentis, pi-
tuitâ viscidâ, & coctâ immixti. Nullum à repetita missione san-
guinis, aut fotibus laxantibus, epiceraisticis, & paregoricis sola-
men. Tandem remissa febris, & symptomata, commotâ liberali-
ter alvo. Contumacior Hepatis dolor, tumor, & tensio die deci-
maquinta, per repetita cathartica, & fotus, evanescentia. Ægra
post dies 40. restituta.

§ VIII.

Cæterum, citò curabilis est abscessus jecoris, si in vegeto Ju-
vene, & virium præsentia, post breve morbi curriculum, ea lo-
ci opportunitate perrumpatur, ut facilis sit per choledochum efflu-
xus puris in intestinum, hinc & ejusdem foràs eliminatio per se-
cessum seu per diarrhæam purulentam, aut per vomitum; aut
facilis sit exitus per vulneris ora, si ex plaga productus; facilisque
indè relicte ab abcessu concamerationis absterasio, & consolidatio.
Abscessus jecoris hoc ritu curatos videre *Nic. Tulpinus; Joh. Iac. Har-
derus; Nic. Beckerus; Aliique.* Suspecta mihi jure est apertio ad
exteriora hypochondrii, ad abscessum Hepatis eo tramite foràs
elutriandum, tum naturaliter per motum intimum facta, tum ar-
tificialiter per Chirurgi manum, licet ab authoribus quampluri-
mis ambæ sint decantatæ. Citò lethalia sunt hujus genii aposte-
mata, & subitanæ sæpè necem afferentia, si circumstantiis op-
positis ad locum exitui imparem abrumpantur; ac vel totum inun-
dent viscus; vel per abdominis Cavum effusa, contenta viscera
præfocent; quo casu empyema Hepatis vocari posset. Diuturna
sunt, & incurabilia; si densius implicata, sicque in mobilitatis
impotentiam coacta materies ad abscessum collecta, in terminis
suis inalteratè quiescat. Quod accidit interdum in spuris abs-
cessibus;

*Vomica, &
Tuberculum
Hepatis.*

cessibus; & Vomicam nuncupamus, si fluidior sit massa comprehensa; Tuberculum, si crassior.

§. IX.

A morbis Hepatis ex sanguine migremus ad morbos ex limpha. Exsurgunt in partibus animalis omnibus ab interstitiis fibrarum texentium principia Canaliculorum quorundam, qui, ob usum suum, aquæductus nuncupantur, seu communiter vasa lymphatica; sicuti ex ipsamet fibrarum substantia oriuntur venarum primordia. Calcant aquosas hasce Fistulas liquidum quoddam in eisdem partium omnium loculamentis secretum à sanguine, quod, ductâ legitimè analogiâ, limpha dicitur; Cujus naturam, progressum, usum, & secretionis causam abundè exponemus *in sect. 15. operis nostri Anatomico-pathologici*; & præsertim in peculiari tractatu rei hujusmodi Historiæ destinato. Copia interdum, frequentius Crassities, & visciditas, Causa est, ut in partium spatiis sensim à sanguine extricans se se hoc liquidum, in Canaliculorum suorum oscula derivari nequeat totum; vel quòd scilicet ea quantitate secernatur à sanguine, quæ nimia sit Emissariorum alveo; vel quòd ea implicatione, & volumine ditetur in componentibus plurimis suis, ut imparis sit corpulentie ad tenuissima vasorum oscula subeunda: Hinc eum per solidorum sinulos, & interstitia exundare frequenter videmus, variasque in aggeries colligi; elatiores in partibus, sed molliusculos, mobilesque tumores elevans in primo casu; ut in ascite; in vesicis ab epipastici stimulo elevatis &c. minores autem, sed firmiores, & stabiles, in secundo; ut in strumosis glandularum infarctibus &c.

§. X.

Utraque ex lymphæ erroribus affectio, seu utriusque generis tumor lymphaticus competit Hepati. Frigidos vocant communiter hujus farinæ tumores, ad discrimen calidorum ex sanguine emanantium, qui jecur adoriri possunt; ut Phlegmon, seu legitima inflammatio superius exposita, in qua sanguinis concretiones absquè violenta ductuum continentium tensione, seu tumore notabili, non veniunt. Primâ tumoris lymphatici specie laceffit Hepar, cum in fluidi soluti copias totum diffluit viscus; ut in tumo-
moribus

Morbi Hepatis à limpha.

Tumores Hepatis.

Hepatis
œdema.

moribus Hepatis œdematosi universalibus; de quibus Glissonius in anat. Hepatis: *In hoc affectu totum Hepatis parenchyma spongia instar æqualiter intumescit, serososque humores undiquaque imbibit. Hoc malo affectum Hepar interdum, in immensam molem excrescit; tum ejusdem generis tumoribus partialibus; ut cum ab aliqua Hepatis parte insignis magnitudinis vesicæ sero solutissimo plenæ propendent, quas etiam paulò post commemorat Idem Author, eodem opere.* Sed hæc tumoris lymphatici species ab ubertate hujus fluidi rara sat est; Frequentior memoratâ à crassitie altera; cum scilicet inspissati, ob varias habitudines sanguinis, succi lymphatici, inepti fiunt ad trajectionem per vasa sua, post susceptam à sanguine secretionem; sicque in hujus visceris corpore lentè implicantur; eumque morbum Hepatis adimplent, qui, post obstructionem à sanguine superius memoratam legitimè etiam obstructio dicitur, eaque lymphatica. Hic jam notare opportunè, lymphaticas in parenchymate jecorario obstructions, solidorum ejus intervalla occupare, non ipsam substantiam; prò ut in hisce secernitur à sanguine limpha, ibidemque characterem imprimat erroris sui; sicque semper imposterum omni jure concipiemus, lymphaticos in Hepate infarctus, inter membranas, aut inter lobulorum interstitia perfici; dum, concretiones sanguineas, seu obstructions à sanguine in intimo parenchymatis corpore, seu glandularibus concursibus collocari, extrà omne dubium posuimus.

Obstructio
Hepatis à
limpha.

§. XI.

Varias adnumero in Hepate lymphaticæ obstructionis species, secundum gradus concretionis varios in hoc succo Hepatis incola. Et siquidem, qui lentoris Character supponi potest in limpha adhuc sanguini maritata; sit jam hic ab erratis in victus ratione; sit à dissonis animi motibus; sit denique à re alia procathartica (quod nunc in censum non cadit), is vel laxioris, vel strictioris compedis concretiones faciet in eodem liquido jam in Hepatis cancellis secreto, dummodò magis, minusve in eodem subsistente fluido subtiliores superstites, mobiliioresque partes perdantur, à circuitu, aut perspiratione abreptæ; hocque ritu magis, minusve

minusve in crassioribus restituantibus particulis nifus ad conta-
ctum augeatur. Primam hujusmodi concretionum speciem sim-
plex adimplet obstructio. Componitur hæc quidem à succo in
substantiæ jecorariæ interstitiis inspissato, sed ea tamen fluidita-
tis quantitate adhuc prædita, quæ sufficere aliquando possit ad
eum rursus deducendum in proprios canales. Hæc, illa est He-
patis obstructio communior, quæ febres, aliosve morbos frequen-
ter præcedit, comitatur, aut sequitur; quæ non difficile solvitur,
vel vi naturali, vel remediorum: Huicque refero Hepatis in-
farctus illos brevi tempore nascentes, minusque renitentes, ex
limpha crudiori, post immoderatos frigida potus, vel exceden-
tem fructuum esum, vel intempestiva remedia refrigerantia, vel
crapulam, satietatemque nimiam, congesta in sanguine; inde-
que in hoc sanguinis diverticulum eructata, & usque ad debitam
ejus coctionem immorante: Hasce obstructions tanquam criti-
cas judico; adeo ut alveos grandiores sanguinis, à feculentis ibi-
dem projectis vindicando, graviores sepe morbos antevertant.

*Obstructio
levior.*

S. XII.

Venit indè firmior concretio alia, in qua tenaci adeo cohaesione
sistuntur grandiores limphæ particulæ, ut renioribus ejusdem,
ac agilibus partibus, vel penè in totum evolutis, vel penè in to-
tum implicatis, omni penè destituantur fluiditate, qua removeri
possint ab adhæisionis loco; Sicque sit ordinariò insolubilis, con-
cretionis hæc species; quam variè subdividunt Medici ab habitu-
dine aliqua dissimili humoris concreti. Atheroma dicunt à ma-
teria sua sevo simili; cujus congestionis exemplum in Hepate ha-
bemus ex *Glissonio anat.* Hepatis: Stheatoma ab humore lento,
& glutinoso, pulsem, aut cremorem referente; quod & in Hepa-
te observatum legitur apud *Clar. Joh. Fantonum Observat. Anato-*
mico-med. 13. post Segerum, & Velschium: Meliceridem autem à li-
quido mellis substantiam æquante: quem casum anno elapso au-
ditoribus meis sat maximum exhibebam in quodam Ductore
militum, dum eorumdem Nosocomio præessem. Misellus per
annum ferè, affectus dolore gravativo, & fixo, ad regionem exi-
tus costarum spuriarum à vertebra orisontaliter versùs hypochon-

*Obstructio
gravior.*

Atheroma.

Stheatoma.

Meliceris.

drium dexterum anteriùs extenso; Succedente hinc febricula habituali, emaciatione, intumescencia partis dolentis pallida, grandescence in dies cum costarum superjacentium incurvatione; Mox ingruente & in dies respirationis angustia, adeò ut, tanquàm orthopnoicus, non nisi erecta cervice respirare posset; Tandem post supperadditam totius habitus intumescenciam, verè suffocatus, cedebat fati, expletis duobus mensibus à principio tumoris. Aperto, primis aleis, tumore in Cadavere: Impetuosa statim eruptio lib. xx. circiter materiæ notabiliter spissæ, ex mixta scilicet gelatina crassiori, solutoque sero compositæ, non albæ, sed rufæ, non graveolentis, non purulentæ. Datâ per debitas incisiones oculis viâ, totoque expresso à fodina sua humore exundante, antiquæ meliceridis nidus offerebatur, ad Hepatis verticem, seu gibbam ejus regionem, qua lambit diaphragma. Effluxæ ad hanc congestionis sedem post crassiores, fluidiores & lymphæ copiosissimæ; facta quaquaversum expansione, impetuque ad exitum, offenso obice insuperabili ad partes posteriores dorsi, & anteriores hypochondrii; actoque sic in partem debiliorem nisu, sciderant hiatu ad pollicis diametrum notabili attiguam diaphragmatis faciem à longa jam laticum exoticorum assidentia, & maceratione laxatam, & à tono suo destructam; indèque ad totum antrum thoracis dexterum exundandum excurrerant; Undè successus prædicti. Inspectio aperturæ ab ipsomet naturæ conatu tentatæ ad exantlandum humorem, intempestivam increpavit Chirurgi formidinem à me in tumoris invalescentia sæpiùs ad apertionem, stimulatam Huic tumorum generi referri possunt minuscule aggestiones lymphaticæ ad milii magnitudinem copiosissimè totam Hepatis substantiam quaquaversum obsidentes, quas nupero mense Martio observabam in Puella sexenni longâ febricula, extincta. Acervuli hujusmodi foveam sibi congruam in Hepatis corpore, seu inter ejus acinos insculpserant, à qua indè facile scalpelli acie abradebantur. Contenta materies albumen ovi ad ignem exactè induratum colore, & consistentia æmulabatur. Quod autem notabile: par in Lienis substantia currebat affectio. Hic etiàm reducimus similes tumores varios accedentes

*Aliæque
congestiones
conformes.*

in hepate, post longas ægri tudines, nunc crassissima, ac translucida gelatina refertos, nunc liquidiori opaca, variisque colorum mixturis depicta. Sic Primus Italiæ Archiater, *Ioh. Maria Lancisius* immortalis lib. suo de *mort. subitan.* in Equite apoplexiâ denato observabat, posteriori Hepatis parti, quæ diaphragmati adnectitur, insidentem tumorem cysticum æruginosa velut argilla plenum, ex cujus adhærentia septum transversum eo loci subrufam coloris labem contraxerat; atque inde sicca tussis &c. In his omnibus congestionibus, quæ eadem sunt in origine, & natura, modicoque momento differunt, frigidus materię lentor legitimam nunquàm admittit suppurationem; Licet ex tenuioris interdum confluxu fluidi, miscella, & orgasmo quamdam pseudosuppurationis speciem concipiat, à vera tamen variis de titulis diversam: Ejus cæterum visciditas ramulosas varias in collectionis superficie densè implicat partes, ad continentis tunicæ, seu folliculi figuram adstruendam; ut superiùs annuimus.

§. XIII.

Maximus in Hepate concretionis lymphaticæ gradus, ille est, in quo exhaustâ omni roridâ lympharum portione, strictiùsque compactâ gelatinosâ; seu deperditâ omnimodè mobilitate, in firmum, in durum vertuntur collecti latices, nullimodè ampliùs *Scirrhus.* in liquiditatem reducibiles. Hujus generis morbus est, Scirrhus Hepatis; Cujus indolentiam, stabilitatem, imò & nullius sæpè momenti incommodum facilè concipiunt, qui eum tanquàm ex liquidis in solidi inertis naturam, & formam transmutatis constructum pensitant. Particeps mobilitatis est Scirrhus Hepatis, non minùs ac alius cujusque generis tumor, si tunicis ejus externis insideat, non intimo corpori. Plures Scirrho Hepatici observationes habemus in authorum paginis, plures etiam fallacias in eisdem legimus; ut, Scirrhum jecoris suppurari posse; imò & factâ exterius Cauterio, aut incisione aperturâ expurgari; Scirrhum jecoris legitimæ inflammationis Sobolem esse posse; Scirrhum jecoris remediis interdum introsumptis curabilem; aliaque de eo consimilia; Quæ omnia prorsus refello. Quòd si postremum in Hepate attingant fixationis, & indurescentiæ statum pituitosi liquo-

Concretiones
Hepatis Cal-
losæ, Gipsæ
&c.

Obstructiones
Hepatis
Spuriæ.

liquores, ut omni deperdita lymphæ fluentis facie, tanquam fex è liquorum evaporatione residua, non nisi ejusdem calcem præ se ferant; Venient certè concretiones callosæ, gipsæ, tartareæ, sabulosæ, lapideæ &c. non multùm texturâ dissimiles; in quibus omni exuta floris forma, & possibilitate, propriè solidescit liquidum. Hujus farinæ durities in Hepate observarunt *Glissonius*, *Platerus*, *Benivenius*, *Raygerus*, *Henen* &c. de lapideis in Hepate concretionibus sermonem ad aliud Caput servamus. Expletis obstructionibus Hepatis legitimis, tùm ex sanguine, tùm ex lymphâ progenitis, quas propriè circumscriptas vocant, illæ essent in censum subrogandæ, quas spurias voco; seu quæ non ex fluidorum vitio in ejus parenchymate, aut sinulis exercito, sed ex mala canalium sensibilibus habitudine emanant, insontibus etiam fluidis eosdem implentibus, adeò ut per solos errores organicos, varias exhibeant interceptiones liquorum in ductibus sanguiferis, & lymphaticis. Sed hæc omnia *Capite tertio* jam retuli, ubi de morbis Hepatis à solido vasculari; Ubi etiam de obstructione cystis felleæ, ejusque Canalium, prò ut ad dictam Categoriâ faciente, loquuti fuimus. Cæterùm duo adhuc perpendenda veniunt circa expositas obstructiones Hepatis. Primum, de quibusdam affectionibus, ad hæc obstructiones succedaneis: Secundum, si in quibusdam Hepatis, aliorumque viscerum obstructionibus constituendæ sint jurè peccantium humorum fodinæ ad febrium præcipuè intermittentium periodos fovendas.

§. XIV.

Stillicidia
Narium ex
Hepatis ob-
structione.

Diarrhœa
Hepatica.

Quò ad primum: Inter obstructionis Hepaticæ Satellitia frequentes animadvertimus hæmorrhagias narium: [quod etiam post *Volcherum Coiter*, aliosque antiqui stigmati homines varios, scripsit in praxi sua celeberrima Expertissimus *Lucas Tozzi*, Partenopeum Decus] & equidem tantum spaii detrahitur ab orbita sanguinis, quantum capacitatis aufert à vasis sanguiducis per abdominis viscera disseminatis, vel comprimens, vel offerciens obstructionis materia; sicque in angustiore locum coacta sanguinea moles, non tantùm grandiori volumine superiora impetet vasa, sed liberaiora earum ora recludet, in nares scilicet hiantia. Diarrhœa in eodem

eodem morbo non infrequens, quam ideò Hepaticam dicunt, petenda est à massæ alimentaris cruditate, & liquamine ex succi Hepatici hebetudine, aut defectu; præcipuè à transcurso limpharum per Hepar plurimum impedito, hincque in intestina undâ notabili regurgitantium: Enim verò; sicuti in tantum per animalis partes sensim secernitur limpha à fluido sanguineo, in quantum hoc sensim à cordis discessu lentescit in capillamentis suis; sicque copiosioribus, suprà alias partes, lymphaticis donetur Hepar, quia majorem ducat in eo, super alias partes, lentescentiam sanguis; sic data in sanguine portæ, ob infarctum Hepatis, retardatione motus ultra consuetum majori, fiet, ut tardius & idem fluor per solida intestinalia proserpens, majores ibidem ultra ordinarium dimittat limpharum copias; eodemque tempore Cruor aortæ ob idem infarctus Hepatici obstaculum, ab assuetæ quantitatis derivatione per primum emissarium suum, seu coeliacam impeditus; in majori per consequens suprà consuetum copiâ per succedens alterum immediatè emissarium, seu arteriam mesentericam, ad intestina depluet; ut indè uberius serum per hæc viscera extillare possit. Luxuriantes ideò in contumaci, fortique obstructione Hepatis aquosæ substantiæ per abdominis viscera, diarrhœam prædictam faciunt, si cavum intestinale subeant; Cachexiam autem, ascitem, aut aliam hydropis speciem, si per partium substantias, meatusque insensiles exundent, indeque per membranas, & integumenta extrinseca; undè tumor abdominis, pedum, scroti, faciei &c. Non est tamen quod hydrops semper ab infarctu Hepatico sobolescat, ut arridebat antiquis: sæpè ejusdem causæ cum eo consocia est productio; ut limphæ lentoris, colluviei: & per hoc in frequenti Cadaverum hydrope defunctorum dissectione, non Hepatis solum Corpus obstructum offendimus, sed & mesenterii, pancreatis &c. Sæpius autem nullum cum eo commercium ducit; ut patet ex frequenti obstructi Hepatis præsentia, absque ullo hydropis adventu; & vicissim ex frequenti hydropis assidentia, absque ulla Hepatis obstructione; adeò ut hydrops ex cujusunque alterius visceris principalis infarctu, imò & à quacunque majuscula in animali secretionem deprava-

Hydrops.

vata oriri possit: sic non infrequentes ex vicio pulmonum, renum, mesenterii, stomachi, lienis observamus hydropes.

§. XV.

*Fodina fe-
brum in
Hepate.*

Quò ad alterum: assero quidem in statu naturali totalem in partibus moram, seu adhærentiam prohibere fluidis, Circuitus leges: Assero tamen hujus rei aptitudinem in statu præternaturali ex inspectione varicis, aneurismatis, aliorumque affectuum consimilium. Sic data in Hepatis sinulis statione succi alicujus visciidi, qui à variè per moram fermentatis particulis suis novam induat substantiæ, ac texturæ formam; indeque vel ex propria, vel fluidorum continuò adventantium solutione, congruum recuperet fluorem ad lymphatica, & successivè sanguinea subeunda vasa; eum certè, ut febrilis accessus toties, & per determinata intervalla incitabulum concipiam, quoties à sanguine in visceris intercapedines eructatum, per determinata intervalla in ejusdem sinum revehi poterit: Stati hinc febrium recursus, seu intermittentium periodi à succo, Hepatis, aut alterius visceris loculamenta, tanquàm fodinam inhabitante, computari facillè possunt: Plurimumque elucescit hoc in Hepar, & ab Hepate liquidi morbosæ depositionis, & resumptionis commercium, ad febres terminandas, & renovandas ex repetitis observationibus, quibus in subjectis quibusdam continuam febrem ex repentino Hepaticæ obstructionis ortu, & elevatione statim judicari, indeque post longa intervalla recrudescere, evanescente statim Hepatis obstructione, animadvertēbam. Quæ febrem solvit Hepatis obstructio, criticam, ut suprà, vocare non incongruum duxi. Claudio prolixam hanc disquisitionem amplissima adhuc adnotatione; cui vobis exponendæ me teneri existimo.

§. XVI.

Eadem est per Lienem, ac per Hepar, in liquidis memoratis cursus naturalis proportio. Et siquidem; quod stat ex parte arteriæ: Idem diverticulum sanguinis, seu Cœliaca, æqualiter ad Lienem, quàm ad Hepar bipartitur: Quod ex parte venæ: Lentus idem gressus, quo sanguis portæ ad Hepar apellit, causa est, ut eodem etiam lentoris gradu sanguis per Lienis substantiam percur-

percurrat; prout idem scilicet lentè progrediens per portam intestinalem Cruor, causa est, ut non nisi lentè ex Liene in oculantem cum ea splenicam venam percurrentem ibidem sanguis derivetur; ob quam rationem splenica vena quater grandior est correspondente arteria. Quamobrem, sicuti proportionalis est lentor sanguinis, & remoratio in Liene, ad lentorem ejusdem fluidi, & remorationem in Hepate; sic ejusdem & gradus proportionaliter fluunt ordinariò in utrisque partibus infarctus, & obstructions; sic consimilis & proportionaliter est per consequens in ambobus visceribus lymphaticorum numerus, copiaque, & motus deVecti liquidi. Eadem in ambobus situatio; ambo scilicet viscera eundem in abdomine horizontem, eandemque (ut ita dicam) lateralitatem occupantia. Itaque lentoris præternaturalis habitudo in viscerum naturalium sanguine, aliisque liquoribus vigen, non minùs in Lienis, quàm in Hepatis parenchymate infigi poterit. Et ecce jam, cur Hepatis obstructio sociam habeat ordinariam, & obstructionem Lienis; nilque in cadaverum extispiciis familiariùs veniat, quàm utrasque partes equali infarctus culpa peccantes animadvertere: Illaque, inter duo hæc viscera, in statu sano, & morbofo consensus, & connubia explicata, non mumialia, & sympatica, ut apud Antiquos; sed verè mechanica, & in vasorum habitudine constituta. Sic in puellæ exemplo superiùs §. XII. allato, eadem in organo utroque occurrebat congestionum miliarium diathesis. Aliæ, & frequentes accedunt in aliis hominis partibus correspondentia, non ab analoga vasorum sensibilibum, sed ab insensibilium distributione petita; seu à compositionis, & substantiæ congeneitate: Ut consensus inter varias Corporis glandulas, longè licet distitas; cutaneas v. g., & bronchiales; renales, aut intestinales, & articulares; mesentericas, & jugulares &c. Sed extrà rem nostram est materia hujusmodi. Hoc addere hîc debeo, quòd, grandius in œconomia animalis incommodum, Hepatis obstructionem ferre suprà eundem lienis affectum sat ille nescit, qui leviter considerat, ex primi visceris obstructione, super eandem alterius duo mala consequi notabilia; Impeditam secretionem à sanguine recrementi, quod in co
valde

valdè seditiosum est; Impeditam distributionem ejusdem in intestinum, in quo valdè est necessarium. Collige à dictis, ex lentescencia obstructiva sanguinis portæ in Hepate, non solum, & eodem crimine implicari posse lienis sanguinem, sed, & aliorum viscerum, succum eundem effudentium in portam; sic ut in obstructionibus Hepatis, & lienis, iidem etiam communiter animadvertantur maleficiis obfita, Pancreas, Mesenterium, Omentum &c.; Obstructionibus ideò lienis, aliorumque etiam abdominis viscerum, quæ in portam sanguinem suum transfundunt, ordinariò antecedere obstructiones Hepatis; adeò ut in generalibus viscerum abdominis obstructionibus, quisquis legitimè affirmare possit, primogenitam fuisse obstructionem Hepatis, quod super cæteras hasce partes magis est capefcendis obstructionibus dispositum; prò ut suprà eas omnes liquido crassiori transcolando destinatum; & econtra non obstructo Hepate, seu liberè per hoc viscus trajiciente, præter alios succos, cruore portæ, difficillimè prehendi obstructionibus alia abdominis viscera, prò ut liberè fluunt per ea latices omnes, ob liberum sanguinis portæ fluorem per vias suas; ut patet.

§. XVII.

Perpensâ jam obstructione Hepatis sanguineâ, & limphaticâ, remaneret hîc, etiam propriè humoralem conferre, seu biliosam: expositis scilicet jam morbosis lentoribus sanguinis in glandulosis concursibus Hepatis, limphæ in lobulorum, acinorumque interstitiis, tertii jam memorati humoris, seu vernaculi ejusdem partis recrementi, in vasis peculiaribus suis lentores peragrarè incumberet: Sed cum principales à fluidis morbi in Hepate, aliisque visceribus naturalibus, ex variis secernendæ, aut secretæ bilis erroribus auspicentur; hinc, ut penso exactiùs incumberem, operæ pretium duxi, varietates eorundem omnes novo quodam, nitidoque ordine exarare; singulas nempe sub quinque vitiatæ Hepatis secretionis classibus, totidem in capitibus comprehensis, colligendo. Sic primo Capite morbos Hepatis, aliarumque partium expromam ex aucta bilis secretionè; secundo ex diminuta; tertio ex abolita; quarto ex depravata; quinto ex secretionè ad alia etiam organa translata. Sit jam igitur.

C A P.

C A P. VI.

Morbi à secretione Hepatis aucta.

§. I.

A Nimalis sanitas in debito locatur secretionum consuetarum usu; sicut vita in debitis per solida, fluidaque correspondentiis motuum. Hinc cum à motibus secretiones accedant; vita secretionum principium est; & reciprocè secretiones sunt principium vitæ, dum à vitiatis secretionibus, vitiantur, à suppressis, & supprimuntur motus vitæ necessarii. Præcipua ad vitam animalis faciens secretio, biliosa est. Et quemadmodum tota œconomiæ animalis perfectio à recto hujus secretionis statu auspicatur (*ut vidimus superius.*) Sic omnes penè illius errores ab ejus vitio ortum ducunt. Bilis multipliciter (*ut supra*) aberrare potest à naturali habitudine sua; hinc morbos innumeros à viscerum naturalium sede oriundos procreare. Hic primò consideranda veniunt, vitium ejus in quantitate simpliciter nimia, sub auctæ Hepatis secretionis titulo comprehensum, affectusque ab eo emergentes. Cæteræ ejus exorbitantiæ, morbique earum affectæ, in sequentibus capitibus sub variis ulterius secretionis Hepaticæ dissonantiis, accedent.

§. II.

In Duplici casu exuberare potest liquidum biliosum, undaque tumidiori in intestinum perfluere; vel cum luxuriantibus revera in sanguine copiosius bilis principiis, uberior fit eorumdem transcolatio in Hepate, & derivatio in intestina: vel cum consueta solum vigente tum in sanguine, tum in colatorio quantitate bilis, eadem ab insolitis corporis ipsius Hepatici, aut partium adjacentium contractionibus validè adeò, copiosèque per ductus suos, in duodenum exprimitur, ut soliti effluxus mensuram longè, & exigentiam transcendat. Venit bilis exuberantia in primo statu; cum post exercitia immodica, vigilias diuturniores, febres ardentes,

Vita, & sanitas in quæ fundentur.

Duplex est exuberantia bilis.

vera

Et apparens.

X

spirituosa

spirituosa alimenta, fervidasque tempestates tanta in sanguine extruitur quantitas salis lixiviosi, retorridique resino-sulphurei, ut incerniculo suo, ac intestinis, supra consuetum exundandis sufficiat. Accedit in altero casu; cum ex diathesi spasmodica Hepatitis, ventriculi, aut intestinorum, in affectu hypochondriaco, febrium intermittentium principio, colica nervosa, aliisque contracturis morboris, adeo premuntur attigua promptuaria bilis, ut tanquam ab admoto emboli validiori momento, violenter, & uberrimè in intestina trudatur liquidum convasatum. In utroque statu grandescens in intestino proportionaliter cum copia & bilis stimulus; isque à comperenti Chyli, aliorumque liquidorum intestinalium mixtura non satis imbibitus, & involutus, nerveam ejusdem canalis laceffit, & quatit tunicam: hinc tensiones ejusdem, & crispaturæ, colica, hydrops sicca, aliæque orgasmi bilioli soboles: Borborigmi, & flatus præcipuè, ob alternè introductum in fistulam intestinalem, collisum, & rejectum externum aerem ab eadem alternè contracta, & restituta (quam flatuum mechanicam amplissimè elucidabo in peculiari tractatu) Perfluens usque ad cavitatem ventriculi tumidum humoris hujusmodi fluentum, nauseam ibidem procreat, sputationes copiosas, vomitus, præcordiorum anxietates, cardialgias, vertiginem, dolores in suprema cavitate lancinantes, anorexias, aliosque stomachi, & capitis morbos: Quarum partium strictissimum, subitumque reciprocè consensum ille radicitus percipit, qui veram colicæ Anatomem. Tantum etenim insequitur culter propaginum nervosarum affluxum ad stomachum, ut non nisi ex glomo nerveo explanato contextam hanc partem ostendat: Tanta insuper est, supra alias omnes corporis partes, nervorum à capite ad ventriculum excurrentium rectitudo, ut facile percipiamus, concussionem, tensionem, aut novitatem aliam in nervi extremo ad stomachum desinente impressam, ocyssime usque ad extremum aliud, seu originem ad caput suam propagari posse. Imò ex copiosa bilis effusione in intestina, & ventriculum, repentinam observarunt mortem *Vesalius, & Ballonius.*

Inter bilis affectus præcipuum tenet locum Cholera morbus; *Cholera morbus.* quem ab aucta hepatis secretionem, seu copiosiori ultra statum naturalem in hoc viscere secreta bile, & ad tenue intestinum suffusa deducunt inter modernos quamplurimi; eò quòd in denatis ex hoc morbo, fellis folliculus non solum bilem contineat ejusdem tincturæ, viridis, æruginosæ, aut alterius; ac tulerant succi in affectus vigentia supernè, infernèque erumpentes; sed eadem semper extremè satur occurrat: Præcipuè quòd in gracilibus, & pichrocholis constitutionibus, in quibus exorbitantiæ bilis assuescunt, frequens sit hæc affectio. Alii tamen jecur in hoc morbo absolvunt ab omni culpa, observantes choleram ordinariò, atque citissime succedere ingestionibus cibi dispepti, immodici, aut aliter pravi, alii que victus erratis: nec tam præceps (*asserunt*) brevissimo temporis spatio fieri in Hepate potest biliosæ secretionis excessus hujusmodi. Litem hanc ad veritatis trutinam conciliando: Volumus cum primis succorum in cholera per vomitum, & alvum effluentium flavedinem, virorem, æruginositatem, aut formas alias, veras esse legitimæ bilis Hepaticæ tincturas: Affirmamus cum alteris enormem illam humorum copiam brevi temporis curriculo in eodem morbo elutriatam, ab aucta Hepatis secretionem non auspicari, sed ab actione liquorum in tubo intestinali nascentium, ibidemque in maleficos degenerantium. Et equidem aggestum in intestinis vel ab impura Chylosi, vel ab arteriolarum eructatione, vel à subdola veneni præsentia liquidum exoticum, tumultuarium, & acre, eo pollere potest stimulo, qui, suprà vim fortioris cathartici, par sit copiosissimis emungendis serosis, aliisque humoribus, ex innumeris per totam intestinalem faciem dispersis hydragogis tubulis, ac siphunculis excretoriis, & præcipuè ex Hepatis, atque pancreatis emissariis; ut tot alvi dejectiones, vomitusque adimplens porrigatur materies. Dixi in intestinis cholæræ incitamentum procreari, per quam rationem, vel modicum, succis copiosissimè eliciendis sufficit, plusquàm ferocius quodcunque purgans. Reverà medicamentum purgans, suum in ventriculo irritamentum inchoando, in violentam

tam illicò contractionem ducit fibras ibidem motrices; quarum indè per totum intestinale tractum continuatio, successivam ejusdem contractionis conspirationem amplectitur usquè ad podicem; adeò ut per totum hoc iter propulsæ incessanter, purgantes particulæ, ac ab omni mora per intestinorum parietes inhibitæ, ab eis fugitivè confossis mediocres solum exhauriant laticum rivulos: Sed cholera materia in tenuis intestini angulositatibus erigens caput, antequàm ad excretionem exsurgant sensiles tunicae, jam mucis adeò, plicisque alligata jacet, ut ibidem longiùs degens, & strictiùs affixa, integram vim suam explicare, ampliusque succorum expressionibus proritandis vacare possit. Probos autem magnam partem humores exprimi in hoc affectu, non morbosos, comprobant, enormis ab excretionibus perfractio virium, sectantes Leipothymia, asphixia, facies hypocraticæ, marmoreæ frigiditates partium &c. indèque, frequenter interitus; Et Præcipuè, notabile in insultu nocumentum à quocunque purgante vel lenissimo; solum ab alexipharmacis vivificantibus, imò & narcoticis levamen. Cùmque bilis potentissimum sit tingens; ut patet, quando bilis cystica solo semicochleari integram aquæ libram colore ejus genuino saturamus; sic, succi omnes limphatici hoc in morbo foras è latibulis suis per exprimens stimulum elicit, eo pingentur colore, quem bilis ab eadem expressione eructata, eisque confusa, adducet ex Hepate, ejusque folliculi in duodenum; ità ut merè biliosa appareant hæc liquida; non minus ac plures aquæ mensuræ paucula cruoris quantitate imbibitæ, & intinctæ, ejusdem colorem, & substantiam mentiuntur.

§. IV.

Bilis exundatio sæpe critica.

Cæterum secretio in Hepate major quàm ordinaria, critica interdum est; ut variis in febribus, aliisque affectibus; quo casu inter Hepatis morbos non adscribenda; prout morbum non faciens, sed solvens. Vidimus nuper ex subitaneo sincere bilis, ingentique vomitu curatam annosam Hemicraniam; & 2. ab hinc annis judicatam 15. mensium Quartanam.

CAP. VII.

Morbi à secretion Hepatis Diminuta.

§. I.

Secretio bilis præter exigentiam naturalem imminuta in emun-
 ctorio suo, vel est ab ipsius organi, vel à bilis ipsius defectu. Paucitas bi-
 lis ex du-
 plici causa.
 Accedit primò, quando ob constrictos præternaturaliter Hepatis
 solidos, seu in densitatis intemperiem coactos (*ut vidimus Cap.*
2.), vel ob scirrh, aliorumve tumorum pressuram, secretorii, &
 excretorii glandulæ bilaricæ meatus ad minorem, quàm deceat,
 amplitudinem reducuntur; ut indè & minor, quàm naturaliter
 fiat, trajici quantitas per eos possit liquidi consueti, & adhuc
 naturaliter constituti. Venit secundò, cùm crassiorem, viscidam-
 que crasim adepta bilis, colatorii Hepatici immiffaria, & emissaria,
 naturali licet in amplitudine adhuc posita, eadem copiâ, ac
 naturaliter petitur, in dato tempore permeare non potest. Crassior
 fit bilis, vel cùm spiritu exuitur, aut aquea humiditate, aut utro- Lentoris in
 bile extra-
 ordinarii
 triplex cau-
 sa.
 que, per introductam exuberantiam caloris; ut in æstivis febri-
 bus continuis; immodico exercitio; potuum spirituosorum intem-
 perantia &c.; Vel, cùm in ea depressa liquidiora hæc principia,
 à terreis, aut gelatinosis prædominio illaqueantur; ut in Chloro-
 si, Cachexia, obstructionibus, affectione hypochondrica &c. Vel
 tandem, cùm crassiores, irregulares, limosasque suas partes, tan-
 quàm sedimentum amurcosum, & cretaceum, criticè in Hepa-
 tis colum despumat cruor, insonti sic ceterum bili visciditatem
 concilians: ut in spontanea intermittentium variarum solutione,
 interdum videmus.

§. II.

Varii à manca biliosi laticis percolatione in intestinum, enas-
 ci possunt in primis viis, & ex his in sanguine affectus. Chilus
 à bilis verrentis penuria in competentem occasionem non positus
 induendi indolem roris purissimi, & justæ alchoolizationis subli-
 mitatem; crudus sic remanens, caseosus, lentus, non tantum fla-

*Diæti lento-
ris effectus
multiplex.*

tus in intestinis procreat, tensiones, putrilagines, inappetentias, vermes; sed in mesenterio, aliisque viis suis turpiter implicatus, infarctus contumacissimos; in sanguine intromissus, fæculentias, & crassamenta, indeque febres lentas, macies; in visceribus omnibus, & habitu corporis, chronicas omnis generis congestiones, putresque cacochilias. Sic factò vitiorum circulo omnes hydro-
pis species ab hoc imminutæ secretionis Hepaticæ statu emanare paulatim possunt; quotiescunque scilicet, post varias humorum diatheses ab eodem inductas, aquosæ substantiæ sanguinis ab aliarum implicatione solutæ, audeant in universo corpore, vel in parte aliqua, veteribus à viis deviare, novas cudere, ac in occurrentibus capacitatibus recolligi. Imminutam bilis secretionem sequitur plerumque uberrima Ascaridum genesis, & tripudium in intestinis; quæ indè animalcula à corpore fugare discimus majori per catharticum provocata ad duodenum quantitate bilis. Lepida est Ascaridum historiola in amico meo. Is per annos jam plures (ut etiam in aliis affolet) hospes hujus generis verminosæ familiæ, indomabilis à quocunque remedio, periodicam solum ab eadem molestiam patitur. Et siquidem hora vespertina (*Horolog. Gall.*) exactissime semper nona descendente ad ejus podicem tumultuaria horum viventium agmina, tantam ibidem, spiris celerrimis suis, minimisque aculeis molestæ titillationis rebrationem per horam integram, nempe usque ad decimam, excitant; ut nullis quasi negotiis vacare vir possit tunc temporis. Omnimoda cæterum petulcorum animalium in aliis diei spatiis quies; sicque nulla prorsus eorundem perceptio. Id constantissime per omnes tempestates anni, omnesque status affecti.

CAP. VIII.

Morbi à secretionem Hepatis abolita.

§. I.

A Bolita in jecore secretionem bilis, pessundatur tandem machinæ animalis ordo, pendens ab interrupta primæ coctionis

nis actione: Imò vidisse affirmant Authores subitas sepè neces in subjectis; quorum cadavera cystim, ductusque alios Hepaticos, nec non intestina liquido bilioso omninò vacua exhibebant. Causæ suppressæ omnimodè transcolationis in Hepate recrementi sui, eadem esse possunt, ac in superiori capite ad solam ejusdem imminutionem conscriptæ, sed longè graviores; effectusque iidem ideò, ac expositi, sed validiores & longè; adeò ut funeri manducant præcipiti. Ex pleno bilis ideò defectu in intestinis non solum vermes pullulant, chilique corruptelæ; sed terribilissimus excrementorum factor, delirium, letargia, suffocationes &c. ab acore videlicet cibario ob bilis verrentis absentiam putrescente, obvios succos omnes subvertente, solidaque nervea quatiente.

§. II.

Ex bilis effluxu in intestina suppresso, petenda frequenter est chilosarum excretionum, aliorumque alvi fluxuum causa. Demp- to namquè occasionali principio solutionis suæ ab inutili fæcum sarcina, facilè restitat Chilus in earum cloaca; cujus indè infectione fracescens, tanquàm excrementum non minùs evacuabile, per communem viam, foras ablegatur è corpore; postquàm ob liquiditatem suam, corpulentiam & eisdem fæcibus liquidiorum conciliaverit. Sæpè è converso, ab eodem biliosæ derivationis defectu in intestinum, origo adstrictionis alvinæ procedit; deficiente scilicet unà cum bile, naturali ad excretionem intestino- rum stimulo. Obstupeo cæterùm de *Aristotelica* apud *animalium Historiam* assertionem: Quòd scilicet omnimoda fellis privatio in bubulis victimis nonusquàm perciperetur.

CAP. IX.

Morbi à secretionem Hepatis Depravata.

§. I.

INsidens hîc declarandis depravationibus Hepaticæ secretionis, modos omnes secreti liquidi à norma naturali devios attexere intelligo:

Tres depravata bilis species.

intelligo: Derivat etenim immediate cujuscunque secretionis depravatio à depravatione humoris, qui secernitur. Venio ideò jam ad cunctas species depravatæ bilis, seu modos præternaturales, morbosque indè in homine prodeuntes numeris omnibus absolvendos; melioribus scilicet, quantum potero, ordine, claritate, & brevitate exarando. Bilis modi, seu qualitates ejusdem omnes, quæ, in hominum morbis, vitii susceptibiles sunt, ad tres solum species reducuntur, scilicet ad tactile, ad sapidum, ad coloratum.

§. II.

Bilis morbi in tactili.

Ad tactile referuntur illi omnes bilis status, qui ejusdem consistentiam respiciunt, sicque à tactus sensu perceptibiles sunt. Quoniam esse rerum animalium naturale, in quadam semper moderatione, seu mediocritate consistit, longè ideò semper ab excessu distante; sic in tactili habitudine bilis, duæ primariæ vitiorum classes accedere possunt, secundum quòd alterutrum regnet mediocritatis extremum. Bilis itaque vel debitam variat consistentiam, tenuiorem induendo, quàm par sit, vel crassiorem assu-

Bilis aquea.

mendo. Aquosior hic humor, fluidior, ac lixivialis in cachexiis quibusdam, aliisque ex colluvie serosa affectionibus observatur; in quo statu activa ejusdem principia à redundante sero nimis invicem diffusa, & tanquàm submersa, chiloideos numeri imparia sunt: Hinc varii primarum digestionum morbi; quos inter, diarrhœas interdum vidimus diuturnas, non tam ex bilis per intestina fluxilioris materie, quàm ex alimentorum, coctione ex-
Limosa. perita non elaboratorum liquamine. Frequentior est bilis in statum oppositum incidentia, seu in crassitiem ultra institutum naturæ: Facilis nempe mutatio in liquido, cujus naturalis jam supra alios humores visciditas, in majorem sat facile accedit: Cujus videlicet ramosæ, gravesque sulphurum substantiæ facile ab aqueis vehiculis sequestrari, strictèque inter se se compingi possunt; præcipuè cum causa aliqua, ut æstas, labor immodicus, solis æstus, liquorum ardentium libido &c. roridam sanguinis partem, seu oleagineo-volatilem, crassiorum sulphurum solutivam, adedè depre-

cernen-

cernendum linquat. In hoc casu, qui ideò creberrimus est, cruoris compagi ingravesceus hoc recrementum, eoque vividius projectum in colum suum Hepaticum, ob indutam hanc spissitudinis formam, impar est ibidem viis liberè trajiciendis suis, adeò ut in ductuum suorum angustis, seu eorum principiis lentescat, ad stabiliendam obstructionem. Et quia lentescens bilis in scaturigine sua, vel mobili quacunque, & seditiosa aptitudine destituitur; vel activa adhuc fovet in gremio, & inquieta principia, in lentoris loco ideò exsurgunt ad luctas; sic lentorem bilis, non minùs ac sanguinis superius descriptum, in duplicem distinguimus, frigidum, & calidum. In primo igitur, bilis simpliciter limosa est, amurcosa; seu propriè frigida, apud antiquos; ut in hydrope post Hepatis obstructionem accedente: In altero, non limosa so- *Frigida* lùm, sed acris sed exæstuans, & propriè calida; de qua in se- *Calida* *quenti paragrapho*: In utroque, varii chiloseos defectus emergunt: Vel etenim profundius involuta, vel altiùs efferata bilis elementa, succos alibiles non satis, aut nimis solvunt. Concoctio autem bilis morbosè lentescens in Hepate, nomen in arte tam strepitans, est in tantam fluiditatem à succis circumeuntibus redintegrari hoc fluidum per mutatas in dies feri recentis copias, ut à ductuum suorum adhæsione disjungi sat possit, & per emissaria sua foràs à viscere derivari.

§. III.

Sapidum, considerabilis est adeò in humoribus animalis mo- *Bilis morbi* dus, ut Archigenes, ipseque Medicinæ Protoplastes Hippocra- *in Sapido.* tes priscis jam ab ætatibus, nostrisque diebus *D. Cesuin.* apud *Zod. med. gall. ann. 1. mens. sept.* morborum penè omnium, ac Symptomatum Causas à saporibus deduxerint; imò & naturales omnes partium humani corporis mutationes. Et reverà qua corpora sapida organum gustus habitudine afficiunt, eadem & apta nata sunt super alias omnes partes impressiones suas proportionaliter insculpere, easque ideò variè permutare. Firmat Prædictorum systema gravis illa apud Eruditum *Lanzoni exercit. de Saliva* Observatio in Matrona, cujus saliva per 8. mensium curriculum deferrebat à sanguine ad linguam, & ora possibiles quascunque saporum

*Bilis Insi-
da.*

rum species, sibi invicem variis periodis succedentes. Sapidum bilis naturale in prima hujus operis parte satis indicavimus: Præternaturale, secundum dicta superius, in duas classes tanquam opposita extrema dividitur. Peccat igitur bilis sapidum, vel in esse obtusiori, quam deceat, vel in acutiori. Venit primo modo, cum minimè amarescens est, insipida, aut dulci proxima; rebusque ideò suis inepta. Induit hanc affectionem vel ex salium suorum deficientia, vel depressione, vel mole grandiori, inertiorique ponderositate; ut nec fluorem, phlegmate diluta suo, adipisci queant, nec ad motus consuetis actionibus congruos evehi. In Cachecticis, præcipuè mulieribus, aliisque lentè ægrotantibus, delinquentem hoc ritu bilem ordinariò vidimus: Depressa etenim, & paupercula in hisce morbis fermentatio sanguinis, impar est cumulandis mobilibus, torridis, solutisque spiculis, quæ insapida bilis elementa faceffant: Sanæ sic bilis genesim refermentantibus cruorem remediis, in hisce casibus procuramus. Insidam ideò, crudamque bilem non solum varii præcedunt morbi, sed & varii, variæque naturæ sequuntur; ut sic hoc bilis genus morborum sit effectus, & causa: Fracidi chili status, congestiones, stagnationes, putredines emergunt; chloroses ingravescentes in diem, cachexiæ, hydropes omnigenæ, totque aliæ affectiones, quot nasci possunt à dejecto, per hanc bilis fatuitatem, primarum coctionum negotio.

§. IV.

*Salsa. Aci-
da Pontica
Etc.*

Ad apicem alium Sapidi biliosi emigrando, seu ad acutioris habitudinem; Bilem observamus à moderamine amaricantis sui in acidam deflectere enormitatem, ponticam, austeram, falsam, aliaque ad varios morbos incitamenta, quotiescunque ob prævias in massa generali fluidorum motiones varias, variis figuræ modis salina ejus aculeantur principia, variisque indè locationibus cum cæteris componentibus concurrunt. Ex falsa bile variæ incutem eruptiones accedunt; Erpetes, Erysipelata, Psores, Phlictenæ, Impetigines, Epynictides, Ephelides, Maculæque illæ, quæ propriè dicuntur Hepaticæ; in quibus omnibus colligitur, stillatque liquor erodens, flavusque, seu biliosus; subtilior ille scilicet,

licet, qui è foco suo jam pridem in massam suggestus, nisi inde depuratorio eructatus ad corporis extremitatem fuit; ubi, spiculis suis à massæ implicatione expeditis, nec non ob initam ibidem moram potentioribus, exesiones aggreditur in canalibus, solutiones in liquidis, aliaque mala. Quod accidit ad hominis extrema per bilis falsedinem, idem, aut simile ab eodem projecto liquore succedere & in intimis partibus posse, non inficior; Dùm salia bilis, super alia omnia, irregularia, & mobilia, sicque, & nocentiora considero: Ex hoc inde principio irruentias varias, & erosiones internas perpetrari existimarem; Emopthysim, Phthisim, Aneurismata &c. Variæ per vomitum, & alvumurbationes fluorum obveniunt ex acida bile, portica &c. In hypochondriis æstus, & angustia; in primis viis tormina, & tumultus; in coctionibus inordinationes quamplurimæ &c. Sed fax- *Acrior.* cundissima morborum mater est, bilis ultra consuetum acrior. Notabilem judicamus acredinem in latice bilioso, cum substantiæ ejusdem, tum Salinæ à componentibus aliis solutæ, ac ad ingentem attritionis, florisque gradum evectæ, cum Sulphuræ in brachiolis discerptæ suis, & subtiliatæ, summam concipiunt aptitudinem ad motuum rapidiorum rotationes, partesque sic obvias omnes magno vigore afficiendas. Bilis itaque ultra naturam acrior vesiculam inhabitans suam, non tantum transsudat ad partes adjacentes hepaticas interdum, eas liniendo colore suo; sed & intimè corrodit, ultimaque labe putrefacit: Ut legitur apud *Melchiorum Fribe in Ephemerid. nat. Curiosor. German.* Per intestina in ventriculum transfusa, ardoris in eo sensum insculpit communiter: Ut apud *Platerum*; eumque non semel erodit, & perforat: Ut apud *Rhodium, Dom. Salam, Panarolum, Bartholin. Th., Aliosque*: Nervosas sæpè ejusdem partes sensibiliter quatit: Sic qui præfervida hujusmodi pollent bile, jejunium diutius protractum vehemènti stomachi, aut capitis dolore sensim ingravescente persolvunt: Nec nisi cibatus affectum tollit. Et siquidem, non minus ordinarium est, exundantem in ventriculo acorem biliosum ab eduliorum substantia imbibere, & illaqueari, sicque & ejusdem ferociam filere, quam nervosam ejusdem visceris tunicam à nudis,

dis, & non involutis bilis aculeis laceffiri, indèque & consensum trahi cum nervorum origine in capite; pro ut nulla inter corporis partes rectior, & refertior vergit nervorum productio, quam inter caput, & ventriculum; ut vidimus *Cap. sexto*. Cardialgia; Morsus ventriculi, quem sodam dicunt, præcipuè in æstate contingens, aliique hujus visceris morbi ab eadem bilis cum exundantis turgelcenti acredine petendi veniunt. In sanguinem immediatè à sede sua, aut per galaxiam remeans hujus genii biliosus humor, febres ardentes efficit, deliria, phrenitides, convulsiones, & manias *Ex Hippocratis oraculis*. Præsertim autem per intestina oberrans, colicas ibidem acerrimas excitat, quas idèò biliosas vocant, efferosque tenesmos, & diarrhœas; quibus contumaces dysenteria succedunt, si à muco intestinali imbibitus, & remoratus erodens hic liquor, fixam ibidem eligat sedem ad foudicationes suas circumpositis tunicis commodiùs, & validiùs indendas. In recto intestino sæpè hæmorrhoides exasperat attritione sua, sicque tumefacit, & ad phlogoses disponit.

§. V.

Fluxus Hepaticus.

Dùm sermo est de diarrhœa, & dysenteria ex hepatis vitio proficiscentibus, ab instituto aberrarem, si de ulteriori alvi fluxu proximè ab Hepate dependente, Hepatico idèò dicto, elocutionculam non apponerem. Infelix est adèò fluxus Hepatici investigatio apud modernorum ratiocinia, ut de elucidatione Medicina desperans, morbum inter Antiquos tam serium, morbis imaginariis adscripserit. Tantæ imposturæ causa est, raritas hujus morbi; per quam difficilè examinari potest, & internosci; præcipuè ejusdem per circumstantias varias cum morbis aliis affinitas; per quam idèò in identitate originis cum ipsis (prorsus cæterum discrepantibus) confunditur. Sic Multi inter dysenteria species reponunt fluorem Hepaticum: Alii inter hæmorrhoidum errata: Plurimi in vitiis ventriculi &c. Miseri Antiquorum Codices! Ecquid tanta vestrum sedulitas in signis veridicis hujusce morbi, plenèque distinctivis exarandis; ebuccinantes scilicet, dejectionem esse fætidad, indolentem, ichoroso-saniosam, seu flavo sanguineam, cum habitudine corporis ad iëtericum, ad cachecticum,

ad

ad hydropicum; frequentibus præcipuè per alias partes sanguinolentis effluxibus? Ecquid; Dùm Recentiores nostri turpissimâ potius ignorantia obcæcari malunt, morbum palpabilem negando; quàm vestros lectione dignari sudores? Eja: Dicite illis, quòd, siquidem audire vos nequeunt, audiant saltem Sodales suos. Audiant *Iac. Bontium med. indor. lib. 3. observ. 9.*, qui litteris sesquipedalibus evulgat, invenisse in homine post fluorem Hepaticum sex mensium defuncto, loco Hepatis solam membranam ipsum investientem satis crassam, instar succi; cui adhuc portio saniei, lotura carniū similis inerat, qualem tam longo tempore excreverat. (similemque casum jam pridem viderat *Ballonius lib. 1. consil. 53.* in sex annorum profluvio, & *Th. Iordanus cap. 19. Phenomen. De Peste*, in septem solùm dierum morbo) Audiant *Clar. Drelincurtium in Thes. discipul. suor. apud tom. 2. Bibl. Pract. amplissima* magni Reipublicæ literariæ Protectoris *Iob. Iac. Mangeti*. Qui, fluxu Hepatico denatos aliquot aperuit, quorum jecur ad instar pomi putris corruptum, contrectantibus digitorum apicibus, cessit, & ad contactum levem diffudit. Audiant *Bonetum*, aliosque plures, quos hîc prætereo brevitati studens. Et casu quo, certiores jam de realitate, causam ejusdem audire vellent: Dicam ego. Fluxus Hepaticus est Catarrhus hepatis. Et siquidem; vigeat jam [*quæcunque sit causa*] liquamen serosum in sanguine portæ, qui hac ideò habitudine deveniat in Hepar, per eum distribuatur, per eum lentescat (*Ut sæpius demonstratum*): Sit jam in loco separationis bilis à massa cætera sua; sit, inquam, in glandulosis concursibus (*Ut etiam expositum*) Ecce jam innatans ad massæ superficiem (*Ut cap. x. primæ partis*) separanda bilis: Ecce jam per meatus directos excurrrens ad excretoria sua: Erit ne sincera in hoc casu? Non certè. Natantes massæ, non minùs ac ipsa, liquatæ portiones feri, non solùm ipsam imbibent, ac dilutiorem per consequens facient, sed solutas ulterius in plexu suo tenues cruoris particulas varias, eidem confundent, & nectent; adeò ut, superans indè bilis suorum exordia vasorum, purpureo hoc contubernali pertincta, ibidem compareat, trajiciat, viasque suas omnes prosequatur, fluentum ideò luteo sanguineum largè ad intestina deferens miscella hac sua. Et

de factò patet, ex liquabili laxitate hac sanguinis fluxus Hepatici principium auspicari, eo quòd sæpè in detentis ab hoc fluxu, sanguinolenta comparia effluant ulteriùs per nares, os, uterum, hæmorrhoides, spiracula cutis &c. Præcipuè quod colliquativis frequenter morbis hæc affectio succedat. Et sicuti cataribus Pulmonis v. g., ob acredinem, vel insitam suam, vel acquisitam à mora in vesiculis pneumaticis, maceratum diù continuis trajectibus viscus, exedit tandem, variisque malitiis labefacit; sic catarthus Hepatis, seu colluvies hujusmodi seroso biliosa, obfalia sua, tam per fluorem acceptum, quàm per initam in lacunis biliferis stationem summè aculeata, & nocentia, suum & viscus post longas exundationes impetet, feriet, variisque labis gradibus postremò afficiet. Fluorem Hepaticum ex polypis cavæ inferiùs videbimus.

§. VI.

*Bilis morbi
in colorata.*

Venio tandem ad coloratum; quod, licet in bile, aliisque corporibus extimæ solùm superficiei passionem indicet primariò; varias tamen persæpè, easque ingentes intimæ coloratæ substantiæ habitudines successivè revelat. Color bilis jam aliàs descriptus, vel in dilutiori declinat, vel in saturatiori excedit. Primum genus adimplet pallida bilis; cujus varii gradus notari possunt, secundùm majorem, aut minorem cruditatis statum in liquidis animalis; seu secundùm majorem, aut minorem aquositatis principa-

Bilis Pallida

tum in bile super activiora ejus principia. Pallida igitur occurrit ordinariò ad cystim suam bilis in delicatulis, in chlorosi; pallidior in cachexia, fluxibusque coeliacis; pallidissima, & ferè absque ulla flavedinis tinctura, ac tantùm non aquea, in hydrope, aliisque morbis diuturnis; in quibus sensim deperierit motuum emicatio in sanguine: In hisce interdum affectibus albescens observatur, & candida, ut vidit *Diemerbroek*. Saturatioris colorati species in bile, adnumerantur variæ, secundùm multiplices gradus, per quos flavus bilis naturalis color ad nigrum accedit. Sex communiter accensentur à practicis: Scilicet, Vitellina, Porracea, Æruginosa, Cærulea, Glasæa, & tandem Atra; quarum causis, & effectibus plenæ sunt antiquorum paginæ. Varia hæc coloratæ

*Vitellina.
Porracea.*

*Æruginosa.
Cærulea.
Glasæa.
Nigra.*

bilis

bilis genera vel per intimam ejusdem fluidi alterationem producuntur, vel per solam ejusdem humoris miscellam cum aliis. Morbosas coloris mutationes in bile ex intima innovatione, ab acido quodam intricabili in ea plus, minusve redundante; sicuti vividius coloris naturalis stabilimentum, ab alkalici volatilis solubilis præpollentia, deducunt recentiores omnes. Et reverà ex *Georg. Baglivi* experimentis; Bilis bubula cum aqua cinnamomi immixta, elegantioris flavedinis speciem induit; cum spiritu sal. armoniac. colorem præ se fert elegantissimum, ad instar rubini undiquè clarum: Fusca Bilis spiritui c. c. maritata, flavum statim assumit opulenter clarum. Cum spiritu nitri confusa, aut cum spiritu salis acidi vulgaris, aut cum aceto, colorem illicò ordinarium permutat in vitellinum; hinc in viridem: Cum aqua fortis bullæ mox in ea viridescences, cum tela veluti cærulea natante. Bilis humana spiritui vitrioli sociata, ærugineum acquirit colorem, & ferè ad atramentum accedentem: Nigra autem bilis, effusâ aquâ cinnamomi, suam statim recuperat flavedinem. Memoratas in homine fellei coloris Phases ex intensiori plus, minusve super hoc liquidum caloris animalis actione, seu graduâli torrefactione, roridiorisque absorptione inferre possumus. Et reverà ex *Willisii* relatu; flava bilis ex cysti sua exempta, ac cucurbitæ indita, si leni M. B. calori exponatur, brevi virescit, at postea instar atramenti nigerrima apparet. A succorum autem delinquentium commixtione, absquè vitio ullo proprio, depravatur interdum bilis in colore naturali suo. Sic sæpè vitellina occurrit; ovi scilicet vitellum crassitie, & colore saturationibus refferens, cum crassæ, ustæque puitæ eidem permiscentur: Porracea; seu succi è foliis porrorum extracti colorem æmulans; Cum aqueo nimis, crudo, aut acri, ex alimentis scilicet aqueis, crudis, aut acribus, chilo deciduo, sicque à lactiferorum osculatione prohibito, bilis in intestinum confunditur; ex quo, albescentium, flavorumque liquorum, per alvum simul evacuabilium amalgamate, viridis perhibetur tinctura; non secus ac Pictores viridem compositionem construunt, cerussam miscendo cum croceo colore, [*Italicè*) *Gialdoline*. Æruginea, seu æruginis colorem præ se ferens:

rens: Cærulea, seu cæli colorem ostendens: Glætea, seu Isatides, herbæ isatidis, seu glæsti tincturam ducens, cum, aut è ductu suo in cavum intestinorum effusa, acidum, & silvestrem succum pancreaticum imbibit; aut succis stomachalibus, & intestinalibus variè inquinatis confunditur. Atra tandem, & fuliginis colorem exhibens, cum in ventriculo, aut intestinis extravasato sanguini, ac per aliquot temporis commorato, commisceri aliquantisper contigerit, hancque illam esse famigeratam priscis sæculis atrabilem intestinalem, autumat *Glissonius*. Multò mitiores sunt, & longè minùs animali infestæ, coloris vitii species in bile, quæ ab humorum peccantium connubio, quàm quæ ab intimo, proprioque ipsiusmet bilis crimine, consurgunt.

§. VII.

Febres biliosæ.

Ut capiti colophonem addam; quærendum restat, ex quam vitiatæ biliosæ qualitatis specie procedant febres illæ, quas nuncupant communiter biliosas Clinici. Non omnia recrementa sanguinis, febris ignitabulum esse possunt, etiam à sedibus suis retropulsa in sanguinem: Illa solùm; quæ in promptuariis suis compagem invertunt ordinariam suam; hacque dispositione ad cruoris alveum remeantia, insurgunt in rei exoticæ naturam, seu in fermentum propriè febrile. Sic bilis in icteritia (*de qua inferius*) ab Hepaticis incerniculis pergrandi licèt apparatu in sanguinem retroversa, febrilem tamen tumultum in eo ordinariò non concitat; quia nempe nullam subiit in vasis suis texturæ immutationem; qua tamen aliquando adepta, febres etiam secum vehit: Sic sæpè ictericos per se febricitare videmus in praxi. Variis modis in receptaculis collecta suis bilis ad crasim variari potest; vel scilicèt cum longiore, quàm par sit, in eis mora protracta, ultrà exigentiam fermentatur; Sicque adustior, viscidior, acriorque facta, ac sanguini hac indole reaffusa, febrem afferre potest: Ut cum post longam ab alimentis abstinentiam febris accenditur. Vel cum humido cicurante suo notabiliter absumpto, salia sua propiorem attractum, sicque mordaciorem aculeum, ac seditiosam acquirunt prævalentiam; ut indè sanguini tradita, eum projiciant in febrem: Ut cum per labores immodicos, per alimenta calidiora, appro-

approperant febres ; præcipuè autem per intensam tempestatis caliditatem ; ita ut febres ferè omnes æstivæ ab alterato hoc ritu recremento bilioso ortum ducant. Vel tandem cùm profluens in intestinum innocuabilis , à viscerum primarum cachochilia conspurcatur ; & sic ab homogeneitate sua immutata , in impuras effervescentias cogitur , quæ indè delinquentiæ , per succos nutritios etiam ad sanguinem delatæ , febrì excitandæ sufficiunt. Ut in febribus variis à primarum viarum inordinationibus , exortis.

§. VII.

Legitimè in febribus biliosis secundi generis , duplicem bilem , *Duplex bilis genus in febribus variis.* crassam unam , tenuem alteram , utrasque ut febrium scatebras , criminantur Practici. Ex bile siquidem in cysti , ductibusque aliis suis inspissata , per potentias *in prima operis parte* expositas , exprimitur faciliùs quod est in ea tenuissimum , & facilè fluxile , ac tanquàm bilis spiritus , quodque propter efferam mobilitatem suam , rapidumque operandi modum , non minùs aptum est attingendo sanguini , quàm in eodem attracto excandescentiis suscitandis ; dùm crassius residuum , & tanquàm prædicti sedimentum , sensim à succis circueuntibus & per partes concussum , exaltatum , ac dilutum , novas ei suppetias suo tempore exprimendas præparare poterit. Sic febres hujusmodi biliosæ , sunt communiter periodicæ ; distinctosque trahunt accessum , invalescentiam , remissionem. Aperit accessum bilis prædicta in intestinum exundans è foco suo ; ex cujus irritatione ad tunicas nerveas , concussio universalis , seu tremor : Hinc obvia sunt sæpè febrium harumce principia , repentinis , violentisque evacuationibus biliosi humoris per alvum , & vomitum , rigore statim succedente , obsignata. Invalescentiam producit ejusdem liquidi salivalibus jam succis , nutritiis , aliisve in intestino immixti , per eorum vias introductio in sanguinem , effervescentia , & deflagratio : Nec per hanc viam deferri potest in venas , nisi quid summè tenue ; & de factò vidimus *in prima parte* , bilem in consistentia sua naturaliter constitutam , seu in tantam subtilitatem non redactam , quanta est in bile hujusmodi febrili , per vias hæc nutritias trajici nunquàm posse. Declinatio tandem expletur à suscepta

per nifum sanguinis ejusdem bilioli laticis defpumatione, feu projectione; vel foràs omninò, per transpirationem denfiozem, sudorem, ptialifmum, diarrhoeam, aut evacuationem manifeflam aliam; vel foràs folùm ex eodem fanguine, non è corpore; per deponitionem nempe in fodinam rursùs fuam, aut in vifceris alteriùs fundum. Sitis indomita, & amaror oris; linguæ flavedo, & fordities; anxietas, & defectus cordis; sæpè cardialgia, flatus, dolores ventris, boborigmi, aliaque symptomata hafce febres comitantia, petenda veniunt à portione aliqua bilis craffioris, per ductus fuos & unà cum tenuiori, ex Hepate in inteflinum decidente, & ventriculum; quam fpiffitudo ab ulteriori itinere impediens, tunicis in hac fiflula, plicifque implicat; exoticè irritabilem facit, putridè fermentantem, halituumque rancidorum, & exficcantium fcatetram. Integre intermittens eft biliofa febris; cum antè novam è promptuariò transmissionem fiventis fucci in fanguinem, jam integre excuffus fuit ab ejusdem finu, qui priùs tranfmiffus: Continua, & remittens folùm, cum ante totalem ablegationem priftini, jam novus ad febris recrudefcentiam fupeditatur: Has ideò febres continuas per fubintrantiam vocamus, feu radicaliter intermittentes. Autumnales febres ordinarię, hoc biliofarum genus adimplent, ex craffefacta fcilicèt per calores æftatis bile in colatorio fuo, factaque fic fodinis febrium producendis idonea. Æftivas febres ex bile etiam prognatas, fuperiùs vidimus. Hyemales veniunt communiter ex limphatica, feu puitofa exorbitantia, à comperenti transpiratione impedita, ficque lentoribus per partes ineundis variis difpofita, nunc frigidis, ex propria natura, nunc calidis, ex remoratione inflammatoria fanguinis à vaforum preffura, utrifque ut plurimùm febriviam pandentibus. Vernæ tandem febres produci ut plurimùm folent ab humore cujufcunque naturæ, qui per hyemem in latibulis fepultus, & orians, ab æthere novo excitatus, colatorium fecernendæ fubftantiæ fuæ conformem non ftatim invenit; hinc quoufque reftitat in fanguine, eundem irritat immifcibilitate fua ad indignationem febrilem. Ex his, quæ de febribus non tantùm biliofis, quam tempeftatis cujufcunque domesticis cafu ratiocinati fuimus,

fuius, colligi potest, febres non solum continuas plurimas, sed de genere intermittentium penè omnes, culpæ bilis impurandas esse; quæ nempè vel immediate ex colatorio suo sanguini ibidem perambulanti comunicetur, ad febres varias continuas producendas, vel in intestinum descendens, ibidemque succis nutritiis novis, aut saltem salivalibus illinc perpetuò ad sanguinem recirculantibus immixta & subtiliata, per vias lactiferas deferatur ad alveum liquidorum generalem, pro febrium intermittentium origine.

§. IX.

Patet itaque meditati, toties à bile causari febres posse, quoties eadem deflectet à statu naturali in qualitatibus suis, vel in tactili, vel in sapido, vel in colorato, sejunctim, aut simul: Imò non solum variarum extensionum febres, acutas, chronicas, continuas, intermittentes; sed & sitim, macies, marasmos, inapetentias, vultus pallores, hypochondriorum calores, & tensiones, alvos nunc lubricas, nunc adstrictas, borborigmos, colicas, obstructions, icteros, choleras, aliosque innumeros, violentos, aut lentiores, in primis viis, in visceribus, in sanguine, in habitu corporis, affectus, partim hoc, aliisque capitibus expositos, partim ad tædium evitandum, omittendos.

CAP. X.

Morbi à secretione Hepatis ad alia etiam organa translata.

§. I.

Bilem in statu vitato per alia ulteriùs colatoria, præter Hepar, secretam à sanguine, frequens autopsia docet. Duplex est in animali secretio liquidorum in genere; (ut videbamus superiùs in prima parte hujus operis) Alia scilicet, quæ media porositate organica, seu per glandulas, ut dicitur, & propria colatoria perficitur; alia quæ per solam porositatem inorganicam, seu simplicem per quascunque partes transudationem. Liquidum

biliosum ordinarium licet naturaliter in solis glandulis, eisque hepaticis secernatur; morbosè tamen, & à crassi sua variatum, non tantum per partes alias glandulosas, ultra Hepar, transcolationem acceptare potest, sed per alias ulteriùs non glandulosas. Hinc in hoc capite secretionem Hepatis ad alia sepe organa, præter hepar, translata, ista duplicitate potitam insequemur; eam primò attingendo, quæ in organis inconfuetis quidem, sed glandulosis, celebratur; secundò eam, quæ in partibus substantiâ glandulosâ non præditis accedit; In utrisque locis bilem animadvertemus, vel otiosè subsistentem, vel ulteriùs derivatam.

§. II.

Bilis secretio translata ad alia organa glandulosa.
Bilis secretio in glandulis salivariis.

Secretio biliosa ad glandulas alias, præter Hepaticas, translata, totuplex esse potest, quot sunt in nobis colatoria liquorum. Et reverâ in secretoriis singulis animalis glandulis transcolari bilem conspicimus variis in casibus; frequentius autem in glandulis salivaribus, urinariis, cutaneis. In incerniculis salivalibus bilis interdum trajicitur, cum aliqua ejusdem pars per causas varias discerpta à tenacitate sua, solutâ in molecularum corpulentia, & liquefcens, motum, & consistentiam induit, affines consistentiæ, & motui seri recrementitii utilioris; sic, ut ejusdem fluore, & implexu perfuens, per philtrum tranetur & suum: Eoque magis ad claustra hæc insolita sublimatur, quò liberiori forsàn acredine sua, eadem ampliùs grandefacit. In hoc casu salivam conspurcat connubio suo, aptamque facit ad linguam molestis amaroribus flagellandam. Sic amaritiem oris ex intima bilis præsentia in saliva frequenter exoriri, non semper ab amaris halitibus, sursum evolantibus è stomacho, ut placet *Sylvianis* quibusdam, patet, ex eo quòd sapida hæc linguæ, fauciumque affectio non tollitur communiter à remediis abstergentibus bilem à stomacho, eamque diluentibus; ut in febribus æstivis, autumnalibus, aliisque occasionibus observamus. Inter numerosas glandularum salivarium myriades, per glandulas faucium in specie familiarior est præpostera bilis secretio hujusmodi. Hæ etenim glandule magis, supra ceteras, aptantur bilis crassitie admittendæ; eò quòd tum amplioribus super alias, ditentur tubulis secretoriis; per quos corpulentior

tior derivatur illa, tenaciorque saliva, quæ in excreatûs formam projicitur; tùm amplioribus, & excretoriis; qui ideò, mediam earum substantiam pertundentes, satis visibiles sunt, nudoque oculo manifesti. Elucescit assertum ex eo quòd in variis amaroribus oris, vividior sentiatur ad fauces hujus sapidi molestia, & tanquàm primaria sedes; adeò ut non nisi gargarismatibus, aliisque oris abluviis ad glandulas hasce fauciales applicatis, bilemque ibidem infixam diluentibus, & edulcorantibus, sublevemus affectum. Copiosa adeò bilis salivæ interdùm committitur, ut non tantùm gustum molestè pungat, sed insuper salivam ipsam, appositæque corpora domestico intingat colore suo, fauces, labia, linguam, lina &c. ut non rarò videmus ad ægrorum lectulos.

§. III.

Nec minori frequentia per urinæ vias elutriatur bilis copiosa quantitas, in variis Hepatis, aliorumque viscerum morbis; adeò ut ejusdem moleculis exuberanter imbibitum excrementum hoc sanguinis, saturatissimum præ se ferat colorem croceum, lintea, imò & matulas tincturâ suâ pingentem. Vidimus aliquando in icterico urinam colore, crassitie, turbiditate, oleositate, opacitate, aliisque modis bilis consistentiam, & formam omnimodè æmulari, totamque sinceræ bilis personam referre: Et forsan eadem quoque sapiditate præditam invenissemus, si fædis hisce observationibus daretur immisceri. Eligit bilis semitam cum urina per renes; quando in sanguine exuberat, & ob philti sui impedimentum aliquod, completis in eo excretionibus est impar; Crassam interim, ustamque habitudinem trahens, faciliorem ideò cum fero sanguinis crassiori, & inutili, seu urinoso, quàm cum salivali, aut alio, congenieitatem, miscellam, & secretionem ducit. Nec difficile est notabilem bilis portionem per urinas perfluere in morbis; ubi in statu naturali aliqualis quotidie fluit ejusdem portio, undè urinæ citrinus color ordinarius, & viscidula compositio: *Ut vidimus alia operis parte.*

§. IV.

Imò & minutiorum etiam glandularum cutis, hospes interdum accedit Bilis, sudorem indè flavum obvia omnia intingentem produ-
Secretio Bilis in glandulis Cutaneis.

Et in cæteris aliis.

ducens, cùm in massa communi competenter adeò attenuata fuit, ut gracillimas hasce vias superare possit, & per eas erumpere. Curiosa est super hanc rem relatio *I. B. Tavernierii*, celebris Itineratoris Galli. Affert iste *lib. suo de itinere apud Persas*, hosce populos longa aliquali viscerum indispositione detentos, verno tempore decoctionem radicis chinæ recentis copiosè epotare; hinc ad lectum compositos, & densius coopertos, uberrimis sudoribus perfundi; sudoremque adeò flavedinis participem esse, ut non tantum pannos appositos hoc colore intensè commaculet, & lintea; sed ex evolantibus ejus effluviis, ipsimet conclavis parietes, & tabulata saturatè pariter flavescant. In cæteris colatoriis omnibus secerni etiam potest liquidum biliosum, indigenisque succis commixtum, varias inde affectiones producere; ut in glandulis pancreaticis, intestinalibus, bronchialibus &c. quarum secretionum exempla brevitatis favore prætereo.

§. V.

Bilis secretio translata ad alia organa non glandulosa.

Secretio bilis in organis non glandulosis; ubiquè per totum corpus exequi potest; pro ut in omnes corporis partes, à vasorum osculis, aut porulis, seu (ut loquar cum antiquis) per anastomosim, aut diapedesim, extillans, aut transudans hoc liquidum, effluere potis est, & colligi. Quid enim est, liquidum illud secretum è sanguine, quod in partem aliquam laxitate, & atoniâ prehensam transcolans, vel grandioribus ibidem congestionibus, eisque folliculatis comprehenditur, vel minutioribus, seu pustulis, *ut dicunt*, vel absquè stabili congestionem, aut folliculo per interstitia fibrarum exundat, flavissimum cæterum, & lentum; nisi perversus humor è massa deciduus, competenti etiam bilis copia saturatus? Nil certè flavescit in sanguine, quàm bilis. Flavæ hujus generis pustulæ, & maculæ observabiles veniunt in partibus quibuscunque corporis, præcipuè cutaneis; easque ideò à defixa in eis biliosi humoris portione, Hepaticas nominant doctiores Practici, à mala scilicet Hepatis secretionem adnatas. Vide de eis aliqua apud tom. I. famigeratissimæ *Biblioth. Practic.* tot de titulis gloriosi *Ioh. Iac. Mangeti* Aspredines quædam, & nigrities in facie, ab adusta, per insolatum, inflammationem, aut quam-

quamcunque aliam causam bile, ephelides vocantur. Præcipue autem ob canalium contexitum diæresim, colliguntur in partibus flavescentes à bile humores. Sic in variis animalis regionibus, aut ulcere, aut vulnere exesis fulvi sæpè perfluunt ichores; à bilis scilicet consortio colorem mutuantes suum: nec ad consolidationem restaurantur laceratæ hæ partes, nisi cum disparentibus succis hisce destruentibus bilioso-acribus, purus nutritius accedit; Cujus ballamica glutinositas dissolutum recolligit, & nectit; cujusque temporaneum ex hiatu partis effluxum puris generationem sat insulsè noncupamus. Frequentior autem, & notabilior in partibus non glandulosis biliosi humoris translatio, icterus est, seu Arquatus; quem, ut apud Authores quò ad ejus naturam hucusquè obnubilum, herculeumque ceterum inter biliosos errores morbum; attentius hic eventilandum propono. *Icterus.*

§. VI.

Quoniam, biliosæ particulæ sensim à sanguine expediuntur per portam (*ut in prima operis parte demonstravimus*) aded ut ad vasorum Hepatis concursus, seu secretoria ejusdem visceris medullia appellentes, jam sint omninò sejunctæ à complexu sanguinis; sicque congruum earum crassitie canali excretorium subeant; dum per attiguum alium fluidiori consistentiâ præditus derivatur sanguis; quotiescunque ad biliferi emissarii exordium, aut progressum, quoddam aderit obstruens, aut aliter offerciens libertatem canalis, impeditæ istæ à traiectione sua, in sanguinis massam retroverti debebunt, ac reaffundi. Sed cum liquidi recrementitii partes, spontè jam, seu vi naturali, ab intimo sanguinis nexu extricatæ, & sejunctæ, tamquam à vita communi emancipatæ, non remisceantur amplius eodem ordine, situ, distributione; uno verbo, eandem cum eo non amplius unionem repetant; ideò, refluunt quidem in sanguinem biliosa hæc corpora; sed sanguini immixta, erunt eidem ut separata: Hoc est non cohærebunt cum partibus sanguinis, ut coherebant priùs; sed neque deducta extra spatium, intrà quod, & partes sanguinis, & partes bilis non cohærentes cum sanguine continebantur, & continentur (*ut verbis utar Bellinianis. De motu bilis proposit. 30.*) Quamobrem,

*Icterus ab
obstructione
Hepatis.*

*Icterus ab
Hepatis vi-
tio alius est
essentialis,
alius acci-
dentalis.*

brem, ut quid onerosum in massa, & improprium, eique tanquam supernatans, foras ab eadem ejicientur per alias animalis partes. Quod si per colatorium aliud non fiat ejectio, sed per partium tum internarum, tum externarum membranas, eisque affixus hic liquor, flavedinem impertiatur suam; jam veniet Icterus. Fæces igitur albescunt in hoc morbo à subtracto bilis cursu per intestina: Croceo è converso, & prasleo colore intensissimo urina prætingitur; quia nil sero sanguinis partes omnes abluenti facilius, quam sua per easdem trajectione, quamplurimas affixas ibidem biliosas particulas sorbere, easque secum per urinæ tramites rapere. Ex dictis, duplicem ab Hepatis impedimento Icterum distinguimus. Primus est, cum in ipsa-met glandulæ Hepaticæ substantia, seu ductuum biliariorum principio obstruens inhæret causa, viamque bili præcludens; sit jam ipsiusmet bilis viscidius quoddam, cretaceum, strictiusque concretum (ut est communius) sit succus quiscunque alius ab erratis in victus genere, aut animi affectu inspissatus, ibidemque notas gerens degenerationis suæ; sit scirrhusa induratio &c. dummodò bilis ultimam secretionem non passa reflectatur in sanguinem, indeque ad membranas partium. Alter, cum ad ductuum biliosorum progressus impedimentum jacet; adeò ut, licet libera sint penitus biliosa incernicula, præclusis tamen, vel trunco, vel ramis sensibilibus ductus Hepatici, vel felleo folliculo, vel utrisque, vel omnibus, secreta jam bilis impar derivationibus ad intestina, regurgitet necessariò in sanguinem, ad ciendum Icterum: Sit jam impediens materia, calculus, mucus, aliave attigua, aut impacta. Ut ideò hanc duplicitem animadvertamus, primam icteritiæ speciem, essentialem voco, alteram, accidentalem. Cæterum, non in omni obstructione Hepatis Icterus pullulat; quia nec omnis obstructio Hepatis in intimis ejus glandularum meatibus exequitur, ut vidimus cap. 5. Nec omnis in sanguinem retroversa bilis, partium velamentis affigitur; sed sæpè per alia cribra exantlatur, ut vidimus superius.

§. VII.

Et quoniam secretorii Jecoris meatus limitatæ capacitatis, & actionis

actionis existunt; sic data in sanguine causa, quæ biliosas substan-
 tias, vel copiosius, quàm in statu naturali, producat, & accumu-
 let, vel jam præexistentes uberius extricet à cæteris principiis,
 & colligat; redundans hæc copia non tota sæpè excerni poterit
 per canales prædictos, licet debitè patulos; sed tanta solùm, quæ
 eorum alveis proportionalis fuerit: reliqua restitabit in sanguine;
 huicque, quia incongruæ, nec ampliùs miscibili, ut suprà, id-
 circò continget per alias partes effundi, per quas foràs indè de-
 rivetur à corpore, si nempe erunt glandulosæ; vel irretiatur so-
 lùm, earumque oculis affigatur, ut sic Icterus producat, si non
 glandulosæ. Et ecce alterius generis Arquatus; quem ideò pro-
 creant sæpissimè febres ardentes, inflammatoriæ, aliæque notabi-
 les; non minùs, ac potuum generosorum immoderationes, ira,
 labores nimii, solis, aut tempestatis æstus; quia largissimam ex-
 plicant in sanguine retorrideri, solutique sulphuris mercem, non
 omnem per philtrea Hepatica, aut alia insuper, transcolabilem,
 ideòque per vasorum terminos in extimas partium oras, seu tu-
 nicas eructatam, & per eas palantem factam. Sic à venenis ali-
 qualibus, ut ab aconito, arsenico, bufonum inquinamento; à
 morfu viperæ, araneorum, canis rabidi &c. accedit non rarò
 icteritia, prò ut rarefcibile vel ingestum, vel inflictum virus, par-
 tes sanguinis omnes expandens, & dissocians, uberrimas & bilis,
 ultrà consuetum, copias icteritiæ procreandæ non impares effor-
 mat citò, & exsolvit ab aliarum amplexibus. Icterus vehemen-
 tes consequens dolores spasmodicos, aut atrociorē colicam,
 ab exorbitanti etiam extricatione bilis à sanguine, ob concussio-
 num nervosarum violentias, auspicandus venit. Uno verbo: Ictc-
 rus alius est à vitio visceris, alius à vitio sanguinis.

§. VIII.

Et hæc sunt duo primaria Icteri genera, quibus omnes cujus-
 cunque originis Auriginosi affectus referri possunt. Primæ classis
 Icterus, seu à vitio Hepatis, limosam ordinariò, & inertem par-
 tibus inspergit bilem, quæ scilicet eandem refert conditionem
 bilis, quæ primos in Hepate infarctus condidit. Sic plerumque
 symptomaticus est Arquatus hujusmodi, & chronicus; aliosque

*Icterus à fe-
 bribus ar-
 dentibus, in-
 flammato-
 riis, aliisque.
 A potu ge-
 nero ori,
 Ira, labori-
 bus, æstu &c.
 A venenis
 introsump-
 tis.*

*A morfu vi-
 pera, ara-
 nearum,
 Canis rabi-
 di &c.
 A dolore
 spasmodico:
 à colica.*

*Duo summa
 Icteri gene-
 ra.*

*Icterus pri-
 mi generis.*

Icterus secundæ generis.

Icteri nigri: Virides: Aliique agnati.

in choream ducit ordinariò graviores morbos: Ipsa Icteri species est, ex qua frequenter phthisim pulmonicam accedere, in hydropeim indè fatalem communiter terminantem, observat expertissimus *Morton*. Deobstruentibus, & catharticis curari debet; & melius forsan, secundum methodum Hollandicam, diaphoreticis. Alterius speciei Icteritia, seu à causa solutiva sanguinis, bilem gestat subtilem, volatilem, & ut ait *Sylvius de le Boë* spiritualisatam; ideòque quaquaversum in corpore permeabilem: Qua de re in hoc Icteri genere non albescunt excrementa, ut in priori, sed potius intensius flavescunt; tum multò citior est hujus secundæ icteritiæ, supra antecedentem, productio: Vidimus etenim à febre primo statim die exortam, à morfu viperæ, post quatuor horas. Critica ordinariò est affectio, ut patet, morbosque præcedaneos sublevat; Ideò mox spontè sua evanescens, remediis nullimodè est oppugnanda. Icterus cæterum niger, est flavus ipsemet intensior, seu bilis viscidioris restagnatio in partium velamentis: Quòd & de viridi dicendum, aliisque agnatis Icteri speciebus; quas omnes primæ speciei icteritiis adnumero. Favet problemati meo de icteri speciebus, divisio ejusdem morbi, apud spectabilem inter Romanos Archiatros I. *Sinibaldum animadvers. pract.* in sulphureum, & salinum. Primum, ab excessu sulphuris retorridi bilem integrantis denominare vult Vir in æternum Colendus; Alterum, ab eminentia salis sui lixiviosi. Sulphureum, visciditate donari, & obtusitate autumat, ac ab Hepatis infarctu originem trahere; Salinum, tenuitatem ducere, & acredinem, eumque non alvi constipationem, ut prior, afferre, sed potius ex irritatione diarrhœas, & rigores. Icteri pertinaces; vel sanati, & recidivantes, à calculo vesicæ felleæ progeniti suspiciendi. Quod si ita est, incurabiles prædicito. In ictero à bilis Copia, tenuitate, & acredine, sæpe loco sanguinis è naribus, aut è cucurbitulis scarificatis, aquam flavam solummodo prodire, observamus in praxi. Sed nimia jam de solo morbo prolixitas in simplici relatu.

§. I X.

Secretionem bilariam, ad alia etiam organa non glandulosa translata,

translatam, luculentius confirmant communicatæ Eruditissimi D. Paterii nostri observationes novissime. Refert nobis Vir amicissimus, ad hanc februarii, & martii fluentis anni 1718. Epidemiam pleuriticam, & pleuropneumonicam, in tribus subjectis eodem affectu correptis, bilem per sputa pulmonica copiosissimè, & cum euporia rejectam, non minùs sapore, quàm colore genium suum individuum, retegente.

CAP. XI.

Morbi Hepatis à Corpore extraneo.

§. I.

QUædam obveniunt in homine morborum effectus, aut causæ, quæ vel ejus solido, fluidove vitiatis imputanda non sunt; vel licet ab alterutrius, aut utriusque erroribus producta, peculiaribus tamen eorundem affectionibus adstringi propriè nequeunt. Sunt hujus farinae res; Calculi, Vermes, Flatus, Polypi; Quorum genus (inquam) nec ad humorum, nec ad partium morbos legitimè pertinet. Quamobrem hæc eadem, pro ut in Hepate sæpè occurrentia, ad complementum tractatus descripturi, congruum duximus in peculiari Capite aggerere, & Corpora extranea nuncupare; non minùs, ac productas ab eisdem affectiones, morbos à corpore extraneo.

§. II.

Crebrò observabiles sunt calculi in Hepate; qui duplicis generis audiunt: Alii, qui in solidum, densumque Corpus concreti, verum æmulantur lapidem, aut tophum: Alii, qui lapidis laminam, seu tanquàm crustam fistulæ lapideam, aut ultimò solidescendentem obtensam tunicam præ se ferunt. Primi, bilis folliculum ordinariò inhabitant; non semel propriam Hepatis substantiam: Alteri excernentium solùm ductuum, seu biliferorum alveos circumsepunt: Utrique ex biliosis particulis in durum con-
Calculi Hepatis; huiusmodi duplicis generis.
 crescentibus, & tanquàm vitrificatis, exoriuntur. Et equidè,
Aa 2 quodd

quòd liquidi biliosi substantiæ salino-muriaticæ, viscidoque sulphuræ, abreptæ à circuitus motu, & discerptæ, gravitati suæ, mutæque implicationis instinctui auscultare nequeant; non miror: Quòd in ductus Hepaticos depositæ, ibidemque lentissimè progredientes, vel derivatæ in folliculum suum, sicque quiescentes omninò, nisu gravitatis naturali subsideant, ductæque subsidentiae uniformitate strictissimos occursum ineant; facillimè concipio: Quòd inde specialiori quadam salis, & visceri conditione præditæ, in veræ soliditatis amplexus concreescere possint, ac tanquàm Crystallari; & pro re facili teneo. Cogita etenim mucaginem acido-argillosam ex diathesi primarum digestionum conciliatam bili, salino-acria ejusdem principia invicem coadunare, & adducere; hæcque eâ ditari figurâ, ut se se invicem possint per planas grandiores facies tangere, minimis inter se se restituantibus intervallis; clarè hinc lapideæ corporaturæ genesim percipies. Biliares calculi ex eminentia principii sulphurei, levis, & concremabilis, aquis projecti supernatant; igni traditi comburuntur; ex observatione *Bidloana*; cui quoque principio referendus est calculorum hujusmodi saturator communiter color. Cæterùm de primi generis calculis, seu subrotundis, & solidis, tum in jecoris acinis, intimæque substantiâ, tum in cystis cavitate repositis innumeræ leguntur ex Practicis observationes, non tam quòd ad eorum numerum, quàm magnitudinem, figuram, texturamque variantes; quas ideò piget recanere. Mortes aliquando subitæ visæ sunt ex assidentia in Hepate lapidum horumce pergrandium. A calculis, seu tophis in cysti degentibus oriri frequenter Icteros, Psoras, universales Pustulas, & Tubercula, aliasve habitus corporis defædationes; tum Epilepsias, Hæcticas, Marasmos, ignotosque morbos, quotidiana est Medicorum meditatio, & Inspectio. Calculi alterius generis, seu crustæ calculosæ Hepaticos ductus offercientes, rarò observabiles sunt in hominibus, frequentius autem in bobus, in quibus ad modum tubulorum excavati, per ramorum biliferorum progressus continuatâ serie propagantur, coralliorum brachiola æmulantes: Nec tamen solitis bilis effluxibus obstant. Fragmina calculorum hujusmodi notabilia,

bilis, in compluribus per intestina, medio choledocho, indèque per alvum deturbata vidisse, tradit *Glissonius*; cujus honorificam mentionem, tamquam Viri, super alios omnes, de re hepatica optimè meriti, libenter in hoc opere multiplico.

§. III.

Liceat hîc, ad novæ hujusmodi editionis ubertatem, aliquot de calculis bilariis, tum cysticis, tum hepaticis obiter historiolas subnectere. Anno elapso D. Comitissa D. . . . Ictero forti afficiebatur periodico, singulis nempe mensibus per dies 12. aut 15. recurrente. Gliscebat suspicio calculi, in cysti fellea latentis. Nec opinio fefellerat. Calculum bilarium, ultra juglandis magnitudinem, & figuræ ad triangularem accedentis, nobilis fœmina tandem excernebat. Eo excreto, evanescebat icterus, quem indè passa ampliùs matrona non est, usque ad hos dies novissimos integrè restituta. Calculi autem excretio fortuita, & plena discriminis fuit. Nempe 28. dierum Puerpera, Cathartico quodam fortiori per cujusdam consilium usurpato, non solum accerrimum hypercatharseos stimulum patiebatur, sed tantas insuper sus, deque per viscera omnia naturalia crispaturas, & nifus embolicos; ut tandem, inter tormina, & premitus, Calculum hujusmodi cum mille humoribus excerneret. Hoc accidens per accidens faustum, semovendo assidentiam calculi, cuicunque alii remedio rebellem futuram, incurabilem forsan in dies morbum momento obtruncabat.

§. IV.

Benemeritus insigniter de Medica Universitate, per tot edita opera, Amicissimus insuper D. *Rosinus Lentilius* Archiater Wurtembergicus, ad epistolam nobis Parisiis per elapsam biennium transmissam hæc addit. *Tumor aliquando hypochondrii, seu epigastrii potius dextri, curandus oblatus fuit, cum icteritio colore. Frustra tentatis pluribus, exhibui infusum ex hepaticis deobstruentibus cum purgantibus mixtum: Excreti sunt plusquam trecenti per alvum calculi, ex rubro flavescentes: Aliqui Cardamomi quantitatem aquantes, alii minores. Detumuit Epigastrium, & ager convaleuit. Calculos autem de vesica fellis prodisse nullus debito. Ejusmodi calculorum in Saxonia*

multos vidi, è bubulo felle primo vere protractos, quibus intus feliciter utuntur ad pellendam auriginem, foris autem naribus attractus sternutare facit. Obtigerunt mihi non semel nephritici, qui quamdiu ictero laborarent, tamdiu calculi dolores cessabant; ictero desinente iidem recrudescebant, reciprocis, ac alternantibus semper his affectibus. Successit denique in horum aliquo, licet aliquot post annis, cachexia, quam excepit ascites lethalis.

§. V.

Calculi biliares tanto numero excreti, & ab experientissimo *Lentilio* æquali circiter minuscule magnitudine circumscriptos, sedes suas figere forsan potuerunt, non tantum in cysti fellea, quam etiam per hepaticum ductum, & melius per poros altiores bilarios, ubi molis rotunditatem, & parvitatem assumpserint; instar calculorum in eisdem fistulis nidulantium, à cl. *Reverhorstio* observatorum. Refert etenim hic author *Batavus* in dissertatione *de motu bilis circulari, ejusque morbis*, non tantum in tribus subjectis calculos cysticos vidisse, liquidi à folliculo comprehensi distributionem plus, minus intercipientes, sed ulterius calculos propriè hepaticos versicoloris substantiæ, cinereæ, albicantis, aut nigræ, calculorum vesicæ in modum, durioris, & solidæ, majores ductuum biliariorum ramos arctè obsidentes; eosque in stationibus suis tamquam in varices dilatantes: Hæcque omnia nitidis figuris exponit.

§. VI.

Hæc insuper habeo ex *Jatromnematibus* ejusdem cl., & toties laudati *Ros. Lentilii*, & ex appendicibus anni 5. & 6. ephemer. germ: *Nordlingæ* mulier quadam septuaginta, & aliquot annorum, ex abscessu lateris dexteri calculos ex rufo flavescentes ultra centum, & plures, pisi, aut circiter quantitate cum pure excrevit, quæ hydro-pica denique expiravit. Abscessus autem fuit hepatis; & calculi, folliculi fellis. Ex *Benivenio* de abditis sic habetur. Decessit his diebus mulier nobilis, dolore prostrata calculi. Sed cum nullum antea ex eo percepisset nocumentum, visum est medicis mortuæ cadaver incidere. Et reperti sunt lapides quamplurimi, non quidem ullus in vesica, ut putabatur, sed præter unum, qui in tunica bursula fellis coloris atrii, & ma-

& magnitudine castanea arida continebatur, ceteri omnes in panniculo, quo contegitur hepatis; unde etiam, veluti in folliculo penduli, sacculum effecerant.

§. VII.

Sequentem casum praxis nostra administrat. Mulier quatuor ab hinc annis ischuriâ prehendebatur per plures dies: Eâdem solutâ, in habitum ictericum, & cachecticum decidebat, cum urina copiosa, sed incessanter pallida, tenuissima, & aquea. Ab excretionem calculi, pisi magnitudinem æquantis urina coloratio reddita; icterus, & prætumida constitutio, aliquantulum sublevata. Mox in integrum recrudescencia, cum urina pallidissima, & merè aquosa. Frequentes inde, & subitanæ ad pectus metasthases, cum sputo sanguinis: Quæ tamen à missione sanguinis statim celebrata aut repetita, sæliciter remittebant. Mulier hisce diebus ex novo ad pulmones decubitu, per phlebotomiam opportunè non revulso, derepente è vivis sublata est. In cadavere non tantum calculos reperiēbamus renales, sed & cysticos quamplurimos, & hepaticos, figurâ, mole, pondere, consistentiâ, & inflammabilitate dissimiles. Adeo verum est, non minorem intercedere consensum inter renales calculos, & hepaticos, quàm inter eandem lithiasim, & podagram; in qua ultima calculi etiam per artus frequenter agglomerantur: Nam, sicuti, gorgonicâ concretione prehensi, renum, aut vesicæ soluti latices, in eorundem cavitatibus lapideas agglomerationes aggerunt; hoc idem à fortiori præstare poterunt, nisi eodem lapidifico perciti, qui per reservatoria hepatica cumulantur, lentiores succi: Ut plena est, & creberrima nostra per praxim observatio,

§. VIII.

Finiamus Hepatis calculosum argumentum observatione *Realdi Columbi*, qui Romæ in ipsa met vena portæ Cadaveris Sancti *Ignatii* tres calculos biliosos invenit; ut habetur ex vita ejusdem sancti: Adeo jam, biliosa corpora, in tophos ulterius concrecibilia, per ipsammet portam arctè coadunata jam sunt, ibidemque ante secretionem hepaticam à toto sanguineo distincta, & secreta; Ut in prima parte hujus Historiæ fusiùs probavimus. Nunc ad vermes hepaticos.

§ IX.

Vermes Hepatis.

Non tantum vermibus insensibilibus scatere naturalia omnia, sed variarum specierum sensibilia hujus naturæ infecta in omnibus animalium, corporisque humani partibus, liquidis, solidisve; in vasis, & extra vasa facile catulire; Hinc ex nidis suis per exitus sæpe varios, per vias intestinales, stomachales, urinarias, etiam sudoriferas; per nasum, per aures, per oculos, per umbilicum, per cutis hiatus morbosos, per alias quascunque naturales, aut præternaturales aperturas foras excerni; longa est omnis ævi Observatorum autoritas. De vermium animalium natura, genesi, generandi modo, nido, speciebus, differentiis, usibus, & proprietatibus, alterius disquisitionis negotium est. Hic solum vermes hepaticos historicè referemus.

§. X.

Pullulat in Hepate Vermium fætura, cum iners est bilis acredo, & vieta; non minus ac in puerorum cavo intestinali frequentes sunt, ob eandem causam, vermium turmæ. Hinc in Cachecticis, Ictericis, & Hydropicis familiarior est hæc Hepatis fæcundatio. *In cysti fellea reperti quandoque sunt lumbrici: At hoc in hydrope sublatorum cadaveribus, quorum nempe biliaris vesicula pituitâ potius, quam bile repleta fuerat, tantum observatum est.* Hæc cl. & famigeratissimus D. Andry, Regius apud Parisienses Professor. Reverà bilis amaror præservativum est fraciditatis succorum intestinalium, undè vermium intestinorum assidentium inordinationes possunt accedere: Ob eandem à putredine præservandi habitudinem, aloe, simplicium amarissimum, est cadaverum balsamum. Sic ob fractam bilis aciem, aut impeditam ejusdem in intestinum viam, scatentium in hac fistula lumbricorum vitia præsidii amaricantibus, bilis analogis, pessundare usus est. Bilis, quæ naturali habitudine sua pollens, vermes intestinorum inquilinos arceat ab affectibus morbois, projicit in eosdem affectus, & fovet, quoties vitiosâ indutâ acredine, eosdem irritet, & succos suos nutritios depravet: ut alio opere exponimus.

§. XI.

Vermes in hominum Hepate ordinarios cucurbitinos esse, quorum

quorum figura soleam æmuletur piscem, testatur *Malpighius*; eamque animalculorum speciem etiam in brutorum jecinore animadvertit, præsertim in bobus; quibus solum morbum hunc specificum esse, non hominibus, malè effantur *Amstelodamenses* apud *Glissonium*. Enim verò Hepatis humani ramos bilarios vermium multitudine confertos observavit *Thomas Cornelius*; copiosissimos in puero per ipsos-met venæ portæ ramos Hepaticos *Emilius Campolongus*: In Hepatis lobulis, seu ipsa-met visceris substantia quamplurimos viderunt *Schenkius*, *Baubinus*, *Montuus*, *Gemma*, Aliique. Grandiorem unum in cadavere puellæ, occupantem choledochi meatum, minorem alterum ad Hepatis tunicam exterius solum adhærentem vidit *Wieri filius*. Quatuor teretes vermes in ipso portæ trunco à se inventos memorat *Spigelius*: idem etiam *Bidloo*: sed introitus, eisdem à *Spigelio* effictus, scilicet per venarum meseraicarum orificia; & aliæ insuper circumstantiæ non minùs graves, polyposa potius ibidem inchoata, & ampliata, hujusmodi corpora evincunt, quàm insecta, & verè viventia, ex intestinis prorepta. Verminosam cæterùm in Hepate colluviem, morbum bobus, aliisque forsan animalibus contagiosum esse, asserunt *Amstelodamenses* prædicti. Curiosum cæteroque est, quod affert toties laudatus *Glissonius*: In ovium scilicet lue serosa affectarum jecinoribus, crebrò tumores contingere, in quorum medio cavitas quædam aquâ referta reperitur, per quam vermiculi lati, rhombi piscis figuram repræsentantes, hospitantur, & innatant. Ex vermibus Hepaticis, ad hujus visceris flatus veniamus.

§. XII.

Crassi ex viscidis fermentantibus succis elevati spiritus, aeri-^{Flatus Ha-} que aliquali innatantes; seu flatus, ut dicunt, eo fruuntur in animalibus imperio, ut liberè per universi corporis ambages, non secùs ac vermium seminia, expatiari possint: Data insuper eisdem est celerrimi excursus libertas. Hinc non tantùm per intestinorum Cavitates, sed etiam thoracis, abdominis, Capitis, cordis, cerebri, lienis, renum, & cunctarum partium; per fluidorum omnium alveos, & fluenta, per membranarum, fibra-
B b rumque

rumque intercapedines, per artus, per habitum corporis, per membrorum, & viscerum intimiorem substantiam, denso agmine excurrando; partes animales universas tum doloriferis distentionibus in dies excruciare valent, tum variis morborum larvis afficere: Adeo ut, jure merito Egregius *Pechlinus* asserat, nullum esse morbum, quem flatus non faciat, aut augeat. Flatuosorum excursuum soboles ferocior est morbus ille, quem flatum ideo furiosum, flatulentum ambulonem, aut spasmus flatuosum appellant authores. Hepar non eximitur à flatuum insultu. Obrepat aliquando inter ejus substantiam, & membranofum tegmen manipulus flatuum, Qui repentinum tumorem nullimodè renitentem tactui, subitam respirandi angustiam, nec non inconstantem tensionis sensum in hypochondrio, cum facili indè, & subita solutione, producendo, genesim suam, & instabilitatem depromit. Statûs hujusmodi descriptionem vide apud *Sennertum*.

§. XIII.

Polypi Hepatis.

Polypus tandem, non minùs gelatinosos, quàm carneos in ramis cavæ, & portæ per hepar dispersis frequenter observavimus in ictero, cachexia, longisque viscerum cacophragiis. In Homine post diuturnum Hepaticum fluxum, indèque ultimam maciem defuncto, pro tota morbi sede, cavæ ramos in Hepate, polypis solidiusculis obfessos animadvertēbam. Recordabar experimentum *Loweri*, qui, cursu sanguinis in jugularibus canis per ligaturas applicitas intercepto, brevi observabat, totum animalis caput ferossâ exundatum colluvie, per meatus omnes effluente. Analogiam ad nostrum casum concilians, dicebam, ex sanguine cavæ hepaticæ, per polypos, tanquam per leviores ligaturas remorato, facile in glandulosis concursibus serum laxius exsolvi potuisse, per meatus indè excretorios alacriter corrivandum cum bile. Hoc tamen ad dissolutionem *Lowerianam* superaddito, quòd minutiores ulteriùs à fugiente hoc sero abreptæ cruoris aliquales particulæ, communi itinere ad intestina profluebant, pro fluxu hepatico excitando.

CAP. XII.

Prodromus ad Praxim morborum biliariorum.

§. I.

Bilis triplici de titulo, super alios omnes animalis, humor est alterationibus subjectus; Et propter consistentiam suam, ac lentorem cursus; & propter vastitatem visceris, quod occupat; & propter principiorum, ejus complexum concurrentium pluralitates, disparitates, momenta. In censum causarum bilem alterantium, præter multigenas ex propria ideo temperie expetendas, addenda insuper sunt errata sex rerum non naturalium, & præsertim variæ tempestatum, & ambientis impressiones. Hæc omnia Therapæiæ biliaræ campum aperient vastissimum.

§. II.

Causis tot variis expositis, bilem in status præternaturam varios conducentibus, eisdem met status, seu morbos bilis particulares peragrabimus. Bilem idè morbosam in septem classes partituri erimus: Videlicet. I. in bilem solutam præternaturaliter, sed naturali non acriorem: 2. in solutam, & naturali acriorem: 3. In bilem naturali crassiore, defectu activorum principiorum. 4. In crassiore simpliciter, ob vehiculi serosi penuriam. 5. in crassiore, ob resinofam principii oleosi compactionem. 6. in crassiore, ob torridam terreo salinæ sociatæ substantiæ dispositionem. 7. tandem in statum bilis medium, seu mixtum; Ex crassamento scilicet, asperitate, & acredine principiorum omnium, aut plurium. Hisce omnibus classibus morbos sobolescentes suos succenturiabimus.

§. III.

Bili simpliciter solutæ, seu nimium dilutæ, & effoetæ morbos varios appropriabimus, dependentes ab irrita, aut saltem imperfecta bilis secretionē à sanguine, ob minorem ejusdem liquidi sus-

cipiendæ cohæſionis facultatem; ut varias icteri species benigniores; aliasque, per varias animalis partes, renes, intestina, ventriculum, glandulas salivarias, aut similes bilis secretiones morbosas, sed placidas; Insuper inappetentias, biliosas eructationes, sputationes, nauseas &c.

§. IV.

Bilis soluta, & insuper acrior; vel simpliciter volatilifata est, & tamquam spiritualifata; vel simpliciter salsa; vel mixta. Ex prima, Cholera morbus, & aliqua Arquati genera procedunt; Lumborum insuper & hypochondriorum prava accidentia, vertigines, præcordiorum anxietates, ardor ventriculi; varii morbi capitis, & stomachi: Explosiones, & rareſcentiæ in sanguine; ephemeræ, causones, & synochæ. Ex altera ephelides, ignes sacri, aut perſici; Herpetes; imò omnes penè cutis affectiones, ex bilis morſu per eandem depaſcente. Ex bile præternaturali, volatili simul, & salsa Erysipelata producuntur, & similia.

§. V.

Crassior ob deficientiam principiorum moventium, & mobilium; seu cruda, iners, & stimulis suis naturalibus carens, lentores frigidos manuducit, indolentes, contumaces; opilationes insuper, & chloroses; ulteriùs cachexias, & hydropes. Quid bilis actuoſitatem deperdat, & quomodo ex deperdita, naturalis œconomix everſiones accedant, latiùs hîc loci eventilabimus.

§. VI.

Crassior, ob vehiculi limphatici penuriam, quasdam icteri classes explicabit; calidas insuper obſtructiones, ariduras, & exæſtuationes, præcipuè chilificationis tempore; habitum luridum, pichro-colum, terreum, subflavum, viscerum intemperies, temporaneas pedum, & manuum incalescentias; eamque præprimis depravatę distributionis digestive habitudinem naturalium viscerum, quæ stomachi frigiditas, & hepatis simul caliditas apud antiquos vocitatur. Resinam hoc pacto biliosam hecticarum etiam principium est. In resinosa bilis præpollentia hujusmodi, factâ sanguinis, aut plurimarum ejus partium, tamquam oleosâ superficie, liquida aquea in sanguineum flumen introducta, per intimam ejusdem compa-

compagem insinuari non queunt, nec dictis concretis partibus affigi; ut nec aqua communis oleo intimè admisceri potest: Nec ideò solvere valent, nec dilatare; concretas partes elongare seu, ut dicitur communiter, humectare, & diluere. Hinc in hecticis essentialibus nullum deducimus ex meris humectantibus auxilium; Totum venit dumtaxat ex refermentantibus, & exaltantibus. Dabimus nos in hoc opere additamentum quoddam salinum, quo mediante aqueæ particulæ per galaxiam introductæ, resinosis sanguineis nubant; solvant ideò, dilatent, & elongent.

§. VII.

Crassamentum bilis à sulphureo suo, non minùs resinoso, quàm exaltrato febres exporriget continuas periodicas, frigusculis, & exorbitantibus exæstuationibus se se excipientes; ardores viscerum contumaciissimos, & fortes, linguæ ariditates, & asperitates; anxietates, lassitudines, vomitus biliosos, ardentissimam sitim, & clamoriam; faucium, & oris incessantem amaritiem, & similia.

§. VIII.

Visciditas bilis terreo-salina, seu cretaceo-caustica febres variorum generum in intensiõibus, extensionibus, & successiõibus producit, si, ad turbas excitandas suas, in massam generalem introducit. Quòd si gliscat dumtaxat per viscera, colicam, diarrhæam, tenesimum, dysenteriam procreat; in ventriculo singultus, fodas, vomitus, convulsiones, cardialgias, languores. Eadem itaque delinquens bilis febres facit, aut morbos sine febre. Primas, si à reservatoriis suis per vasa referentia denuò ad sanguinem retrogreditur; alteros, si ab eisdem reservatoriis per vasa excretoria defertur ad receptacula alia, absque commercio cum sanguine. Sublimatur in primis; præcipitatur in alteris.

§. IX.

Tandem mixtum bilis statum, ex crassamento, copiâ, exaltatione, & acredine febres intermittentes varias progignit, exquisitas, ut dicitur, & spurias. In hisce febribus dies ipsi à febre vacui signa adhuc biliosæ exorbitantiæ deferunt; ut inappetentias, virium prostrationes, pulsus parvos, os amaricans, linguam flavescens, Cardialgias, urinas croceas, habitum improvisè icte-

ricum, capitis lancinationes, dolores ad hepar, & epigastrium tensivos, sitim, ardores, nocturnam inquietudinem. Omnia unam bilem redolentia: serum ipsum sanguinis, Phlebotomiâ, aut cucurbitulis extractum, saturatè flavescens.

§. X.

Postea ad examen practicum specierum apud antiquos morbosarum bilis sedulò descendemus. Bilem, vitellinam vocatam, bili crassiori, cum torridiori sulphurei ejusdem elementi habitudine, & præpollentia imputabimus. Aliæ bilis morbidæ famosiores præcorum gerarchiæ, tamquam mixta corpora, & exotica, ex variis humoribus dissimilibus, confusis invicem, & recoctis resultantia, in palam venient. Hinc de morbis omnibus bilariis, qui hujusmodi delinquentiis arrogantur.

§. XI.

Tanta bilis vitia non à solo ejusdem liquidi interno principio, seu temperie sua facillimè alterabili; sed magis à causa extrinseca, & vario præcipuè ambientis, & tempestatum statu, auspicanda veniunt. Ex succis omnibus animalibus, ambientis novitatibus bilem primariò subjici; hyeme depressam, & obtusam sub feri compedibus, prædominio, & genio jacere; excuti verno tempore; expandi ulteriùs æstate, & excandescere; hinc tandem autumno majores intemperantias suas explicare, successivè videbimus. Graduales bilis per ver, æstatem, & autumnum alterationes eò notabiliores extant, quò aeris ambientis, & respirati temperies tempestatibus propriis non correspondet; præcipuè si fervores, & æstus aut longiores sint, aut intempestivi ultra tempestatis exigentiam aut intensiores ex ventis australibus nimium, & pertinaciter efflantibus; aut irregulares ex intermixtis improvise aquiloniis. Siccitas insuper regnet, & imbrium, ac pluviarum defectus, major, aut minor, qui prædominantium eorundem ventorum anomaliis ortum debet; Unde bilis perassationes, ut dicitur, majores, aut minores; seu nimix componentium suorum rigiditates, & compactiones, ob magis, minùsve abreptas ab eorum sinu cicurantes, & leniores humiditates; exasperata in consequens, & acuata ejusdem principia. Quæ certè bilis affectiones

etiones in tot morbos per æstatem conjurant; præcipuè ad autumnum, & principium hyemis crebriores, contumaciores, interdum & acutiores; sensim deperditâ in liquido bilioso liquiditate illa artificiali, quam rarefactivus æstatis calor servare aptus erat.

§. XII.

Stagirita in libro *Problematum* memorat bilis affectus ex varia ventorum perflatione per æstatem, & autumnum: *Quod si sicca æstas, & aquilonia, & autumnus siccus, iisdem aquilonibus perflatus, morbo biliosos infestat; An ad idem corpus eorum ac temporis habitus vergunt: Itaque veluti ignis igni adjicitur. Cum enim corpora exsiccentur, quantumque in his dulcedinis erat, evaporatum sit, vehementerque incalescant necesse est: Ut dum humor consumitur, arida lippiudines oriantur, residuoque quod biliosum remanserit, eodemque recalescente, febres acutæ, ut pote ex bile sincera, invadant.* Problem. 12. sect. 1. Animadvertit etiam *Aristoteles*, impressiones morbosas bili inditas ab intemperantiis æstivis faciliùs versùs hyemem depromi; quo tempore liquida animalia priùs per ambientis calorem rarefacta, in se se condensantur. *Vitia bilis per æstatem contrahi debent; morbi acuti, qui certè ex bile consistunt, per hyemem potius urgent.* Problem. 6. sect. 1.

§. XIII.

Veris ficcitatibus, longis, aut excessivis fervoribus æstatis intermixta improvise imbrum, aut pluviarum ubertas, subitaque idcirco in succos animalis aridiores introducta humectatio, laxatio, & solutio, ad morbos etiam biliales aggerrimos viam tritissimam, sternit. Id etenim tentat solvens ambientis aqueum, massæ humorum pertraditum, super coctam jam bilem, ejusque asperiora, & exaltata salino-sulphurea principia, quod aqua communis cocto lapidi, seu calci superaffusa, ejusque sales, & igniculos in fluorem, & motum dilatans; rabidas scilicet effervescentias ciere. Phasim hujusmodi æstate 1714, annisque aliis præcedentibus observavimus.

§. XIV.

Successivè igitur ad ventorum, & ficcitatis laudatas habitudines, fervorisque idcirco notabilis in tempestatibus concepti, factum

ctum est; ut ad annum elapsum 1715. Grande factò bilis crassamine, & aculeo, explicans se se ad Majum mensem præcocior æstatis æstus, indeque vehementer prosequens, ob austros assidue afflantes, ortamque ad plagas omnes nostras, totamque Italiam, ariditatem, delinquentias ubicunque biliares epidemicas insperferit. Provinciis illis nostris, ubi parcius, aut nihil ad veris finem, & æstatis principium pluebat, aut ubi pluvix tardè nimis effundebantur, optimâ licet climatis temperie donatis, ægrorum numerus increbuit. In ditione *Clarasensi*, & *Cuneensi* habitantium medietatem biliaria ægritudo corripuit. Ad ipsammet *Cunei* civitatem, cui, præter generalem causam, fluvii etiam alluentis exsiccatio accedebat, duo habitantium trientes ægrotabant. Ad vicinias *Clarasci* nunquam pluebat; Et nemo penè hominum ab aliqua bilis affectione immunis factus. Vigente hoc influxu, *Taurinum* imbres aliqui, à veris principio inchoati, identidem emolliebant; Hinc minor longè in Hac metropoli ægrotantium biliosorum numerus; Licet æstus non minor datus fuerit; aer insuper puritate, & diflatione inferior aere memoratarum urbium, & ditionum; Grandior insuper fructuum, aliarumque rerum non naturalium intemperantia. Fluet ideò hoc capite de Epidemiis biliariis variarum tempestatum disquisitio.

§. XV.

Bilis itaque à tempestatum anomaliis in statum præternaturalem conjecta, tripliciter morbosè adoritur; vel scilicet febriliter; vel non febriliter; vel mixtè. Febriliter, cùm jam vitiata in sanguine, postmodum in reservatoriis suis collecta, & tamquam recocta, in eundem sanguinem reaffunditur; ibidemque extranei fomitis, seu humoris non ampliùs miscibilis conditionem assumit, ad febres varii ordinis, secundùm diversam subjectorum dispositionem, producendas; ut variis locis superiùs indicavimus: cur autem aliquibus subjectis continuas inferat, mitiores, aut acutiores; aliis intermittentes varias, ejusdem naturæ humor; attentè hîc loci explicabimus. Non febriliter bilis infesta est, cùm secreta à sanguine, ex viscere suo ulteriùs derivatur, remeatu in sanguinem non factò; seu per intestina à choledocho delabens,
diar-

diarrhæas simpliciter , dysenterias , tenesmos , dolores , ardores , vomitus ; singultus , sitim , defectiones , aliosque primarum viarum affectus procreat. Tertio autem modo , seu mixtè subjectum suum invadit bilis præternaturalis facta , cum ambas metitur vias ; sanguinis nempe , & intestinorum. Hinc dysenteria v. g. complicata , seu cum feбри , aut acuta , & tamquam inflammatoria ; aut mitiori , & protractâ. Curiosa erat nobis hisce diebus ægritudinis biliaria alternatio. Dysenteria in juvene exquisita , accensâ per vices febre statim cessabat ; febre defervescente , & remissiori factâ , recrudescebat. Hoc autem per mensem , & ultra. Alternationes hujusmodi quinque , aut sex dierum spatium exactè mensurabant. Integrè tandem dysenteria judicata , & soluta febris à magistrali hypecacuanæ administratione.

§. XVI.

In bile per subjecta varia febrili , aut non febrili prævalens supra crassitiem acredo faciliori curationi viam sternit : E contra , cum crassities supra acredinem dominatur. Siquidem , expedita à tenacitate humoris , & facta totius juris acredo , in vegetas ideò irritationes insurgens , majores etiam in solidis , liquidisque , systases , & nisus imponit ; undè impacti , aut immixti extranei vegetior , & celerior excussio , aut extrusio succedat. Sic dysenteria quamplures in Epidemia memorata , aliisque similibus facile cedebant specificis suis ; & febres ante septimum , imò & ante quartum circuitum absque usurpatione febrifugi judicabantur ; Quæ in aliis summam contumaciam inducebant : Et sicuti præcox in hac Epidemia bilis coctura , & deflagratio morbos æstivos per vernum tempus anticipabat ; sic & autumnales morbi ordinarii ultra consuetum præibant. Quare Tertianæ ; & Quartanæ , *Septembri & Octobri* ordinariò triumphantes , *Julio , & Augusti* solum principio viguere. *Septem-ber* , & sequentes menses intermittentibus carebant ; præviè excussâ , quæ in subjectis dispositis deflagraverat bile.

§. XVII.

Post hæc omnia abundè pertractata , descendemus ad solemnia
Cc quædam

quædam febrium continuarum biliosarum symptomata; eaque simpliciter ex eodem individuali principio deducemus. Exanthemata spuria copiosissima, nunc plana, asserrimis pulicum morfibus analoga, ac similes in malignis verè febribus eruptiones cutaneas simulantia; nunc etiam fastigiata, & papulata, febres biliosas æstivas quamplurimas in junioribus, & pauperculis præcipuè, comitari solita, auspicabimur faciliè ex variis ad habitum corporis glomeratis biliosis arefactis substantiis. Hæmorrhagiæ, dolores Capitis ab eodem fonte emanabunt, moribus nempe biliosis ad aliquam sanguinis partem in majores cohesiones perstrictis; major in consequens densitas, & resistentia florum; & major sanguinis ad tergum appellentis nisus in vasorum latera: Hinc tensio, dilatatio, dolor, diapedesis: facilius autem in capite, quàm in alio quocumque recipienti; Quam nempe per partem unda sanguinei laticis uberior perfluit, & grandiores insuper vasorum flexuræ, & grandiores angustia. Sic etiam delirium biliosum: sic palpitationes biliosæ, & pulsum intermittentiæ à diversitate densitatum sanguinis in diversis vasorum tegmentis explicabuntur. Febres ideo biliosas ab extrinseco particularum sanguinis turbamento, quæ ob memoratorum, aliorumque symptomatum satellitia, & complicationes, obstrepentes, & feroces, perperam malignæ nuncupantur, à propriè malignis discriminabimus.

§. XVIII.

Missionis sanguinis utilitates, inutilitates, aut noxas in variis morbosæ bilis statibus perpendemus. In biliosis generaliter rarefcentiis à sanguinis missione religiosè abstinendum esse proponendum veniet. Eductio sanguinis spatium, & momentum liberius liquidis rarefactis, aut rarefaciendis procurans, morbo augmentum conciliat. Ideo valet in hoc casu Antiquorum axioma: *Sanguis est frenum bilis*. Succenturiatur Avicenna monitum: *Cave ne inducas effervescentiam biliosorum*. Biliosum explodens ignitulum per phlebotomiam non tollitur, non imminuitur, quin imo intensivè adaugetur. Tantumdem ad ejusdem impetum superadditur, quantum resistentiæ detrahitur; quæ certè diminutio
resistentiæ

resistentiæ tanta est, quanta est quantitas sanguinis, per lanceolam detracti. Per hoc generale principium dicitur communiter: *Vena sectione sanguinem agitari.*

§. XIX.

Post saniores Curationum Cardines in prædictis omnibus perpenſos, varios præſervationis modos à morbis bilioſis ex lentore, & acredine, ob calidum tempeſtatum, & ſiccum, diffuſè memorabimus; Humectantibus præcipuè appropriatis, & matutinis copioſis potionibus. Qui longis potionibus v. g. thæ, caffè, aut calidæ meracioris quotidie aſſueſcunt; ex hiſce neminem quem noverim, bilioſis per æſtatem, aut autumnum efferationibus correptum vidi: ſcilicet reparatâ quotidie deſſiciente per diſſipationum injurias bilis fluiditate, nec non acore cicurato.

§. XX.

Morbis ideo bilioſis, Verno tempore confuſis, & ſporadicis, æſtate, & autumnò ſolitariis, & endemiis, hyeme mixtis, & multipliciter ob pituitæ prædominium, aut concurſum larvatis, aut depreſſis Hippocraticæ conciliabuntur obſervationes ex quibus elucidationes deducemus quàmplurimas; & curandi modos. Principales idcirco *Divini Senis* ſententias, bilis erratis variis congruentes, quantâ potuerimus ſedulitate, commentabimur.

§. XXI.

Exempli Gratiâ. Circa bilis morboſæ motiones. *Surditas bilioſas alvi dejectiones, ſurditatem alvi dejectio ſedat.* Coacæ Prænot. & Aphor. 28. ſect. 4. & Bilis orgasmus eſt. *Febrienti, aut per bilem æſtuant in tempore foras diſperſa bilis, bonum: Diffuſa verò, ac diſperſa ſub cutem, toleratu levior eſt habenti, & curatu facilior ſananti: Diffuſa autem, ac diſperſa & ad unam aliquam corporis partem allapſa malum.* lib. 1. de morbis: Bilis methaſtes bonæ, aut malæ. *Bilis ſi ſua ſponte aut infra, aut ſupra proruperit difficilius ſedatur.* De locis in hom: Cholera morbus. *Lactis agitati exemplo commoto humore quidquid in corpore retinetur à principiis ſeponitur: Et bilis quidem cum ſit lentiffima in ſuperficiem diſcedit. Secundo loco ſanguis: tertio Pituita: Ex hiſ autem*
Cc 2 humoribus

humoribus maximè gravis est aqua. 4°. de morbis : Vitiata bilis per corpus secretiones. Bilis eorum omnium, quæ in corpore insunt cum sit glutinosissima, maximè diuturnas stationes facit : De natura hominis : Obstructiones ex Bile.

§. XXII.

Circa febres biliosas. In Homine incalescente corpore aqua foras exhalat: Quod verò est biliosum, cum coherens, & densum sit, neque similiter extenuatur, neque exhalat: Verum extenuatus biliosus humor efficit, ut corpus incalescat: Copiosius autem, & melius alimentum feberi suppeditat. 4°. de morbis. In Biliosis spiritus magnus, & febris acuta cum præcordii intensione juxta aurem abscessus facit: In Coacis. Hæc omnia febribus biliosis æstivis, autumnalibus, & hyemalibus aliquot concernent. Quibus etiam referendus est Hippocratis textus: Febres magna ex parte à bile oriuntur. De nat. hominis.

§. XXIII.

Hepatitis. Morbus hepaticus: Dolor acutus in hepar incidit; & sub ultimas costas, & in humerum, & in claviculam & sub mammam: & suffocatio fortis tenet, & aliquando lividam bilem revomit, & rigor, & febris primis diebus debilior habet, & dum tractatur hepar dolet: De internis affectibus: Hepatitis vera, seu bilioso-sanguinea. Alius hepaticus morbus: Dolores quidem eodem modo premunt in hepar, & color differt à priore: Interdum vomitus bilis pallide cum fructu; si verò non vomuerit, bilis ad oculos pervenit, & sunt valde pallidi, & pedes intumescunt: Ibidem: Hepatitis spuria, seu bilioso-serosa. Hepaticis sputum multum cruentum, siue intus subputridum, siue si merè biliosum fuerit, statim perniciem denotat: Coacis prænot. Hepatitis cum pulmonis affectu complicata. Hepatico colliquatio cum raucedine, malum portendit, idque præcipuè si cum quadam tussi contingat: Ibidem: Ex bilis in thoracem fluxione tabidi, & suppurati: De Locis in Homine: Phtisis Hepatica, seu IctERICA. Hepate dolentes cum oris ventriculi dolore, sopore, rigore, & aluo exturbata, cum corporis extenuatione, ciborum fastidio, multis tenuibus sudoribus disfluunt, & purulenta per alvum demittunt: Ex Coacis: Hepatitis

Hepatitis lentè in abscessum, & tabem migrans. *Iecur purulentum si aduratur, & fluat pus purum, & album, sani fiunt; In tunica enim pus continetur.* Aphor. 45. 7. Hepatitis feliciter ad partem gibbam visceris dexteram lateralem suppurata, & per cauterium aperta: Ut nobis interdum contigit. *Ex Hepatis ustione quibus pus amurce simile prodit lethale:* Coac. & Aphor. Hepatitis frigida; seu steathoma Hepatis, Cauterio externè apertum. *Hepar vehementer de repente dolentibus febris succedens remedio est:* Ex eodem in Coacis: Hepatitis ex solido nerveo, seu convulsiva in Hepatis ligamentis, & membranaeis partibus. *Iecur aquâ repletum, si eruperit in omentum, iis venter aqua repletur, & moriuntur:* Aphor. §. 7. Hepatitis serosa, undè ascites à lymphaticorum Hepatis ruptura. *Quibus Hepati dolor hi sanguine per alvum egesto, servantur; non autem egesto, moriuntur:* Coacæ: Fluxus Hepaticus Criticus in Hepatide exquisita.

§. XXIV.

Pertinentia ad Icterus. *Icterici non admodum flatulenti sunt.* Aphor. 72. 5: Ictericia dissolutiva. *Morbus regius si post septimam febribus ardentibus succedat, sudoris indicium est; neque enim exsudare, nec alias usquam abscessum facere consuevit sed sanantur:* Icterus Criticus. *Quibus in molestis febribus, septimâ, nonâ, undecimâ, aut decimaquartâ die morbi regii oriuntur, bonum, ni dextra præcordia obduruerint; sin minus, res in dubium venit:* Coacis: Criticus etiam, aut symptomaticus cum exundatione hepatis icterus. *In febribus ardentibus, si morbus regius, & singultus quintâ die, lethalis est: de Iudicat:* Icterus merè symptomaticus, & malignus. *Regio ex morbo fatuitas, aut stupiditas malo est:* Ibidem, & prædict. Icterus cerebri. *Regius morbus ante diem septimum in biliosa febre cum rigore succedens morbum solvit; citra rigorem verò intempestivè obortus, lethalis:* De natura victus in acutis: Discrimen Icteri critici, & symptomatici. *Regii morbi ex hepate subalbidi, ex aliis visceribus nigricantes:* De morbis vulgar. Discrimina arcati ordinarii & nigri.

Et similia à Medicinæ oraculo depromenda; Quæ omnia opulentissimam ad praxim hepaticam nostram suppellectilem explicabunt. Nec ulterius in Prodromo.



HISTORIÆ HEPATICÆ

PARS TERTIA.

Aperiens ea quæ Morborum Hepatis, præcipuè Biliariorum
Therapeiam, seu Curationem adimplent.

AUTOR LECTORI SUO,

In hanc Partem introducendo.



POST QUAM ante hos tres annos, & quod excurrit, Bibliopolarum Genevensium rogatis binas primas partes Historiæ Hepaticæ ampliatas elargitus fuerim, & tertiæ insuper Prodromum, ad calcem earum adjiciendum, transmiserim; Hæcque postmodum singula, typis illico reddita, quominus ad hos usque dies prodirent gravissimis de causis impe-
rassem, multa mihi quidem occasio per totum id temporis allata est, non solum Prodromi illius nostri institutum maturius revisendi, perpendendique; sed etiam ex parte non adimplendi. Nam ex his, quæ ad peragrandam Hepatis Therapeuticam Provinciam pollicebar in Prodromo, alia sanè videbantur theoreticè admodum, & scholasticè suscipienda fore, quæ puram praxim, & simplicem observationem, quibus tantummodo instru-

instruendam hanc partem designaveram, non ita directè concernerent: Alia insuper nimis strictè posita, veluti si novis, severisque legibus ad investigandas tot classes delinquentiæ biliaris medentes voluisssem compellere. Meditanti itaque mihi quo passim alio scribendi genere meam hanc Therapeiam aggrederer, quam utique liberaturus fidem meam, ante annos multos impostam, simul etiam humanissimis summorum Hominum Votis, & sæpè iteratis celebriorum Academiæ invitationibus, ut morem aliquando gererem, colligendam demum decreveram; Practica ideò Adversaria mea iteratò volutanti, atque cum novis quotidie ad ægrorum lectulos observationibus compellenti, appulit Amici doctissimi dissertatio Epistolica, ex qua gratissimum fuit opportunius deligere consilium, editique jam Prodromi formam magnam partem oblivisci.

Enim verò de biliarium morborum, nostris regionibus sub vario aspectu frequentium, sæpè & popularium naturâ, generibus, extensionibus, & successibus accuratiùs pervestigandis jam diu sollicitus, simulque, quantum observandi, legendique assiduitas valeat, in dies instructior, cum sæpiùs non cum discipulis dumtaxat, sed cum collegis meis de latiori, quàm apud modernos conveniat, eorundem morborum ditione, sermones instituerem. Cl. Collega noster D. Lelius Thomas Guidettus, Urbis, Totiusque Eporediensis Provinciæ Protophiscus, Pilosophus, & Practicus indefessus, urbem, ædesque meas frequenter conveniens, illâ, quæ nos ab adolescentiâ conglutinat, studiosâ consuetudine, singulares adeo circa eosdem biliares morbos semel, iterumque observationes communicabat; ut quod illas in quendam ordinem collectas, nec non sub modulo dissertationis digestas inscriberet, & transmitteret, eidem author fierem. Expedita Epistolica dissertatio cum non ità multò post à Viro accurato reddita mihi fuisset, eamque non candore solùm, & judicio, sed ad multifariam biliosorum affectuum Historiam, tutâ diagnosi, prophylacticâ, ac therapeuticâ administratione non modicè spectabilem deprehenderim, in id me faciliè contuli, ut ab eadem designatæ
partis

partis meae argumentum & caput instituerem. Imo cum in hac de morbis biliariis exercitatione ii omnes hepatis morbi, aut non obscure delineati, aut etiam admodum expleti, mihi obviam fierent, qui in bonam praxim accedunt, consequenter inter eorundem descriptiones loca illa omnia optabilia comperirem, quibus facile foret observationes meas his morbis referendas, & gravioribus cunctis Prodromi partibus praeterea respondentes, interfirere; firmavi animum, quam Therapeuticam meam Hepaticam forem exaraturus, ab hac amicissimi Viri Therapiae exordiri, cum eadem proficui, & cum eadem, minimè recedens, absolvere; non ideo in Prodromi ordinem ulterius pergens, sed in alium, variumque & ut Guidetti Disquisitiones se porrigent, abruptum, & miscellaneum, id tamen consultum ducendo, ut huiusmodi editiones Prodromum adhuc intactum proferrent, tum ut iste prioris institutionis nostrae monumento superfit, tum ut Tironibus, morbos varios bilis status curiosius pervestigantibus non exilem faciem praeferram.

Atque ut ad summam novae huius partis me conferam. Cum rari in hominibus ab interiori principio morbi sint, qui vitium aliquod biliare sibi non asciscant, ita non solum proprios hepatis morbos omnes, qui medicis curationibus subiacentur, aliqua bilis delinquentia immediate conjectatur (quod facile intelligitis, cui ignotum non venit, ex visceris cujusunque morbo laesam iri ejusdem actionem, aut saltem productum ex actione) ac penè omnes antecedit, ut in huius partis progressu paucum fiet. Quae passiones hepatis à bilis errore non producantur, pleræque vel medicis curationibus non subjacent, vel à causa aliis etiam partibus communi ortum ducunt, nec ideo particularem Hepatis; sed generalem curationem deponunt. Soli bilis morbi, videntur in Hepate speciatim respici, seu naturae huius visceris, & domesticis solique praesidiis hepatis directe spectantibus, oppugnantur.

Morborum Hepatis Genera, Origines, Sedes, & successiones pathologicae superiori parte describendo, eos vel propriae solido, vel à liquido interfluente, vel tandem à tertio Cause genere,

genere, seu ab infidente corpore prorsus extraneo profectos animadvertimus.

Inter morbos hepatis à toto solido, intemperies in primis, ut dicitur, qualitatibus; vel simplex, vel cum materia; jam vel à fluidis hoc viscus interfluentibus, sed non biliosis, idest sanguine, & lymphâ primordia consequitur; vel à fluido in eodem secernendo, aut secreto, seu nominatim biliari: Si à primis; propria hepatis curatio non indicatur, sed universalis alterutrius, aut utriusque fluidi: Quod si à Liquido propriè hepatico, seu biliari; jam Curatio erit biliaris. Intemperies hepatis in secundis qualitatibus constituta, quæ à fluido non est, sed proximè à solido, ut solidum, remediis non emendatur. Atonia hepatis si à propria intemperie ortum ducit insontibus fluidis, rursus incurabilis; si à fluidis generalibus, fluida generalia prospicienda. Jecoris ad attiguas partes adnascentiæ morbosæ, varices, aneurismata, ductuum excretoriorum dilatationes præter naturam, tandem & hydatides, quæ jam lymphaticorum hepatis varices sint, aut ab eisdem distincti, interspersique succingentis tunicæ aquosi tumores minutuli, æquè medicis auxiliis omnibus rebelles sunt, non secus ac similes in visceribus aliis affectus: Hæque ut & aliæ hepatis nunc memoratæ affectiones, quæ revera per sola extispicia palam fiunt, signa propria & constantia non adeò proferunt, ut in his potius conjiciendis, quàm recensendis, nostram hanc historiam immorari oporteat. Sensibilium in Hepate solutionum continui, scissionum, abscessuum, ulcerum, vulnerum &c. Theoriam superiori parte satis excussimus: Horum omnium praxis naturæ potius viribus, quàm artificialibus remediorum referatur. Quædam interea de horum diagnosi, quædam de prognosi, imò & Curatione, ut loca se porrigent, adhuc attingemus. Jecoris spasmodiam superiùs attulimus. Hæc idiopathica sat rara est; suum interim diagnosis, & curationis locum implebimus. Morbi à corpore extraneo vel insanabiles, vel præsidis generalibus, & per universalis Causæ oppugnationem incundi.

Dd

Atqui

Atqui hepatis morbi, quos praxis ordinaria curandos exhibet, biliares sunt plurimum generum febres, intermittentes, aut continuatae, acutae, aut tardiores, vehementes, aut mansuetae, stationales, aut vagae; benignae, aut perniciose; Tumores insuper varii, calidi, aut minus calidi; hepatitides, obstructiones graviores, aut leviores; dolores praeterea majores, aut minores; ictericitiae, colicae, cholerae morbi, vomitus, diarrhoeae, dysenteriae, tenesmi, biliares praesertim pleuritides, alique plurimi ex eadem scatebra affectus, qui licet fortuito majus, aut minus sanguinis, aut lympharum vitium importent, tamen aut à bilis vitio immediato, aut non sine bilis vitio immediato nascuntur: Ideo quemadmodum praecipui biliares sunt morbi, ita etiam Therapeia hepatica, quae non extra eosdem quaerenda est, erit & sigillatim biliaris. Qua de re si, quantum sibi constat diuturna nostra observatio, per Guidettiana morborum biliariorum commentaria, quae morbos omnes ex bile productos indigitant, aut absolvunt, morborum biliariorum genera omnia, dominatus, vires, diagnosim, prognosim, nobisque insuper tutiorem redditam auxiliorum medicorum administrationem distribuam, nonne genuinam, optandamque in morborum hepatis curationibus Therapeiam oppido attigisse confidam? Quod reliquum: Meae hujusmodi cum supradicti Cl. Viri animadversionibus ordine proposito intermixtae; ut clariores evaderent, utiliores insuper, & curantibus acceptiores, longè ab omni Theoriae, & hypotheseum farragine, ex practicis simpliciter eventibus proferre annisum sum. Has ideo practicos Canones nuncupare posse videbar; veluti nudas, & incomptas, nec nisi ab aegrorum lectulis susceptas veritates, simplici stylo, non eloquenti, non fucato exaratas, his omnibus complectens. In aliquo tamen morborum biliariorum genere gravius occurrens argumentum, & vastius, quod ideo Canonum numerum amplificaret, eorumque res longius protraheret, necessario me compulit, ut Canones in protractiores Paragraphos, ceu totidem Capitula, converterem, eisque omnibus tractatum peculiarem aggererem: quod praecipue in biliosa pleuritide ad-

vertes.

Pars Tertia.

verres. Hæc nempe, veluti ingentis momenti affectio variâ
que per regiones, ad tempestates frequentissimè erumpens,
interdum etiam populatim defæviens, & perniciosa, hucus-
que tamen, quod sciam, non satis perspecta, aut descripta,
diligentiùs idèò à nobis perspicienda, describendaque videba-
tur. Nemo enim, ni fallor, Hippocratica hucusque con-
ciliavit oracula, quæ dejectiones alvinas, præcipuè bilia-
res, naturales, aut artificiales in veræ pleuritidis invasionibus
interdum commendant, interdum condemnant. Ænigmaticum
hunc divini Senis sermonem per calculum præxeos, biliosas
proprie pleuritides ab aliis diversi generis discriminantem, sol-
vere feliciter speramus, divisis ad varias pleuritidum condi-
tiones præceptis magni Legislatoris specie discordibus: Cui
studio ab accuratissimo Guidetto nostris de Consiliis incho-
ato non minori observationum syndrome nostram & operam
impendemus.

Et quoniam ad morborum biliariorum genus pariter præcipuum
quadrare videtur febris biliaris periodica, veluti aliarum om-
nium biliarium longè frequentissima affectio, quæ, si mul-
tùm inclementes, post ver non optimum, fervidiore præcipuè,
siccioreque ætates adfuerint, nostrarum aliarumque regionum
incolas magis, aut minùs epidemicè percutit: Hac de re post
nostras, & Guidettianas de febribus, aliisque morbis bilia-
riis disquisitiones, biliales pariter Constitutiones epidemicas
annorum 1711. 1712. 1713. 1714. 1715. 1716. 1717. 1718. 1719.
1720. 1721. 1722. 1723. & partis ann. 1724. unico tractatu
comprehensas adjicimus. In rebus his omnibus practicis, can-
didisque naturæ ægrotantis, curantisque inspectionibus, etsi,
quantùm possibile à Theoreticis principiis esse me declinatu-
rum pollicitus sim, quia tamen in physicis disquisitionibus,
& præcipuè in morborum primordiis, quæ non semper ex se-
se sat latè patent, diligentius explorandis, optandum est, ad
aliquod solidius principium confugere, ubi ratio, cum au-
thoritate & experienciâ conspiret. Nos idèò in commentariis
his nostris ad illud accedemus principium, quod ut summâ au-

thoritate innixum; rationi, insuper, consonum, & ab auctoritate
 ratori experientia elicitorum, viris optimis communius est,
 scholisque omnibus luculentius acceptatur. Nam, ut de praxi
 medica decernit Hippocrates lib. de Carnibus, *quod accessit est*
 qui hanc de arte medica tractationem suscipere valet, commune
 sententiis principium ponere; nec possunt, nec debent in praxi
 saniori novitiæ observationes qualescumque ab optimis artis ve-
 teribus præceptionibus desciscere; Ad ipsum igitur Hippo-
 cratem confugiam, cujus placita uti autoritate plena, ra-
 tione & experientia manu ducta, sententiis omnibus com-
 munia, summæque idcirco spectabilia sedulo amplectar. Sub
 his me totum reponam; In morbis omnibus biliariis ex-
 plendis ex purissimo hoc fonte limpiditatem & ubertatem
 hauriam: Præcipue quod in his morbis enucleandis, nec
 aliquis, opinor, divinam Hippocratis solertiam ad hos-
 usque dies imitatus est, nec planè doctrinam interpretatus.
 Hæc contigit ad hanc partem præfari. Tu nostris his fru-
 ere ad bilis morbos laboribus Lector, si candidus, si do-
 cilis, si prudens, & amicus veritatis es, cui tantum hæc
 aliaque nostra maxime probanda fore arbitramur; iisque
 etiam atque etiam instructus, fac impofterum ut tu alii-
 que felicius valere queant. Atque ad Præfationis coronam
 dem, & tuam insuper aliorumque omnium eruditionem
 nobileque documentum liceat hic gravissimum Hippocrati-
 cum textum, lib. de Arte, veluti in medicam Homiliam con-
 cinnatum recensere, & suspicere: Nonnulli turpiter in-
 sectandis artibus artificium suum collocant; neque id quod fa-
 cere se credunt meo quidem iudicio obtinent, sed sua scientia
 ostentationem faciunt. At eorum aliquid, quæ nondum inventa
 sunt invenire, quodque invenisse, quam non invenisse præstite-
 rit, similiterque imperfecta ad finem deducere, id mihi ve-
 detur illius esse munus, qui intelligens existimari expetit.
 Qui vero ea quæ ab aliis sunt inventa apud imperitos tradu-
 cit, is sane prudentia existimationem tueri velle non videtur,
 sed potius naturam suam, aut ignorationem malitiose prodere.
 Solis

qui hanc de arte medica tractationem suscipere vult communis

scribus praecedentibus deficiat. Ad idem in Hippo-

STUDY OF THE

DE BILIOSIS AFFECTIO IN RYB

ad hoc mantentur auctoritate *presertim* quoniam, siquis

DEBILIOSA PLEVRITIDE.

DISSERTATIO EPISTOLARIS.

Ad Amplissimum Virum, Doctorem Amicissimum

D. IO BAPTISTAM RIANCHI

Anatomiae, & Medicinae Professore Taurinensem

12

Optatam nuper accipi; nec iucundius quidpiam per humani-

vivendo primogenitis foetibus Anatomico-Pathologicis hepaticis, qui-

bus librorum supellectile. et copiam in dies augentem.

De d. 3. terea

terea morborum insidiis iugiter obsessos mortales validioribus propugnaculis instructos nequaquam perspicimus; quippe fecundandæ Physiologie vacarunt sagaciores Medici, in obscuro relictis Pathologicis Disquisitionibus ad rectam medendi rationem apprimè facientibus. Quid prodest, quæso, agrotis hominibus præclarum illud immortalis Harvei inventum ab universa Physicorum Republica dignis laudibus celebratum; quid tot, tantæque ab hoc invento illata hypotheses; Si vitale microcosmi liquidum in fontes, rivulos, flumina, lacus, & maria optimo jure distinctum, jugiterque circumfluum novis duntaxat, itidemque ignotis salium peregrinorum copiis devehendis obstringitur, totque inde salibus Theorica Medicina conditur, ut insulsa tantundem remaneat Practica? Quid, inquam, proderit, si deturbato Apollinis Tripode, & debellatâ elementorum, humorumque quadrigâ, nova è chemicis fornacibus elementa excutiantur, dum interim voracissimo febrium rogo cremari non desinunt humana corpora? Fortasse complures morbi lethales habiti clades suas usque adeo non extendissent, si Hippocratis Oracula, aliorumque Veterum monumenta novis in dies observationibus exculta, atque locupletata fuissent, non verò contempta, aut ablegata. Hoc sane gravissimum consilium laudatus Celsus, pro suâ erga homines charitate, lib. de Arte; de Priscâ Med., pluribusque locis insculptum posteritati reliquit. Sed tibi tandem, Bianchi doctissime, clarior illuxit dies, qui scriptis, & opere Hippocraticam Medicinam in bonam frugem restituis.

De

De Vera inquirenda Medicinæ Canones Practici.

C A N O N I.

IN Praxi nemo hypotheticus fortunatè se gessit. Recta ad librum naturæ, non ad machinam intellectus consuetudo philosophandi; Bona non jam ex Chartaceorum Anatomicorum pagellis, sed ex Cadaveribus, præcipuè morbo-
se denatis Anatome, quæ insuper, cum assidua ægrorum observatione comparatur, (*nihil etenim ait Cl. Bartolomæus Eustachius ad medicorum eruditionem conducibilis est, quàm morborum causas in ipsis mortuorum reſeratis cadaveribus explorare.*) Sedula constitutionum in morbis animadversio; Parca quidem, sed opportuna remediorum quantitas, atque selectio, Judicium circa medicas novitates non præjudicatum, ut scilicet apprimè dignoscantur, quæ sint ad praxim proficua, quæ inutiles, quæ noxiæ; Assidua præcipuè in Hippocratica observatione exercitatio, felicem aliquando Practicum instituunt.

II. Ità ex *Bacone de Verulamio de augm. scient. Lib. 4. Cap. 2.* "Quod ad Curationem morborum attinet, multa sunt quæ desiderantur: Primum est, Intermisſio diligentia illius Hippocratis, utilis admodum, & accurata, cui motus erat narrativam componere casuum circa ægrotos specialium, referendo qualis fuisset morbi natura, qualis medicatio, qualis eventus.

III. Ità ex *Baglivio epist. ad spectatissimum Andrium.* "difficilis hisce praxeos Medicæ temporibus, in quibus omnia speculationum, & hypotheseon fluctibus agitata, turbataque videmus, non ante cessura tempestas est, quàm medici prætâ opinionum arrogantia, & fastu, ad Hippocratem clavum tenentem, & moderantem confugiant, & ab eodem naturæ voce loquente, discant, quâ viâ progrediendum
"fit,

“sic, ut ad veritatis metam in medicina tandem perveniamus.

IV. Ità ipsemet *Hippocr. lib. de Veter. Medicin.* “Qui Veterum in-
“ventis rejectis, ac repudiatis aliam inventionis viam, aut mo-
“dum aggreditur, & aliquid se invenisse jactitat, is cùm fal-
“litur, tum alios fallit. „ Id autem de morborum, eorumque suc-
“cessionum observatione intelligendum.

V. Ità denuò Medicinæ Legislator, *de decenti ornatu.* “Quid-
“quid artificiosè dictum est, non autem factum, methodi inar-
“tificialis demonstrativum existit; nam putare quidem non au-
“tem facere, ignorantia, & inartificialitatis signum est: opinio
“enim maximè in Medicina in crimen vertitur eam adhiben-
“tibus.

VI. Ità idem *de diebus judicat.* “Oportet autem exactè per-
“discere unamquamque temporum Constitutionem, & quemque
“morbum, & qui morbus sit bonus, & qui periculosus aut in-
“Constitutione, aut in morbo. „ Morborum etenim investiga-
“tio ex mutua collatione constitutionum, ac tempestatum affla-
“tu, priorumque signorum syndrome jam ab opinione rece-
“dit, & in rectam, tutamque cognitionem accedit. His nos ve-
“stigiis Hippocraticis, ac tempestatum, & constitutionum condi-
“tionibus insistentes, in morbos biliares exquisitiùs noscendos,
“curandosque progrediemur.

VII. Quod reliquum: cùm ferè iaceat medicorum Scri-
“ptorum in his, aliisque praxeos observationibus diligentia, sty-
“lo solum Ciceronis, Cæsaris, Terentii, Livii, aliorumque
“Latino sermone disertorum hominum lambendo, propriisque pa-
“gellis exscribendo inhiantium; non tempero, quò minùs, mo-
“nito Guidem nostri excitatus, celebrem locum illum ex Sene-
“cæ Epistolis ad Lucilium eisdem commemorem. “Non quærit
“ager medicum eloquentem, sed sanantem; sed si ità competit,
“ut idem ille, qui sanare potest comptè de his quæ facienda
“sunt, differat, boni consulet: non tamen erit quare gratu-
“letur,

„letur sibi, quòd inciderit in medicum etiam disertum; Hoc
 „enim tale est, quale si peritus gubernator etiam formosus est.
 „Quid aures meas scalpis? quid oblectas? aliud agitur, uren-
 „dus, secandus, abstinendus sum: Ad hæc adhibitus es:
 „Curare debes morbum veterem, gravem, publicum. Circa
 „verba occupatus es? jam dudum gaude, si sufficis rebus. Quan-
 „do multa disces? quando quæ didiceris affiges tibi, ita ut
 „excidere non possint? Quando illa experieris? non enim,
 „ut cætera memoriæ tradidisse satis est: In opere tentanda
 „sunt. „Hucusque Seneca; cujus consilio Medicos quidem elo-
 „quentes laudamus, sed simul & practicos, & ægris pro-
 „ficuos.

2. *Infirmities omnes nostra natura infestas in duas primò
 classes, velut duo suprema genera dirimere placuit Medicorum
 Principi lib. de Affectionibus, his verbis: Morbi omnes hominibus ex
 bile, & pituita oriuntur; Nos tamen hucusque latuit quomodo,
 quotve modis ab alterutro, vel utroque principio speciales homi-
 num aegritudines verè sobolescant, & quibus debeant fugari re-
 mediis. Tibi reservatum erat, Vir præstantissime, tanti ponderis
 opus, qui singulari dexteritate, scientiâ, & labore rimatus es
 penitiora natura opificia, motus, passionés, extispiciis, speculati-
 onibus, & longâ praxi. Tibi jure merito gratulari debet Anato-
 micorum cætus, quòd immortalis tuâ hepatis Historiâ, aliisque
 tot operibus tantam Rusticioribus lucem sis fœneratus. Majus est
 quod debet tibi tota Medentium Cohors ob elucidatam biliosorum
 morborum Pathologiam; Sed & maximum illud, quod ad operis
 complementum, & publicum bonum propediem expectat à te Orbis
 totus, volumen scilicet eorundem morborum Therapeuticum. Faxint,
 deprecor, Superi, ut seras videns annos, & queas alteram malo-
 rum iliadem, seu catarrhalem, pari sorte enucleare, ejusdemque
 tutiorem therapeiam publico juri tradere ad universam felici-
 tatem.*

Ec

De

De supremis Causarum internarum in morbis hominum generibus secundum sententiam Hippocraticam.

Canones Practici.

Canon I. Principale morborum genus in homine à pituitoso principio exordiri nemo jam ambiget, qui noverit totum animale machinamentum ex aqueo principio, præ aliis omnibus, non minùs confici, quàm conservari perennè; Hoc insuper principium non quidem simplex, sed substantiis innumeris diversi generis concrescibilibus, ac cementosis non minùs promiscuè commixtum, quàm modis variis coagmentatum, infundi jugiter in humanum corpus; posse ideò hoc modis etiam innumeris à statu naturali recedere.

II. Nec exilior à principio bilioso scatebra morborum deducenda est, cum in morbis internis omnibus, vel ut causa, vel ut effectus vitium biliare ità frequenter concurrat, ut adhuc Hippocrates magnam partem febres, morbos inde alios penè omnes à bile salutandos statuerit.

III. Porro, quemadmodum quidquid per liquida animalis oleosum est, & simul concrescibile, seu pingue, ut ait Hipp. quod certè in animali non modicum est, in biliare elementum facessit, aut facesset, aut potest facessere, ut fusiùs in prima parte Historiæ nostræ probavimus; ità & quidquid ad hunc ordinem est, alterari facillimè potest, quoties ultra statum naturalem concrescat, aut exarescat, aut exasperetur: solvi, autem, aut concrescere, exarescere, & exasperari faciliùs potest, quodcumque ex actuosis, iisque dissimilibus partibus in se protinùs luctantibus, variasque in cohæsiones nitentibus, ut bilis, contexitur. Solvatur jam in sanguine ultra statum naturalem biliare recrementum: Illicò imminuta ejusdem secretio, quæ naturalem in segregabilibus liquidis cohæsionem expostulat, ut alibi probavimus: Concrescat, aut exarescat, ut in hoc lento,

Iento ; torridoque humore frequentius occurrit , minùs etiam per incerniculum suum transcolabitur , cui nempè officio determinata naturalis liquiditas deposcitur. Bilis ideò hoc aut illo modo , aut simul utrisque luxurians , & delinquens per sanguinem , vel in eo superstes , & infensa , vel ex eo in partes decidua , aut projecta , in illo , aut istis , aut utrisque , turbas varias , morbosque excitare potis est.

IV. Quælibet causa cujuscumque morbi , interna sit , aut externa , satis apta est aliquam , aut plurimas , aut omnes ex his biliaribus depravationibus producere. Estto jam causa quælibet recens manifesta , seu procathartica , sit insolatio , sit violentum exercitium , sit animi passio , aut vitus error , aut inedia , aut cutanea constipatio , aut alia quæcumque in subiectis dispositis bilis inordinatio , è vestigio revelatur , aut per speciales viscerum naturalium ardores , aut nauseam , aut vomitum , aut biliare urinarum saturatius lixivium , aut biliosas quomodocumque & ubivis effervescentias ; præcipuè per oris amaritiem , declinantis valetudinis ordinario nunciam , aut pedissequam ; ut jam febres omnes , aut alii morbi quicumque , acuti , aut longi aliquod erratum bilis per excretiones aliquas , aut omnes , aut Cutaneas habitudines , aut alia per partes corporis stygmata communiùs redoleant , cedantque deinceps , aut multum allevientur , si bilis vitiata , vel sincera , vel immixta naturaliter , aut etiam artificialiter , cum decenti concoctionis conditione è corpore expurgatur.

V. Si Hominum morbosè defunctorum extispicia consulimus , bilem in receptaculis suis improbitate semper aliquà plus minùs percitam animadvertimus ; modis enim assiduè variis differre bilem cysticam , & Hepaticam hominis quocumque modo morbosè denati , à bile cystica aut hepatica hominis non morbosè demortui , seu decollati , strangulati , aut aliter repentinè mactati constanter observavimus.

VI. Nec tantum facillimè super alios humores bilis in Homine depravatur , sed semel in morbis depravata , omnium etiam facillima in peiores adhuc depravationes festinat. Ita in principio

aut augmento plurimorum præcipuè ex bile solutiori morborum, si bilis delinquens opportunis præsiidiis consultò, citòque non premitur, morbi sæviores alii ex eadem quidem Causa, sed veluti nova, validiorique insurgente, acto vitiorum circulo, non infrequenter erumpunt. Ità febri biliari intermittenti faciliè subcontinua succedit, & postmodum continua; ex leviori ejusdem originis febre, acuta interdum supervenit, aut etiam perniciosa; ex colica biliari iliaca passio, aut Cholera morbus, ex eoque lypiria; ex diarrheæ biliosa simplici tenesmus, & dysenteria; ex pleuritide biliari phrenitis acerrima, juxtà illud Hippocratis „Lateris dolor cum biliosis sputis temere, aut præter rationem evanescens egros in vehementem, & furiosam mentis emotionem agit., Imò proprio interdum receptaculo collectabilis præternaturaliter soluta, tam bene coerceri non potest, quin in attiguas partes accerrimè, sæpe & exitialiter desæviat. Mulier quadragenaria ann. 1704. jam diu icterica, improvise decubuit cum extremorum omnium frigiditate marmoreâ, sudore gelido, siti, vomitu nunc irritò, nunc pleno. Post horas 24. ab invasione, in asphixiam & jactationem gravissimam concidens mente continuo valens, è vivis emigrabat. Aperto cadavere, omnia bene constituta. Sola cystis felleæ insignis turgescencia ex bile porracea liquidissima, ex qua ad duodenum arctè incumbente, ac notabilem liquidi sui copiam transfudante, ad ejusdem intestini superficiem per tres transversos digitos quasi ex caustico applicito profunda erosio proserpserat, hinc Lividitas Gangrenosa, unde prædicta omnia symptomata, morsque ipsa.

VII. Bilis in homine, ut facile ex quacunque alia morborum causa, ità manifestius ex animi affectibus afficitur, ac immediatius in ametriâ cietur. Familiares ex mentis pathematibus icteritiæ sunt: solemne enim est, irâ, mærore, interdum & metu, aliisque animi motibus q̃s primò amarescere, morde-ri interdum ventriculum, aut dolere intestina, vomitus biliosos explodi &c. occurrunt creberrimè biliales diarrheæ, aut tenesmi, colicæ biliosæ, aut cholera immaniores ex animi im-
petu

petu subitanè progenitæ. Domina quædam ptialissimum naturalem gerens, quacumque animi passione vehementius suscepta, salivam ex limpida, & insipida amaram, & flavam uberrimè expuit, non rarò biliosa simul diarrheæ corripitur cum oris intenso amarore, absque alio ulterius affectu: Quæ tamen, pacatâ mente, post diem unum, aut alterum spontè etiam solvuntur.

VIII. Bilis vel depravatur in sanguine, innatans adhuc cum sanguine, vel in colatorio aut receptaculo suo, secreta jam integrè à sanguine: utrobique indutâ in collectis invicem principiis suis specificâ cohæsionis vi, dissimili à cohæsione sanguinea, vel non febrifera est, vel febrifera. Non febrilis, cum in specificas suas cohæsionis vires tantummodo nititur, nisu ulterius alio, seu percussione in sanguinem, non factò: sic non integrè sanguinis extranea; ut in icteris variis, aliisque morbis biliosis sine febre, quo statu vel in sanguine, vel extra sanguinem tranquille in sese cohæret. Febrilis, cum nîsus insuper in Compositionem sanguinis elasticos, seu ut communiter dicitur, Phlogisticos edit, induta hoc pacto hostilis principii, seu manifestè contra vim sanguinis insurgentis naturâ; ut in febribus omnibus, aut morbis febrilibus biliosis. Hæc clariùs demonstrantur nostra de febre dissertatione.

IX. Consultò quidem biliosas cum antiquis nominare *putredines* omittemus, sed non cum modernis omittemus tot Causas morborum à biliaribus exorbitantiis auspicari, quum nobis per assiduam praxim compertum est, in quolibet morbo vel universalî, vel particulari, præcipuè cum febre conjuncto, si bilis concocta vel spontè vel per remedia egeratur, morbi declinationem elucescere. Morbi igitur præcipuè febriles ex bile innumeri procreantur; bili igitur, præcipuè in febrilibus morbis remediorum administrationes comparandæ.

X. Cur ergo biliosum morborum principium, tot sæculis ad Praxim multò felicioribus abundè recognitum, imò à natura animali agente, & patiente tot modis manifestatum, deformare, negligere, aut sub obscurioribus aliis in animali

salium, sulphurum, Caput mortuorum &c. nominibus perperam indigitare? Adesdum: bilis id ipsum sit, & bilem adhuc vocemus, quod bilis est, quod bilis fuit, quod bilis erit imposterum, & ut tale perpetuò noscendum, quemadmodum tot sæculis agnitum, totque magnorum hominum judiciis fuit.

XI. Enimverò, dum bilem inter morborum principia immediate collocandam aggredior, adversus salia, sulphura, & si quæ sint, alia Chemicorum notis obsignata elementa non illo animo insurgo, ut eadem è re animali illiberaliter proscribens videri possim. Volo quod ista sedent, agantque in unoquoque vivente; volo insuper quòd bilem ipsam componant, eique molem potissimam subministrent, ut primâ, & alterâ hujus historiæ parte per inditam bilis analysim enunciaui. Sed quando bilem in morborum syndrome memorare intendero, jam non divisim in bilis sulphura, non in salia, non in eorum complexus, aut proportionem, aut singulares agendi modos inquiram. (Nam cuinam hæc unquam revelata satis fuere, si quæ omnia ignis analysta è corporum visceribus eruit, deformata sunt, & à statu naturali divulsa?) Sed bilem veluti ex tota substantia operantem, & ex toto infestam memorabo; quæ scilicet sulphura, salia, aliaque principia in complexu suo spectabili simulque recondito non disjunctè sed collectim agentia conglutinat, & secum sub uno volumine importat.

XII. Guidettianam igitur ex Hippocrate sententiam recoligo: *Morbos præcipuos hominibus ex bile, & pituita exoriri*, eamque vel ipsismet innovantium modernorum votis firmandam esse conjicio. Quippe cum apud Theoricos, & apud Præceos optimates proclive sit judicare cruorosas propriè partes, quas globulos dicunt sanguineos, ex sese delinquere haudquaquam posse, nisi ab alio adjuncto principio aut vinciantur, aut stimulentur; quænam aderit humano corpori interna morbi conditio, ubi aut bilis, aut pituita immediate non delinquant, quarum certè primâ supra alia omnia principia sanguinis moleculis stimulum injicere potest, altera vinculum?

XIII. Sed ut continuò ad Hippocratem redeamus, quisnam

nam tanto hoc homine nitidiùs, ac solidiùs in primis Causarum per morbos delinquentium generibus adducendis sese expedivisse gloriabitur? Bina duntaxat ejusdem loca ex multis feligamus, quorum alterum *ex lib. de Morbis* decerpimus, alterum *ex lib. de affect.* Primum, „Morbi igitur omnes oriuntur partim „quidem ex iis, quæ in Corpore insunt pituita, & bile, partim verò ex his quæ extra obveniunt, laboribus, & vulneribus, quin & calidò supra modum calefaciente, à frigido „supra modum refrigerante, ex sicco plus æquo siccante, & „humido plus æquo humectante. Ac bilis quidem, & pituita unà oriuntur cum his, quæ in nobis nascuntur, & in corpore modò plus, modò minùs adsunt „ Alterum in rem nostram quadrantius „ Bilis autem, & pituita morbos excitant „cùm in corpore supra modum vel resiccantur, vel humectantur, vel incalescunt, vel refrigerantur. Hæc verò bili, & „pituitæ contingunt ex cibis, & potibus, laboribus, vulneribus, odoratu, auditu, visu, rebus venereis, calore & „frigore. „

3. Ut autem necessitudinis nostræ legibus defuisse non videar, observationes nonnullas circa ægrotudines bili imputandas, è schedulis meis collectas offero, illo cordis, animique candore, qui veros amicos decet, ut sumus nos ab ipsis medicina nostræ primordiis. Doctissimo Medico, felicissimo Practico, & ornatissimo Viro, qualis es, mi Bianchi Carissime, vulgaria nimis erunt, & levidensia quæ scribam; Sed vel meliora non dedit exercitii mei conditio, vel cultiora non novit ingenij mei imbecillitas. Cumque novarum rerum auctor esse non possim, novam expeto ab edendis lucubrationibus tuis cynosuram, quâ possim citiùs, & tutiùs agrotos meos in salutis portum deducere. Inter præjudicia, quæ ob bilis culpam humano corpori contingere me docuit experientia per annorum seriem (omissis ijs, quæ ab evidente ejusdem humoris exundatione per signa manifesta patefiunt in quibusdam peculiaribus morbis) gravissimi momenti sunt, quæ febricitantes, æstivo præsertim, & autumnali tempore subdolâ Tertianarum intermittentium, vel remittentium facie corripere consuecunt, & in progressu perniciosè furentes, lethales eventus,

eventus, vel saltem contumaces afferre. Et quamvis per dicta tempora anomala sæpius exurgant ægritudines, pro variâ anni, & tempestatum successivâ constitutione, ita & pro variâ regionum, & victus conditione; quedam tamen Cælo nostro respondens febrium indoles biliosa, & tertianaria pertinax, vel acuta, secundum magis, & minus quotannis, dictisque temporibus, veluti anniversariâ recurrenti consuetudine, excitari perhibetur, quæ, si medentes incautos offendat, amisso Tertiana nomine, malignarum personam induere solet, earumque ferocitatem simulare.

De Febribus Biliosis, stationariis, acutis, & perniciosis, vulgò etiam malignis nuncupatis.

Canones Practici.

C A N O N I.

Æ State, sicciori præsertim, ac fervidâ, cum maximè nec imbribus, nec ventorum flatibus squalori solatium, aut interspiratio interponitur; siccoque etiam, & australi succedente autumno, biliosæ perversitates, orgasmi, & irruptiones medentium operam fatigant. Inter has coctæ, aut solutæ, asperiorisque bilis, asperiusque idè in sanguinem vibrantis turgentias, introductâ in liquidis præcipuè fervidiorum hominum turbâ ingenti febrili, periodicâ, subcontinuâ, aut continuâ, pectoris indè, aut Capitis, aut aliarum partium irritativæ, aut etiam systrophicæ invasiones obveniunt; Viscerum præcipuè naturalium ætus, tensiones, crispaturæ, aut tumefactiones, aut etiam pulsationes; & ex Ametriâ per easdem partes evidenter biliosa nausæ, sitis, Cardialgiæ, ariditates, prostrationes, jactationes; mentis ulterius interdum concussiones, & tanquam deliræ confusiones imaginum. Cutaneæ quandoque maculatæ, papulosæ, exanthematicæ, aut aliter punctulares eruptiones. Tunc subitum in ore medicantium resonat nomen

nomen exquisitioris malignæ, suosque facile plaudentes habet: Quod tamen ut facile acceptatur, ita & facilius deponitur, cum nempe strepitus universus morbi, etiam ante stadia coctionum (sine quibus febres verè malignæ non judicantur) & sine consueto malignarum ambitu sedatur suaviter, ægris quasi repentinè convalescentibus; ac symptomatibus, vel à mediocri Catharsi, vel à sudore ante septimam leviusculo, præcipuè à modica, in morbi etiam augmento ingesti peruviani corticis copiâ, non difficile pacatis citò, tutò, & jucundè solutus perspicitur.

II. Summa itaque Clinicorum est, distinguere febres illas, quæ verè malignam naturam fortiuntur, à fomite nempe illo anomalo (dicant jam deleterium, dicant necroticum, aut aliud simile; id omne est semper adhuc anomalum) quod mole minimum est, nec imò sensile, activitate autem maximum, quod modis variis sanguinis crasim profundius evertit, quod quacumque cujuscumque humoris in homine pervicaciâ semper adhuc pervicacius est, febres, inquam, illas acutas distinguere, quæ omnibus promiscuè tempestatibus improvise, & intercurrenter invadunt, nec facile debellantur à remediis; motum, quantitatem, aut qualitatem humoralem directè respicientibus; nec tandem difficulter communicantur; distinguere inquam ab illis acutis febribus, quæ stationariè accedunt, quæque ab evidenti aliqua alicujus humoris aut plurium in motu, copia, qualitate, aut in omnibus simul delinquentia ortum ducunt; quas insuper delinquentias per varias tempestatum intemperantias, aut improbum rerum non naturalium regimen, aut aliam quamcumque manifestam causam excitari non obscure depræhendimus; quæ ideo febres non subdole invadunt, *veluti canis mordens, & non latrans*, ut proprium malignæ signaculum est, sed potius in clamorosa confestim erumpunt symptomata, quæ ideo in ipso etiam principio, cum minis & strepitu grassantur; ut facili nimis malignarum vocabulo, eò solùm exceptas animadvertamus, quod sæviùs primis aleis videantur obstrepere, & debacchari: Quæ tandem à subjectis in subjecta contagiosè non

communicantur. Hoc modo propriè malignæ à biliosis perniciosis jam faciliè distinguuntur.

III. Alia insuper præter exposita, biliosam acutam à maligna concomitantia discriminant; Decubitus, pulsus, facies, calor, sitis, ariditas, excreta &c. Præter exteriora quædam quam plurima, & fortuita; in quorum censu est, frequentius biliosam febrim in juvenibus esse, in maturioribus rarius, sed omnes malignam febrim promiscuè adoriri. Habitum in prima ad flavescentem inclinare, in altera ad lividum, aut luridum. Decubitus in biliosa febre levior, sed cum vehementi jactatione, & loci impatientia: in maligna gravior, sed minor jactatio, seu major motuum arbitrariarum resolutio. Pulsus semper celer, amplus, vel vibrosus, & plenus in prima, vix in accessionis principio sensibiliter immerfus, ordinario non inæqualis, non intermittens; in altera è converso. Facies in biliosè febrientibus vivax; in malignè, collapsa. Calor febrilis, sitis, ariditas, in primis vehementiora, in alteris ordinario minora, interdum nulla. Quoad excreta, in illis urinæ extra accessionis principium, & sæpè in subjectis fervidioribus etiam in accessionum principiis semper rubescences, aut flammeæ, ordinario lateritiæ, saturatæ insuper, & turbidæ, sed non confusæ, cum leviori, ac rubescenti encoremate: in his aut pallidæ, tenues, aqueæ, & similes, aut quales sanorum, aut quales jumentorum. Aliisque insuper, secundum varias subjectorum, ac tempestatum constitutiones, circumstantiis differunt inter sese magnopere malignæ & acutæ biliales; quæ ultimæ, secus ac primæ faciliè, ut supra frequenter ante statutos dies maturitatis morbi, non sine adstantium stupore, judicantur. Nam, ut alias dictum est, Rapida, & aperta in continuis verè biliosis febribus acuties facili diffinitioni viam sternit, communiter ante septimam, nisi senes, aut præviè valetudinarios adoriatur.

IV. Nec ideo eadem est Curatio febris exquisitè malignæ, & acutæ biliaris. Primæ extimulantibus prospicitur, auram veneficam ab arcto liquorum animalium complexu excutientibus; emeticis; vesicatoriis, purgantibus in principio fortioribus, si cacho-

cachochimia, quæcumque sit, primas vias obsideat, tum præ primis in fine status, concoctione appropinquante, aut jam factâ: revulsoriis insuper; & præcipuè diaphoreticis, & subtiliantibus, in augmento, eisque actuosis remediis, quæ cardiaca, & alexiteria nuncupantur. Acutæ autem biliales pacantibus, largis diluentibus, ac epicerasticis simpliciter excipiendæ, missio quidem cruoris, aut larga catharsis mediocris in principio adhibendæ: Prima si contumaces vigiliæ sint, dolor capitis constans, pulsus durus, ardor perpetuus, aut decubitus imminens, aut ea simul, aut aliqua, præcipuè in juvene, & robusto: Altera, si ista desint, præcipuè si ventris tensio percipitur, si nausea, si vomitus, si diarrhæa &c. Quod si principio intermittentes fuerint, aut Typum distinctè adhuc tertianarium conservent cum aliquali in periodorum ingressu perfrigeratione, ad usum febrifugi celeriter, etiam ante septimam, confugiendum. Sic bile furente ante concoctionis certamen constrictâ, & compressâ, posteriores ejusdem turgescentiæ & in viscera eruptiones faciliè præcaventur. De usu Peruviani corticis in tertianis hujusmodi perniciosus consulatur Nobilissimi, & Amicissimi Torti Therapeutica specialis, quæ in his febribus pertractandis palmam omnem cordatioribus hucusque præripit.

V. Verum tamen est, ex acutis biliosis febribus alias esse continentes, alias essentialiter continuas sed periodicas, alias solum subcontinuas. Continentes biliosæ ardentes sunt, seu synochales intensæ aut Causones, stadia brevissima percurrentes, ita Hippocrates *lib. de vict. rat. in acut: Causus idest febris ardens fit, cum venula tempore æstivo exiccata acres, & biliosos ichoras ad se traxerint.* Has febres apprimè delet pura & frigida copiosissimè epota, præcipuè in juvenibus, & stomacho robusto præditis. Continuæ periodicæ vel solitariæ sunt, in quarum curatione remediis, ut supra, incedendum est; vel complicatæ per phlogosin, aut per non phlogosin cum peculiaribus partium affectibus, ut quæ cum hepatitide, ictero, aut affectu pulmonum inflammatorio bilioso, vel essentialiter, vel etiam symptomaticè effervescunt. Rursus in aliquibus hisce febribus

ulteriores insuper complicationes aggeruntur; nam sæpius in his febribus, ictero, opilationi Hepatis, aut etiam Hepatitidi copulatis, affectus pectoris, aut Capitis systrophici, aut simpliciter irritativi per anadromem, aut epigenesim superducuntur. Has etiam febres, ut supra, post debitas Catharces, sanguinis missiones, & revulsiones, ante singulares decubitus debito febri-fugo citò oppugnandas admonemus. Catharseos, & missionis sanguinis occasiones in febribus biliosis, hepatis, aut pulmonis affectui phlogistico, aut non phlogistico complicatis, inferius attingemus cum de pleuritide biliosa, hepatitide, ictero &c. Indicationem *Plebotomia* in continuis solitariis biliosis non solum symptomatum habitudines, aut decubituum dispositiones intendunt, aut moderant, sed varia insuper exteriora. Quæ inter, præter omnia quæ ab ætate, sexu, & anni tempore peti possunt, à climate, regione, ventorum dominatu, & victus regimine potiora disponuntur. Ita non solum qui ad plagas australes degunt; sed qui ventis australibus dumtaxat subjiuntur, sanguinis missionem, difficulter tolerant, quandoque lethalem experiuntur: Qui borealibus distantur, ut plurimum facilius tolerant; Qui occidentalibus facillimè perferunt. Lusitani facilius Hispanis; Hispani Gallis; Galli Italis, & inter Italos Insubres facilius Romanis, hi Neapolitanis, Calabris, & Siculis, liberalem Phlebotomiam patiuntur. Quod si regionibus, aut ventis occidentalibus subditi, simul etiam victu perfruantur euchymo, & vino præcipuè abundanti, aut generosiori potionentur, frequentioribus venæ aperturis recreari solent; non item qui cerevisia, aut liquore alio non bene vinoso, multò minùs qui aqua pro potu ordinariò utuntur. Subcontinue tandem acutæ biliosæ simplices servant adhuc naturam intermittentium tertianarum, quarum genus è Limine, principio scilicet intermittentes, implevere, indutâ postea per accidens continuitate, & simul vehementiâ symptomatum; distinctis tamen circuituum remissionibus, ac exacerbationibus constanter adhuc stipantur: quæ ideo si prosperè judicentur, ante judicationem in pristinas, aut pristinis analogas intermittentiæ periodos, ut plurimum, restituantur.

Ob

Ob hanc rationem hujusmodi naturæ febres tertianæ perniciosæ etiam nuncupantur, cum graviora secum ducunt symptomata, veluti à typo tertianario non recedentes, vel eundem ex sese repetentes, si fortè recesserint. Hæ si fortiter desæviant, præcipuè in subjectis senilibus, attritis, aut delicatulis cum virium eversione, aut languore notabili, statim à principio peruviano cortice comprimantur; Cui certè auxilio facillimè cedunt. Exempla aliquot ex hisce biliosis acutis febribus subcontinuis, seu perniciosis tertianis ocysimè peruviano Cortice debellatis, tum varia in hoc morborum genere, hujusque remedii administratione observanda, inferiùs conferemus, cum de Epidemiis biliosis ann. elapso. 1718. & 1719. & signatim in Tractatu eisdem appenso *de usu hujus Corticis, seu china-china in his febribus.*

V I. Hanc febrium biliosarum speciem, seu subcontinuas simplices fortasse respicit textus ille Hippocraticus *ex lib. 1. morb. vulgar.* „Quæ diebus imparibus invasiones habent, ea diebus paribus decernuntur. Quorum verò accessiones imparibus diebus fiunt, ea in paribus judicantur. „Et ille alius *lib. 2. de eisdem morb. vulgar.* Febres, quæ uno die intermissionem, altero verò perfriktionem habent, judicium ad septimum circuitum sustentant. „ Jam in primo textu loquitur Hipp. de febre continua periodica, in alio autem de febre prius intermittente, & postmodum continuâ videtur differere: ut ideò in utriusque subcontinuæ conditionem haberi conjicere possimus. Reverà, quas febres subcontinuas biliales simplices sibi ipsis in subjectis variis interdum relinquimus, nec febrifugis ante integrum earum circuitum abrumpere nitimur, hæc juxta memorata divini senis oracula judicari deprehendimus.

V I I. Indolem harum febrium ex bile, fortuito continuarum seu subcontinuarum, quæ ideò intermittentium naturam adhuc redolent, plus esse tumultuariam, quam malignam annuere videtur idem Hippocrates *in Coac. prænot. & aphor.* „Febris, si quibus aliquando intermiserit, periculum abesse significat. „ adeò ut quotiescumque divinus senex etiam in *Coacis* effatur.

„Febres, quæ proximè ad tertianarum naturam accedunt cum
 „incontinenti Corporis jactatione malignas esse, non legitimam
 malignitatem intelligendam reor, qualis est in febribus mias-
 maticis, & deleteriis superius allegatis, sed solam symptoma-
 tum pervicaciam, & ferociam. Quot etenim per æstates, aut
 alia tempora pervagantur tertianæ, simplices, aut duplices,
 legitimæ, aut spurix, quin imò & subcontinæ, quæ summas
 in paroxysmis jactationes ducendo, ne hilum quidem discedunt
 à febrium benignarum natura?

VIII. Quod spectat ad biliosas febres continuas cum affe-
 ctu particulari præcipuè pulmonico, complicatas; verum qui-
 dem est Hippocratem *in prædict. & Coacis* enunciare. „Febres in
 „præcordiorum doloribus obortas malignas esse, sed altum
 nimis sermonem, veluti genericum, omnes indiscriminatim
 præcordiorum ac hypochondriorum dolores immiscentem, in-
 telligendum reputo, vel in solis præcordiorum affectibus ex
 vitio syderati sanguinis, non autem bilis; vel etiam in allata
 superius significatione quo ad meram symptomatum feritatem:
 Præcipuè quod idem Hipp. eidem loco superaddat „Febres,
 „quæ soporem, & lassitudinem inducunt, aut in quibus cali-
 „gant ægri, insomniis, ac tenuibus sudoribus vexantur, mali-
 „gnæ sunt. His namque malignis signaculis ordinario carent
 febres biliosæ, ictericæ, aut non ictericæ, quæ hepatidem,
 aut pleuritidem faciunt, aut comitantur, aut consequuntur:
 quod melius elucescet inferius, cum de biliosis horum affectuum
 generibus.

IX. Cæterum, bilem, suprà alios animalis succos, etiam in
 propriè malignis febribus, saltem symptomaticè, depravari,
 præter viros alios cujuscumque ætatis consultissimos, testis mihi
 novissimus est Præsul B. M. Lancisius in aureo ejus opere *de*
noxiis Paludum effluviis, ubi febres malignas legitimas ex ve-
 nefico ab aquis palustribus variè vitiatis afflatu, ac miasmate
 excitatas egregiè describit per epidemias Romanas, Urbeveta-
 nam, Balneoregiensem, Pifaurensensem, & Ferentinensem. Obser-
 vabat Vir Cl. in cadaveribus denatorum ab his febribus, quas
 ut

ut ab extraneo forinsecus inducto , tertianas perniciosas nuncupatur , *hepar potissimum subfusi , ac bilem cysticam atrii coloris passim occurrentia*. Simili pariter animadversioni nostra in variè malignis febribus extispicia collimant , quibus bilem cysticam non tantum atratam , sed ulterius instar picis interdum concretam , non raro fætidissimam , milleque aliis modis delinquentem deprehendimus. In hominibus , imò in bestiis omnibus , quas culter anatomicus perlustravit , veneno quocumque narcotico , aut caustico lentè aut ocyssimè sublatis , bilis illicò in locis suis omnibus notabiliter depravatam se præbet. Similes quo ad bilem in promptuariis suis deterrimam recognitam , in hominibus , aut brutis veneno propriè pestilentiali , etiam subitanè , sublatis observationes tum nostris inspectionibus , tum aliis penès authores creberrimis debemus. Sed avertat à nobis salutis author Deus opt. max. quæ sua est in humanum genus interminabilis commiseratio , minitantem his diebus jam propè veneficam epidemicam labem ; ne in hoc observationum genere nimio certè infortunio instructiores simus. Hæc interim abundè valeant firmandis superioribus assertis de bilis vitio immediato , aut essentiali , aut symptomatrico in pene iis omnibus animalis morbis , qui vitiis fluidorum imputantur.

4. *Pleuritides insuper , & peripeumonias peracutas , nedum autumno , aut ineunte hyeme , sed etiam verno , & æstivis temporibus ab huiusmodi biliari fluido exorbitante partas inspexi , quæ nullo ex consuetis evictæ præsidiiis funera cumulabant , nisi variatâ prorsus medendi methodo nova forent aptata remedia , biliosis passim irruptionibus obsistentia , ut in observationibus infra recensendis exponam.*

DE VARIO PLEURITIDIS GENERE,
Et signatim de biliosa Pleuritide.

TRACTATUS.

Pleuritis in genere quatuorplex sit.

§. I. **P**leuritis in genere septifariam est. Prima Pleuritis verè Phlogistica, seu inflammatoria, & ducitur immediatè à sanguine. 2^a. Catharralis, à pituita, seu cum modernis à lymphæ: 3^a. mixtè, seu lymphatico - sanguinea: 4^a. spasmodica, seu Crispativa, immediatè ex solido pulmonali: 5^a. stomachalis, aut intestinalis, & ut communiter dicitur, verminosa: 6^a. Hepatica, seu typhodes cachochima, symptomatrica: 7^a. tandem biliosa, seu typhodes essentialis. Singulæ species per signa sua specialia internosci possunt, & diligenter distingui, Nostræ quæ statim succedent, in signis harum omnium pleuritidum imò & in curationibus nonnihil peragrandis digressiones longiusculæ eo institutæ sunt, ut ex omnibus pleuritidum generibus juxta se positis biliosæ susceptum genus exquisitius elucescat:

Signa Pleuritidis inflammatoriae legitima.

§. II. Pleuritis inflammatoria legitima comitem ducit febrim exquisitè acutam, continentem, vix saltem sensibilibus periodicam; pulsum notabiliter vibrosum, & stabiliter durum; dolorem lateris punctim laceffentem, perpetuum, & immutabilem, ad anteriora, posteriora, aut lateralia Thoracis, præcipue versus jugulum, humerum aut scapulam, saltem immediate ad mammam, & ut ait Hipp. *Cum gravitate consistente ad brachium*; magnam insuper respirandi angustiam; genæ unius, quæ parti affectæ respondet aut ambarum saturatum ruborem; rubescences, ac scintillantes oculos; sanguinis tenuis, & floridi, nunc sinceri, nunc fero, aut mucis quandoque immixti assiduam cum tussi violenta

violenta expuitionem, jaëtationem, vigiliam, linguam rubram, asperam & rigidam, interdum & nigram, cui tamen vix fitis adjungitur. Pleuritis hujusmodi nullâ quidem ordinario prævia fluxione, aut alio pulmonis affectu, sed aliquâ solum in rebus non naturalibus præmissâ delinquentiâ procatharticâ notabili, nunc cum rigore aliquo inter exordia plus minus molesto, interdum nullo, juvenes præcipue & plethoricos adoritur, extractus cruor crustâ quidem gelatinosa ut plurimum contegitur, sub ea tamen rutilus, compactus, & firmus. Dolor, febris, spirandi angustia, tussis, sputum cruentum, principio simul omnia invadunt. Verno præcipue tempore hujusmodi pleuritides excitantur.

Signa Pleuritidis Lymphaticæ

§. III. Pleuritis Lymphatica, seu Catharralis multò lentius inchoat, ordinario cum multo rigore: Dolor, aut tussis, aut utrumque præcedunt febrem: Hinc omnia paulatim augescunt. Interdum dolor ante septimam videtur disparere: sed mox recrudescit: Progressu interdum vagus, interdum vix sensibilis; Minoris cæterum, quàm in legitimè phlogistica, momenti sunt doloris acuties, & respirandi difficultas: pallidæ expuitiones, vel à principio crassiusculæ, nunc cum aliquo sanguine minùs coccineo, grumefacto, aut fibroso, nunc prorsùs sine sanguine: extractus sanguis densâ, albidâque gelatinâ coopertus, interiùs luridus, solutus, & flacidus. Pulsus mollior: genæ, lingua, & urina pallentes: concidentes oculi, & facies; febris mediocris, distinctè periodica; non rarò quotidie ad vespertas cum aliqua horripilatione se exacerbans, manè cum sudore leviusculo, aut etiam sine sudore remittens; decubitus gravis; frigidos, humidos, anhelosos, tussiculosos, sedentarios, hyeme præsertim adoriens; ultra exquisitam diuturnior, utpotè rarissimè ante decimam septimam desinens.

Signa Pleuritidis Mixtæ , seu lymphatico - sanguineæ.

§. IV. Mixta pleuritis, seu Lymphatico - sanguinea, mediam inter utrasque signorum syndromem ducit: Mixtæ ex pituitoso, & sanguineo constanter anacatharses: febris interim ut plurimum exquisitæ phlogisticæ acutiem simulat, licet cum pulsus remissiori duritie facilè per sudores judicatur; hinc versùs quartam leves ordinariò sudatiunculæ, versùs septimam, & ulterius uberiores, utilioresque. Pleuritidis species hujusmodi in borealibus plagis super alias omnes communior est.

Signa Pleuritidis Convulsivæ.

§. V. Convulsiva Pleuritis, principio violentissima est, sed celeriter, & ut plurimum ante quartam, aut circa quartam sedatur, febre potissimum adventante, aut ingravescente. Equidem in hac pleuritide dolor febrim per diem unum, aut alterum ordinario antecedit, dolorique ingravescenti accedens, aut ingravescens febris remedio est, ut in aliis etiam convulsionibus, Hipocratis, & praxeos testimonia sat perhibent. In hoc interim morbo ut dolor acutissimus affligit ita & angustissima, ac inæqualis respiratio, cum tussi, aut non ita frequenti, aut semper sicca, & inani, tum ob doloris vehementiam difficilimâ. Febris quæ accedit sat valida est; pulsus tamen non adeò durus est ut pulsui Phlogisticæ pleuritidis similetur, annuit hujusmodi Pleuritidem Hipp. 3. de morbis: *sunt, & sicca pleuritides sine sputo, quæ difficiles sunt; judicationes similes aliis sunt, sed ampliore in potu humectatione indigent, quàm alie. Biliosæ verò & sanguineæ nonâ & undecimâ die judicantur.*

*Pleuritides ex primis viis manifestè symptomaticæ;
earumque signa aliquot.*

§. VI. Pleuritis stomachalis, seu communiter verminosa
pueros

pueros præcipuè infestat cum ventris rugitu, & tensione, halitu acido, & graveolente, ventris fluore, & dolore punctorio: dolor hujusmodi sinistram, ut plurimum, pectoris regionem occupat; propagatur indè aut ad correspondens hypochondrium, aut etiam ad epigastrium. Ex copiosa excretionem per sedem, aut vomitum, præcipuè per verminosas dejectiones feliciter, citoque judicatur. Interea tussis, sputo sanguineo, dolore ad mammas, spirandi difficultate, febre interdum, & pulsu pleuritides alias systrophicas acutiores æmulatur. Huic pleuresi accensendæ sunt pleuritides flatuosæ, & hypochondriacæ, quæ à Ballonio, Baglivo, aliisque memorantur. In his ex visceribus inferioribus ad mammas, sternum, & Thoracis latera dolores ascendunt, ob membranarum ventris, diaphragmatis, Thoracis, præcordiorum, pulmonumque consensum, & complicationem. Sed spuria hujusmodi pleureses, non minùs ac stomachalis prædicta, pulmones non intimè invadunt, symptomaticè, veluti elonginquo laceßunt: Ita flatuosa, præcipuè & hypochondriaca partes solùm spiritales externas, & costas vix nothas communiùs occupant, cum doloris propagatione ad epigastrium, & ad hypochondria, seu, ut Hypocraticam vocem adhibeam, ad præcordia. Hæc remedio aliquo discutiente, aut anodino, ut spiritu anisi, chochlear. cherefol. diascord. req. Nic. Bezoart. vegetalibus facillè discutiuntur: sed de his symptomaticis, spurisque pleuritidum classibus, peculiarem suo loco tractatum conficiemus.

Signa Pleuritidis Hepaticæ, seu Hepatitidis Pleuritica.

§. VII. Pleuritis hepatica, seu hepatitis pleuritica, systrophicum pariter pulmonis affectum similat, imò & frequentius ipsammet pleuritidem inflammatoriam exquisitam, superius connotatam. Febris acuta confectatur cum pulsu etiam duriusculo: difficilis respiratio; cruentæ cum tussi expuitiones; dolor ad dexteram Thoracis partem profundè torquens, malæ dextræ, multum supra sinistram, intensus rubor. Interea tinctura quæ-

dam icterica, aut subicterica per cutim, oculos, linguam, & excreta omnia, præcipuè per lotium suffunditur; per os, & fauces intensa, & assidua amarities cum siti, & ariditate; bilis in sputo constans, perassata, commixta cum sanguine, dolor ad costas spurias descendit, & obtusè ad dextrum hypochondrium affigitur; ibi insuper, vel ad tactum leviolem molestissima sensatio; ibi tensio, tumor, renitentia, & durities totam hepatis molem circumscribens; ibi calor intensior, ibi tandem assiduæ jactationis, sitis, ardoris, ariditatis, totiusque morbi principium. Cur jecoris phlogosi passio hæc pulmonis succedat declarare inferiùs conabimur.

Signa Pleuritidis propriè biliosæ.

§. VIII. Venio tandem ad septimum illud genus Pleuritidis, quod nostri instituti Caput est, pleuritidis scilicet verè biliosæ, non jam ex prævio hepatis affectu sympatricæ, aut symptomaticæ ut superior est, sed ex immediata bilis à sanguine in pulmones irruptione, idiopaticæ, & essentialis. Hæc igitur biliosa pleuritis, quam post Hippocratem, à nemine, quod sciam, satis consideratam depræhendo, principio, imò & progressu suo communiter Phlogisticam pulmonis legitimam pleuritidem febris, pulsu, dolore, tussi, sputo sanguineo, ac spirandi difficultate mentitur; quod pariter de superiori pleuritide, seu hepatica dicebamus: Ipsam interea quædam speciatim comitantur, quæ ab alia quacumque pleuritide distinguunt; oris amaror assiduus, cum nausea pariter perpetua; frequenter & vomitu biliosorum, & viscidorum; dolores ventris præcipuè ad epigastrium, non raro cum diarrhæa; imò & interdum tenesmo; sitis inprimis quasi inextinguibilis, atque à potu ordinariè recrudescent; Et lingua flavescent lentore incrustata, seu ut exponit *Duretus*, lingua bile suffusa; mollis adhuc tamen non aspera, non ficca, non hiulca. Nulla cæterum sitis est ordinariò, aut linguæ sordities, cujusmodi in aliis pleuritidum generibus adest, si pleuriticam hepatidem excipias. Febris adest distinctè periodica, typum insuper tertianarium commu-

communiter servans , seu cum majori diebus imparibus ingra-
vescentia , ut ideò conjiciam , Galenum de febre biliosæ pleu-
ritidis fuisse locutum , cum dixerit in comm. ad aphor. 12. lib. 1.
Pleuritidis accessiones magnam partem existere tertianæ. Jungi-
tur febri calor acerrimus , qui alii cuicumque pleuritidi com-
munis adeò non est. Contumaces vigiliæ , interdum & sub-
deliria , pariter copulantur. Pulsus in morbi progressu sensim
à duritie remittit , præcipuè post catharsim. Pleuritis biliosa
dolorem suum frequentius affigit parti dextræ , cum Hepate
correspondenti ; ab hepatica tamen pleuritide manifestè distin-
guitur ; quòd nulla durities , nullus tumor , dolor , tensio , aut
calor intensior , ad dextrum hypochondrium occurrant ; quæ
prævium aut socium hepatis affectum exhibeant , ut in hepa-
tica pleuritide accedit. Sed & interdum biliosæ pleuritidis
dolor est sub mamma sinistra , etiam usque ad jugulum ejusdem
lateris exporrectus , absque invasione partis dextræ , ut non
ità pridem in muliere ad Portam Padi decumbente videre fuit.
In hac pleuritide sputa cum sanguine biliosa sunt , seu non so-
lum intensè , etiam à Principio , flavescentia , sed etiam ut plu-
rimum amara. Galenus ex sputo totus est in genere peculiari
pleuritidis judicando. Ita de constit. art. Isag. Cap. 15. effatur :
Quod sputo rejicitur necesse est aliquo semper esse infectum colore ;
attamen non semper eodem : Quippe quum nec excrementum in in-
flammata parte conclusum semper ejusdem sit naturæ. Etenim cum
sanguinolentum fuerit , aut biliosum , cujusmodi ferè semper ea fluxio
est , quæ pleuriticis plegmones fomentum præstat , à succo detento in
inflammata particula sputum colore inficitur ; rubro quidem si sangui-
neum id fuerit , quod in membranam influit , flavo autem si biliosum.
& de loc. affect. lib. 2. cap. 9. asserit : *In pleuritide sæpenumero*
magis biliosum , in peripneumonia verò magis pituitosum sputum se-
qui consuevit : & insuper Comment. 6. Aphor. 33. ex solo flaves-
centi sputo biliosam pleuritidem auspicatur : Dictum autem à
nobis est , ubi de morbo laterali sermonem habuimus , quod latera-
lium morborum hic quidem , qui unà cum pallidis , & flavis sit
sputis ex biliosis humoribus ortum habet : Nos autem ad signum
biliosæ

biliosæ pleuritidis pathognomonicum instituendum alia ulterius præter flavescens sputum, bilis primario delinquentis indicia, aut memorata, aut memoranda deposcimus. Sputi namque flavedo interdum ex sola catharri pulmonici maturatione, quandoque ex inflammati visceris calore, seu veluti perassatione ortum ducit. Venter in hac pleuritide progressu morbi intumescit, nisi citius biliosa diarrhæa superveniat. Tandem cum malè judicatur morbus, sputo suppresso, & diarrhæa suppetias non veniente, Pleuriticus post diurnas vigilias in delirium facescit. Sequentia hæc ad diagnosim biliosæ pleuritidis affert Gravissimus Foësius ex indefessa Hippocratis interpretatione: *Cum verò in Thoracem bilis fluxionem commoverit, hinc conspicuum fiet: Dolor lateris mollitudinem occupat, & ad jugulum ejusdem Partis pertingit; febris adest, & lingua superiori parte ex viridi pallescit, & condensata excreantur. Huic morbo periculum septimo aut nono creatur.* Extractus sanguis in biliosa pleuritide gelatinoso tegmine non obducitur, saltem communiter, & præcipuè in biliosis & picrocholis, sed vel rutilus est tantummodò, & compactus sine sero innatante, aut cum vix pauco, eoque flavescenti, & soluto. Quod si extracto sanguini in aliquibus biliosâ pleuritide affectis concretum aliquid supercrescat, id intensè flavescens est. In Phlogistica, aut etiam catharrali pleuritide sanguini è vena extracto crusta alba plus minùs supersternitur; quin imò si hæc crusta saltem ad secundam missionem non appareat, malum; nec ampliùs morbo repetita sanguinis extractio opitulatur. Urinæ in biliosa pleuritide biliosæ notabiliter sunt, seu crassæ saturatæ, Croceæ, & ad lateritium accedentes. Corripit ordinario biliosa pleuritis biliosos, ictericos, aut subictericos, aut prævio alio bilis affectu præhenso. Verè, ut plurimum, non accedit, sed solùm æstate, autumno, imò & hyeme, quæ autumno sicciori succedat: Quod si Verno tempore obveniat, semina ab hoc tempore eidem procreata non sunt, sed præcedenti æstate, ex cujus intemperie igniculi biliales morbifici in sanguine cumulabantur, autumno postea relictî, mox per hiemem compressi, novoque vernali æthere exci-

excitati, ut alibi clariùs probabimus, cum de tertiana intermittente biliosa. Ità vere superioris anni 1719. cujus & hiemis præcedentis constitutiones fuere intemperatæ; veris scilicet constitutio hiemalis, hiemis verna, cæteris hyemalibus morbis, præcipuè pleuritidibus sincerè phlogisticis, catarralibus, aut mixtis plurimæ pariter biliosæ pleuritides intermiscebantur, cum siti, fervoribus universalibus distinctè periodicis, aliisque propriis biliosi erroris signaculis. Nunc ad biliosæ pleuritidis curationem; & obiter primùm de aliorum pleuritidis generum curationibus, saltem quoad principes curandi scopos, sanguinis missionem, Catharticum, & alterantia intus sumpta. Prognosis inde Hippocratica, aliaque ex tanto hoc Præceptore notabilia ad magnum pleuritidis negotium facientia, post curationem exscribentur, nec non tractatum absolvent.

De occasione Phlebotomiæ in Pleuritide acuta in genere; & obiter de signis concoctionis in eodem morbo.

§. IX. Quoad usum Phlebotomiæ; in genere sanguis in pleuritide acuta mittendus, aut non mittendus, tum in sudore, tum in non sudore, tum in Anacatharsi, tum in non anacatharsi, secundum circumstantias alias præter sudorem & anacatharsim; parùm ex se se quoad mittendum, aut non mittendum indicantibus copiâ, qualitate, aut tempore sudoris, aut sputi, si epiphenomena alia non respiciantur. Revera si sudor non accedit, aut cum nullo sublevamine accedit, sanguis detrahendus est; si cum anacatharsi accedit; aut etiam sine anacatharsi, cum febris, doloris, & spirandi levamine, sanguinis missionem non imperato: si sudor obvenit cum imminuta quidem febre, sed duro adhuc pulsu, presso adhuc pectore, nec viribus prorsus conflictis; adhuc imperato. Si sudor accedit ad septimam, vel etiam post septimam, & mox recedit, morbo non soluto, sputoque non facili, jam vel est à spasmodica diathesi aut vasorum plenitudine generali, aut particulari, cutis spiracula, aut tracheas, & bronchia, aut simul coarctante; & iteratò mittendus;

vel

vel ob imbecillitatem generalem corporis , aut particularem
 pressioni pulmonum ; & non mittendus. Caveto igitur ne hal-
 lucineris à sudore , quantumvis universali in principio legitimæ
 Pleuritidis ; præcipuè cum urinis non coctis, tenuibus, aut etiam
 saturatis , ut à sanguinis detractone arcearis. Phlebotomatus
 æger , & sæpiùs vel in sudore principii , & augmenti , si expe-
 diat , faciliùs adhuc sudabit ; hinc sudor ad morbi statum , seu
 versus septimam opulentiùs accumulabitur , & ad nonam , aut
 undecimam judicabit. Hoc adhuc adnotato , quod mihi mul-
 tiplex experientia suggessit : Qui in pleuritide legitima die se-
 cundâ , aut tertiâ post debitas sanguinis missiones , livescunt in
 facie , aut inflantur vehementer in venis colli , omnes ordina-
 riò , vel ante septimam , vel in septima , vel non diu ultrâ
 septimam depereunt. Valens anacatharsis quotiescumque per
 gradus augescens , gradualiter etiam dolorem lenit cum febre,
 & sublevat spirandi angustiam , sanguinis missionem prohibet ;
 imperat , si quidem libera , nec tamen auxilians. In genere
 concocta integrè anacatharsis Cruoris missionem prohibet , in-
 concocta , aut imperfectè concocta jubet , aut tolerat. Nec ta-
 men sputi concoctio judicanda est vel ex copia , quæ sæpe ab
 nimia partis affectæ laxitate, lethaliq[ue] stagnatione, aut metha-
 stasi ortum ducit ; vel ex colore , cum sputi flavedo , aut sub-
 flavedo ex biliari interdum funesta pleuritide accedat ; aut ni-
 mio fervore pulmonum , catharri in bronchiis depluvia veluti
 perassante ; non insuper à consistentia , nam sputum sæpè visci-
 dulum , aut viscidum , aut aliter consistens ab exsiccativa par-
 tis inflammatione derivat , non autem à laudabili concoctione.
 Sic in hoc affectu sputa principio viscida , quæ semper viscidio-
 ra fiunt , perniciofa sunt , & ordinario prænunciant interitum.
 Bona ex sputo concoctio per mediocrem consistentiæ gradum
 indicatur , quæ nempe consistentia ad morbi principium in-
 choans , insensiliter usque ad quartam , aut etiam septimam
 diem accrescit, ibidemque subsistit ; nec ulterius pulmonis liqua-
 mina indurantur ; ex facilitate insuper expectorationis , cum
 proportionato virium , febris , vocis , respirationis , decubitus,
 &

& doloris sublevamine: magis ideo concoctio ex statu generali Corporis, quàm peculiari partis affectu exploratur. Pepasum siquidem in morbis non unicum speciale signum depromit, sed plura, & communia: ideo ait expertissimus Duretus in Coacis Hipp. *frustra materia in parte aliqua suspicitur concoctio, si universitatis excrementa sunt cruda.*

De Catharsi in Inflammatoria Pleuritide, non biliari.

§. X. Pleuritis phlogistica legitima nullam ante septimam admittit Catharsim, imò nec post septimam, donec concocta sit, aut suppurata & abrupta. Si viscerum naturalium aliquis cachochilia comitetur, suppleant simplicia diluentia largius assumpta, aut etiam clysteres Lotorii. Viscerum siquidem inflammatorias tensiones intendunt ulterius, laceffunt, crispantque irritamenta cathartorum; quorum nempe impetus, & percussiones in fibras jam nimium intentas, & fortius vibrantes durius etiam impingunt; nec ideo nisi violentæ, & coactæ feri utilioris expressiones sunt, qui non tantum in pulmonis, quàm aliorum viscerum sinceris inflammationibus fluores alvi spontè, aut per remedia contingunt: *Quacumque ea quæ inflammata sunt* (Hippocrates 4. auctor.) *statim in principio morborum medicamento solvere aggrediuntur, hi de intento quidem, ac inflammato nihil auferunt, non enim remittit affectio, quæ adhuc cruda est; quæ verò morbo resistunt, & sana sunt colliquesaciunt.* Ita divinus senex non solum artificialem alvinam purgationem in vera pulmonis sinceraque inflammatione angue pejus declinat; sed ipsammet spontaneam condemnat: *A morbo laterali, vel pulmonis habito alvi profluvium adveniens, malum* Aphor. XVI. sect. VI. Nonne igitur in exquisita hac pleuritide jugulabunt emetica, à practicis variis in quacumque indifferenter pleuritide, & maximè primis aleis usurpata? nonne ex emeticis, supra simplicium cathartorum vires, succussâ magis, & irritatâ internarum partium contractilitate, major redundabit ad affectos pulmones irruentia, percussio, & aggestio? sola jam

ex artis auxiliis in hoc affectu præito sint revellentia, derivantia, ac evacuantia per phlebotomiam debitè, citòque adhibita; diluentia, Epiceraistica, relaxantia; humida, blandaque diaphoretica, calidiuscula semper omnia, oleosa insuper simplicia aliqua intermiscenda, interdum & fons, & pediluvia. Quod confirmat Galenus Comment. 1. lib. de rat. vict. in morb. acut. Cap. 33. asserens: *Pleuritici doloris esse remedia tria: nempe fomenta calida, sanguinis detractionem, & purgationem*: Sed hæc ultima post concoctionem humorum intelligenda venit in inflammatoria exquisita pleuritide. Reliquum naturæ committendum.

De Tumore Pulmonis Phlogistico in Necrosim vergente.

§. XI. Dixi revellentia, & hujus generis similia esse citò adhibenda. Nam si in exquisito, & prægrandi pulmonis tumore phlegmonoso intercepti nimium cruoris fluxus, & refluxus per visceris vasculares angustias, tempestivè satis non restituantur, periculum est, ne vitales motus integrè obruantur, ac inflammatum viscus in syderationem, gangrænam, aut sphacelum funestè prolabatur: Hunc morbi successum laudabili analogismo apoplexiam pulmonum nonnulli appellarunt. Deprimatur hæc calamitas à subita in morbi augmento doloris evanescencia, cum pulsu repentinè prostrato, factoque exili, & inæquali, & aliquando intermittente, ac solidis resolutis, etiam inopinatò molli; sudoribus frigidis, frigidis etiam exterioribus, syncope frequenti, facie collapsâ, & lividâ; respiratione rarâ, & inæquali, simulque suspiriosâ, & sublimi; præcipuè exspuito magis, magisque livescente, & ærugineo reddito, aut nigro aut etiam subitanè suppresso. Hippocrates in *Coacis* exquisitam hanc pulmonum inflammationem in syderationes abeuntem dignis Laconismis describit: *Quibus tota lingua fit alba, & aspera, pulmonis ambæ partes inflammantur: Quibus autem dimidia, tantum illa pars, quæ spectatur: Et quibus ad unam claviculam dolor est; una supera pulmonis ala agrotat: Quibus autem ad ambas claviculas dolor urget, ambæ superæ pulmonis ala laborant:*

& quibus circa mediam costam, ibi & media: Quibus autem circa septum transversum, infera quoque ibi: at vero quibus dimidia pars tota pulmonis obsessa est phlegmone; omnia quæ adjacent ei parti laborant. Ergo si vehementer inflammentur aortæ (intellige pulmonum bronchia, ex interpretatione Dureti) ut in latus incumbant; & corpus ea parte resolvitur, & costa exterior livore tegitur. Hujusmodi autem peripneumonicos prisci vocabant syderatos. Tum syderationem Pulmonis pleuritica inferiùs adhuc rememorat: Quod si totus pulmo inflammetur cum corde, ut in latus procidat, resolvitur totus ager, jacetque frigidus, & sensus expers: moritur autem secundum, aut tertium diem agens. Sin autem sine corde contigerit, idque minùs; seriùs vitam finiunt. Pulmonem in latus procidere est motum solidi cum vita in hoc viscere deperdi, undè necrosis; quod explicare videtur Hippocrates ex analogismo necrosis in fætu qui in utero materno vitâ functus in alterutrum, uteri latus procidit. Ægrum jacere frigidum, & doloris expertem, de prævio dolore pleuritico intelligendum duco. Cor in gravissima pulmonis inflammatione, à sanguine per emissaria pneumonica non defluente facilè interdum obrui, & symptomaticè inflammari percipio: Hieme superiori, cum Mediolani diverterer, præcipuè ad mensem Januarium, maligna pleuritis phlegmonodes grassabatur, facilè in Necrosim pulmonicam, etiam ante septimam, abiens: quæ ideò plurimos rapidè sublatos videbamus. Hoc tempore, hacque in Urbe ornatissimus Curtius varias mihi easque singulares observationes, ex longâ, accuratâque Praxi ad umbilicum perductas, circa pulmonum tumores; acutos, aut longos, supervenientibus interdum organi hujusmodi syderationibus, aut Necrosibus, quæ nostra erat consuetudo, communicabat: Quas à Viro Præclarissimo post egregia tot alia, Medica, & litteraria, Latinè, & Italicè, edita ab eodem monumenta, omnique plausu excepta, fore aliquando in publicum bonum evulgandas non dubitamus.

De Dorsali Pleuritide Hippocratis.

§. XII. Pleuritidem dorsalem Hippocratis in sanguinearum Phlogisticarum classem adnumero, ductus illo ejusdem textu pleuritidem hujusmodi in Coacis describente : *Quibus autem pleuriticis illud accedit etiam, ut multum rubeat dorsum, incandescent humeri, & ipsi residendo graventur, alvus autem perturbata, viridi, & multum fatidâ bile feratur, ii sanè propter eam subductionem vigesimo die intereunt; quos si effugerint periculo defunguntur.* Nam alvi fluxus præcipuè biliosus nonnisi Phlogisticæ sanguineæ pleuritidi perniciosus evadit, ut ex aliis ejusdem Coi locis per hunc tractatum identidem memoratis, & nostrâ ulterius ex praxi confirmatur; Cæteris è contrà pleuritidum generibus alvi fluxus, præcipuè bilioforum, conducit: ut ex alia Hippocratis sententiâ in eisdem coacis indicatur: *Pleuriticis prodest alvum mollescere.* Quod etiam mille aliis locis ad varias particulatim pleuritides rememorat. Confirmat assertum eventus. Pleuritides namque cum febre acuta, & dolore ad scapulas, & dorsum difficillimè judicantur, in abscessum ordinariò vergentes. Jam igitur inflammatoriæ exquisitæ sunt.

Cura Pleuritidis lymphaticæ simplicis, seu frigidioris.

§. XIII. Secundum pleuritidis genus, seu propriè Catharale, præter calidos haustus blandè attenuantes, & diaphoreticos, juxta ætatis, tempestatis, subjecti constitutionis, aliasque circumstantias varias, promiscuè missionem sanguinis, & purgationem, aut potiùs unam, quam alteram, aut etiam neutram, ante septimam, exigit. Ideò in subjectis interdum frigidis hieme præsertim afflante, cum lentore lymphatico, quod supra lentorem sanguineum in pulmonibus affideat, hanc veluti crudam pleuritidem, seu simpliciter lymphaticam, absque sanguinis missione, sæpè etiam sine catharsi, attenuantibus solùm, & vivificantibus faustè curamus. In his igitur casibus camphorata, succinata volatilia,

tum

tum præcipuè oleosa volatilia, ut tincturam croci optimam, liquorem C. C. succinat. aut legitimum elixir. Parav. sine aloë cum myrrhâ probè per longam circulationem solutâ, & similia, superbibitis calidissimis haustibus ex Carlina, angelica, scabiosa, Camedr. heder. terrestr. hyssop. veronic. baccis juniper. aut simul omnibus, aut pluribus, aut similibus, felicissimis ut plurimum aleis adhibemus; quo pacto liquida lymphatica in pulmonibus concretiora fluxilia redduntur, & abundæ sputi, aut diaphoresis Copiæ paulatim eliciuntur. Memini me plurimos pleuritide catharrhali frigidiori conflictatos, interea cum dolore punctorio, respirandi angustia, tussi profundâ, crudâ, & difficili; sputo interdum ramentis sanguineis immixto, febris etiam ad acutum symptomaticè vergente, sed cum pulsu tenui, non duro, sed flacido, præcipuè mulieres delicatulas, pallidiusculas, aut priùs frigidâ chlorosi prehenças, liberalibus interpolatis haustibus vini generosi, ut malvatici, niceni &c. procuratâ hoc ritu sputi, transpirationis, totiusque morbi concoctione, abjectoque remedio alio quocumque, prosperè & non ultrâ decimam quartam sanasse. Id autem præprimis advertendo, ut vinum calidè semper, aut calidiusculè sorbillandum propinarem; quod hac cautione oportuè adhibitum quantum in hac lenta non solum pleuritide, sed in omnibus tum corporis undequaue, tum partium specialium cruditatibus maturandis, solvendis, discutiendis, emendandisque valeat, indicibile est. Gratulor igitur mihi de dissertatione Illustrissimi, & expertissimi D. D. Davini, Serenissimi Mutinensis Ducis Medici *De Potu vini calidi*, dum hæc scribo, dono mihi ab eodem authore humanissimè transmissa, quæ rarissimis juxta, ac gravissimis observationibus praxim meam in his, aliisque crudioribus morbis vini calidi exhibendi luculenter confirmat. Vini usum in frigidiori catharrhali pleuritide sedulò commendat Galenus Comment. 3. in lib. Hipp. de vict. rat. in morb. acut. *Quæ ad educationem eorum, qui in pulmone continentur, crassorum humorum futura sunt idonea medicamenta moderatam humiditatem habere debent. Quod si viscosi humores fuerint, non humiditate solum est opus*

verum quoque & ea, quæ ab acidis fiat succis, deterfione. Ob eam rem melicratum quidem ad crassorum humorum expuitionem est convenientissimum, oxymel verò ad viscosorum. Post melicratum ptisana est, atque ab ea vinum dulce, si coctis jam tum peripneumoniâ, tum pleuritide propinetur, amplius non vexatis inflammatione corporibus. Quod si vinum huiusmodi epotum sitim faciat, ad expuitionem minus idoneum redditur. Verum ut uno absolvam verbo, vinum dulce in acutis morbis ad expuitionem tum propter dictas operationes, tum propter communem vinorum omnium rationem, quâ vires roborant, idoneum existit, & maximè iis, qui quævis humida, quæ tum in thorace, tum in pulmone continentur, expuunt. Ita Hippocrates eodem lib. de vict. rat. in acut. definit cui pleuritidis generi vinum exhibendum veniat, cui non exhibendum, & quale; hisque, & aliis locis piper, & calida remedia similia in torpidiori pleuritide usurpat.

Interdum in huiusmodi pleuritide crudam, & insubactam chylosyn pro primo morbi fomite subodorantes, curationem totam absolvimus, tincturis stomachicis spirituosis variis, ac aromatico-amaris, per calidos haustus appropriatos solutis. Quandoque per urinas lymphas inertiores pulmonicas, cum morbus aliquando defrikerit, solvi, & derivari mandamus tincturâ millepedum per spiritum ardentem juniperinum elicita, addito interdum sale volat. C. C. nostræ præparationis, & similibus. Cæterum, in torpida Catharrhali pleuritide, si post quintam, aut sextam stet adhuc non modica spirationis difficultas, cum paucâ, ineptâque expectoratione, similetque acutam naturam, præmissis universalioribus, præsertim cathartico, ex manna, melle rosat. solut. aut similibus, si per primas quoque vias cachochilia lymphatica stabuletur, ad crura, & coxas Phenygmata inurimus, faciliiori inde communiter, cum sputo uberiori, & concocto, procuratâ respiratione, undè morbi viam ad generalem maturationem expeditior. Hanc ideo speciatim pleuritidem respicere Hippocratem conjicio 2. de vict. rat. in acut. ita edicentem: *Lateris dolor, sive is per exordia fuerit, sive postea obortus sit, tentare medicamentis calidis dissolvere, non absurdum est.* Ne tamen

tamen infinitus sim, hæc in hujusmodi pleuritide, aliisque sequentibus, usque ad biliosam pleuritidem, quæ solum ab instituto respicitur, pede sicciori trajiciam.

Pleuritidis Mixtæ, seu Lymphatico-sanguineæ, itidem convulsivæ, stomachalis, & Hepaticæ Vmbratilis Curatio.

§. XIV. In mixta pleuritide, seu sanguineo-catharrali, cautius est non purgare ante septimam, ac liberaliter potius phlebotomare: nam licet inflammatio pulmonis, sincera non sit, est tamen adhuc inflammatio. His ad exigentiam expletis, ad usum diaphoreticorum confugiendum est, non tamen asperiorum, & impetu præditorum, in forma spirituum, quintessentiarum, salium volatilium &c. (Nam hæc acrius percussis, tensisque solidis, liquidisque expansis, adaugent inflammationes) sed lenium simplicium, & humidorum; ut calidi liberales haustus decoction. radic. scorson. bardan. fol. card. bened. scabios. cameedr. ferpill. &c. Quibus, aut similibus intermisceri possunt c. c. phil. pp. stibium diaphor. bezoart. vegetal. nostrum, sang. hircin. legitimus, iisque analogæ, in fine augmenti, statuque usurpanda: Interdum in difficiliore sudatione syrup. Fimi Equini s. a. parat. In convulsiva pleuritide, super alias omnes pleuritides, pessimam decernimus catharsim. • Necessaria huic est sanguinis missio, etiam ad exigentiam crebrius repetita, vel si valida febris, cum majori pectoris angustia, & vigiliis, superveniat, vel si longius immorans sanguis sub prælo convulsionis pulmonicæ systrophicam inflammationem minitetur, vel tandem si graviora alia debacchentur symptomata. Cæterum longa diluentia, laxantia simplicia, oleosa, blandè diaphoretica, & præcipuè anodina suppetias adveniant ita Hipp. lib. 13. de morbis textu superius citato in hoc pleuritidis genere uberiores solum humectationem præscribit: *sed ampliore in potu humectatione indigent.* Stomachalis, & verminosa Pleuritis opportunis principio purgantibus, aut etiam mediocri emetico, interdum simpliciter oleosis propulsatur. Hepatica purgationem principio, aut phlebotomiam

tomiam simul, aut sejunctim exoptat secundum præpollentiam biliaris cacochimiæ hepaticæ, undè fons morbi, aut pulmonalis accensionis, quæ urgens fit symptoma, sed de his alio Loco. Id solum pro monito generali adjiciendo, fortia diaphoretica in quacumque pleuritide statim ab exordiis usurpata pessimè afficere; nec solum efferato jam sanguini, & obfesso pulmone nocere, sed ad deliria, aliasque capitis gravissimas concussiones viam sternere.

Cura Biliosa Pleuritidis; ejusque habitudines varia.

§. XV. Jam ad biliosam curandam pleuritidem me defero. In vero hoc affectu sanguis quidem in principio mittendus est, si sputum difficile sit, diarrhæa non superveniat, febris, dolor, & spirandi difficultas, invalescant in juvene præcipue, & vegeto corpore, cum magna universali exæstuatione. Quotiescumque hæc omnia aut plura non sint, præcipue si venter prius tensus, & turgidus extiterit, aut in morbi invasione turgescat, non est quidem mittendus: Hoc namque præsidii genere in biliari pleuritide, ut ut acutæ signa incauto colluderent, plurimos repentinè prostratos, & ad septimam aut nonam è vivorum numero sublato dolenti certè experientiâ perspeximus. Hippocrati inconcussum est, bile notabiliter dominante, cæteris paribus, venam non secare. Ità lib. de humor. & in epid. effatur; *tria impedire venæ sectionem in sanguinem spuentibus, tempus anni, pleuritis, & bilis.* Verum tamen est, Divinum senem, bilem inter Phlebotomiæ impedimenta pro curanda pleuritide memorantem, non tantum biliosam pleuritidem significare vellet, sed & sputum biliosum facile, concoctè, citòque in hoc pleuritidis genere obvenientem, ubi certè tota Clinici sedulitas promovendo huic sputo dirigenda venit, Phlebotomiâ angue pejus declinatâ, quæ sputum retrahere, resque ægrotantis evertere potis est. Audiamus quæ super hac re consultissima enunciat Duretus in Coacis ad Commentarium illius textus Hippocratici: *Pleuritides autem biliosæ simul, & sanguineæ &c.* Itaque

Itaque si admodum biliosus humor est, ea flava tantum erunt (loquitur de sputis in hac Pleuritide) sin autem sanguineus, rubra. Quod si ex utroque mixtus, rubra simul & flava. At talis humiditas in bonis ducenda, si facilem habeat, copiosumque exitum, cum accessione laudabilium urinarum. Tale sputum promoveri debet iis, quæ expurgationem juvant, molliendo, leniendo, & sputum ciendo, non autem sanguinis detractio retrahi, & impediri: Quod usu venire videmus, non sine mœrore, & nemesi, ab istis pragmaticis vulgò dictis, qui omnem pleuritidis curationem exigunt in sanguinis detractioe sæpius iterata, quandiu pleuriticus hujusmodi sputa expurgat cum spe salutis prædivite. O homines reipublicæ calamitosos, atque funestos! Ipsam pleuritidem, quæ suâ sponte nullius operis indigens cum tali sputo quiesceret, ex eventu reddunt mortiferam. Ita Galenus Comment. 3. in lib. 6. epidem. supra allatum textum Hippocratis, abstinere in pleuritide à detractioe sanguinis, si post cruenta biliosa expuantur. Sit jam in principio morbi sua quoque Phlebotomandi, aut non phlebotomandi indicatio, ante quartam purgandum est; fortiùs autem si nausea, si vomitus, si flava aut aliter variegata linguæ sordities cum assidua oris amarore compareant; vel cum hypochondriorum, epigastrii, aut totius ventris persistenti tensione: quo casu etiam emeticum, secundum bilis lentores, & copiam, mediocre, aut validius, laudabili exigentiâ, faustoque eventu administratur: Quod confirmat Galenus Comment. 4. in lib. de victus ratione in morb. acut. cap. 6. dicendo: *Bilem tum per vomitum, tum per clysterem vacuandam esse.* Quin immò Catharsis primis interdum diebus repetenda est. Si semel usurpata bilem primorum viscerum non illo modo subduxit, & infregit, ut hæc adhuc turgere non desinat, novasque in pectus invasiones minitari. Ideò Galenus Comm. 4. in lib. Hipp. de vict. rat. in acut. admonet: *Vel statim ab initio, priusquam in partem aliquam firmati sint humores, medicandum; vel postea cum concocti fuerint.* Purgantium classem ipsemet Galenus indigitat lib. de Dynamidiis Cap. de purgantibus choleram rubram: *Cholagogis utendum est in passionibus ictericis, hepaticis, spleneticis, pleuriticis, phreniticis,*

synanchicis, mania, Cephalalgia, ophtalmia, erysipelate, lepra, febribus tertianis, & quibus cholera abundat. Quâ textus conclusione manifestum venit, Galenum intelligere de his morbis, cum à bile oboriantur. Imminutâ biliari cacophragiâ, translata ejusdem pars ad pulmones facilius digeritur, eâque per sputum in dies maturius factum expurgatâ, ad septimam, ad nonam, ad undecimam usque ad decimam quartam affectio cedit; præcipuè si diarrhæa aut naturaliter superveniat, aut per catharsim excitetur; quâ certè felicius morbi stadia abbreviantur. Calidè interim, & copiosè epotandum: sic fluidius factum, attemperatumque recrementum biliosum ejectionibus variis pacatius paratur. Apprimè insuper opportuna oleosa, quæ bilem glomeratam solvunt, stimulantem infringunt, effervescentem illaqueant, detergunt impactam; tandem, si copiosa sint, per inferiora, aut etiam blandè per vomitum deturbant. Fetus prosperè adhibentur, si cum ventris tensione dolor etiam accedat. His etiam cicuratur bilis, & eluitur: fugienda volatilifantia, imò & testacea. Prima bilem insensè exacuunt, altera magis adhuc ineraffant, suisque in latibulis figunt. Bilis inflammatoria, quæ tenax simul est, & acerrima suaviter quidem præparanda, sed fortiter eliminanda. Biliosa Pleuritis super alias systrophicas ob causæ peccantis mobilitatem, & insuper (cum bona venia nostrorum in pedagogio censorum) insupurabilitatem, ocyus judicatur. Sic Medicinæ Dictator in Coacis: *Quibus pleuriticis continuo lingua bile suffusa est, septimò judicantur: quibus autem tertio, aut quarto, ad circiter nonum.* Ob hanc mobilitatis, ac expeditiorem absque suppuratione solubilitatis rationem, bilis si propriè cum sanguine in mixtam pleuriticam phlegmonem extruendam concurrat, morbus facilius sanescit, juxta illud ejusdem Hippocratis in eisdem Coacis: *Pleuritides autem biliosæ simul, & sanguineæ, ut plurimum nono, aut undecimo judicantur; ac fere saluti concedunt.* Quod si lentæ, ac intricabili lymphæ seu pituitæ uberiori ad producendam pleuritidem bilis adedò copuletur, ut fluore suo in lymphæ concretionibus deperdito, & infaustè coercito, excretioni, & pepasmo minùs

apta

apta sit, in morbum non tantum contumacem, sed & lethalem conspirare potest, juxta illud Hipp. Consultissimum in lib. de morbis. *Ex morbo autem laterali intereunt cum circa exordia copiosa quidem pituita & bilis ad latus impacta fuerit, multaque ex reliquo corpore prætereà affluerit, quam neque spuenso propter copiam, neque putrefaciendo superare possit.* Deservescente declinataque biliosa pleuritide simplici, mansuefacto dolore, & quodam febris circuitu post duodecimam superstite, cum aliqua quotidie horripilatione, aut perfrigeratione, omnia usu leviusculo tincturæ corticis peruviani feliciter sublata, quandoque experti sumus. Solam hanc observationem Hippocratis testimonio firmare non possumus, cui nempè mirabile hoc, ac præprimis antibiliare præsidium non innotuit.

Pleuritidis Erysipelatosæ Cura, & conditio.

§. XVI. Pleuritis Erysipelatosa quæ multum ab Hipp. lib. *de int. affect.*, aliisque locis consideratur, familiæ biliosarum Pleuritidum adoptanda venit. Siquidem quodcumque Erysipelas à sanguine bilioso tenuiore, fervidioreque deducunt practici. Itaque erysipelatosa dicitur species quædam pleuritidis, cuncta secum pleuritica devehens signacula, & insuper notabilem in ingressu rigorem ex transmissione, per progressus indè morbi non amplius redeuntem, postea febrem assidue acutam; sitim insuper ingentem, & perpetuam cum linguæ intensa ariditate, frequentem vomitum & lypothimiam, notabilem respirando narium apertionem, universalem æstuationem assiduam, cum magna jactatione & inquietudine conjunctam, urinas flammeas, saturatas, croceas, & quasi lateritias, faciem notabiliter rubentem, sed variis ac fugacibus ruboribus, internam præcipue in regione pulmonis ardoris sensationem, & insuper pro signo pathognomonico, dolorem punctorium super alias pleuritides auctiorem, non jam fixum, & stabilem, sed per Thoracis peripheriam serpentem & nunc ad anteriora, nunc ad posteriora vagantem, hasque regiones, nunc simul, nunc sejunctim

invadentem; quemadmodum externa ad habitum corporis erysipelata uni loco non affigi depræhenduntur, ut Phlegmonosæ inflammationi solemne est; sed loco dimoveri, & serpere, vicinasque partes mobiliter per epigenesim invadere: Tum in erysipelatosæ pleuritide animadvertunt practici, quod specialis sensus acutioris caloris per Thoracis regiones serpentem dolorem confectatur, unàque cum eo pervagatur. Stabiliunt itaque auctores, pleuritidem erysipelatosam esse inflammationem pulmonis, cæteris omnibus magis exteriorem, & superficialem extenuioribus, mobilioribus succis; vagam ideò & mobilem, cum acuta febre, dolore, ardore, &c. Quam ideò nos ex succis biliosis decernimus, cum ex ipsismet erysipelatis principiis, tum ex Testimonio Hippocratico. *Vbi verò in Thoracem ob frigus defluxerit, bilis existit.* Lib. de Loc. in Hom. Reverà pleuritides erysipelatosæ hyeme ordinario, & boreis efflantibus, imminutâque per cutis constipationes transpiratione communiter obveniunt. Ab erysipelatosæ pleuritide, quod magis suprâ pleuritidem biliarem simplicem, indicatur, est ipsa sanguinis missio, largè etiam in principio usurpanda, ob facilem præcipuè ad caput anadromem; quâ magis aut minùs secundum exigentiam productorum expletâ, ocyus inde confugiendum est ad purgantia, non tamen fortiora, ut frequentius in pleuritide simplici biliosa expetuntur, sed mitiora, & blandè laxantia. Nulla ideò emetica; nulli alii potentes stimuli. Post hæc universalia præsidia erysipelatosæ pleuritis Longis diluentibus ac emollientibus, tepidiusculis potionibus ex malva, althea, violar. Soncho &c. restingui potest, intermixtis præcipuè discutientibus, & anodinis ex flor. sambuci, hiperic. viol. bellidum pap. Rhead. farfar. melilot. nimp. ex absinthio umbellifero, ex lentibus, ex sem. lini: insuper ex Camphor. sperm. cæt. &c. oleum ex lini seminibus expressum mirificè in hac specie pleuritidis super alia omnia oleosa opitulatur. Succedit in adjumentum oleum ex seminibus melonum s. a. extractum. Paregorica tutiora, cum Clisteribus emollientibus, interdum & fotibus, prædictis auxiliis interpollanda, præcipuè si vigiliæ, & fervores contumaciter adjunguntur.

Pleuritis

Pleuritis biliosa quæ aliarum omnium sit pessima.

§. XVII. Pleuritis biliosa illa omnibus deterior habenda est, & ordinariò funesta, in qua signa omnia Phlogistica exquiritæ pleuritidis præoccupatus jam clinicus primis aleis offendisse sibi persuadet; scilicet quinque illa toties decantata, quæ simul collecta veram pleuritidem sanguineam pathognomonicè declarare videntur. Pulsus durus, acuta febris, spirandi difficultas, tussis cum sputo sanguineo, dolor punctorius ad costas veras, aut jugulum, aut scapulas; Pessima, inquam, est, non eo tamen quod restingui non possit, nam biliosa pleuritis, licet principio suo, seu primâ irruptione, turbâque sub speciebus hisce non suis occultata, tamen catharticis fortioribus, imò & emeticis diligenter, citoque usurpatis impetita, non difficilè cederet, mutuataque ferociam deponeret; nisi clinico ambigenti sub forma ut plurimum sinceræ inflammatoriæ pleuritidis illudens, in viam Phlebotomi infaustè, & fataliter alliceret, ad tempora catharticorum necessaria omittenda. Tunc pleuritici hujusmodi post plures missiones sanguinis etiam cum facili sputo & copioso, ventre magis in dies, & hypochondriis præcipuè turgentibus, ad nonam, undecimam, aut decimam quartam, biliosâ turgescenti colluvie præfocati, & tandem ex bilis ascensu in cerebrum communiùs delirantes, diem miserè postremum obeunt. Memini lepidæ sanè historiolæ, quam mihi superioribus annis referebat amicus quidam Comprofessor meus. Accersebatur ille, multum adhuc adolescens, ad quendam pleuriticum, quem simul omnia Phlogistica pleuritidis laudata argumenta obsidebant. Intereà, ut verè biliosa erat pleuritis, ita inter illa epiphenomena quidpiam in hypochondriis, ac epigastrio dolens, prætumidum cum nausea medicum satis perplexum reddidit; tum præcipuè sinistri ex Phlebotomia passim eventus in vagantibus æstivâ illâ fervidâ tempestate pleuritidibus, nec nisi ad obitus properantes vivacis juvenis animum bonâ forte à phlebotomia avocarunt, semel tandem in emetici

administrationem suadendo. Vomebat hinc æger abundè biliaria, & immixta, ac in largos indè secessus profluebat, hinc suavi diarrhæa perennante, & sensim invalescente, nec interrupta anacatharsi, imò uberiori jam facta, & maturâ, post septimam absque ullo Phlebotomi tentamento feliciter judicabatur. Casum, ut rarum, & notabilem, ac per illam epidemiam insolitum festinanter juxta ac festinanter auribus senis magistri sui fortunatus observator reportabat, plausus non ordinarios, ut ipsi videbatur, ab eodem accepturus. Sed juvenis inexpectato obrigit, cum à Magistro suo in encomiorum loca amarissimas reprehensiones, veluti in medicinæ apostatam, ac à verò curandi tramite oberrantem, evibratas, colligebat. Respondebat modestè discipulus, infirmum suum statim ab adhibito emetico fuisse à morbi acutie sublevatum, hinc postea faustè, & celerrimè evasum. Acriùsque succensebat Magister; addens postremò, vix interesse si mortuus æger fuisset, dummodo per rectam, tritamque methodum occubuisset.

Prognosis Biliosa Pleuritidis.

§. XVIII. Modò tandem ad illa biliosæ pleuritidis præsignia, quæ ad Tyronum instructiones cum ex Hippocraticis oraculis collegimus, tum dictum in Praxi, cum hujus morbi eventibus optimè quadrantia observavimus. *Quibus in morbo Laterali lingua circa initia biliosa est, hi intra septimum judicantur; quibus verò tertio, ac quarto die, circa nonum;* Hippocr. in Coac. prænot. Fœsius accuratissimus Hippocratis interpres, ad Textum Hippocraticum hæc aurea subjungit. „In veris sputi legibus, & „salubri pleuritide sputum bile coloratum initio esse debet, & „itâ ad concoctionem progredi: Biliosam autem pleuritidem „indicat lingua bile tincta, quæ & levior esse, & securior „judicatur, ab Hippocrate lib. 3. de Morbis, ideòque promptè ad judicationem procedit. In Pleuritide autem, & peripneumonia à lingua signa peti debere docet Hipp. lib. de morbis, & alibi. Hactenus Fœsius. Addam ipse, signa eventuum in pleuritide

pleuritide aut peripneumonia in genere esse potissimum à statu respirationis deducenda: Facilior facta, & persistens boni semper ominis, difficilior facta, aut non facta facilior, semper mali.

Prognosis ulteriùs biliosæ Pleuritidis ex Hippocrate.

§. XIX. Textus insuper Hippocraticus qui in eisdem Coacis subjungitur, biliosam adhuc pleuritidem respicit, apprimèque experièntiâ firmatur. *In morbo Laterali affectis dolores, & alvum emolliri utile est, sputa colorari, nullos in pectore strepitus fieri, urinam rectè procedere. Quibus contraria molesta sunt, sputumque dulcescere.* Etenim nonnisi biliosæ pleuritidi alvi solutio succurrit, quæ cuicumque alteri pleuritidi non biliosæ adversatur secundum ejusdem Aphor. XVI. Sect. VI. superiùs memoratum. Ut ideo Hipp. in hoc textu alvi profluvium in pleuritide commendando, pleuritidem propriè biliosam indicet, in qua igitur dulcescens sputum malis ominibus respicit; tamquam suppressæ biliosæ Anacatharsis indicium.

Rursus Prognosis ex Hippocrate per sputi tempora, conditiones, & miscellas.

§. XX. Quæ autem addit divinus senex, cum dicta confirmant, tum graviores in biliosa, aut etiam mixta pleuritide ad salutem, aut mortem quoscumque eventus, ex sputi natura egregiè connotare videntur. *In omnibus autem laterum, & pulmonum morbis sputum promptè, ac citò excreari necesse est, flavumque sputo permixtum esse. Quod si multo post dolorem, flavum, aut non commixtum rejicitur, nec sine multa tussi, vitiosum censetur. Omnino autem prævum flavum, si sincerum est, & glutinosum, & candidum, & rotundum, itemque vehementer ex virore pallescens, quoque spumosum est, & lividum, & æruginosum: Aliquanto verò deterius, quod sic est sincerum, ut nigrum quoque videatur. At flavum cui paulum sanguinis mixtum est, initio quidem salutem pollicetur, quod verò septimo die, aut longiore spatio, tale*
apparet.

apparet, non adeò tutum. Admodum autem sanguinolentum, aut quod statim initio livescit, perniciem præ se fert. Pravitatem etiam indicant, & spumantia, & flava, & nigra, & æruginosa, viscosaque, & quæcumque celeriter colorantur. Mucosa autem, & fuliginosa cum celeriter colorantur, tum securiora sunt. Quæ verò intra quintum diem, dum concoctionem accipiunt, colorantur, meliora censentur.

Et alia ex Hippocrate.

§. XXI. Confert his etiam, quoad prognosim pleuritidis sincerè biliosæ, aut mixtæ ex sputi natura, Textus alius Hippocr. eodem loco. *Qui in morbo laterali sputa rejiciunt purulenta aliquantulum biliosa, rotunda, aut purulenta aliquantulum cruenta, iis temporis progressu periculum creatur. Perniciem autem denunciant sputa nigra, fuliginosa, aut quibus qualia ex vino sunt.* Suppuratio etenim in biliosa pleuritide multo deterior est, quàm in alio quocumque pleuritico affectu, ut ad §. XXV I. inferiùs videbimus. Sputa rotunda & cruenta in pleuritide majorem inflammationem, & ex inflammatione visceris exsiccationem denunciant; nigra, fuliginosa, aut obscurè rubra inflammationem ad *Necrosim tendentem.*

Prognosis mixtæ biliaris Pleuritidis, seu sanguineo-biliaris, etiam ex Hippocrate.

§. XXII. Eventus autem in mixta biliosa pleuritide tum ex sese, tum ex statu doloris prænunciat Hipp. eodem loco. *At verò biliosi simul & sanguinei morbi laterales ferè nono die, aut undecimo judicantur, ac maximè sanescunt. Quibus autem in morbo laterali initio quidem dolores leves sunt, quinto verò aut sexto die ingravescent, ferè ad duodecimum perveniunt, raroque servantur, sed præcipuè septimo, ac duodecimo die periculum subeunt. Quod si bis septem evaserint, servantur.*

Prognosis

**Prognosis ex eodem mixta alterius biliosa Pleuritidis,
seu bilioso - catharralis.**

§. XXIII. Interitum in mixta frigidiori biliosa pleuritide, seu bilioso - catharrali hariolatur Hippocrates ex non solutâ anacatharsi lib. 1. de morb. *Ex morbo autem laterali intereunt cum circa exordia copiosa quidem pituita & bilis ad latus impacta fuerit, multaque ex reliquo corpore præterea affluerit, quam neque spuendo propter copiam neque putrefaciendo superare possit. Quem textum jam supra ad §. XIII. exposuimus.*

Prognosis biliosa pleuritidis suppuratæ ex eodem Coo.

§. XXIV. Periculum in mixta biliari pleuritide à suppuratione facta minuitur Medicinæ Parens lib. Prænot. *Horum verò locorum dolores (loquitur de locis pleuritidis) qui neque per sputorum purgationes, neque fecum alvi dejectionem neque vena sectionem, aut medicamenta purgantia, & victus rationem sedantur, eos ad suppurationem tendere sciendum est, ex suppurationibus autem admodum exitiales sunt, quæ sputo adhuc quidem bilioso existente suppurantur; sive biliosum illud separatim, sive unâ cum pure expuatur. Idque potissimum si ab huiusmodi sputo suppuratio procedere cæperit, cum morbus ad diem septimum pervenerit. Qui verò talia spuit, ne decimo quarto die moriatur, metus est, nisi quid boni accesserit.*

Prognosis ejusdem à biliosis ejectionibus.

§. XXV. Nec solum per sputum biliosas pleuritides judicari, sed etiam per alvinas egestionem biliosas aut urinas retriementis biliosis criticè saturatas, declinato abscessu; non autem judicari nec abscessum declinari, si desint huiusmodi secretiones ex alio textu ad eundem locum appposito habeto. *Si febris desinet, neque dolor conquiescit, neque sputum ex ratione procedit,*
K H *neque*

neque biliosa sunt alvi egestiones, neque benesolutæ ac sinceræ, neque urina admodum multa, & copiosum habet sedimentum; suffragantur verò ad salutem reliqua omnia salutaria signa; in his hujusmodi fore abscessus expectato.

Explicatio duorum superiorum textuum Hyppocratis.

§. XXVI. Hippocrates in toto *prænotionum* Libro quò ad morborum acutorum, præprimis pulmonarium eventus, judicationes, & reversiones, præ aliis quibuscumque elucubratissimo, ut, veluti acutorum polare sydus, assidue à medicantibus consulendus sit, tum maximè in binis his novissimis Textibus, totam biliosæ Pleuritidis, aut mixtæ, aut sinceræ historiam aperit. Postquam memoratis locis sputi pleuritici naturam omnem, & conditiones singulas, bonas, malas, pessimas, ejusque ad diversa morbi tempora habitudines divinè instruxerit, nunc in sputi subsidio primam judicandæ biliosæ pleuritidis rationem decernit, alteram in Diarrhæa biliari spontanea, tertiam in revulsione per venæ sectionem, quartam in catharticis, quintam in urinaria derivatione, tandem est invictus ratione: His rectè non institutis, dolore cum febre perseverante, suppurationem, imò & abscessum prænunciat, ut ut signa alia salutaria compareant, quæ in levata febre, spirandique angustia, pulsuque insuper molliori reddito, siti ac æstuatione imminuta conjicienda sunt. Sudorem inter biliosæ Pleuritidis subsidia non accenset, quæ in aliis pleuritidum generibus expetit, & magnificat: Bilis etenim delinquentis lentores ex cutis spiraculis non diffillantur, ut palam est in febribus biliosis intermittentibus, quas copiarum sudorum non judicant: Compares ideò sputi, alvi, urinæ ejectiones proficuas solum observat, & postulat, quibus omnibus quodcumque bilis peccantis crassamentum elutriari immediate potest. Sanguinis missionem intermiscet, quæ quidem non causa morbi, sed potius fortuitæ circumstantiæ variæ prospiciuntur, ut consideratum fuit superiùs. Suppurationem præcipuè in hac pleuritide omnium pessimam judicat.

quæ

quæ sine bilis morbificæ suppuratione accedit: Equidem præterquamquod si bilis pleuritica suppuretur, vera suppuratio non est, sed potius salutaris concoctio, seu pegasmus sine suppuratione; Nam non bilis sed sola lymphæ nutritia, seu succus, ut aiunt, alibilis, in sanguine suppuratur; quoties in biliari pleuritide bile non suppuratâ, suppuratio superveniat, primò causæ huiusmodi morbi primariæ seu biliariæ nimia tenacitas, & perassatio, rebellis pepasmo revelatur; secundò ea suppurantur quæ suppuranda non sunt, quæ autem suppuranda non suppurantur. Quod si suppuratio hæc indebita versùs septimam obveniat; pejor adhuc & ad interitum festinans: morbus qui ad statum absque ullâ causæ peccantis concoctione, pervenit, funestus est. Statum autem biliosæ pleuritidis septima determinat. Bilis tamen vel post septimam adhuc incocta, quod ante decimam quartam aliquando coquatur, seu suo modo suppuretur, aut è pectore, ad aliqua emissaria subitanè propulsa effluat, liberando pulmones, illud est quod sibi vult Hippocrates effato illo: *Ne decimo quarto die moriatur metus est; nisi quid boni accesserit.*

De suppurationibus in Pleuride ex Hippocrate.

§. XXVII. Mixtam ulteriùs pleuritidem, seu biliosam, & Catharralem, ejusque aleam variam secundùm varium principiorum prædominium, & complicationem videtur annuere summus Legislator noster lib. de loc. in hom. *Et qui ex pulmonis inflammatione aut morbo laterali pus intro colligunt, minimè moriuntur, sed convalescunt. Purulenti verò ut plurimum fiunt, cum fluxio ad eundem locum velut in bilis fluxionibus decubuerit. Sed in bilis quidem fluxionibus multum defluit, & ubi defluxerit, sedatur; purulentis verò tum minùs defluit, tum minùs sedatur.* Et paulò inferiùs: *At vero bilis hoc modo periculi plena est, si in oculis regius morbus oboriatur, in unguitibus livores oborti fuerint, corpus ulcera habeat, partesque circa ulcera livide fuerint, cum sudor non toto corpore, sed aliquâ tantùm corporis parte erumpit, & cum febre remanente ex pallido virescens*

excreatur ; aut si excreatio cesset , cum adhuc in pulmone remanet ex pallido virescens . . . Ita sunt pulmonum inflammationis , & lateralis morbi indicia. Hippocratica hæc loca sub obscuro contextu comprehendunt syndromem rarissimarum observationum, quæ non nisi post diuturnam , sedulamque experientiam medentibus inclarescunt. His etenim , ni fallor , expertissimus Senex discriminat suppurationem latissimam à stricta , & legitima suppuratione in pleuritide catharrali , aut biliosa , aut simul junctis , cum febre secundum circumstantias varias minori , aut majori , ut inde eventum in utrisque prænunciet ; facilem , tutum , & salutarem , in prima ; difficilem , perniciosum , aut saltem ancipitem in altera , veluti in tabem , aut suffocationes proclivem ; Primam videlicet , quâ *minimè* , ut ait , *moriuntur , sed convalescunt* , non quidem cum abscessu , aut pulmonis disruptione prognatam , imò nec propriè suppurationem , sed quandam maturationem simplicem feri catharralis , quod prius subtile , & per pulmones dispersum , à reticulis pulmonalium vasorum in vesiculas transfudat , ex his in bronchia colligitur , & recollectum inspissatur à calore partis , avolante unà cum aëre subtiliori ejusdem portione : facile etiam ex bronchialibus glandulis in bronchia immediatè eructatur , & ibidem similiter coquitur. Susceptâ hâc habitudine consistens in aëreis fistulis fluxionis materies , facilius per spurum ejicitur. Interdum collectus in tracheæ propaginibus , & trunco , nec non recoctus catharrus , novis laticibus à sanguine suppeditatis ulterius imbibitur , & irroratur , ut quandam induat liquaminis formam ; præcipuè si latices glandularum bronchialium (non illas intelligo , quas depingunt glandulas aliqui in eisdem tunicis tracheæ , & bronchiorum ; sed quæ per totum pulmonem , manifestæ , ingentes , & uberes , ad quascunque bronchiorum divisiones exterius assident , & cum eis per propria excretoria communicant) consistentiam , vesicularium laticum texturâ multò minùs concrescibilem , ducant. Hac de re pluribus in locis Hippocrates *suppurari & pus colligi* solam esse inspissati , coctique , aut etiam prædicto modo postea eliquati catharri pleuritici *collectionem*

collectionem in bronchiis, intelligit; Quem nempe humorem ille pepasmi gradus attigerit, & immutaverit, quo puris natura referri quoquomodo videatur. Ita *lib. de vict. rat. in acut.* proffatur: *Cocta autem sunt sputa; cum puri similia fuerint*: Ita magis hujusmodi suppurationem à vera, & legitima per allatum textum excludit, cum asserit: *Purulenti verò ut plurimum fiunt, cum fluxio ad eundem locum velut in bilis fluxionibus decubuerit.* Bilem etenim propriè non suppurari, sed solum maturari jam vidimus. Addit prætereà: *Ex puris intro collectione convallescere*; Quod certè convalescentiæ, judicium in veris suppurationibus non ita liberaliter pronunciat. Equidem, quod è pulmonibus per tussim sæpenumero excernitur purulentam speciem repræsentans, id non omne verè purulentum esse manifestò liquet nobis, frequenter observantibus excreatus pulmonicos in sanis, sanoque aut non sensibilibus morbo pulmonis præditis obvenientes, absque ullâ præcedenti, aut succedanea affectione præcipuè post somnum, & lymphæ nutritiæ dispensationem ad viscerum omnium recessus; cujus certè roris alibilis pars vesiculis pulmonum, & bronchiis liberaliùs in variis subjectis affusa, quendam extraordinariæ cocturæ gradum per stasim suam adipiscitur, ut, veluti purulenta, manè cum tussi excernatur; interdum etiam ex variis aliorum succorum extraordinariè pariter coctorum, ideoque flavescientium, viridescientium, lividorum &c. mixturis variegata. Hac de re quemadmodum nihil est supra pulmonalem excreatum, quod magis purulentam habitudinem mentiatur, ita etiam in praxi nihil magis operosum est, quàm veram phthisim à spuria, seu ab illa, ubi sola catarrhi, ut dicitur, putrescentia absque visceris læsione concurrit, ex solo excreatu purulentias affectante, internoscere; nisi excreatus hujusmodi hemoptoicis superveniat. Videmus igitur quàm latè pateat suppurationis nomen ex ipsomet Hippocrate, qui licèt frequentius suppuratos illos nuncupetur, quibus *inter Thoracem, atque pulmonem pus acervatur*, seu propriè empyematicos (ut hoc etiam de titulo apud quamplurimos ejusdem senis interpretes acceptatissimum sit, *Empyematis*

nomen significare omnem in genere suppurationem; quod tamen ut patet est perperam acceptum) alias tamen pulmonum phases dissimiles eodem nomine indigitat. Ita etiam Galenus comment. 6. in Aphor. 20. vult: Suppurari nomen esse unius mutationis in sanguine veluti genericum. Idemmet Galenus competentem suppurationis in genere descriptionem exporrigit De Medic. simpl. facult. Lib. V. Cap. 6. quam non prorsus in hoc paragrapho suppurationum importunam ratus, lubenter subjungo. Tres sunt alterationes, seu coctiones in animalium corpore adnumeranda: Una planè secundum naturam, seu coctio ciborum: Altera è contra planè præter naturam, ut quæ in putrescentibus omnibus, corruptisque accedit: Tertia ex utraque mista, atque media, seu suppuratio, quæ ab ingenito quidem fit calore, sed non planè vincente; neque enim ex materia peragitur, quæ prorsum benigna sit, neque tamen ex omnino aliena. Revera quæ suppuratur materies, est quidem alibilis, sed quoquomodo vel in motu, vel in consistentia, vel in mixtura debet esse depravata, ut ideò ab ingenito calore impugnetur. Cæterùm descriptæ latissimæ suppurationis, seu catarrhi recocti, indeque per anacatharsin expurgati benignum genus ante septimam, imò ad tertiam, aut quartam diem, vel in ipsa catarrhali pleuritide simplici, sæpenumero confectum animadvertimus. Ex hoc suavi coctionis gradu febris, dolor, & spirandi difficultas mitescebant. In eadem pleuritidis specie contigit olim mihi, semel atque iterum observare ab hoc suppurationis genere oborta, post septimam vix elapsam, empyemata; lenia tamen, & facile, citoque curabilia, sputo interea adhuc copiosè, imò liberaliùs profluente. Nam inter costam ex postremis legitimarum anteriorum unam, & alteram elevato die octavâ, aut nonâ molli quodam tuberculo, sub eodem fluctuans materies percipiebatur, hæcque ad levem vix ictum lanceolæ erumpens copiosè profluebat. Erat autem, ut suprâ, catarrhale non verè suppuratum liquamen, quod post decem, aut duodecim dies integrè expurgabatur, febre ad tempora expurgationis desinente, cum sputo, & dolore pleuritico; atque punctione intercostali
per

per idem tempus coalitâ, ægrotantes non ultra vigesimam optimè judicabantur. Ex his alter pectore bene valens, ischuriâ renali non ita pridem defunctus est: Alter intactam ad has usque dies valetudinem ducit. Nulla etenim ruptura visceris, aut ulcerosa diathesis ab hoc empyematis genere oborta est, quod nempe ex sola per substantiam, & tegumenta pulmonis transfudatione habitum judicandum venit: Nec insuper memorata hucusque primi gradus suppuratio unquam ex se se in pulmonibus continui solutionem molitur; secus ac veræ suppurationes mox describendæ. Fortè igitur Hippocrates per illam textus superiùs allati particulam: *Qui ex pulmonis inflammatione, aut morbo laterali pus intro colligunt, minimè moriuntur, sed convalescunt*, non tantùm blandam suppurationem hucusque descriptam, sed productum ab eadem empyema, memoratis meis non abfimile, cum facili, tutâque morbi judicatione describere cogitavit. Ut, ut sit, Creberrimi sunt catarrhalium pulmonis simplicium affectuum pepasmi cujuscunque gradus. Siquidem ex Galeno comment. 3. in Progn. cap. 23. *Humoribus crassis, & crudis natura per abscessum, aut per coctionem medetur*. Illa tamen allatorum meorum casuum coctionis celeritas est equidem rara; ut pote eodem Galeno dictante comment. 7. in aphor. 34. *Frigidum omne est difficulter solubile, & vix coctionem admittit, & perinde diu durat*. Sed in affectione pleuritica catarrhali sanguis à vasorum pressuris magis interdum retardatus, atque accumulatus notabiliorem indè in pulmone fervorem inducit, ut catarrhi, quantumlibet crudioris, coctionem festinare possit; quandoque, secundum majorem adhuc inditi fervoris gradum, veluti subitanæ excitare. Videtur indè. Causa comparare circuitus pleuritice biliosæ fluxionis cum pleuritide catarrhali prædicto modo suppuratæ. *Sed in bilis quidem fluxionibus multùm defluit, & ubi defluerit sedatur; purulentis verò tum minùs defluit, tum minùs sedatur*. Quibus utique meo judicio significare contendit, in orgasmo, aut methastasi biliosa pleuritica ex sputo faciliore, uberiorique celeriore fore solutionem, non item in catarrhali hujusmodi pleuritide, ob causas,

causæ, quantumlibet solutæ, lentorem. Ita Galenus comment. 3. in Prognos. cap. 29. *Humores calidi per excretionem, frigidi per abscessum vacuantur.* Accedit postea Magnus Medicarum rerum Legislator in superaddito textu ad illud suppurationis genus circumscribendum in biliari pleuritide, quod post septimam, imò ordinariò post decimam quartam, in morbi statu, factoque apostemate, aut saltem legitimâ suppuratione superveniens, in suffocationem communiùs, aut, si in quadraginta diebus non purgetur, in tabem irreparabilem ægros perducit. Equidem suppurationem hujusmodi designare videtur ex accedenti oculorum flavedine, unguum, aliarumque partium livore, ulcerosâ diathesi, sudore partiali (quem præcipuè nocturnum, & ad pectoris regionem & superiora intelligendum ducimus; tum quod ipsemet Celsus in variis empyematibus perniciosum ad Caput, collum, & superiora sudorem memoret; ita in Coacis inter indicia suppurationis affert *sudores circa collum, & jugulum*; tum quod præcipuè exponat aphor. 38. sect. IV. *Quâ parte corporis sudor est ibi significari morbum.* Quod ideo & reciprocè intelligendum venit) & maximè ex febris contumacia, cum arido, viridique purulento excreatu (quæ viridescens suppuratio omnium pessima est, eo quod, quemadmodum suppuratum non malum, *album, leve, & æquale* esse oportet ita viridescens suppuratum pravissimam bilis coctionem lymphæ superadditam, intermistamque denotat) tum ex eodem cessante, & putri materiæ in pulmonibus superstitæ. Constare nobis ulterius posset de periculosa suppuratione, dispari à benigna priùs exposita voluisse Celsum in hoc altero textu sermonem instituere, si eundem textum cum alio in Coacis, deteriorem suppurationem enunciante, conferre velimus, quo pacto descriptionum similitudines palam fiant. En textus: *Omnes quidem purulentos ita deprehendi oportet: Primum si febris non dimittit, eaque interdum levior est, nocte increscit; frequens sudor, tussis & cupiditas tussendi, ubi tussiendo penè nihil extussitur; oculi cavi, malæ rukent, ungues adunci; calor extimorum digitorum; pedum edemata; cibi fastidium; pustula toto corpore sparsa: cui pariter* alius

alius collimat ejusdem in Coacis, de suppuratis, & empyematicis verba facientis: *Quibus autem veniunt inde febres, & sitis, & cibi fastidium, atque pus exit lividum, aut viride, spumans, & fervidum, alvusque liquida est, moriuntur.* Et sicuti Hippocrates his locis postremò appositis pessimam, & deinceps lethalem suppurationem describit, ut jam periculofam descripserat in textu, ad principium paragraphi exposito; *At verò bilis hoc modo periculi plena est &c.* Quo certè loco malam bilis coctionem cum catarrhali suppuratione infaustè concurrere significatur; Ita qui conferat has ultimas descriptiones suppurationum pulmonis cum prima descripta suppuratione, quâ *minimè moriuntur, sed convalescunt*, non erit ampliùs cur sibi non persuadeat, divinum Senem varias suppurationum pulmonicarum species, salutare, periculofas, calamitofas, & lethales apprimè sedulòque distinguere; Quas ut nos revera distinximus, ita nemo, quod sciam, ex tot Hippocratis commentatoribus hucusque distinxit. Quamobrem necessariam hanc, & tam frequenter in praxi spectandam locorum Hippocratis circa suppurationum differentias, & conditiones collationem, ut ut ab instituto aliquantulum deviam, tamen in utilitatem medentium nostro huic biliosæ pleuritidis tractatui invidere noluimus.

Varii ex Pleuritide Suppurationis Gradus clariùs adhuc exponuntur.

§. XXVIII. Et ut Hippocratica oracula Tyronibus planiora faciam, tres suppurationis gradus pleuritidibus supervenientes Meis, & Hippocratis observationibus distinguam. Primus igitur, ut supra, gradus est, quædam feri concrecibilis à toto sanguine per pleuriticos pulmones retardato, ac restricto expressi, & decidui recoctio, interdum & solutio, ut alia humoris compositio, quandoque etiam liquaminis in sese non-nihil consistentis species emergat. Quæ tamen nova ex catharrhali fluxione productio in locum pulmonis determinatum non recolligitur, sed ut priùs per vesiculas pulmonares, & bronchia

fuerat dispersè deposita, ita & in iisdem loculis immutatur, & remanet; hinc pluries repetitis pulmonum pressionibus, aut sensim superiùs ad tracheam protruditur, ibidemque vel susceptam consistentiam asservans, vel (ut communiùs ob aërem trajicientem, & exiccantem fit) densiùs adhuc conglobata, per vices expuitur; aut etiam (quod rariùs, sed tamen, ut ex allatis casibus, possibile) pellitur paulatim ad latera, & à rara pulmonis tunica in antra Thoracis transfudando, levius producit empyema; vel utrasque simul partes exequitur. At ista, ut exploravimus, legitima suppuratio non est, sed similis suppurationi immutatio; nec verum est pus quæ excreatur materies, aut empyematica evadit, sed tantummodo puriformis: Nec cum huiusmodi conficitur maturatio similans suppurationem, febris ingravescit, aut rigor supervenit, aut respiratio difficilior accedit; nec quando confecta est, febris illico notabiliter immittit, aut acutus dolor in simplicem gravativum immutatur, veluti in vera suppuratione contingit. Gradus huiusmodi non veræ suppurationis super alios omnes communiùs in Pleuritide affectis occurrit. Gradus alter veram suppurationem importat, cum efferatiores, fervidioreque lymphæ à pleuritico cruore sejunctæ in speciali pulmonis loco, aut plurimis simul distinctè locis collectæ, nec non in tuberculum, vomicam, apostema folliculatum, seu abscessum, (sunt nempe hæc omnia non nisi per gradus, aut etiam per nomen disparia) turmatim ruentes, & aggestæ, ibidemque per integrum pepasum recoctæ, in pus legitimum faceffunt; quod indè vel sensim per excreatus expurgatur, aut etiam diutius quiescit in parte, sacco morbofo involutum veluti in cuniculis delitescens. Tertius tandem illa collecti puris in vomica multitudo est, aut vis erodens, & fodicans, ut fociatis viribus vectis, & cunei, non tantum vomicæ, sed etiam pulmonis latera violentiùs abrumpat; hinc superiores ad excreatum, & laterales ad gravius, seu ulcerosum empyema eruptiones fiunt, communiùs tamen lateraliter magis, quàm superius, ob puris ponderositatem. Huic empyematis generi refertur perniciosissimum illud, quod textu novissimè

novissimè allato annuere videtur Hippocrates, & apertius locis aliis describit. Secundus & tertius suppurationis gradus à locis Hippocraticis solidè per Duretum explicantur in Coac. fol. (mihi) 255. Primus cæterum descriptus suppurationis gradus in simplicibus, & communioribus pleuritidibus accidit, lymphaticis, biliaribus &c. Alter in mixtis, seu sanguineo-lymphaticis, sanguineo-biliaribus, aut lymphatico-biliaribus occurrit: Tertius nonnisi in phlogisticis sinceris pleuritidibus; quæ tamen fortissimæ non sint: Has namque, viis cruoris per pulmones summè constipatis, ut itus ejusdem, reditusque tandem intercipientur, ante suppurationis tempora abire in necrosin, superius vidimus §. XI. Signa harumce omnium suppurationum præcipua ex Coacis Hippocratis elicere quisque poterit: Interea alteri solùm, & tertio pleuriticarum suppurationum gradui apprimè convenit Aphor. XV. Sect. V. *Quicumque ex morbo laterali suppurantur, si in quadraginta diebus purgentur à die à qua fit ruptio, liberantur, si verò non, ad tabem transeunt.* Et satis de pleuritica suppuratione.

Biliofarum Pleuritidum genuinæ divisiones.

§. XXIX. Ex tot itaque Hippocraticis sensis jam novum non erit, quod biliosa in genere pleuritis alia simplex sit, alia mixta: Simplex, quæ à sola bilis delinquentia, morbosaque ejusdem in pulmonibus congestione, absque essentiali aliorum humorum labe, ortum ducit: Complicata, in qua bilis in pulmone delinquens proprium etiam lymphæ vitium, aut sanguinis verè phlegmonosum sibi in consortium adducit. Rursus simplex alia mitior & brevioris circuitus, alia gravior, sæviorque: Prima ex bilioso dumtaxat orgasmo progenita, cum bilis morbosæ copia mediocris, secreta jam à toto sanguine, eique tamen adhuc superaffusa, & veluti innatans, cum eodem pulmonares reticulos percurrens, ibidem à cursu suo nonnihil retardatur; visceris idcirco partes omnes lacefcens, excitulans, convellens, membranæ succingentis acutum dolorem,

sanguinis retardationem à crispatura vasorum, hinc febrim, & angustiam spirandi, hinc tussim à stimulis, excreatus a transfusionibus in bronchia, aliaque pleuritidis stigmata manuducens. Verum enim verò cum bilis in hoc orgasmo pleuritico vaga per sanguinem sit, suoque adhuc impetu, & mobilitate cieatur, facile à pulmone discutitur, ac expeditur, to o pulmonis affectu interdum etiam ante septimam evanescere; ut locis non paucis adnotavit Hippocrates. Biliarem hunc affectum, ut non externis thoracis partibus sed ipsis pulmonibus infixum, pleuritidem quidem nuncupabimur, sed per solam irritationem. Altera quæ gravior est à bilis Methastasi, seu decubitu per fluxionem, ortum habens, cum totus quantus sanguis pulmonicus bilis peccantis confusâ affusione luxuriat, tum solidametipsa pulmonalia, vel tota, vel plurima eodem delinquenti succo imbibuntur. Hæc stasis biliaria in pulmonibus legitimam Phlegmonem universo symptomatum satellitiô frequenter similat, præcipuè in fervidis subjectis & juvenilibus, siccâque æstate, & calidiori. Cæterum pleuritis biliosa simplex, tum prima ex descriptis, seu minor, tum altera seu major alvinis evacuationibus, ut toties superius commentati sumus, aliisve similibus præfidiis depellenda venit; quibus in genere Hippocraticum illud, præter tot alia, oraculum consentit: *Quibus in febris dolore lateris fiente alvus multa aquosa, & biliosa egerit, alleviantur*: illudque aliud ex Coacis: *Pleuriticis autem prodest alvum mollescere*; ut jam superius memoravimus. Mixta igitur seu complicata pleuritis biliosa, in qua bilis extranea cum aliis pariter peccantibus succis per areas pulmonum debacchatur, alia est sanguineo-biliaris, cum sanguis simul & bilis in pleuriticam affectionem conjurant; alia lymphatico-biliaris, seu bilioso-catarrhalis, cum lymphâ, seu pituita simul, & bilis. Varias de his complicatis pleuritidibus hippocraticas observationes contulimus, signatim in §. XIII. & XXI. aliisque plurimis. Pleuritis hujusmodi biliaris complicata, secundum bilis, aut fociorum delinquentium humorum præpolentias varias, & productiones, modis variis superius expositis oppugnatur.

De Vera Pleuritidum biliosarum sede.

§. XXX. Dixi Pleuritides omnes biliales, etiam si simplices sint, non jam in externis Thoracis partibus defigi, sed in ipsamet substantia pulmonum. Hoc nec fortuito, nec leviùs dictum admonet Duretus, alique Hippocratis clarissimi Interpretes, non tantum antiqui, quàm recentiores senis divisioni Pleuritidum in pleuritidem propriè biliosam, & pleuritidem propriè non biliosam non integrè, opinor, advertentes; ut inde oppositos ejusdem Præceptoris textus, alvi profluvium in pleuritide modò approbantes, modò reprobantes, simul conciliarent, cogitarunt jam, pro illa pleuritide, in qua Hippocrates alvinæ purgationis utilitatem testatur, non quidem esse pulmonis affectum intelligendum, sed lateralem dumtaxat per costas, ac intercostalia, congestionem externam, à cachochymia aliquâ, ex hypochondriis, seu ut dicitur more Hippocratico, ex præcordiis sursùm delata, vel à Capite in fluxionis modum inferiùs depluente, & exteriora infestante absque ullo pulmonis affectu. Sed non benè castigatam esse hujusmodi interpretationem eruo ex eodem Hippocrate, qui in his Lateralibus doloribus, quos ut biliosas pleuritides, aut mixtas, aut sinceras designat, suppurationes, abscessus, empyemata, sputaque inde pulmonica, coctionibus variis, aut suppurationibus ob signata commemorat in locis illis suis superiùs per §. XXII. & XXIII. allatis, aliisque plurimis; constatque practicis, dolorem merè Lateralem, seu spurium, ut dicitur, nunquam in suppurationem emigrare; nec nisi ab affectis pulmonibus sputa hoc modo disposita amandari; nec idèò nisi iis biliosos hujusmodi affectus assidere. In doloribus aliquibus lateralibus, quos ut biliosos describit Hippocrates, nonne periculum, imò ipsummet obitum minitatur? super hac re Textum citatum in §. XIII. & XXI. aliumque in §. XX. recognoscas velim. Interea externi Laterales morbi, si soli sint, periculo vacant. Textu illo citato ad §. XXV. senex non obscurè describit fluxionem

bilis non jam in exteriora Thoracis, sed in ipsos pulmones, ad procreandam pleuritidem lib. *de humor.* & in *epid.* recenset cruentorum expuitionem in biliariis pleuritidibus: *Convenit quibusdam sanguinem detrahre tempestivè in talibus: in aliis autem velut in his non hoc convenit: Impedimentum in spuentibus cruenta; anni tempus, pleuritis, & bilis.* Nec tamen in doloribus Lateralibus externis cruenta expuuntur. Tandem in *Coacis* asserit Senex: *Lateris dolor in sputo bilioso, quod immeritò evanuit, insaniam facit.* Nec tamen hoc omne ex dolore solùm intercostali unquam producit.

Historia agrorum Hippocratis, apposita superiori paragrapho confirmantia.

§. XXXI. Sed quid plura? Consulat Historias ægrotantium Hippocratis qui se certiore exoptat, biliosas illas pleuritides, quæ alvi fluxu solvuntur, in ipsismet pulmonibus systrophicè stabulari. En ægrotus XIII. VII. *Epidem. Cauponi, qui peripneumoniâ laborabat, alvus statim subiit: Circa quartam diem sudor multus accidit: Febricula soluta esse videbatur; Tussicula nulla erat, ut ita dicam. Quintâ, sextâ, & septimâ, desinebat febris; sudor octavâ; nonâ excreabat pallidum. Decimâ affatim non sæpe alvus dejiciebat: circa undecimam mitius habebat: decima quartâ sanus evasit:* Audiamus nunc præcipuam ad hunc casum interpretationem expertissimi Valesii: *Rarum exemplum est hoc peripneumonia benè per alvi profluvium soluta, nam ut in Aphorismo dicitur, à peripneumoniâ malum est. Neque sanè successisset, nisi pariter sudasset, & excreasset homo (hæc tamen sola Valesii conjectura est, non sensus Hippocratis, ut inferiùs videbimus) Excreatio enim peripneumonia est principalis, ut Hippocraticè dicam, evacuatio; sudor omnibus inflammationibus est conveniens: Accessit peculiaris quædam Causa, ob quam hæc alvi profluvium contulit, species succi (nec tamen ægrotus succum assumpsit, nisi pro hoc succo intelligat interpres succum bilialem in Corpore, & pulmonibus redundantem: Reverà prosequitur) Nam color sputi pallidus*

pallidus bilis indicavit redundantiam, ea verò per alvum utiliter subit, aut subducitur. Itaque etsi morbi ejus species solvere ventrem non suadeat, si tamen bilis redundare videatur, licet ob cachochimiam etiam in eo morbo aliquando facere. Illud enim habuit egestio alvi conveniens, quod dejecteretur acervatim non sæpe. Nam talis egestio quia est copiosa confert, quia rara rectè fertur. Ex his itaque liquido patet, peripneumoniam hujusmodi biliosam fuisse, ut potè bilioso alvi profluvio ad principium levatam, ad statum, & declinationem solutam; morbum interim verè pulmones obsidentem; ut extrà omne dubium est: Pleuritidem autem à peripneumonia non differre nisi per gradus, aut etiam si mavis, per situm affectionis in pulmonis corpore, scilicet externum magis in prima, internum in altera, sed in utrisque semper affectum pulmonem, nemo ad has dies jam ambigit. E contra ægrotus alius, post hunc servatum Cauponem ab Hippocrate immediatè descriptus, qui est XIV. VII. eorund: Epidem; eodem morbo, peripneumoniâ scilicet biliari, similibusq; symptomatis percitus, decimaquintâ moriebatur, cum productæ per alvum in statu morbi biliosæ dejectiones supprimerentur. Hermoptolemo post pleiadum occasum febris supervenit: Tussis non valde vexabat, lingua autem qualis est peripneumonicis. Nonâ die sudavit, totus refrigeratus est velut videbatur. Obtulerunt ipsi succum, & circa meridiem calefcebat. Undecimâ sudavit, & alvus demisit. Siccata sunt biliosa dejectiones, & tussicula supervenit. Decima quartâ excreabat, & stertebat: Decimâ quintâ cum toto tempore mentis compos fuisset, mortuus est. Audiamus aliqua ex interprete Vallesio: Hic mortuus est eodem morbo, & eodem ferè tempore quo Caupo liberatus. Nam ex peripneumonia obiit hic die decima quintâ, ille ex eodem morbo liberatus est decima quartâ. Illud habuit simile hic morbus priori, quod sudores, & alvi profluvia acciderint. Verum hæc ipsa fuerunt deterioris conditionis, & lethalia. Nam à sudore refrigerabatur, & alvus cum fluere cepisset, suppressa est intempestivè, & recurrente sursum bile, tussicula aucta est denuò, cum à principio fuisset exigua. Supervenerunt postremò

postremò illa duo pessima signa, excreare pallidum decima quartâ &c. Ego tamen adnoto primò, mortuum esse hujusmodi peripneumonicum, non quòd sudores & biliosa alvi profluvia fuerint *deterioris Conditionis, & Lethalia*, ut affert Vallesius; Sed quod hæc semel producta suppressa fuerint, sudores tamen ut ut perduraverint, quia tamen peccanti Causæ compares non fuere ideò inutiles redditì: secundò, eventum hujus ægroti satis manifestare, Cauponem antecederet descriptum per constantem alvi egestionem, principio obviam, statuque morbi reducem fuisse judicatum, non autem per excreatum, aut sudorem, ut voluisse Vallesius videtur: Nam hic ultimus suprâ Cauponem meliùs sudasse videtur, iteratò scilicet, & diebus Criticis, idest ad nonam, & undecimam: Caupo vix semel, dieque non judicatoriâ, nempe octavâ. Meliùs insuper quàm Caupo excreavit: Nam Caupo vix ad nonam excreasse narratur, idque pallidum: Hermoptolemus ad decimam quartam sputum non vitiosum excreabat: Et Hermoptolemus *mortuus est*. Adnotato tertio, Cauponem à morbo evasisse per egestionem alvinam à naturâ procuratam, seu spontaneam. Non etenim commemorat Hippocrates succos Cauponi fuisse propinatos: sed in Hermoptolemo fluorem alvi biliosum à *succo eidem oblato* fuisse advocatum suspicor, à quo partam illico notabilem utilitatem conjiciendam linquit Hippocrates, qui quod biliosæ suppressæ fuerint dejectiones conqueritur; & suppressioni subitam adjungit Tussiculæ invasionem, & mox stertorem, & mortem. *Etenim* [doctissimè ad hanc Hippocraticam Historiam commentatur ornatissimus & addictissimus meus Joh. Baptista Verna opere suo eximio *Pleuritidis, morborum acutorum principis*] *exsiccatis biliosis egestionibus in pectore materia pleuritica amplius angescibat, & premebat*. Cum autem apud Hippocratem, suosque omnes interpretes non ab externo Lateris, sed ab interno pulmonali affectu exquisitiores reputentur Pleuritides illæ, in quibus dolor usque ad claviculam protenditur, jam ægrotus LXXXIV. VII. Epidem. Hippocratis, qui pleuritide & inflammatione captus est cum dolore usque ad Claviculam, biliosis

biliosis tamen dejectionibus levatus, nostra hucusque de biliosis egestionibus, veras, & pulmonicas biliales pleuritides judicantibus, commenta munit, & firmat: *Metonem post pleiadum occasum febris corripuit, & Lateris sinistri dolor usque ad Claviculam protensus, atque is adeo vehemens, ut quiescere non posset, & inflammatione laborabat. Dejectio copiosa erat biliosa, tribus ferè diebus cessavit dolor, calor verò circa septimam aut nonam; Tussis aderat, excreationes neque ullo modo biliosa, neque multæ fiebant; verum pituitosa tusses comitabantur, cibos sumebat, aliquando exhibat velut sanus: aliquando autem illum calores tenues exiguo tempore corripiebant: sudores exigui sub noctem: spiratio in calore frequentior aderat: maxillarum rubor, lateris gravitas, & sub axillam, & ad humerum pertingebat: Tusses detinebant. Medicamentum per superiora eduxit biliosa: Tertiâ post medicamentum exiit pus, quadragesimâ verò ab initio morbi: Per alios verò triginta quinque dies repurgatus est, & sanus evasit.* Copiosis biliosis dejectionibus principio suppetias venientibus, statim ad tres dies exulabat dolor, necnon ad septimam aut nonam febris, & inflammatio: sed cum biliosis dejectionibus necessarii pariter hoc casu biliosi excreatus non responderent; nam *excreationes neque ullo modo biliosa, neque multæ fiebant*; hinc morbus ab alvi fluxu non integrè judicatus fuit: Bilis equidem, quæ fluere adhuc ad affectum pulmonis potuisset, copiosis sedibus distracta fuerat; sed quæ jam effluerat, per sputum non discussa, peperit cum pituita simul collecta primum illum suppurationis gradum à nobis §. XXVIII. superius descriptum; simulque recoctionem passa, vagam febriculam seu calores; sudores sub noctem, graviolem in caloribus spirationem; lateris gravitatem, aliaque leviolem suppurationis speciem confectantia. Subductâ tamen per emeticum adhibitum, ut prius per alvum fuerat, novâ adhuc bilis delinquentis quantitate, residua pulmoni impacta lenius, & faustiùs cum pituita maturescebat; ut per judicans sputum aliquot tandem hebdomadarum curriculo expurgaretur, agrumque liberaret. Cæterùm, ut ut benignior suppuratio successerit, hæc tamen nec accidisset, si sputum biliosum, biliosis

dejectionibus superadditum , pulmones competenter expurgasset : Admonet etenim senex in Coacis tunc fieri in pleuritide abscessum , aut simplicem suppurationem , cum *Alvus non fertur liberaliter biliosis dejectionibus , & sputum convenienter non editur.*

Et ut hæc singula novo observationis munimine obfignentur , juvat hîc historiam biliosæ pleuritidis mense Octobri dum hæc scribo , mihi præsentem referre. Mulier quinquagenaria vegetæ , & biliosæ constitutionis , febre cum rigore corripitur , nausea simul , oris amarore , linguæ flavedine , ventris tensione , & rugitu. A propinata catharsi multæ biliales ejectiones fuere , non tamen probè concoctæ. Ad finem diei secundæ , nocte mediâ , dolor ingruit lateralis punctim lacescens , cum siti , ardore viscerum , febre acutâ , pulsu tamen non adeo duro , spirandi angustia , tussi in primis cum sputo simul sanguineo , & simul intensè flavescente , seu propriè bilioso (Nam quæ sputa ad primas pleuritidis aleas flavescent , nullâ adhuc insurgente coctione , nonnisi biliosa judicamus) ejusdemque habitudinis sputum ad usque finem tertiæ , & principium quartæ prosequabatur , constanti ad noctem mediam exacerbatione febris , doloris , & difficultatis spirandi. Ægra ob febris acutiem , & æstuationis vehementiam Phlebotomum passa fuit. Quartâ , sputum notabiliter crassèfactum atque imminutum : Hinc major respirandi oppressio , pectoris tamen dolore evanescente , factâque capitis per levem soporem , & vaniloquium interpolatum aliqualli invasione. Quintâ præcavendæ hujusmodi Epigenesi parcam denuo sanguinis detractionem imperabam , ac clystere acriori novæ adhuc biliosæ dejectiones eliciebantur , sputo indè restituto , eoque liquidiori. Sextâ sputum adhuc uberius , sed non ultra naturam bilioso - sanguinei : Ex novo clystere copiosa adhuc bilis subductio. Principium septimæ mitior excepit conditio morbi , cum sputo à prioribus non dissimili , sed fluidiori , & uberrimo. In statu , & fine septimæ diarrhæa spontanea bilis saturatæ , & concoctæ febrem , & respirationem mulcebat. Caput , mensque libera. Principio octavæ egestionis biliosæ per alvum spontaneæ leniter perseverabant. Exhibitum hac die catharti-

catharticum, quo bilis benè concoctæ proluvie non modicâ deturbatâ, delebantur febris, & tussis, ægra nil postea expuendo præter semel, aut iterum quidpiam album & simpliciter catharrhale. Nonâ vix febris vestigium, sed nulla tussis, nullus excreatus. Ita pectoris affectio integrè eâdem die judicabatur, & ad undecimam febris. Nulla suppurationis species toto morbi decursu visa est.

Quædam pleuritidem, præcipuè biliarem, antecedentia, & consequentia.

§. XXXII. Duo adhuc in rem nostram: Primum quod antecedentibus biliosæ pleuritidis; alterum quod consequentibus refertur. Quod pectoris acutos affectus, præcipuè biliosos in deterius agit, est prævia, & subdola ejusdem visceris intemperies aliqua in ariditate, in laxitate, aliave quacumque imbecillitate, aut atoniæ gradu; insuper in humiditate nimia, aut strictiori naturaliter contextu: antecedens insuper habitudo, in tumore aliquo sensili, aut insensili, pulmonibus interno, aut adnato, aut attiguo, aliave vitio aliquo organico, etiam externo, vel toti Thoraci, vel alicui solum Thoracis parti assidente, præcipuè in quadam depluviorum, aut stasium, seu defluxionum, ut dicitur; speciali habitudine, aut facili in eadem relapsu. Ita qui saniori sunt pectore, seu spirabilium partium vigore, & amplitudine præditi; Ab invasione pleuritica facilius, ociusque liberantur; pulmones etenim qui sani sunt, vegetoque suo, ut par est, in fibris nerveis, muscularibus, membranaceis naturali elatere pollentes, morbos varios, quibus fortuito invaduntur, felicius, & celerius excutiunt: & è contra. Ità tussiculosi, catharrofi, anhelantes, asthmatici, gibbi, hemoptoici, & similes si mediocri pleuritide, etiam solum biliosâ, aliquando corripiantur, facile occumbunt: Ita ex Aphor. 46. sect. 6. *Qui gibbi ex asthmate, aut tussi fiunt, ante pubertatem moriuntur*; mortemque hujusmodi Galenus in commentario hujus Aphorismi ex facillima pectoris suppuratione auspicatur.

Nostroque adhuc sene dictante, recidivantes pleuritides multo difficilius curantur; ac sæpius in eas relabentes è vivis surripiunt. Prævia in primis pulmonum exsiccatio pleuritides etiam non summè exquisitas, ut biliosas, aut similes alias, lethales constituit: *Quum pulmo etiam ipse supra resiccatus fuerit.* Hipp. Quod autem pleuritidi biliosæ non bene judicatæ frequenter supervenit est in cerebrum Anadromes, aut morbus aliquis biliosus cutaneus: Quoad primum: *Lateris dolor cum bilioso sputo præter rationem evanescens agros in vehementem, & furiosam mentis emotionem agit:* Hipp. in Coacis, ut jam superius retulimus. Quoad alterum: Bis in biliosa pleuritide animadvertimus cum sputo, & dolore quartâ die suppressis ingens ad totam faciem erysipelas subitanè depositum; quod tamen ad septimam, topicis aliquot blandè discutientibus usurpatis, præcipuè ex decoctione lentium cum flor. sambuc. & tantill. camphor. & insuper attemperantibus, unâ cum tota pleuritide disparebat, ægro per eandem judicationem utrosque simul affectus evadente. At satis de biliosa pleuritide, simulque aliis, commentatus sum. Nunc ad Guidettum meum revertor.

5. Febres in primis quod attinet, nequeo non mirari disparitatem illam notabilem quâ vernaes Tertianæ ab autumnalibus discriminantur. In illis firmo stant talo Hippocratis dicta, De judicat. In Aphor. & Coac. Nempe: Tertiana exacta quinto, aut septimo, aut summum nono circuitu terminatur. Febris si aliquando intermiserit periculum abesse significat. *In istis è contra vix, ac ne vix quidem eorum veritas comprobatur.* Rursus si tertianâ vernali affectis labia exulcerentur, proxima salutis indicium est, si autumnali detentis hujusmodi exulceratio contingat, interdum acutior, vel saltem prolixam prænotat febrim. Idem observamus ex sudoribus, aliisque excretionibus paroxysmalibus. Vnde autem disparitas? An ex diversis peccantibus fluidis, variisque ideo eorundem discrasis petenda? Nequaquam: Nam ab ejusdem recrementi biliosi vitio, hæc præ illa tempestate diverso, arguendum censeo: Quæ namque contingunt verno tempore tertianæ ab orgasmo quidem bilioso produci autumno per hyemalem adiapneustiam accumulato. Verumtamen

cum ob animale, ut ita dicam, antiperisthasin à frigido ambiente contractam validior chilificatio, & reliqua exactius elaborata fuerint pepses; idcirco bilis à crasi sua naturali vix deflectentis genus ad secretiones, excretionisque suas perficiendas proximè dispositum comperiatur, facilius poterit effervescentia febrilis ope, soluto lentescens lymphæ connubio secerni, & viis reseratis eliminari per alvum, renes, cutim, aliasque vias etiam non consuetas. Hoc pacto per regulares periodos evocata redundans cholera agrotos brevi dimittet pristinae salutis; ni fortè rigidior bruma, ut aliquando contingit, lentoribus augendis ansam dederit, præcipuè in corporibus minùs vegetis, sicque retardato pepasmo, per plures exigat paroxysmos atteri, & per congrua præsidia eliquari, ac fluido-fieri exuberans recrementum, priusquam educatur.

DE TERTIANIS VERNALIBUS.

Canones Practici.

Canon I. **Æ**stivas febres manifestè periodicas, in primis intermittentes, ab accensæ per tempestatis intemperiem, aut tostæ, aut modis aliis exasperatæ bilis erroribus ortum genuinum suum auspiciari, ut variis superiùs locis, ita abundè magis inferiùs explanabimus. Quoad vernas febres, præcipuè intermittentes, si æstas austrina, fervida, & sicca præcesserit, hæ succedente vere, etiam ante adventum caloris, præcociter erumpunt: Ut vere hujus anni 1720. post fervidissimam æstatem superioris anni, aliisque proportionaliter ad alios annos temporibus vernis, luculenter animadvertimus. Si opposita æstatis constitutio fuerit præhabita, intermittentes nonnisi ad finem veris, austrisque jam efflantibus, & ambiente notabiliter excalefacto egrediuntur. Ideo jam non minùs præcoces, quàm tardiores vernaes tertianæ à bile sunt: Primæ scilicet ab hoc succo per præviæ æstatis inclementias depravato, nec non autumno hyemeque succedentibus, quæcunque fit causa, in viscerum recessibus constricto, & recondito, mox ab elatere Ætheris vernalis excitato, &

soluto : Alteræ ab eodem liquido per veris fervores in causam febriferam recenter parato. Ita quò vernum tempus celerius incalescit, & ad æstatis constitutionem appropinquat, eò citius intermittentes expurgiscuntur.

II. Vis observationi supervenit ex manifesto febrium æstivarum biliosarum recurso in vernum tempus succedens. Nam fervidioris æstatis aut autumnii intermittentes, præsertim in biliosis, & juvenibus, post methodicam universalium, ut dicitur, remediorum administrationem, febrifugo compressæ, eadem sequenti vere, aut æstate frequentissime repullulant; harumque novarum deflagrationum auxilio, & instrumento febrilia recrementa omnia, hætenus in sanguine refractaria, si medici prudentia conspiret, integrè, ut plurimum, ab ægri corpore tunc temporis expurgantur. Ulterius, quæ intermittentes per autumnum, & hyemem ad vices feriantes, & ad vices recidivæ, usque ad vernum tempus errabundæ protrahuntur, hæc utique tempestate recoctæ, & veluti ad debitam maturitatem evectæ, eadem perfectè in subjectis, non ulterius malè habitis, judicantur.

III. Ex his deducimus, Tertianas febres, quæ incunte vere accenduntur, eidem tempestatì non esse familiares, & natives, sed potius extraneas, & fortuito advenas; videlicet præcedenti æstate, aut autumnio creatas; eas inde, fomite nec probè, nec integrè à corpore excusso, sed vel imperfectis naturæ nixibus, vel etiam remediis quidem depresso, tamen adhuc superstite, tacitè hyemem transfiliisse, at per vernum ætherem noviter succusso extraneo, auspiciis prioribus resurgere.

IV. Deducimus insuper, tertianas, quæ vere non adhuc in æstatis fervores migrante attolluntur, residuum ferè aliquod superioris æstatis biliare incendiculum critico vividiori motu è corpore excutiendum fovere; hinc simpliciores fore, magis regulares, leves, atque breviores; quemadmodum è converso, quæ æstate, aut autumnio sobolescent, ut potè ex actuali, atque diffusiori productæ bilioso incendio, diuturniores, aut graviores fieri consueverunt.

V. Non

V. Non inficior, febres plurium generum periodicas ab aliis ulterius, præter biliosum, principiis quandoque verno tempore procreari: sic superius innuimus Cap. I X. §. VIII. secundæ partis, vernas ut plurimum febres produci ab humore cujuscunque naturæ, qui per hiemen in latibulis sepultus, & otians, ab æthere novo subinde excitatus, secernendæ substantiæ suæ colatorium conforme non statim adinvenit; hinc quousque in sanguine restitat, eundem immiscibilitate sua in febriles motus adigit: sed si verni temporis ingressu tertiana, præprimis exquisita, febris invadat, hanc esse propriè biliosam confirmo; cujus videlicet biliosum esse ignitabulum revelant tum symptomata universa biliosa, tum eadem, ac in cæteris biliaribus morbis, per bilis concoctionem, & excretionem, aut pacationem, inversionemve, judicatio.

VI. Labiorum, ut & pinnarum nasi, & linguæ apicis pustulæ, fissuræ, excoiationes, leves exulcerationes, atque excrustationes ex bile acriori, subtiliorique ad has partes à sanguine eructatâ, in intermittentium statu creberrimæ, licet non perpetuò in tertianis autumnalibus mali ominis sint, ut innuere videtur Guidettus noster, imò salutarem quandoque judicationem auspicentur; tutius tamen in vernalibus salutem proximam despondent; Quod idem de sudoribus, securius in vernalibus morbum decidentibus, infidè verò, & semper imperfectè in autumnalibus, adnotamus: Idque morbifici humoris tenuitati, mobilitati, parcitati, & potissimum novo cuidam, vegetoque impellenti, & defæcanti principio, in vernalibus supra autumnales, arrogandum venit.

6. *Æstivas autem & præsertim autumnales tertianas doloso frequenter incedere gressu nemini latet. Invadunt hæ primis diebus eodem omninò more, ac exquisitè intermittentes; Ast post tertiam, ad summum quintam periodum (si nullis, aut perperam institutis remediis tractentur) fiunt duplices remittentes, mox continuæ malique moris cum alvi irritationibus, turbationibus flatulentis. Et sæpè biliosis dejectionibus, modicum aut nullum Levamen præferentibus, vel cum sudoribus intempestivis ac symptomaticis, aut nullis,*

nullis, iisque succedente cutis quadam ariditate, & squallore cum acuto & mordaci calore tangentibus obvio, ventris tensione imò & interdum tumore universali tensivo, aliàs tandem cachectico. In pluribus vomituritiones cientur spontaneæ ne dum initio morbi, sed ejus quoque progressu: In plerisque dumtaxat ad easdem proclivitas, vel anorexia, & oris amaror: In omnibus anxietates cum Zonatorum hypochondriorum, lumborum, renumque regionem veluti constringente, cum extensione ad dorsum gravativa, atque universali lassitudine. Ex quibus abundè liquet, bilem præ cæteris humoribus febres istas accendere quarum plurimas, ut monebam, nisi ab experto Medico prudenter regantur, ad necem assolent malignarum stigmate terminari, vel agros saltem ad plures hebdomadas angere, ac longam medentis assiduitatem defatigare.

DE INGRESSU TERTIANÆ

Biliaris perniciosa, ejusque Indicatione.

Canones Practici.

I. **T**ertiana bilialis perniciosa hîc à Cl. Guidetto exhibita, superiùs à nobis exarata, secundùm tempestates, ægroantium ætates, temperamenta, & bilis peccantis copiam, impetum & locum, variis invadendi modis, variisque acutiei gradibus invadit. Brevior æstate sed fortior; Contumacior autumnis sed lenior: ad autumnis finem malignantior. In juvenibus picrocholis, & biliosis immanior: In ætate provectioribus vitales functiones, & animales, præcipuè arbitrarias notabilius adoriuntur: senes inter rigorum excessus eripere minitatur. Ubi peccantis humoris multitudo, aut impetus validior extat, crebriores, graviorefque ejusdem circuitus producuntur, & ardentiora symptomata. Si colatorium suum magnam partem vitiatus succus inhabitet, & per vices in sanguinem refundatur, apertiores fiunt exacerbationes, & remissiones; secus si magna ejusdem portio stabuletur in sanguine. Commune tertianæ perniciosæ

perniciosa ingredientis dignum est, febrem cum notabili per primas vias biliari tripudio intermittenter inchoatam mox in continuam extendi cum vehementioribus symptomatibus, essentialem quidem continuam acutam simulantibus, sed distincto semper circuitu, cum rigore, aut horrore invasionis, & praesertim constantibus per primas vias biliaris turgescientiae stigmatibus, nausae, cibi fastidio, interdum & vomitu, praecipue in paroxysmorum ingruentis bilioso, amaritiae oris assiduae, linguam sordidam, & communiter flavam, siti, dolorificis ad epigastrium, aut hypochondria abdominis tensionibus, intestinali murmure, alvinis fluoribus, aut irritamentis, caeterisque animalis Oeconomiae ex depravata bile laesionibus, quas affabre Guidettus noster exponit, adnotando potissimum mesenterii concussiones, & distractiones varias ab intestinorum, & coli praesertim, passionibus, unde molestae in ejusdem ambitu, atque origine sensationes. Caetera pro Diagnosi perniciosae tertianae ingressus ex superius à nobis, & nunc à Guidetto expositis repetenda sunt.

II. Arduum profecto, nec solum huc usque phaenomenon est, in his, aliisque febribus arbitrarias vires, seu musculorum voluntariis artuum & trunci motibus inservientium, actiones, plus aut minus notabiliter infirmari, atque interdum sufflaminari, dum interea necessariae, seu musculorum centralium & visceribus advolutorum, principibus quidem vitae functionibus, non verò voluntatis nutui famulantium, vires, constanter adhuc permanent, & quandoque vividius exercentur, eadem praesertim causa motus in Instrumentis utrisque supposita. Pro hujusmodi verò Phaenomeni solutione dicendum puto, motus omnes, qui ad vitam necessarij plurimis animalium musculis donati sunt, quemadmodum per totam vitam perennes esse debuerant, ita etiam ad non ingens molimen institui. Agunt idcirco hujusmodi musculares potentiae super solam liquidorum gravitatem, quae satis exigua est, nullam insuper existente antagonistarum ab eisdem superanda resistantiam. Ob hanc rationem motus musculorum hujusmodi liquidorum communiter interfluentium affusione, propriaque structura invicem conspirantium

N n

absque

absque alio momento superaddito celebrantur, ut ideo inalteratè, eâdemque semper necessitate fiant in morbis omnibus, quo usque consueta liquida per hos musculos trajiciuntur, horumque insuper musculorum naturalis structura servatur. Sed idem profectò in arbitrariis motibus haud quaquam contingit: Quemadmodum enim quæ pro illis adhibentur Instrumenta muscularia majoribus gravitatibus interpolatè superandis dicantur, ità præter propriam structuram, liquidorumque communium alluvionem cursus aliquis liquidorum extraordinarius superaddendus venit, quo certè tum antagonistarum resistentiæ, tum solidarum movendarum partium gravitates unà vincantur. Sed hæc nova liquorum superaffusio ad arbitrarios motus obeundos non adeò facilè ob irregulares fluidorum motus perdurat, & suggeritur, ut è converso in morbosis quibuscumque affectibus fluit adhuc ordinarii liquoris unda per necessarij motus Instrumenta: Nec ideò in febre, aliisque morbis arbitrarij motus, ut inarbitrarij, perseverant. Sed quò me distraxerant ab iis jam foliis relegatæ, theoreticæ disquisitiones? Ad proximam perniciosæ tertianæ febris regredior.

III. Bilis itaque in hujusmodi febrium ingressu redundantis, & depravatæ, uno verbo, turgescens efferationes, & malitiæ in deterius adhuc ruentes præcavendæ sunt, usurpata celerrimè generosiori Catharsi, atque in robustis emetico: hinc statim liberaliter præscripto, vel primo curationis stadio, nullâque expectatâ coctione, Peruviano febrifugo.

IV. Nam cum memorata symptomata non modicum in primis visceribus apparatus turgescens Bilis denuncient; idcirco ex Hippocratis oraculo eâdem die, eâdem horâ purgandum est. Sed cum in subjectis quamplurimis febrili hoc genere conflictatis ferocissimi bilis circuitus inducias omnes excludant, nec satis catharticis obtemperaturi sint, neque possint cathartico-rum iterationes, absque virium exsolutione, & concidentia naturæ, satis adimpleri, hi tunc celerius supprimendi sunt, aut primis aleis intermixto cum purgantibus febrifugo, aut etiam iisdem præposito; tum febre hæc perniciosâ solis febrifugis primo

primo ingressu oppugnatâ , atque depressâ , purgantibus deinde pacatiùs subrogatis, atque juxta exigentiam repetitis, secundùm varias turgescentię biliosæ, & productorum circumstantias adhiberi opera poterit. Qui dictitant febrem per corticem febrifugum deletam , si postea cathartica propinentur, revocari, fomite scilicet à stimulis, & concussionibus catharsecos ex amplexu febrifugi soluto , & in novam libertatem vindicato , hosce toto quidem celo hallucinari assidua nos edocuit experientia , quâ ægros post exhibitum corticem à febre liberos , per subrogata purgantia tutiùs à relapsu præcaveri , recognovimus. Febrilis materies per totum corpus dispersa posteaquam febrifugis particulis implicata corpulentior idcirco crassiorque reddita fuerit, si non integrè ab universa massa sejuncta est , additiùs saltem in se se conglobata & cohærens, succedaneis cathartici percussionibus cedere faciliùs potest, cumque adnexis febrifugi moleculis unâ subduci. Hoc sanctè referre possum , in innumeris casibus , eorumque plurimis (ut dubium ad lancem veritatis apponerem) de industria tentatis , egros cujuscumque habitudinis , & quâcumque tempestate à febre quâlibet intermittenti, aut intermittētis naturam participante per febrifugum vindictos , hinc propinato cathartico nec magis nec minus in febrim fuisse relapsos quam ii , quibus catharticum præscriptum non fuerat ; ut ideo decernendum videatur , purgantes , post usum febrifugi administrationes ad revocandam febrim , vel non revocandam nil penitus conferre.

V. Tutò itaque in perniciosis his febribus , febrifugum quocumque tempore , potissimùm purgantibus immixtum propinetur : Imò debellatâ febre , ut ejusdem regressui prospiciatur, successivè & epicriticè per 20. 30. imò & interdum 40. dies minori dosi exhibendum. Quod si regredi febrim contingat, nervosiùs subitoque repetendum : Infringi enim hoc modo biliosas quascumque explosiones , & partitis vicibus , dispersas, inversas, ac depressas substantias hujusmodi febriferas ; Ad naturales tandem secretiones , excretionesque compelli aut emendari saltem, atque ad eas tranquillè disponi quotidiana praxis confirmat.

7. Nec simplex biliosi recrementi excessus ; ut sic reputandus venit harum febrium incendiculum , sed fellea potius cacachylia, crassioris scilicet , acriorisque Bilis per æstatem sensim provecta, tribus potissimum de causis, videlicet propter esculentorum eam augmentum ingluviem fructuum horeorum , salitarum carniū, Vini Meracioris &c. Secundo propter languidiores Ventriculi vires , & succorum Chilificationi inservientium inopiam , vel alterationem. Tertio ob jugem , nimiamque subtilioris biliariae portionis exhalationem, ut & aqueæ diluentis , per poros cutis , atque crassioris ab æstu perenni assationem. Quo fit , ut viscidius factum hujusmodi Recrementum altiores agat in visceribus stases. Quod innuisse videtur Hippocrates de Nat. hom. his verbis. Bilis eorum omnium quæ in corpore sunt cum sit glutinosissima maximè diuturnas stationes facit. Et quarto de Morbis subdit. Incalescente corpore aqua foras exhalat ; Quod verò biliosum est cum densum atque cohærens sit neque similiter exhalat. Cum autem ex ejus redundantia aut cohærentia natura infensa sequi necessario debeat fermentatio præternaturalis , cujus ope sequatur ingruentis colluviei attritio, & subtiliatio sufficiens ad secretionem, excretionemque: hinc oritur dictarum febrium occasio , imò & necessitas ut mox addit laudatus Celsus eodem loco de morbis, nempe extenuatus biliosus humor efficit ut corpus magis incalescat copiosius enim & aptius alimentum feбри supeditat. Sed quid ultra pergo in Pathologicis inquisitionibus recanendis, quas tam affabrè in secunda Historiæ tuæ Hepaticæ parte exarasti Vir æternum colende; Dum scribendi occasio nil aliud deponcit quàm simplicissimum exhibere animadversionum specimen, earum videlicet quas mea praxeos decursu e Lectulis agrotantium decerpere datum est ad Therapeiam firmandam? Omissis itaque ulterioribus ratiocinationis argumentis , statim ad ea quæ ad medendi methodum pertinent, candidè indicanda me confero.

DE BILIS NATURALIS.

*In Febriferam Mutatione.**Canones Theoretico-Practici.*

I. **S**I quandoque contingat, ut vel ob raptus ventorum, vel tempestatum inclementiam, aut victus nimiaeque exercitationis errores, aut impetus animi aut aliâ quâque de causâ quidquid biliaris extat in sanguine, aut ejus plurimum, in restrictiorem, rigidioremque naturam immediatè convertatur, aut torrida, aquea solutaque, quæ pro vehiculo eidem addita pars est, ad illam usque mensuram absumatur, ut memorata concretio, rigiditas, aut utraque simul accedant, In novum profectò elateris gradum, novosque ocillandi modos adigetur hoc liquidum, aut ejus saltem determinata quantitas: Idcirco nec aptè secretum in sanguine, aliam in eodem fluido sanguineo lineam cohesionis, & nisuum suscipiet, & alios consequenter motus naturalibus absimiles; ut ideo cruori fiat extraneum, & totam febrilis stimuli naturam induat. Sed hæc inferius, ubi de febris natura dissertatio instituetur, abundè exponentur.

II. Quod si Bilis in statum mutetur oppositum, seu ultra naturalem compositionem suam (quæcumque adfuerit, aut præcesserit causa) solvatur, laxetur, & lique scat in sanguine, in extraneum, & febriferum non minùs vertetur, quoties solutione susceptâ, proportionaliter diversos in se se, & cum sanguine cohesionis nisus obtineat. Primum Bilis vitium in genere febres intermittentes ferè procreat: Alterum continuas sed de his fusiores alibi sermones instituimus.

III. Bilis febrilis interdum in sanguine, contagii suo genere pollet, suamque per partes liquidorum optimas, aut succos quotidie in alimoniam per primas vias elaboratos, labem celeriter diffundit. Videmus frequenter homines in victus regimine

cautos , & benè valentes , non biliosos , non Ictericos , non hepate , aut alio viscere oppilatos , prævio Bilis idcirco apparatu minimè percitos , modicâ priùs febre , hinc sensim augescente cum variis biliosis circuitibus prehensos , ab eâdem haudquaquam expediri , nisi post longum tempus , atque tantas successivè biliosas excretiones , quæ fortasse liquidorum omnium in vasis circuentium mensuram & pondus aut æquent aut superent. Plurimas hisce casibus liquidorum sanguinis , aut assumptorum alimentum non biliales substantias à bilioso fermento in bilem extemplo depravari , & converti suspicimus , ut ex aceto acetum , aut ignis ex igne progignitur. Id præterquam in morbis aliis , præsertim præstitum evidenter percipimus in febre , ex cholericâ passione homines priùs incolumes , nec ullâ bilis colluvie aurea detentos , repentinè invadente : In febre ex serpentis morfu , ex ira , ex venenis variis introsumptis , ex ovis barbi piscis comestis , aut pravo quocumque alio alimento , præcipuè ex horariis fructibus , non ne exundationes extemplo biliosæ , & subitanæ interdum gravissimæ icteritiæ enascuntur cum bilis immensis copiis per partes omnes erumpentibus ? ut ideò bilis quandoque scintilla , in morem ignis elementaris , escâ dispositâ , magnum undequaque per sanguinem biliare protinùs excitet incendium.

IV. Nec paradoxam , aut obscuram conceptui , ingentem hanc , & ocysimam in febribus , aliisve morbis Bilis ex bile multiplicationem his videri posse arbitramur , qui legerint primâ parte hujus Historiæ substantiam cruoris potissimam , bilis esse remotum principium , pituitosam videlicet gelatinosam , ramosam portionem , quæ cæterorum omnium sanguinis principiorum uberrima est , post longos ambitus , attritiones , & incalcescentias in Bilis corpus facescere ; ut ideo crudum sanguinis sulphur nuncupati eamdem fuerimus. Quamobrem ut hæc crudi sanguinei sulphuris pars in coctum , ustumque sulphur , sive bilem , multo præcociter convertatur , seu quod diuturno tempore naturaliter conficitur negotium , brevissimo absolvatur , sat est , ut aliquod in sanguine principium aggregetur , ex quo
ramosa

ramosa ejusdem elementa celerrimè in illos calefactionum, & attritionum gradus, procreandæ Bilis temperaturæ conformes, adigantur: Huicque operi præstò esse bilem ipsam in quibusdam morbis & febribus peculiari modo commotam, & effertam Cœus ipse lib. de Morbis testatur. *Bilis inquit Commota cum ad sanguinem, & venas ingressa fuerit, sanguinem ex compacta compage cum Commotione dimovet, & serosum facit, & calefacit: calefactus autem præ febre reliquum etiam corpus totum percalefacit.*

8. Cum itaque dictis temporibus, æstate nempe & autumno, rarò ut dixi, contingant febres ex se se absque artis auxilio depurativæ, ut ineunte vere; Cumque nec in omnibus corporibus eandem servant omninò naturam; ut certa remediorum tessera possit omnibus indiscriminatim conferre, præsertim quod attinet ad universalia præsidia: sequitur jam ut (quamvis à bilioso infarctu in singulis excitari comperiantur) ratione diversorum subjectorum, & victus regiminis diversus quoque morbosus apparatus accumuletur: Quo fit, ut in præscribenda alterutrâ ex universalibus præsidiis, evacuatione, varia & dissimilis exsurgat Indicatio saltem initio febris in uno subjecto diversè ab altero: Cujus signa non semper se produnt adeo manifesta, quin adhuc supersit dubitationi locus: sæpissimè enim ad agrotos vocatus tantam, tamque confusam mirabar symptomatum turbam, ut purgatio ne, an venæsectio, vel neutra in primis foret eligenda decernere anceps & summi ponderis negotium esset. Solemnes namque evacuationes, quæ aliquibus necessaria videbantur, aliis veluti perniciose, præscribendæ non erant. Nec doctorum ut ut gravissimorum, consilia poterant in illis casibus suffragari, quin in alterutrâ operatione tentanda adhuc extaret ambiguitas.

DE CURATIONE ANTIPRAXIA.

*In Ingressu Morborum Biliosorum.**Canones Practici.*

I. **I**N Febrium biliosarum simplicium, sed vehementiorum ingressu an purgatio deligenda sit, aut potius sanguinis missio, maxima frequenter occurrit curanti perplexitas. Febris quidem ipsa in juvene, aut robusto ægrotante, violenta, nec non acerbiora symptomata, præcipue pulsus duri, vibrantes, & celeres, cum æstuatione, siti, dolore capitis, anxietate, Bilis per primas vias turgescencia è vestigio non adeo manifesta, manifestior potius cruoris ipsius turgescencia, suspectæ ideo aliqujus ad partem aliquam nobiliorem majoris irruptionis dispositiones, præferendam protinus missionem sanguinis imperare videntur. Sed è converso si in biliaris hujusce febris ingressu, tempestatis, & temperamenti in ægrotante constitutio de biliari morbofo principio admoneant, habitus præcipue, excretiones, morbi periodi, biliaria tandem per universum corpus indicia in argumentum purgationis accedant. Quid, si hæc omnia simul invicem confusa sint atque promiscua, seu, ut dicitur, æquè indicantia (nam si disjuncta, unaque aliis prævalentia deprehendi queant, perito Clinico difficile non est, alterutram fidenter præferre) quid, inquam, in hujusmodi antipraxia agendum expediet?

II. In æquali Indicatione, & urgentiâ Phlebotomiæ, & catharticos in eodem subiecto, eodem momento à sanguinis missione inchoandum est; Nam majus, & promptius periculum imminet à sanguinis quàm à bilis turgescentiâ. Turgescenti sanguini brevissima via est à vasis suis ad partes obsidendas. Bili vero ex propriis latibulis ad partes longius iter impendit & gressus communiter tardior. Hæc fusè agitantur in nostris Institutionibus medicis, tract. Therap. cap. 3. quas publici juris aliquando

aliquando faciemus ; In quibus autem particulatim circumstantiis præstò sit ad Pleuritides Phlebotomia , superiùs vidimus ; In quibus ad hepatitides inferiùs examinabimus ; In quibus autem ad febres propriè bilianas adhuc magis inferiùs declarandum erit, cum de epidemiis biliosis.

9. *Exploratâ aliquando harum febrium naturâ, methodus sequens mihi est probatissima. Cum primùm accersitus in prima morbi invasione (quod rarò evenit. Nam alterna intermissio vel remissio an- sam præbet agrotantibus differendi medicam implorationem ad usque novas periodos) sedulè sciscitor, qualis sit febricitantis Idyosincrasia, victus ratio ; atque exercitatio. Quod si plethoricum, meri bibulum, aut exercitiis deditum hominem , aut juvenem feminam consuetas purgationes regulariter non passam, curandam aggredior, atque hu- jusmodi agrotantes in paroxysmo capitis dolore lancinante, membro- rum lassitudine, jactatione, respiratione anhelosa, & anxietate con- flictentur, non vereor, præmisso enema, curationem auspicari per phlebotomiam. Quâ institutâ nil mihi studiosius est, quàm frigefa- ctum, concretumque sanguinem inspicere, coccyneam ne, an variega- tam, aut lentescentem superficiem referat : Quod si purpuream inspe- xero, supernatante licet sero saturatori, est mihi argumento, in visceribus naturalibus biliosum vitiatum penus procul dubio latere. Animadvertendum tamen est an rubellus ille cruoris color à delicatâ nimis Chirurgi incisione, vel à lento ejus per cutim repentis, non prosilientis effluxu processerit ; Nam sæpe fit ut promiscuè concreseat in disco, floris tempore nullo factò partium integrantium divortio, aut precipitatione, ut ceteroquin fieri solet, quando sanguis per am- plam incisionem libero prosilit gurgite.*

DE INSPECTIONE EXTRACTI SANGUINIS,

Præcipuè in Biliariis Affectibus,

Canones Theoretico-Practici.

I. **H**Yppocrates de vict. rat. in acut. in phlogistica Pleuritide coloris extracti sanguinis mutationem expectandam jubet. *Venam, inquit, secare prodest in cubiti flexura interna, & non cunctari copiosum sanguinem detrahere, donec multò rubicundior fluxerit, aut pro puro, & rubicundo lividus: utrumque enim contingit.* Baglivus detracti sanguinis mutationes in Pleuritide apertius adnotat, & judicat lib. 1. prax. med. *In Pleuritide, peripneumonia, & hujusmodi inflammatoriis pulmonum morbis, si in sanguine è vena secta extracto non appareat in superficie crusta alba, quæ necessario apparere debet, pessimum: materia namque illa crustam efficiens in pulmone remanet, eumque infarcit; unde paulo post crescunt febris, inflammatio, spirandi difficultas, & reliqua symptomata: si verò in altera sanguinis missione incipiat apparere, bonum: Contra, si in secunda ne quidem apparebit, abstineto statim à sanguinis missione, aliter interficies egrotantem; quia per repetitam tum sanguinis missionem sanguis spoliatur parte volatiliori, unde major ejusdem ad coagulationem via præbetur; ut mihi retulit pro humanitate sua vir doctissimus Dominus Lancisus amicus noster.* Sed ipse ab affdua praxi crebriores adhuc observationes recolligo mutationis coloris sanguinis in inflammatoria pleuritide, atque adventus crustæ albæ laudatæ, non quidem ad primam, aut alteram missionem, sed solum ad tertiam; quin imò & solum interdum ad quârtam, intrepidè adhuc susceptam cum optimis ægri rebus, morbique judicatione mox succedente, non obstante crustæ illius defectu in prima venæ sectione, & in altera, nec non in tertia. Quæ quidem observationes his placitis Baglivi, & Lancisii omninò adversantur. Interea Phases hujusmodi in bilioso sanguine,

sanguine, & biliosis systrophicis affectibus expectandæ non sunt.

II. Etenim quò morbus biliosior est, eò murice suo rutilantior, sincerior extractus cruor, & in se se compactior post moram aliquam constanter deprehenditur, cum innatante sero communiter subflavo in humidioribus subjectis, quorum præsertim vena latam à Phlebotomo passa est incisionem, cum nullo verò in ficcioribus, accedente leviori atque angustiori venosi canalisi vulnere. Sed undè jam hoc phænomenon? An quòd bilis in determinatis latibulis morbosè collecta fuerit, & concentrata, ut ideò fluens per orbitam cruor, principiis magis homogeneis donatus, vividius etiam naturalem colorem præse ferat? An potius repetendum erit ab intimiori, cum sanguine subtilioris bilis confusione, & simul exaltatione, eodem ferè pacto ac attenuata quædam sulphura nec non ab alkalicis in liquore aliquo exaltata exquisitiùs rubescentem tincturam procreant?

III. Sanguis è contra in affectibus pituitariis, seu catharralibus è vena eductus, & subsidens ferè non concrescit, sed disfluit adhuc solutus, simul etiam livescens aut nigricans, crustâ modò albidâ, modò flavâ, quandoque viridi, aliâve densiori, aut tenuiori, duriori, aut laxiori obductus, interdum etiam nullâ, sed vix portioni cuidam serosæ liquidiori subjacens. In complicatis biliariis, & lymphaticis affectibus variegati cruores extracti, ut plurimùm, conspiciuntur.

IV. Plena interdum cementi sanguinei, seu nutritii glutinis ad extracti sanguinis superficiem excentratio, & in unam molem collectio minima sanguinea subjacentia soluta inter se se, disjuncta, adhuc ideo fluitantia, hinc & apparenter liquata dimittit. Interdum (quæcumque sit causa) celerius ad educti sanguinis superficiem gelatinosa crusta concrescens, totam eandem cooperit, priùs quàm à subjectorum cruoris globulorum gravitate & momento contractili, superius fuerint ad superficiem depulsæ solutionis feri portiones, quæ ideo coactæ per eosdem globulos, & interspersæ, liquiditatem, & quandam

ad oculum uniformem miscellam eisdem ulterius conservant, impeditâ tomenti induratione. Quandoque totum extracti sanguinis serum per omnia globulorum intervalla concrescit, aut etiam per sinulos tomentosorum concretorum corporum ubicumque occultatur: Hinc utroque modo uniformis sanguineæ substantiæ sequitur induratio.

V. Profectò superducta extracto cruori crusta consistentiæ variæ, aut coloris, aut densitatis, aut molis, subjacentem sanguinem liquidum, aut non liquidum definens, ex variâ lymphæ nutritiæ habitudine, seu veluti coctionis diversis gradibus, ut alibi diximus, auspicanda est.

V I. Varia lymphæ nutritiæ habitudo ad se excentrandum, vel non excentrandum in extracto sanguine, ab ejusdem sanguinei fluidi, per vasa animalia circumstantis, motu vario dependet. Et sanè in febrilis circuitus augmento, crustis illis nutritiis, albis, aut flavis eductus ferè sanguis non cooperitur, quibus tamen in eodem subjecto, & in ejusdem febris remissione, obductum se prodit. Hujusmodi phænomenon ab humorum in augmento febris majori confusione, minori verò in ejusdem declinatione inferendum esse consultum duco, ita ut pacatiores succi specificas gravitates, & cohæsiones suas multò faciliùs, quàm turbati possint repetere.

V I I. Non nulli ex alteratione variâ & miscellâ intermixti ante extractionem aëris, in extractione occurrentis, post extractionem circumfusi, universas educti sanguinis habitudines deducunt. Reverà, ut etiam annuit Guidettus noster, sanguis per angustius venæ foramen extractus diversam continuò habitudinem induit à reliquo per latius educto; & ulterius vasi traditus, ac quiescens diversis etiam modis alteratur juxta varias superficierum obvii aëris habitudines. Atqui detur aëri propria potestas, sua quoque principiis sanguini ingenis. Cur verò non est auxilio pleuritici extractus sanguis colorem adhuc suum uniformem coccineum inalteratè conservans? Cur majus solamen ex eodem variegari inchoante percipitur? Cur maximum, & integra ferè, faustaue morbi judicatio, cum ex eodem

eodem brachio prius pertuso, eodem venæ hiatu, eodemque ambientis statu eductus cruor tegmine versicolori gelatinoso, & ut dicitur, pleuritico induitur, ut pariter in affectibus biliosis universalibus præclar. Guidettus observat?

VIII. His omnibus non consuetæ dumtaxat ex plerisque obviæ in morbis variis multiplices extracti sanguinis phasæ reddi palam queunt, sed & rariores, ac fortuito eidem subjecto, & morbo, accedentes quoad extractum sanguinem, nunc summè serosum, nunc fæccum, concretum, aut eliquatum, sincerum, vel incrustatum variisque coloribus præditum. Sed hæc diligentius excutient practica nostra Problemata, brevi etiam in lucem edenda.

10. Cuicumque verò causæ tribuatur floridus ille color mihi semper suspectus est, & timorem incutit cum de biliosis affectionibus agitur: Idcirco totus insisto in promovendâ recrementi eructatione per loca conferentia, lubentiùs semper per inferiora, nisi quid obstet. Idcirco sæpè vomitorium præscribo v. g. ex tartar. emet. & sal. absinth. āā. gr. vj. cum confer. viol. vel, (quod tutiùs) ex infusione croc. metal. ℥j. vel ℥jss. pro subjecti constitutione cum ℥j. tart. vitriol. vel sal. polychrest. in aq. cichor. q. s. & aliquando cum pari quantitate oximell. scyllit. hauriendum elapsâ horâ unâ, vel alterâ post venæ sectionem, eâdem ipsâ die, prius quàm sanguis dato spatio velociùs circumactus fellei recrementi jam fermentati fluentum secum rapiat ad irruptiones & sæva symptomata, ut contigisse non semel observaverit in sua quisque praxi. Quod nisi sedulò, aut tempestivè præcaveatur, perniciosas indè Anadromes fieri docet experientia.

DE OCCASIONE EMETICI,

In Biliosis Affectibus,

Canones Practici.

- I. **E**TSI biliosâ vomitione nil frequentius occurrat in praxi, utpote penè omnes vomitus per morbos, & præcipuè

præcipuè per febres tincturam Bilis, aut amarorem præseferunt; determinata tamen, & electiva biliosi delinquentis humoris per vomitum invitatio tentanda non est, nisi quodam hic gradu maturæ veluti liquiditatis polleat, aut turgescentiâ mediocri, aut ex hepaticis receptaculis suis, jam versùs principium duodeni, & ventriculum sponte eructetur. Quod si bilis vel crudior extet, vel nimium tenax, vel fervens admodum, aut erosiva, aut si paulatinam ex sese per inferiora transcolationem ineat, non inversè movenda, nec properè nimis ad superiora proritanda: *Cave ne inducas effervescentiam biliosorum.* Celebre est effatum Avicennæ.

II. Respiciendum insuper, ut vomitum instituas juxtà habitum, & consuetudinem ægrotantium, ac tempestatem. Cachyma, simulque carnosæ, & consistentia Corpora tutius emeticis tentabis, non item quæ priùs exquisitè valentia in biliarem morbum confestim rapiuntur: Graciliora, Melancholica longoque pectore, aut collo, laxoque pulmone prædita non tam facilè ad vomitum stimulanda: Nec illa quæ ad vomitum proclivia non sunt.

III. Occasio emetici cum anni temporibus ut sit conferenda ex Hippocrate eliciamus lib. de salubri diætâ. *Vomitum oportet, & ventris Cataclysmata in hunc modum usurpare. Sex brumalibus mensibus vomere: Quod id tempus æstivo est pituitosius, & morbi caput tentant, & regionem supra septum transversum. At æstas ubi vigeat, uti Cataclysmatis: quippe hoc tempus torridum est, & corpus biliosius, & gravitates lumbos & genua afficiunt, Calorque urget; præterea fiunt in ventre tormina. Quare corpus oportet refrigerare, & quæ elevantur deorsum ab his locis subducere.* Hæc in gratiam Bilis æstate per vomitum vix movendæ expressim, & singulariter pronunciasse Hippocratem latè patet ex illo alio textu. *Medicari æstate superius, hyeme verò inferius:* Quod certè consilium demptâ bile, aliis quibuscumque humoribus per æstatem peccantibus conciliare videtur.

IV. Emeticum ut morbis particularibus accommodandum sit ex Celso eruamus lib. 2. cap. 3. *Vomitum necessarius est omnibus,*
qui

qui ante febres horrore & tremore vexantur, omnibus qui cholera laborant, omnibus etiam cum quâdam hilaritate insanientibus, & comitiali quoque morbo oppressis. Si autem morbus acutus sit, medicamentis asperioribus opus non est.

V. Porro ex Bilis per vomitum ejectæ habitudine varia, probum aut improbum eventum auguratur Hippocrates lib. prænot. Vomitus per quam est utilis qui bilem pituita quàm maximè permixtam habet, ac neque admodum crassus est, neque multus: Qui enim sinceriores, pejores sunt. Si verò quod vomitione rejicitur porrum Colore referat, aut lividum, aut nigrum fuerit quisquis horum colorum adfuerit prævus æstimandus est. Quod si eodem vomitu omnes ii colores rejiciantur, id exitiale est admodum. At lividus vomitus si graviter olet celerrimam mortem denunciat: Omnesque subputres & graves odores in omnibus vomitionibus mali. Ubi repetitos vomitus singultus excipit, mox febris cum pulsus intermittencia, aliqujus visceris inflammationem expectato.

II. Emeticis tamen diluentes haustus interponi aut subministrari curamus, parilesque fatus spongiâ exceptos. Et hypochondriorum regioni calidè repetitos ipso vomendi tempore, aliisque etiam horis sine vomitu, longè à pastu, præsertim matutinis. Sic & juscula pullo- rum insulsa herbis cichoreaceis, scab. agrim. capillaribus, ac emollientibus alterata.

DE OCCASIONE FOTUUM,

In Biliosis Affectibus,

Canones Practici.

BILE in viscera naturalia irruente, eâque vehementer extimulante, anodini atque emollientes per exordia fatus quantum utilitatis præstent, quisquis accuratiorem praxim profitetur, haud quaquam ignorat; His enim intensa nimis contractaque fibra laxatur exterius, & flexilis efficitur. Diluentes haustus, nec non lotorii clisteres ad idem officium interni sunt.

sunt fœtus , nec minùs idcirco auxiliantes.

II. Sed si alicujus jam per viscera decubitus suspicio sit, caveas à longâ nimis fotuum administratione ; Partibus enim per remedium ulterius laxatis fluidorumque in stasim compactorum solutione rapidè nimis tentata, suppurationes accelerantur. Ità Hippocrates lib. 2. acut. *Si fovendo nihil profeceris ad ipsum dolorem sedandum , fovendi finem facito. Quo textu ad affectum pulmonicum deinceps relato , subjungit. Id enim pulmonem exsiccet , & suppuratum accersit.* Et lib. decret. Fotus velut in modum explorationis , commendat jubendo , cum primum laterales morbi oriuntur , dolereque latus incipit , quia nondum manifesta est affectio , calfactionibus , fomentisque periculum esse faciendum. Idcirco in Coacis ad hunc locum Hippocratis effatur Duretus. Plurimum valere etiam ad suppurandum ipsa curatio , quam medicus instituit.

12. Si stomachus antiperistaltico vomendi nisu perculsus fatiscat, exhibeo per horam ante cibum bol. ex conf. hyacinthin. ʒj. theriac. ʒss. sal. absynt. ʒj. & tertiâ post cœnam horâ emuls. ex sem. melon. sem. pap. alb. extract. in aq. cichor. addito syrup. de suc. ejusdem cichor. vel endiv. vel totius citri , aut hujusmodi , addit. sal. prunel. ʒj. laudan. liquid. gut. xvj. His peractis non nihil supersedeo , & solo jusculorum usu contentus , diligenter observo naturæ , morbique motum: sæpius enim compertum habeo , tantum agris meis levamen ab hujusmodi regimine accessisse , ut nonnulli post tertium paroxysmum jam convalescerint , alii mitius imposterum febricitaverint , & recensitis temporibus ab Hippocrate definitis liberi prorsus evaserint. Si autem, vel ob majorem bilis redundantiam , vel debiliorem vomituritionem prædicta non suffecerint , & sævire pergant symptomata duplicatis accessibus ; tunc per intervalla clysteres injiciendos jubeo , non omissis fomentationibus ; nec non venæ maleol: sectionem præscribo ; eò quidem lubentius , quò per hanc aptius revellitur circuentis Bilis impetus, ejusdemque progressus remoratur. Interea laudatis alterantibus interpono mixturas ex aq. flor. sambuc. totius citri , & theriacal. frig. rob. granor. samb. conf. hyacinth. & similibus paratas , identidem hauriendas, & fere post diem quintum exhibeo potionem ex decoct. tamarind. ʒss. rhei. ʒj. in aq. com. addit. elect. lenit. vel cassia recent. extract. ʒss. vel

vel ℥j. Syrup. ros. aur. ℥ij, ut quandiu possibile est evocetur biliosa materies fluorem nata; repetendo deinde post hanc potionem usum præfatæ mixturæ cum addit. sal. absynth. & card. ben. aut similia. Quoties hoc vel suppari ritu servato etiamnum vigeat Tyrannis bilifera sanguinem adorta, tunc absque hesitatione, modo vires ferant phlebotomias repetito audaciori animo quam in principio; nec sanguis per has extractus, & coalescens sincerus erit, ast versicolor vel qualis esse solet in verè pleuritidis, jamque propagatam significat deflagrationem. Cucurbitulas, & frictiones, quæ in aliis, præcipuè malignis febribus adeò commendantur, in his verè biliosis inutiles, imò noxias observavi, si vigente morbo citius applicentur; agitando enim materiam acrem morbificam, perspirationi adhuc imparem, inflammationem adaugent. Pari ratione neque prosunt fudores cum & isti irregulares fiant, & symptomatici languorem potius quam levamen præferentes, quandoquidem sanguinis massam seroso vehiculo depauperantes, nil penitus morbosæ Bilis, in suarum partium cohesione vigentis, exantlare videntur; Unde major sequitur fluidorum ariditas, & solidorum tensio, minor inde ad secretiones dispositio, & tandem maxima ad perennandam febrim, vel properandam necem occasio: supervicanea idcirco diaphoretica in hujusmodi febrium genere censenda sunt. Accidit persæpe post irritam sudorum emanationem arida, luridaque cutis crispatura, ut in limine monebam, vel tensiva habitus intumescencia in criticam quandoque cachexiam desinens; cum nempe ab ulteriori effervescentia, & collisione biliosa tandem resina non nihil attenuata à cutaneis glandulis excipitur, ibique inhaerens easdem ad tempus obstruit, quò usque vigorata natura, nec non novis vegetisque succis referta paulatinis irrorationibus perfundendis par sit, ne dum ad laxandam cutis glandularem, & reticularem structuram, verum etiam ad perluendum sanguinem, viasque pro faciliori urinarum micturitione, levigandas. Porro veræ crises in his febribus raro contingunt, quæ morbificam materiam statim dissipent, nec non ejusdem fodinas exhauriant. Urinas dumtaxat uberrimas vidi jam peractis morbi stadiis depositâ rubedine sua mictitari nitidissimas, cum videlicet agrotantes aliquâ jam gaudent futura sanitatis certitudine. Vesicatoria præ cæteris localibus sæpè proficua visa sunt in contumacioribus

cioribus hisce febribus, quæ utut sanguinem spiculis suis dolorificis sollicitare valeant; viam tamen ad emanationem seri acrioris, & valde ferventis aperiunt; tum etiam ad sanguinem propagatæ, eique confusæ eorum particule epispastica & cantharidina salino-resinosam bilis copiam attenuare, & ad vias urinarias trudere, aptæ natæ sunt.

DE OCCASIONE HAUSTUUM DILUENTIUM

In Febribus Biliosis, & insuper Anodinatorum, Clysterum, Cardiacorum, cucurbitularum, frictionum, sudoriferorum, diureticorum, & vesicantium.

(Ufus Catharticos, & Phlebotomiæ inferiùs in nostro epidemiarum biliosarum febrium tractatu abundè exponetur; ut occasiones Febrifugi in eadem biliosa febre suo etiam loco pertractabimus.)

Canones Practici.

I. **L**icet diluentes haustus in biliosis febribus causam febrilem è directò non tollant, eam tamen notabiliter hebetant, & molliunt, sæpiusque diu emollitam à morboſis cohæſionibus invertunt, & in naturales restitunt. Nec locus occurrit humectandi opportunior quàm in biliari affectu: Nam quaecumque bilis vitium auxilia diluentia deſtulat. Ità si crassa Bilis fit, tenax, & viscida, quam in biliosis morbis ex propriâ cohærendi, & sese conglobandi naturâ, frequentissimam vidimus, longis haustibus dilatatur, & solvitur, ut ideò in his casibus super alios quoscumque, congruat tritissimum illud Hippocratis: *Corpora cum quis purgare voluerit oportet fluida facere.* Idem est, si soluta bilis fit, subtilior, & vaga, quæ nempe diluentibus attemperatur & cogitur. Quamobrem biliosâ febre correptis largi humectantes haustus præscribendi sunt: Præcipuè pro juvenibus, & vividis visceribus, toroso præsertim ventriculo præditis, utimur longis decoctionibus, aut etiam succis herbarum refrigerantium, cichorei, endiviæ, scariolæ, sonci, pimpinellæ &c. interdum & suaviter lenientium ut malvæ, mercurialis, & similium; In delicatioribus aut senescentibus verò jusculis

jusculis per easdem alteratis. Si tussis abest, aut quæcumque alia pectoris affectio, acidiuscula, aut acida immiscemus ex acetosa, trifol. acetos. ex succo limonum, aut citri, berberis, aut granatorum, ex spiritu sulphuris, aut calcantino &c. si firmior sit solidorum, & liquidorum compages, ut non tam facilis eorum relaxatio à crudis haustibus speranda sit, puram & frigidam quoque usurpamus ex aqua fontis, nuceriana &c. Distillatas aquas parvi facimus, quibus simpliciores decoctiones, aut succos meliori omine subrogamus. Excipio serum lactis, quod in stomacho valentibus simpliciter, aut cum herbis appropriatis per M. B. distillatum in morbis biliaribus diluens, & cicurans efficacissimum venit, uti etiam simplex absque distillatione usurpatum. Celebrem, & practicis hodie deliciosam, aquam illam distillatam alkalicam ex infusione, & digestionem testaceorum, & alkaliū fixorum, ut ras. ebor. matr. perlar. C. C., ocul. C., &c. longā jam experiētiā suāsus parvi pendeo. Nam etiāsi aqua hujusmodi ex fixis illis immixtis corporibus secum quidpiam fortasse apportaret, gravibus tamen, & inertibus moleculis saturam, aquā communi aliquantō adhuc inefficaciorem suspicarer. Quod si in his febribus præter bilis fervorem ejusdem etiam visciditas præpolleat, danda opera est, ut simpliciter diluentibus aperitiva pariter, abstersiva, & incidentia permisceantur, qualia ex radicibus communibus aperitivis eliciuntur, & insuper helenii, fragariæ, graminis, rubiæ tinctorum &c. ex foliis agrimon. ling. cervin. hepaticæ, ex cuscuta, epitim., camedr. chamepit. &c. & cum succorum febrilium biliosorum solutio, & concoctio per partes quidem fiat, ideo præparantibus, alvum etiam emollientia, subducentiaque per vices interponenda. Sed de his suo loco.

II. *Amurcosa bilis, acris, viscida, & circa jecur, vicinasque partes coacta, & in motu impedita, quæ longā ibidem morā acrior reddita, & cum putri cachochilia ebulliēns, salsos vapores exhalando, accidentia circa ventriculum primò, & sensim affusa sanguini, febrem cum sociis symptomatis producit: Atque adeo loco stomachicorum, & deobstruentium danda potius sunt remedia bilem diluendo temperantia,*

& per alvum subducentia, habitâ quoque ratione solidorum, ab ejusdem ebullitionibus nimium crispatorum, & ita fluidorum cursum, inductâ tensione intercipientium. Hactenus Baglivus differt. *de Bilis nat. usu, & morbis*. Hæcque adduxi, ut ex progenitis per bilis morbosæ stimulos frequenter solidorum crispaturis, admoneam varios sæpè, eosque acutos, & interdum spasmodicos dolores exoriri, quandoque ex cerebri infestatione & tensionibus contumaces vigilias atque mentis turbationes non rarò per intestinalem fistulam acerbissimos vomitus, colicas, & si quæ sint alia satis urgentia biliosi affectus symptomata, quibus indè paregorica, & anodina citò usurpata mirificè opitulantur, eaque potissimum ex theriaca recenti, diascordio, & similibus, præcipuè ex bezoartico nostro vegetabili elicita. Valde insuper in affectibus biliariis spasmodicis, aut ad spasmodiam accedentibus, proficuum experimur anodinum vegetabile Ettmulleri hoc modo in fine dissertationis *de usu & abusu precipitantium* descriptum *℞. opii, & sal. tartar. ana, cum s. q. aq. com. irroratis ad pultis liquidioris consistentiam, blandoque digestionis calori aliquando expositis; pro concreti gummeo-resinosi faciliori penetratione, & dissolutione affundatur successivè & suspensâ manu acetum distillatum. Fiet sic cum formali quasi fermentatione ebullitio. Continuetur hæc affusio ad punctum saturationis usque; dennoque aliquandiu digestionis leni exposita filtrentur, & phlegmatis exhalatione inspissentur, cum spiritu vini per se rectificato extrahenda, & ad debitam vel fluidæ essentia, vel spissioris extracti consistentiam redigenda.*

III. Clysteres, foci interiores sunt, & species diluentium & anodinarum non infimæ: Abluunt, & verrunt, molliunt, & subducunt, & quoniam stomachalibus immutationibus non subjacent, varias earum rerum ex quibus fiunt, facultates in intestinalem fistulam inalteratè deferunt, ejusdemque contentis immediatè communicant, ut sæpiùs facultates hujusmodi ex hac fistula ad alias partes alacriter transmittantur. Ità ex vino confecti clysteres ebriosi sunt; ex opio narcotici; ex lacte, vitellis ovorum, aut similibus, nutritii; ex therebinthina diurectici; ex decocto absinth. montan. aut absinthii umbiliferi Lobelii,

aut

aut herbâ rutæ sudorifici; ex chinâ chinæ febrifugi; ex alchimi-
milliâ, hederâ terrestri, veronica, pede cati, & similibus vulne-
rarii &c. Quare non tantum in biliari affectione, sed in alia
quâcumque, nisi summa laxitas intestinis affideat, quibuscum-
que exigentiis non modicè prospiciunt. In bile qualibet vi-
tiatâ neque adhuc concoctâ catharticiis clysmata, tutò semper
eventu subrogantur, ac inter ejusdem humoris præparantia sin-
gulariter accensenda sunt; Lotoria profecto, & emollientia in
efferrâ, & acri, absterfiva in cretaceâ & lentiori, acrius solu-
tiva in impurâ, & copiosa.

IV. Cardiaca temperata, ut confectiones hyacinthinæ, &
alchermes, pulveres cordiales simplices, aqua melissæ, totius
citri, theriacalis frigida, cuicumque biliosarum febrium generi
secura sunt, & quocumque morbi tempore præscribi possunt.
Volatilia, & acuentia, ut essentiæ, salia volatilia sicca, aut
humida, oleoso-volatilia, & exquisitè aromatica nonnisi in
febris, quas crudior, & cretacea bilis exfuscitat, & in sub-
jectis humidioribus, laxis, & mollibus usurpanda sunt. Nec
virium apparens imbecillitas in usum auxiliorum volatilium præ-
cipitanter alliciat. Perspice primò an vires ab exsolutione, an
potius ab oppressione & solidorum ariduris, aut contractioni-
bus deficient. Infirmæ primo modo vires calidis cardiacis re-
novandæ sunt, altero verò, simpliciter evacuantibus relevandæ.
En textum Cl. Sinibaldi à parva sua methodo animadvers. 3.
circa usum medicamentorum, decerptum, & in hoc bivio re-
ctum tramitem medenti exhibentem: *Quando Medicus in morbi
principio debilem pulsum explorat interroget primo an præcesserit ali-
qua insignis evacuatio, aut hemorrhagia, aut diarrhæa, aut alterius
generis, an longum jejunium, magnus labor, aut magnus dolor: Obser-
vet postmodum, an pulsus quò magis comprimitur, magis evanescat,
& ex his manifesta erit debilitas ab exhaustu: sed si nulla ex dictis
causis præcedente, pulsus sit inæqualis, & licet parvus, comprimenti
resistat, ac resiliat, credite sine hæsitazione, quòd debilitas est ab op-
pressionis nec roborantibus indiget, sed vacuatione: Præcipuè quod
in biliosis affectibus Cardialgiæ, & calidi ex bile lacescente*
P p 3 ventriculi

ventriculi languores, ut virium dissipationem magis dissimulant, ita vehementius cum aliis omnibus biliosæ improbitatis productis exasperantur, si fortè calidis impetantur remediis. Sed cur vinum *latificans cor hominis*, optimumque ideo Cardiacum, quod nulli biliari feбри Hippocrates denegabat; Nos his febribus invidemus, nec in opportunum hujusmodi ægrotantium auxilium, & reparationem non advocabimus? Hippocrates vinum in Morbis etiam acutis, in Pleuritide ipsâ, Peripneumoniâ, Anginâ, aliisque similibus concedebat, tantummodò in maximo capitis dolore, & in delirio interdicens; *Ubi tamen in his morbis (effatur de vict. rat. in morb. acut. sect. 3.) suspicatus fueris aut capitis gravitatem vehementem, aut mentis percussione, penitus à vino abstinendum, & aquâ in tali utendum aut vinum aquosum, & album penitus dandum, & penitus inodorum & post ipsius potum aqua modica insuper bibenda.* Vinum itaque in biliosis ægrotantibus pensum omne cardiacorum absolvat; & Julapia gemmata, margaritas, fragmenta pretiosa, bezoar, & si quæ sint alia sumptuosa pharmacopæorum idola, pluteorum suorum pompæ relinquamus.

V. Quemadmodum cucurbitulæ, & Frictiones in idem officium conspirant, cutanea videlicet spiracula reserandi, liberandique capillamenta ad ambitum corporis vascularia: Primæ quidem si simplices sint, dilatando, & aëre externo rarefacto, promovendo, ut internus attollatur & cutis texturam expandat; vel si cum scarificatione usurpentur, cutaneum cruorem etiam extrahendo: Alteræ verò concutiendo, subtiliando, & succos pariter per vasa exteriora non minùs premendo, quàm ad eadem idcirco evocando: Utræque igitur suo modo ad tegumenta corporis liberiores fluidorum cursus invitando, interdum & ab interioribus partibus revellendo, atque expeditiorem, uberiolemque transpirationem producendo; Ità non video, quòd hujusmodi auxilia biliaribus morbis valde prodesse possint: Nam biliosus humor ejusmodi est, ut nec à liberaliori transpiratione laudabiliùs segregetur à sanguine, aut in eodem emendetur; nec ab ipsis sudoribus solvi possit, & eliminari; nec ad cutim depositus productos

productos à se se morbos integrè judicet. Ideò biliosæ febres non quidem per sudores, aut uberes, aut frequentes, sed per alvinas, aut alias excretiones curantur. Vidimus interdum in subjectis Ictero contumaciori prehensis, postmodum acutâ cutaneâ constipatione correptis, affixas dorso, & scapulis cucurbitulas, easque scarificatas, ipsum immediatè noxium, seu biliosum humorem derivare, puro sero saturatè flavescenti, & ad gustum amaro, seu absolutè bilioso, loco sanguinis ex inditis vulnusculis copiosè educto; nec tamen, judicatâ constipatione post largam hujusmodi succi peccantis evacuationem, Icterus ullo modo remittebat. Sudorem morbo regio laborantibus amarum emitti, seu propriè biliosum, affirmat etiam Galenus de sanit. tuend. lib. 4. cap. 4. Nec ullum tamen, quod sciam, regium morbum ab hujusmodi, aut alio quocumque sudore fuisse sublatum animadvertit: Tanta est lentoris biliaris cum diaphoresi ordinaria improportio. Verum tamen est, ex cutaneis constipationibus Bilem, super alios quoscumque animalis succos, faciliùs citiùsque alterari (ut supra etiam adnotavimus) os ideò statim amarefcere, nauseas & ventris dolores cieri, vomitus interdum biliosos concitari &c. Sed hujusmodi biliaris consensus à circumferentiâ ad centrum, seu à cutis adstrictione ad bilis centralis alterationem reciprocus non est, seu similis à centro ad circumferentiam adeò ut vitium bilis per apertiore factam periferiam corporis efflari, emendarique facile possit; Bilis enim ex his etiam causis fortuitis in morbosas affectiones concitata, & ut plurimùm in arctiores lentores coacta, per alios longè modos, quàm per transpirationem, aut sudorem educitur, aut emendatur. Ità sæpiùs in praxi observavimus in adiapneustia, & cutaneis rigiditatibus, præcipuè à frigore subitaneo cum febre productis, exortas biliares excandescantias non priùs sedari judicarique, quàm post ventris tormina bilis mordacis excretio, & copiosa diarrhœa, aut etiam levis dysenteria accederet: Adeò verum est, lentum naturaliter biliosum laticem, secus ac subtiliores alii, faciliùs alvi subductionibus respondere, quàm motibus, secretionibus, aut perspirationibus cutaneis. Bilis
itaque

itaque crissim laudabiliorem explet alvina subductio, non unica tamen quantumlibet copiosa, ut sudor unicus copiosus succos alios morbiferos excutere potest, & penitus auferre, sed iterata per vices, & crassiuscula; biliosum enim crassamentum non nisi per partes coqui, abstergi, detrudique potest, atque elutriari. Ideò in morbis quibuscumque biliosis, in ipsamet dysenteriâ biliosa, in cholericâ affectione &c. si in principio morbi, aut progressu interpolatas bilis saturatioris, sed crassiusculas simul spumantes objectiones observas futuram jam tutò, citòque judicationem prænunciato.

VI. Quamquam notabilem Bilis cum cutaneis trajectionibus impropotionem adnotaverim, non inficior tamen, succum hunc quandoque à validioribus sanguinis & fluidorum motibus extraordinariè solvi posse atteri, nec non naturali crassitie spoliari, ut in analogam sero sanguineo subtilitatem evehctus, per extima cutis itinera in sudores effundi non possit. Galenus de sanit. tuend. lib. 4. cap. 4. aliisque locis effatur, *sudorem post validissimos labores, & vehementem æstum planè flavum conspici*, seu immixtè biliosum. Nos insuper superiùs part. 2. cap. x. §. IV. retulimus, Persis verno tempore decoctionem radicis chinæ recentis copiosè calidèque eporantibus, atque ad lectum compositis & densiùs coopertis bilem adeò attenuari, ut hi eandem copiosè per sudores effundant flavedine sua pannos appositos lintea &c. intingentem. Secerni etiam posse in colatoriis aliis addidimus secundùm varios susceptos tenuitatis, seu extraordinariæ cohæsionis gradus, ut reverà in variis Icteri speciebus, aliisque morbis contingit. Sed firmiùs adhuc stabilio, in biliosarum febrium judicatione, naturam hisce Bilis attenuationibus & tritibus, ut eandem per sudores trajiciat, ferè non uti; itaque irrita ut plurimum est in morbis verè biliosis sudorum multitudo, si sola absque alio naturæ conatu succedat. Quod ulterius confirmat consistentiam bilis ultra alios humores densiorem, & crassiolem; quæ videlicet nec per pepasum ad eam devehì subtilitatem possit, quâ pollet cruoris potissima pars, seu serum, per sudoris vias communiter perfluum.

VII. Ut

VII. Ut rariùs per sudorem Bilis in morbis suis expurgatur, ita frequentius per urinam, cui semper aliqualis biliosi liquidi portio in statu naturali quotidie immiscetur; Undè urinæ citrinus color ordinarius, ut superioribus hujus Historiæ partibus exposuimus. Revera, quemadmodum per urinaria incernicula crassiores, quàm per cutanea, & ponderosiores fluidorum partes eliminantur, salia videlicet terrestriora, & lixiviosa serum inertius, ramenti ipsamet nutritiæ substantiæ; ideo & eisdem facilius copulatur, easdemque trajicit vias biliare viscidum recrementum. Quamobrem nulla est biliaris affectio, quæ lotium biliosâ corpulentia aut tincturâ saltem, vel utrâque scatens, criticè vel symptomaticè non emittat, adeo ut qui probè per praxim urinarum inspectionibus assuescunt, urinam ex biliari affectu alteratam ab aliâ cujuscumque affectione, distinguere noverint. Nam ut in Ictericis omnibus singularia in urinis stygmata ab aliis quibuscumque discriminantur, ita etiam in singulis biliariis febribus, & ulterius in bilis affectibus particularibus, aut cum febre, aut sine febre, pleuritide, aut phrenitide biliosâ, cholerâ morbo, Obstructione Hepatis, fluxu hepatico &c. De urinis hujusmodi per varios bilis affectus inspiciendis, pluribus historiæ nostræ locis, ubi varii examinantur morbi, sermonem institui-
mus. In febribus biliariis essentialibus, quò major est morbosæ bilis deflagratio, eò urinæ recremento hujusmodi saturatiores proliciuntur. Idcirco in febribus hujus generis, æstivis, juvenes vegetosque viros corripientibus, etiam si legitimæ intermittentes sint, urinæ saturatissimæ conspiciuntur, intensè rubescentes, & veluti flammæ; non item in biliosis febribus hyemalibus, & vernis, aut ad finem autumnii, ut ut continuæ sint, imò & acutæ, senescentes, aut delicatulos invadentibus: Ob quam constantem observationem, ex febrili bilis affatione talem redditam urinam esse non diffiteor. Clinicus igitur distinguat oportet urinam saturatam, rubicundam, flammæam, interdum & confusam ex affectu locali, aut totius sanguinis inflammatorio, aut acuto, quæ ideo mala est, ab urina ejusdem habitudinis non quidem ex inflammatione, sed ex immixtis biliosis

attritis moleculis, quæ ideo non tam damnanda, imo quandoque salutaris, & critica: Idque facile dignosci poterit ex ægri tolerantia, & symptomatibus, tum ex morbi, ætatis, præcedentium errorum, & tempestatis circumstantiis, quæ biliosi humoris culpam indicent, vel excludant; præcipuè ex urinæ, & contentorum colore; nam in urinis ob bilis saturationem rubescentibus color ad croceum, aut rufum nonnihil declinat, non item in urinis inflammatoriis, seu sanguinis, aut alicujus visceris inflammationem consectantibus, quæ flammeam magis, & lucidiorem habitudinem æmulantes, cum lingua arida, & sicca, intentis visceribus, hypochondriorum calore, aliisque signis inflammatoriis, emittuntur. Præterea in biliosis urinis hyposthasis, indeque sedimentum ferè rubescunt, non autem in legitimè phlogisticis. Urinæ hoc modo in incendiis biliariis accensæ, & saturatæ ob suum hujusmodi, & contentorum colorem, qui laterum colorem simulat, communiter lateritiæ nuncupantur: Quas potius criticas, quàm symptomaticas memorat, opinor, Hippocrates, & à perniciosis ex phlogosi non biliari, aut inflammatione distinguit *Prognost. cap. 14*. Nam postquam urinam omnibus laudabiliorem, aliamque non tam laudabilem inspexerit; *Urina*, inquit, *optima est, cum album sedimentum, & leve, & æquale per omne tempus est, usque dum morbus judicetur: significat enim securitatem, & morbum brevem fore; si vero deficiat, & nunc quidem pura reddatur urina, nunc autem subsideat album, & leve, diuturnior morbus fit & minus securus*. Deindè subdit: *si autem sit urina subrubra, & sedimentum subrubrum, & leve, multò diuturnior hæc quam prima fit; salubris verò valdè*. Dixi Hippocratem postremo hoc textu biliales lateritias urinas indicare voluisse. Equidem urina rubra, aut subrubra cum simili sedimento in acutis, aut inflammatoriis febribus, aut morbis aliis non biliariis *salubris* ex se se numquam est, sed in biliosis dumtaxat affectibus & *salubris*, diutius, tamen protrahitur: Nam bilis intingens, & saturans ob lentorem, affationem, & copiam non adeò facile coquitur, & expellitur; Atque qui febribus per æstatem biliaribus periodicis, præcipuè tertianâ

tertianâ simplici intermittente conflictantur; urinas hujusmodi lateritias profundentes, si ante septimum circuitum utantur febrifugo, quomodocumque per iterata cathartica sæpius purgati fuerint, post quindecim dies in febrim certissimè relabuntur. Cæterum exulant fortiora diuretica ab acutis biliaribus, & bile solutiori redditâ aut vividius æstuante: sunt enim stimulantia nimium, & concutientia. In earum autem declinatione humidis diureticis, nec non epiceraisticis utimur. Tutiora sunt in Chronicis biliariis febribus, bile viscidiori, simulque inertî existente: Proficua in frigidis hepatis obstructionibus variisque Ictericis crudioribus. Elicimus ea potissimum ex radicibus comunibus aperitivis, polipodii, enulæ, smilacis, ex sisimbrio aquatico, parietariâ, virgâ aureâ, chamepiti, alchimillâ, ononide, capillaribus &c. ex cicer. rub. bacc. juniper. salibus variis lixiviosis, ex absinth. tamarisc. cort. fabar. nitrata etiam interdum adhibemus, tartarea, vitriolica, martialia, armoniacalia &c.

VIII. Vesicantia tandem vel respiciantur ut solidorum stimuli, ex quibus indè applicitis, & introductis major succedat motuum nisus in villis membranaceam provinciam componentibus, nec non vividior expressio corporis cujuscumque liquidioris, positi ad eorum contactum, idest circa illos, & intra spatia per quæ successivè moventur, hinc major ejusdem derivatio, ut mechanicè sentiunt Bellinus, & Baglivus: vel ut nova morbosa emissaria excogitanda sint ad humores recens exoticos educendos aperta, secundum aliorum placita, præcipuè Lancisii lib. de repentin. mort. observ. II. *Validius est remedium ad omnino præternaturalem humorem extrahendum, morbosa emissaria subito artificio aperire, quàm inani spe illius concedere evacuationem ordinariis seterniculis, quæ cum consueta sint nonnisi sensim congruere cum fluidis, mixturâ, ac motu naturali gaudentibus, nec subito, nec tuto præternaturalibus excipiendis liquidis aptari possunt: Vel denique auxilia sint, liquidorum in genere dissolventia, simulque revellentia, derivantia, atque evacuantia, ut scholæ communius effantur. Vesicantia itaque sub his omnibus, aut singulis speciatim operandi modis explorata, biliosis cujuscumque*

generis febribus, ut ut contumacioribus, præcipuè si bilis acrior, fervensque partes, atque cruorem afficiat, vix esse proficua tum ratione, tum experimentis suffultus stabilio. Et sanè nec stimuli in his febribus ad ulteriores solidorum pressiones superaddendi sunt, quæ nempè bilis irritantis aculeis jam satis laceffita, in immodicas interdum tensiones, & crispaturas absque ulteriori phænigmorum additamento cientur. Insuper cum Bilis humor non sit omninò præternaturalis, & extraneæ naturæ, sed prius in naturalium succorum familiam adscriptus, indè non ob naturæ mutationem, sed ob solam aut motus, aut consistentiæ, aut proportionis, & nexus principiorum alterationem à statu laudabili desciscens: Cumque plurima eidem naturalia emissaria aperta sint, quæ quocumque modo depravatam transcolare possunt, & foras eliminare, ut nuper, & alibi vidimus, cur nova dolorifica, variisque de causis suspecta, & quidem ex se se morbofa, seu per inditam continui solutionem, tum per varias in partibus, & sanguine concitatas irritationes perniciofa emissaria eidem educendæ aperiemus? Denique nec Bilis accensa, aut concitata per causticas vesicantium particulas est ulterius solvenda, exasperanda aut excitanda, nec per Phænigmorum inustionem revelli ista potest, derivari, aut evacuari, cum nusquam biliosis elicitis substantiis, quæ haudquaquam suppurantur, sed serosis continuò ac liquidis nutritiis lymphaticis facile suppurabilibus madere vesicantium ulcera animadvertimus. Ob has rationes numquam in biliosis febribus profecisse vesicantia testari possum (cui candido asserto totam à Guidetto nostro indulgentiam speramus) vixque in illis affectibus non febriferis, ubi bilis lentor potius, quàm fervor, & concitatio dominetur, ex vesicantibus utilitatem percepimus. Ità in Ictero frigido sine febre ex non acri, sed potius gelatinoso-resinosâ bile, atque obrusiori, faustè opitulantiâ hujusmodi auxilia interdum deprehendimus. Placet itaque vesicantia in coagulis non inflammatoriis, aut phlogisticis, seu in lentoribus potius catarrhalibus non calidis commendare. Profunt revera in malignis ex coagulo, & visciditate febribus, in soporosis affectibus, hydrocephalo,

cephalo, vertigine frigida, capiplenio, apoplexiâ, paralyfi, aliisque capitis, aut nervorum affectibus frigidis, pleuritide lymphaticâ, lentâ (ut superius innuimus tract. de biliosa Pleuritide) similiter in depluviis variis, seu, ut dicitur, defluxionibus lymphaticis localibus, ut & in morbis variis oculorum, aurium, narium, linguæ, gutturis &c. in diuturnis pertinacioribus ad determinatas partes ex fluido doloribus permanentibus, aut periodicis: nam ex antiquorum oraculo. *Dolores recentes calidi, veteres verò frigidi*: Denique in illis omnibus affectibus, in quibus, ut ait Baglivus, *neceſſe eſt ſolvere, divellere, derivare, excitare, & ſimilia agere*; & ſimul humores non calidos revelere, & ſimul evacuare. Rejicimus autem hujusmodi præſidia ab inflammationibus omnibus legitimis, aut etiam acutis febribus ſimplicibus, à Convulſionibus, præcipuè recentibus & cum febre, à doloribus ſyphiliticis, in primis cum calida viſcerum, & ſanguinis intemperie conjunctis, à calido hifterico affectu, & maximè, ut ſuprà, à bilioſis exſcandentiis, cum bile effertâ, extimulante, & potiffimùm febrili, ita ut calida, & ſicca inſurgat morbi habitudo; nam affectus hos omnes concernit illud Aetii de veſicatoriis loquentis, effatum (quod ideo ſanctius obſervandum venit) *In calidis, & ſiccis affectionibus his ego non utor: Per veſicantium enim ſtimulos*, ait laudatus Baglivus *major in fluidis fermentatio, turgentia, & orgasmus excitatur, & in ſolidis vivida quadam oſcillatio &c.*

IX. Licet Phlebotomiæ ſermoneſ aliò fervare inſtituerim; hîc tamen loci non reticebo; in turgelcentia Bilis, atque ad caput anadrome habitam ex pede phlebotomiam fallacem ſatis in maribus, & infidam, interdum & noxiam communiùs me deprehendiſſe, tutiorem tamen, & ferè continuò proficuam in mulieribus. In viris febrili biliari contumaci cum majori, aut minori acutie prehendiſſe ſalvatellæ ſectiõnem, miſſioni ſanguinis ex talo, maximo ſanè cum fructu ſubrogamus: Proficuam inſuper vel in iſſis ſimplicibus tertianis febribus ſalvatellæ aperiõnem, hujusmodi interdum febres, inſtar nobilioris cujuſcumque febrifugi plenariè expugnantem frequenter obſervavimus.

Grave hoc saltem monitum Guidettianæ ex talo memoratæ Phlebotomiæ fuisse continuò hîc loci superaddendum existimavimus.

13. Irritationes alvinæ, aut biliosæ Diarrhœæ sæpe in his febris intestina laceſſunt, absque symptomatum imminutione, quas tamen suppressere vix audeo, nisi vires atterantur; Demulcentibus potius & anodinis compeſco, & non nunquam extractis è salvatella sanguinis unc. 6. circiter. Quod præsidii genus in præfato casu pertinacioris febris valde proficuum cognovi. Ceterum supra dictis arefactis corporibus, quibus salvatella sectio non profuit supervacaneum est importuna usurpare remedia. Præstat, negotium ad aliquod temporis naturæ committere, solaque cichoracea aut alia hujus generis præscribere, quorum auxiliis plures fausto omine curatos animadverti. Crises per sæpè secundum magis aut minus susceptam exoticæ bilis tenacitatem, & lentorem ad habitum corporis spontaneè sed imperfectè erumpunt, cum Icteriis inde subitanè aut paulatinè abortis: Undè primarum febrium temporaneæ seriationes. Intererea Icteria hujusmodi sibi ipsis interdum linquenda, velut per naturales liquidorum solidorumque pressuras insensiliter diffilabiles: Interdum etiam perspectâ earum contumaci statione, aut sensibili detrimento, epicraticis purgationibus, aperitiis incidentibus, & catharticis apozematibus, tum digestivis, tum diureticis præsidiis, oppugnanda.

TRACTATUS

TRACTATUS

*De Morbis ex Bile in Hepate, aut extra
Hepar, particularibus.**Introductio.*

Quemadmodum in naturali statu id omne, quod in sanguine biliosum est, demptâ portione quadam minori, tenuiori-
que quæ transcolatur cum lotio, ad hepar pro secretionē de-
vehitur: secretum indè ad specialia in intestinis officia præstanda
destinatur, eisque muneribus perfunctum, foras è corpore eli-
minandum est; Ita per status frequenter præternaturales, aut
non quidquid biliosum extat ad hepar pro secretionē deducitur,
sed ejusdem major aut minor portio, modò in colatoriis aliis
seccernitur, unde morbi in his partibus à translata Hepatis se-
cretionē fiunt; modò per tunicas corporis dumtaxat effunditur,
ut determinatum Icteri genus conficiat; aut si in hepate re-
ceptum fuerit biliare liquidum, ex hoc in intestina non per-
fluit, sed remoratur in Viscere, ibique tumores varios, modò
non calidos, seu obstructions, nunc magis, aut minùs cali-
dos, seu phlegmonem, vel hepatitidem constituit; Aut ex he-
patis viscere in sanguinem per ramos cavæ relabitur, atque
reaffusum in sanguine interdum per omnes indifferenter corpo-
ris partes ab eodem sequestratur, ut nova adhuc Icteri gene-
ra procreet; Quandoque citius, ac ferociùs in partes aliquas
determinatas sive internas, sive externas, intimè aut minùs in-
timè invadendas transmittitur; hinc Pleuritis biliosa, Phrenitis
biliosa, Erysipilas &c.; Aliquando non tam citò segregatur à
sanguine, sed turbas in eodem varias, priùsqum sejungatur,
exsuscitat, ex quibus variæ biliosarum febrium Classes emer-
gunt; vel tandem id omne, quod biliosum est, defertur quidem
ad

ad hepar, in eodem secernitur, atque deinceps ad intestina transmittitur; At verò copiâ, vel acredine, æstu, solutione, crassitie, turgescentiâ aut his omnibus simul donatum intestinali fistulæ varios morbos invehit: undè colica biliaris, vomitus, diarrhœa, tenesmus, cholera morbus, dysenteria, fluxus hepaticus &c. Cum autem novissimus hic Guidetti nostri textus de his omnibus Biliosis affectibus edisserendi argumentum nobis offerre videatur, lubenter idcirco de eisdem sermones instituemus. Sed in superiori parte hujus Historiæ secretiones hepaticas ad organa non hepatica translatas abundè satis exposuimus: nec istæ profectò plurimum in medendi opera calculum exhibent. Præterea de biliosis morbis universalibus, seu de biliaribus febribus per alia Historiæ nostræ loca, & in primis per inferiora, quidem multa distributa venit dissertatio, præterquam de Lypiria biliari. Itaque solos, ex his omnibus, locales morbos à bile variis modis vitiata pendentes (demptâ biliari jam superiùs descriptâ Pleuritide) toto hoc tractatu practicè perpendemus: & à variis Icteri generibus exorsi in hepatis obstructions, & succedentem scirrhum progrediemur, post hac in Phlegmonem, abscessum, & ulcus, deinceps in hepatidem, phrenitidem biliosam, Erysipilas, colicam biliarrem, aliasque intestinales ex Bile affectiones, Lypiriam denique biliosam attingemus. Quibus omnibus ad umbilicum perductis, disquisitiones, & casus praticos Guidettianos proseguendo, neque tot nostras imposterum adnotationes interserendo, vixque additis ad loca aliquot de dolore, & spasmodia vulneribus, & scissionibus hepatis nonnullis praticis observatiunculis, ad biliales febres epidemicas, & Febrifugi tractatum properabimus, quibus aliquando hanc quoque therapeuticam partem absolvere divino bene juvante Numine confidimus.

DE ICTERO.

Canones Practici.

I. **C**UM itaque, ex superius memoratis, Icteriorum alter à Bile ortum ducat, quæ in hepate percolata nondum fuit, sed immediatè à sanguine ante appulsum in hepar per tunicas interiores, & exteriores partium corporis animalis effusa; alter autem à Bile jam per hepar trajectâ, & ab eodem denuò in sanguinem retropulsa; jam hic repetere consonum duximus, quod superius in part. II. cap. X. referebamus: Icteriorum videlicet, alterum esse à vitio sanguinis, alterum à vitio hepatis, utrumque autem vel criticum vel symptomaticum. Criticus est Icterus à vitio sanguinis, si immediata effusio, & diffusio Bilis è sanguine in partes succedat, cum integra, aut penè integra ejusdem sanguinis liberatione ab hisce substantiis prius extraneis, sive si transmissio hujusmodi per leges criticas absolvatur. Symptomaticus autem censendus erit, quotiescumque ex copia, aut orgasmo biliari procedat effusio, superstitè adhuc in sanguine tantâ succi ejusdem portione, quanta in eodem liquido fovendis morboris affectibus sufficiat. Eodem ritu Icterum à vitio hepatis criticum appellabimus, si bilis ab hepate in sanguinis gremium regurgitatio, & retropulsio non sine integra solutione prævii morbi obveniat. Symptomaticum verò, si factâ in cruorem hâc ictericâ propulsione vitium hepaticum non desistat, aut etiam augeatur, adeo ut icterica hujusmodi productio sit potius contumacioris affectionis, & obicis hepatici indicium, sive obex & affectus hujusmodi tumor sit calidus, minùs calidus, aut non calidus, sive spasmodia, imbecillitas atonia, corruptio.

II. Icterus à sanguine producitur in genere ex quacumque causa præternaturaliter in eodem sanguine ocillante, quæ ideò non tantùm in vasis sanguiducis ad hepar tendentibus, sed insuper in aliis quibuscumque vasis, ad partes alias distributis,

R r

moleculas

moleculas in bilis corpus facessere aptas sollicitet in biliosas manifestè cohæsiones, quæ in partes deinde trajicientes possint ad earum superficies sensibilibiter implicari, aut etiam spontaneè à sanguine affigi & deponi. Immediatè autem à vitio hepatis Icterus oritur, cum bilis per vasa sanguiduca ad hepar tendentia in cohæsiones quidem disponitur suas, sed in eodem, ut suprà, vel obstructo, vel contracto, vel nimia jam bile obfesso, & saturato, aut aliter etiam vitiato non secernitur, ut ideo repellatur in alveum generalem fluidorum, ex quibus inde affusa per partes vicem aliquam præstet hepaticæ secretionis: vel quidem in hepate secernitur, sed siquidem tota recipi nequit in promptuariis suis, ita dum pars aliqua dumtaxat excipitur, portio alia ad intestina elutriatur, alia tandem ab hepatis pressione in sanguinem restituitur, ut tum in aliis collatoriis ad supplementum secernatur, tum ad commodiores subeundas secretiones adhuc per partes effundatur. En breviter Icteri utriusque ratio, critici nempe & symptomatici. Rursus uterque Icterus criticus scilicet, aut symptomaticus, à vitio sanguinis, aut hepatis, vel est cum febre vel sine febre. Cum febre quidem, si præseferat intimiorem redundantis bilis miscellam, & collisionem cum propriis cruoris principiis, eorumque turbatum motum, nec non naturalium cohæsionum, nissuumque sensibilem alterationem, quæ vel prævia sit ad Icterus, vel eundem comitetur, aut consequatur. Ex adverso febrem excludet si hæc omnia contrario modo se habeant. Cum autem circa Icteri geneses atque classes satis superius part. II. cap. X. pervestigatum fuerit, practicas hîc solum pro singulis Icteri speciebus tum criticis, tum symptomaticis, & nostras & Hippocraticas observationes adnectemus.

III. Et primò Icterus ex sanguine, criticus, & cum febre indicatur ab Hippocrate de judicat. sub his verbis. *Febre ardente finiente, si morbus regius succedat non solet amplius sudare, neque alibi usquam abscessum facere sed sanus evadit.* Reliquiæ hoc casu febriles non tantum criticè à sanguine per hepar, sed etiam per partium corporis intercapedines expurgantur: nec sudor
amplius

amplius effunditur, vel quia spiracula cutis obsidentur ab Ictero, & Icteri materies trajiciendis cutaneorum meatuum angustis minus apta est, vel potissimum, quia febrilis causa secreta, eadem ac per Icterus bilis est, quâ aliquando secretâ nec sudor ad judicationem exigitur, nec amplius abscessus ex morbo jam judicato expectandus est. Itâ Valesius in epid. *Morbus regius in febris solutione ortus, per quem & urina & dejectio sunt quales in bene valentibus, facillimè solvitur*; ac brevi Criticus etiam regius morbus judicandus est, ante septimam in acutis apparens, si largis per alvum, urinam, & in primis hæmorrhagiam purgationibus stipetur. Itâ Hippocrates epidem. lib. 1. sect. 3. in acuta ardentium febrium epidemia effatur: *Quibusdam morbus regius sexto die accidit: sed hos aut per urinam purgatio, aut alvus turbata juvabat, aut magnum profluvium sanguinis, ut Heraclide accidit; qui juxta Aristoclidem decumbebat. Atqui huic & ex naribus fluxit sanguis, & venter turbatus est, & per vesicam est purgatus. Judicatus autem est sexto die, non ut Phagoreon servus, cui cum nihil horum evenisset, mortuus est.* Idem Hippocrates lib. de vict. rat. in morbis acutis: *In febre biliosa, morbus regius ante diem septimum cum rigore succedens febrem solvit, citra rigorem verò intempestivè obortus, lethalis.* Nam obveniens in statu morbi rigor, qui etiam ante septimam in biliari acuta exquisita interdum accedit, concoctionem declarat, & rectam à sanguine peccantis bilis transmissionem, & fomitem à sinu liquorum vitalium excussum. Super hoc concoctionis Icterus confectantis fundamentum addit divinus senex in Coac. prænot: *Quibus in molestis febribus septimâ, nonâ, undecimâ, aut decima quartâ die morbi regii oriuntur, bonum, si dextra præcordia obduruerint.* Nam si hypochondria duro tumore corripiantur, Icterus est ex vitio visceris symptomaticus, ut infra monebimus, ex quo non nisi pernicies oritur. Præterea Celsus eadem habitâ pepasmi, aut incepti, aut confecti ratione lib. 1. de morbis inquit: *Febricitanti quidem, & bilioso si bilis suo tempore (semper intelligit tempore coctionis) extra dispersa fuerit, bono est; sub cutem verò effusa, ac dispersa agroto toleratu facilius, & medico*

curatu promptior; effusa autem, ac dissipata, & in unam aliquam corporis partem incumbens, malo est. Hic enim Hippocrates excretionem Ictericam, criticam aut semicriticam judicatoriis diebus, aut iis qui prope judicatorios sunt, perpetratam, quæque per evacuantia indè præsidia ad crîsim perfectam manuduci facile potest, distinguit à biliosa methastasi, ad partem aliquam majoris usus irruente, quæ semper mala est, præcipuè si per decubitus accidat, ut cum in caput erumpit; non autem per effluxum, ut cum ad fistulam intestinale determinatur biliaris methastasis: Quæ pulmones aggreditur media est inter methastasin per decubitus, & effluxum: Nam in pulmonibus decumbens bilis majorem quidem stasim perpetitur, quàm si in intestinis deponatur, ex quibus nempe ulterius effluit, sed multò minorem quàm in capite; siquidem ex pulmone potest ulterius per anacatharism expurgari, quod minimè de bile in caput translata verificatur, ex quo nulla ferè ad exitum via aperitur. Sed de his diffusè jam egimus cum de biliari pleuritide. De cætero qui in febribus critici sunt hujusmodi Icteri, si citò spontèque non dispareant, facile intra quinque, aut sex dies exantlantur cum integra febris jam ab ictero mitescentis solutione, usurpato apozemate cathartico, aperitivo, & abstersivo, bis per diem epotato. Qui Icteri febribus intermittentibus superveniunt, easque perfectè judicant, brevi sine alia remedium administratione ex sese dissipantur, nisi ad extremum autumnus adveniant, quorum nempe plures, ut ut insontes, usque ad subsequens veris initium protrahuntur.

IV. Quod si Icterus in febre acutâ, aut aliâ quacumque superveniat, eâ nec adhuc declinante, nec ullo modo concoctâ, idè nec rigore, nec ullo alio pepasmi indicio stipatâ, & præcipuè manifestâ aliquâ aut pluribus evacuationibus non apparentibus, criticus profectò non est, sed merè symptomaticus; Qui nempe laudabilem secretionem non consequitur, sed potius motum morbi, & violentam bilis immixtæ sanguini exundationem, ac veluti explosionem, vel subitam rarefactionem, & dissolutionem, deperditis (quæcumque sit causa) ejusdem co-

sionis

fionis modis, vel redundantiam nimiam vel tandem orgasmum. Ità idem Hippocrates aph. 42. sect. 4. *Quibus febribus morbus regius ante diem septimum accidit, malum: & alio textu. In febribus ardentibus si morbus regius, & singultus quinto die contingat lethalis est*: namque in hoc casu Icterus quinto die accedens non solum symptomaticus est, velut in morbi augmento, cruditate, & turbatione excitatus, sed insuper convulsioni copulatur; imò etiam sine convulsione Icterus in biliosa febre accedens, dummodò *intempestivè* seu absque ulla concoctione contingat, lethalis, ut suprà, ab eodem Hippocrate pronuntiatur. In Icteris hujusmodi symptomaticis licet spectabile sit Valesii monitum comment. in 7. epidem. *Morbus regius, qui ob biliosam sit cacochimiam nonnisi sæpè ac vehementer expurgato corpore solvitur*; bilis tamen nisi turgescat, aut ob nimiam solummodò redundantiam Icterum producat, non est continuò catharticis impetenda; sed si soluta simpliciter extet, rarefacta, & displosa prius emollientibus, epicerasticis, refrigerantibus, imò & subacidis, acidisque per alia loca memoratis pacanda, attemperandaque, iisque ad quendam consistentiæ, & spissitudinis gradum, pepasmo proximum, præparanda, & promovenda: cui ideo arquati generi puto potius conferre monitum illud Hippocratis lib. de loc. in hom. de Ictero loquentis: *Medicamenta purgantia ne dato, ne corpus magis conturbes*. Veniunt & Icteri symptomatici ex sanguine cum febre in hectica essentiali ictericâ, in phtisi icterica, (interdum etiam phtisis icterica præviam habet hepatis obstructionem, ut vidimus 2. part. cap. X.) in longa, & funesta lithiasi cum febre lenta, aut marasmode, aliisque chronicis affectibus: In his aurigines multò lentiores sunt, nec aliis remediis curandi, quàm his, quæ morbis eadem foventibus conferre videntur. In genere urinæ in ictero quocumque symptomatico febrifero, aut non febrifero bile saturatæ sunt, crocæ idcirco & tingentes: In ictero quocumque critico urina ut plurimum naturaliter colorata est, & benè constituta: Jamque ex urina duo primaria Icteri genera discriminari invicem possunt.

V. Arquatus criticus à sanguine sine febre interdum post morbum viperarum, aut araneorum, tum post ingesta venena varia rarefacientia accedit cum ægri incolumitate. Quod si quandoque contingat homines post ingestum, aut inflictum virus in icterum facessere, & inde etiam mori, criticum semper ex se se icterum hujusmodi arbitramur; ex quo nempè crebrius in his casibus affectos homines à venefico morbo feliciter judicari perspicimus. Strenui vinipotæ frequenter ventriculi languoribus, aut colicis, aut articularibus affectibus corripuntur, quos tamen his omnibus non rarò solutos vidimus per subitum salutarem icterum. Irâ correpti in statum quandoque valetudinarium decidunt, nisi icterico affectu corripiantur. Histericæ interdum passiones per icterum supervenientem solvuntur. Vidi-
mus prætereà conflictatos à chronica celtica lue cum ulceribus & doloribus assidue vehementerque homines subito ictericos evadere, cunctaque in eisdem aliquandiu pacari. Icteri hujusmodi nullam ex se se curativam praxim deprecantur. Arquatum tandem symptomaticum, à sanguine sine febre, non infrequentem animadvertimus in subjectis variis utriusque sexus, præcipuè juvenibus, gracilibus biliosis, & rari corporis habitus. Hæc, incunte æstate præcipuè sicco, & ventoso, cum diurnis æstuationibus, in Icterum delabuntur, cum virium prostratione, languoribus, inapetentiâ, interdum & vomitu, non rarò & diarrhœâ biliosâ interpolatè recurrente; nec nisi ad autumnum, refrigerato aëre, ac imbribus emollito liberantur. Hujusmodi affectos longis diluentibus, & simul Analepticiis excipere oportet, præcipuè si bilis crassioris, & effoetæ inditia videantur. Proficuum identidem experimur bolum ex cassia cum cinamomo, & tantillo rhabarbari, interdum serum lactis cum amaris simplicibus præcipuè Marrhubio, & centauro distillatum, aut longos haustus ex The, in pluribus aquas acidulas, non rarò in pichrocolis chocolatam ipsam religiosè usurpatam. Sed efficacius præsidium est tempestatis immutatio, patienter expectata.

VI. Nunc

VI. Nunc Icteros ex vitio hepatis immediato, eosque etiam vel criticos, vel symptomaticos, cum febre, vel sine febre, expendamus. Criticus cum febre observatur, quando Phlegmone hepatica, aut hepatitis, aut simplex hujus visceris dolor cum febre per Arquatum repentinè obortum judicatur, excusso per hanc crism, aliòque transmissò humore morbum producente, & fovente. Arquati hujusmodi, soluto hepatico morbo, post aliquot dies absque alia remediorum administratione paulatim disparent: symptomaticus cum febre dicitur, quoties ab affecto Jecinore per epigenesim fit, affectione visceris non remittente, imò ut plurimum ingravescente. Hunc exprimit Græcus senex aph. 42. sect. 6. *Morbo regio laborantibus si sit hepar durum, malum.* Hujusmodi autem duritiei nomine intellexit Medicorum magister vel opilationem, vel inflammationem, vel scirrhum, ut solidè exponunt interpretes. Quare biliales in his morbis hepaticis eruptiones ictericas, visceris affectione non imminutâ, sed fixâ, & stabili, cum dolore & rumore, aut pulsatione, & calore, aut constanti simpliciter duritie, & renitentiâ, ut ut diebus decretoriis cum rigore aliquo, aut quopiam leviusculo signo coctionis obveniant, ex sola bilis irritatione, aut orgasmo, atque ex mala epigenesi excitari, suspicamur, non autem ex critica, salutarique secretionem: Undè discrisiæ, sive difficiles judicationes. Quod si è converso icterus symptomaticus non sit, sed potius essentialis, & erumpens ex bilis impetu, copiâ, & malitiâ, illam in hepar Hippocratis duritiem, seu unam, aut plures affectiones deferat, deterioris adhuc alexæ censendus.

VII. Icterus ex hepate criticus sine febre interdum oritur, cum diurnæ ejusdem visceris opilationes sine febre, aut spasmodici dolores interpolatè infestantes, aut colicæ biliosæ per Icterum subitanè erumpentem judicantur. Sed frequentius Icterus hepatis sine febre symptomaticus est, veluti non à motu naturæ ad segregandum & expellendum insurgentis productus, sed ab ipsismet in hepate morbiferis causis segregationem inhibentibus: Bile idè per universum corpus potius diffusâ quàm effusâ

effusâ Phyma symptomaticum aggerente, ut cum Dureto loquar. Lentæ non rarò, & subdolæ, præcipuè in hypochondriacorum, studiosorum, aut longis animi affectibus districtorum hominum Jecinore congeruntur intemperies, quæ sensim in lentum pariter sine febre Arquatum influunt: isque naturalem ulteriùs constitutionem videtur invertere, & malam non minus animi habitudinem, inductis frigidioribus animi pathematibus, stupefactione, mœrore, aliisque, quàm vitiata corporis constitutionem cum flatibus, indigestionibus, cruditatibus, inapentiâ, emaciatione, torpore, somnolentiâ, prostrationibus, introducere: Quæ si longiùs perduret cuilibet artis auxilio rebellis efficitur. Sapienter itaque Hippocrates admonet lib. de judicat. & prædict. *Regio ex morbo fatuitas aut stupiditas malo est.* Icteri hujusmodi, utpotè à bile cretaceâ, vappidâ, amurcosâ, viscidâ, & inertî sive frigidiori, ut aiunt, progeniti, communiter idcirco frigidi nuncupantur, qui sibi cachexiam præcipuè in mulieribus asciscunt, in pueris frequenter hydrocephalum, atque in hydropem ut plurimum terminant: Ideò speciem hujus Icteri Hipp. & Gal. pituitosam etiam appellant, velut ex pituitæ cum bile infarctu prognatam. Decocta his amara conveniunt ex absinthio, gentianâ, angelicâ, cichoreo, abrotano, salviâ, marrhubio, carduo benedicto, ruthâ, scordio, camedri, centaureo minori, chelidonio majori, polio montano, aristolochiâ rotundâ, origano, hyssopo, & similibus. Famigeratissimus & amicissimus vir D. Rosinus Lentilius Archiater Wurtembergicus, smegma quoddam suum aperitivum antiictericum mihi per epistolam ante hos quatuor annos communicabat, eoque indè in ictericis hujusmodi affectibus, ac hepaticis insuper chronicis obstructionibus feliciter usus, in publicam esse utilitatem evulgandum ratus sum. *R. ciner. absinth. juniper. agrimon. aa m. iiij. cum s. q. aq. fontis f. lixivium forte. Hujus lixivii mensur. seu pint. vj. incoque radic. rub. tinctor. & filic. an. ℥ij. bardan. ℥iij. fol. marrhub. alb. m. iij. flor. centaur. min. m. ij. cola; & cum colatura & sebo bovillo liquato coqu. s. a. ad consist. smegmatis, vel saponis, sub finem adjiciendo croc. aust. pulveris. ℥ij. effund. in capsulas ligneas; & usui serva.*

serva. usus. smegmatis hujus 3j. aut 3ij. solvantur in haustu lactis vaccini calidi. Bibat eger hoc lac calidè bis in die. Cum aliis etiam vehiculis interdum exhibemus, quandoque cum tinctura rhabbari, & absinthii pontici aut montani, nunc solidè in bolo & opiatâ præcipuè cum martialibus. Profunt insuper tincturæ ex mirrha, croco, millepedibus in spiritu juniperino &c. præcipuè essentia digestivæ, aut tincturæ chalibis nobiliùs alcoholisatæ: Ità præstantissimam deprehendimus essentiam martialem armoniacalem, aut martis tincturam s. a. paratam cum succo absinth. & sal. vol. C. C. aut cum spiritu baccarum juniperi & menthæ. Laudo etiam tincturam martis tartaream Lemerii, tincturamque martis auream pharmacopœæ Bateanæ. Terebinthum Cyprium quemadmodum in Pleuritide biliari non admodum calidâ, succo morbifico per urinas derivando non modicam efficaciam præstat, ità & in Ictero frigido per easdem vias solvendo. Postmodum juscula viperinâ, absinthiaca, aut juniperina, commendamus. Inter cathartica rhabbaro utimur cum tartareis; cætera ferè declinamus.

VIII. Denique Icteri, ex vitio hepatis symptomaticè sine febre producti, non infima causa est calculosa cystidis felleæ habitudo. Superiùs in altera parte hujus historię symptomaticum auriginosum morbum ex calculo cysti felleæ insidente, optimè judicatum exposuimus, eodem calculo per cathartici stimulum in nobili matrona è cysti deturbato, & excreto. An præter fortuitum hocce auxilium alia etiam remedia potis sint calculos hujusmodi recentes, aut veteres è nido hoc suo arctè servato semovere, hætenùs profectò imperspectum fuit: An insuper calculi ipsi humani è folliculis cadaverum hepaticis collecti, & præparati calculis hujusmodi viventium abrumpendis, atque è propria sede divellendis prestò sint, ut vagatur opinio. An denique ad hunc usum præstantior sit lapis ex felle seu vesica biliaria nigri bovis, nihil ipse profectò decernam, lapideas has omnes virtutes nimis adhuc obscuras existimans, ut & specificam ejusdem calculi biliaris humani facultatem in febribus continuis, & lapidis in cysti fellea porcorum indorum, & in

ventriculo histricum etiam indarum insidentis. Sed practici curiosiores viderint. Porro eò redeunt, unde nonnihil digressi : Quæ in ictericis urina linteum immersum flavedine notabiliter tingit potius jecinoris, quàm sanguinis Icterus denunciat ; nam Bilis in Ictero hepatico suam magis naturam, & cohæsiõnem consequuta est, ut liquida à sanguine decidua colore suo saturare faciliùs queat, nec de cætero difficile est, bilem colore refertissimam lotium sanguinis eodem inficere, dum plurima etiam alimenta, aut assumpta remedia flavedine sua lotium notabiliter afficiunt, quâ pariter immersa lintea tinguntur, ut beta, crocus, jus cicerum, rubiæ tinctorum, aut tormentillæ, cassia, rhabarbarum, semen fantonici &c. Jamque cum notabili animadversione tractatum absolvamus. Icteri pertinaces, vel sanati, & sæpiùs facileque recidivantes, exinde incurabiles redditi, à calculo cystidis felleæ ferè produci, cadaverum sectiones quamplurimæ nos, & Baglivum docuere. Quod jam in I. I. part. cap. X. annuimus.

DE OBSTRUCTIONE HEPATIS,

*Et obiter de Scirrho, aliisque in hoc viscere Morbosis
congestionibus.*

Canones Practici.

I. **D**E hepatica obstructione sermonem facturi, solam hinc obstructionem memorare intendimus à proprio trajicientis humoris vitio progenitam; nam quæ à solido primitus contracto, angustatoque, viamque præterlabentibus succis, fortasse infontibus, præpediente obstructio hepatis producitur, organica propriè dicenda est, atque vitio cavitatum, & meatuum etiam juxta veterum placita, nominatim referenda : Hanc in altera hujus historiæ parte conspicati satis jam fuimus, ubi aliam quoque obstructionem, sive ab alio vitii solidi genere elicitam remittimus,

remittimus, quam memorato loco antiquorum intemperiem nominare non erubescimus.

II. At verò humoralis obstructio non insolens est in hepatico viscere, ubi nempe liquida uberrima, & multiplicia, & insuper à cursu per alias animalis partes communiter habito notabiliter retardata continuò trajiciuntur: Et sicuti latex propriè sanguineus, vel sincerus, vel cum recrementis variis, aut saltem cum succis propriè non sanguineis immixtus, stases in hepate præternaturales aggrediens, exquisitè calidas illas acutasque obstructions producit, quas inferiùs attingemus; ità liquida non sanguinea speciales in hepate morbosas retardationes suscipiendo leviores quasdam alias obstructions procreant, quas hic reverà agitare decernimus.

III. Ex succis, qui jam à cruoris propriè dicti natura recedentes, hæere diutiùs possunt in jecore, indeque leviores, aut graviores obstructions extruere, primas tenent Bilis, & lymphæ; Quarum prima cum ex tardigrado super ceteros liquores in Hepar tractu, tum ex propria, insitaque tenacitate, & crassitie, in arctiores adhuc nexus (quæcumque causa sit) implicata, & coacta veniat, diversorum quidem graduum obstructions cingere facillimè in hoc viscere potis est, ubi non rarò in duriores, sive calculosas concretiones degenerat: Altera verò seu lymphæ tum quod uberius in hepate super alia omnia viscera separatur à sanguine sejunctèque percurrit, tum quòd multò infirmiùs in hac, quàm in alia quacumque parte à vi circuitus generalis urgetur, ad proprias quoque aggerendas obstructions non difficilè disponitur.

IV. Verum tamen ad judicandam Hepatis obstructionem non soli tactus testimonio fidendum est; Quippe nisi Hepar tumore notabili, eoque admodum renitenteprehendatur, difficilè satis per solum tactum ejusdem habitudines recognosci, dijudicarique possunt, quantumvis in ipso inspirationis momento ad inferiora detrusum hoc viscus diligenter exploretur. Hinc tot practicorum errores effluxere de hepaticis, aliorumque viscerum morbis, absolutas ex solo contactu sententias profe-

rentium: Viscerum siquidem naturalium obstructions exploranti manui facillimè fallaces extant, dum aliquis, quicumque sit, renitens in cavea abdominis, circumscriptus locus, qui explorantis manui offeratur, frequentius ex convulsiva, aut simili ambientium, aut superpositarum partium tensione ortum ducit, quàm ex legitimis contentorum viscerum obstructionibus: sæpissimè enim contingit, ut durities & resistentia per abdominis areas exploratæ integumentis dumtaxat communibus, aut propriis, membranaceis, aut muscularibus, non autem internis propriè corporibus assideant; & quamquam renixus ad propriam hepatis regionem occurrat, non illicò perinde asseverandum est, renixum hujusmodi ex hepate potius, quàm ex aliis eidem alligatis, aut adjacentibus partibus exoriri: si quidem Còlon intestinum hepati immediatè attiguum, imò ad imam ejus crepidinem alligatum, ventriculus ipse, Ren ipse dexter, Lienque usque ad dextri hypochondrii provinciam ob varias interdum præternaturales affectiones expandi queunt, tactuque hic loci dolenter, aut etiam indolenter, resistendo, insontis hepatis, suoque naturali ambitu præditi, resistentiam atque obstructionem mentiri. Imò quantumvis Clinicus sibi pro re nata suadere posset ipsum hepar & proprium ejusdem vitium novisse contactu, superest adhuc non tam facile diluenda dubitatio; num scilicet hujusmodi vitium propriam hepatis seu, ut vocant, Parenchimatofam substantiam occupet, num solam potius ambientem tunicam, quæ nempe ultra consuetum quandoque contracta, indurata, & resistens, aut etiam flatuoso corpore, inter ipsam & viscus coacervato, elevata, aut serosis laticibus imbibita, & crassefacta insontis fortasse potest comprehensi visceris obstructionem, aut aliud quodcunque vitium simulare. Memini mihi sæpius fuisse non mediocriter volupe quorundam practicorum delibare oracula, qui extraordinariam quandam (ut in morbis frequenter assolet) in toto rectorum abdominis musculorum tractu tensionem, aut renixum contactu percipientes, firmo statim animo enunciabant, notabiles per totum abdomen stabulantes obstructions contingere. Alius quidam
non

non infimi subfelli medicator in picrochola muliere, atque intestinis valde gracilibus, facileque ad latera abdominis excurrentibus, gracillimo insuper, extenuatoque mesenterio prædita, per prementem fortiter manum vertebrae ipsas persentiens, exquisitum, confirmatumque scirrhum deprehendere in Pancreate, & pertractare ruto asserebat. Sed de nimia plurium practico- rum in anatomicis rebus innocentia numquam satis dolendum.

V. Simplex igitur obstructio hepatis, quæ nempe non adhuc vergit in notabilem visceris, & manifestò renitentem duritiem, seu scirrhosam, aut similem, per alia potius indicia manifestatur. Et sicuti simplex hujus partis obstructio alia à Bile est, eaque adusta, & fervente; alia quidem adhuc à Bile sed simpliciter crassa, & cretacea; alia denique à frigidiori humore, sive merè lymphatica, ut hac de re ex hepaticis hujusmodi obstructionibus aliam calidam denominemus in praxi, sive calidum in hepate lentorem, à primi generis vitata bile; aliam frigidam, sive lentorem frigidum, à lymphaticâ in hoc viscere aggestione & concrecentiâ; aliam tandem mixtam, mediamque, seu à bile non acriori, non calidiori, sed tantummodò crassefactâ, & obstruente, ita tria simplicis hujusmodi hepaticæ secretionis genera propriis signis interstinguere assuescimus.

VI. Simplex quæcumque hepatica obstructio sibi sociam devehit coloris faciei, interdum, & totius corporis, immutationem, sed variam juxta memoratas obstructionis species: Etenim saturatè flavescunt, qui primi generis hepaticâ obstructione distringuntur; ex albo pallescunt, qui frigidam, lymphaticamque gestant obstructionem: Flavescunt simul, atque pallent, qui mixtâ corripuntur: si quidem genericè in omnibus; si non totius corporis, color saltem faciei sensibiliter immutatur.

VII. Sed alia adhuc tutiora indicia hæc hepaticæ obstructionis species discriminant. Ex Bile adusta & ferventi hepaticum obstructum infarctum denotant non solum levior, aut gravior icterus, antecedens, concomitans, aut consequens, sed

insuper urina turbida, & crocea; pertinax alvi stipticitas, aut crudæ, albæque solum dejectiones; Dolor dextro insidens Hypochondrio cum molesta, & assidua gravitate punctorius, quandoque, præsertim per tactum, acutior; notabiles à cibo exæstuationes, atque ad volas manuum, & plantas incalescentia horis aliquot molesta; post mediocrem motum respirationis angustia, & veluti cordis angor & palpitatio; constans cibi fastidium & sitis insueta præsertim à pastu; oris amaror assiduus cum dentium sorditie linguæque flavedine; frequentes flatuum per intestina, atq; ventriculum excursions; erraticæ febres, interdum cum rigore notabili ingruentes quem quidem accensiones fortes, atque totius corporis enormes jactationes excipiunt; notabilis ad tactum etiam extra febrem, in universo dextro hypochondrio acrioris caloris sensatio.

VIII. Frigidam hepatis obstructionem revelant præter pallorem faciei, & universi corporis habitus, ad cachexiam vergentem pedum frequenter œdematosa intumescencia, ad vespertas præcipuè ingravescens; notabilior dextri totius hypochondrii elevatio, sed cum dolore obtusiori, ac ferè etiam ad tactum vix sensili; Pallida urina, nunc tenuis, nunc crassa; libera alvi excretio, eaque liquidior, & cruda; Assidua quædam spirandi difficultas, major autem post aliquem corporis motum, in primis ad acclivem ascensum; Continua, homotona, sed lenta absque sensibili calore febricula, imo sensus frigoris universalis ferè perpetuus; ventriculi inconcoctiones; sicca quædam tussicula; lingua pallescens, & flaccida; musculorum torpor & universi corporis gravitas; præcessa potissimum prævalentis pituitæ per varias affectiones indicia: Signa verò ad designandam mixtam hepaticam oppilationem, promiscua veniunt.

IX. Pertinacior Hepatis frigida, sive lymphatica, obstructio præsertim post diuturnos in rebus non naturalibus errores, quandoque in scirrhum convertitur, cum pituitosus humor, obstructionem pertinaciter fovens, tenuiori suâ, liquidiorique portione temporis successu dissipatâ, & abreptâ, in volumen inertius indurescit, ac veluti in tophaceam naturam tophis podagricorum

eorum analogam, concrefcit. Rarò biliofa fimpliciter obftru-
ctio in fcirrhum degenerat, ob bilis activiorem indolem: Ob
eandem quoque rationem multò etiam rariùs fcirrhus à legiti-
ma hepatis inflammatione procreatur. Scirrhum hepatis à fim-
plici Ictero exortum confpicatus ipfe hucusque non fui.

X. Quod fi contumax hepatis obftructio non quidem in fcir-
rhum propriè aggerendum, fed ad hepaticam potiffimùm depra-
vandam, aut etiam fufflaminandam fecretionem intendatur,
everfis primarum digestionum naturalibus distributionibus, &
minimè fubactis recentibus fuccis, qui fanguinem appellant;
in crudam & ferosam colluviem, demiffis naturalibus cohæ-
fionibus paulatim faceffit liquidum fanguineum, ut facilis ad hy-
dropem via, in primis ad Leucophegmaticam, fternatur. Ve-
rum tamen eft, quafcumque hydropis fpecies absque ulla he-
patis, aut cujuscumque alterius vifceris labe corpus aggredi
poffe: Quod contra veterum placita quotidiana experientia,
atque hominum hydrope quocumque denatorum extispiciis edo-
cti, profectò affirmamus.

XI. Hepatici fcirrhi figna funt, tumor poft diuturna præ-
ceffæ obftructionis indicia ad Hepatis regionem circumfcriptus,
manifestè durus & renitens, præcipuè cùm æger vel erectus
manet, vel in latus finiftrum decumbit: majorem hic, aut
minorem hepatis tractum occupat, interdum per totam hepa-
tis circumferentiam contrectanti manui fe exporrigit: Gravi-
tatis fensus in hac regione valdè quidem moleftus non eft, fed
obfcurior, intereà affiduus: nulla communiter febris, corpus
tamen notabiliter emaciatur, ejusque color in viridescentem
maximè pallorem traducitur; urinæ parcitys, hinc fcirrhus
hepatis celerrimè cachexia fuccedit, & nifi maturè occurratur,
& hydrops, & obitus. Æger meliùs in dextrum latus decum-
bit, quoniam fcirrholi vifceris pondus à finu coftarum, absque
moleftia fufientatur: At verò, ægro in finiftrum latus recl-
inato, ponderofum hepar ventriculum dolenter comprimit.

XII. Scirrhus minorem tantummodò hepatis partem infe-
ftante diutiùs adhuc ægri vita protrahitur brevius autem, eodem
potiffimam

potissimam hepatis portionem invadente. Quod si totum hepatis corpus scirrhusa aliquando duritie obsideatur, mors fores pulsatur, præcipuè quibus alvus non dejicit observante Galeno. Qui Scirrhi ad suppurationem perducuntur ex practicorum observatione facile in cancerum abeunt, nullamque curationem suscipiunt: Nec tamen feliciorum suscipit hepatis scirrhus quamcumque induat habitudinem; hic enim ut plurimum incurabilis est, præsertim confirmatus & grandior. Externis interea validè emollientibus & discutientibus potissimum utendum; interius autem potenter dissolventia, incidentia, & roborantia interdum & exsiccantia, eisdem superaddere contingit. Hæcque fusiùs describunt practici antiquiores omnes, præcipuè Galenus & Aëtius, à quibus ideo recensendis, veluti eorum utilitatem haudquaquam sperantes, lubenter supersedebimus. Id proportionaliter intelligendum est de calculis, in propria hepatis parenchimatosa substantia delitescantibus, nec non de vermibus & hydatidibus in eodem viscere natis, & contumaciter stabulantibus.

XIII. De cætero, respiciunt in genere difficilem hepatis, jamque insanabilem obstructionem signa illa à Galeno lib. de dynam. collecta, si in hepatico affectu simul accedant: *Tussire nimium, in latere dextro quiescere non posse: sanguinem è naribus identidem profluere: pedem dextrum aut etiam utrumque constanter tumescere; post vesperam, & circa vesperam, pigritiam vel lassitudinem pati.* Quibus superaddenda est lenta febris, & continens, cum corporis consumptione, surdaque, aut vividiori ad hypochondrium dextrum doloris sensatione perpetuâ.

XIV. Recentem, & sine febre frigidam hepatis obstructionem designat Hippocrates aph. 40. sect. 6.: *Quibus hypochondrii dolor est sine phlegmone iis superveniens febris dolorem exolvit.* Quoniam, ut ait Galenus, *febrili motu dolorificus humor inciditur, tenuatur, atque digeritur.* Adde, divinum senem per textum hujusmodi, obstructionem hepatis veluti criticam indigittare, quæ nempe ex crudi, indigestique humoris, ad naturalium fluidorum cohesionem imparis, secretionem in hepaticis concursibus

concurſibus inſtitutâ , perficitur indè , auſpicatôque abſolvitur à febre ſuperveniente , quæ ſuccum viſceri quidem hærentem, ſed jam à majori ſanguinis alveo fauſtè ſepoſitum maturans ulterius , & ſubigens , vel inſenſiliter deinceps excutit , vel ad integrum exitum ab animali , per opportuna loca diſponit :

XV. Nam ſimplex obſtructio hepatis alia quodammodo critica eſt , alia verò abſolutè ſymptomatica : critica , quæ cum majori morbo celeriter , & recens ſuccedat , eundem delet , aut ſublevat , morboſo , ut diximus , principio ex alveo fluidorum majori , in minores , & minimos ſeu hepaticos vaſorum ſecretorios concurſus , depoſito. Symptomatica verò , quæ non à determinata , & proficua puri ab impuro ſecretione inſtituitur , ſed à malefica , fortuita , & paulatina ſuccorum in his concurſibus , abſque immediato naturæ regimine , coacervatione , & craſſitudine ; undè uber aliorum , pejorumque morborum ſcatebra reſeratur. Elucidant plenariam criticæ hepatis obſtructionis judicationem quæ enunciat Hippocrates in coac. & aph. *Tumores hypochondriorum ſine phlegmone recens abortos, tum indè natos dolores exolvit borborigmus , in hypochondrio excitatus , maximèque ſi exciderit cum dejectionibus & urinis : ſin minus ipſe per ſe trajectus. Juvat autem qui ad inferiora devolvitur.* Quippe cum criſis haud quaquam perfectâ dicatur , quoties morboſus humor ex majori ſuccorum animalis promptuario in partem adhuc corporis determinatam projicitur ; ex qua indè reaffundi , & reſtitui non difficilè in idem queat ; idcirco ut perfectior , plenâque criſis evadat , ex determinata illa parte deturbandus ad alias humor eſt , in quibus non difficilè liceat morboſos humores ſecernere , & à corpore penitus ablegare. Cui quidem officio (illâ in hepate conſideratâ congeſtione , quæ quidem à ſalutari naturæ molimine inchoatur) oppidò Couſ noſter opportuna cenſet renalia , atque intestinalia incernicula , melius autem poſtrema ; cum deturbandi , atque foras ejiciendi humoris directior longè , breviorque via ab hepate ad inteſtina , quàm ab eodem ad Renes obveniat , tum lentis excipiendis quicquiliis hepaticis inteſtina ſint renibus ſummoperè commodiora.

Ita concludit Senex. *Juvat autem is quibus ad inferiora devolvitur, atque motum humoris, ab hepate ad intestina perfluentis, denotat memoratus ab Hippocrate Borborigmus.*

XVI. Curativa igitur principalior indicatio, symptomatice hepatis obstructioni consulit. Hæc licet in genere aperitiva de- postulet, dispari tamen hæc modo juxta peccantis humoris ge- nera, dirigenda sunt. Enim verò si primum memoratum ge- nus adimpleat obstructio sive à bile torrida, piceaque, sed simul furente, excitari morbum compertum sit, diluentibus, longisque aporematis, epiceraisticis, eccopzoticis, ac demulcentibus, vix blandè absterfivis, potius tentanda curatio est, quàm, ut apud pra- cticos communiter assolet, fortiter aperitivis, incidentibus, aut calidè attenuantibus. Fugienda idcirco purgantia, præsertim validiora. Mihi usui frequentius est alteratum hoc jusculum. *℞. radic. cich. gramin. fragar. acetos. & taraxac. a. ʒiʒ. fol. ci- chor. endiv. capill. ven. pimpinell. agrimon. scariol. & hepatic. à MSS. semin. frigid. major. a. ʒij. flor. bellid. violar. & hiperic. a pug. ij. santal. citrin. pul. ʒiij. cinnamom. ʒij. limonem unum, aut alterum in taleolas incisum. Coque cum s. q. aquæ fontis. de- colat. largos capiat haustus mane, & vespere. Proficuum extat frequens cassiæ usus, modico interdum addito rhabarbaro con- fugiendum insuper exterius ad repetitos fatus ex malva, althea, violaria, sem. lin. & fænugrec. flor. camomil. melilot. Bellid. verbas. aliisque emollientibus, & blandè discutientibus. Interius ad serum lactis lupulatum, aut cum sisimbrio decoctum, aut etiam ex eorum infusione distillatum; ad decoctiones, jura al- terata, aut succos, largè præcipuè cum jure dilutos, rad. gra- min. rad. & fol. cichor. fol. dent. leon. taraxac. scariol. acetos. endiv. bugloss. pimpinell. sonchi, lactucæ; & similia. Valent in primis succi subacidorum simplicium, extractaque ab eisdem salia essentialia; quibus omnibus palmam præripit sal. essent. alleluia, seu acetosellæ cum jure quotidie usurpandus, salique interdum vegetali magistrali conjunctus. Perutiles insuper sunt leniores acidulæ præmissis universalibus præsiidiis. Fugienda Chalibeata, absinthiaca, ammoniacalia, & similia, salino- volatili*

volatili principio , aut asperiori , excitantique pollentia.

XVII. Hæc tamen ultima , tartareis præsertim immixta, utiliter adhibentur in opposito hepaticæ obstructionis genere, seu à frigido lentore lymphatico. Opitulantur igitur in hoc affectu fortiora aperientia , incidentia , deterfiva , roborantia, atque volatilifantia, ex regnis omnibus deducta, modisque quàm plurimis administrata , iisque interpollatè intermixta præsidia visceris plenitudinem imminuentia , seu congruentia cathartica. Proficua interdum deprehenduntur in ejusmodi obstructione, ad cachexiam aut hydropem faciliùs tendente , Jura Galli veteris & viperina , aut etiam diaphoretico - diuretica ex rad. chin. bardan. smilac. fals. parill. fassafr. guajac. lign. quercin. juniper. & similibus. Sed pro omnium remedium institutendis classibus, & formulis, ut & victus in hisce morbis ducendo regimine , innumera apud practicos omnes authores commentaria suppetunt.

XVIII. Media tandem, sive mixta hepatis obstructio à limosa bile, sed inertiori, mediæ quoque naturæ remediis oppugnatur. Frequenter utor ipse in hac obstructionis specie succis, decoctionibus, aut aliis præparationibus, elicitis ex 2. aut 5. radicibus aperitivis communibus, & radic. ering. enul. campan. rub. tinctor. filic. fol. agrimon. capil. ven. hepatic. buglos. ling. cervin. geran. cuscute. camedr. absinth. hisop. marrub. centaur. min. fumar. scolopendr. flor. genist. & sambuc. baccar. juniper. &c. utor prætereà arcano duplicato , tartaro vitriol. & limatur. calib.; lixiviosis quoque salibus; & identidem aloëticis, rhabarbaratis , aliisque specificis Catarticis.

DE HEPATIS PHLEGMONE.

Canones Practici.

*Hepatis
Phlegmo-
ne vel gib-
bam, vel
cavam
partem di-
stinctim
obsidere
potest: Pri-
ma tactui
manifestior
est, altera
obscurior.*

I. **Q**UANDOQUIDEM hepatis viscus, quod præter communia integumenta tribus valdè crassis abdominis musculis, & insuper peritoneo contegitur, tactui vix aliquam sui notitiam præstare posse videtur, nisi (ut Galenus admonet lib. 5. de loc. affect. cap. 7.) *vel magna in ipso oriatur inflammatio, vel incumbentes ei muscoli extenuati fuerint*, vel (quod quidem Galeni loco addendum esset) fortis saltem obstructio ingentem tumorem afferat; Phlegmone hujus visceris, quæ quidem sola, & legitima, & propriè à cruoris vitio, inflammatio est, si gibbam ejus partem invadat, ita attollit ejusdem molem, ut tactui perfacilè conspicuam reddat; non item si imam dumtaxat regionem occupet; ut hinc phlegmonem in cavâ hepatis regione, advertente Galeno, per alia potiùs accidentia, quàm per tactum investigare oporteat. Hæc autem hepaticæ phlegmonis differentia loci haberi facile potest, namque cum phlegmonosa affectio coacervata in determinatum tumorem inflammatio sit, hæc certè partem unam hepatis duntaxat obsidere potis est, alterâ quidem in tumorem non advocatâ; licet hæc cum tumida parte suos etiam morbosos assequatur consensus: veluti in phlegmone humeri, aut cubiti, vicinæ partes lentorem sanguinis, tensionem, calorem, aliaque phlegmonis accidentia, veluti in leviolem quandam inflammationis partem deductæ, compatiuntur.

*Signa
utriusque
Phlegmo-
nis commu-
nia, Do-
lor, febris
acuta, dif-*

II. Signa tum internæ, tum externæ hepaticæ phlegmonis communia sunt: I. Dolor ad dextrum hypochondrium, non quidem punctorius, sed obtusus, qui ideo vocabatur ab Archigene *tardus, stupidus, & simpliciter tractatorius*, ut habemus in Gal. 2. de loc. aff. cap. 8., interea cum ingenti
ad

ad hunc locum gravitatis sensu ; quandoquidem viscus suapte naturā amplum, omniumque hominis maximum, & valdè compactum, si multo repleatur sanguine insignem gravitatem nascitur, quæ ab ægrotante imprimis percipitur, dum sese ab uno latere in aliud convertit. Ab inflammatoria verò accumulatione sanguinis in hepate cum non tantum viscus, ejusque succingens membrana, sed annexa insuper ligamenta in ingentem adigantur tensionem, hinc tensivus dolor cum gravativo foederabitur, ut in omnibus hypochondrii locis, quibus hepar per sua ligamenta connectitur, peculiarem suum tensivum persentiri dolorem necesse sit. Ita Galenus 2. de loc. aff. cap. 8. loquens de ejusmodi hepatis dolore ait *dolor hujusmodi, si quis alius, vicina corpora ad consensum inducit, sentiet igitur æger molestam tensionis sensum totā illā cavā diaphragmatis parte, cui hepatis suspensorium ligamentum illigatur; sentiet igitur ad finem sterni, & cartilaginem Xiphoidem, quibus suspensorii ligamenti productio committitur; sentiet ad posteriora, atque ima diaphragmatis, ubi ad locum trajectus cavæ peculiari ligamento connecti hepar in ejus anatome ostendimus; sentiet ad latera spuriarum costarum, quibus dexterum hujus visceris ligamentum à nobis descriptum adnascitur; sentiet tandem in ipso sinistro hypochondrio, ubi sinistrum à nobis pariter suo loco descriptum ligamentum affigitur, atque interdum suis etiam molestis tensionibus afficietur umbilicale ligamentum.* Ita Galenus, ejusque sectatores effati sunt in hoc hepatis morbo, dolorem in pluribus plerumque locis percipi. Hoc autem ex dolore multiplici elicited hepaticæ phlegmonis signum gravissimum est, cum certè, vel hoc solo discerni hæc affectio ab aliis omnibus queat. Addit Galenus cit. loc. Phlegmonosis jecoris doloribus doloris usque ad jugulum extensionem, quam tamen aliis etiam hepatis morbis, ut obstructionibus, scirrhis communem esse contingit. Licet afferat Forestus de hepat. affect. lib. XIX. obser. VII. : *dolorem ad jugulum usque propagatum sentiunt in tantummodo, qui magnā laborant phlegmone.* Quod si adsit hæc ad usque jugulum doloris in hepatica

*ficultas
spirandi,
sicca tussicula, æstus,
cibi fastidium, sitis,
vomitus,
adstricta alvus, urina color corporis, decubitus &c.*

phlegmone propagatio, morbum in gibba parte intelligendum esse, idem author eodem loco ex Galeno admonet. II. Febris acuta quidem, sed plerumque non ardens, neque cum intenso calore, interea cum pulsu magno, sed molli, & undoso, cum urinis rubeis, & crassis, cum rubore faciei interdum sincero, interdum verò subfusco, atque ad dextram genam intensiori; atque hæc febris noctu ut plurimum exacerbatur. Forestus loc. cit. ait: *Nisi valenter jecur inflammari contingat, licet febris exciteur, quoniam princeps viscus est, tamen ea acuta non erit, nisi eadem inflammatio magna sit.* Interea à praxi edocti sumus, febrem, jecoris legitimam phlegmonem comitari solitam, vel malignam esse, vel saltem semper acutam: Ita de phlegmonosis doloribus intelligendus videtur Hippocratis textus in lib. Prorrh. *Febres ex hypochondriorum doloribus malignæ.* Non tamen diffiteor, à majori, vel minori, ampliori, aut angustiori hepatica Phlegmone acutiorem remissioremve exoriri febrem; dum sanè in externis omnibus, internisque partibus magnitudinem inflammationis vehementia febris continenter sectatur. Quà de re, ut in exili, spuriaque interdum hepatica inflammatione vix febrem percipere datum est; ita in acutissimo, & universali jecoris phlegmone, veluti erysipelas est, vel ipsa ardens febris, seu typhodes, ut dicitur, excitatur, atque excandescit. III. Ingens spirandi difficultas; cum hepatis moles ad auctâ gravitate adnexum diaphragma deorsum trahat, magnitudine, & intumescentiâ comprimat, utroque modo liberum ejus motum impediat. IV. Tussicula arida, & sicca, molesta quidem, sed rara. Fortè quintum hujusmodi signorum genus implere posset monitum illud Hippocratis in Aphor. 59. sect. 5. *Hepati inflammationem patienti singultus advenit.* Hæc quidem signa propria sunt hepaticæ phlegmonis, atque ab eadem inseparabilia: Alia insuper à Galeno, aliisque advocantur in medium, quæ vel hunc affectum non semper comitantur, vel aliis etiam hepatis morbis, ut hepatitidi, erysipelati hepatis & interdum adjiciuntur: ut linguæ color in primis magis ruber, deinde verò niger evadens: vehemens cibi fasti-

fastidium, sitis inextinguibilis: vomitus tum sinceræ bilis, tum ejus, quæ ovorum vitellis similatur, quæ postea æruginis aliquem colorem referre conspicitur: alvus adstricta: urina flammea, & acris: color totius corporis pallidus ad ictericum vergens: decubitus supinus facilis, sed difficillimus super utrumque latus, cum in dextro decubitu major tensio sinistro hepatis ligamento inducatur, in sinistro verò cætera ligamenta à suspensi visceris pondere vehementer distendantur. Sensus ingentis æstus ad dextrum Hypochondrium, interdum cum macularum ex rubro nigricantium, aut exurentium vesicularum ad hunc locum eruptione.

III. Distinguitur legitima hepatis phlegmone à calidâ, sive acuta hepaticide ab accensa bile producta, quod in hac ultimâ affectione, si adsit dolor, acutus sæpè est, atque lancinans cum non tanto molestæ gravitatis sensu; neque insuper per varias visceris partes tam multiplex: Febris in hepatis phlegmone statim principio acuta est, sed in calidâ hepaticide initio quidem lenis, hinc sensim augescens, in statu morbi, longè quàm in phlegmone ardentior evadit cum calore intenso, sæpe cum rigore, aut horrore periodos instituens, cum veloci pulsu, duro, inæquali, & quodammodo ferratili, urinæ tenuibus, intensè citrinis, seu croceis, & ardentibus, flavo insuper, seu icterico, aut aliter lurido ad faciem aut etiam ad totum corpus subitanè oborto colore: tussis inanis frequentior: lingua flavescens, & sicca: oris amaror: oculi concavi: summa, & inextinguibilis sitis: acerrimæ auriginoso colore saturatæ, aut etiam lividæ bilis vomitiones crebræ: gravior ciborum aversio: biliosæ, calideque per alvum dejectiones. Comitatur macilentus, atque extenuatus corporis habitus: tum causæ bilem multiplicantes, aut in inordinatos motus excitantes præcessere; ut fusiùs inferiùs, quum de hepaticide sermo erit.

IV. Interstingui facilè insuper potest phlegmone hepatis à pleuritide, quod in hac acerbior dolor est, & punctorius. Et licet in hepatis phlegmone doloris usque ad jugulum propagatio interdum contingat, tamen, observante Dureto in

*Signa quæ
Hepatis
Phlegmonem
à calidâ
Hepaticide
distingunt.*

*Signa He-
patis Phle-
gmonem à
Pleuritide
dirimen-
tia.*

com;

comment. ad Coacas: *Hepatis inflammatio solam ad jugulum tensionem facit: pleuritis verò punctorium, & gravantem dolorem, quæ duo planè sunt acerbiora quàm tensio.* Difficultas insuper in pleuritide spirandi major est, nulla coloris faciei mutatio, saltem non in ictericam illicò habitudinem conversio, nisi in biliosa aliàs descripta pleuritide, quæ quidem adhuc ab hepatis phlegmone satis distinguitur per doloris sedem ad costas veras, atque humidam, sputisque feracem creberrimam tussim. Cæterum non solum sicca non est, quæ in qualibet pleuritide tussis vehementior est, & molestior, quàm in hepatis phlegmone; sed plerumque humida, saltem procedente malo, cruento sputo, aut aliquantulum sanguini intermixto, aut aliàs colorato conjuncta; atque copiosa ejiciens; Pulsus insuper durus, & vibrans, ac ut vocant, ferratus, seu ferrinus: In Hepatis verò phlegmone, tussis, ut supra, arida, & sicca est, neque crebra, nec fortis: mollis pulsus, atque ad undosum accedens: Tum inspiratio, atque expiratio æquè difficiles sunt in pleuritide: sed in hepatis inflammatione prima difficilior percipitur, altera verò facilior. Tumor denique, & pondus gravans, veluti deorsum trahens thoracem, ad dextri hypochondrii regionem haudquaquam in pleuritide dignoscitur. Operosius igitur videtur à pleuritica, & præcipuè biliari affectione distinguere memoratam superius hepatitidem, quam quidem sectantur acutus interdum dolor, intensior febris, duriorque pulsus. Et sanè præter memoratam respirandi diversam rationem nonnisi doloris sedes, atque à tussi exspuitionum habitudo affectus hujusmodi interstinguere possunt, cum non tantum eadem in utroque affectu doloris, febris, & pulsus ratio videatur, sed & excretionum per vomitum, aut secessum, aliorumque omnium, quæ bilis copiam, malitiam, aut malam transmissionem indicare queant. Ita facillimum est, hujus generis hepatitidem cum pulmonum affectu complicari juxta illud Hippocratis in Coac. prænot. *Hepaticis sputum multum cruentum, sive intus sub putridum, sive si merè biliosum fuerit, statim perniciem denotat.* Non ergo cruentum hoc sputum ab affecto Hepate recta

rectà profluere dijudicandum est ; ut neque Textus ille Hippocratis in Coacis : *Qui spumantem expuunt sanguinem, dextro-que laborant hypochondrio, à jecore spuunt, multique intereunt,* intelligendus venit, quatenus sanguis ab hepate ad tracheam, veluti per directam quandam liberèque productam viam, in fonte fortasse pulmone traductus, tussì foras ejiciatur. Id enim non sibi velle declarat idem Cous in Aphor. XIII. sect. V. *Quicumque spumofum sanguinem expuunt, his e pulmone eductio fit.* Sed eo quòd impedito per ingentem hepatis phlegmonem in magnis numerosisque hujus visceris sanguiducis vasis libero sanguinis fluxu, is certè tam insigni proprii itineris parte defraudatus, aliòque cursum necessariò inflectens, irruptionem in pulmones, atque etiam exundationem frequenter moliatur; undè ejusdem spumosi, aut minùs spumosi, copiosa, minùsve copiosa per tussim excretio contingat. Eodem quidem pacto, quo mulier, cujus oclusa uteri vasa menstrui sanguinis effluxum impediant, hæmorrhagiâ narium, aut vomitu, aut hæmoptysi sanguinem non rarè profundit : juxta Aphor. XXXII. Sect. V. *Mulierì sanguinem evomenti menstruis erumpentibus solutio.* Et vicissim. Atque illud in Coac. *Mulierì menstrualì, cui menstrua non respondent prodest è naribus profluere sanguinem :* Multisque juvenibus usu venit, cohibitâ narium hæmorrhagiâ sanguinis anadromem cursum habere per pulmones, exitumque per os. Porro curatarum hepatis inflammationum pro pleuritide, aut saltem pleuritidi similium, plurima prostant exempla apud Galenum, Zacutum, Horstium, Valleriolam, Schenckium, Forestum, Panarolum, aliosque: Tum plurima etiam complicatarum hepatis, atque pulmonis lethaliù inflammationum : Quorum unicum, idque profectò recentissimum, ne nimius videar adducam. In Principe de Urfinis Romæ Prid. Non. Decembr. superioris anni 1722. post quatuor dierum morbum octuagenariâ defunctâ, & apertâ, hepatis, & pulmonis viscera abitâ in necrosim inflammatione æquè perculsa deprehensa sunt. Ita illac accepimus.

*Differen-
tia in He-
pate Phleg-
monis, &
Erysipela-
tis.*

V. Cum autem erysipelas hepatis inflammatio quoque sit, sed latior, & acrior, & totum occupans viscus, neque in peculiarem tumorem coacervata; idcirco quantumvis Galenus 5. de loc. affect. cap. 7. admonere contendat *hepatici erysipelatis accidentia phlegmonis accidentibus ferè similia esse*. Per ipsum interea erysipelatis acutiorum gradum utramque invicem affectionem distinguemus. Adjicit enim Galenus; & *insuper (in hepatis erysipelate) febris quoque cum vehementissima siti laborantes cruciat*: Eas enim febres, quas *causones*, seu *ardentes antiqui vocabant*, magnâ ex parte advenire videmus jecoris, aut ventriculi flammæ dispositionibus, atque in pulmonis inflammatione erysipelatis particeps ardentes febres excitantur, quemadmodum ubi in universo quoque corpore biliosi humores ad immoderatum fervorem perveniunt. Verùm hæc, quæ aut jecoris, aut ventriculi occasione eveniunt, omnium sunt vehementissimæ, quibus particulis ita laborantibus febres magnâ ex parte in marcorem transmutantur: Per diversam igitur comitantis febris naturam phlegmone hepatis ab ipsius erysipelate discriminatur; & dispar febris conditio à dispari utriusque morbi fovente causâ æstimanda est: Illa enim propriè à sanguineo, hæc verò à biliari principio ortum ducit. Hinc non tantum hepaticæ phlegmonis febrem erysipelatosa febris seu ardens, & Typhodes, longè vehementiâ superat, sed ulterius acutior in erysipelate dolor est, & calor admodum intensior non solum in affecto hypochondrio, sed in universo etiam corpore.

*Indicia
hepatis
Phlegmo-
nem à spaf-
modico
ejus dolo-
re distin-
guentia.*

VI. Alia insuper indicia sunt, quæ hepatis spasmodicum dolorem à phlegmone discriminant: Quippe spasmus hepatis morbus est repente invadens, cæterum ficans, ut nulla in linguâ, cute, urinæ, aliisque excretionibus peccantis, aut transmissæ bilis vestigia obversentur: Dolor non gravativus, aut tensivus, sed veluti dilanians, atque ad interiora, superioraque retrahens, isque vehementissimus, non insuper continuus, sed ad intervalla recurrens: intervallata in consequens spirandi difficultas: Ingens quidem, unaque per totum hypochondrium tensio, non verò circumscriptus tumor

tan-

tangenti manui porrigitur : Nulla tussis , aut saltem ejus conatus ab hypochondrii tensione impeditus. Ut subita ejus invasio est , ita & subitanea solutio : Nulla præcipuè febris , quæ si tandem morbo diutius desæviente , accendatur , morbum indicat juxta illud Hippocratis in Coacis *Hepar vehementer derepentè dolentibus febris succedens remedio est.* Cæterum à simplici obstructione , atque à scirrho per propria signa , horum tractatibus adjecta , facile jecoris phlegmon interstingitur.

VII. Galenus cit. loc. animadvertit , inflammationem musculorum abdominis cum hepaticâ inflammatione confundi posse , hinc signa tradit , quibus una ab altera distingui valeat. Siquidem in musculorum abdominis inflammatione cutis circumtensa valdè est , ut si quis digitis apprehensam attrahere velit , ea minimè sequatur. Insuper inflammatio musculi unius aut plurium abdominis se tactui non tantum facillimam præbet , sed insuper extra hypochondrium elongatur , versùs umbilicum plerumque se proferens , affectorum prætereà musculorum figuram repræsentando , diversam à figurâ inflammationis hepatis , in qua quidem subrotunda , & circumscripta in hypochondrio moles profundius percipitur , dum musculi manu facillè pertractari , nec non à subjecto tumore dimoveri , atque expediri possunt. Præcipuè dissimilis in hisce inflammationibus totius corporis color exhibetur : In musculorum inflammatione naturalis , & vividus permanet , in hepatis phlegmone aut pallidior apparet , aut ad ictericum vergens. Ita per hujusmodi totius habitus , & in primis faciei coloris inspectionem , atque insuper ventris explorationem Galenus Stesianum quendam , ab aliis Medicis abscessum in hepate gestare creditum , abscessu in abdominis musculis , ex phlegmone genito , affectum esse revelavit , ut meminit cit. lib. 5. cap. 7. *de loc. affect.* Atque his Galeni vestigiis insistens Valeriola , mulierem , quæ ab alio Medico phlegmonoso hepatis tumore prehensa judicabatur , musculorum abdominis inflammatione vexari foeliciter ostendit , ut affert lib. 4. observat.

Quomodo distincta sunt musculorum abdominis, atque jecoris inflammationis indicia.

cap. 5. Adhæc, urinæ, aliaque excreta in musculorum inflammatione veluti naturalem consistentiæ, coloris, & componentium partium habitudinem videntur adhuc præ se ferre; quod quidem in hepatis phlegmone minùs contingit.

Quomodo
Phlegmone
gibba, aut
cava partis
Hepatis dis-
cerni invi-
cem queant.

VIII. Denique phlegmone gibbæ, cavæque partis hepatis distingui invicem sat facillè possunt. Si gibba, vel convexa hepatis pars laboret, durus tumor tactui se facillè porrigit, figuram hepatis penè globosam, aut quasi semilunarem referens: renixus: dolor inter respirandum major est, & usque ad dextram juguli partem protensus, ut detrahi videatur, acris insuper circa cordis foveam: Tussis, & respiratio crebrior cum dispnea, majorque gravitatis sensus; cum difficili in dextrum latus decubitu: facilis ad phrenitidem, imò & paraphrenitidem transitus. Symptomata denique omnia ad partes thoracis attinentia graviora sunt, quàm ad intestina, & ventriculum; & sanè si cava pars afficiatur, tumor ad tactum non est adeo conspicuus; dolor interim aliquis per tactum, & compressionem percipitur: Vehementior fitis, linguæ scabrities, & nigredo, interdum flavo, aut viridi colore fucata, nausea ferè continua: imò in ventriculo cardiogmos, aut frequens singultus, aut utrumque; biliosarum sanierum vomitus; ventris laxitas & *ambarum partium commune symptoma est febris, sed convexarum major*; ait Duretus ad Coac. Hipp. fol. mihi 458. Adite eundem ibidem, & fol. 325. pro his diversis in gibba, aut cava parte eliciendis inflammationis indiciis; tum Galenum lib. 5. de loc. affect. cap. 7. Forrestum lib. XIX. de Hepat. affect. observat. VII. Sennertum de Hepat. inflamm., Riverium lib. XI. cap. II. de Hepat. inflam. aliosque.

Hepatis
Phlegmone
etiam ante
quartam
diem agrum
interdum de
medio tollit,
at verò non
per morbi

IX. Gravissima hepatis phlegmone cum enormi visceris tumore, etiam ante quartam diem agrum jugulare potest, non quidem ex morbi solutione, seu malâ judicatione, sed ex oppressione tumoris, five ex respirationis suffocatione, per diaphragma à functione sua prorsus impeditum. Ut qui hoc pacto præfocentur, per immanem orthopneam moriantur. Ita
habet

habet Hippocrates sect. 2. lib. 2. Popular. morbor.: *Coi sorori* ^{solutionem;} *hepar elatum est splenico modo. Mortua est secundâ die.* ^{sed per tu-} *Idest,* ^{moris suffo-} *hepar in hoc casu tantam in molem fuisse elatum intelligit* ^{cationem:} *in quantam lien interdum solet,* ^{cujus qui-} *qui sanè ob laxissimam textu-* ^{dem Phleg-} *ram facile, celeriter, & insigniter distendi potest, atque* ^{monis indi-} *tumescere. Ita insignem lienis tumorem, qui usque in dex-* ^{cia exhiben-} *tram partem tendi aliquando videretur, Licicæ accidisse su-* ^{tur.} *perius Cous narraverat. Cæterum similem in hepate phleg-* *monosum decubitus cum strangulatu & nece ad secundam in-* *vasionis diem vidimus nos non ita pridem, seu Idibus Martiis* *hujus anni 1723. in Illustrissimo D. Francisco Boschetti ante* *Templum D. Antonii in majori Padi viâ decumbente. Ita* *oportune annotat Duretus in comment. ad Coac. Hipp. loc. de* *morb. vesicæ: Quæ phlegmone systrophica jecur occupat primis* *etiam morbi diebus sæpè mortifera esse dicitur. Pessima igitur,* *mortemque esse brevi adfuturam portendentia, hæc in hepa-* *tis inflammatione signa sunt: Febris ardens, sitis inexhausta: lingua* *scabra: refrigeratio extremorum, quum medium corpus, &* *præcipuè dextrum hypochondrium uritur: vomitus item ni-* *ger, vel porraceus: venter intumescens: jactatio vehemens* *cum frequenti pedum suscepta ab ægro nudatione. Enormis* *præcipuè tumor, renixus, & dolor cum frequenti singultu,* *animique defectu. Hepatis Phlegmone per metaptosim, in-* *vadens, si fractis viribus accedat, citò mortifera est, juxta* *illud in Coacis: Ex anginosi hypochondrii dolor irritâ crisi, cum* *infirmirate summa, & exolutione abortus, clàm necat, tametsi* *admodum videatur esse in tuto.*

X. Prognosim à divini senis oraculo hauriamus. *Præcor-* ^{Naturalis} *dia sine ullo doloris sensu equaliter mollia esse oportet: At in-* ^{Hypochon-} *flammatione tentatâ, aut inequaliter affectâ, aut dolore vexata,* ^{driorum vis-} *non contemnenda agritudinis notas præ se ferunt. In Coacis præ-* ^{cerum sta-} *not. fol. mihi 279. jam dixerat: Præcordia optima quidem, quæ* ^{tus; ipsorum-} *dolore vacant, mollia sunt, & equalia tum dextrâ, tum sinistrâ* ^{que tumen-} *parte: Incensa verò, aut dolentia, aut intenta, aut inequa-* ^{tium variis} *liter affecta, tumentia, potissimum in principio morbi mala sunt,* ^{secundum} *præfer-* ^{variâ se-} *nis, doloris,* ^{magnitudi-}

duritie
molitudi-
nis, & ad-
iuncta febris
conditionem,
eventus ex
Hippocrate.

præsertim in dextera parte, & mortem brevi affore indicant. In Prognost. verò: Præcordia tumida, dura, & dolentia, si in univ-
ersum affecta sunt, maximum malum portendunt, si verò altera
parte dumtaxat, & sinistra minus periculum est. Addit insuper:
Hujusmodi tumores (viscerum scilicet in hypochondriis degen-
tium phlegmonosi) in principio quidem proximam mortem de-
nuntiant: pariter lib. Prognost. Ubi verò viginti dies excesserint,
neque quiescente febre, neque tumore remisso, ad suppurationem
convertuntur. Mollis tumor dolorem non inferens, & digitis
cedens longiori tempore finitur, sed non ita grave ab eo pericu-
lum pendet. Quod si intra sexaginta dies neque febris desinit, ne-
que tumor desistit, fore suppurationem hoc loco, & reliquo ventre
significat. Durus itaque, magnusque tumor, dolore crucians, mor-
tis periculum non multo post fore denunciat: mollis verò, & sine
dolore, quique prementi digito cedit, longus esse solet. Ventris
tumores minus faciunt abscessus, quàm qui in hypochondriis: mini-
mè verò qui subter umbilicum sunt, in suppurationem vertuntur.
Jamque his textibus Legislator noster prius naturalem hypo-
chondriorum viscerum statum, hinc acutissimi eorum, &
præcipuè jecoris phlegmonis, peracuti, acuti simpliciter, &
demum in chronicam indolem vergentis, eventus omnes tum
ex tumoris amplitudine, & loco, majus, aut minus peri-
culum denunciat.

Alvi fluxus
in Hepatis
Phlegmone
mali: &
qui deterio-
res sint. Pa-
ròides hunc
morbum ple-
rumque ma-
le judicant.
ex Hipp.
Nihil autem
moveri mor-
tiferum est.

XI. In hepatis phlegmone alvi fluxus mali, præcipuè
si ante morbi concoctionem adveniant; cum his ea non ex-
cernantur, quæ excerni oportet, atque insuper humorum
turbationes, & solutiones, & viscerum resolutiones per ipsos
indicentur; quo quidem judicio intelligendus est textus ille in
Coacis. Quæ cadunt in hypochondrium dolorifica mala, cum
aliàs prava sunt, tum verò si faciunt profusiores alvos: Pejora
autem, quæ brevi nascuntur. Pessimæ verò inferiores hujus-
modi excretiones, si copiosæ, & crassiores sint, simulque ad
lividum colorem accedant juxta illud Hippocratis in Protre-
thic.: Ex torminoso sedimentum limosum, sublividumque, malum:
An ex hypochondriis dextrum dolere videatur, exolvaturque? atque
his

his [parotides parùm dolorificæ? Venter his omnibus copiosè fluens, perniciem affert. Revera aliis locis Causa de parotidibus hepatis inflammationi supervenientibus sermonem inducit, malè insuper ab hujusmodi transmissione præfagiens. Ita in eod. Porrethic. *Ex volvulis malè olentibus cum febre acuta, hypochondrioque sublimi diutius perseverante, parotides exurgentes perimunt. Ibidem. Quibus amplè, & crebrò spirantibus morbus regius, & febres acutæ cum duris hypochondriis refrigerata fuerint, hi abscessus magni secundum aures suscitantur.* Revera in hoc ultimo textu Hippocrates neque satis dirimere videtur duritiem hypochondriorum inflammatoriam à duritie scirrhusa, cum de dolore fileat, neque in transmissione ad parotides [perniciem, aut utilitatem contingere annuit. Id interea colligamus, parotides hypochondriorum morbis succedentes plerumque mali ominis esse. Interea frequentiores fortasse Hippocrati visæ sunt ab hypochondriorum phlegmone, aliisque morbis parotidum eruptiones, cum ibidem binos adhuc hosce textus adjiciat. *Quibus comatosa, fastidiosa, hypochondria, dolentia, & cruenta exigua, in his parotides exciuntur: antea autem faciei signa - - - Hypochondrii contentio cum comate fastidioso, & capitis dolore parotides attollunt.* (Galenus in commentario: *per dolentia hypochondria, & hypochondrii contentionem phlegmonem intelligit.*) Tum in Coacis habet, *in diuturno hypochondrii meteorismo* (habeas pro meteorismo Hippocratico magnum, subitoque in sublime elatum, ipsiquemet visui fortè obvium nec tamen valdè durum tumorem, à flatu, scirrhuso, aut phlegmone productum, interdum ab eodem usurpatur hoc nomen pro egri surrectione, dum nempe is à lectulo se attollit de quoque residet, ut sect. 2. progn. t. 6. & Coac. t. 493. quandoque etiam pro ipsamet flatuosa substantia per intestinalem fistulam turbulenter vagante: Atque de hoc flatuoso intestinorum meteorismo loquitur in Coacis: *à suppressione alvi meteorismus Hypochondriorum, gravis. Colica flatuosa.* Tum in 7. Aphor. sect. 6.: *Dolores qui ventrem tenent cum tumore, levissimi sunt: sine eo, gravissimi. Flatus Hypochondriacus.*)

& alvo graveolente, abscessus, qui ad aurem assurgit, necat. (Intelligit hic senex pro graveolente alvo illiacam affectionem: quod quidem superius explicaverat: *Parotides graveolentis vulvuli confectariæ cum febre acuta, & hypochondrii meteo-rismo, diuturno, interimunt.*) Tandem ibidem: in biliosis spiritus magnus, & febris acuta cum præcordii intensione juxta aurem abscessus facit. Sed id fortasse translationum ab hypochondriis ad parotides frequentius erat in Græciâ ad ævum Hippocratis. Nos tamen in Italii nostris regionibus rarissimum esse animadvertimus. Interea nihil prorsus in hepatis inflammatione per evacuationes moveri, mortiferum est. Ita in epidem. Hippocratis lib. IV. *Puerpera maritus, qui prope Sitodochiæ aedes habitabat ictericus erat, ad quem septimâ die veni, octavâ mortuus est, neque urinam, neque alvi excrementa emittens, hypochondria magna erant, & dura, & spiratio crebra. Hic moriens, ne frontem quidem præ labore madefecit.* Ab hisce igitur siccis hepatis inflammationibus est summopere cavendum.

Phrenitidem
Hepatis in-
flammationi
persæpe suc-
cedentem
præscientia
signa.

XII. Frequentius ab inflammato hepate ad cerebrum pro-
inducendo delirio transmissiones, sive epigeneses, ut pluri-
mum funestæ, celebrantur; præsertim si revellentibus, ac
derivantibus præsidiis morbi principium, & augmentum
non satis fuerint oppugnata; ut in Dromeade uxore, cu-
jus historiam affert Hippocrates lib. 1. popular. morbor. Cum
verò per nimiam hepatis, atque sanguiferorum vasorum pleni-
tudinem, ejuscemodi decubitus ad caput obeantur; ita Hip-
pocrates in prognosticis, & Coacis signum exhibet, quo isti
prænosci queant: *Præcordiorum vena, si pulsant,urbationem,
aut delirium portendant: sed eorum qui sic affecti sunt oculos aspi-
cere oportet: quippe frequens illorum motus insaniam commina-
tur.* Atque in Coacis prænot. rursus ait: *Pulsus in hypochon-
drio cum perturbatione dementia est: magisque si oculi crebrò mo-
ventur.* Et sanè quæ in hepatis phlegmone, dextræ coeliacæ
aut ipsiusmet Aortæ sensibili, molestâque pulsatione prehen-
duntur, præcipuè si post institutam sanguinis missionem hanc
adhuc pulsationem persentiunt, neque eidem ante morbum
assue-

assueverint , raptum ad caput , atque phrenitidem non effugiunt ; Nisi inflammatione ad occultam vomicam , aut etiam in viscere aggerendum scirrhum vergente , delinquens humor aliò non rapiatur , & decumbat ; quorum quidem alterutri morbo post inflammationem non rarò contingenti videtur prospicere locus ille in Coacis : *Stomachi dolor , & pulsus hypochondriorum , febre extinctâ , malum denunciant : idque cum aliàs tum in sudatiuncula.* Stomachi dolor ab Interpretibus pro singultu , interdum pro cardiogmo intelligitur : pulsus hypochondriorum eximix quidem , ut ait Duretus , inflammationis inseparabile signum est ; Qui tamen , defervente inflammatione , & in metaptosim facescente , vigere adhuc potest ob ademptam hepaticæ , & cœliacæ arteriæ libertatem à tumore scirrhuso , aut suppurato. Ephidrosis verò , seu illa sudatiuncula , quâ roscidum est tantum caput , cervix , & thorax , aut etiam quæ perexigua toto exudat corpore , tuberculi potiùs hepatici , vomicæ , aut cujuslibet suppurationis confectoria esse solet , quàm scirrhi , ut inferiùs dicemus. Dixi superiùs dextræ cœliacæ , aut ipsiusmet aortæ pulsationem ; quoniam arteriæ substantiam hepatis ingressæ , atque ad ejus vasorum tunicas dispersæ , cum graciles admodum sint , sensibilem edere pulsationem non possunt , ut idcirco à qualibet causâ pressæ nimium in jecore fuerint , sensibile pulsationis incrementum in solo cœliacæ ramo dextro vel ipsius cœliacæ trunco , vel etiam in viciniore aortæ sectione inducere possint. Quod quidem nec Galenum præterit , dicentem 2. de loc. aff. cap. 3. *Neque in hepate , neque in renibus nunquam hujusmodi pulsationem apparere.* Æquivocum interea esse argumentum potest hujusmodi in affectibus hepatis arteriarum pulsatio : Quippe plures noscimus , præcipuè hypochondriacos , & picrocholos tali arteriarum pulsu , vel citra febrem , & affectum hepatis , atque in ipso naturali statu vehementer obsessos. In his igitur *præcordiorum venæ* pullantes , in superventa hepatis inflammatione , metastasim ad cerebrum ,

non ita tutò designarent. A turbatis cæterum, tremulisque oculis, & præcipuè inflammatis, & turgidis, imminens prævideri potest infania; tum quod turgida oculorum vasa turgentia ea pariter, à quibus originem nacta sunt, cerebri vasa testantur; tum quia nervorum oculi concussiones, sive tremores nervosorum pariter in vicino cerebro caudicum ab irruentibus improbis succis laceffitorum, jactationes significant.

*Hepaticæ
Phlegmones
vel per hæ-
morrhagiam
narium, vel
per sudores,
perfectè ju-
dicantur;
imperfectè
per urinas,
sedes, ictero,
aut vomitus
diebus crui-
cis, malè per
suppuratum;
pessimè, &
lethaliter
per scirrhum,
aut gangre-
nam, aut
marasimum,
aut hydro-
pem.*

XIII. Tametsi Galenus lib. 3. de Crisibus cap. 3. hæc tradat de hepaticæ phlegmonis judicatione: *Hepatis de convexa quidem partes inflammationem patientes tribus præcipuè modis crisis obediunt, fluxibus sanguinis è nare dextra, & sudoribus bonis, & urinis abundantibus: convexa autem partes excrementis alvi biliosis, atque sudoribus, nonnunquam verò & vomitibus: magis autem expetuntur per urinas expurgari; per sudorem tamen decretoriâ die advenientem Hepaticæ indiscriminatim phlegmones ut frequentius, ita foelicius judicantur; rectè igitur admonet Doretus in Coacis; Phlegmonarum omnium systrophicarum mutationem esse, aut convenienter naturæ, seu diaphoresi, & suppurato; aut contra naturam, seu scirrho, & gangræna. Quippe Phlegmon hepatis, instar aliorum omnium calidorum tumorum, vel, bene diffatis per sensilem, aut insensilem transpirationem, qui fuerant incensi, & impacti, humoribus, atque indè restitutis in circulum, faustè resolvitur, absque ullo in viscere relicto morbi vestigio; vel suppurat; vel in scirrhosam congectionem densatur, atque induratur; vel tandem in corruptionem faceffit. Prima judicatio totum naturæ opus est: Altera morbi, & naturæ virium participans: Tertia, quartaque semper à dominatu morbi ortum ducunt: Tertia immedicabilem quidem hominem, sed diu adhuc superstitem linquit: Quarta lethalis est, citòque interimit. Sed si sudores parvi sint in morbi cruditate advenientes, mali; juxta illud Hippocratis in iisdem Coacis: *si cui sine febris vacuitate sudatuncula crebra cum hypochondrii tensione conjuncta sit, malè illi est: sed maltò pejùs, si ejus dolores ad jugulum, & acromion se obsistent.**

ment. Interea igitur non rarò per lylim seu etiam absque sensibili sudore per paulatinam & insensilem resolutionem hic morbus terminatur : sæpenumero in imperfectam crism per icterum faceffit : quandoque, præcipuè quum diutiùs protrahitur, in scirrhum induratur, *tenuiori*, ut ait Galenus (sive sanguineâ) *morbum committentium humorum parte difflatâ; crassiori verò, & sequaci* (seu lymphatico-ramosâ) *in visceris amplitudinibus depacta*. Non rarò inflammatio hepatis, nulla procuratâ suppuratione, in hecticam, & marasmodem febrem definit: interdum & in hydropem. *Hepatis inflammatio, ac durities facile in aquam inter cutem transit*, ait Foësius.

Atque ab inflammato Hepate progenitum Hydropem gravem fore, & lethiferum præfagit Hippocrates in Coacis decisionibus: *At verò hydropes illi permolesti sunt, atque mortiferi, qui veniunt è morbis acutis*. Profectum ab inflammato Hepate hydropem eodem deinde loco describens Cous, certissimum præbet indicium, quo quidem iste ab alio Hydrope, mesenterii, vel intestinalis tubi, aut utriusque vitiis creato, distingui valeat. *Quibus hydropes à lumbis, & ilibus ortum habent, iis tument pedes, ac diarrhæa longa est, quæ nec prætumidum ventrem adæquat, nec ipsos lumborum, & ilium dolores exolvit. Sed quibus ab Hepate sunt hydropes, & unâ iusses adsunt, & crebra incessit tussendi cupiditas, & commemorabile nihil extussiunt, ac pedes tument; tum alvus non dejicit nisi dura, atque coacta. Quin etiam circa ventrem assurgunt ademata, partim dextra, partim sinistra, quæ modo consurgunt, modo subsidunt.* “Astricta alvus, ait in “Commentario Duretus, signum syllogisticum est, atque, “ut ita dicam, character hydropis Hepatici, non secus atque Diarrhæa prædicta illiaci. Alvus autem nihil dejicit, “quia nec irritatur corruptione chyli, nec suppressione tantâ “opprimitur. Deinde hîc feces naturali carent vehiculo, id “est humore, quem hepatis phlegmone prorsus exhaurit. Tum “intestina prioratione illâ non gaudent, ut solebant dejectionibus ipsis dicata, quam bilis edit per folliculi meatum effusa.

“ effusa. Quæ ratio inhibendæ, atque sistendæ fecis commu-
 “ nis est omnium ictericorum: Cujusmodi sunt tales Hydro-
 “ pici. Hucusque Duretus. Cum igitur noster Dictator in iis-
 dem Coacis de aliis hydropis speciebus, non à peculiari he-
 patis, aut alterius visceris vitio, aut læsione, sed ab univer-
 sali fluidorum dyscrasia ortum habentibus, loquens
 ab alvi fluxu bonum portendat: *Qui secundum venas hydro-*
pici sunt, prorupta in alvum aquâ sanantur. . . . Aqua inter cu-
tem initio aquosum alvi profluvium absque cruditate exortum, mor-
bum solvit. . . . Aqua inter cutem vitio, cui Leucophlegmatias
nomen est, laborantes alvi profluvium sedat: Jam in hoc textu
 duo præcipua colligenda sunt: Primum, in Hydrope à lum-
 bis, & ilibus, seu, ut commentantur Interpretes, à mesen-
 terio, & intestinis ortum habente, nihil alvi profluvium ju-
 vare, cum semper symptomata, atque ab impedito nutri-
 tiorum laticum trajectu fiat ejusmodi excretio: Alterum ve-
 rò, in Hydrope ab Hepatis inflammatione producto neque
 posse alvi fluxum proficere, cum hydropes ab acutis mor-
 bis incurabiles sint; neque posse sperari, cum in hepatico
 hoc hydrope alvus non dejiciat. Sed de Hydrope nos dicen-
 do fortasse nimium à proposito digressi fuimus.

Hæmorrh-
gia quo loco
contingere,
& quibus
conditioni-
bus stipari
debeat, ut
Phlegmo-
ni Hepatis
proficua
evadat:
Tum quibus
indiciis præ-
nosci queat.

XIV. Sanguinis è nare fluor, decretoriis, aut etiam
 non decretoriis diebus adveniens, maximo solvendæ Hepatis
 inflammationi adjumento est, eoque magis, si citius in principio,
 aut augmento, seu ante morbi statum contingat, juxta illud
 Hippocratis in prognost. *Accidit in his (sive in hypochondrio-*
rum inflammationibus) in prima circuitione (seu in primis sep-
tem diebus) etiam sanguinis è naribus fluor, atque admodum ju-
vat. Hujusmodi verò crism in legitima dumtaxat jecinoris
 inflammatione, seu phlegmone, prodesse deprædicat per il-
 lud in Coac. *Quibus cum rubore faciei hypochondrium in feбри-*
bus non est molle, effluente naribus sanguine, convalescunt. Nam
 in solo phlegmone facies rubore coloratur: In illegitimis aliis,
 seu bilioso sanguineis hepatis inflammationibus, ut in erys-
 pelate,

pelate, calidâque hepatitide, facies ictero, aut subicterico colore suffunditur. Sed quemadmodum sanguinis per nares eruptio in Hepatica Phlegmone citò adveniens celeri auxilio est, *inchoatam*, ut ait Duretus, *systrophem reprimendo, factam exolvendo*; denique *concitatum rheuma inhibendo*, & *consistens vacuando*; ita sanguis per tussim in eodem morbo ejectio gravissimo extat periculo, juxta illud in Coac. *Quicumque spu- mantem expuunt sanguinem, dextroque laborant hypochondrio, à jecore spuunt, multique intereunt*. Tunc enim pessima conficitur epigenesis, geminatâ affectione, persistente foco primigenii morbi; afflicto simul pulmone, apertoque indebitæ vacationis loco. Alibi Còus fluere sanguinem recto itinere commendavit, contrario verò culpavit; docens ipse quid nam per contrarium intelligat: scilicet, *Liene grandiore* (seu inflammato) *fluere sanguinem è nare dextra, affecto Hepate è sinistra*. Ita ad Hepaticam recreandam phlegmonem sanguis à dextra nare, servatâ nempe Hippocraticâ vasorum rectitudine, effundi debet. Cæterum in eodem textu adjicit Hippocrates indicia humorum fursùm tendentium, undè fluxus sanguinis naribus imminentis prædictiones eliciantur: Videlicet capitis dolorem, subitamque oculorum veluti hebetationem: *Sed tum sanguinis eruptio expectari debet, quum interrogati, aut caput dolere, aut oculos caligare fatentur*. Addit insuper quibus hominibus utiles hujusmodi sanguinis effusiones frequentiores extant: *Magis tamen in junioribus quinto & trigesimo anno sanguinis flures expectare oportet*. Addit Duretus in Comment. ad Coac. *Inflammato hepate quò citius venit liberalis hæmorrhagia, eò res agri melius eunt*. Huc quoque referri debet sensus illè Hippocraticus: *Icterus jecoris oppressione natus accedente hæmorrhagiâ deletur*. Quippe Còus oppressionem illam verè inflammatoriam esse intelligit: Elucetque per praxim, regium morbum in Hepatis inflammatione erumpentem largâ sanguinis missione sublevari. Ita hæmorrhagiâ superveniens sanguinis missionem facîle supplet. Sed magis super hâc re perspicuum extat Senis in Coacis

judicium : Hypochondriorum , Hepatis , Cordis , partiumque umbilico circumpositarum dolores excluso sanguine periculo defunguntur , non excluso , intereunt. Dolores hîc aliisque locis pro veris inflammationibus recipit.

Qua alvi,
aut urina
excretiones
in acutis bilio-
sis, atque
hepatis in-
flammationibus perni-
ciosa sint.

XV. Concernere quoque Hepaticæ inflammationis prognosim Hippocratica illa in Prorrethicis sententia videtur : *In acutis biliosis albicantes , spumose , & pericholæ dejectiones , male : Male quoque & urina hujusmodi, an & his jecur dolorosum.* Cum enim Hippocrates arguere morbum ad concoctionem non adhuc perductum intendat, ab urinis in hoc albicantibus coercitum in viscere peccantem indicari succum intelligit , à spumosis acerbiorum ejusdem effervescentiam , à pericholis verò multam ejusdem noxii , ac palantis humoris copiam. Quippe pericholum ex Galeno significat superfluum biliosum , & tenue. Quam ob rem ut de his urinis Hippocrates malum in acutis biliosis , sive hepaticis præsignat , ita ex una earumdemmet urinarum inspectione biliosorum, sive hepaticorum morborum acutam indolem explorari posse , atque manifestari declarat Aphor. XXXII. Sect. VII. *Quibus autem in urinis biliosa sedimina supernè tenuiora sunt , acutum morbum significant.* Namque in hujusmodi urinis bilis non adhuc concocta , seu re-collecta apparet , sed adhuc per sanguinem subtilius dispersa ; quæ totam ideo volantis sulphuris conditionem participans sursum attollitur ; hinc neque multa , neque crassa , neque nimium oleosa esse deprehenditur ; undè ut morbi brevitatem , ita & acuties , ut dicitur , emanat. Quod de urinalibus dictum est , id pariter de alvinis ab Hippocrate memoratis dejectionibus intelligendum superest. Imo ex Practicorum omnium observatione quilibet alvi fluxus , hepatis Phlegmoni conjunctus lethalis est , aut saltem admodum perniciosus , nisi diebus decretoriis contingens materiam , quam excernit , concoctam præ se ferat. Quod etiam alio textu indicare Senem voluisse , superius perspeximus.

XVI. Deni-

XVI. Demique: *in hepatis inflammatione singultus malum.* Hipp. Aphor. XVII. Sect. VII. Ingens siquidem, & ferè totum viscus obsidens Hepatis Phlegmon est, quæ ventriculum premat adeo, & veluti strangulet, ut queat in hujusmodi convulsionis speciem adigere. Ita Galenus in hujus Aphorismi Commentario subjungit: *Singultus Hepati inflammationem patienti dicitur supervenire, non semper, neque quomolibet patiente, sed quando ad magnitudinem attollitur, fervente inflammatione, in quo fervore stomachus ad compassionem trahitur, nonnunquam communium nervorum ratione. Quare tunc solum compassio fit stomacho ad hepar, quum inflammatio & maxima, & pessima fuerit.*

Maxima
Hepatis
Phlegmonem
singultus co-
mitatur.

XVII. Causam hepaticæ phlegmonis repetendam esse à fervidioris sanguinis, atque in hoc viscus impetuosius irruentis, minorumque ejusdem meatuum ordinem turbantis collectione, affusione, atque stasi, aut saltem notabili retardatione eo liberius existimamus, quò cum Phlegmone communis sit visceribus aliis, omnibusque humani corporis parenchymatosis, aut muscularibus affectio, à communi seu partes omnes æquè irrigante liquido, quod quidem ipse sanguis est, potius quàm à speciali, seu bile, deducenda esse videtur. Sed partium hominis inflammationis modus, & ratio Medicorum scholis tam sunt vulgaria, & comperta, ut nos, post aliqua super hac re in superiori hujus Historiæ parte vellicata, in hac tertia unam praxim amplectentes, Theorico hoc opere disputantium otis, & tricis dimisso, hujus morbi, aliorumque hepatis diagnosim, prognosim, & curationem ex instituto aggredi, seduloque prosequi dumtaxat intendamus. Id unum annotare juvabit, internas hepaticæ inflammationis Causas ab externis, & procatharticis excitari, & disponi interdum plurimum posse; ut à contusione regioni hepatis inflicta, casu ab alto in hypochondrium dextrum, & similibus.

Causa Hepa-
tica Phleg-
monis con-
juncta non
tantum à
stasi sangui-
nis, sed à
vehementi
suscepto fer-
voris motu
est deducen-
da.

XVIII. Quod

Curatio, qua
in Hepatis
Phlegmone
atque Erysi-
pelate, præ-
cipue spurio,
eadem vide-
tur, quomodo
sit dirigenda
quoad san-
guinis mis-
sionem.

XVIII. Quod igitur spectat ad Hepatis Phlegmonis, atque Erysipelatis mixti, seu phlegmonosi curationem (in utroque enim morbo medendi scopus eodem plerumque recidit) eò sanè dirigenda ista erit, ut prius impediatur inflammationis incrementum; quâ obtentâ re, ad eandem indè minuendam, & tandem resolvendam progressio instituat. Cum itaque ab irrumpente vehementer in hepar sanguine, copiosius hinc aggesto, atque in tumultuariam effervescentiam concitato, Phlegmone ortum ducat; Est hic decubitus impediendus, frenandus saltem, atque attenuandus, sanguinem liberaliter evacuando, in alias, easque distantias partes per revulsionem avertendo, atque insuper effusum in viscere sensim ab eodem derivando, lateralibus hujus retardati liquoris pressionibus unâ cum mole imminutis; ut tandem liber in parte, per ablata hujusmodi pressionum obstacula, liquidorum omnium fluxus & refluxus reparetur, & revocetur; seu, ut dicebat præceptor, strictum ab inflammatione productum relaxetur. Celebranda igitur est, ac largè repetenda Phlebotomia, ratione evacuationis, revocationis ad oppositam, aut valdè longinquam partem, aut derivationis à viscere: in quibus quidem adimplendis indicationibus rectus, atque expeditus ordo adhibendus est; prius basilicam dextram aperiendo, & sanguinis copiam, affectionis magnitudini, ægri viribus, & constitutioni non imparem, detrahendo. Secunda indè saphena, si in muliere cum non liberis mensibus emergat morbus: Hemorrhoides post hinc uberrimè aperiendæ: Quod quidem præsidii genus, quidquid objiciant circulationis leges, hepatis evacuationem propius respicere videtur, cum à Galeno in Comment. Aphor. XII. Sect. VI., instituto hemorrhoidum sermone, hoc posterorum memoriæ traditum legatur. *Si quis hoc ei intercludat iter (seu hepatis se se vacuandi per hemorrhoides libertatem adimat (simul duritiem in Hepate facit, simul multitudine gravat, ac crassitie.* Aëtius tetrabib. 2. serm. 2. cap. 3. non tantum primo, & secundo

secundo die venam secari jubet, sed & septimo, si dolor ex inflammatione adhuc vigeat, & vires ferant. Imò plerique antiquorum in maxima inflammatione etiam usque ad Leipothymiam sanguinem educebant. Nec certè, ob memoratas rationes, missione sanguinis ex variis corporis partibus elicienda, expeditius in hoc affectu præsidium esse posset: Cætera enim principem curationis scopum non attingunt. Galenus in inflammatoriis hepatis doloribus salvatellæ dextræ sectionem valdè etiam proficere *lib. de anat. vivor.* author est; ubi etiam ad antiquos hujus visceris dolores ab arteriæ manus sectione mirabile juvamen pollicetur. Præmissâ hâc sanguinis ex majoribus venis liberali evacuatione, cucurbitulis quoque, cum scarificatione uti licet, vel ad coxas, & crura revulsionis studio, vel ad dorsum, & lumbos in aliquam ineundam derivationem admotis. Cavendum verò ne quum Phlebotomiæ usu hæmorrhagiam narium, quam remotam censemus, supplere conamur, eandem, quæ revera sit proxima, importunè, ac perniciosè subtrahamus. Conducet ergo imminuentis hæmorrhagiæ narium indicia diligenter à Galeno prædiscere. *lib. 3. de cris. aliisque locis.*

XIX. Cathartica, vel leviora, ante septimam, atque ante declinationem morbi angue pejus fugienda veniunt; cum ex superius allegatis, in hoc morbo alvinæ omnes evacuationes perniciem afferant. Interea oleosa plurima purgantium vices supplere poterunt, si cum aliqua primarum, ut dicitur, viarum expurgatione inflammatoriam visceris tensionem laxari oporteat. In hunc sensum dulcium amygdalarum, aut papaverum, aut seminum melonum, aut lini olea revocamus. Clysteres; hosque frequentes purgantibus subrogari pariter expediet, sed vix emollientes, & lotorios, ne quælibet stimuli vel pusilla ratio ad usque inflammata partem per tunicarum, aut vasorum continuitatem, cum non levi incommodo traduci queat. Quod si, febre cum inflammatione deservente, lene aliquod per alvum solvens remedium

*Quomodo
præterea quò
ad alia re-
media.*

exigi post septimam videatur, id certè à sero lactis cum tartari cremore, à beta, viola, mercuriali, à cassia, epyrhimo, polipodio, elect. diaprunis, aut similibus modestè parandum erit. Topica vel in principio, vel in progressu inflammatorii morbi, hepatis regioni adhibita, quæ discutientia, repellentia, resolventia, aut etiam diaphoretica dicuntur plurimam semper mihi suspicionem fecere: Quandoquidem actuosum quodlibet, ut ut exterius applicitum, hepatis Phlegmoni irritamento esse, aut saltem tenuiores substantias, tenacioribus indè magis hærentibus redditis, dissipare fortasse potest: Ableganda igitur non minùs sunt propriè refrigerantia, & pacantia, quæ inflammatos interdum succos mortiferè indurant, & fixant. Cavendum enim est, ne nimium in hepatis Phlegmone exterius, aut interius, aut utroque modo perfrigerando, humores cogas, atque ut ait expertissimus Duretus, à *nimum stupefacta inflammatione scirrhus fundamenta extruas*. Actu frigida, tametsi Erysipelas, aut insignis fervor debacchetur, nunquam admovenda sunt. Repellentibus verò, non calidè, non frigidè; sed tepidè admotis, ac sæpius renovatis, in Hepatis erysipellate interdum uti licet. Emollientia igitur, blandèque laxantia, externè, internèque, calidiusculè ut dicitur, aut etiam tepidè duntaxat in hujus morbi vigore usurpabimus. Diaphoretica & Diuretica ob metum vehementioris excitandæ turbationis, cautè plerumque in hoc morbo declinabimus, licèt per spontaneum interdum, atque decretorium sudorem liberari affectionem, aut per faciliores urinas in progressu sublevari posse, perspectum sit. Leviora in contumaci vigilia, aut acerbiori dolore, aut utrisque, admittuntur paregorica. Denique Galenus method. med. lib. X. cap. V. in Hepatis, & Ventriculi phlegmone tenuissimum victum, imo penè nullum imperat: *Nam quod ad phlegmonem, quæ in his est partibus spectat, minimè planè est cibandum*. Cæterùm, dictante Sennerto, tutissimum est, ut sine suppuratione Hepatis inflammatio curetur. Si tamen præcaveri suppu-
ratio

ratio non possit, danda opera, ut quàm citissimè perficiatur, & quantum fieri potest curetur.

Atque pensum hîc meum absolvisse videor super naturâ, causis, diagnosi, prognosi, & curatione hepaticæ phlegmonis. Nunc gradum faciam ad Hepatis abscessum, atque ad ulcus, ex abscessu frequenter superstes.

DE HEPATIS, ABSCESSU, ATQUE ULCERE;

Et Primum de Abscessu.

Canones Practici.

I. **I**N Hepatici Abscessus Examen introduci vix posse videmur, nisi quædam prius in genere de suppurationis natura hîc loci afferamus, aut, si mavis, super similibus in Tractu Pleuritidis Can. XXVIII. superius adductis disquisitionibus, repetamus. Et sanè bina sunt primaria suppurationum genera: Primum, & simplex suppurationis genus illud est, in quo concrescibilis aliqua simulque hæterogeneis plurimis particulis imbuta lymphatica substantia à sanguine, alicubi viscerum retardato, expressa; aut spontè sejuncta, tum per ipsius sanguinis, tum recipientis visceris calorem, atque insuper insensilium propriarum particularum vividum quendam, & adauctum motum, novam consistentiæ habitudinem, seu veluti cocturam quandam consequitur, ut in quoddam speciale liquamen, nonnihil in se consistens faceffat. Neque indè cocta hæc, atque leviusculè crassescens lymphæ confluit

Quid sit suppuratio in genere; quod ejus generis; & quomodo Abscessus, seu Apostema à simplici suppuratione distinguatur: Quid tandè empyema, atque quot sensibus accipiatur.

in determinatam sedem, in eâque totum colligitur; sed ubique fuit hoc modo mutatum, ibidem manet; fit jam in vasis, aut quibuslibet vasorum, aut viscerum spatiis dispersum. Atque cum liquidum hujusmodi, internis suis ab hujusmodi coctione refrectis motibus, quendam pariter in componentibus particulis nisum, & impetum, nonnihil prius solidorum prementibus viribus reluctantem deperdiderit; & hoc pacto iisdem pressionibus facilius, docilius, atque ductilius reddatur, ut ad secretiones, atque excretiones paratum magis se præbeat; Hinc hujusmodi suppurationis, seu potius coctionis genus à pepasmi legibus non multum recedit: Neque emergens ab ipsa liquamen pus verum dicendum est, sed puriforme. Alterum verò suppurationis genus pus verum producit; in qua nempe actuosissimæ, fervidissimæque lympharum copiarum ab inflammato, congestoque in tumorem cruore expeditæ, & sejunctæ, in communem excavatum sinum turmatim irruunt, ibidemque recoctæ vertuntur in pus legitimum, procreans hoc pacto abscessum, folliculato tuberculo coacervatum, atque collectum. Prima igitur, seu simplex, & diffusa, seu disgregata suppuratio, neque circumscriptam, seu folliculatam congestionem secum ducit; neque inde superstes ulcus in loco suppurationis relinquit; cum nullam revera solidis, seu continentibus partibus sensibilem alterationem inducat: atque illa suppuratio est, quæ in plurimis pulmonum rheumaticis, aut etiam calidioribus contingit affectibus. Altera verò ex adverso sinum effodiens, apostematica, folliculata, atque inde ulcerosa, hepaticas phlegmones, non bene judicatas, prosequitur, interdum & calidiores hepatitides, præcipuè autem exquisitas pulmonum inflammationes. Atque ut omnibus palam res sit, in his nos, aliisque omnibus neque per hylum ab Hippocratica abscedere doctrina, en utrumque suppurationis modum; in morbo pulmonis ab eodem lib. 1. de morbis egregiè, atque perspicuè descriptum: *Pulmonis inflammatio fit, cum commotam, & humectatam pituitam,*

& bilem propter calorem ex vicinis locis pulmo ad se traxerit, super ea, quæ jam in ipso existunt. Totum quidem corpus percalefacit, doloremque præcipuè dorso, lateribus, humeris, ac spine exhibet, cum nimium plurimam ad se humiditatem attrahat, hæque partes supra modum resiccantur, nimiumque incalescunt. Cum verò ad se traxerit, tumque bilis, tum pituita sedem in pulmone fixerit, putrescit, & in pus vertitur. Et siquidem præcipuis ad judicationem diebus putrefacta per sputum reddita fuerint, evadit ager. Si verò susceperit quæ per initia obvenerunt, aliaque præterea accesserint, & neque putrefacta per sputum rejiciat, præ copia supervenientium plexumque moriuntur. Est igitur salutaris, dispersaque sputi concoctio, seu veluti Pepasmus, quàm hîc loci describit Senex; qui postea ibidem in malam, seu coacervatam indicandam suppurationem progreditur: Quòd si ad duos, & viginti dies perveniunt, febrisque dimittit, neque in his per sputum repurgati fuerint, purulenti evadunt. Jam ergo utramque suppurationem valdè discriminat. Ad finem ejusdem libri primam denuo, seu salutarem suppurationem commemorat: Ex morbo autem laterali intereunt, cum circa exordia copiosa quidem pituita, & bilis ad latus impacta fuerit, quam neque spuendo propter copiam, neque putrefaciendo superare possit. His itaque Hippocraticis textibus commentati sunt Interpretes optimi primam suppurationis speciem confici à virtute naturalis caloris, alteram verò à violentia febrili. Cæterum ad primæ suppurationis censum reduci debere Aphorismum xxxviii. Sect. VII. *Catarrhi prolabentes in superiorem alvum viginti diebus suppurant*, luce præclarius videtur; cum certè Catarrhalium hujusmodi distillationum suppuratio, quæ ut plurimum salutaris est, neque ullam pulmonis substantiæ læsionem inducat, in majori duntaxat defluxis feris consistentiâ conciliandâ, undè major spuendi, seu ut dicitur expectorandi facultas suboritur, subflavoque inducendo colore expleatur. Hoc adhuc ab Hippocraticis colligamus oraculis; cruorem ipsum non esse suppurationis materiam, seu sanguinis purpuream partem in pus

haud quaquam converti posse ; sed ipsam duntaxat nutritiam, albidamque lympham utramque suppurationis speciem adimplere. Hoc enim non obscure docet Hippocrates in progn. *Abscessus autem sunt, hi quidem ad infernas regiones, quibus aliquid phlegmatis circa hypochondria sit.* Quemadmodum igitur probum pus semper albescere oportet ; ita quomodocunque alicubi à cursu suo retardetur cruor, aut partibus hæreat, aut etiam cum febrili æstu, & qualicunque effervescentiæ gradu extra vasa subsideat, nunquam in albam habitudinem, sive propriè in suppuratum faceffit: Ut in aneurismate, in ecchymosi, aliave omnimodâ quâlibet per vulnus, dieresim, aut rixim, sanguinis intra, aut extra canales stasi videre est : Quibus quidem casibus putrescere sanguis, atque in foetidissimum sanguinis cadaver migrare non verò suppurari perspicitur. Demùm Empyema, quæ vox sæpè apud Hippocratem, aliisque antiquos sonat suppurationem in genere ; interdum determinatam in pulmonibus puris collectionem, sive pulmonis vomicam; frequenter verò puris collectionem in cavitate Thoracis extra pulmonum substantiam significat ; in peculiaribus Hepatis suppurationibus ab eodem Hippocrate, aliisque, modò pro simplici, seu primi generis suppuratione desumitur ; modò pro folliculato ejusdem visceris abscessu ; interdum etiam pro rupto ejusdem teterrimo, quod phlegmone produxerit, apostemate, cum visceris superstitie ulcere, seu toto illo relicto sinu, qui fuerat ab abscessu excavatus, atque insuper exundatione puris à loco rupturæ in abdominis Cavum, undè contenta viscera obruantur, ac præfocentur : Quem tertium esse, nec non gravissimum suppurationum gradum superius in cit. biliosæ pleuritidis loco declaravimus. Postremum hoc cæterùm hepatici empyematis genus annuimus in hujus Historiæ parte II. Cap. V.

*Suppuratio
hepatis in
folliculatum
semper abs-*

II. Ut modò ad hepatis suppurationes descendamus : id è limine animadvertendum est, hæc alteram ex descriptis speciebus, seu deteriorem, continuò adimplere ; cum revera deside-

desiderentur in jecore liberæ, amplæque excretoriæ fistulæ, à visceris substantia veluti sejunctæ, ut in pulmone bronchiales, & tracheales sunt; in quas quidem celeriter defluant catarrhales succi, atque indè per primam suppurationis speciem, & naturalem veluti calorem concocti, subactique, arbitrario postea spuendi nisu commodè, citòque foras expelluntur. Sed hujusmodi in hepate succorum mutationes in ipsismet sanguiducis vasis, ab acerrimo inflammatorio calore obeuntur: hinc citæ ejectioni non facilia colliguntur invicem, & morâ acriora reddita, atque *ulcerifica*, ut ait Duretus, hujusmodi liquamina, exercitis vectis, & cunei viribus, scindere substantiam visceris valent, & rodere; atque in insculptam hoc pacto determinatam sedem exundando, demùm in folliculatum abscessum converti. Quod adeò verum est; ut quoties ab authorum quolibet hepatis suppuratio pertractatur, sub abscessus in distinctum tumorem elevati specie describitur; tum semper mortiferâ, aut saltem pessimâ prognosi obsignatur. Revera confecto hepatis abscessu de agrotante actum est; nisi fortè fortunâ adeò foras ab hepatis substantia vertatur suppuratus folliculus, ut ipsam hepatis tunicam potissimùm occupans, se facilem præbere queat exitui, per tentatam à Chirurghi opere apertionem disposito; vel adeo versùs biliaria ad intestinum emissaria erumpat, ut per eadem ad alvum expurgari possit. Interea in his adhuc casibus suo non caret discrimine hepatica suppuratio, tum ratione superstitis ulceris, tum etiam virulentia collectæ puris, ut inferiùs liquebit. Cæterùm tempora productionis hepatici abscessus duo sunt; nempe in exquisita ejus inflammatione; seu plegmonosâ aut mixtâ Erysipelatosa; (quam ultimam, hepatis ignem sacrum appellat Galenus in Comment. 2. Progn. Hipp. 66.) vel in minus exquisita, qualis esse potest hepatitis calida, aut mixta, quas quidem inferiùs describemus. In prima post diem vigesimum abscessus conficitur: In altera post sexagesimum: Quæ quidem

cessum facessit: Quomodo conficiatur: Quando lethalis extet; & quando aliquam curationis spem faciat: & quanam sint tempora hujusmodi suppurationis.

dem tempora à binis Hippocratis textibus in Coacis eliciuntur : *At verò tumor in Hypochondriis durus quidem , ac dolorificus pessimus est , si sit ab omnibus partibus. Eorum verò qui sunt unius partis , periculi minus habet qui è sinistris assurgit. Verùm tumores hujusmodi , per initia quidem nati , mortem in propinquo esse denunciant : sin autem vigesimum superent , manente febre , in suppurationem vertuntur. . . . Tumores autem molles , ac doloris expertes , seriores illi quidem adferunt crises : At minus aliis periculosi. Sed hi quoque tamen sexagesimum diem superantes , manente febre , in suppuratum vertuntur.*

Signa inflammationis hepatis, qua suppurari debet; & signa jam suppurantis; & qua jam suppuratam esse declarant: Quæ insuper ruptionem abscessus indicant; Quæ lethalem eventum; quæ spem adhuc aliquam pollicentur: Quæ proximam mortem denunciant: Quæ tandem gibbam, aut cavam partem affe-ctam esse indicant.

III. Signa igitur futuri hepatici abscessus deducuntur à contumacia inflammationis , quæ quidem remediis non cedat, suisque , ut supra , criticorum dierum circuitibus nulla , quæ morbo par sit , judicatione excipiatur. Ad imminentem jecoris prælagendum abscessum valere etiam suo modo potest illud Hippocratis in Progn. : *Qui multo tempore tennes , & crudas mingunt urinas , si cætera ut evasuris adsint signa , hos ad regiones infra septum transversum abscessum expectare oportet.* Hoc revera signum semperprehendimus in his , qui à capitis vulnere , post aliquot dies , interdum & plures , imo aliquando post sexagesimum , octuagesimum , interdum & centesimum diem , hepatis tandem abscessu corripuntur: quos cum in altera hujus historiae parte fol. 146. jam satis memoraverimus , & causas purulente translationis à capite ad hepar pro instituti ratione tetigerimus , hîc jam prætermittere liceat ; hoc solum notabili adjecto , quod mihi non ita pridem referebat Præclarissimus Collega Antonius Reina: Plurimos nempe ad celebrem per omnes ætates Urbis nostræ Taurinensis Obsidionem Capite percussos in Nosocomiis Militum mortiferis hujusmodi hepaticis abscessibus tentatos ipsum observasse , quorum qui per lapides bellicis tormentis , mortariis dictis , projectos , sævis quidem , sed citra lacerationem , contusionibus afficiebantur , citius , non superato acuti morbi stadio , in hosce abscessus , præcipitemque inde necem stupidi,

ac

ac veterinosi ruebant.

Signa jam suppurantis inflammationis à subita gravativi consueti doloris in pulsativum, simulque puncturium mutatione, tum à febris, aliorumque symptomatum ingravescenti extemplo habitudine eruenda profectò sunt. Quippe ex Hippocratis oraculo. *Dum pus conficitur, dolores & febres accidunt, quàm in confecto*; sive omnia exacerbantur. Accedunt rigores nullo ordine invadentes, & crebrò citati, caloris irregularibus pariter exacerbationibus excepti; quæ in deteriori abscessu multò magis inæquales sunt, & abruptæ. Ita ex Hippocrate: *In his morbis frequens sudatiuncula, & horroris vicissitudo pessima.* Concoctum jam, sive confectum abscessum indicat doloris mutatio: *Si dixerit pro dolore sibi inesse pondus in loco, quo dolore afficiebatur: Hæc enim fiunt inter initia supurationum.* Hipp. in toties cit. Progn. Febris insuper aliorumque symptomatum imminutio quidem, sed viribus enormiter debilioribus relictis, cum frequenti, languidoque, interdum & intermittenti pulsu, faciliq; & frequenti animi defectio-
ne. Quandoquidem Phlegmoni succedens suppuratio consideratur ab antiquis veluti cinis, flammæ atque igni superstes. Tum non in pulmone solùm, sed & in hepate, aliisque visceribus, expletam confectamque jam fuisse suppurationem declarare possunt adducta illa à Coo in Prognost. indicia: *Principio si febris non dimittit, sed interdum tenuior, noctu vehementior est: si sudores multi superveniunt, cum sicca, & inani tusi: si oculi cavi redduntur, maxillæ verò ruborem trahunt, & ungues manuum curvantur; digiti verò potissimum summi cale-
scunt, atque in pedibus tumores fiunt, neque cibum appetunt.* Ruptionem abscessus comitantur creberrima Leypothimia, frequensque syncope; præcipuè si pus in abdominis cavum effundatur; quæ quidem effusio semper lethalis est. Signa demum, quæ aliquam de bono abscessus eventu possent nobis spem facere, sunt si febris, annotante Præceptore, “ eodem
“ die post abscessus eruptionem dimitteret, ac cibum æger
“ citiùs appeteret, & siti liberatus esset, & venter confi-
stentia,

“ stentia dejiceret ; & pus album , leve , & concolor esset
 “ ac vacans pituitâ , seu crudâ & mucosâ substantiâ (de quo
 quidem in sequenti Can. V. dicemus) aut saltem ad hæc
 “ proxima fieret accessio “ Signa verò deterrima si febris non
 “ desierit , aut cùm videatur deferere , denuò recalescens in-
 “ notescat ; sitiant , neque cibum appetant , &c. aliaque
 adhuc magis perspicua in sequenti paragrapho exhibenda. Morti
 proximis à rupto abscessu , venter intumescit cum lurida , &
 hypocratica facie , atque insigni virium prostratione ; & fri-
 gidum sudant circa collum , & faciem , atque animo linqun-
 tur : *Qui hepatis abscessu laborantes colorem habent ictericum , fe-
 brem continuam , inapetentiam , & nauseam , lethaliter decum-
 bunt.* Sennertus. An gibbam hepatis regionem , an concavam
 obsederit apostema , à signis præcedentis phlegmonis , quæ quò
 ad alterutram visceris partem superius discussimus , colligi tutò
 poterit. Hanc fortè disquisitionem concernit illud Hippo-
 cratis in Progn. : *Abscessus autem fiunt , hi quidem ad infernas
 regiones , quibus aliquid phlegmatis circa Hypochondria adsit : Illi
 verò ad supernas , quibus hypochondrium quidem flacidum , ac do-
 loris expers persistit ; difficultas autem spirandi aliquo tempore fa-
 cta , desierit sine occasione alia.*

Prognosis
 abscessuum
 Hepatis, ex
 situ, & figura
 tumoris ab
 Hippocrate
 elicitæ.

I V. Prognosim abscessus Hepatis à divino pariter Sene-
 hauriendam ducimus : *Suppuratorum quæ sursum sunt* (scilicet
 ex mente Dureti quæ stabulantur in suprema regione abdo-
 minis) *alia quidem in tunica stabulantur collecta ; alia verò sunt
 in visceribus ipsis diffusa.* Abscessuum prædictorum lethales sunt
 illi , qui pus effundunt intrò. Reliquorum autem suppuratorum ,
 quæ foras abscedunt , principem locum obtinet , quod ut brevissimè ,
 sic acutissimè est collectum. Idest ex mente præclariorum In-
 terpretum , Lethales illi abscessus sunt , qui pus intrò in vis-
 ceris penitiora effundunt , pus scilicet à natura non recolle-
 ctum , neque secretum , sed propriâ erodendi vi novas sibi
 vias , atque cuniculos excudens , & amplificans. Quod qui-
 dem magna ejusdem visceris læsio , atque unitatis solutio con-
 sequitur,

sequitur, novaque succrescit offensio partium, virulentam potius, quam purulentam materiam excipientium. Hoc apostematis genus hepatis Vomicam medentes plerumque nominant, quæ interdum brevis, frequentius diuturnior morbus est, at semper incurabilis; tum quia penitiores cuniculos agens, visceris functionem insigniter lædere, aut integrè etiam delere potest; tum quia abditum purulentum phyma est, cujus puris lentor, atque ingens crassities salutarem vacationem, ejusque penitior stabulatio vacationis aditum invenire non potest. Suppurata verò, quæ foras abscedunt, brevissimæque circumscribuntur sede, & veluti in mucronem fastigiantur, salutem portendunt; tum quia minimam, aut modicam indicant substantiæ visceris læsionem, atque rupturam; tum præcipuè validas naturæ vires vegetosque ad expellendum conatus, adhæc meatuum libertatem, & puris exquisitè mitigatam substantiam denunciant. Ita Cous in I. Prognost. Phymata viscerum in hypochondriis degentium suppurata rememorans, superiora repetit, aliisque superadditis confirmat: *Suppurationum observatio sic accipienda est. Earum omnium, quæ in exteriorem partem erumpunt, optima sunt parvæ admodum, eminentes, atque in acutum fastigiata: pessimæ verò sunt, quæ magnæ, latæque, minimèque in mucronem contractæ.*

V. Interea licèt ad hepatis exteriora, seu juxta ipsam succingentem tunicam, purulenta colligatur materies, atque fastigiatum tumorem, modicâ quidem sede comprehensum protendat, periculo tamen non vacabit, nisi eas ulterius attingat conditiones, quas Senex in iisdem prognosticis proponit: *Pus autem optimum est, si candidum, æquale, leveque, & quàm minimè fætidum est: Maximè verò contrarium huic, deterrimum est.* Fætidum enim corruptionis, non concoctionis indicium est: Quod etiam de colore, & consistentia dicendum; Cùm quò magis puris color à naturali nutritii succi candore, densiorque consistentia ab æquali levitate recedunt, eò majorem virulentiam testentur. In aliis autem Coacarum, atque Aphorismorum

Prognosis abscessuum hepatis per eundem Hippocratem à puris colore, odore, consistentia, & locis, per quæ idem excernitur, tum de variis ejusdem quæ apud auctores detantantur, excretionum viis.

rismorum locis adjicitur „ Pus nec debere esse fervidum , neque „ subcruentum , neque canosum , neque crassius , neque tan- „ dem ab ipso vulnerarium specillum , quod in sinum perusti „ lateris immittitur , colorari oportere „ Ita etiam in Coacis: *Quibus inusto hepate velut amurca prodit , lethale.* Hosque ho- mines ex cruditate , & malitia suppuratæ materiæ in corru- ptione , & marasmo finire vitam omnibus certè compertum est : Fieri enim non potest , quin jecoris substantia intimiùs computruerit , si pus exinde prodiens putridum , simulque in- star *amurca* , seu fecis olei , concretum appareat. Pravum itaque , & deleterium collectum humorem , tum sordidum , aut malignum ulcus hujusmodi excretio depromit. Eodem pacto , quantumvis abscessus hepatis , si cavam occupet par- tem , rumpi in biliares ductus , iisque mediis , non nimium grandi relictâ in viscere plagâ , per intestina expurgari queat ; ut huc referri videatur illud Hippocratis in Prognost. : *Quacun- que verò intro rumpuntur , optimæ sunt , si cum exteriori sede nihil communicant , sed adductæ sunt , nec dolent , & omnis ex- terior locus unicolor apparet ;* atque simile aliud in Coacis: *Eo- rum , quæ introrsum feruntur optimum quidem illud , quod neque dolore , neque tumore , neque colore conspicuum quicquam foris exhibet , contrarium verò pessimum ,* deductâ siquidem spe vel à nullo , vel à minimo relictò cuniculoso ulcere , vel saltem à tali , cujus curatio duce Naturâ suscipi , nec non absolvi va- leat ; Multum adhuc discriminis in eodem itinere , iisque- met locis , per quæ derivantur suppurata , expectan- dum esse videtur „ Quoniam , ut ait Galenus in hujusce „ textus Commentario , excretum per intestina pus mordet , „ & conserpit ea , difficultatemque committit intestinorum „ Quæ indè , ut addit Duretus , *Fractis jam viribus immisericorditer agrum exercet.* Ita ait Avicenna 3. Canon. fen. 14. tract. 3. Cap. 2. *Scias quòd , cum apostemati hepatis associatur ventris solutio , est mortale.* Jam ergo quamlibet Hepaticam suppurationem malâ prognosi excipiendam esse , cum ipso Hippocrate in iisdem Coacis.

Coacis concludamus: *Quibus Hypochondriorum mala suppurant, pestiferum.* De cætero pus in hepatis suppuratione confectum nunc per urinam excerni, ut legitur apud Salmuthum; nunc per vomitum ejici, ut apud eundem, & Fernelium; nunc per sputum, & tussim, ut apud Schneiderum, Frider. Hoffmannum, & Erastum; aut tandem per metasthasin fuisse translatum in furas, aut decubuisse in articulos, ut placuit Schenckio, Bauhino, Jacotio, aliisque, in censum rariorum naturæ operum reponimus. Denique totum hepatis parenchyma suppuratum interdum iri, quod à laudato Schenckio narratur, id mihi hucusque & præcessoribus, invisum est. Id fanè apud antiquos omnes indubitatum videbatur, abscessum gibbæ hepatis per renes, atque urinarias semitas, cavæ vero per intestina, & sedes expurgari frequenter posse.

VI. Quotiescunque igitur systrophica Hepatis phlegmone, aut etiam calidior hepatitis, suppurati mutationem acceperit, cum aliqua salutis spe res ire poterunt, si naturæ potentiâ purulenta phymata ad vacuationem puris intrò, aut foras regantur, maloque erunt loco quando virulenti puris dominatu sursum, deorsum, foras, introrsum vacuationis inclinatio fiat; ut revera frequentius in hepatis abscessu contingit. Si igitur præcaveri suppuratio non possit, danda saltem opera, ut, dum vires valent, quàm citissimè perficiatur, atque suppurata materies promptius è corpore extrudatur. Externis auxiliis solummodo opus est, cum pus ad gibbam hepatis superficiem, veluti ad ejusdem tunicam, collectum, præstitâ à Chirurgo aperturâ, foras è corpore educi potest. Antiquorum mos aperiendi latus per unctionem, qualem describit Hippocrates *de intern. affect.* ut immanior, ita nobis obsoletus est. Cum ægro optimè agitur, si per communia *pyrotica*, atque *escharotica*, seu per causticos, ut dicitur, lapides, aut etiam breviori manu per scalpelli aciem, apertionem molimur. Si benè cesserit, puro, alboque effluxo pure, hepate hoc pacto expurgato, atque per injectiones detergentium, & balsamicarum.

Curatio abscessus hepatis, tum interna, tum qua interna variis effluxuri puris itineribus accommodatur.

sanicarum tincturarum omni procuratâ noxii succi expressione , & substantiæ visceris consolidatione , reliquum vitæ tempus æger sine labore exiget : Sed si foetidum , saniosum , amurcosum pus , aut aliter , ut suprâ , defficiens , pervicaciam sui , & plurimam visceris læsionem , atque corruptionem ostendat , nisi (ut memorato loco ait Hippocrates) *per alia remedia convalescat , consumptus perit.* Ita etiam declarat Aphor. XLVI. Sect. VII : *Quicumque suppurati uruntur , aut secantur , si purum fluxerit , & album , evadunt : si verò subcruentum , feculentum , aut foetidum , pereunt.* Sed alia illa remedia ab Hippocrate designata (quæ quidem interna esse intelligenda sunt) moventis naturæ inclinationibus erunt quàmmaximè concinnanda , atque quò illa vergat ducenda ; sine cujus nempe potenti molimine nihil erit proficuum expectandum. Ita si raptio purulenti ad intestina habeatur , plenaque ejusdem per sedes ejectio , nil erit certè innovandum , sed attemperantia dumtaxat , ad declinandam dysenteriam , adhibenda. Quòd si imperfectiùs evacuatio succedat , lotoriis ista clysteribus , blandèque abstersivis , cum furfurum , & hordei decoctionibus , melle rosaceo , & similibus , immixtis terebinthinatis , allicienda erit , & perficienda. Si renum meatibus puris demandetur expulsio , hi leniendi sunt , & blandè aperiendi cum seri lactis caprilli copiosis haustibus , emulsionibus semin. frigid. in aqua ononidis , malvæ , pariet. &c. aut si lentius habeatur excretio , lenibus , & balsamicis diureticis suaviter proritandi ; ut decoctionibus cicerum rubrorum , & stibii crudi , radic. aperit. terebinth. cyprio aut balsam. sulphur. terebinthinato , aut copaivæ balsamo (quod quidem tenuioris terebinthinæ genus est) aut tincturis succini , pareyre-bravæ , hiperici , juniper. aut camedr. &c. Juvat oximel vel simplex , vel diureticum : In primis blandè alvum laxantia , quæ propriis stimulis puris per urinas trajectus promovere etiam posse videntur.

Vomitus si fortè accederet purulentæ substantiæ , pinguibus , oleosis , aqueisque tepidulis promovendus , aut attem-

attemperandus. Pure à fïſſo, aut ex eſo hepatis corpore in abdominis Cavum exundante; obviaque viſcera indè inficiente, & corrumpente, atque ad ſphacelum promovente, uſui fuerat antiquis quædam uſtionis, aut para centeſis ſpecies, quam tamen, veluti ſemper inutilem prætereo. In quocunque horum caſuum hydromel plus, minùs medicatum conducit; atque vulneraria præcipuè, largis hauſtibus exhibenda. Hæc etiam, aut ſimilia vomicæ, ſeu penitioris abſceſſus curationem, ſi quæ erit, committere poterunt.

HISTORIÆ ABSCESSUM,

Et Vomicæ Hepatis.

ABſceſſus Hepatis ex vulnere ad hanc partem inflitcto, tum ex Capitis plaga cum pure ad hoc viſcus translato, aut ex diuturnis Chronicisq; morbis, progenitos ſuperiùs deſcripſimus in altera parte fol. 146, & ſequentibus. Suppurata ceterùm ex aliqua hepaticæ inflammationis ſpecie lethalia tubercula in hepate, & ab hepate producta memorat Hippocrates in Epidemiorum libro ultimo: *Cleotimo ſutori cum alvus diu liquida fuiſſet, & calor accidiffet circa hepatis regionem, tumor tuberculo ſimilis ad hypogaſtrium descendit, & alvus humectabatur, & alterum ipſi tuberculum circa ſuperiorem hepatis regionem ad hypochondrium exortum eſt. Mortuus eſt.*

Historia ſanati per lateris apertionem abſceſſus hepatis, nobis non ita pridem à doctiſſimo Doctore Laurentio Maſſâ Medico Caluſienſi communicata, Hæc eſt: “ Accerſitus „ anno 1720. Poſtr. Id. Januarii ad Dominicum Ferrerium, „ ann. 36. ætatem agentem, & ruſticis laboribus deditum, „ cum febre continuâ cum dolore gravativo in hypochondrio „ dextro „

„ dextro, in parte tamen posteriori ad costas mendosas deprehen-
 „ di correptum. Febris nocturno tempore suas habebat exacer-
 „ bationes. Diagnofis hujus affectus, etiamfi aliqua figna ab-
 „ effent, hepar inflammatione laborare, mihi fuit. Ter fe-
 „ ctâ venâ, fcilicet bis in brachio dextro, femel in pede,
 „ exhibitis refrigerantibus, & humectantibus hepar refpicien-
 „ tibus, morbus de fua feritate circa decimam octavam om-
 „ nino remittere videbatur. Elapfis circiter tribus menfibus,
 „ etiamfi patiens aliquâ frui valetudine videretur, de dolore
 „ tamen in dicta parte fixo conquerebatur. Febris veluti ha-
 „ bitualis eum exercebat. Tandem in marafmum deductus
 „ patiens meo confilio, pro fuæ faluti confulendo, D. Johan-
 „ nem Baptiftam Bertam, virum in Chirurgia, ac medendi
 „ dexteritate celeberrimi nominis vocavit. Quinam exitus
 „ hujus morbi, alioquin dubiæ aleæ fuerit, per descriptionem
 „ dicti D. Chirurgi, quam tibi lubenter mitto, dignofcere
 „ poteris &c.

Chirurgi fuper eadem Historia Epiftola.

„ Anno 1720. 9. Maii accitus fui ad Dominicum Fer-
 „ reriū Cuccliensem, juvenem agreftem, ætatis fuę ann.
 „ 36. circiter. Nudato hypochondrio dextro fitum doloris,
 „ quo affligebatur digitis mihi demonftrabat, mecum obser-
 „ vante D. Laurentio Maſſâ Doctore Medico, atque in Apol-
 „ linea facultate nemini fecundo, famigeratiſſimoque. Abſcef-
 „ ſus in dicto dextro hypochondrio profundius fitus detectus
 „ fuit à prægreſſa hepatitide, quâ is in particulari loco affli-
 „ ctus fuerat, & adhuc affligebatur. Ad foras educendam
 „ materiem requirebatur in dicta parte apertio, quam Cau-
 „ ſticis lapidibus faciendam delegi. Profundæ eſcharæ locum
 „ ſcalpello uſque ad cavitatem aperui; atque à ventris ſpecu,
 „ ut immiſſus ſtylus indicabat, effluxit purulenta materia.
 „ Eſcharæ

„ Escharæ lapsum unguentis suppurantibus acceleravi : Post
 „ cujus lapsum in foramen satis amplum digitum adegi ; &
 „ solutionem super hepatis gibbum tetigi , quæ rotunda erat
 „ ad Libræ Sabaudicæ magnitudinem in latitudine : In pro-
 „ funditate autem crassitiem digiti unius æquabat. In dies pure
 „ meliorem notam acquirente , spem concepi , ægrotantem
 „ nostrum fore salutem consequuturum , Hippocratis effato
 „ innixus : *Quibus hepar suppuratum aduritur , si pus purum*
 „ *effluxerit & album , evadunt ; in tunica iis pus continetur : si*
 „ *verò qualis amurca fluat , pereunt.* Consequutus est igitur
 „ ægrotans iste integram sanitatem circa finem Junii ejusdem
 „ anni &c. Illustrissimæ Dominationis tuæ addictissimus fa-
 „ mulus , Joannes Baptista Berta Montalengarum Chirurgus.
 Liceat hîc ergo animadvertere , hujusmodi abscessum esse il-
 lis accensendum , qui , ut superius dictabat Hippocrates , *in*
exteriolem partem erumpunt , parvi admodum atque eminentes ex-
tant ; ideoque eodem annotante *Coo optimi sunt , & sanabiles :*
 Tradit enim Chirurgus noster *solutionem ad hepatis gibbum ro-*
tundam fuisse , ad libræ Sabaudicæ magnitudinem in latitudine ; seu
vix ab binos transversos digitos latam.

Historiam aliam abscessûs hepatis , sed in lethum conversi ,
 cum epigenesi ad pulmones vide superius in II. Parte Cap. V.
 fol. 147. ex famigeratissimo Lentilio ; & aliam insuper ab eo-
 dem Authore indicatam in eadem parte fol. 190.

Vomica Hepatis lethalis.

Advena quidam , longis peregrinationibus attritus , habi-
 tuali febre jam dudum prehensus , cum macie , & dolore hy-
 pochondrii dextri , vehementiori demùm correptus febre in
 primarium Taurinense Nosocomium concedebat. Post ali-
 quot à decubitu dies fastigiatus subitò tumor ad idem hypo-
 chondrium apparuit , cum non obscuris confectæ suppurationis in-

diciis. Aperto per pyroticum tumore ingens deterioris puris copia erumpebat. Postridie mortuus est. In cadavere putridum, & ferè putridum totum hepar deprehendebatur; cujus gibbam signatim partem foras tandem erupti tumoris basis latè satis occupaverat, & recens quidem, sed insigniùs corruerat. Vomica hepatis à diuturnis latibulis ad exteriora visceris tandem porrecta, atque per novam corruptivam supurationem abrupta. Ex communicatione Cl. expertissimique D. Reina, ejusdem Nosocomii Primarii Medici, atque in Taurinensi Universitate Theorices Professoris.

ULCUS HEPATIS.

Canones Practici.

Natura hepatici ulceris.

I. **G** Raphicum est, quod à Fernelio Pathol. lib. VI. Cap. IV. prolatum legimus hepatici Ulceris judicium "Ulcus
" ex abscessu contractum perpetuò colluvie multâ sordescit,
" neque unquam potest sanescere. Jecoris enim solida sub-
" stantia spermatica quum sit, non magis quàm pulmonis
" reparari potest. Tum igitur vitiosa est sanguinis confectio;
" corpus non alitur, sed verè tabescit. Putrida, faniosa,
" & interdum cruenta est alvi dejectio, ac sæpè quasi ex
" cadavere facta colliquatio. Urina quoque sanie perfusa, aut
" si ea in abdominis spatium penetret, hydrops omnium gra-
" vissimus exoritur, qui & inguinum, pubisque gravitate, &
" manifesto tumore se prodit, siquidem vires tandiu persi-
" stant, quod certè vix unquam ulla observatio.

Ulcus hepatis duplex: alterum veluti acutum, ab abscessu contractum.

II. Sed duplex hepatis Ulcus est: Alterum, quod suppuratæ inflammationi succedit, pure Phlegmonis locum occupante, eumque, ac circumpositam visceris substantiam exedente: Alterum quod citra inflammationem, ortamque
ab

ab hac ipsa suppurationem , à virulento , causticoque per
 hepatis penetralia gliscente succo , in meracioris vini , aut
 aliâ quâlibet victus rationis intemperantiâ , in venerea , aut
 scorbutica lne , in hectica , aut phthifica febre , in calidiori,
 acriorique rheumatismo , in insensili transpiratione contuma-
 citer constipata , in acerrimæ bilis dyscrasia , aliisque tan-
 dem in casibus contrahitur. Primum velocius , & cum in-
 gentibus turbis producitur , jam ab ipso initio magnum , mul-
 tamque visceris partem occupans ; hinc acutius , periculosius ,
 & brevius , ut plurimum lethale : atque si diutius persistat ,
 in gangrænam , atque sphacelum degenerans.

*Alterum
 Chronicum,
 à diutina
 erosione.
 Viriusque
 eventus
 panduntur.
 Fragmina
 carnea, per
 alvum sæpè
 prodiisse vi-
 sa, haudqua-
 quam ab he-
 patici ulceris
 erosione repe-
 tenda sunt.*

Alterum clanculò , lentèque depascitur , principio exile, neque
 nisi post longum tempus increscens , majorem , quàm primum,
 salutis spem facit : Quod tamen si incuriosè habeatur , tan-
 dem in immedicabile carcinoma , aut etiam in funestum can-
 crum non minùs convertitur. Utrumque eò sæpè maligni-
 tatis procedit , ut profundius inductis per visceris substantiam
 longâ exesione cuniculis , disruptâque succingente tunicâ, cu-
 mulatæ saniei majorem , aut minorem undam in caveam ab-
 dominis pro graviore , aut leviori læsione contentorum vis-
 cerum effundat. In utroque insuper , diuturniori , immanio-
 rique reddito , exesæ visceris substantiæ particulas , & fru-
 stula cum quodam tabifico fluxu excerni per sedes posse , ex-
 cretaque fuisse visa , atque post hujusmodi excretiones adhuc
 evalisse ægrotantes , aliquæ Alexandrini , Herculis Saxonix,
 Nicolai Florent. Matthæi de Gradibus , & aliorum observa-
 tiones testantur. Sed hujusmodi excretas substantias solida,
 propriaque hepatis , aut alterius cujuslibet ulcerati visceris
 fragmenta non fuisse , eò certius videtur , quò erosa ab in-
 terno principio viscera semper in pus , ichorem , aut saniem,
 aut anomalum quoddam virus , tabumque liquefcunt , nun-
 quam verò frustulatim dilaniantur. Quippe erodentis interni
 liquidi morsus insensili gradu serpendo , insensiles pariter
 particulas gradatim disrumpit , invicemque dissolvit: Hinc

solidarum animalis partium in frustra disruptiones non nisi ab externis, solidisque instrumentis repetendas esse censemus. Interea livida, nigricantia, aut aliter corrupta, majora, aut minora, solidiuscula fragmina carnosam naturam æmulantia, viscerumque substantiam mentientia, à carcinomatosis concretionibus, intestinorum cavum occupantibus prodiisse, continuè in praxi atque extispiciis comperimus. Ita hujusmodi excretiones non nisi cum gravissimis intestinorum doloribus, difficultatibus, aliisque proprii eorum affectus argumentis, contingunt. Neque dubium est, plurimas tum solidas, tum etiam liquidas, quatientes validè, ac divellentes causas in intestinis occurrere, quæ quidem internis viscerum substantiis minimè assident.

*Signa utriusque
ulceris,
ejusque sedis
ad gibbam,
aut cavam
hepatis.*

III. Quod signa, utrumque hepaticum ulcus discriminantia, respicit. Ulcus inflammationi succedens per prævia hujus morbi indicia dignoscitur. Ulcus sine præcedente inflammatione in jecore excavatum dignosci poterit per ulcerosum assiduum dolorem in dextro hypochondrio, cum arida, & inani tussi, fixâ, aut erraticâ febriculâ, præcipuè post cibum ingravescente, icterico habitu, continuâ ciborum omnium, inapetentiâ, ingentique præcipuè carni fastidio, & tabe sensim invalescente conjunctum. Adest & oris amaror, & linguæ foeditas; sed sitis non acrius urget. Parvæ interdum flavescentes, aut livescentes pustulæ ad faciem efflorescunt. Teter ex ore halitus expirat. Frequens animi deliquium accedit. Interea si febris continua non sit, lentiorque extet rodentis ichoris malitia, vires ita interdum constantes videntur, ut æger consuetis muniis vacare possit. Sed Febris post longum morbi progressum constantior evadit, neque aliquem typum servans, & demùm in hecticam, & marasmodem desinens. Si ulcus gibbum hepatis teneat, difficilis sanè respiratio est, & dolor transversî septi: Tum affecti hepatis signa in urinis apparent; imò urinam purulento perfundi absque signis ulcerationis in vesica, aut in renibus, celebris anti-

antiquorum observatio fuit. Sed ulcere Cavum hepatis obfidente, dejectiones alvi purulentæ deprehenduntur, saltem continuò liquidæ, crudæque. Interdum & cruenti quidpiam simul externitur, cum dolore intestinorum ob translabentis materiæ acrimoniam, ut dysenteria esse persæpè putetur; cum tamen gravitatis, & continuæ veluti terebrationis sensus in hepate permaneat. Inapetentia magis excruciat; nausea major; vomitus frequens, & oris acerbior amaritudo.

I.V. Prognosis ex his, quæ tradita sunt, elici abundè potest. Ulcus hepatis ni exiguum sit, & veluti solam hepatis superficiem occupet, atque inter initia curetur, exitiale est. Multò majus discrimen afferunt exulcerationes jecoris, inflammationi, præstitoque abscessui succedentes, quàm quæ sine iis incipiunt. Ita quæ relinquuntur ulcera ab apostemate, si profundiora sint, magisque à biliaribus ductibus diffusa, non certè consolidantur, sed altiùs depascentia citò in necrosim vertuntur. Forestus lib. XIX. observat. X. casum affert hepatici apostematis in suppuratum mutati, undè malignum, atque depascens ulcus natum est, & demùm lethalis gangræna: Quod bis nobis etiam videre contigit. Periculo tamen plena sunt illa hepatis secundi generis ulcera, aliisque primi generis reverà æquiparanda quæ proprias sanies per aliquod corporis emunctorium non subducunt, sed cæcè, & sordidè in viscere retinent, & accumulunt, omnique exitu prohibent. Hæc quidem præter consumptionem, & phthisim lethalem etiam, atque præcipitem hydropem non infrequenter inducunt, ut etiam annotasse Ferneliū superiùs vidimus. Quandoque ulcera hepatis, vel à nimium accumulatis, virulentis, atque opprimentibus succis exasperata, vel ab erratis in sex rebus non naturalibus, aut aliis quibuslibet causis lacerata, acriter inflammantur (ut sæpè etiam in ulcere pulmonum evenit) febrilis indè incandescit ignis; atque ægri sitientes, æstuantes, delirantes, simulque convulsi præcipiti cursu, atque per acutam febrem moriuntur.

*Prognosis
in utroque
ulcere, aut
simplici, aut
inflammato.*

*Remediorum
in hepatis
ulcere admi-
nistratio.*

V. Ulcus hepatis, ut aliud quodlibet, abstersionem, repletionem, & consolidationem, roborantia insuper viscus remedia deponit. Si in recenti secundi generis ulcere abundantis sanguinis indicia obtrudantur, vena secari poterit, ut ulcus immune ab inflammatione servetur, multoque ideo magis si inflammatum ulcus sit, & vires consistant. Ita in non adhuc confirmato ulcere, ad excutiendas, verrendasque jecoris fanies, atque per alvinam excretionem movendas, non infimæ virtutis Cathartici utendum est. Mundificantium, & abstergentium commodiorem classem adimplent vulneraria præsidia dicta, quæ insuper adglutinantes, seu balsamicos succos in sanguine renovare, atque insuper urinæ vias aperire solent. Hæc, præcipuè ex vegetabili regno elicita, per varias formas, per succos in primis, & decoctiones parantur, atque exhibentur. Inter horum plurima seligenda sunt consolidida major, ejusque radix, bistorta, plantago, quinquefolium, urtica, æquisetum, millefolium, hypericum, scabiosa, verbenæ, Carduus sanctus, alchimilla, buglossa, ulmaria, hederæ terrestris, & arborea, Veronica montana, fanicula, vincapervinca, hyssopus &c. acriora interdum adjiciuntur vegetabilia; ut angelica, Valeriana, Carlina, Imperatoria &c. Præterea plantæ hepati propriæ intermiscendæ sunt; ut Hepatica, chamepites, lingua cervina, agrimonia &c. Lignosa quædam non inconsultò in his pariter decoctionibus adhibentur, ut lignum juniperinum, rhodium, aut lentiscum, radices chinæ, & sarsæ-parillæ, saffra, santali citrini, aut albi adjecto etiam C. C. raso. Serum lactis caprini non improprium est, præcipuè si cum mulsâ, aut aliter, juxta statum morbi, atque ægrotantis constitutionem alteretur. Post abstergentia conveniunt siccantia, quæ aliàs internis vulneribus, atque ulceribus perutilia sunt, ut aristolochia rotunda, salvia, radix ireos, Caryophilata, spica, schenanthum, absinthium; quibus addi possunt sarcocolla, lapis hematites, spodium, coral. rub. & similia. Terebinthina cruda, cum vitello ovi soluta,

foluta , largo juris haustui immixta , & propinata , plurimum in viscerum ulceribus confert , mundificans , consolidans , acriores succos irretiens , atque ad renes compellens , hinc mali reliquias absumens. Similem adimplent paginam balsama peruviana , copayve , aliaque similia , & simplicia ; similem pariter composita , ut balsamum sulphuris terebinthinatum , anisatum , succinatum , cum saccharo faturni , aliisque edulcorantibus. Cremor hordei alimentis semper erit sociandus , & prisana hordeacea martialis pro quotidiano potu exhibenda. Sed implere ulcus , atque consolidare totum naturæ opus est ; quod ipsa quidem , ablatis impedimentis omnibus , ficcatoque ulcere , atque nutritiis scatentibus succis , non difficilè molitur.

HISTORIA

Hepatica exulcerationis secundi generis , morbis aliis copulata ; ex nuperrima communicatione Cl. & amicissimi Viri D. Tignoni , apud Cuneenses Celebratissimi Medici.

„ **M**ulier quadragenaria frigosi habitus jam quatuor ab
 „ hinc annis ex laborioso partu conquerebatur de ali-
 „ quo pondere in abdomine ; ex quo tempore diminui men-
 „ ses inceperunt. Post annum tamen foeliciter alium edidit
 „ partum ; nihilo tamen minus idem pondus durabat , atque
 „ tumorem in dies augeri persentiebat. Superiori Augusto
 „ mense vehementiora omnia à Thermis adhibuit remedia :
 „ sed omnia incassum. Sub finem autumnii post intentata plu-
 „ rima ab aliis Medicis remedia meum expostulavit auxilium.
 „ Universum corpus macie laborabat ; venter tamen adeo
 „ plenus erat , ut videretur binos gestare infantes. Tumor
 „ in tres circumscriptas dividebatur prominentias : Levis aderat
 „ febris.

„ febricula : Vrinæ diminutio notabilis ; & talis alvi stipticitas ,
 „ ut per mensem (quod sanè mirabile) , irritò quocunque re-
 „ mediorum auxilio , nunquam dejecerit : Vndè pauco tem-
 „ poris intervallo mollis , sed enormis Meteorismus elevatus
 „ est. Suffocabatur itaque ; atque exilissimus pulsus proximam
 „ necem minitabatur. Celebratâ Paracentesi fecibus , &
 „ urinæ libertas concessa est ; ita ut ab orci faucibus erepta
 „ videretur. Quater punctio instituta fuit , & plusquàm cen-
 „ tum quinquaginta libræ aquarum extractæ sunt ; quum po-
 „ stremâ peractâ punctione , discessoque Chirurgo , ipsamet
 „ ægra ferreo quodam instrumento ipsum punctiōis locum
 „ recludens , totum effusis aquis inundavit solum ; & post
 „ aliquot horas naufragam in iisdem animam emisit. Aperto
 „ cadavere tumorem in ventre plus 25. libras pendentem in-
 „ veni , in quo aderant plus 20. alii tumores diversæ magni-
 „ tudinis , atque figuræ. Centrum tumoris Cartilagineum
 „ erat , ovalis figuræ , nigro humore repletum. Diversi erant
 „ liquores in dictis tumoribus contenti : Quidam nigri instar
 „ atramenti , alii limpidi instar aquæ : Nonnulli pellucidum
 „ albumen , mel tandem plurimi imitabantur. Incipiebat
 „ tumor à medietate ventriculi per varia prominentia vasa ,
 „ quæ in illam indè molem disseminabantur : ejus conus per
 „ membranulas plurimas utero , & vesicæ accreverat ; atque
 „ insuper multis in locis peritoneo alligabatur. Apertis hisce
 „ omnibus tumoribus plus duodecim adhuc libræ ex omni
 „ materiarum genere egrediebantur. Dictum tumorem ex
 „ ventre extraxi illæsis contentis aliis partibus. Mesenterium
 „ atque intestina naturaliter se habebant : hepar erat dimi-
 „ nutæ molis ; atque membrana ejusdem extima corrosa oc-
 „ currebat , pure imbuta , diaphragmati , & costis annexa : &
 „ ulcerosa læsio in visceris substantiam se pariter insinuabat.
 „ Lien naturalis erat : solum deficiebat omentum ; cujus nempe
 „ nullum prorsus apparebat vestigium. Ex quo liquidò ap-
 „ paret non aliud fuisse totam hanc morborum iliadem , quàm
 „ ipsam-

„ ipsammet , succis variis præternaturalibus perfusi omenti
 „ excrescentiam „ Hucusque D. Pignonus.

Mirari fortasse aliquibus continget in hoc casu, hepar solum, solidius viscus, non autem lienem, flaccidius, & mollius, aut alia laxiora etiam viscera, in omentalis carcinomatis affectu fuisse involutum. Attamen sæpius à nobis per hujus Historiæ partes annotatum est; hepar, in morbis, præcipuè diuturnis, præ aliis omnibus visceribus lædi; atque si vitiorum origo non est, in vitiorum saltem continuo induci consortia: omnemque rei causam amplè retulimus. Similem ipse descripto carcinomatosum omenti affectum in Nobili Foroliviensi cum cl. piæ memoriæ Valsalva Bononiæ videbam. Sed siccus erat morbus, citra immixta, aut expressa liquamina; licèt enor- mis hujusmodi visceris accretio utriformentem quamlibet ventra- lis hydropis ingentioris speciem mentiri facillè posset. Solidus, lividusque, & jam propè corruptus tumor (quantum visu con- jici potuit) 25. libras pendere fortasse potuisset. De cetero ad descriptum hunc à Pignono ab Hepate, & omento hydropem quadrare adhuc posset, quem nos superius ruptis jecoris lym- phaticis conciliavimus, Aphorismus ille LVII. Sect. VII.: *Qui- bus hepar aquâ plenum in omentum eruperit, his venter aquâ re- pletur, & moriuntur.*

DE HEPATITIDE

Canones Practici.

- I. **H** Epatitis, morbus cum apud antiquos cum jecoris phleg-
 gnone, imò & erysipelate non rarè confusus, tum
 apud recentiores incertior, & obscurior, hîc modò à nobis,
 castigatam Hepatis morborum, eorumque differentiarum, &
 Curationum historiam intendentibus, quoad fieri possit, ex-
 plicanda

*Hepatitis,
 morbus He-
 patis, vel in-
 gruens, vel
 consistens,
 seu si lubeat,
 antiquorum
 intemperies*

cum materia, aut sine materia, obstructionis, Scirrhi, Phlegmonis, Erysipelatis, aliorumque hujus visceris morborum fundamentum esse, eisque interdum conjungi potest; sed neutrum horum omnium propriè est, quæ nempe suam peculiaris morbi speciem adimplet; tum vel per ipsa Modernorum principia explicari potest.

plicanda, elucidandaque suscipitur. Duretus, qui in explicando Hippocrate palmam omnibus arripuisse videtur, Hepatitidis definitionem in genere proferens: *Hepatitidis* (inquit ad Commentarium de Hepaticis Hippocratis fol. mihi, 321.) *ex qua hepatici nominantur, est exolutio hepatis à norma, & præscriptione sui proprii temperamenti, & complexionis procul egressi, atque id sine phlegmone systrophica, & sine scirrho.* Cùmque ex cujuslibet partis temperie propriæ ejusdem actionis facultas eliciatur; à Jecoris ejuscemodi intemperie propriæ facultatis, atque functionis imbecillitatem deducere pergit laudatus vir, atque Hepatitidis causam in genere perscrutari; quam quidem vel in meatuum, vel in humorum vitio considerat; utramque verò vel intra natam, congenerem, & coequalem; vel extrinsecus incidentem dietæ vitio in victu, & instituto; Tum ab unaquaque ex his causis disparia incommoda, sive præternaturalia phænomena attendenda esse animadvertit. Dirimit ergo causam Hepatitidis in *ingruentem*, quam ab humoribus, & in *consistentem*, quam à vitio meatuum, seu propriæ visceris substantiæ repetit: Ab utraque dyscrasiam hepatis deducit, quam rursus distinguit in *frigidam cum crudore, cachochimia, & flatu*; & in *calidam cum ardore, putredine, bile primùm flavâ, mox atra, & ad extremum marasmo hydropico.* Ut inde ex his nobis in genere elucescat: Hepatitidem esse peculiarem dyscrasiam hepatis, seu intemperiem cum materia, aut sine materia, à solido, aut à liquido, aut ab utrisque productam; ex qua non solum sensibilis læsio propriæ actionis succedat, sed alii præterea per alia viscera, aut sanguinem, diffusiores morbi, acuti, aut chronici, seu calidi, aut minùs calidi, graves, aut minùs graves succrescant. Tres deinceps Hippocraticas Hepatitidis species laudatus author enunciat: Primam, in qua color sublividus, alteram, in qua auriginosus, tertiam in qua niger corporis habitum invadit. Interea cùm super illam, quæ hepati credita ab antiquis fuerat, conficiendi sanguinis operationem, ejusque idcirco alterationes tota in hoc morbo expositio antiquo-

rum

rum sita sit ; si nos sanioris Theoriæ principiis suffulti , proposuam à Dureto divisionem complectendo , Hepatitidem in calidam , frigidam , simulque & in mixtam discriminemus , cuilibet suas causas brevi dicendi genere conferamus ; gravissimis præcipuè Hippocratis , ejusque præclariorum Interpretum observationibus cum iisdem sedulò , & appositè conciliandis , sive hujusmodi morbi diagnosi , prognosi , & curationis modo , quantum hanc partem deceat , aperiendis insistamus , ut cum omnes ejusdem species inter se , tum singulæ ab apparenter similibus , re tamen vera disparibus morbis per propria signa dirimi impostero à medentibus valeant ; pensum jam nostrum absolvisse non dubitabimus.

II. Quotiescunque igitur in illo vasorum contextu , qui Hepatis parenchyma dicitur , seu propriè in horumce vasorum lateribus , & nominatim in villis eadem componentibus , illa mutabitur naturalis vis distractionis , & contractionis , quæ quidem hæc solida ab appellentium liquorum pressione superantur , & mutuùm easdem superant , ipsosque premunt , alterius nempe ex his substantiis resistentiâ adversus alterius resistentiam alternatim minori redditâ , undè tota liquidorum fluxus , & refluxus per viscera , totaque secretionum , aliarumque omnium naturalium functionum ratio petenda est ; orietur jam hepatis morbus à solido , sive ut aiebant antiqui , intemperies suapte naturâ sine materia ; sive à densitate , rigiditate , aut raritate , mollitie &c. ut jam superius in II. partis Cap. II. tetigimus.

Et sanè duplex hujusmodi affectionis genus , idque oppositum , se præbet : vel scilicet cum adaucta in hepaticis solidis contractionis vis , ab affluentibus succis superari satis non potest , ut nimium hoc pacto constrictis hujus visceris meatibus , minus distribui appellant latices , minusque fecer-
ni queant : vel cum imminuta est ; ut minus etiam influen-
tes iidem humores ad proprios cursus , & secretiones urgean-
tur. Vtramque reverà habitudinem sub communi imbecil-

*Explicatur
per moder-
norum prin-
cipia consi-
stens hepatis
intemperies,
ab antiquis
sine materia
dicta; qua
duplex est,
sub commu-
ni tamen
imbecillita-
tis hepatis
nomine ab
antiquis de-
scripta; atq;
à simili in
pulmonibus
affectione ul-
terius elu-
cidata.*

litatis nomine cognoverunt antiqui, & *consistentem* morbum appellarunt; in quo quidem nunc calidam, nunc frigidam intemperiem animadvertere valere, quum nempe à liberâ hoc pacto traiectione, & secretionis ratione, ultra naturalem statum, impeditos liquores, vel in turbatos intestinos motus concitari, acrius incallescere, variasque motuum ametias per totum sanguinem proferre, & expandere; vel per visceris meatus tacitè, frigidèque lentescere, observarent. Vtramque cæterum hepatis hujusmodi intemperiem cum similibus pulmonum, à solidi vitio frequenter productis, intemperiebus comparabant. Primam videlicet cuidam sensim inductæ pulmonis ariditati ac densitati retulerant, undè quædam phthisis species ortum ducit: alteram verò illi pulmonis dyscrasiæ, quæ laxitas absque ulcere dicitur, ex qua altera phthisis species emergit, à modernis Phthisis Fracastorii nuncupata.

Alia Hepatis intemperies, seu à materia, & cum materia, ingruens ab antiquis vocata: Ex quâ alterâque superius descriptâ, Totâ calida, frigida, mixtaque hepatitis ratio elisitur.

III. Quod si, insontibus hepaticis solidis, illa obveniat liquidorum hominis, ab erratis in sex rebus non naturalibus, & præcipuè ab immoderatis exercitationibus, aut vigiliis, à calefacientibus, atque exsiccantibus animi affectibus, à calidioribus alimentis, meraco vino, atque intemperantiùs epoto; aut à tempestatum injuriis, aut ab alteratis perspirationibus corporis, aut tandem à calidis præcessis morbis producta, vel etiam ab oppositis causis excitata, crassitiei, & densitatis habitudo; ut hæc in hepar delata momento ejusdem solidorum contractili reluctentur, ipsaque infirmas distractiones constanter adigant; jam nova Hepatitis imbecillitas accedet, à liquido posita, atque servata, seu à materia, & cum materia intemperies, *ingruens* ideoque vocata; quæ pariter, juxta signatas superius condiciones vel calida, vel frigida accensebitur. Hoc igitur utrumque imbecillitatis genus est, à plerisque antiquorum *Hepatitis* in genere nuncupatum; Hæcque in utroque calidæ, aut frigidæ affectionis origo. Mixta interea Hepatitis illa audit, quæ pro-

propriorum symptomatum indole calidæ, frigidæque videtur intermedia. Nunc ad ipsa Hepatitidis tradenda in genere signa, singulas ejus species per propria etiam indicia interstinguendas, & tandem ab aliis hepatis morbis per singularem omnium diagnosim dirimendas descendamus.

I V. Et sanè cum nulla sine bilis, ejusque secretionis vitio hepatitis sit; ita semper hunc morbum manifesta ejus criminis argumenta sectantur: Quorum præcipuum est flavus, aut luridus biliosus squalor, totam cutem, & inprimis faciem, plus, minus obsidens, cuilibet certè hepatitidi secomitem præbens; ut annotat Galenus de diff. symptom. Cap. V. Plerasque verò, præcipuè chronicas, & diuturniores hepatitis crudæ alvi excretio excipit, veluti cæliaca diarrhœa, aut hepaticus fluxus, seu carniū loturæ similis; interdum non valdè absimilis naturæ vomitus. Ita Gal. de sympt. caus. lib. 3. cap. 2. De composit. Pharm. s. loc. lib. 8. cap. 6. & lib. 5. de loc. aff. cap. 7. & alibi sæpissimè. Sed calida Hepatitis satis à frigida, aut saltem minus calida, per propria signa discriminatur. Hippocrates lib. de intern. affect. hæc tradit de calida hepatitide: *Morbus hepaticus: dolor gravis ad hepar irruit, & sub ultimas costas, & in humerum, & in claviculam, & sub mammam, & suffocatio fortis tenet, & aliquando lividam bilem revomit, & rigor, & febris primis diebus debilior habet, & dum tractatur hepar dolet. Agri color est sublividus, eumque cibi, quos antea comedit, strangulant, & in ventrem irruentes incedunt, & tormina excitant.* Pergit inde eodem loco in signa alterius Hepatitidis, quæ certè minus calida est, explicanda: *Alius Hepaticus morbus: Dolores quidem eodem modo premunt in hepar, & color differt à priore: Interdum vomitus bilis pallidæ cum fructu: Si verò non vomuerit bilis ad oculos pervenit, & fiunt valdè pallidi, & pedes intumescunt.* Illam autem hepatitis ab anni mutationibus, hanc verò ab improbo victus regimine prognatam statuit. Primam nos hepatitis alio etiam nomine bilioso-

Signa Hepatitidis in genere; & differentia specierum Hepatitidis ex Hippocrate.

sanguineam vocare solemus , alteram bilioso - serosam. Bilioso - sanguineam ; quoniam licet biliosi primitivi erroris sobolem hanc esse fateamur , acutiei tamen , atque cujusdam inflammationis , saltem succrescentis , participem plerumque recognoscimus. Ita ait de hac Hepatitide citato loco Magister : *Cibis abstineat , quoad morbus judicatus fuerit , quod ferè intra dies septem contingit.* Aliam verò bilioso - serosam nuncupamus , quia in hoc affectu crudæ ut plurimum , atque cretaceæ bilis turbulentus lentor feri etiam universalis lentorem videtur secum tandem conducere. In prima insuper efferatæ , atque æstuantis bilis indicia varia plerumque se porrigunt : anxietates , & ardores ventriculi , vertigines , universales æstuationes , cibi fastidia cum oris intenso amaro-re , sitis , linguæ ariditates , jactationes , & somni vacuitates : In altera languores , & lassitudines , cardialgia , mentis hebetudo , artuum tremor , cachecticus interdum habitus. Primæ Hepatitidi , sæviante , aut remittente dolore , proficere videtur Hippocrates diluentium illis , atque laxantium tepidulis sorbitionibus , quæ in lateris dolore non minus adhibentur : Largam Caprini lactis copiam ad promovendam Catharsim propinat (quod quidem Catharseo genus in his aliisque morbis Hippocrati aliisque antiquis usitatissimum extitit.) Si bilis strangulatus urgeat , vomitum vel inter sudores provocat ; & si vomuerit , idem rursus post quatuor horas faciendum monet. In altera verò hepatitide scammonio utitur. Cum verò hanc etiam hepatitidem efferari interdum , in eaque *incendi ventrem* observaverit ; ita in hoc casu per cocti lactis longos etiam , & repetitos haustus purgationem instituit ; fomentum admoveri jubet ; atque in morbi ferocia , si expediat , internam dextri cubiti venam secari præcipit. Quod superest : Causa nostra plurimis aliis locis securiores Hepatitidum judicationes per sedem , aut urinas , naturâ aut arte conductas , obtineri testatur ; ut inferius videbimus.

V. Differentias insuper hujusmodi Hepatitidum Galenus *Differentia ex Galeno.* sæpè declarat: Lib. V. de loc. affect. cap. 7. hæc habet de utraque Hepatide: *Incipit interdum affectus ob frigidam intemperiem citra febrim, quando tenuis sanies sanguinis excernitur, deinde tractu temporis, dum sanguis in viscere corrumpitur, febris supervenire solet, quæ tum ab imperitis usque adhuc negligitur, ut laborantem interdum nequaquam febricitare putent; quippe hunc affectum ob inediam accidisse existimant: Siquidem quod nulla sit ipsis cibi cupiditas, potius quàm ob medicorum institutum, laborantes à cibo abstinere invenerunt. Itaque quum interim nihil excernatur, videaturque laborans omnino liber à febre, balneis eum exponunt, ac debitam victus rationem præscribere negligunt: Quò circa rursus corruptos cibos alvus dejicit, quos deinde hepaticorum excrementum nonnihil sequitur. At nonnulli, qui ob frigidam intemperiem laborare inceperunt, non solum non perdunt cibi cupiditatem, verum etiam interdum multò magis, quàm antea se esurire aiunt. Calidas verò intemperies nunquam comitatur ciborum appetentia, sed ingens cibi fastidium, sitis vehemens, febris insignis, vitiosorum humorum vomitus. Hæc sunt propria hepaticorum accidentia: Sic enim nominari jam dixi eos, quibus visceris ipsius vires fuerint imbecilles: Quà in re vulgus medicorum errans hunc affectum putat esse dysenteriam. Inflammationem autem (intellige phlegmonem) alia, ut dictum est, sequuntur accidentia. Jamque paulò superiùs dixerat: Calida jecoris intemperantia tum contentos in ipso humores, tum eos, qui per mesenterii venas deferuntur, & assant, & adurant: Frigida autem contentos jam in ipso humores crassos, atque ad fluxum, & motum contumaces reddunt; id verò, quod ad ipsum fertur & pituitosum, & crudum, & semicoctum efficiunt. Et libro de Composit. Pharmac. f. l. lib. 8. cap. 6. hæc addit: Calidâ igitur intemperie circa viscus existente colliquationes sunt primum humorum, deinde etiam carnis ipsius hepatis, & evacuat per ventrem bilis crassa, graveolens, & abundè colorata, quemadmodum in pestilentibus febribus contingit. Frigidâ verò*
intem-

intemperie existente neque assidue excretiones, neque multa fiunt: Durat tamen affectus diutius, & per aliquot dies profluet ipsi venter majori copia, cujus neque fetor similis est iis, quæ ex calore sunt liquefacta; neque color similis, aut compages; verum minus graveolentia ab iis excernuntur, speciem putrefacti sanguinis, non colliquatae carnis habentia &c.

*Differentia
Hepatitis,
& Hepaticæ
Phlegmonis.*

V I. Reverà cum in calida hepatitide non tantum bilis, quæ quidem morbo incunabula porrigit, accensionem contrahat, sed sanguis ipse in eandem frequenter trahatur diathesim, ut veluti inflammari, ac phlegmonosam inducere affectionem videatur; ita hujusmodi hepatitis genus sub Phlegmonis specie potest medentibus imponere. Et fortè in hoc censu aberravit Erasistratus, citatus à Galeno lib. de atra bile Cap. V. *Biliosa porrò humiditas, ait ille, quòd necessario excernenda sit, testes sunt affectus complures adorientes, nempe regii morbi, & phlegmone circa jecur genita.* Verum pluribus signis jecoris phlegmone, calidaque hepatitis invicem distinguuntur, ut jam superius attulimus Cap. de phlegmone Can. I I I. Enim verò, cum Phlegmone hepatis à sanguine primum inflammato, hinc bilem interdum in consensum rapiante, frequentius non rapiante, calida verò hepatitis à bile primum accensa, sanguinem modò in diathesis consortium ducente, modò etiam non ducente ortum ducat, dispar in utraque febris conditio obversatur; quæ nempe in principio phlegmonis acuta jam est, atque vehemens; in calidæ verò hepatitis ingressu mitior, hinc paulatim invalescens, donec ardentior evadat; adeò ut in progressu suo acutior phlegmonoso affectu, & vehementior, hujusmodi hepatitis videatur; tum in hac hepatitide omnia, aut plurima efferatæ bilis indicia se produnt quò ad calorem, sitim, frequentes rigores; duritiem, & velocitatem pulsus; colorem urinarum, faciei, linguæ, & totius corporis (qui quidem vitiosus semper apprehenditur; cum solis hepatis, primitus à bilis vitio productis affectibus conveniat illud Galeni 2. de loc. affect. cap. 9.:

Lingua,

Lingua, & universi corporis color alteratur, ubi hepar vitiatum est) cibi fastidium, vomitiones, alvinos fluxus, aliaque similia symptomata; quæ reverà in legitima hepatis phlegmone nunquam, aut saltem rarissimè occurrunt; ut citato loco videre est. Addi potest hepatici tumoris habitudo, qui certè vel inter ipsa phlegmonis initia statim adest; sed in memoratæ hepatitidis principio nullus esse adhuc plerumque videtur. Ita Galenus lib. VIII. de compos. Pharmac. S. L. Cap. VI. hæc effatur: *Affectio igitur hepatica peculiariter appellata, veluti etiam cæliaca, & stomachica, citra tumores præter naturam circa ipsas partes contingit. Inflammatum enim esse hepar, aut abscessu laborare, aut induratum esse medici dicunt, aut aliud quidpiam tale; non tamen hepaticum vocant hominem ipsum, cui tale quippiam accidit: Verùm quando citra manifestum aliquod in viscere malum, in propriis actionibus debilitatur, tunc agrum hepaticum appellant. Non tamen inficior, hepatis non frigidam solum, sed & calidam hepatitidem interdum succedere, cum non tantum incensa, sed & adaucta liquidorum moles hoc viscus ultra naturales mensuras extenderit. Sed huiusmodi tumores nunquam inchoante morbo, ac sensim invalescente, nec non diutius vigente procreantur; ut in difficultum obstructionum familiam accensendi ut plurimum veniant, semper verò symptomati decernendi; Phlegmonis autem tumor symptoma profectò non est, sed ipsemer essentialis morbus; cum nullè sine tumore produci phlegmones possint; qui statim idcirco intra ipsa inflammationis exordia vel gibbam visceris, vel cavam, vel laterales etiam partes invadit. Hepatitidi cum indè succedente manifesto tumore suum pariter intemperiei cum materia nomen accomodabant antiqui; ut calidam sine sensibili tumore hepatitidem, intemperiem sine materia, sive siccam inflammationem, vocare non minùs consueti sunt.*

VII. Sed multò operosius videtur, Hepatitidem calidam satis, aptèque à pleuritide discernere: cum non solum

*Hepatitis
calida sæpè
cum acutè.*

C c c

calida,

aut Chroni-
cis pulmo-
num morbis
adeò copula-
tur, ut idem
cum iisdem,
& indivi-
duus morbus
videri possit.
Interea ta-
men rationes
affectuum in
diversis his-
ce visceri-
bus à peri-
to medente
discerni que-
unt, & de-
bent.

calida, & acuta hepatitis per signa æquivoca adeò sæpè cum pleuritide confusa maneat, ut medentibus imponens, pro systrophica pleuritide judicetur; sed etiam non rarò cum eadem genuina pleuritide adeò reverà copulata sit, ut ambæ affectiones, manus sibi mutuùm porrigere, atque in unam veluti, & individuum affectionem concurrere videantur. Hinc, quemadmodùm per facilè excitatam ab hepate ad pulmones noxiū humoris epigenesim pleuritis ab Hepatitide, non mutato morbi cursu, procreari potest, ut in hoc casu pleuritis Hepatitidi succrescens morbus, seu veluti symptomaticus evadat; ita ex pleuritide, veluti primario morbo, secundaria in hepate affectio, sive symptomatica hepatitis produci interdum assollet, juxta illud Galeni, à Dureto in Comment. ad Coacas fol. mihi, 41. memoratum: *Sic igitur partibus respirationi dicatis multum, graviterque affectis, male officium suum facientibus, hepar contagione afficitur. Periculosam pleuritidem Hepatitidi conjunctam indicat illud Hippocratis in Coac. prænot. Hepaticis sputum multum cruentum, sive intus subputridum, sive merè biliosum fuerit, statim perniciem denotat: Et aliud insuper in iisdem Coacis: Qui spumantem sanguinem spuitione rejiciant cum præcordiorum dextrorum dolore, iis ex jecinore prodit, & plerumque pereunt. Nec acutus solum pulmonis morbus, seu pleuritis aut peripneumonia, cum calida hepatitide interdum conspirat, sed & chronica labes, seu phthisis. Ita Hippocrates in iisdem Coac. prænot. addit: In hepatico mala est colliquatio cum raucitate; idque cum aliàs, tum si tussicula sit. Atque ad hujus textus Commentarium hæc adjicit accuratissimus Duretus noster: Hepatitis, & Phthisis mutua conspiratio est in ægroti perniciem, atque sympatica earum generatio, hinc, inde causas ducentium. Nam Hepatitis à phthisi, & hujus ab hepatitide generatio est. . . . Quemadmodum igitur in phthisi hepaticum est, alvum ferri liquidis, & saniosis excrementis: Sic in Hepatitide phthisicum, continenter tussire cum raucitate, aut raucum esse cum proritatione tussicula. Et sanè nihil expli-*

explicatu facilius est, quàm quod bilis in jecoris morbo excandefacta, & turgescens, propriique domicilii impatiens exundet in sanguinem, atque hujus vehiculo vel in caput ad phrenitidem, aliosque acutos, aut minùs acutos excitandos morbos, vel in pulmonem ad longos, aut minùs longos ciendos affectus irrumpat; in primum nempe facile ascendat, si volatiliior, atque tenuior sit reddita; in alterum duntaxat vagetur, si minùs volatilis, & tenuis: Ut eodem pacto cuique non arduum est intelligere, vitia sanguinis in pulmone contracta faciliùs ad afficiendum hepar, quàm alias partes, deferri: Cùm hepar super alia viscera majoribus, & numerosioribus vasis donetur, hæcque liquores interfluant, gressu, super alium quemlibet in aliis visceribus institutum, lentissimo præditi: Ut in secunda hujus Historiæ parte ostendimus, cùm de facili, frequentique Chronicorum capitis morborum in hepar transmissu loquuti fuimus. Sed diligentiori clinico perpendendum incumbit, an descripta superiùs Hepaticorum indicia ante, vel post affectum pulmonis emerferint; Ut nempe quis horumce, hepatis & pulmonis jam sibi invicem intermixtorum, affectuum primigenius sit, quis alteri adjunctus, dijudicare cautè possit, atque discernere.

VIII. Interdum verò spirandi difficultas, aliaque similia accidentia à systrophico pulmonis morbo, hepatitidem comitante non quidem proficiscuntur, sed solum à quadam in pulmonibus per affecti hepatis viciniam inducta irritatione, atque sympatico consensu; præcipuè si hepar prætumidum extet: *Prætumidum hepar*, (ait Duretus in Coac.fol. mihi, 334.) *suo appulsu multum opprimit diaphragma, unde pulmones similiter in angusto esse videntur, ut si Catharrhici copia obruerentur: proindeque non minùs contendunt expedire se, & explicare tussiendo ab illa molestia, quàm si materia esset quædam expectorabilis, cujus expectorato liberantur, & liberè aurâ fruuntur.* Alteram præterea tussis hujusmodi symptomaticæ causam

Non raro calida hepatitis non quidem systrophico pulmonis, sed solum sympatico, atque per irritationis consensum excitato manus exporrigit: Quos sane interstinguere affectus multò facilius est opera.

causam jam prius adduxerat: *Accidit autem tussis concussione thoracis, atque pulmonum, quam ciet non quidem prolapsus catarrihi, sed inane studium anacatharseos, cujus opinionem facit proritatio diaphragmatis ab exundante sero, & quodam ichore maligno ex hepate, cui superpositum adjacet diaphragma.* In hunc igitur censum reducendæ sunt calidæ illæ hepatitides, in quibus cum dolor aliquis, ut supra, ad costas ascendens, & sæpè usque ad jugulum protensus vigeat, medicos sub falsa ficcarum pleuritidum persona solent non rarò decipere. Ejusmodi fuit calida illa Hepatitis, à Galeno in egrotante medico, per semetipsum decepto, recognita, atque per propria indicia à pleuritidis suspicione vindicata: quæ quidem ab eodem Galeno describitur lib. 5. de loc. affect. cap. 7. Signa enim hepatitidem, non verò pleuritidem, indicantia hæc erant: Gravativus dolor nothas dextras costas infestans: Febris quidem vehemens, sed cum pulsu non adeò duro: Crebra, & parva respiratio, quæ si elatior trahebatur, dolor ad hypochondrium dextrum vehementiùs correspondebat, isque semper gravativus: Tussis ex longis intervallis exigua, & arida, quâ nempe nihil expuebatur: Molesta insuper, usque ad jugulum protracta sensatio, sed tensiva duntaxat, non verò punctoria, veluti in pleuritide contingit; (sed incertum esse hoc signum eodem loco testatur Galenus, quod *magnas inflammationes, quemadmodum & scirrhum* comitari id soleat) Præcipuè autem tenuis cruoris sanies per alvum egesta, carniū nuper mactatarum ablutioni haud absimilis, *evidentissimum*, ut ipse addit, *affecti jecinoris indicium.*

Alia ulterius argu-
menta, calidam hepaticam à sy-
strophica
Pleuritide,
ut ut ista
vel biliosa
sit, distin-

IX. Igitur præterquàm quòd in pleuritide, atque in acuta hepatide diversa doloris inducitur habitudo, in affecto quidem hepate gravativi, & si ad superiora porrigatur, tensivi, in pleuritide verò semper, & ubicunque punctorii; tum dispar in utrisque prima doloris sedes, & tussis ratio dissimilis; accedit ulterius, quòd in Hepatide acrioris caloris sensus in dextro hypochondrio perlentitur, tum mutatus in

in ictericum, aut aliter biliosum colorem habitus corporis exhibetur: cum quamlibet Hepatitidem, annotante Hippocrate, & Interpretibus, coloris fæditas comitetur; tum insuper, ut aliis locis annuimus, alia plurima ferventis, effertæque bilis in excretionibus, & comitantium febrium periodis offerantur Phænomena, quæ quidem in systrophica pleuritide non contingunt. Quod si biliosa alio loco descripta pleuritis quò ad alvinas egestionem, cutis tincturam, aliaque accidentia, quidpiam cum hac Hepatitide commune ducere videatur; copiosa tamen expuitio in illa est, durior pulsus, dissimilis extensio, atque habitudo doloris &c. Quod superest: In calida hepatitide cum assiduo, & contumaci dolore, febreque æstuosa, & acuta diutius protracta, sui etiam generis suppurationes, & abscessus contingere, non insolitum vidimus. Ita in altera hujus Operis parte Cap.V. §. VII. fol. 149. de calidioribus hepatitibus, quæ scilicet in abscessum frequenter migrant, aliqua prælibet attulimus, & quandam imprimis, de calidarum genere, Hepatitidem annuere placuit, in quâ sanè insolitus dolor, sive pungitivus, apparuit.

guentia: Licet interdum punctorius dolor, & suppuratio nonnullas ejuscemodî hepatitides excipiant.

X. Nunc ad frigidam Hepatitidem gradientes, hanc utique ab amurcosa, limosaque bile, in hepatis vascularibus concursibus gliscente, ac veluti incrustatâ, sine ullo à sanguine concepto æstu, produci deprehendimus, sit jam vel à vitio laxati solidi, atque in atoniam faceffentis; vel ab actuosioribus per præcedentes morbos, aut tempestatum injurias in humorum massa deperditis, aut valdè depreffis particulis; undè bilis præternaturalem consistentiam, suorumque componentium inertiam acquirat. Reverà bilis (ut ait Hippocrates de nat. hom.) eorum omnium, quæ in corpore insunt, cum sit glutinosissima maximè diuturnas stationes facit; præcipuè si ultra naturalem statum ex memoratis causis lentorem adhuc assequatur. Bilis autem morbose stationes secundum varia earum loca variis excipiuntur eventibus. Duo præcipua

Frigida hepatitis neque suppurationem, neque aliam quâcunque crîsim intendit; in qua quidam bilis statio inertissima est: & quanam in partibus hominis solemniore bilis stationes sint.

ex internis hominis partibus loca sunt, in quibus solem-
niores bilis *stationes* fiunt; hepar, & pulmo: In primo pro
hepatitidum, aliorumque morborum origine: In altero pro
biliosæ pleuritidis causa. Sed collecta bilis in hepate, in quo
quidem naturaliter neque ex appellente sanguine, neque ex
natura solidi prementes valdè potentia, aut quassativæ exci-
tantur, si lentoris ingenio imbuta jam fuerit, diutinam fa-
cilè, & ferè tranquillam stasim, propriis deperditis motibus,
propriisque invicem agglomeratis, coactisque ramentis induit;
ut jam qualiscunque hepatitis, nisi concitatus pariter in fer-
vorem cruor, proprios peculiare Pepasmos ordiatur, in sup-
purationem non desinat: præcipuè verò hepatitis frigida in
nullam crifium rationem moveat; sed potiùs in varias indu-
rationum, five obstructionum, sensilium, aut insensilium spe-
cies hepar bilioso limo immersum faceffat. Ex adverso, quæ
in pulmone congeritur biliosa substantia, cum perpetuam à
respirato aëre quassationem, & insuper vehementes à sangui-
ne, per pulmonicam arteriam è corde evibrato, succussio-
nes excipiat, jam magis, magisque soluta vel in citos urge-
tur trajectus, atque hoc pacto liberiùs expeditur à visceribus;
vel visceri adhuc hærens in irrequietos adeò motus adigitur,
ut nisi expuatur, aut per alias statis diebus excretiones eli-
minetur, in celeri quidem suppuratione, ab immixtis, simul-
que ferventibus lymphaticis copiis excitata implicetur. Præ-
terea bilis in hepate, veluti in proprio domicilio degens, nisi
in orgasmum concitata sit, sensim, lentèque colligitur: Non
itidem in pulmone, in quem adaucto semper impetu ruit, at-
que in ipso, veluti peregrina, & extranea, stare nescia, &
turbulenta servatur. Neque hîc ulteriùs de frigida Hepatiti-
dis diagnosi dicemus, cum hæc superiùs prolata jam fuerit:
Hoc solum addendo, urinas in hac hepatitide, similiter
ut est aqua, tenues, atque albas profluere: Quales Ga-
lenus prorrh. 17. f. 2. in Hepatico adolescente observavit.

XI. Mixta

XI. Mixta tandem hepatitis, quæ neque vehementiora, neque inertiora sibi sociat symptomata, & febre quidem interdum stipatur, non verò acutâ, sed mediocri, atque distinctius periodicâ; à non tam effectâ, seu actuosis partibus destitutâ, seu cretaceâ prorsus, bile producitur, ut hæc in varios motus, variasque stimuli rationes excitari non queat, præcipuè si in bilioso, & picrocholo temperamento, ac juvenili ætate hic morbus se prodatur: hinc veluti compositam ex acuta, & chronica, vel potius neutram, indolem præ se fert. Ita Galenus lib. V. de loc. affect. cap. 7. post exposita signa calidæ, & frigidæ hepatitidis hæc indè subdit: *Quum itaque ambo interdum affectus convenient, utriusque accidentia simul apparere solent: Quæ in promptu medicum habere oportet: Sic enim non solum laudabunt nos, sed admirabuntur & ii, qui operâ nostrâ indignerint; præsertim si accidentia quoque, quæ aliis morbis communia sunt, insuper prospexerimus, veluti quòd dolor ad nothas costas pervenit, quòd jugulus detrahi videtur, quòd spiratio parva redditur, & frequens. Et licet mixta hujusmodi hepatitis sine febre interdum occurrat, non tamen sine plurimum bilis acrioris, simulque crassioris ob lymphatici vehiculi penuriam, ideòque ferventis, signorum comitatu se perhibet: Inter quæ non ultimum locum habent interpolatæ illæ, sed irregulares Philogoses, per viscera, & totum quandoque corpus, præcipuè chylicationis tempore, displodentes, quo quidem manuum palme, & pedum plantæ, quæ cæterum semper aridæ plerumque sunt, & calidæ, mordaciori, sicciorique calore excandescunt: Comitatur luridus habitus, terreus, subflavus, citrinus, aut etiam ictericus: Universalis macies, quæ interdum, adauctâ refinosa bilis calidiori indole, lentas, hecticasque febres manu ducit. Interdum hic morbus ad menses diutius protrahitur, præter illos memoratos æstus, quaque die post cibum manus, pedes, aut etiam faciem, aut corporis habitum ulterius invadentes, aliaque biliaris dominatus symptomata,*

Mixta Hepatitidis, seu quæ calida, frigidaque intermedia est, adjuncta Phenomena, tum quæ illam continuè, aut interdum consequuntur.

erraticis primùm febribus stipatur ; postea molestum quendam in hepate , diuturnumque cum sicca tussicula dolorem, atque renixum paulatim apparat , ex quo lenta , & amurcosa , diuque latens , folliculata suppuratio , postmodum cum gravi & diffuso hepatis tumore , doloreque ulceroso se valdè prodens , progignitur ; undè lenta febris , tabes , & obitus. His si remedia efficacius moventia , aut etiam duntaxat emollientia , & suppurantia adhibeantur , mors citius accedit; suppuratâ scilicet , quæ suis in cuniculis surdè , tacitèque jacebat , substantiâ infauitè concitatâ , atque ad totum hepar, aut etiam ad reliqua abdominis præfocanda viscera mortiferè effusâ. Notabilem mixtæ ejuscemodi hepatitidis , per longum tempus in suppuratum conversæ , & in abdominis cavum lethaliter tandem abruptæ historiam exhibet Coiterus in *Observat. anat. chirurg. miscell.* Aliamque hujusmodi suppurati morbi , sed per paracentesim feliciter curati , historiam , ab amico Doctore communicatam , inferiùs ad calcem abscessus, & ulceris hepatis exponimus.

Tres Hepatitidis Classessum facile inter se, tum ab aliis morbis interstinguuntur: & cur eò sit deventâ res medica, ut hæ non tantum invicem sed insuper cum aliis longè diversis hepatis morbis plerumque confundantur.

XII. Porro, quemadmodum his tribus Hepatitidis classibus cæteræ omnes ejusdem species , fortasse per solos gradus distinctæ , reduci à perito Clinico facile queunt , & illæ, quæ cum febre aggrediuntur , & quæ sine febre ; & quæ cum oborto deinceps tumore , & quæ sine tumore ; aut cum ciborum fastidio , aut etiam cum servata appetentia ; aut cum delinquentium succorum ab hepate ad alias partes excursionē , earumque idcirco majori , aut minori consensu , aut cum inducta veluti ad solum hoc viscus obsidione : Ita per diligentem diagnosis operam non solum dissimiles hujusmodi hepatitides facile , distinctèque dignosci possunt , sed ab aliis morborum hepatis generibus cum maxima ægrotantium utilitate , nostræ artis admiratione , & Professorum laude interstingui. Nempe si bene intelligatur (ut ait Galenus loco superiùs citato) quæ accidentia cuilibet morbo propria sint, & quæ aliis quoque morbis communia : ac propterea quæ ab utrolibet genere sint

sint inseparabilia : item quæ magna ex parte , & quæ rarò videri soleant ; atque ea , quæ ancipitem habeant eventum. Idemque lib. 8. de compos. Pharm. f. l. cap. 6. loquens de hepatis affectionibus hæc medentium memoriæ prodit : *Primum igitur omnium discernendum est , num debilitas quadam visceris adsit, aut alia quadam affectio ipsum prehenderit, aut citra debilitatem affectum sit , inflammatione , aut induratione , aut abscessu laborans , aut obturatione , quemadmodum etiam an Erysipelatosam habeat affectionem , aut ulcus , aut aliquam putrefactionem , nam & in hoc hepaticam affectionem dicunt.* Eò interea res Medica deducta est , ut nostrarum ætatum medentes theoretica Galeni, aliorumque expertissimorum Antiquorum placita , Hæmatosin Hepatis , propriasque , & insitas partium omnium facultates docentia , ab instituto circulationis invento dedignant (quod minus adhuc mali esset) simul etiam morbos ab intemperie proscribere à praxi contendant (quod jam humanæ reipublicæ perniciosum est) ; simulque (quod etiam , atque etiam perniciosissimum) solidiora , gravioraque praxeos præcepta, ab illis tam longo , seduloque observationum cumulo, studioque collecta , traductaque dedidicisse videantur ; ut his certè diebus neque Hepatis phlegmonem ab ejus erysipelate , neque utrumque affectum ab Hepatitide , neque Hepatitidum diversas species dirimere (quæ quidem omnes , singulæque affectiones disparem curandi normam plerumque deponent) neque tandem alios plurimos hujus eximii visceris morbos, ab antiquis tam bene descriptos , propriâque diagnosi obsignatos , dissimili pariter , quandoque oppositâ remedium administratione excipiendos , internoscere soleant.

XIII. Prognosis hujus morbi ex variis ipsis , qui obver-
santur in praxi , & ab Hippocrate indicantur , dissimilium
Hepatitidum eventibus , elicienda venit. Jamque , dictante
Sene , breviorum Hepatitidum judicationes per alvum , aut
urinam celebrantur ; diuturniorum verò per suppurationem,
icterum , hydropem , aut phthisim. Ita igitur quò ad primas
D d d effatur

*Prognosis
Hepatitidis
in genere :
& primum
illa ex Hip-
pocrate at-
tingitur, qua
respicit ju-*

dicationem
hepatitidis
per alvum,
aut urinam.

effatur Cous in Aphor. 73. Sect. 4. : *Quibus Hypochondria suspensa, murmurantia, lumborum dolore superveniente, iis alvi humectantur, nisi flatus erumpant, aut urina multitudo proveniat: Hæc verò in febris.* Intelligit quidem in hoc Aphorismo Hippocrates hepatitidem non frigidam, ac cum dolore, & tumore conjunctam; & insuper cum febre, *Hæc verò in febris*, sed non phlegmonosâ; seu sine legitima inflammatione: Quod quidem magis perspicuum reddit alio textu in 2. prognost. & Coac. ubi eisdem eventus recolligit: *Tumores hypochondriorum sine phlegmone recens obortos tum inde natos dolores exolvit borborygmus in Hypochondrio excitatus, maximèque si exciderit cum urinis, & dejectionibus: Sin minùs, ipse per se trajectus. Juvat etiam is, qui ad inferiora devolvitur.* Supervenit hîc annotandum, fuisse Hippocratem in hoc textu loquutum de affectu ipsorum majorum viscerum, in hypochondriis degentium, non verò partium hypochondrio confinium, ut glandularum mesenterii, pancreatis, & omenti, veluti eidem aphorismo commentari studet Lucas Tozzius. Quippe tumorum Hypochondrii nomine nunquam utitur Hippocrates, quin systrophicam principalis comprehensi visceris affectionem intelligat: Ita hoc pacto non minùs ab hoc loco exulat suspicio aliûs Hippocraticæ sententiæ: Quòd nempe Senex potuisset sermonem instituere de flatibus, doloribus, aut aliis passionibus intestini coli, sub dextro Hypochondrio, imò in eodem, ad hepatis crepidinem trajicientis. Siquidem Borborygmus intestinum, ipsorumque alios morbos potius per meteorismi, quàm per tumoris nomen pluries ab eodem indicari animadverto. Cùm autem hujusmodi in Hepate congestiones à viscida, lentaque bile, pituitæ, (seu lymphæ cum modernis dicamus) commixta æstimandæ sint, ita murmur in hypochondrio obortum ostendit, moliri ipsam febrem earundem attenuationem, & dissolutionem, cui quidem operi sensibilis per urinas, aut secessum, vel insensibilis etiam per flatus solutæ substantiæ dissipatio non difficilè succedit;

succedit; Cum victæ cruditatis, & restitutæ virtutis peristalticæ intestini signum esse borborygnum addat Duretus in Coacis. Accidit igitur (ait Galenus in Commentario hujus Aphorismi) tali murmure descendente ad lumborum loca, unâ cum ipso tumorem ex hypochondriis deportari: Unde partibus, quæ hîc sunt, ex ipso distentis, provenit dolor: Deinde hoc pacto, humore aliquando ad distributionem concitato, solus spiritus flatuosus emittitur, nonnunquam verò unâ cum humore.

XIV. De non rara diuturniorum, sive inveteratarum Hepatitidum suppuratione, quam indè alvus deponit, loquitur Hippocrates in Coac. prænot. hoc modo: Circa hepar dolentes, cardialgici, veternosi, perhorrescentes, alvo turbatâ, macri, ciborum fastidiosi, sudatiunculis crebri, purulenta per alvum profundunt. Cardialgici, seu ab acore bilioso per cholidochum usque ad ventriculum exundante in nervosis hujus utris partibus laceffiti, atque exstimulati: Veternosi, seu capite graves, menteque infirmiores redditi: Perhorrescentes, ab horrida scilicet suppurata materie, cujus transmissio non sine rigore, aut horrore succedit: Alvo turbatâ, seu hepaticis liquaminibus, intestinale jam tubum alluentibus: Macri, ob adjunctam febriculam, tum naturalium viscerum caco-chymiam, atque hinc chyloseos depravationem: Ciborum fastidiosi, ob deteriore bilem per caveam ventriculi exundantem, seu ut ait Duretus, ob ruptam hepatis bilem, & sursum proruptam, fortasse & puri commixtam: Sudatiunculis crebri. Quod quidem symptoma ab oppressione circa initia morbi, aut ab exolutione in diuturni progressu ortum ducens, pessimum est, si cum superius memorato horrore contingat; juxta illud Senis pariter in Coacis: Crebra sudatiuncula, & horroris vicissitudo, pessima: Nam dum vitam finiunt, empyema ostendunt, cum alvo turbata. Hujusmodi autem empyema illam superius in abscessus hepatis disquisitione Can. I. memoratam secundi generis suppurationem significat, quæ in peculiari sede & folliculo interdum versûs intestina abrupto, colligitur, ra-

*Prognosis
ex Coac. He-
patitidum in
suppuratione
vergentium,
& qualis
isthac Hepa-
titidum sup-
puratio ple-
rumque sit.*

rissimè per visceris vasa diffusa manet. Atque insuper hîc annotandum, seu potius repetendum est, quòd si in his, aliisque hujus Historiæ locis per nostras, Hippocratis, aliorumque observationes, suppuratas Hepatitides proferimus, de hac secundi generis, seu deteriori suppuratione intelligi volumus; tum non de bile, ut bilis est, quam quidem suppurationem haudquaquàm attingere in biliosarum pleuritidum tractatu suo loco demonstravimus; sed de pituita, seu lymphâ, in biliosi erroris consensus rapta, eique immixta, atque morbosas stases fervoresque insimul patiente, nostram aperimus sententiam. Quod si in calidiori hepatitide cum bile sanguis vehementer in hepate, veluti per contagium inflammetur, produci abscessus posse, fervore, malitiâ, & contentis substantiis, non absimiles iis, qui producuntur à phlegmone, profectò non inficiamur.

Prognosis ex eodem Hippocrate Hepatitidum, in icterum difficilem, aut in hydropem abeuntium, earumque, quæ in phthisim facessunt.

XV. Hepatitides quæ in difficilem icterum, aut universalem Hydropem vergunt, per propria signa à colore cutis petenda dignoscere docet Hippocrates in Sect. I. lib. 2. morbor. vulgar. sub his verbis: *Quibus quod est inter abdomen & cutem inflatum est, & non subsidet, iis color est velut multum pallidus, aut ex albo pallescens, quoniam ab hepate totum quod tale est procedit, hepaticis etiam morbis laborant, quin etiam qui ictero ab Hepate tenentur, colore subcandido suffunduntur, velut aquâ inter cutem laborantes, & Leucophlegmatici. Verum & Hydropes, & icteri, qui à liene procedunt nigriores sunt.* Vallesius in iisdem Epidemicis fol. mihi, 107. hunc textum sat appositè commentatur. Sed omnium pessima hepatitis est, quæ in phthisim degenerat. *In Hepatico*, ait in Coacis præceptor, *mala est colliquatio cum raucitate, idque cum aliàs tum si tussicula sit:* Cujus textus cum eleganti Dureti commentario superius in Can. VII. meminimus. Frequenter nobis in Praxi obversantur hujus notæ ægrotantes, icterici, luridi, dextro Hypochondrio dolentes, & interdum tumidi; tumidi

tumidi insuper pedibus, æstuosi, siticulosi, nauseabundi, anhelantes in scalarum ascensu, aut quolibet mediocri exercitio; lentè insuper, simulque periodicè febricitantes, cum profunda, & præcipuè nocturna tussi, quâ flavum, viscidumque expuunt. Interdum quâdam appetentiæ emicante prurigine melius habere videntur, sed febre nunquam vacui vertente tempestate citò in deterius ruunt; hinc sensim colliquant, ac demùm prorsus tabidi, aut tumidi, aut diarrhoeâ correpti, aut orthopnoici præcipitanter, quandoque improvisò moriuntur. In hocce mixti morbi genus studiosi præcipuè, & melancholici adducuntur. Ex his interea non tantùm quisque diuturniorum hepatitidum diagnoses, sed pessimas, imò funestas prognoses elicere faciliè poterit. Ita in Phthisi Hepatica cruentum mali odoris, atque biliosum reverà sputum copiosè ejectum proximam necem denunciat: juxta illud Senis in Coac.: *Quibus hepaticis copia est cruenti sputi, ejusque vel nonnihil mali odoris, vel biliosi meri, citò mortiferum.* Ita si pallidus hepaticorum icterus virore suffundatur, est citò mortiferus, etiam juxta sensum Hippocratis 3. de morbis: *Morbis regius acutus est, & citò necat, si color totius malicorium maxime refert ex viridi pallescens, & qualis lacerti viridis, seu viridis albo interspersus color.*

XV I. Sed, quæ tam crebram se præbet, variisque modis conficitur Hydropis ab Hepatide productio, tanti momenti est, ut ejus principia, & causas hîc diligentius excutere operæ pretium censeamus. Cum enim non insolens sit tum calidam, tum frigidam hepatidem, si utra diutiùs protrahatur, in scirrhum, eumque incurabilem vergere, ex quo indè variæ hydropis species proficiantur; ita non rarum videtur, ex alterutra, etiam non producto scirrho, hydropicum adhuc morbum secundùm circumstantias varias originem ducere. Et primò quidem in hunc censum reducitur Aphor. LVII. Sect. VII. *Quibus hepar aquâ plenum in omentum erumpit,*

D d d

3

perit.

Examinantur Hydropes ab hepatico vitio proficiscentes; & primum ascites à ruptura hydatidum Hepatis, qui hydrops prorsus est incurabilis.

perit, his venter aquâ repletur, & moriuntur. In hoc Aphorismo incomparabilis Hippocratis Doctrina morborum, atque indefessæ observationis majestas per omnes posterorum ætates effulgebunt. Ipsi siquidem ignotus non fuit, qui maximum recentiorum inventorum videtur ornamentum facere, vesicularis hydrops, sive in hydatidibus congestus hydropicus latex, cujus, non solum per peculiaria viscera, sed per totum præterea abdomen dispositi plurimæ circumferuntur modernorum medentium animadversiones. Quippe cum in variis, præcipuè contumacioribus hepatidum affectionibus illa sit vasorum hepatis mutua compressio, & angustia, ut lymphæ ab internis hepatis partibus ad chylare excipulum per propria lymphatica vasa properantes, sive ad circulum reduces, tum minùs in proprios cursus urgeantur, tum in priorum canalium progressu nova adhuc ab externis pressionibus impedimenta subeant, disposito ad latera vasorum nisu, eadem inter binas naturales angustias, seu inter valvulam, valvulamque extrinsecùs sensim extrudent, atque ampliabunt; ut demùm unumquodque his valvulis interpositum spatium, aut plura saltem, rotundam sive vesicularem affectare figuram queant: Hinc longè, latèque vesicularum, seu hydatidum, secundùm liquidorum pressionem majorum, aut minorum, excitabuntur series, sive catenationes; quæ quidem vesicularem hydropem procreent: Quare Hippocrates suo etiam tempore, ut nos nostro, vesicas hujusmodi aquâ plenas ad ambientem hepatis membranam recognoscens, hasque indè à vehementibus contentorum liquidorum pressionibus ultra resistantiam omnem expansas, hinc & abruptas, aquam in ventris cavum effundere, atque asciticum hydropem producere interdum deprehendens, hanc etiam ascitis speciem memoriæ hominum aperire curavit: *Quibus hepar aquâ plenum in omentum eruperit iis venter aquâ repletur, & moriuntur.* Dicit ergo *in omentum*; non quidem quòd aquam in ipsam tunicarum omenti cavitatem hydatides exonerent, quia

quia omentum hepati, & ventriculo superincumbit; quemadmodum non bene effatur in hujus Aphorismi paraphrasi Lucas Tozzi, cum omentum minimè hepar obtegit, & à solo ventriculi fundo (præter quàm ab aliis partibus) propendeat; sed quòd aquæ ab Hepate erumpunt in locum ab omento occupatum, seu inter intestina, & peritoneum, ut hoc pacto in medio aquarum, ad hanc indè sedem collectarum, omentum ipsum immersum natet: Quod quidem in omnibus asciticis affectibus occurrit. Addit *iis venter aquâ repletur*: Quæ quidem saturitas celerius, aut tardius absolvitur juxta abruptarum hydatidum magnitudinem, & numerum. Demùm concludit: *Moriuntur*: Non quidem ab omenti erosione, atque insanabili ulcere, ut perperam denuò citato loco proponit Tozzius; sed quia vel intacto omento (ut reverà in ascite denatorum extispiciis nunquam ulcerosum perspeximus, licèt reverà flaccidum, laxissimumque, & tabe penè totum consumptum) Nemo ab ascite hydrope evadit: Ita Hippocrates in lib. affect. sect. V: *Morbis lethalis est, cum venter aquâ plenus esse cæperit*. Ita perpetuò autopsia: neque ulla valet instituta paracentesis ut ex Hipp. cit. loco [nisi aqua in peritonei duplicatura duntaxat niduletur] quæ imò lethum accelerat: Eoque insaniabilior censendus est Hydrops hujusmodi, ab Hepatis lymphaticorum ruptione progenitus, quò, vel omisâ ascitis ratione, nemo certè perennes illos in perruptis hepatis vasis exundantium aquarum fontes siccare posset, & claudere. Conciliari igitur cum Aphorismo Hippocratis non posse videtur illud in ejusdem Commentario Galeni assertum: *Servantur enim aliquæ aquæ inter cutem laborantes, quamvis & hic locus* [scilicet ad omentum] *aquâ repleatur*. Nam licèt sanari anasarcâ, aut leucophlegmatiâ, seu universali hydrope detentos non sit tam difficile; si tamen *hic* ad omentum locus ipsis etiam aquâ repleatur jam ergo *servari* non possunt: Quòd si intereâ *serventur*, hydrops ad *hunc locum*, seu propriè ascites, non fuerat, neque à rixi hydatidum hepatis ortum duxerat: Sed solum in peritonei duplica-

duplicatura gliscebant aquæ. Atque ut hæc hydropifica ad peritoneum collectio se curationi per punctiōem, aut etiam diuresim institutæ non difficilem præbet; ita propriè non est ascites dicendus. Mirabiles casus, & judicationes Hydropis duplicaturæ peritonei in alio opere consultò exponemus.

*Examinatur
alia species
hydropis, seu
universalis,
ab hepatico
pariter erro-
re ortum du-
cens.*

XVII. Hepaticum pariter, re tamen vera non asciticum hydropem denotat locus ille Hippocraticus in Coac:
Quibus ab hepate sunt hydropes, unà tusses adsunt, & crebra incessit tussendi cupiditas, commemorabile nihil expuunt, ac pedes tument, tum alvus non dejicit, nisi dura, ac coacta: Quin etiam circa ventrem asurgunt œdemata, partim dextra, partim sinistra, quæ modò consurgunt, modò subsidunt. Dispar profectò ab ascite revelatur hoc loco ab hepatis vitio procreatus hydrops, nempe universalis potius, cum aliquo affecti pectoris consensu, ab oppressione potius tumidi jecoris (veluti in ejusdem Phlegmone contingere assolet) quàm à pulmonis systrophe producto; tum non quidem à lymphaticorum, seu hydatidum laceratione, sed à depravata in hoc viscere biliari secretionē. Ita Duretus in subnexa paraphrasi principia hepatici hujus vitii deducit, vel à *torrido marasmo, quem febris impressit ardens, acuta, nec tamen tam citò peremit; aut à chronica, & vetusta febre, ut quartana; vel etiam à suffocatione nativi caloris, aut à scirrho;* quæ repeti non minùs possunt à qualicunque alia hepatis atonia, seu intemperie, vel ob præcessas hæmorrhagias, aut alias immodicas evacuationes, vel à frigido succorum lentore, aliisve similibus causis in hoc viscere inducta. Quidquid verò sit; in hac hepatis diathesi, quæ ad hydropem viam sternit, bilem crassiores præternaturaliter, crudamque, & inertem evadere, propriâque absterzivâ, & solvente, ad chylicationis perficiendum opus institutâ potestate, propriisque naturalibus, alvum ad solitas excretionēs irritantibus, stimulis destitui, abundè liquet ex illo Hippocratici oraculi indicio: *Tum alvus non dejicit;* quod quidem vocat Duretus *sylogisticum signum*

signum hepatici hydropis. Cum verò alvi suppressionem chylo-
seos pariter depravatio necessariò consequatur, sanguis in cru-
dam, & serosam colluviem paulatim faciens, frigidis
ineundis lentoribus, contumacibus oppilationibus, chlorosi,
cachexiæ, & congerendo demùm universali hydropi, simulque
particularibus *œdematibus*, se facilem præbet. Hanc verò
Hydropis speciem non, ut superior, immedicabilem repu-
tamus, cum universalis hæc sit, tum inexhaustam in jecore
morbi scatebram non recognoscat; atque inprimis à tenuiori,
mobiliorque humore produci hæc affectio videatur: *Oede-
mata partim dextra, partim sinistra, quæ modò assurgunt, modò
subsident.* Remediorum ad hunc morbum administrationem
inferiùs in curatione frigidaë hepatitidis memorabimus.

XVIII. Marasmus Hepatis, quem inter Hydropis *Examinatur*
causas accensere Duretum superiùs annuimus, calidaë hepati- *Marasmus*
tidi, diutiùs in biliosis protractæ, aut acutiori febre stipatæ, *Hepatis, à*
quandoque succedens, ab Hippocrate in Coacis, aliisque lo- *longa, aut*
cis, sub nomine *exhausti fricti*, seu quasi *fricturâ retorridi* *etiam brevi*
indicatus, concinnè adeò, appositèque à solertissimo laudato *Hepatitide*
Dureto, Hippocratis Ocello, describitur, ut integrum ejus- *progenitus;*
dem; tametsi profusorem, à suis in Coacas commentariis *qui idcirco*
decerptum, subnectere textum non tædeat. „ Exhausti hepa- *duplex est;*
„ tis, atque tostæ causa est cæcus ignis, vel ardor febrilis, *Acutus, &*
„ undè celeriter continenter, & vehementer febris movetur, *Chronicus.*
„ proindèque acuta est, undè Hydropes veniunt. Atque cæ-
„ cus ignis fundamentum habet in dyscrasia congenere, velut
„ parentum vitio lata; tum in coæva, quæ cum ætate simul
„ accrescit, tum ea, quæ primùm insita, diætam nacta est,
„ quæ vires acquirit eundo. Talis est dyscrasia eorum, qui
„ jam intemperiei à prima compagine, sicut Apollonius, dys-
„ crasiæ pergrandis accessionem adjungunt, æstare potissi-
„ mùm ab edacitate, ut ait Hippocrates, & liberalissima
„ potione vini. Atque hic cæcus ignis depopulatur hepatis
„ gratiosum humorem, ipsumque reddit exuccum, quod
E e e „ aref-

„ arefciendo fit durum , & è fuave rubenti nigrum , aut ci-
 „ nericium. Sic ab exhausto vis perit sanguifica , & pro
 „ sanguine funditur serum , aut pituita atrii coloris, aut cinerei.
 „ Interea dum cæcus ignis depopulatur humidum primige-
 „ nium , antequàm incommoda veniant marasmi hepatici, de-
 „ populatio illa cernitur in atrophia , & cachexia hominum
 „ morbo regio fœdatorum , in siti , & siccitate linguæ fucatae
 „ subviridi , aut flavo colore, tum in febricula quadam no-
 „ cturna , & parum placida membrorum quiete. Dejectiones
 „ sunt pilulatæ vervecinarum modo. Urinæ multâ bile sa-
 „ turatae. Adveniente marasmo paulatim hydrops affurgit ,
 „ perennitate ichoris in alvum confluentis. Superest causa
 „ altera marasmi hepatici , quæ posita est in ardore febrili,
 „ quo ipsum hepar conflagrat. Enim verò nihil æquè na-
 „ tivum calorem extinguit atque febrilis ardor. Ac sanè
 „ jactura fit major humidi primigenii septem diebus à febre
 „ acuta , quàm à calore insito septuaginta annis. Septem die-
 „ bus vitam is finit , tabificâ vi febris consumptus , qui sep-
 „ tuagenarius erat futurus duce nativo calore. Nihil tam citò
 „ fatale est ad interitum , quàm febris acuta , si pestilentiam
 „ tantùm exceperis. Ergo marasmm facit febris acuta, quæ
 „ in hepate focum habet. Qualem in Hermocrate notavit
 „ Galenus ex historia præceptoris. At talis marasmus, aut
 „ citò mortiferus est , ut in Hermocrate , aut hydropificus,
 „ ortus ab hepate ex morbo acuto. Hic sanè miserrima est
 „ conditio febricitantium , siti ardentium , qui ejus non di-
 „ cam depellendæ causa , sed ne levandæ quidem , pauxil-
 „ lum frigidæ impetrare non possunt à quibusdam super-
 „ stitiosis. . . . Nefas est non explere sitim , quæ facit ma-
 „ rasmm hepaticum : Nam & sitis causa est causi : Quo-
 „ niam venulæ cùm exaruerint , ad se attrahunt biliosos , &
 „ acres ichores. , Hucusque Duretus. Cujus vel ob hæc so-
 „ la postrema verba laus non immortalis esse non posset ; cùm
 „ in sæculo veteribus fermentis nimium imbuto , Arabumque
 neniis

neniis adhuc non mediocriter obnubilato, quo quidem plerique humorum morbi specialibus quibusdam putredinum classibus referebantur, ut in ægris vel ardenti febre correptis potatio, ob metum augendę putredinis exularet, illuminatissimam ipse medicinam adhibens in his calidis hepatis affectionibus frigida potationem acriter insinuat. Quandoquidem quot apud sectę deterioris antiquos biliosę leviores, imò vel intermittentes febres in causones, indęque in mortiferas hecticas degenerasse visę sunt, à largo humectante potu, qui eas tempestivè cicuraret, atque (ut facilè fit) inter initia reprimeret, crudeliter inhibita! An ex bono medendi artifice, magistroque Hippocrate, atque germana ejusdem scholę in Erysipelatosis ipsis affectibus (ut inferiùs annuemus) in ardentibus febribus, biliosa colica, cholera morbo, aliisque morbis, à tenuiori, acriorique bile productis largiorem frigida, & purę toties commendatum usum ediscere quilibet abundè non potuisset? Sed ut ad institutum redeam: Est igitur marasmus Hepatis veluti à longo, vehementique ejus incendio superstes cinis: Exucca, & veluti coriacea reddita hepatis caro. Et sanè in hominibus, à chronico hujus visceris marasmo percitis, seu à primi generis depascente igne, qui sensim, ob congenitas, vel adventitias, vel etiam utrasque causas, in dies invaluerit, consumptis, atque hinc post longum corporis squalorem denatis, & apertis, deprehenditur jecur prorsus aridum, nigrum, durum, coriaceum, in minimam molem retractum, cultri aciei enormiter resistens; aut ex adverso sibi, ob irrigantium succorum penuriam, sibi vix cohærens, friabile idcirco, atque in granulofas, & ferè fabulosas particulas facili ope dissiliens. In marasmo verò secundi generis, seu acuto, ab ardenti, brevique febre progenito, jecur humidius quidem adhuc perspicitur, cum sanè velocissima illa febris qualescunque visceris depasce, atque extinguere humiditates non valuerit. Interea durum, & lividum, cinereum, viride, eruginosum, interdum & nigrum

obversatur. Dodoneus cap. 3. *Observat. medic.* refert nobilem quendam 20. annos melancholiâ conflictatum, qui tandem de virium debilitate conqueri, cibumque & potum averfari cœpit, cum nulla febre, imò cum frigoris sensu per universum corpus, pedumque œdematoso tumore; sed cum rubicunda urina, veluti si febris ardens, aut hepatis inflammatio affuisset. *Malo tandem*, addit hic author, *ingravescente, ad alium cibum sumendum, præter exiguam sorbitionem adduci non potuit. Ita inediâ consumptus è vita migravit.* Hujus hepar colore undique nigrins, quàm secundum naturam, apparuit, sed tamen minùs nigricans, quàm pulmonis sphacelo corrupti substantia, impressorum digitorum vestigia ferè retinebat. Videtur autem hic casus non hepatis reverà marasum, sed potiùs corruptionem, atque sphacelum repræsentare; cùm tanta adhuc in livescente hoc viscere scateret humiditas totam substantiam relaxans, & emolliens, ut digitorum impressorum vestigia ferè retineri valerent: tum causæ non præiverant quæ genuinam hepatis tabitudinem induxissent. Cùm verò in his omnibus extispiciis illâ, quâ hepar afficitur, tabificâ labe alia pariter suffundi viscera non deprehendatur, marasum hepatis, non ab antiquis in hæmatoseos, (quam in hac parte conditam existimabant) frustratæ gratiam leviter fuisse excogitatum, sed morbi distinctum genus, ab aliis omnibus dispar constituere, lubenter fatebimur: tum de facili ejusdem productione mirari non subiet. Cùm enim in omnibus liquidorum morbis bilem proprias etiam compati ametrias, neque morbosus ignibus, simulque lentoribus, & pravis stationibus excipiendis, aut producendis Hepate, & bile nullam aliam hominis partem, nullumque humorem alium se paratiorem præbere, sat alias ostensum sit; Quidni in præternaturali hominis longo, aut acuto breviori igne Hepar contracti mali manifesta argumenta non porriget, quod quidem vel in levioribus morbis, tantum ignem non excitantibus, plus minùs à naturæ statu immutatum continuò deprehenditur?

XIX. Cùm

XIX. Cùm igitur ab utroque etiam marasmo hepatico trahere hydropes originem soleant, jam certè plurimæ hepatis affectiones accedunt, quibus antecedentium hydropis causarum potestas denegari non potest: Phlegmone (ut vidimus superius in Can. XIII. hujus Hepatici affectus) vel contumacior obstructio, vel scirrhus, vel lymphaticorum ruptiones, vel exsiccatio, & contabescencia, vel ulcus, ut suo loco; vel tandem etiam spasmus, ut inferius habebimus; quorum quidem omnium morborum contumax hepatitis fundamentum plerumque est, & origo; tametsi frequenter etiam ab aliis principiis, inculpabili hepate, accumuluntur hydropes, & fiant; ut ostendimus superius in II. Parte Cap. V. fol. 157. Ita Hippocrates in Coacis Hydropes ab Hepate, atque hydropes ab aliarum vitio partium proficiscentes, in genere distinguit: *At verò hydropes illi permolesti sunt, atque mortiferi, qui veniunt è morbis acutis: Plurimi autem nascuntur à lumbis, & ilibus: Alii verò ab hepate.* Jamque in hoc textu Medicinæ Dictator hydropes à primigenio liquidorum vitio subortos recensere primùm videtur; quos quidem, veluti ab ingenti, subitâque sanguinis dissolutione, atque in serosis partibus colliquatione excitatos, absolutè lethales denunciat. Ita etiam in lib. prænot. sect. II. reperit: *Aqua inter cutem, quæ ex acutis morbis oritur, mala. Nam neque febre liberat, vehementesque dolores excitat, & lethalis est.* Postea hydropes ab ilium, lumborum, atque hepatis errore nascentes commemorat. Porro non hos solùm à lumbis, ilibus, & jecore, sed ab aliis etiam visceribus, ventriculo, intestinis, licne, utero, pulmone; renibus, cerebro, præterquàm ab hæmorrhagia, aliisque humorum defectibus procreatos hydropes variis recitat locis Hippocrates. Per illam verò textus singularem particulam: *Plurimi autem nascuntur à lumbis, & ilibus* arguit Senex illos nominatim hydropes, qui dolorifici sunt (ut indè declarat in sequentibus) qui nempe à spasmodica

Recolliguntur omnes hydropum cause, quæ in jecoris vitio sita sunt, atq; ab aliis aliorum viscerum distinguuntur; omnesque hydropis species accensentur, quæ ab iis deduci possunt.

diathesi intestinalium , & meseraicarum partium [ita enim perspicaciores exponunt interpretes] ut plurimum concitantur; sive siccos , & convulsivos hydropes , stabilem abdominis, atque uniformem tensionem , seu tympaniam in medium ducentes. Hi nempe mixtam diuturnam hepatitidem sæpissimè sectantur , si hæc spasmodicæ nerveorum mesentericorum plexuum affectioni , seu ut dicebat Hippocrates *hectica intestinorum* , spiritu flatulento fetorum intemperiei copuletur. Sicci hujusmodi , & doloriferi hydropes ut plurimum insanabiles exant ; quos quidem illæ excretiones non exolvunt , quæ alios hydropes sanare valent. Vide superiùs in disputat. de Hepatis Phlegmone cit. Can. XIII. Tandem addit , *Alii verò ab hepate* : Quos certè hydropes licèt in hoc textu ab acuto exquisitè morbo , seu ab hepatis phlegmone , accensoque per hunc morbum sanguine videatur elicere ; in aliis interea locis à non tam acuto morbo , sive ab una bilis maleficientia deducit ; ut satis explicat per illum in Coacis : *In biliosis alvus turbata , quæ pauca exhibet similia genituræ atque mucosa , & circa Hypogastrium dolorifica , nec urina faciles in meiando , ex talibus desinunt in Hydropem* , cujus explicatio apud Duretum, aliosque interpretes videri poterit : aliàs etiam hepaticos Hydropes à frigidis causis , ut à contumaci pituitosa obstructione referre intendit. Ita lib. de int. affect. *Aqua intercus ab Hepate* ; quæ tunc quidem oritur , cùm ad hepar pituita accesserit, eamque hepar exceperit , & humectum redditum fuerit : confestim igitur ardorem huic præbet , & flatum excitat. Deinde verò procedente tempore aqua impletur ; posteaque corporis morsus contingit ; in tibiis , & pedibus tumor est laxus , hepar durum redditur , ac intumescit : & clavicula extenuantur. Quare , ut omnia recolligam : Docemur ab Hippocrate , non solùm hydropem in genere ab hepatis affectu , sed varias hydropis species à diversis hujus visceris affectibus procreari : Ab eruptione , & cataclysmo aquarum ex lymphaticis hepatis particularem hydropem , seu ascitem : à Phlegmone , aut biliosa ejus

ejus diathesi, tum à frigidis, & lentioribus morbis, ut ab inveterata obstructione, à scirrho, & similibus, universalem hydropem, sive anasarcam, aut leucophlegmatiam, seu pituitam albam: & tandem ab hepate, in convulsivæ, flatuosæque diathesis vicinorum viscerum consensum advocato, particularem alium, sed ficcum, & tympanitem hydropem. Atque hæc de hydropificis non benè judicatarum hepatis passionum symptomaticis, sive succrescentibus morbis, pro rei instituto sat dicta sunt.

XX. Porro: Cùm ex Hippocratis monitis per alvum aut urinam feliciores in genere hepatitidum judicationes attingantur, quibus nempe fluxibus vitiosorum humorum crassamina accommodari sat aptè possunt; ut id promptius, faustiusque obtineatur, medicamentis iis insistendum esse videtur in genere, quæ incidendi, attenuandi, abstergendique tutiori facultate pollentia, vitiosos succos ad exitum apparent, attenuatos, abstersosque solvant à visceris implexu, atque hinc per memoratas vias eliminant. Attamen cùm id sæpius in calidarum hepatitidum principio contingat, ut sanguis in biliosorum æstuum conspirationem concitatus, tum febres non mediocres excitet, tum visceris vasa repleat, aut impediatur, & sensiles partes distendat, cum majori, aut minori tumore, ac dolore; Tunc certè à phlebotomia erit incipiendum; quâ nempe sanguinis in hepar ferociùs irruentis retractio, in eodem consistentis, atque æstuantis amotio, & visceris oppressio sublatio instituitur. Quòd si ab imbecillitate, ut suprà, seu atonia solidi hepatici oriatur affectio, unde sanguinis, & bilis retardatio, simulque enormis congestio, hinc tumor, & dolor deffumenda sint; maximo adhuc auxilio esse potest sanguinis missio; quâ quidem tanta detrahitur ad retardatorum, congestorumque, succorum repetendos fluxus resistantia, & impedimentum, quanta est extracti sanguinis copia. Hinc Cous in curatione Hepatitidis cum dolore, & tumore manifesto, etiam absente febre, non

*Quâ remedium ad-
ministratio-
ne sit in He-
patitide
utendum,
tum in gene-
re, tum in
specie. &
primò de usu
Phlebotomiae*

non solum phlebotomiam commendat, sed in æquali ejusdem, atque catharseos indicatione esse ab ipsa auspicandum, sub his verbis commemorat in Coacis: *Quibus continuò in febris vacuatione, hypochondrii, & cordis dolor, crurumque ac partium inferiorum, & unà venter in molem assurgit, phlebotomia exolvit, & alvi profluvium.* & 4. acut. confirmat. Hic à phlebotomia ordiri oportet. Additque Duretus in comment. ad Coac. fol. 388. *Quamlibet hujus visceris dolorificam systrophem non nisi phlebotomia concedere, si desit hemorrhagia; reddi verò insanabilem, si quis antè operam purgationi dederit, quàm venam secuerit:* Neque igitur solum in ejuscemodi, inflammationem producentis, aut minitantis, hepatitidis principio detractio sanguinis, veluti ob revulsionis rationem, instituenda est; Sed etiam in progressu, ipsoque statu, si calida adhuc oppressio visceris maneat, & vires ferant, derivationis modo, imperanda; tametsi febris admodum cesserit: Cùm à præceptore 7. Prorrh. habeamus: *Quæ in hypochondrio relicta supersunt incendia, extincto febris ardore, malum denunciant.* Nec opportunior sanguini, & bili celebrari derivatio poterit; quàm per admotiones hirudinum sedalibus venis, etiam pro rei ratione repetendis: Quibus sanè multa sanguinis, ad Hepar per portam venam progredientis, copia imminui potest; hinc viscus ab obruentibus, atque exundantibus liquidis expeditiùs reddi.

Quando
purgandum
sit, & quan-
do præpa-
rantibus
duntaxat
insistendum;
& quam
preparantia
seligenda.

X X I. Postquàm appositè fuerit emittendi sanguinis indicationibus prospectum; cùm à praxeos legibus doceamur, vitiosos succos protinùs esse vacuandos, atque per debita emissaria eliminandos, si hi in secretoriis, atque excretoriis sedibus expediti, paratique degant; priùs verò præparandos, sive alterandos, cùm, vel strictiùs impacti visceribus hæreant, vel latiùs soluti, & palantes facti, sus deque debacchen- tur; ideòque primi attenuandos, atque dissolvendos se præbeant, alteri recolligendos, & condensandos; ex his certè fontibus tota in quolibet hepatitidis genere, & gradu, nec non

non quâcunque delinquentium succorum indole rectæ curationis ratio manare posse videtur. Quippe si calida hepatitis occurrat, simulque efferata bilis non tantum æstuet in hepate, sed insuper, suscepto sanguinis itinere, per alias partes exundet, atque in primis *turgeat*; eâdem horâ convenienti cathartico deturbabitur: Si verò non *turgeat*, seu genuinum orgasmum non induerit; aliis interea modis sine tam manifesto in primis viis apparatu laceſſat partes, & ſtimulet, unde Phlogoses, febres magis, minùſve ardentes, exſiccationes, nausæ, vomitus, cardiogmi, dolores capitis, croceæ, fervidæque urinæ, anxietates, ſpirandi angustiæ, ſitis, cutis ardor, prurigo, & ſimiles affectiones excitentur; præmiſſo leviori, seu minorativo, ut dicitur, cathartico remedio, quod primarum viarum verrendas ſordes reſpiciat, ut caſſiâ, pulpâ tamarindorum, diaprunis &c. eiſque inſuper ſubſtituto abluentium, atque lenientium clyſterum frequenti uſu; de longis, atque repetitis humectantibus, temperantibus, increaſantibus, deprimentibus, atque, ut dicitur, refrigerantibus conſulendum erit. Medicamenta, ex vegetabili regno elici- ra, hepar, & bilem refrigerantia ſunt, Radices cichorii, acetof. taraxac. fragar. fol. acetof. end. ſcariol. acetofell. cichor. ſonchi, lactucæ &c. quorum claſſes, & formulę, ſive deco- ctiones, ſucci, ſyrupi, apoſemata, diſtillata &c. apud Sen- nertum *in hepatis intemperie*, alioſque authores abundè recen- ſentur. Opportunum eſt ſerum lactis depuratum, ſincerum, aut cum refrigerantibus herbis alteratum; tum pro delicatio- ribus per M.B. diſtillatum: In primis cichorei ſuccus lar- gis aquarum refrigerantium, aut juris, hauſtibus dilutus. Con- ferunt ros vitrioli, iteratis digeſtionibus à vitriolo abſtractus, & diligenter edulcoratus; aqua nuceriana; gelatina C. C. aut eboris; emulſiones ex 4. ſemin. frigid.; Nitrata fixa; ſucci limonum, citri, ribes, granatorum; ſpiritus vitrioli, aut ſulphuris, in longis hauſtibus dilutus; & ſimilia humectantia, alcalica, aut acida, vel acidula, quibus quidem pacari queat

bilis fervor, aut concitatio, ipsaque subtilior dilui, crassescere, aut constringi. Illud interea Galeni monitum VIII. de comp. Med. s. loc. memoriâ tenendum est: *Hepatica Medicamenta non debere esse vehementer refrigerantia; saltem non diuturno usu usurpata.* Quod si fervens humor simul etiam viscidior extet, vel ob terosi vehiculi defectum, vel ob nimium assata oleosa ejus principia, quæ ideò, in resiniformem, & calidam veluti amurcosam substantiam facessendo, compactiora reddantur; refrigerantibus, & diluentibus blandè incidentia, atque abstergentia intermiscenda sunt, deducta ex borrag. bugloss. agrimon. pimpinell. cherefol. hepatic. chamædr. & similibus; atque ex aperitivis radicibus. Deservente febre, neque vehementiori vigente dolore, ad blandiores vitriolatas acidulas confugiendum superest. Prosunt specialia fomenta, in quibus corroborantia laxantibus, atque anodinis sociantur. Optimum est in hoc morbo emplastrum *de flore Cæli* ex officina expertissimi D. Boiron Sabaudi elicatum, dextroque hypochondrio exterius admotum. Denique de quiete ægrotantis præ cæteris cogitandum; juxta illud Hippocratis in epid. *Præcalida naturæ refrigeratio est aqua pota, & quies.*

Quæ paranda sint, usurpandaque in frigida speciatim Hepatide remedia.

XXII. Quod si frigida hepatitis sit, atque bilis inertior, vel ob volatiliorum principiorum defectum, aut profundam nimis illaqueationem; vel ob salinarum, atque oleosarum partium fixiorem, & compactiorem indolem; potentiùs absterfiva, incidentia, extenuantia, solventia, atque exaltantia expetuntur, formis quidem ad operam variis parata. Ita præter illa varia, quæ in hepatis frigida obstructione superius à nobis proposita, huic pariter curando affectui communia esse possunt, valent decocta amara ex eryngio, marrubio, peucedano, absinthio Pontico, aut minimo Lobelii, aut umbillifero; ex chamædrios vulgari, & insuper alpino nostro, seu celebri illâ herbâ rotæ; ex centauro minori, ex cuscuta, chamæpytheos, fumaris, scabiosa, epythimo &c. atque insuper sicca ex his aut similibus vegetabilibus parata remedia,

remedia, seu lixiviosa salia, ut sal. absinth. centaur. tamarisc. &c. tum extracta amariora, ut gentianæ, absinth. chamædr. centaur. scord. &c. Quippe amaricantia, simulque temperamento calida, aut calidiuscula remedia penè insipidam, & ferè emortuam bilem propriâ acrimoniâ extimulare, atque in naturalem indolem propiùs, atque commodiùs resuscitare posse videntur. Imò volatilia salia, spirituosiora remedia, & quæ validiùs impellere, atque excitare apta nata sunt, in hoc affectu prosperrimè quandoque usurpantur; quorum quidem ope refervescentibus liquidis, & solidorum adauctis momentis, si simul revocetur febris, aut præsens vividior reddatur, remedio esse potest: Juxta illud Hippocratis in his frigidis affectibus: *Intendere ignem oportet.* Accensendi præterea sunt inter frigida hepatitis alterantium classes pulveres varii magistrales incidentes, corroborantes, atque excitantes. Utor ego sæpiùs composito ex radic. aron. pul. zedoar. menth. sicci. summit. absinth. pont. pul. viperin. & croco; cujus frequentes doses per diei horas dispertior: Neque insuper in hoc affectu mihi infrequentes sunt boli, aut etiam dissolutiones entis veneris optimi, myrrhæ, & arcani duplicati. Proficuum insuper deprehendimus usum essentia aureæ terræ foliatæ tartari, solutæ à spiritu salis ammoniaci; tum frequentem hauritum ex vino calido cum dissolutione pulveris radic. zedoar., duobus, aut tribus guttulis olei rorismarini priùs irroratæ. Laudo præterea pilulas ex gummi ammoniac. digesti, & nutriti in spirit. ceras. nigror. cum flor. sal. ammoniac. martial. ambr. gris. & ol. cinnamom., quæ ante coenam usurpari frequenter possunt. Sed inter hujusmodi alterantia principatum obtinent martialia præsidia, prudenti regimine adhibita. Utiliores in hoc morbo Martis præparaciones, sunt; Essentia martialis ammoniacalis cum spiritu cherefolii parata; Tinctura ex chalyb. & tartar. venet. calcin. per spirit. vini elicita, immixtaque vino malvatico, in quo pulvis granor. paradisi fuerit diu infusus; sal noster martialis acido quocunque exutus;

vinum per caballinorum clavorum infusionem , & longam macerationem alteratum ; Tum ferri tinctura quælibet , habita in spiritu quolibet urinoso sollicitè dephlegmato. Ferreis his , aut similibus remediis interdum subrogamus sublimatum balsamicum ex sale ammoniaco , marte , & succino s. a. paratum ; vel sal cachecticum chalybeatum.

*Præparantiũ
Præsidiorum
in mixta He-
patitide ad-
ministratio.*

XXIII. In mixta hepatitide , in qua bilis fervor , simulque lenta crassities plerumque copulantur , absente febre , potentiores vitriolatæ , & martiales , thermæ aquæ non leviter cum fructu propinantur : quales apud Insuæres sunt Valtelinenses , dictæ *del Masino* , & Sancti Mauricii. Balnea insuper aquæ dulcis faustè , & opportunè adhibentur : Quod quidem remedii genus in hac hepatitidis specie frequenti usui antiquis fuit. Neque erit hocce præsidium in calidis Hepatitibus , febre vacuis , præmissis , aut consuetantibus internis remediis , omittendum. Cæterum interna remedia in mixta Hepatitide , juxta biliosæ visciditatis , aut phlogosis dominatum , ad abstergendi , & solvendi , aut potius recolligendi , & pacandi rationem prudenter conciliare clinicus poterit :

*Purgan-
tium & diu-
reticorum,
qua præpa-
rantibus au-
xiliis in He-
patitidis cu-
ratione suc-
cedere de-
bent, species,
& formula
varia.*

XXIV. Præparatis igitur , pro ineunda diuresi aut catharsi , peccantibus in Hepatitide humoribus , jam ad præsidiorum alterutrum , secundum morbi tempus , ægri , ac tempestatis constitutionem , & inclinationem , evacuandorum præcipuè humorum , atque naturæ proclivitatem , deveniendum erit ; aut etiam , si expediat , utroque simul utendum. Leviora insuper ejuscemodi Pharmaca secundum circumstantias varias , aut valentiora adhibenda. Mirè aliquando contulit pro leniori hepatitidis non calidæ purgatione vinum album , catharticum redditum ab infusione , aut ebullitione radicum mechoacannæ ; quod quidem pro epicratica purgatione sæpius tutòque usurpari potest. Aliter etiam epicrasim per apofemata aperitiva , simulque purgantia , aut per syrupos mesentericos compositos , aut cachecticos dictos , per syrupum de pomis

pomis regis Saporis , de cichorea Nicolai , & similes , aut per
 extracta sennæ , rhabarbari , agarici , mechoacannæ , diacar-
 thami , per extractum panchymagogum Hartmanni ; aut etiam
 per pilulas , ut tartareas Bontii , de ammoniaco , aut mela-
 nagogas Quercetani , & similes , interdum instituo. Sequen-
 tes pilulæ pro suavi , tutâque in frigidis *hepaticis* purgatione
 apprimè conducunt. R. spirit. ardent. nasturt. aquatic. q. v. in
 hoc solve flor. sal. ammoniac. martial. & refin. jalap. ana q.v.
 spiritum ad quamdam mellaginis consistentiam evaporari cura:
 Cum residuo corpore excipe q. s. massæ pilular. tartar. Bontii,
 ut fiat denuò pilularis massa , ad debitam indè dosim coenam
 ituro exhibenda. Blandè purgat hoc pharmacum manè, noctu
 instar tutioris opiatu suavissimum conciliat somnum. Rob ex
 baccis sambuci catharticum selectioribus hujus farinæ remediis
 succenturiandum non minùs arbitror. Si blandum quod-
 piam exspectatur emeticum : Fac infusionem in unc. V l. vini
 alb. duodecim , aut quindecim foliorum asari , atque
 expressionem ad unc. I V. redditam propina. Quòd si in
 diuresis operam contendere oporteat [quæ reverà pulsus
 crassioribus , turbidisque urinis , morbum integrè solvit ;
 ut hinc Galenus S. de loc. affect. 7. *In hepaticis affecti-
 bus urine quoque deteriores redduntur , quibus imperiti Me-
 dici nonnunquam decepti gravis morbi periculum subesse arbitran-
 tur*] plurima sanè efficacia in his morbis hujusmodi remedia
 obversantur. Leniora diuretica sunt in frigidâ , mixtâve he-
 patitide syrupus raparum , & raphani succus : Valentior est
 celeberrimus Mindereri syrupus , qui apud nostrates , sub nomine
 Pecchii , recentioris ejusdem instauratoris , in frequenti usu
 venit. Communiora præsidia officinalia sunt, salia absinthii,
 tamarisci , corticum fabarum , aliaque lixiviosa plurima ; aut
 cineres juniperi , tiliæ , filicis , fraxini , fagi , genistæ , aut si-
 milium , aquâ , aut vino lixiviati. Selectiora sal polychre-
 stum , nitrum hermaphroditicum juxta Pharmac. Batean. Elect.

diatartarum : Infusio millepedum in tinctura baccarum juniperi , cum spiritu vini parata : Tinctura antimonii Glauberi : Decoctiones fortiores radicis asari , quæ quidem valdè aperitivæ evadunt. In primis spiritus aperitivus Penoti. Prodest eximiè syrupus therebinthino - viperatus secundùm descriptionem Gaspari Realis ; cùm jam suapte naturâ multa sit therebintinatorum omnium facultas ad urinas in his hepaticis, aliisque insuper diversi generis affectibus pellendas. Demùm valdè etiam confert ebullitio in vino albo radicum filicis, & cuscutæ.

Urgentia in hoc morbo interdum symptomata quibus remediis prospicienda.

X X V. Quæ in hoc morbo interdum urgent symptomata per sua pariter, eaque specialia remedia, pacari possunt. Ita strenuum est paregoricum in vehementiori dolore, aut vigiliis, à sæva hepatitide inductis, tinctura nostra anodina è genuino vitrioli sulphure parata. Paregoricum etiam in biliosis hecticis paratur à recenti theriaca, nitro optimo depurato, & spermate ceti. Juvant insuper Pilulæ Matthæi, vulgò in Anglia Starkii dictæ, ex descriptione celeberrimæ Pharmacopœæ Bateanæ. In virium prostrationibus, cardialgia, aut ingenti languore egregius est elixir vitæ Taddei Florentini, aut spiritus stomachichus Patris Fardellæ, apud aliquos in secreto habitus; aut elixir proprietatis Paracelsi, per diuturnam myrrhæ, croci, & aloës in convenienti menstruo digestionem, debitamque per pelicanum, aut bina vasa invicem occurrentia, & ut artis est, obsignata, circulationem, juxta præscriptiones Helmontii confectus.

Quomodo curanda biliales hectica febres, à contumaci hepatitide profecta.

X X V I. Inter contumacioris hepatitidis symptomata præcipuè accensendæ sunt febriculæ quædam, ut supra, periodicæ, aut, ut plurimùm, irregulares, anomalæ, in lentam, & habitualement, hinc hecticam fortasse, & marasmodem facessentes; quas quidem alere potuit pervicax, atque deterrius biliosum crassamen, non tantùm jecoris substantiam, sed & ipsas per sanguinis alveum nutritias, atque oleoso-volatiles

tiles particulas obsidens , glutinis more illaqueans , & compingens , ut depravari secretiones , succorumque recentium cum toto sanguine misturæ tandem aboleri videantur. In hoc quidem statu remedia illa excogitanda , atque in ægrotantis viscera , & sanguinem intromittenda sunt , quæ non tantum coactam , pendulamque , ut dicitur , sanguinis & bilis compaginem dilatare , & laxare , sed insuper propriâ interpolatione roridas , aqueasque novorum succorum , vel ab alimentis , vel à remediis suggestorum copias , in sanguinem introductas cum resiniformi ejusdem substantia commiscere valeant , unamque ex utrisque substantiis substantiam constituere: Eodem pacto , ut puto , atque alcalici salis interventus aqueum corpus cum oleoso satis conjungit , quæ quidem sine hujus tertii concursu consortium non patiuntur , seu in eandem compositionem non coeunt. Fortè etiam bilis naturaliter constitutæ subtilissimus flos , ex intestino in sanguinem remeans , vinculum illud unionis inter recentes , veteresque succos instituit ; qui si in torrida bile , atque in resiniformem habitudinem degenerante deficiat , accommodatis remediis extricandus est , aut ab ipsismet cibariis particulis renovandus. In his igitur hæcticantibus hepatis morbis efficacissimum pro necessariis his ineundis connubiis instrumentum esse , & veluti amicitiae liquorum interpretem , balsamum nostrum nitratum , ex ammoniaco & nitro sale speciali modo paratis , sociatisque confectum , nec non cum cauto regimine adhibendum , etiam , atque etiam experti fuimus. Nec profectò sine hoc introducente remedio liquida quælibet refrigerantia torridioribus , ut suprâ , coactisque sanguinis particulis insinuari possunt , & annecti , quæ nempe haudquaquam cohærentia , vix desuper innatant , citòque elabuntur. Interea quæ febres horum affectuum pedissequæ intermittentium indolem non transcendunt , aut saltem manifestis excipiuntur periodis , à pulvere , composito ex lapide pumicis

pumicis, sale absinthio, corticibus aurantiõrum, & spinachiorum semine non difficilè comprimuntur.

Quanam sit
in variis he-
patitidis spe-
ciebus victus
ratio insti-
tuenda.

X X V I I. Denique victus ratio secundùm hepatitidis naturam varia imperatur. In calido affectu refrigerans, ex tenuibus, humidisque alimentis deducta: In frigido, cibi usurpandi sunt calidi, & aromatibus conditi: In utroque verò vitandi glutinosi, acidi, & constipantes. Vinum in frigido hepatis morbo amplissimè commendat Galenus lib. 8. de compos. Pharm. sec. loc. cap. 7. *Vinum, ait convenientissimum est citra inflammationem, aut erysipelas, aut abscessum, aut calidam intemperaturam, in egrotantibus: Nam & nutrit, & concoquit, & roborat, & putrefactioni resistit: Et si intemperies ex humiditate facta sit, & frigiditate, eam citra omnem molestiam, ac securè persanat.* Idcirco moderni in hoc casu non solum malvaticum, creticum, aut hispanicum, merum, sed variis aromatibus conditum, quod Hippocraticum nominant, cum regimine propinant. In mixta Hepatitide diætæ ratio medio pariter modo habenda est. Atque hæc de Hepatitide, insigni frequentique morbo, sed valdè apud modernos neglecto, ejusque solemnioribus productionibus, pro Tironum studiis suffectura esse putabo.

*Mixtæ Hepatitidis, post Pulmonis affectum contractæ
Historia.*

DUM hæc scribimus; vertente Maio mense, D. Anna Pisona, annum agens quinquagesimum, à diuturno, leviterque suppurato pulmonis morbo in mixtam hepatitidem inciderat. Dolor, tumor, & renixus dextrum occupabant hypochondrium, eisque flavo-virescens icterus, cum croceis, & lateritiis urinis inter ipsa initia se comitem addiderat. Febris continuam, simulque manifestè periodicam habitudinem assequuta est, cum siti, foeditate linguæ, anxietate, vigiliis,

&

& prostratione virium. Dolor primùm ad usque sinistrum hypochondrium, sinistri nempè hepatici ligamenti interventu, expatiabatur. Interea, vernâ non modicum favente tempestate, vix ultra septimam, epicrasticorum, suaviter emollientium, atque abstergentium, aposematum usu, fotuum insuper, clysterum, & imprimis epicraticæ purgationis auxilio, paratâ bile, atque hinc ad alvum permotâ, mulier integrè evadebat. Translatio morbi à pulmone ad hepar crisis quidem, sed imperfectæ indolem redoluit. Nullum indè, soluto hepatis morbo, pulmonicæ affectionis vestigium superfuit: Neque fortasse hepaticis erroris expers fuerat primigenii affectus invasio. Hujusmodi curationem ducebat ornatissimus collegiatus Doctor Theophilus Vecherius, amplissimi quondam mei in praxi præceptoris Josephi Emanuëlis à fratre nepos. ego in consilium adhibitus. Confirmat hic casus notabilem illum superius descriptum pulmonis, atque hepatis in mutuis propriorum morborum ineundis transmissionibus consensum.

APPENDIX AD HEPATITIDEM.

De Hepaticis Hypochondriacis, seu Hypochondriacâ biliosa Passione, ab Hippocrate sub nomine Resiccatorii morbi descriptâ.

Hippocrates lib. II. *de morbis*; morbum quemdam, resiccatorium ab ipso dictum, describens, ejusdem originis à bilis errore æstimandæ non obscura videtur argumenta porrigere. En textum „Non inediam, non cibum sumptum ferre potest, sed jejuno quidem viscera rugitum edunt, „ & ventriculi os mordetur, & aliàs varia vomit, bilem, „ salivam, pituitam, & acre, postque vomitionem aliquantif-

G g g

per

„ per melius habere videtur. Ubi autem cibum sumpsit, ru-
 „ ctus ei contingunt, cum rubore incenditur, semper se-
 „ copiosum alvi recrementum dejecturum existimat; cum verò
 „ defecerit, flatus infra demittitur, caput dolore vexatur,
 „ totum corpus huc, & illuc veluti acu pungi videtur, crura
 „ gravantur, debilitantur, & imminuuntur, debilisque eva-
 „ dit. Huic medicamentum quidem per inferiora purgans,
 „ deinde verò per superiora propinato, & caput purgato.
 „ Cibis abstineat dulcibus, oleosis, & pinguibus, & crapu-
 „ la. Succis post cibos vomitum ciecto; & si anni tempus
 „ ferat, post exhibitum lac, aut serum asininum; medica-
 „ mentum, utro tibi magis opus esse videatur, insuper pro-
 „ pinato. Frigidæ balneo æstate, & vere utatur, autumno
 „ verò, & hyeme unguento, & deambulatione, exerci-
 „ tationeque modicâ. Quòd si debilior sit ut exerceri ne-
 „ queat, iter conficiat; cibis frigidis, & alvum dejicienti-
 „ bus utatur; & si venter non infra subeat, molli infuso sub-
 „ luito. Hic morbus diuturnus est, nec nisi consenescentes
 „ deferit; alioqui ad mortem usque comitatur., Haftenus
 Hippocrates. Plurimi Modernorum morbum hunc ad hy-
 pochondriacam passionem referre contendunt: Neque ipse
 his adversari velim, quem nempe non latet, Hypochondria-
 cam affectionem genericum sat nomen esse, sub quo pluri-
 mæ species, disparem interdum indolem redolentes sitæ sunt.
 Verùm specialem hunc, si lubeat, hypochondriacum affe-
 ctum ab acriori, acutâque bile, simulque ob initam paula-
 tim exustionem, atque lenioris, humidioris, dulciorisque
 liquidi defectum, crassiori, & resinosa, ortum ducere mul-
 ta quidem testantur. Et sanè: Qui descriptâ ab Hippocrate
 symptomatum syndrome corripuntur, ii pariter simul alia pati
 per assiduam praxim animadvertuntur, quibus profectò mani-
 festus peccantis biliosi laticis dominatus retegatur. Iracundi
 ut plurimum sunt, atque amarulenti: Cujuslibet rei impa-
 tientes; mente vagi, valdeque inconstantes; ad motum
 faciles,

faciles, & proni: ore facile amari; linguâ plerumque flavescentes, præcipuè exurgentes manè, atque aliquot horis à pastu; atque insuper post assumptum cibum manuum palmis, interdum & pedibus excalescenti: æstivo tempore malè habentes, & pejus in sicca, calidaque temporum inclinatione: sæpè icterici, in primis sub cane, & ante canem, sed brevè perfrigerato nonnihil ambiente, revalescentes: id verò juvenili præcipuè ætate; quo quidem tempore in plurimam virium attritionem per æstuosas tempestates, consumptionem, phlogoses, inappetentias, atque vigilias ruunt, cum auriginoso colore: Autumno verò, atque hyeme deletâ aurigine, instaurantur: Croceas seu bile saturatas urinas, lintea intingentes, etiam citra arquatum, frequenter projiciunt, interdum & lateritias, simulque flammeas: Denique æstuosis, inquietissimis febribus, exquisitioribus tertianis, aut synochalibus, aut anomalis, aliisque biliaribus morbis æstate, aut autumno sæpè numero obnoxii evadunt. Sed ipsa prolata ab Hippocrate diagnosi, atque remediorum administratio propositum omne confirmat. Et primùm: *Non inediam pati, ventriculi os mordi, capitis dolore vexari, acria vomere, ac semper copiosum alvi recrementum dejiciendum fore existimare*, germani effectus sunt, non quidem hypochondriacæ illius passionis, quæ in acido, austero, pontico salino principio, in serosis humoribus fluorem adepto, (veluti à modernis describitur) originem habeat, & sedem, sed mordentis, acrioris, resinosi, & impacti biliosi succi. Ita compertum omnibus sanè est, Picrocholos, seu manifestè biliosos, longam ferre inediam non posse; ut si ciborum, præsertim humidorum, diutius ingestiones protrahantur, à bilis super intestina, & ventriculum morso, nausæa corripitur soleant, & stomachi simul ardore, seu *soda*, ut dicitur, torqueri; hinc sæpè atrocibus cephalalgis, aut hemicraniis confestim tentari, bilemque ipsam acerrimam; interdum vitellinam redditam, vomere cum sævis ventriculi concussionibus; quos tamen vomitus

prompta doloris capitis solutio complectitur ; ut hinc Galenus qui hæc pariter phænomena observavit, tradat 3. de loc. affect. cap. 7. *Quin etiam frequentissimè videmus, flavâ in ventriculo bile contentâ caput dolore affici, mox eâ per vomitum ejectâ, illico dolorem mitigari.* Ita Picrocholi ab Hippocrate, suisque Interpretibus dicuntur homines, amarâ bile valdè scatentes, qui in superioribus partibus, putà in ventriculo, coacervare bilem consuecunt, & quibus inedia molestissima extat ; Qui tandem amarulentiâ facilè commoventur. Vid. senem, Galenum, Foesium, aliosque. Quæ insuper tenesmi species sub illâ, copiosâ creditâ, sed irritâ alvi excrementi dejectione, indicatur, nonnisi hærentibus ad intestinorum tunicas, mucoque intestinali intermistis, biliosis humoribus referenda venit. Quæ autem adduntur : *ab assumpto cibo rubore incendi ; ac totum præterea corpus huc, & illuc velut acu pungi,* syllogistica ipsius delinquentis bilis indicia sunt ; à qua nempe calidas omnes à cibo effervescentias repetendas esse, aliàs ostendimus. Tum in hujusmodi biliosis non solum diffusæ per totum corpus crebræ phlogoses, calidæque punctiones contingunt, sed uberrimas vesiculas, sive papulas, ad cutem subitò erumpentes, citòque evanescentes persæpè animadvertimus ; ex quibus abruptis serum flavum, & acre cum maximo discissi folliculi ardore exstillari perspicitur. Fortia verò cathartica, & emetica ab Hippocrate huic morbo proposita, acidam, austeramve pituitam non quidem respiciunt, cùm acidiores hi succi ab hujusmodi purgantium remediorum stimulis exasperari, & deteriores fieri plerumque videamus ; sed pro bile ipsâ limosa, viscidaque expellenda consultò memorantur. Sic hujusce humoris inclinationi inferiùs, aut superiùs purgans remedium accommodandum esse meminit Senex : *Utro tibi magis opus esse videatur insuper propinato.* Accedit frigidæ imperatum balneum ; quod quidem non acidis laticibus, sed potius acriori, atque æstuanti bili proficuum esse liquet ; ut pluribus aliis locis idem aperit Hippocrates, qui in biliosis morbis frigidâ non tantum

tantum externè , sed etiam internè liberaliter utitur. Ita lib. 2. de morbis adversus febres à bile sermonem instituens : *Alterà autem die , ait , quā febris detinet , aquam frigidam quantum bibere volet dabis.* Confirmat lactis usus , huic morbo à Præceptore laudatus , quem quidem Hypochondriacis , acidam , indéque flatuosam diathesim patientibus deteriore esse evincit idem Aphor. LXIV. Sect. V. *Lac dare capite dolentibus malum : malum verò & febricitantibus , & quibus hypochondria suspensa murmurant.* Quæ quidem *susensorum , & murmurantium* phænomena Hypochondriaco flatuoso morbo recenset Galenus 3. de loc. affect. cap. 7. Tandem cibi , quos in *resicatorio* hocce morbo Cous admonet , *frigidi , & alvum dejicientes* , non nisi calidæ biliosæ cachochiliæ conciliari possent. Atque illa prognosis : *Hic morbus nonnisi consenescentes deserit* , biliosis hypochondriacis tantummodò convenit ; qui nempe fat frequenter ad usque quandam ætatem , fervidioris bilis dominatui obnoxiam , graciles servantur , atque strigosi. Postea ad maturiores annos refrixâ bile pinguiore fiunt , & crassi , firmiorique valetudine utuntur : Dum ex adverso qui pituitosâ , seu acidâ Hypochondriacâ passione torquentur , quò senescunt , eò latius morbo viscera , & artus devastante , succretisque vagis , aut fixis defluxionibus , ac catarrhorum depluviis , in deterius ruunt , graviusque affliguntur.

*Historia Calidæ , & Peracutæ Hepatitidis. Ex Hippocrate ,
Estque Egrotus VIII. Lib. III. morbor. vulgar.*

Adolescentem illum , qui decumbebat in foro Mendacium , vehemens febris corripuit , ex lassitudinibus , & laboribus , & cursibus insolitis : Primâ , alvus turbata est biliosis , tenuibus , multis : Urinæ tenues , subnigræ ; non dormivit , siticulosus fuit. Secundâ , omnia exacerbata sunt , dejectiones plures , intempestiviores ; non dormivit , mente turbatus fuit,

fuit, & leni sudore perfusus. Tertiam difficulter tulit, siticulosus, anxius: Multum se jactavit, & perplexus erat, deliravit. extrema livida, & frigida. *hypochondrii contentio submollis utrinque.* Quartâ non dormivit, pejus se habuit. Septimâ mortuus est: Circiter vigesimum ætatis annum agebat. Acutum. Hucusque Hippocrates. Vallesius in *Commentario* licet hunc morbum à *bile vehementer agitata, & malignè putrescente* consultò deducat; tamen non adfuisse solum calidam hepatidem, seu biliosam hepatis inflammationem, sed insuper lienis inflammatorium quoque consensum, ab illo, *Hypochondrii contentio submollis utrinque*, non inconsultò dijudicat.

DE ERYSIPELATE HEPATIS

Canones Practici.

Erysipelas hepatis ab ejusdem phlegmone per plurima, à causa, symptomatū, & eventus dissimilitudine rependa argumenta distinguatur.

I. **D**ifferre Erysipelas Hepatis ab ejusdem visceris phlegmone, cum per symptomata, tum per foveam, & conjunctam causam, superius in Phlegmonis disquisitione, Can. V. satis attulimus. Reverà symptomata, Hepaticum erysipelas comitari solita, flammeam illam morbi habitudinem manifestè declarant, quæ à Galeno s. de loc. affect. cap. 7. accensetur, atque insuper de vict. rat. in morb. acut. comm. 4. confirmatur. *Flammantes morbi sunt erysipelas, Herpetes, & Carbunculi*, atque in isagog. 48. *erysipelas, idest ignis sacer, est rubedo cum ignita inflammatione*; aliisque locis idem ab eodem adducitur. Causam itaque erysipelatis in genere non quidem sanguinem, sed bilem esse eò magis suademur, quòd cruor in tantum induci incendium non posse videtur: Cum in sanguine delitescant partes, in exquisitam effervescentiam, ac dislosionem minùs ductiles; quæ nempè implicari facillè possunt, & ab indita retardatione otiosè concreescere. At bilis aliquando soluta,

soluta, simulque excandefacta, quolibet efferationi modo rarefcere, atque displodi apta fit, initoque orgasmo, simul aliquam determinatam partem invadere, accendere, atque in erysipelatosam affectionem projicere, simulque in irrequietissimo ipsa motu, sive orgasmo servari. Quippe, annotante Dureto, *causam habet erysipelas biliosi humoris orgasmum, vel expressionem;* atque erysipelas Galenus à *tenui bilis fluxione*, quæ quidem ab orgasmo non dispar est, perpetuò deducit. Hinc quemadmodum erysipelas laxior morbus, & diffusior extat, Phlegmon verò constrictior morbus, quoniam accensa bilis moræ, & limitatæ congestionis impatiens, totam, quod adorta est, visceris substantiam occupat, & quamlibet insuper corporis partem facillimè, citissimèque occupare potest; ita nec tantum, ac Phlegmone tumorem, nec resistantiam tantam, nec pulsationem efficit, sed majorem quidem calorem, ut annotat Duretus in Coacis: *Est erysipelas tumor citrinus, & fugax dum premitur digitis, cujus molestia major est in calore, quam in renixu, & pulsu.* Atque Galenus de art. Curat. ad Glauc. lib. 2. cap. 1. *Erysipelas est multo inflammatione calidior magisque colorem flavum representans* [loquitur hîc de externo erysipelate, quod interno conciliandum est] & si tetigeris, facile sanguis subterfugit, rursusque illabatur, exquisitè tenuis (tenuior siquidem, quàm in Phlegmone, ab immixta subtilissima, rarefcenti, & irrequieta bile redditus) & *aspectu rubidus; Non tamen dolet hoc veluti inflammatio: neque, ut aliqua inflammationis species, pulsum, aut compressionem, aut tensionem invenit similem.* Tum in lib. Hipp. de offic. med. comment. 3. *Erysipelas perpetuò quidem inflammatum est, non tamen perpetuò tumet.* Hinc ob mobilem efficientis succi habitudinem longè suprâ Phlegmonem celerius, plerumque erysipelas judicatur.

II. Causam igitur erysipelatis ab ipsa recrementitia bile, *Causa in genere Erysipelatis, ejusque illegitimum,* in orgasmum, & accensionem evecta, tutò Galenus pluribus in locis deducit. ita 14. meth. med. cap. 1. ait: *Erysipelas* ex

& spurium, ex bilioso succo nascitur. de sympt. caus. lib. 3. Cap. 2. *Amara*
sua sincerum, quidem bilis cum in toto corpore redundat regius vocatur morbus;
 & mixtum, atque hinc cum unam quampiam particulam obsidet erysipelata, & ulcerum
 in ulceratū, serpentia. 3. de differ. febr. 32. Cum fluxio fuerit exquisitè bi-
 & non ul- liosa, calor erysipelatosus partem occupat. Reverà ubique loco-
 ceratum dif- rum biliosam esse erysipelas fluxionem, seu biliosa fluxionis ger-
 ferentia: tum men, toto jure deprædicat. Forestus pag. 145. in scholiis hæc
 utriusque habet: Erysipelas, & Herpes à fluxione biliosa quidem originem habent,
 indoles, sym- sed diverso modo. Fluxio enim biliosa in aliquam partem si decum-
 ptomata, & bat; idque ab exquisita bile profecta exulcerat: si verò sanies
 eventus. aquosas; vel etiam sanguinem habeat, minus est acris, sed parti-
 culam magis in tumorem attollet, quàm exulceret. Hoc igitur
 erysipelas nominatur, alterum verò herpes. Reverà hic author,
 à Galeni præceptis edoctus, duplex tradidit erysipelatis ge-
 nus considerandum, quod quidem in ipso fonte videamus.
 Galenus itaque in 14. method. med. cap. 2. Cum ergo nec
 plenè biliosa, nec sanguinea fluxio est, sed ex ambabus mixta, uti-
 que ab eo, quod in mistura exuperat, nomen ipsi indatur, ac
 dicatur de eo id, quod exuperatur; sic ut vel phlegmonem erysipe-
 latosum id vocemus, vel erysipelas phlegmonosum. Ubi autem neu-
 trum vincit, ibi vitium phlegmones, erysipelatosque medium nomi-
 netur. Ex his quidem prodiit distinctio erysipelatis in ulce-
 ratum, & non ulceratum. Primum nempe, seu legitimum,
 & purum, à sincera bilis enormiter excandefactæ, liberæque
 adurentis, fluxione ortum ducens: alterum, seu spurium à
 bile, aliorum lentiorum humorum connubiis castigatâ, mode-
 ratâque: Hinc primum cum cita erosione plerumque, exar-
 dentissimam febrem cum immani fervore, aliisque feris sym-
 ptomatibus, atque peracutum, deterioremque morbum produ-
 cit, intereà brevior, qui sæpè ad quartam, saltem ante
 septimam, judicatur: neque ingentem tumorem, sed pla-
 num duntaxat, atque in omnibus visceris partibus æqualem,
 non verò inæqualem, aut fastigiatum, neque idcirco absces-
 sum procreat; bilis enim in perniciosissimum motum & orgasmum
 concitata,

concitata, affectam partem indurare non potest, sed solum, annotante Galeno, in marcorem interdum inducere: Alterius verò ingenii Erysipelas tumorem majorem elevans, minus acutam febrem devehens, longioremque morbum, mitioribus quidem phænomenis stipatum, sed non ita facile judicandum producens, non valdè supra Phlegmonis naturam attollitur: Cui idcirco, non benè judicato, non solum abscessus interdum supervenit, sed quandoque putredo, juxta Aphor. XX. Sect. VII. *Ab erysipelate putredo, aut suppuratio* (quas quidem maligno erysipelati contingere commentatur Galenus); tum ab eodem interdum, si fuerit præcipuè incautis remediis immodicè refrigeratum, linquitur scirrhus: ut ex Gal. 7. de compos. med. per gen. cap. 9.

III. Ut modo hæc omnia, veluti ad instituti pro-
 fessionem discussa, intereà gravissima, cum Hepatis erysipelate
 conciliemus; id jam primum annotandum est; productioni
 erysipelatis, ut in aliis quibuslibet visceribus, ita & in He-
 pate, nil certè officere; Cum ipsa efferatæ bilis natura ad
 quaslibet excursions, ut supra, aptissima sit, atque ad illos
 omnes motus, ubique versabilis, quibus erysipelatosæ affe-
 ctio efformatur; tum Scriptorum cujuslibet sæculi innumeræ
 constanter observationes frequentem in Hepate hujus morbi
 genesis abundè testentur. In primis verò in jecur irrumpe-
 re facilius posse erysipelatosam bilem, eis dubium esse non
 posset, qui probè callent, facilius in propriis, quàm pere-
 grinis sedibus, humorum malitias displodi, suasque vires
 exerere. Undè quemadmodum Hippocrates Pulmonis ery-
 sipelas II. libro de morbis descripsit, Galenus ejusdem in he-
 pate affectionis 5. de loc. affect. cap. 7. signa in genere pro-
 tulit; ita nobis, aliisque medentibus plurimis datum est, non
 solum erysipelatosum hunc morbum, in Hepate signatim, non
 semel perspicere; sed utrumque erysipelatis memoratum ge-
 nus distinctè, facileque in obviis casibus recognoscere. Enim-
 verò, ut à Galeno citato loco propositum illud erysipelas je-

*Occurrunt
 in hepate
 Erysipelata,
 tum sincera,
 tum mixta,
 atque per
 propria pha-
 nomena ab
 aliis omni-
 bus morbis,
 cum ad au-
 thorum pa-
 ginas, tum
 præcipuè ad
 agrorum le-
 ctulos, satis
 discriminan-
 tur. Hinc
 castigatissi-
 ma Hepaticæ
 velut epide-
 mici, since-
 rioris erysi-
 pelatis histo-
 ria exhibetur.*

coris , mixtum esse videtur , sive phlegmonosum erysipelas, quod idèd à sanguine simul cum bile accensò progenitum, per solam aliquorum symptomatum acerbiorè indolem videtur à sincero phlegmone differre : *Erysipelatis autem accidentia* (ait enim Galenus postquàm hepatis Phlegmonis symptomata explicaverit) *his ferè similia sunt , & insuper febris quoque cum vehementissima siti laborantes cruciat : eas enim febres quas caufones , idest ardentes antiqui vocabant , magna ex parte advenire videmus jecoris , aut ventriculi flammeis dispositionibus , atque in pulmonis inflammatione erysipelatis particeps ardentes febres excitantur : quemadmodum ubi in universo quoque corpore biliosi humores ad immoderatum fervorem perveniunt. Verùm hæ , quæ aut jecoris , aut ventriculi occasione eveniunt , omnium sunt vehementissima ; sic nobis non ejuscemodi Hepatis tantummodò erysipelata , sed sincera insuper , atque exquisita ad ægrorum lectulos luculenter animadvertere , & curare interdum contingit. Quippe in fervidis , aridisque æstatibus annor. 1711. , & 1712. per Nosocomia militum , castrorum laboribus fatigatissimorum , exquisitum hocce jecinoris erysipelas ferè epidemicum extitit. Acutissimâ statim obortâ febre , eâque totam caufonum naturam æquante , videbatur ægris hypochondrium dextrum in ardente fornace gestare , ac veluti flammâ ab eodem loco erumpente , indèque per totum corpus diffusâ , perennè , molestissimèque comburi. Clamosè sitiebant cum aridissimis gingivis , & faucibus , quæ denuò , vix trajecto potu , desiccabantur. Neque arida solùm lingua , sed simul rigida , & nigra , quæ vix emollita , mundata , & absterfa atrâ rursus fuligine obducebatur. Rubidus universi corporis color , sed in accensa facie quidpiam subflavum , rubori veluti circulum protendens obversabatur : urinæ ardentes , & flammeæ : nulla quies , sed assidua membrorum jactatio : enorme ad cibos omnes fastidium : Interea vix tumor ad hepar deprehendebatur , vix tensio : in aliquibus tamen macula quædam saturatè rubidior , flammeum calorem præ se ferens , totumque*

tumque occupans dextrum Hypochondrium discernebatur. in omnibus vix tussis, tum non ingens spirandi angustia: vomitus quidem crocæ acerrimæ, & calidissimæ bilis, cum maxima ventriculi concussione ægros ferè perpetuò infestabat; qui certè fidus adeò exquisitorum, majora viscera occupantium, erysipelatum comes esse videtur, ut ipsius pulmonis erysipelatis non solùm insigne, sed & utile symptoma esse vomitum Hippocrates cit. lib. II. de morbis memoraverit: *Si oriatur in pulmone erysipelas, tussis detinet, & sputum multum ac liquidum expuit, velut ex gutture, quod cruentum non est: dolor dorsum, & inanes, ac molles laterum partes occupat, viscera strepitum edunt, pituitam acidam vomit, dentes obstupefcunt, febris, rigor, ac sitis corripit, cum quid comederit, in visceribus strepitus editur, acidum eructat, venter stridet, & corpus torpescit. Cum vomuerit melius habere videtur; ubi verò minimè vomuerit, decedente die tormina, & dolor in ventre suboriuntur, & liquidum stercus demittitur.* Atque ut ad ægrotantes nostros redeamus; iis, qui ad salutem vergebant, tertiâ jam die morbus, & accidentia minuebantur, hinc quartâ evanescebant sine ulla manifesta crisi. Cæteri ante tertiam nec febre, nec affectione visceris, nec alio quolibet mitescente, subitâ corripiebantur phrenitide, rigidique, & exsiccati quartâ vel quintâ die moriebantur. In aliquibus, judicatâ, cum febre, & accidentibus, erysipelatosâ affectione, supererant lancinantes dolores, hepatis regionem per aliquot adhuc dies infestantes, qui postea turbatâ à biliosis, mucosis, aliisque anomalis liquidis alvo, & succrescente tenesmo, feliciter dissipabantur. Hi certè de inductis levioribus, atque superficialibus, ut dicitur, ab exquisito erysipelate super hepatis viscus exulcerationibus, aut pustulis, deturbato per sedes erodente, aut collecto liquore, tandem incrustatis, exsiccatis, atque coalitis, suspicionem non modicam incutiebant. Ita in denatis ab hoc morbo hepar aut summè exuccum, aut ulcerosum deprehendebamus. De cætero in erysipelate Hepatis dolor non grava-

tivus, neque tensivus percipitur, ut in phlegmone; sed acutissimus, & veluti ardentem perterebrans; tum febris, quæ jecoris erysipelati se comitem præbet, illa reverà est, quæ ab antiquis typhodes dicitur. Vid. Reies, Bonetum, aliosque.

*Uteriora ex
Galeno ar-
gumenta,
Erysipelas
Hepatis ab
ejusdem
Phlegmone
dirimentia.*

I V. Ex his tum utriusque hepatici erysipelatis inter se, tum ejusdem in genere à legitima Phlegmone differentia elici abundè poterunt: Quas quidem postremas Galenus, postquam memorato Loco sect. 5. de loc. aff. cap. 7. attulerit, denuò inculcare videtur in 14. meth. med. cap. 1. per dissimilem in utroque morbo coloris, & in primis pulsationis rationem. Quandoquidem, eodem dictante, molesta in affecta parte pulsatio phlegmones proprium est symptoma, quippe quæ altè magis in obsessam partem demittitur, hinc magnum tumorem attollit: Erysipelas verò potius superficie tenus consistere, quàm profundius descendere videtur, ut solidam valdè congestionem apparare non queat: neque tenuis, & fugax biliosa substantia tantum expandit tumorem, neque arteriis in locum affectus appellentibus hæc adeò renititur, ut easdem in morbosos nixus ad latera, sive in sensibiles pulsationes ciere valeat.

*A bile etiam
enascuntur
varia ad
cutem eru-
ptiones, qua-
quidem ve-
luti minutu-
la, & disgre-
gata sunt
erysipelata.*

V. Intereà non solum Erysipelas in cute, aut in hepate, aut in alio quolibet viscere excitum, è proximo excandescæ bilis errore ortum ducit, sed alii plurimi cutanei morbi, solitarii, aut cum aliis viscerum morbis complicati, qui certè veluti totidem minutula, seu sub minimâ mole collecta, atque invicem disgregata erysipelata sunt. Et primò Galenus ab erysipelate nullibi herpetem distinguit, cum omnes ejus species variè delinquentis bilis germina esse demonstret. Ita 2. de art. curat. ad Glauc. cap. 1. *Flava bilis quando sui servans naturam unà cum sanguine per totum corpus defertur, morbum facit, qui icteros idest regius, appellatur; sola verò quando se-creta est, & in aliquo membro consistit, Herpes vocatur. Siquidem* *crassa*

crassa sit secundum substantiam, totam exulcerat cutem usque ad carnem suppositam: atque hunc affectum Hippocrates nominat Herpetem exedentem. Si verò tenuior fuerit, id, quod in superficie est, tantum veluti deurit: atque hæc species generis sortitur appellationem, cum simpliciter, & sine additione Herpes vocetur. Nam ex duabus aliis speciebus, quæ quidem nuper dicta est, Herpes exedens nominatur: reliqua verò altera, miliaris, quum in hoc affectu pustula parva, ac multa per summam cutem similes milii excitantur: fit autem Herpes hujusmodi ex bile quidam & ipse, sed minùs calidâ, & acri, quàm sint priores. Ita idem de different. febr. cap. 5. affert: Correspondent herpetibus, & erysipelatibus, quæ ex flava bile consistunt, cancri & phagedænæ. lib. de tumoribus & alibi, torrefactæ, picæque bili, seu atræ redditæ anthracis ortum conciliat. Antiquis ignis vocabulum calidioribus morbis, ab accensa bile ortis, committere pathologicè placuit. Ita quemadmodum Hippocrates ardentem à bile febrem, seu causum, in Epidemiis, in lib. de Glandulis, de Morbis, aliisque locis ignem vocitavit; ita ignis ab aliis erysipelas in genere nominatum est, atque si latum & serpens, ignis sacer, & vulgò etiam ignis Sancti Antonii speciatim dictum. Herpes ferus, ab aliis Zona, à plurimis verò ignis Persicus nuncupatur: impetigo volaticus ignis, volagrius, aut sylvaticus plurimis audit. In similem censum revocari possunt aliæ plurimæ ad cutem calidæ, aut minùs calidæ, mordaces, aut minùs mordaces, latiores, aut angustiores, planæ, aut papulares eruptiones; nempe epinyctides, phlyctænæ, esseræ, Psyraces, Acrochordones, furunculi, maculæ hepaticæ, tum fixæ, tum volaticæ, & recurrentes; ichorescentiam, ut dicitur, sanguinis, & bilis omnes indicantes, aliæque similes summam cutem interdum fœdantes, quæ aut à bilis errore, aut non sine bilis errore procreantur, ut à facili earum, post bilis emendationem, atque institutam à toto corpore excretionem, solutione, compertum medenti cuilibet esse potest;

præcipuè autem ab ichoribus, qui ab iisdem exprimuntur. Quippe ut illud omne quod ex productis ab erysipelate ulceribus, aut pustulis efflorescit, atque exstillat, flavum, & acerrimè biliosum deprehenditur, totam siquidem efficientis, conjunctæque causæ naturam redolens; ita & eandem indolem participat liquidum quodlibet à memoratis cutaneis eruptionibus exudans. Huc quoque referendæ forent biliales illæ veluti erysipelatosæ, miliares efflorescentiæ, in infantibus sæpè contingere solitæ, à quarum redundantia interna, prius afflictantia tormina sublevantur, vigiliæ leniuntur, & flavo-viridescentes acriores alvi dejectiones mitescunt; quæ tamen symptomata, evanescente cutaneâ eruptione, recrudescere solent. Hujusmodi morbi meminit pariter Iunkenius Chym. med. Phys. part. II. sect. 2. cap. 2.

Videtur Hippocrates cutaneas quasdam eruptiones à primitivo bilis errore deducere.

V I. Neque cutaneos solum hujusmodi affectus, sed alios insuper, & præcipuè ulcerosos contumaces, cum viscerum complicato affectu à primitivo bilis errore Hippocrates deduxisse videtur. *Quibus magnus est lien, siquidem biliosi sunt, fædati multum apparent, ulceribusque obsiti, quæ difficulter sanantur: Tum illis ab ore fædus est odor, atque macrescunt. Lien verò durus percipitur, manetque sui similis in magnitudine. Sin autem pituitosi sunt lienosi, nec cibos dejiciunt, multò minora sunt iis prædicta incommoda, tum lien aliàs, atque aliàs major, aut minor est.*

Numquid in primo hujus Textus membro Hippocrates modernorum scorbutum calidum, seu ut dicit Villisius, à sulphureo-salino principio exortum, ut in altero scorbutum frigidum, seu salino-sulphureum, indigitat, atque potissimas ejusdem, & consecretantium cutis vitiorum causas à bilis malitia proponit? Sed præclariùs adhuc Senex morbum hunc, recentiore creditum describit lib. de inter. affect. sect. V. ex collectione Foessii, folioque mihi 549. tum sub nomine sanguinei convolvuli eodem tractatu fol. 557., ut pariter in prædict. lib. 2. sect. 2. fol. 111.

VII. Redeo

VII. Redeo ad Hepaticum erysipelas, cujus prognosis, *Prognosis hepatici Erysipelatis, secundum circumstantias varias magis, aut minus gravis.* præterquàm quòd ex vehementissima ipsa natura morbi, arduàm plurimùm, gravissimique discriminis plenâ, deducenda est; ab Hippocrate in quibusdam circumstantiis pessima, aut lethalis prædicitur: *Erysipelas foris quidem extare utile, intrò autem vergere lethale; cujus quidem rei indicium est cum rubore evanescente pectus gravatur, & acrius spiritum trahit ager,* in Coac. prænot. Hæc repetit in I. de Morbis sect. 5. & Aphor. 25. Sect. VI. in hoc enim monito docere Hippocrates tria videtur: Primum, interna erysipelata, quæ scilicet viscera obfident, externis, sive in cute serpentibus, deteriora esse. In quo sensu Aphorismus citatus intelligendus est; *Erysipelas intrò converti malum.* Secundum, transitus, seu propriè palindromes erysipelatis ab externa sive cutanea parte ad internam v. g. à facie ad cerebrum, à brachio, aut thoracis exterioribus ad pulmonem; à lumbis, femoribus, cruribus, pedibus ad hepar, aut alia abdominis viscera, tum præcipuè à faucibus ad laryngem, ut contingere in praxi frequenter videmus, lethales prorsus esse: quod quidem significat Coacarum textus *intrò vergere*, non malum, sed *lethale*. Tertium tandem tutum proximæ mortis indicium esse difficilem indè succedentem respirationem, sive dyspnœam, cui quidem citò orthopnœa, & crudelissimus strangulatus succedit. Cæterum syllogisticum lethalis hepatici erysipelatis argumentum est; externa perfrigerari interno ardore superstitè; veluti in lipyriis febribus accidit, aut aliis, quæ ab internis lethiferis inflammationibus originem deducunt.

VIII. Curatio Hepatici Erysipelatis, præcipuè mixti, *Curatio Erysipelatis; præcipuè in lienæ purgantium.* seu phlegmonosi, licèt quòd ad phlebotomiæ, aliorumque præsidiorum rationem curationi phlegmonis, ut suo loco attulimus, similis esse posse videatur. Quædam interea circa catharseos, & frigide potationem, ab Hippocrate, & Galeno hîc annotare operæ pretium arbitramur. & primò quod purgationem spectat; hæc nos in erysipelate in genere, quàm in phleg-

phlegmone minùs scrupulosè uti posse, ipse Hippocrates author est, qui in pulmonis erysipelate super alia quælibet remedia, nullâque expectatâ coctione morbi, purgandum jubet: *Huic medicamentum deorsum purgans propinato, posteaque lac asininum bibat, nisi naturâ lienosus fuerit: quod si sit; nec succis, neque lacte, neque sero purgato, sed eo, quod paucâ quantitate sumptum plurimum foras educat. . . . sed si juvenem aliquem citius à morbo liberare voles, post purgationem ei pectus, & dorsum inurito:* Ita Galenus in Class. 7. lib. de ocul. cap. 2. in erysipelate à causa intrinseca primò propinat Pharmacum rubram choleram purgans, deindè, si opportunum est, utitur phlebotomiâ, postea medicinâ infrigidante, & humectante: calore transacto ad dissolutiva confugit: Ita se gerit in oculorum erysipelacea inflammatione, primò catharticum exhibens, indè sanguinem mittens. Ita in dynamid. sp. 20. aliisque omnibus locis pro erysipelatis curatione liberè ad cholagoga veluti ad sacram anchoram confugit. Et sanè cum bilis in erysipelate, præcipuè exquisito, in affecta parte, totoque in sanguine, turgat; nisi jam imminet propè ad nobilius aliquod viscus minitetur irruptionem, atque decubitus, quod quidem per detractionem sanguinis diverti opportunè queat, quidnam ipsam bilis catharticam è corpore expeditam ejectionem, prohibere posset? Ita nos tum externa, tum interna erysipelata per cholagogam inter ipsa initia generosè susceptam purgationem, vel vehementissimis vigentibus symptomatibus & febre, citò expugnata, sæpenumerò in praxi comperimus.

*Usus frigida
in erysipelate
qualis esse
debeat.*

I X. Quod attinet ad usum frigide in sinceriori erysipelate; cum jam Hippocrates de febribus à bile sermonem instituens addiderit lib. 2. de morbis: *Alterâ autem die, quâ febris detinet aquam frigidam quantum bibere volet dabis:* Et paulò inferiùs agens de febre, quæ neque noctu, neque interdiu remittat, cum forti æstuatione, alvo per leve infusum sublutâ, & prisanæ succo bis die frigido ad sorbendum dato,
reliquo

reliquo tempore aquam frigidissimam bibendam præceperit: Galenus IX. method. med. cap. V. in hoc morbo, qui bilis germen exquisitum est, frigida hujusmodi liberalem epotationem proponit, atque commendat: Porro erysipelas, quod verum erysipelas sit, non aliter sanaveris (nempe per copiosam frigidam potionem) at si mistum cum phlegmone sit, in hoc concoctionis expectanda sunt nota. Sed cum X. de simpl. med. facult. fol. 75. hæc habeat: Sanè ea erysipelata, quæ ignea etiamnum sunt, & reverà erysipelata, calidorum, & acrium medicamentorum omnino nullum juvare potest: Quæ verò per refrigerantia refrigere, tum hoc, tum alia multa medicamina digerentia adjuvare valent, Intelligere videtur, frigidioris aquæ potum in erysipelatis principio, & augmento, cum nempe maximè viget ejusdem fervor, usurpandum esse; non verò cum mitigari jam cœpit. Et sanè si quis alius morbus, certè erysipelas eodem morbi stadio se se sibi dissimilem præbet; cum imminuto plerumque fervore, tenuique effervescente bile diffusâ, hærentes varii in affecta parte supersint succi, qui dispares, imò & interdum primo morbi genio oppositos, curationis scopos aperiunt. Sed primâ erysipelatis æstuatione dissipatâ, aut valdè saltem imminutâ, erysipelas non amplius esse, idem Galenus VII. de simpl. medic. facult. fol. 52. denunciat: & sanè scribunt, incipientibus quidem etiamnum, atque gliscentibus, crescentibusque erysipelatis alia medicamenta, declinantibus verò, ac flaccescentibus alia. Neque enim erysipelas etiam vocari debet, posteaquam inflammatio ejus, & ferver, ac biliosum illud abierint. Omisâ igitur, quæ à declinatione erysipelatis elici possit, agendi ratione, videndum erit, eodem dictante Galeno, in hujusce morbi principio, num refrigerationis indicatio vincat vacationis indicationem, aut ex adverso, aut æquales invicem indicationes sint. Hanc cæterum vacationem idem Interpretum Hippocratis Antesignanus XIII. method. med. Cap. VIII. sanguinis esse missionem intelligit: Phlegmone cum duplici ratione à natura recessit, & quia pars ipsa multo sanguine

*sit referta ; & quia eadem sit calidior , utique vacuationis indicatio refrigerationis indicationem vincit : Contrà scilicet quàm in erysipelate , in illo namque refrigerationis indicatio magis urget , quàm vacuationis. Quamquàm utriusque affectus curandi commune caput est infestantis humoris vacuatio (intellige igitur vacuationem sanguinis per phlebotomiam in Phlegmone , bilis verò per catharsim in exquisito erysipelate) ideoque postquàm refrigeratum erysipelas est , ad ea quæ digerunt medicamenta convertimur. Porro in cit. XI V. meth. med. cap. 3. per digestia etiam vacuantia , tum pro vacuantibus , ipsa bilem purgantia non phlebotomiam intelligere testatur : Pro sanguinis missione , medicamento quod bilem trahat , purgantes. Neque hîc refert , Galenum cit. loco de externo erysipelate loqui , cùm res quo ad agendi normam tum in externo tum in interno hocce morbo eodè recidat. De topicorum ratione in Hepatis erysipelate superiùs ad curationem Phlegmonis loquuti fuimus. Atque hæc de erysipelate suffectura putabo , posteaquàm ad argumenti coronidem exemplum unum , aut alterum Hepatici erysipelatis obiter subtexuero : Historia prima. Mulier ætate non provectâ aliquam ex animi pathemate uterinam stranguationem passâ , Catameniiis totâ hyeme deficiebat. Vere anni 1714. subito hepatis erysipelate corripitur , ut ex signorum syndrome liquidò patuit. Dum omnia ad tertiam diem cum proximæ necis discrimine recrudescent , tota subitò facies guttâ rosaceâ cum incredibili tamen fervore , pruritu , nec intereâ sine ingenti tumore , seu veluti dolorifico rubenti tubere suffunditur : atque absque alia evacuatione hepatis morbus , & ardentissima febris ad quartam judicantur , superstitæ usque ad decimam quintam diem deletæ tumore rubidâ faciei maculâ ; sed ægrâ intereâ optimè revalescente : Undè confirmata aphorismi bonitas : *Erysipelas ab interioribus verti ad exteriora , bonum.* Historia Secunda. Non ita pridem vir 30. annos natus , gracilis , pichrocolus , & iracundus vagâ arthritide per tres hebdomadas conflictabatur , cum continenti febre.*

febre. Icterus postea erumpebat, à cujus affectus novitate febris, & artuum dolores mitescere visi sunt. Croceam tamen bilem interdum cum magno ventriculi ardore vomebat. Tandem flammæ hepatis habitudine cum causone correptus, quartâ ab hac postrema invasione die veluti combustus fato cedebat. In aperto cadavere durum, exsuccum, simulque ulcerosum hepar deprehendebatur. Quadrat ad hunc casum illud Hipp. febricitanti, & bilioso, si bilis suo tempore extrâ dispersa fuerit bono est: sub cutem verò effusa ac dispersa agroto toleratu facilior, & medico curatu promptior; effusa autem, ac dissipata, & in unam aliquam corporis partem incumbens, malo est.

HISTORIA HEPATICÆ PHLEGMONIS,

non suppuratæ, citiùsque idcirco lethalis: seu Observatio LXIX. Caroli Pisonis Lib. De Morbis à serosa colluvie ortis. Quæ quidem ad calcem disputationis illius morbi apponenda, omissa casu cùm fuerit, hîc saltem memoratur.

Illuſtris Baro Ferdinandus ab Honaufem, cùm inflammatorio Hepatis affectu, febreque continuâ, tertium & intra annum recrudescente, teneretur, toto morbi decursu aquea-biliosa profusè reddidit. In cadavere autem ejus, inter alia Cacopragiæ viscerum indicia, jecur immanni tumore extuberans repertum, cujus superficies quidem tota duos circiter transversos digitos vieta prorsus, flaccidaque, & mollis prementi manui apparuit, interiùs autem corpus ligni instar durum, & retorridum prorsus. Hæc Piso. Reverà Hepaticæ Phlegmones, quæ in abscessum non desinunt, citiùsque idcirco lethales sunt, fracto visceris tono nexuque, aut siccata ejusdem substantiâ, & ferè combustâ, vel utrâque impressione diversis ejus partibus inflicta, hæc, quæ Piso descripserat,

scripserat ; in hujusmodi morbo denatis videnda , ut plurimum , relinquunt : Ut nobis pariter animadvertere aliquando contigit.

DOLOR HEPATIS

Spasmodicus , Arthriticus & Flatuosus.

Canones Practici.

Dolor Hepatis quando veluti primigenius hujus visceris morbus considerandus veniat; Atque ejusdem species.

I. **T** Ametsi unanimi medentium consensu dolor morbus non fit, sed morborum symptoma, quâ etiam ratione eundem hucusque consideravimus, tum in biliari pleuritide, tum præcipuè in specialibus jecoris doloribus, qui hujus visceris Phlegmonem, abscessum, Ulcus, Erysipelas, atque hepatitidem sub diversâ indole, diversoque gradu sequuntur; cum verò veluti distinctus ab aliis, & tanquam solitarius, imò primigenius perspicui morbus queat, si eo modo invaserit, ut neque præviam in viscere sensibilem affectionem habuerit, neque post se relinquat; In hac conditione de dolore Hepatis, tanquam de peculiari, abstractoque ab aliis affectu, nonnullam hîc habere mentionem instituimus. Dolor itaque hujus partis in hac lineâ consideratus, vel est spasmodicus, vel arthriticus, vel tandem flatuosus.

Dolor Hepatis Spasmodicus: ejus progressus; consensus cum aliis partibus; symptomata; succrescentes

II. Hepar spasmodico dolore affici, ut cæteræ omnes hominis partes, potest; cum ipsi non desint insignes nervorum distributiones, plexus, atque fasciculi; veluti in anatomica ejusdem descriptione ostendimus. Hinc non solum lacinantes, ut dicitur, dolores homines sæpè varios, præcipuè hypochondriacos, aut pichrocolos, cæterum stantes, aut ambulantes, nervosis hepatis plexibus inflicti, cum nullâ præviâ

præviâ , aut superstitie hepatis systrophicâ affectiohe subitò ^{interdum morbi; & curatio.}prehendunt , subitòque remittuntur , atque evanescunt ; sed ulterius cum improvisâ pectoris angustîâ , & violentâ vocis, sive acutâ expressione hepar intrò sursùm iisdem convelli videtur ; Juxta illud Hippocratis in Coacis : *Quibus acuta vox, hypochondria intrò sursùm iis revulsa sunt.* Fortè etiam spasmodem hepatis intellexit Hippocrates , cùm posuit 6.Epidem. *Eum , cui apex hepatis complicatus erat , concussi ; repentè dolor cessavit.* Fortè insuper referri potest ad dolorem hepatis spasmodicum Aphor. LIV. Sect. VII. *Quicumque hepar circumdolent , his febris superveniens solvit dolorem.* Quippe convulsionibus supervenientem febrem remedio esse declarat Aphor. XXVI. sect. II. *Febrem convulsioni supervenire melius est , quàm febris convulsionem.* Designat ex Hippocratis sensu Duretus in Coac. fol. mihi 329. spasmodicos hepatis dolores sub illo Hippocratico textu : *Qui velut quibusdam uncis instar ejusdem retis piscarii Hypochondria circumplectendo , ipsa quodammodò laniare videntur.* Cùm autem spasmotica hepatici nervosi plexus affectio mesentericos pariter plexus , continuitatis ratione , plerumque in consensus ducat , atque etiam nervosos aliarum partium funes in similia contractionum fœdera ciat, non ideò spasmotica hepatis affectio sine vehementibus lumborum , & ilium passionibus accedit , atque ex fœderatis ejuscemodi convulsionibus , ac torminibus , si diutiùs vigeant , siccus hydrops non rarò producitur ex Hippocrate. Hypochondriacarum hujuscemodi , atque lumbarium contractionum , eorumque per nervorum tractus ad alias partes propagationum meminit Duretus in Coac. fol. superiùs adducto : *Hujusmodi sunt etiam diuturni circa lumbos , & ilia , qui ad hypochondria prorepunt dolores.* Est enim feritas magna illius excursus , qui prorepit è lumbis , ac suorum incommodorum vim magnam ostendit quòcumque appulerit ad cerebrum , ad cor , ad stomachum , ad septum transversum. Qui quidem Convulsionum excursus , atque concursus à lumbis ad memorata , aliaque viscera perbellè ex-

plicantur per tot coagmentationes, & nexus octavi, & intercostalis paris, in creberrimos tum ganglioformes, tum reticulares plexus per singula viscera distributos; quorum quidem omnium mesentericus plexus si centrum non est, atque veluti omnium basis, non sine tamen proximo omnium concursu videtur concinnari. Sed hæc in Anatomicis videbimus: Spasmodici hepatis doloris, undè Epilepsiæ origo fuit, casum quendam producit Greulichius dissertatione de Bile: *In hepatis regione Monialis 25. annor. circiter monstrabat quantum apice digiti tangebatur, sibi prævium dolorem inferre, & hinc paroxysmum [Epilepticum] quem in lecto sedens brachiorum agitatione, & gemituosis expirationibus discutere solebat.* Pro spasmo hepatico mirificè conferunt Tinctura florum bellidis, & hipericonis; Tinctura anodina nostra; Pilulæ ex specifico stomachico, saccharo Saturni, balsamoque sulphur. terebinthinato, anizato, aut etiam succinato confectæ; essentia anisorum; spiritus stomachicus Patris Fardellæ; aliaque similia: Fetus præcipuè emollientes, tepidaque balnea; Atque acidularum, & martialium aquarum usus.

*Arthriticus
Iecoris Do-
lor: Quos
præcipuè cor-
ripit: Quo-
modo à spas-
motico dis-
criminetur:
Ejus accura-
ta descriptio:
& curatio.*

III. Arthriticus interdum dolor, magis, minúsve diuturnus, atque insuper periodicus, hominum, externæ, seu communi Arthritidi obnoxiorum hepar interdum infestat, & torquet. Qui certè à spasmotico discriminatur, cùm minùs quidem acerbus sit, sed non tam fugax, & vagus, neque tantam spirandi angustiam inducat, neque tactui tam sensibilis; præcipuè verò in iis contingat, qui alia arthritici dominatus morbi per artus, & viscera præbere solent indicia. Hic autem dolor ab accuratissimo Guilielmo Musgrave nobilissimæ societatis Anglicæ socio, dissertatione *de anomala Arthritide, sive interna*, præcipuè in ejusdem præfatione, opportunè memoratur, atque ab expertissimorum antiquorum codicibus confirmatur; Ut ejus hæc verba referre opportunum existimem: „Paulus etiam Ægineata nonnullorum meminit, qui aures, dentes, guttur, & nonnunquam *Fecur* Lienemque arthriticis doloribus consi-

ctari

„ Etari pronunciant ; à quibus nisi desubito vitium in artus se se
 „ recipiat, eructetque, periculum brevi tempore laborantes oc-
 „ cupaverit; „ Et paulò inferius subjungit. „ Quid? quod Deme-
 „ trius inter recentiores Græcos Pepagomenus, Michaëlis Pa-
 „ læologi Medicus, his assentiatur, Libro [istius Imperatoris
 „ jussu] de Podagra scripto, *non tantum*, inquit, *in manus,*
 „ *pedes, omnes articulos tales ferri fluxiones: Verum etiam in Ce-*
 „ *rebrum, Jecur, atque ideò ipsum Cor, easque teterrimas esse, liberatq;*
 „ *difficillimas.* Reverà non tantum arthriticas simpliciter, seu mo-
 „ biliores affectiones, sed fixiores, stabiliioresque, seu podagricas
 „ ab artubus repulsas, in viscera ipsa abdominis, imò pulmonem,
 „ & cerebrum contendere cum lethali ut plurimum eventu, in-
 „ terdum in praxi animadvertere contigit: quod quidem à Gale-
 „ no pariter, aliisque Antiquis plurimis descriptum legimus. Pro-
 „ priam interea, seu specialem curationem non indicant arthritici
 „ hujusmodi viscerum affectus, qui sanè ad communem universa-
 „ lis causæ curationem dumtaxat videntur referri. Atqui si quæ
 „ est peculiaris curatio, ea quidem per febrem, aut sudorem su-
 „ pervenientem expletur; præcipuè verò si iterum posset rheu-
 „ matica affectio ad artus restitui, ut admonet Galenus Comment.
 „ II. ad Hippocratis librum *de Nat. Hominis*, & ad textum V.,
 „ cujus verba loco cit. appositè refert nobilissimus Musgravius.

IV. Venio ad dolorem flatuosum hepatis, quem quidem *Flatuosus*
 describere videtur Hippocrates lib. de *Prisca Medicina* versùs fi- *Hepatis Do-*
 nem: Qui sanè textus cum notabilia plurima contineat, hinc to- *lor, ab Hip-*
 tus à nobis insinuabitur: „ Quæ verò flatus, eorumque convul- *pocrate per*
 „ siones in corpore efficiunt, ea in cavitatibus, ac laxioribus *ipsamet me-*
 „ spatiis, velut ventre, & thorace, strepitum, & sonum exci- *chanica*
 „ tare æquum est. Cum enim non sic impleant, ut consistent, *principia?*
 „ sed mutationes, & motiones habeant ab ipsis strepitum, & *descriptus:*
 „ evidentes motiones fieri necesse est. Quæ verò tum carnosa, *Qui tamen*
 „ tum mollia, in iis stupores, & repletiones, quales jugulatis *non adhuc*
 „ fiunt. Quòd si in latum, & renitens incurrat, eique aliquid re- *perfectè con-*
 „ sistat, quod naturâ neque sit adeò robustum, ut vim ejus su- *stare vide-*
 „ „ stinere, *tur. Flatuo-*
 „ „ „ *sus, si qui sit,*
 „ „ „ *hepatis dolor*
 „ „ „ *flatulenti*
 „ „ „ *ambulationis*

videtur so-
boles esse.
Meteorismus
levis Hypo-
chondrii à
Dureto de-
scriptus. In-
flatio hepatis
ex Sennerto:
Ejus signa:
curatio: Lo-
ca Hippocra-
tis, quæ huic
facientia
videntur.

„stinere, neque ab eo malè affici queat; neque ita molle, &
 „rarum, ut in se recipiat, & cedat, sed tenerum, floridum, san-
 „guine præditum, & densum velut *hepar*, ob densitatem qui-
 „dem, & latitudinem renititur, neque cedit, flatus verò
 „subiens increfcit, robustior efficitur, & impetu in id, quod
 „obluctatur, fertur; verùm quia tenerum, & sanguine prædi-
 „tum, doloris expers esse non potest: Easque ob causas gra-
 „vissimi, creberrimique dolores eo in loco excitantur. „ Re-
 „verà per hunc textum vagantium, & impingentium flatuum
 „collisiones, & sonitus, per elasticas cavitatum, latiorumque
 „spatiorum circumcingentes tunicas producti indicantur; Tum
 „furda Emphysemata in minoribus partium commissuris collecta,
 „subitæque in primis nervorum, vasorumve *oppletiones*, pressio-
 „nesque, undè incubi, stupores, gravedines, paralyticæ auræ,
 „aliæque similes affectiones procreantur; Tum in visceribus ten-
 „siones, & distentiones, simulque eorum renixus, ac contractio-
 „nes, ex quibus quidem dolores prodeunt, qui simul acuti sunt, &
 „tensivi: Ut hinc occasione flatulenti ambulonis annuat Hippo-
 „crates solidorum humani corporis percussiones, elateria, contra-
 „ctilia momenta, impetus, aliasque mechanicas res, modernorum
 „meditationibus acceptissimas. Ita etiam apud modernos nonnulli
 „per proprias observationes furiosum flatum, sive flatulentum am-
 „bulonem describere valuerunt; Ut Joh. Michaëlis *Prax. clinica*
 „*special. Cas. XIX.*, Pechlinus in *Observat. Physico-medic.* alique. Hic-
 „que ultimus vel ipsum cor à copiosissimo concluso flatu duabus
 „partibus naturali majus, omnesque insuper corporis venas passim
 „flatibus insigniter distentas aliquando exhibuit, qui *bilem* præ-
 „terea flatuum dominam nuncupavit. Cui quidem aliisque as-
 „sentior circa flatuosos ambulones in cavis partibus non difficile
 „collectos. Concederem pariter de laxioribus, & veluti spon-
 „giosis, aut penè vesicularibus visceribus, ut, ad exemplum, de
 „liene, quem sæpè à flatu subitanè inflari, & valdè turgere depre-
 „hendimus. Sed de solido, firmoque hepatis viscere non ita certa
 „res est, quomodò flatulenta substantia intimam hujus visceris
 „substan-

substantiam penetret, eandemque in dolorificam distentionem, & tumorem diducat, aut inter parenchyma, tunicamque succingentem gliscere, aut per ejusdem vasa expatiari, eaque pro dolore inducendo manifestè distendere queat. Quæ certè omnia, aut singula, non benè hucusque animadvertere valui. Interea flatuoso hepatis tumori nituntur Interpretes *sub mollem Hippocratis distensionem hypochondrii* accommodare, five *meteorismum hypochondrii* levem, subitum, fugacem, facilè digitis cedentem, facilèque redeuntem, sed tamen dolorificum. Ita scribit Duretus in Coac. fol. 318. "Hypochondria, (seu potius Hypochondriaca viscera) multis de causis in majorem molem assurgere. Causæ autem (ait) cur sic assurgant, tres omninò dictæ sunt à Præceptore; Inflatio, inflammatio, scirrhus. Inflatio fit à spiritu flatulento, eaque duplex, cum borborismo, & cum torminibus. Cum borborismo recens, atque fugax: Quoniam borborismus ille sic editur, flatus exclusione deorsum: Itaque citò exolvitur, vel cum dejectionibus, & urinis, vel ipse per se trajectus, vel ad sedes inferas devolutus. Inflatio cum torminibus contraria est borborismo: Est enim dolorifica; Ille doloris expers: Hæc sursùm movetur, ille deorsum. Atque hæc recens, ille vetus. Tum similia rursùs annuit fol. 388., ubi meteorismi hujusmodi à recente inflatione cum borborismo unicam redintegrandi spem, atque rationem in purgatione sitam esse tradit, nisi fortè pensum illud per se absolvat natura, flatu cum urinis, aut dejectionibus, excidente, aut etiam per se ad inferiora trajecto, & devoluto, veluti docet Hippocrates. Sennertus Pract. Lib. III. Part. VI. Sect. I. peculiare Caput de inflatione Hepatis litteris mandat; sed paucis se quidem expedit, hæc pro tota morbi Ætiologia scribens: *Inflatio est cum sub tunica crassus flatus concluditur, qui hepar inflat, & dolorem in eo excitat.* Signa præbet, quibus ista ab aliis hepatis morbis discriminetur. "Cognoscitur hoc malum, addit, ex tumore dextri hypochondrii, qui est sine gravitate, sed cum magno dolore, qui tamen non est continuus, sed nunc

„ intenditur , nunc remittit ; Et si locus digitis prematur, tu-
 „ mor cedit : Nullum tamen murmur percipitur , nec latentis
 „ vomicæ suspicionem præbet. Corporis, & faciei color , ut
 „ in aliis Hepatis tumoribus non mutatur. Urina, si febris ab-
 „ sit, quod plerumque fit, est alba, & spissa., Huicque morbo
 digerentia , repellentia , ac discutientia , tum interna, tum ex-
 terna præscribit , tum, si fovens causa, eaque cruda iners, cras-
 saque , præsens sit, debita ejusdem præparantia, atque inde eva-
 cuantia : Nostrates huic morbi generi magno cum fructu accom-
 modant elixiria quædam, variaque spirituosæ distillata ; Ut spi-
 ritum oleosum aromaticum Silvii, elixiria theriacalia ; Aquam
 D. Montagny sabaudi, aquam Carmelitarum Lugdunensium &c.
 Alii interea dolori hujusmodi hepatis, siue inflationi, ex flatu-
 lento dumtaxat spiritu, facile, & in insensilem modum dissipa-
 bili, conciliare student binos illos Hippocratis textus ; Primum
 nempe ex Aphor. XXXIV. Sect. VI. *Quicumque ex hypochondrio*
laborant sine febre, iis superveniens febris laborem exolvit. Et al-
 terum ex Coacis : *Tumores hypochondriorum sine febre recens obor-*
tos, tum inde natos dolores exolvit borborigmus in hypochondrio ex-
citatus ; Maximèque si exciderit cum urinis, & dejectionibus : Sin-
minùs, ipse per se trajectus. Juvat etiam iis, qui ad inferiora devol-
vitur. Nos autem veritatem propiùs accedere arbitrati sumus,
 Præceptoris hæc loca cum certiori hepatis, aut saltem crebriori
 affectione, qualis est in diuturnâ Hepatitide à viscidâ, & lentâ
 bile, crudiori lymphæ immixtâ congestio, superiùs in hepa-
 titidis tractatu Can. XIII. conciliando. Aliqui Hippocratica
 hæc sensa ad ipsam flatuosam colicam accommodare studuerunt,
 cum Colon intestinum, ut aliàs dictum est, dextrum hypo-
 chondrium non minùs occupet, attollatur facile à flatu, atque
 sensibilem inflationem tactui proferat ; Tum præcipuè in fla-
 tuoso ejus affectu omnia hæc, à Magistro proposita, contingere
 Phænomena videantur ; Et cum præsertim ad Coli Intestini
 morbum apprimè quadrare rati sint id aliud in Coacis præce-
 ptum : *Quibus hypochondria tumore assurgunt, alvo suppressâ malum:*
Malum

Malum est etiam quibus inveteratione morbi tabescentibus, alvi profusè feruntur. Ea tamen consulantur, quæ nos super hac re incit. Hepatitidis XIII. Canone aperuimus.

MIRABILIS HISTORIA

Motus, seu doloris Spasmotici in Hepatis regione ex
cl. *Pirrho Maria Gabrielli*: Quæ est Observatio XL.
Ephem. Germ. Decad. III. ann. IV.

Mulier 40. annorum natæ, boni habitûs, nuptæ Viro,
Menstruum diminutione duobus ab hinc annis laboranti,
obortus est motus quidam pulsatorius internus in hepatis re-
gione, singulis mensibus per unam, quandoque verò per duas,
aut tres horas circa menstruorum eruptionem, in octo vel de-
cem dierum decursu quotidie eandem invadens; qui quidem
dum paulatim augebatur, & sæpè sæpiùs patientem affligebat,
tale sumpsit incrementum ne dum in frequentia, verùm etiam
in majori pulsatione, ut ferè quotidie eandem cruciaret; un-
dè propter vehementem motum coacta fuit in lecto decumbe-
re. Accersitus ego eo temporis spatio, quo vix aderat motus
prædictus, nam singulis horis, tribus, aut quatuor vicibus ean-
dem invadebat, observavi hepatis regionem tractabilem, &
absque ullo obstructionis vestigio: Incipiente autem dicto mo-
tu, spatio unius horæ quadrantis in tantam elevationem ipsa
hepatis regio se extollebat cum motu violentissimo pulsatorio,
quem ego vocabam spasmodicum, ut per palmum & ampliùs
elevaretur in tumorem cum concussione totius corporis, & præ-
sertim thoracis in dextera parte: Et tunc temporis ipsa hepa-
tis regio ad contactum adèò apparebat dura, ut ferè videre-
tur lapidea; Undè patiens taliter laborabat, ut cessante motu
debilis ac languida jaceret in lecto. Atque iterùm post dimi-
diam horam plus minùsve motus adveniebat, & semper dura-
bat per octavam horæ partem, aut semiquadrantem, paulatim

incipiendo, nimirum primis pulsationibus mediocriter, reliquis autem gradatim augescentibus usque ad partis elevationem per palmum, & amplius, cum maxima adstantium admiratione. Mulier hæc spatio 25. dierum in Nosocomio S. Mariæ de Scala medicamentis purgantibus leniter purgata, ut adhibitis à me remediis ex antimonio diaphoretico, oleo succini, & assa fetida compositis, celebratâ sanguinis missione in brachio, & ex saphena melius se habuit, atque in præsentî vivit, & ambulat minori cum pulsatione; undè consuetas ac domesticas operationes facillè exercet. Hucusque Gabriellius. Ubi annotandum reor, morbum hunc, etsi ab hoc Practico veluti hystericum non inutilli suspitione habitum, primigenium tamen in hepate appositè censeri posse; cùm idem Scriptor, præterquàm in hepate, suas hunc nullibi exeruisse vires testetur.

Hepatis Vulnus ejusque Contusio, & Scissura.

Canones Practici.

*Vulnera
quædam, quæ
ab Hippocra-
te, Celso,
aliisque Ve-
teribus de ve-
stigio pro
lethalibus
accenseri vi-
dentur, non
stricto ita
sensu acci-
pienda sunt;
Dum vel
fundi uri-
naria vesica
penetrantia
vulnera,
corticalis
pars cerebri*

I. **H**epatis vulnera pro lethalibus indiscriminatim habuisse Hippocrates, Celsus, alique Antiquorum probatissimè videntur, ob hæmorrhagiam, illis ut plurimum conjunctam. Ita asserit Celsus Aphor. XVIII. Sect. VI. *Vesicâ discissa, aut Cerebro, aut Corde, aut septo aliquo ex tenuioribus intestinis, aut ventriculo, aut jecore, lethale est.* Confirmat in Coac. prænot. *Vulnera ferè mortalia contingunt in Cerebro, aut spinali medulla, aut jecore, aut septo transversò, Corde, vesica, vena majore.* Ita Celsus lib. V. cap. XVI. *Servari non possunt, cui basis Cerebri, cui Cor, cui stomachus, cui JECINORIS PORTÆ, cui in spina medulla percussa est, cui aut pulmo medius, aut jejunum, aut tenue intestinum, aut ventriculus, aut renes vulnerati sunt, cuique circa fauces grandes vena, vel arteria præcisa sunt.* Interea severius hocce Hippocraticum judicium temperat valdè Galenus in

Com-

Comment. memorati Aphorismi. Et sanè moderari ut puto, oportebat. Quippe cùm, urinariam vesicam in Cervice ad usque ejus cavam discissam sanari posse Lithotomiæ operationes ostendant: In fundo verò sauciatam, imò ad usque cavum perforatam admisisse interdum curationem plurimæ adhuc observationes testentur. Vetustiorum plurimis usui fuerat, Lithotomiæ operationes ad pubis regionem, seu ad vesicæ fundum instituere; Plurimique intereà evadebant. Retulit mihi peritissimus majoris Taurinensis Nosocomii Chirurgus D. Albertus Verna, aliquando in septuagenario homine, ab urethræ callosa excrescentia in absolutam vesicalem ischuriam delapso, atque hinc, ob præstitam sanguinei feri ad universum corporis habitum præcipitem effusionem, hydropico extemplò reddito, jamque Orthopnoico, sensibus omnibus ferè destituto, mortisque faucibus proximo, scalpello aperuisse vesicæ fundum, quæ nempe vel ultra umbilicalem regionem tumebat adeò, ut ipsi visui se manifestam præberet: Urinas hoc pacto feliciter eduxisse, easdemque per eundem hiatum dies aliquot exstillasse, donec exedentium cereorum introductione absumpto, deletoque urethræ callo, lotium pristinam suam viam repeteret: deleto hinc hydrope illo fortuito: Consolidato vesicæ fundo: Et sene post aliquot hebdomadas in pristinam sanitatem reposito. Similem in cerebro, corticali parte profundius ad oras usque medullaris sauciatâ, cum quadam imò suspicione læsæ aliquantæ medullaris portiunculæ, per cerebrosos primores anfractus serpentis, sanationis eventum nos aliquando perspeximus: Et propriâ observatione Galenus ad hunc locum confirmat. Similem pariter fuisse traditur in plaga cordis, ejusdem sinus non adeunte. Ita effatur Etmullerus lib. VI. Chirurg. Med. Cap. II. "Vidi ego Romæ apud egregium Chirurgum cor canis, in cujus parenchymate tres globuli ferrei erant, & ita quidem, ut isti globuli omninò coaluerint in parenchymate cordis. Nam Canis erat mortuus sub anatomico cultro, aliaque exempla à Pareo, Schneidero, Schenckio, aliisque proferuntur.

profundius sauciata, cordis plaga ventriculos non penetrans, atque graviores continui renuium intestinorum solutiones, curari adhuc possunt.

Graviora intestinorum tenuium vulnera, à natura sponte, feliciterque curata, Vid. ex Maur. Eggerdes Observat. I X. & X. Ephemerid. Germanic. ann. I V. Decad. I I I.

Elucidatur
sensus Hip-
pocratis cir-
ca memorata
vulnera
prius à Ga-
leno, hinc
etiam ab
ipsomet Hip-
pocrate, &
Celfo.

I I. Cùm idem prætereà de aliis partibus, quarum vulnera ab Hippocrate prædicantur lethalia, à Practicis quamplurimis decantetur, suspicari juvat, Senem per illud Aphorismi verbum *discissa* intellexisse dumtaxat magnum, atque profundum vulnus, quod jecur usque ad majora comprehensa vasa, cerebrum usque ad medullarem partem, diaphragma ab una ad alteram faciem disciderit, atque alia memorata viscera usque ad propriam cavitatem enormiter aperuerit. Ita posuit Galenus in Commentario: *Quosdam in ventriculo vulneratos dicunt aliquando, sed rarò, fuisse sanatos. Tenuium autem intestinorum natura, & ventriculi magis, non parum participant carnosae substantiae, & ideo in summa parte vulnerata sæpius agglutinantur: Tota autem discissa usque ad eorum cavitatem rarissimè. Sed jugis cordis, atque diaphragmatis motus, quem quidem sanationi prorsus officere eodem loco decernit Galenus, agglutinationi levioris accepti vulneris vix posset, ut arbitror, impedimento esse; cùm hujuscemodi plagæ, si pulmoni, ut ut jugi motu concitato, infligantur, adhuc curationem excipiant. Addit autem (quod rei nostræ caput est) de vulnerato Hepate Galenus: *Hepatis autem non solum profundum vulnus in fibris ejus factum, sed etiam fibræ abscissæ aiunt fuisse sanatas: Atque lethalem hepatici vulneris conditionem ab unâ majoris vasis rupturâ, succedenteque hæmorrhagiâ, videtur deducere: Hepar verò vulnera habet plurimo manantia sanguine, atque idcirco prius moriuntur, qui ita sunt vulnerati, quàm vulnera agglutinari possint. Hoc autem dixi, volens intelligi etiam venam esse dissectam. Sed quid plura? Ipse Hippocrates suam adhuc in prædict. lib. I I. sect. 2. moderatur sententiam: *Vulnera autem ferè quidem mortem afferunt, quæ magnas venas, quæ sunt in Collo, & inguinibus laeserunt, deinde quæ cerebrum, & hepar, deinceps quæ in intestina, & vesicam pertinent. Quæ sanè omnia magnam perniciem afferunt, non eam ta-***

men,

men, ut (quod quidem existimant) nemo ex his servari possit. Nam & his nominibus præditi loci multum inter se differunt; atque ipsi modi: Hæc parum etiam cujusque corporis constitutio differt. Incidit enim interdum ut neque febre, neque inflammatione tentetur sauciatus, interdum etiam nullâ ex causâ febricitat, nec aliquam corporis partem inflammatio prorsus occupat. Hinc Celsus loco superius memorato affert illos à vulnere servari non posse cui basis cerebri, cui jecinoris portæ, cui pulmo medius percussa sunt: seu pars cerebri medullaris, vasa hepatis majora, & pulmonis intimior substantia, quorum quidem vulnera omnium consensu lethalia sunt.

III. Constat ergo, Hippocratem, & Interpretes in profundiori dumtaxat hepatis vulnere, seu in diacope, cum indita majoribus venis læsione, non verò in leviori, & superficie tenus inflicta plaga lethale fatum fuisse minitatos. Enim verò cum nullum viscus grandioribus supra hepar, atque numerosioribus vasis donari, imò ipsam hepatis parenchymatosam substantiam ab elegantissima venarum Portæ, & Cavæ, atque biliarium ductuum invicem concurrentium sylva totam quantam confectam eo artificio disponi, ut quò interiores magis partes perlustremus, eò majores venarum rami, aut ipsi trunci obversentur, superius in primâ Historiæ parte ostensum sit; utique vulnus in hepar infligi profundius non poterit, quin major aliqua faucietur vena, atque hinc insanabilis interna sanguinis jaçtura, seu citò perimens hæmorrhagia concitetur. Ita ob inductam ejuscemodi effusionem sanguinis, mortem cum vitâ repentinè commutasse illum Hippocratis lib. 5. Epidem. fauciatum tutò censendum est. Illi cui hepar percussus est jaculo statim color mortuis similis affusus est, oculi concavi, anxietas, & difficilis tolerantia. [Fortissima certè maximæ internæ hæmorrhagiæ indicia] mortuus est antequam concio solveretur, cum ipso diluculo sauciatus fuisset. Quemadmodum igitur vulnera hepatis profundius inflicta, non quidem suapte naturâ, sed ob productam hæmorrhagiam, celerem indè suffocationem animique defectus indu-

Vulnus Hepatis quo igitur in casu lethale sit, & quo in visceris loco, & quam inducat symptomata. Quodnam verò curabile, vel abscissis hepatica substantia portionibus. Cur Veteres formidandis jecoris vulneribus fuerint adeò proclives.

inducentem, lethalia sunt, atque quæ hepar diaphragmati adjacet, & ubi venæ cavæ truncus est, illata plaga profusione sanguinis implacabili est omnium maximè præceps ad mortem; Ita superficie tenus inducta, quæ quidem non majora vasa, externam nempe hepatis substantiam contexit, dumtaxat offendant, si modica succedat hæmorrhagia, atque affluens sanguis facilè per vulnus ipsum educatur, lethalia minimè censenda sunt; quæ imò facilem, citamque curationem, peritâ manu ministratam, recipiunt. Tum frustula quoque hepaticæ substantiæ non exigua, quæ quidem majora secum vasa non avellant, absque lethali eventu abscindi à sauciato hepate posse, cum plurium Scriptorum, tum, quæ nobis non ita pridem transmissa est, adnexæ inferiùs historiæ testimoniis, ut abundè, ita & manifestè comperitur. Vid. super hâc re Æginet. lib. 6. cap. 28. Cornel. Gemm. Cosmogr. lib. 1. cap. 6. Ber-
tinus lib. 13. Med. cap. 7. Guil. Fabr. Hildan. cent. 2. Obser-
vat. 34. Sennert. Pract. lib. 3. part. 6. sect. 1. cap. 7. Velschius
in rat. Vul. Lethal. jud. cap. 9. Glandorp. lib. specul. Chirurg.
Ceterum Modernis Antiqui in timendo ab hepatis vulnere in-
teritum religiosiores fuisse videntur; cum in hepate sanguinis, &
vitæ fontem, ac fundamentum principatum, & facultatum na-
turalium, atque animalium salutarerent. Interea, si, ut par est,
non ultra biliaris secretionis officinam, hujus visceris munera
reponamus; Multa hujusce metus ratio excuti medentium ani-
mis poterit.

*Diagnos.
hepatici
vulneris à
genere, sede,
complexu, &
gravitate;
insuper à lo-
co, & specie
doloris, à co-
pia, & colo-
re effusi san-
guinis, à vo-
mitu, urinis,*

I V. Danda igitur opera est, ut solutè in hepate vel pun-
ctum, vel cæsionis unitatis genuina conditio dignoscatur: An
planè abscissa ejusdem pars aliqua sit; An solum contusa, an
utroque modo affecta: An vulnus exteriorem dumtaxat, an
intimiorum substantiam, an gibbam, an cavam regionem oc-
cupaverit; An jecori solum, & communibus corporis tegu-
mentis, an simul finitimis, aut remotis etiam visceribus indi-
tum fuerit. Interstingui autem hæc omnia poterunt per cæ-
dentis Instrumenti, rationem, & impetum; per fabricæ, &
habi-

habitudinis partium, plagæ objectarum anatomicam notitiam; atque per consequentia symptomata; Et præcipuè à doloris genere, & sede: Nam puncto hepate non solum in ejus regione dolor percipitur; sed ob allatas alibi rationes usque ad jugulum, & scapulam dextram plerumque protrahitur: à loco insuper effusionis sanguinis, atque ab ejusdem majori, aut minori copia; Præcipuè ab ejusdem effusi sanguinis colore, qui nempe, biliferis ductibus in lacerationis partem inductis, aliquâ imbutus flavedine ut plurimum deprehenditur; Imò sanguinem ipsum propaginum portæ, super alium quemcumque sanguinem, non obscurè flavescere, aliàs annotatum jam fuerit. In hepatis plagâ biliosus plerumque cum magno ciborum fastidio, in contusione verò cruentus vomitus contingit, vel sanguinis per alvum, aut etiam urinam excretio; [Quæ tamen ultima vel in ipsomet simplici vulnere quandoque obveniunt.] In utroque casu anxietas excitatur, cardialgia, & respirandi difficultas, seu, ut ait Hippocrates, *densus spiritus*; vel etiam Orthopnoea si læsum hepar inflammetur, & turgeat. *Fecinoris vulnerati nota sunt: Multus sub dextra parte præcordiorum profusus sanguis: ad spinam reducta præcordia; in ventrem cubandi dulcedo; punctiones, doloresque usque ad jugulum, junctumque & latum scapularum os, intenti. Quibus nonnunquam etiam biliosus vomitus accedit.* Hæc Celsus lib. V. cap. XXVI. Simples hepatis contusiones ab aliquibus propriè lethales non judicantur. Intereà referente V. Epidem. Hippocrate: *Puer à mulo in hepate percussus quarto die mortuus est.* Ab inducta in viscere ruptura, ejusque vasorum rixi, cum interna hæmorrhagia lethum hujus pueri fuisse operatum censerem. Hepatis intereà contusio, tametsi rupturam nullam inducat, si naturæ, aut remediorum ope haudquaquam soluta, diutiùs protrahatur, præcipuè si sui generis Ecchymosim produxerit, facilè in spurium abscessum degenerat. Hinc Hepatis contusionem in genere deteriore, vulnere atque periculosiore esse, decernit Sennertus.

decubitu, aliisque symptomatis; cum adjecta, aut non adjecta contusione, cujus etiam exitus perpenditur.

*Curatio vul-
neris, & con-
tusionis he-
patis.*

V. Curationem quod attinet : si in vulnere hepatis ingens sanguinis profluvium metuatur , vena cubiti dextri citò secanda est : clysteribus laxa alvus servanda : Hi autem refrigerantibus , simulque vulnerariis præsidiiis blandè adstringentibus , lenibusque immixtis abstergentibus parandi. Statim verò adstringentia , glutinantia , & balsamica propinentur , qualia in hæmophthosâ usurpari solent , quorum sylva prostat apud Sennertum , aliosque Scriptores practicos. In contusione hepatis , præmissis pariter his , aut similibus universalibus remediis , sedatoque , si subsit , interno sanguinis fluxu , confugiendum est ad suaviter dissolventia , qualia etiam lapsis ab alto , & percussis suaderi solent ; Raponticum , Lacca , Sperma ceti , mumia , schenanth. succinum , bol. armen. rad. tormentill. aristoloch. rotund. thus , crocus , myrrha , absinthium , terebinthinata , & omnia in genere vulneraria , non jam nimis calida ; sed quâdam abstergenti , & discutiendi facultate prædita. Adstringentia , glutinantia , digestiva , & similia præsidia in vulnere hepatis ; aut discutientia , resolventia , simulque roborantia , in contusione extrinsecus adhiberi solita , inspectioni , operique Chirurgorum lubenter remittimus. A vino ægri abstineant : tenui , ac refrigerante diætâ , cibisque glutinandi virtute pollentibus utantur. Aqua epotetur ex coriandri seminibus , & radice arundinis , aut radice symphiti , & nodulo c. c. aut eboris , cum jujubis , passulis , aut similibus alterata , & decocta.

*Prognosis à
percussione
hepatis, in
abscessum
migrante
deducta.*

VI. Contingit non rarò in hepatis nec profundiori , nec leviori vulnere inflammationem excitari , quæ citò ad interitum plerumque ducit ; aut liquida ex abscissis vasis soluta , neque foràs liberè , sed potiùs per visceris substantiam effusa , in conficiendum majorem , aut minorem abscessum accumulari , præviâ , aut etiam non præviâ inflammatione. (Vid. cap. XXVI. lib. II. Observ. Medic. Nic. Tulpii ejuscemodi ex jecoris vulnere abscessus.) Quod pariter de contusione superiùs est dictum. Ad bonam , aut malam in hoc casu instruendam prognosim confi-

considerandæ sunt allatæ superiùs , cùm , de abscessu hepatis, conditiones , quæ nullam , aut aliquam spem nobis curationis præbeant. Verum tamen est , abscessus hepatis ex vulnere, aut contusione prognatos , ut plurimùm in Empyemata facessere; Undè collectio , atque exitus cænosi , atque amurcosi puris; quod quidem Phænomenon insanabilem visceris corruptionem ostendit.

V I I. Scissuræ hepatis à casu , aut percussione , cum, vel sine contusione , præcipuè cum majorum vasorum rixi, lethales sunt ; neque ideò curationem admittunt ; cùm subitâ sanguinis effusione præfocent. Vid. superiùs in 2. parte cap. 2. fol. 136. gravissimam hujus affectus historiam, nobis à cl. Lentilio ante hos quinque annos communicatam; quæ cum Hippocraticâ historiâ percussi hominis à jaculo , superiùs commemoratâ convenire videtur. Hæc quidem mortalia signa declarat. Hepatis substantiam solâ humiditatis privatione rumpi posse, atque ob humoris penuriam, & siccitatem rimis quibusdam dehiscere ; ut affert Fernelius lib. 6. de part. Morb. & Sympt. cap. 8., jamque superiùs in altera parte memoratum fuit, mihi hætenùs incompertum est. Ut nec hætenùs innotuit similis affectus , ab internis violentioribus motibus procreatus ; qualem describit Glissonius Anat. Hepat. cap. XI. “ Vidi aliquando in giba quorundam Jecinorum parte rimas, & hiatus majusculos, qui fortè à partium extremarum violentiore complicatione ortum duxerant : Quemadmodum & panis frustum nimîâ incurvatione diffingitur. Rimis istis, sive fissuris [quo tempore eas mihi videre contingit] natura medelam attulerat : Non quidem factâ agglutinatione , aut cicatrice, sed tenuis pelliculæ superinductione , quâ utrumque fissuræ latus obduxerat , manentibus tamen labris sejunctis , licèt illæ se se mutuò attingerent , : Tulpius (ut ex cap. XXXVI. lib. II. Observat. ejusdem medicarum) inveniens in muliere, regio morbo atque hydrope denatâ, Jecur aridum, atrum, exsuccum, & instar corrugati corii ita in se contractum, ut vix

Scissura hepatis, à casu, aut percussione producta, sunt omnes lethales. Quæ ab internis motibus, aut ingenti siccitate progenita apud aliquos auctores decantantur, sunt valde nobis incerta.

æquaret geminum pugnum (seu verum hepatis superiùs descriptum marasmm) curiosè satis, sed incassum, rimas illas Fernelii quærebat; quas quidem si ullibi, certè in aridissimo hoc jecore se in conspectum daturas sperabat.

Vulnera fellea cystidis que sanabilia sint, quæ lethalia.

VIII. Amplum vulnus vesicæ felleæ in casu quodam, qui sextus est Pandect. Medico - Legal. Part. II. Sect. IV. eruditissimi Valentini, à Medicâ Lipsiensi Facultate absolute lethale sancitum fuit. Intereà parvum ejusdem folliculi vulnus ad collum, aut etiam cysticum ductum, absque ulla mediocrium sanguiducorum vasorum læsione, non tam lethale credendum ducerem.

HISTORIA PRIMA.

Vulnus Hepatis, cum ejusdem substantie mutilatione curatum.

ANno 1716. die 10. Junii Carolus filius quondam Joannis Antonii Passere Calusiensis, ætatis annorum 30. conjugatus, & exercitiis rusticanis deditus, jam ab aliquo tempore maniacus, cum ad arva progressus fuisset, furiosus factus, cultrum ab adolescente, qui in pascuis armenta custodiebat, petiit, & is statim è pera extractum cultellum tradidit. Parvum illum cultrum ter, aut quater sibi in pectus adegit demens; sed nullum factum fuit vulnus, subuculâ ex nova, & crassiori tela constructâ ictibus reluctante. Ventrem idè nudavit, & repetitis ictibus magnum vulnus parum infra scutiformem cartilagineam ex lineâ albâ sectione aliquantulum obliquâ ad cartilagineos costarum margines inferiùs versùs pertingens Epigastrii cavum penetrans inflixit: sequuta fuit extemplò ingens sanguinis profusio. Cecidit vulneratus, ac sine motu, & voce permansit: Adolescens qui cultellum exhibuerat, aufugiebat, domumque se recipiens, nunciabat quod sequutum erat in demente.

demente. Hæc intelligens accurrit conjux cum sacerdote, & pluribus aliis ; illumque in cruore natantem reperiunt , & morti proximum judicant : Sacerdos sacrâ unctione vulneratum munit. Misellus interim domum asportatus tamquam moriens nullo subventus fuit pro vulnere remedio. Die sequenti vivebat adhuc. Vocatus ad ipsum accessi unâ cum eruditissimo, experientissimoque Domino Medico Francisco Farcito , nobiscum juncto Domino Joanne Baptistâ Ubertino chirurgo. Vidimus hepatis portionem non parvam è vulnere egressam, pluribusque vulnusculis trajectam. Hanc tetigi, & alæ hepatis portionem , quæ ventriculo insidet , esse dixi , scilicet angulum illum acutum, in quem jecur sensim attenuatur ; atque ut corruptioni proximam , excindendam esse pronunciaui, ne intus remissa reliquæ visceris substantiæ labem inureret , et si scinderetur , sanguinem in abdominis cavum copiosè effunderet, ideoque quadruplici filo intorto , & incerato ligavi , hinc digestivo communi vulnus implevi ; reliquum curationis Domino Ubertino commisi : Elapsis sex diebus portio exul fuit sejuncta ; & magnum illud vulnus intra bimestre fuit consolidatum , remanente aliquâ herniosâ tumescentiâ : & insanus hic à dementiâ quoque liber evasit. &c. *Illustrissima Domis. Tua Addictissimus famulus Joannes Baptista Berta Montalengarum Chirurgus.*

HISTORIA SECUNDA.

Vulnus Hepatis cum ejectione per alvum ejusdem substantiæ sanatum.

Faber lignarius in majori Taurinensi Nosocomio ante aliquot annos decumbebat , profundo ad dextrum hypochondrium vulnere sauciatus. Vomebat , atque per alvum eiciebat sanguinea : Ipsamet hepatis frustula per sedes rejecta

fuisse visa sunt. Optimè intereà revalescebat. Ex communi-
catione Cl. D. Reina.

HISTORIA TERTIA.

*Vulnus Hepatis simulque Ventriculi, & Intestini tenuis, cum
Biliariorum Vasorum scissione, ad curationem perductum.*

M Eretricula Taurini superioribus annis, plurimis punctim
plagis in ventriculo, hepate, atque intestinis ab amasio
fauciabatur. Vulnus ventriculi manifestabatur per frequentem
ab eodem ipsorum ingestorum eruptionem; Plagam intestini te-
nuis per chylum pariter hoc pacto exeuntem, & tandem he-
patica non levis, sed usque ad hepaticos non minimos ductus
protracta læsio per biliosam substantiam unà cum aliis succis per
vulnus guttulantem. Intereà ab his omnibus plagis post hebdo-
madas aliquot sanabatur, atque revalescebat Muliercula.

BINÆ HISTORIÆ

*Insignem Hepatis, atque Pulmonis in suppurationibus consen-
sum exhibentes; Quæ cum in superiori Disquisitione Abscessus
Hepatis omiffæ fuerint, Hic saltem ad calcem solutionum
continui Hepatici memorantur.*

Quantus sit Jecoris, & Pulmonis consensus, quem quidem
aliàs in mutua priorum morborum, & symptomatum
frequentique Epigenesi abundè memoravimus, liquet ulterius
ex crebra inspectione Cadaverum, à suppuratione alterutrius
harumce partium denatorum. Ita præ aliis exemplis plurimis,
leguntur hæc in *Sepulchreto Boneti de Hypochondriorum tumore*
Observat. XI. §. VIII. “J. Tassinus cum febre assidua dolorem
lateris

„ lateris querebatur , & ad regionem hepatis. Circa gibbum
 „ Diaphragmatis pars pulmonis tota in pus abierat, cujus pars
 „ transfluxerat in hepatis regionem,, De sola Doloris com-
 „ municatione extat Observatio Abrah. Veneri “ Quendam ex
 „ hepatis tumore laborare existimabam : Cúmque dolor quo-
 „ tidie augetur , & duraret longiùs , hepar ipsum in pus
 „ conversum esse arbitrabar. Post cadaveris autem apertionem
 „ inveni hepar penè illæsum; Totam verò thoracis cavitatem
 „ pure plenissimam; ita ut de pulmonibus vix exigua portiun-
 „ cula conspiceretur : Ex quo symptomatum utriusque affe-
 „ ctionis tantam cognationem fuisse satis mirari non potui. „
 Hic adhuc , vel extra locum, addendum est; nos in memo-
 rata Hepatici abscessus disputatione spurias, & frigidiores hu-
 jus visceris suppurationes, seu atheromata, steatomata, meli-
 cerides , aliasque similes , de industria prætermisisse ; Tum
 quia crebra est apud Authores horumce affectuum expositio;
 ut apud amplissimum virum , almæque nostræ Leopoldinæ so-
 cietatis celeberrimum Præsidentem D. Lucam Schrockium in
 Ephemerid. Germ. decur. III. ann. I. ; apud Riolanum An-
 thropogr. lib. II. cap. XVI. ; apud Velschium Epitagn. Obser-
 var. LIV. &c. Atque insuper in altera hujus Historiæ Parte
 eosdem fati excussimus : Tum præcipuè quòd nullam hi morbi
 curationem admittere videantur.

DE FLUXU HEPATICO.

Canones Practici.

I. **F**luxus hepaticus est dejectio indolens humoris cruenti, *Fluxus He-*
 ichorosi, hostiarum recens mactatarum ablutioni simi- *paticus quid-*
 lis, & fetidi, ab hepatis primùm intemperie, deindè & cor- *fit: ex dena-*
 ruptione ortum ducens: Quâ conflictati appetitu sunt prostrato, *torum ana-*
tome evin-
 carnes

*citur, mor-
bum ita di-
ctum, ab he-
patis vitio
ortum duse-
re.*

carnes averfantur, delectantur vino, febriculam, aut febrem quandoque patiuntur, siti nonnunquam urgentur; atque si morbus protrahatur, sanguinolenta interdum per os, nares, uterum, hæmorrhoides, aut cutaneos poros emittunt, & tandem non solum pruritu, sed cachexiâ, hydrope universali, aut solius abdominis, aut saltem gravi pedum œdemate infestantur; aut in consumptionem, & marasmm decidunt. Porro etsi sublatum cum Recentioribus ab hepate Hæmatoseos officium velimus, fluxum intereà hepaticum ab Antiquis dictum, proximum affecti hujus visceris symptoma, sive succrescentem morbum accensendum esse, imò ab hoc viscere evidenter proficisci, superiùs in I l. Parte Cap. I X. §. V. (sed impensè, fateor, neglecto ad hunc locum dicendi stylo, ob creberri-
mam nostram eorum, quæ ex calamo festinanter excidunt, revisendi impatientiam) evincere, ac demonstrare studebamus; Idque præcipuè ex Anatome denatorum ab hoc morbo. Quippe cum, *Jac. Bontii, Ballonii, Th. Jordani, & Car. Drelincurtii* (omissis aliis plurimis non minoris notæ Scriptoribus in idem collimantibus) Observationes attulerimus, quibus quidem in hominibus, brevi vel longo hepatico fluore defunctis, læsum hepar, erosum, & putre, imò eodem, quod in vivente profluxerat, tabo, loturæ carniū simili diffuens, perpetuò compertum fuit, ipsumque legerimus Forestum, affirmantem lib. XX I. *Observat. XXII.* non tantum cruenta, & aquosa, sed ipsam quasi hepatis substantiam dejecisse eos, qui ex hoc affectu morerentur; visum nobis est, nullum ampliùs quò ad hujus morbi ætiologiam, & sedem, superesse dubitandi locum: ut quod Galenus sub nubilo, citra cadaverum apertiones, ex unis affecti hepatis collatis phenomenis de hujus morbi origine conjecturaverat; per exculta indè extispicia fuerit ab Anatomicorum solertia in optimam lucem collocatum.

*Demonstra-
tur, hepati-
cum fluxum
à qualibet*

I I. Intereà non desunt qui fluxum hujusmodi ab aliis partibus præterquàm ab hepate, quod in hoc casu insons reputant, deducere conantur. Ita Sylvius lib. I. *Prax. med. cap. XIII.* qui

qui hunc effectum se unquam vidisse negat, existimat causam ejus in copioso duntaxat sero, sanguini admisto, & vasa simul relaxante sitam esse. Paulus Barbette Pract. lib. cap. V I. putat esse speciem hæmorrhoidalis fluxus: Alii ab arteriis aut venis intestinalibus, sive mesaraicis referre contendunt. Sed jam Sylvianum assertum quò ad originem ex seroso principio sat tenet; quò ad excretionis locum, sat impar est: cum locum hujusmodi non explicet; nec potius relaxari in intestinis sanguida vasa probet, quàm in jecore neget: Reverà [ut ad adversantes alios descendam] neque hujusmodi fluxus internorum hæmorrhoidalium vasorum apertioni imputandus est; cum hæmorrhoidalem excretionem tensio ad finem recti, ardor, angustia, dolor plerumque comitentur; tenesmi insuper species quædam superveniat; plurima ex tumore, & dolore inducta resistantia clysterum introductioni reluctetur; Purus, simulque crassiusculus sanguis dejiciatur, alvinis fecibus non immixtus, qui vix post diuturnum, chronicumque morbi progressum pallefcit. Hæc autem interea in hepatico fluxu non contingunt: neque ab arteriis intestinalibus, aut venis esse potest; quandoquidem ab intestinalium arteriarum anastomosi, repetendus non est; quoniam in hac eruptione purus sanguis floridus, atque eximie coccineus, lucidusque effunditur; sanguini idcirco per hepaticum fluxum subducto oppositus: neque verò ab apertis intestinalibus venis: nam præterquam quòd venæ non hiant in intestinorum cavitatem, ut anatomicarum rerum non ignaris compertum est, id accedit, quòd ex his, vel hiantibus suppositis, merus adhuc sanguis proflueret. Atque, ut has omnes ex intestinalibus sanguiducis vasis sanguineas excretiones recolligam; copia hepatici fluxus tanta nunquam deprehenditur, quanta in hæmorrhoidali, ob anastomosim, hæmorrhagiâ; neque in illo, ut in hac, tam crebra cietur dejectio: tum in omnibus intestinalium vasorum aperturis si semel subsistant excretiones, non facilè redeunt, ut in hepatico fluxu. Tandem hepaticus fluxus memoratis cæteris

alia, præterquam in hepate, & ab hepate, sanguiducorum vasorum in intestina apertione, deduci non posse: Atque plurima, quæ quidem frequentiora sunt, hepaticum fluxum antecedentia, aut consequentia, adducuntur.

multò diuturnior est : ut qui ad menses , interdum & annos protrahitur , livido ut plurimum , vel citrino colore stipatus : Imò indicia affecti jecoris vel antecessere , vel comitantur , vel consequuntur. Intestinalis excretio , quæ quidem diù manere non potest , appositis remediis facilè , brevique cedit ; hepatica verò diù rebellis est ; quandoque insanabilis ; tum si narcoticis per aliquot horas suppressus interquiescat , majori postmodum ubertate recrudescit , secus ac in mesaraicorum , aut hæmorrhoidalium hæmorrhagia. Intermiscentur hepatico fluxui biliosæ frequenter dejectiones , præsertim à somno , & prandio , febriculâ distinctè periodicâ , cum calore circa vespas invalescente , siccâ interdum accedente tussiculâ , nonnullâ , magis minùsve doloriferâ , dextri hypochondrii intumescentiâ , nauseâ , linguâ flavâ , & amarâ , siti , summâ virium debilitate , respiratione difficili , quandoque veluti interceptâ , vel singultuosâ ; cardialgiâ , croceis urinis , ventris rugitibus , & flatibus , creberrimâ dejectionum mutatione , rerum omnium tædio , somnolentiâ plurimâ &c.

Cur hepaticus fluxus dici queat Catarrhus Hepatis.

III. Diximus præterea in II. Parte : *Fluxum hepaticum esse catarrhum Hepatis* ; neque insulsè dicebamus. Et sanè cum hepatica hujusmodi profusio serosa sit , simulque sanguinea , seu à sero unâ cum sanguineis particulis in hepatis vasis à communi massa præternaturaliter secedente , atque per biliares ductus ad intestina defluente , ortum ducat , tum serosi omnes per partes corporis morborum defluxus , seu *defluxiones* , ut dicitur , in genere sub catarrhosis , seu communi Catarrhorum nomine veniant , cur hepatico hujusmodi defluxui , hepatis catarrhirationem denegabimus ? Ita ab omnibus Practicis affectus hujusmodi serosis , sive catarrhalibus morbis accensetur ; Qui nempe in præcipuam ejusdem curationis indicationem intendunt animos , seri in sanguine & viscere redundantis , aut facile nimis ab iisdem secedentis , atque in morbosum liquamen faciescentis consumptionem per aromatica & similia (ut inferius exponemus) moliuntur , aut evacuationem per catharsim ,

aut

aut à coctionum officinis, ad emunctoria varia, veluti cutanea, renalia &c. transvectionem, seu derivationem; ut hoc pacto *siccescant alvini ductus*. Interea hepaticus huiusmodi catarrhus calidus est, acris, salsus, à venarum hepatis apicibus, à sero-
fiori sanguine laxatis, in appensa, pariterque laxiora reddita
biliariorum ductuum principia neque lentè delabens, neque cum
impetu ruens. Hinc quemadmodum hepatica huiusmodi sero-
so-biliofo-sanguinea colluvies diutiùs plerumque, lentèque pro-
trahitur, neque acerba inducit symptomata; ita viscus, quod
alluit perennè, maceratque, post longum tempus exedit tandem,
variisque modis labefacit.

¶ V. Totus rei cardo est, hepaticam huiusmodi (ut *Quomodo fluxus, hepa-
ticus dictus, ab aliis om-
nibus sangui-
nolis al-
vinis fluxi-
bus distin-
guatur.*
plures nominant) Dysenteriam à communi dysenteria,
sive fluxum huiusmodi ab intestinali fluxu distinguere. At-
que totum hocce discrimen à Galeni codicibus elicatur. Ita
ille III. de Symptom. caus. Cap. II. postquam loquutus fuerit
de sanguineis dysenteriis, quæ iis, quibus artuum aliquis præ-
cisus sit, frequenter accidunt, tum de illis certo circuitu re-
petentibus in iis hominibus, qui ab exercitata priùs vita ad
omninò desidiosam se transferunt, alvi insuper fluxus, vel
decretoriè in acutis morbis, vel tabescentiæ sive colliqua-
tionis more productos innuens, descendit ad bonæ, malæque
intermediam excretionem, qualis est in ventre cibi semicoctis;
„ excernitur, ait, is maximè in hepaticis affectibus: vocant
„ ita in quibus morbus ipse jecoris est imbecillitas, licet nulla
„ sit phlegmone adjuncta. Hoc enim casu similis passio visceri
„ incidit, iis quæ imbecillo ventri accidunt: Quando is qui-
„ dem appetit, sed cibos quos sibi admovet cum non conco-
„ quat, iisdem gravatur, & semicoctos ad intestina demittit.
„ Est autem huiusmodi excretionis species (veluti etiam eam
„ assimilarunt qui ante nos fuere) maximè similis carniū
„ loturæ: præstiterit autem fortasse non ita solūm dixisse, sed
„ quò exactius sit exemplum, cruentarum atque recenter ene-

„ Atarum, sermoni addidisse. Quin etiam si quis quod ita ex-
 „ cretum est, aquosum sanguinem nominet, sic quoque mihi
 „ illud clarè interpretari videtur „ & paulò inferiùs hæc ad-
 „ jicit à memoratis deducta. “ Caterùm differentiæ sanguino-
 „ lentę excretionis quatuor in universum sunt, quatuor suc-
 „ cedentes affectibus: Una quidem ipsius sanguinis in iis, qui-
 „ bus artuum aliquis est abscissus, vel qui exercitationem di-
 „ miserunt, per circuitum repetens: Altera cùm ex imbecil-
 „ litate jecinoris aquosus sanguis dejicitur, quem utique lo-
 „ turæ carnis assimilant: Tertia, quæ mox dicta est melan-
 „ cholici splendentisque sanguinis: At hæ quidem tres ut mul-
 „ tum simul excernatur efficiunt. In quarta & minutim, &
 „ exiguo tempore expulsio facta visitur, aliàs quidem veri
 „ sanguinis, aliàs concreti. In hac & puris non rarò exiguum
 „ aliquod excernitur: etiam ulcerum crustulæ, quæ græcè
 „ *ephelcides* dicuntur: præterea membranosa quædam corpora,
 „ quæ intestinorum ipsorum sunt particulæ: sed & stercus su-
 „ per his collectum sæpenumerò excernitur, sanguinis in se
 „ guttas habens. Quartæ autem, de qua modò egimus, in-
 „ testinorum exculceratio est affectus: quam etiam solam non-
 „ nulli dysenteriam nominandam censent „ Jamque ex his
 „ doceri possunt medentes cùm causam hepatici fluxus dignos-
 „ cere, tùm hujusmodi fluxum ab aliis sanguinolentis fluxi-
 „ bus interstinguere, præcipuè ab illo tertio Galeni *melan-*
 „ *cholici splendentisque sanguinis*, qui nempè ab apertis ut pluri-
 „ mùm internis hæmorrhoidibus proficiscitur; atque insuper à
 „ quarto, qui propriè dysenteria atque intestinalis fluxus nun-
 „ cupatur.

Rursus ex
 Galeni alio-
 rumque Hip-
 pocratis In-
 terpretum
 sententiis
 discrimina-
 tur fluxus
 hepaticus.

V. Sed ab his ulterius hepaticum fluxum idem author
 aliis locis, aliisque argumentis discriminat. Quippe *VI. de loc-*
affect. Cap. II. De intestinorum affectibus dignoscendis de intestina-
 li dysenteria loquens hæc tradit “ Neque repentè, & affatim
 „ fit hujusmodi affectus (id quod in eo, quem hepatis vitio
 „ accidere diximus, fieri solet) atque proprias etiam habet
 notas.

„ notas. Etenim protinus ab ipsius initio, bilis mordax secer-
 „ nitur, quam deinde interaneorum abrasiones sequuntur, po-
 „ stea paulum cruoris simul excerni videtur, quando videlicet
 „ affectus ipse jam dysenteria est &c. Atque huiusmodi dy-
 „ senteria ab iis, quæ ab hepate profluunt, ita discernuntur.
 „ Nam ab initio tenuis sanies sanguinis ab hepate dejicitur, dein-
 „ de aucto malo crassus humor, fecibus vini non absimilis:
 „ præterea in hepatis excretionibus nihil abrasum expellitur:
 „ atque interdum duorum aut trium dierum intervallo sup-
 „ primitur evacuatio, deinde rursus redit malum, atque ex-
 „ cernuntur excrementa prioribus multò pejora. Id verò per
 „ intestinorum ulcera haudquaquam apparet: Quippe in iis
 „ neque affatim, neque ex longis temporum intervallis labo-
 „ rantes dejicere consueverunt. Superius, seu V. de iisdem
 „ locis affect. Cap. VII. Postquam hæc attulerit: *quum igitur alvi*
sedimenta aquæ, in qua nuper macerata caro abluta est, similia esse
videritis, efficacissimum hoc vobis signum sit affectionis hepaticæ, &
plurima superioribus similia tradiderit, tum fuerit effatus, in-
cipere interdum affectum ob frigidam intemperiem citra febrim; quan-
do tenuis sanies sanguinis excernitur; deinde tractu temporis, dum
sanguis in viscere corrumpitur, febrem supervenire solere, atque
 imperitos clinicos hanc sæpè negligentes, malæque victus, ac
 remediorum ratione utentes increpaverit; tandem medicorum
 errans vulgus insinulat, quòd hunc affectum putet esse dysente-
 riam: sub eodem capite fluxus huiusmodi, à jecoris imbecil-
 litate progenitos, dirimit ab his plurimis, qui à plenitudine,
 ipsoque viscerum robore excitantur, integrâ quidem plerumq;
 in omnibus existente valetudine, plerumque verò parte ali-
 quâ non hepaticâ morbum patiente; ut quæ huiusmodi evacua-
 tiones sub nomine *cruentarum dysenteriarum* evenire solent in
 iis, qui membro aliquo, ut suprâ, mutilati sunt, aut in exer-
 citatione educati, se ad otium converterint, aut in vegetis
 fœminis, quibus menstrua defecerint. In his quidem, annotat
 Galenus, *sincerus sanguis excernitur, similis ei, qui ab hostia inter-*

dictus ab
aliis omni-
bus alvinis
excretioni-
bus; præci-
pue verò à
genuina dy-
senteria. Re-
sutatur di-
stinctio he-
patici fluxus
in legitimū,
& spurium.

fecta profundi consuevit. De cætero inter prima singularis doctrinæ, consummataque experientia pericula, quæ Romam conveniens Galenus ad summam famam comparandam protulit, illud certè fuit, quo ad siculum Medicum, pleuritide se detineri putantem, accitus, hepaticum vigere fluxum à dejectionum conditione detexit, atque ex hoc fluxu certissimum jecoris affectum magnâ cum adstantium admiratione revelavit. De peculiari verò hepatici fluxus ratione hæc habet Forestus *in schol. ad Observat. XXIV. lib. XXI. de profluvio alvi* "Fluxus hepaticus etiam sumitur pro quoquoque fluxu humerali ab hepate proveniente, sive fuerit à bile, sive à fece melancholica. Sed quando est *sanguineus lotivus* ex debilitate hepatis, tunc propriissimè vocatur hepaticus: minùs propriè si ab aliis humoribus, vel vitio hepatis, vel apostemate hepatis fiat, ut ideò qui vulgò hepaticus fluxus dicitur, fluxus propriè sit ab Authoribus *lotivus sanguineus* dictus. Raym. Joh. Fortis cum aliis pluribus distinguit hepaticum fluxum in legitimum, & spurium; Primum scilicet, in quo dejectio reverà cruenta est: alterum in quo tantum chylosa: sed nos qualemcunque non cruentam dejectionem ab hepatici fluxus ratione ablegando, sentimus cum Fernelio, chylosam dejectionem cæliacarum passionum familiæ esse adoptandam. Neque arridet nobis alia Sennerti distinctio: qui nempe legitimum dicit, si crudus solum sanguis, spurium, si corruptus deficiatur.

Hepaticus fluxus quando criticus est, & quando symptomaticus, unde prognosis ratio elicienda: & primum de Critico, cujus sapè nō per alvum via est, sed per vomitū.

VI. Quemadmodum igitur sanguinæ in genere dejectiones, quæ quidem in praxi non infrequentes offeruntur, dissimilis alicui sunt, viam nempe nunc bonis, nunc malis ægrorum rebus sternentes; ita hepaticus in specie fluxus modò salutarem se præbet & criticum; modò malus est; interdum etiam & lethalis. Criticus hepaticus fluxus declaratur ab Hippocrate in Coacis: *Quibus hepatis dolor, hi sanguine per alvum egesto servantur, non autem egesto moriuntur.* Intelligit Senex egestionem sanguinis per alvum ab hepate, gravi quidem, & per acutâ, aut acutâ affectione obfesso, sed adco viribus pollente, ut

ut valeat morbificam causam expeditè excutere, atque per proprium excretorium ductum, sive cholidochum, ad intestina propellere. Hæc autem egestio, ut salutaris sit, in morbi status principio, seu ante, aut circa septimam (veluti superius in *phlegmone hepatis* de critico sanguinis per nares profluvio effati fuimus) obtinenda est: Tardiùs habita, aut visceris inclinatis jam viribus supervenit, hinc perperam à natura regitur; aut etiam, vigente adhuc jecoris robore, organica eidem læsio inducta, aut fortis intemperies jam est, ut criticam quomodolibet indolem hujusmodi excretio redolere non possit; imò affectiones aliæ sub eadem evacuatione nascuntur. Quod quidem animadvertit Galenus VIII. de Composit. medicam. 5. loc. Cap. VI. „Exactâ concoctione frustratâ, hepaticis sanguin-
„ nolentus humor per alvum excernitur talis consistentiæ, ve-
„ luti si quis sanguinem cum aqua confudisset: & plerique sanè
„ Medici imaginem ejus depingentes scripserunt, talem ejus
„ compaginem esse, velut si quis victimæ recens mactatæ car-
„ nes aquâ lavasset. Et plurimæ hepaticæ affectiones ab hujus-
„ modi excretionibus initium capiunt, nondum magnam de-
„ bilitatem hepate habente. Auctâ autem affectione nihil am-
„ pliùs tale excernitur, sed multiformes alię qualitates, &
„ compages, velut à ventre ex cruditate laborante, Ita etiam
V. de loc. affect. Cap. VII. criticas hujusmodi ab hepate aut
similes, remediorum ope à robusto jecinore elicitas dejectiones
indicare videtur “ Atque ut in hepaticis affectibus (quam-
„ quàm rarò) medicamentorum auxilio, robustiore evadente
„ jecinore, interdum dejiciuntur excrementa tum colore, tum
„ odore pessima, expurgante se ita viscere: sic eodem modo
„ urinæ quoque deteriores redduntur, quibus imperiti Medi-
„ ci nonnunquam decepti, gravis morbi periculum subesse
arbitrantur „ Interdum criticum hujusmodi sanguinis hepaticum
fluxum, per aliquam causam à progressu per intestina im-
peditum, per vomitum determinari observavit Baglivus; cu-
jus quidem textum, cum indicia genuinæ eruptionis ab hepate,

ac satis appositam, pro fluxu hujusmodi per humiliores, seu intestinales partes promovendo, remediorum administrationem complectatur, in medium afferre oportet “ Errant qui putant
 „ omnem sanguinem vomitu ejectum venire è pulmonibus.
 „ Venit à jecore, liene, utero, capite, & frequentissimè ex
 „ suppressione mensium, & tunc non est timendus; Nam mu-
 „ lierculis familiaris est: Signa quando venit ex hypochon-
 „ driis, potissimum jecore, sunt, palpitation hypochondrii, do-
 „ lor, ardor, tensio; Signa obstructionum, color subflavus,
 „ viridis in facie, aut reliquâ cuti, palpitation cæliacæ, aut
 „ umbilici: Vomunt sanguinem nigrum, non verò spuman-
 „ tem. Motus sanguinis ab hypochondrio venientis manifestò
 „ percipitur, & sursùm ascendere manu percipitur, quod in
 „ suo ægrotante observavit Ballonius. Juvenibus familiaris est
 „ hic exitus loco hæmorrhagiæ. In hujusmodi sanguinis vomitu
 „ ex jecore, adstringentia non juvant: sed primæ viæ à ni-
 „ mia colluvie purgandæ, quæ visciditate suâ obstructionem
 „ in vicinis locis pariendo, sanguinem ad superiora regurgi-
 „ tare faciunt: Purgandæ autem decoctis, seu apozematis
 „ aperientibus, & solventibus, cum tamarindis, myrobalanis
 „ & deinde chalybeatis perficienda curatio.

De fluxu he-
 patico sym-
 ptomatico,
 ejusque pro-
 gnosi: Tum
 quomodo
 dysenteria
 hepatis san-
 guinea, sive
 hepaticis
 propriè flu-
 xus, ab hepa-
 tica biliari
 dysenteria
 distingui de-
 beat.

VII. Sed hepaticum symptomaticum fluxum innuit Hip-
 pocrates in Coac. *In alvi proluvie prærubra dejectio, pravum.*
 Cum enim Præceptor non loquatur in hoc textu de subita, li-
 beraque sanguinis per alvum, firmis viribus, egestionem, he-
 patis dolori, citra ullam præviam diarrhœam, superveniente,
 ut loco superiùs indicato loquutus est, neque de fluxu pallidi
 sanguinis, seu mixti cum sero, seu, ut suprâ, *de lotivo sangui-*
neo, sed de ejectione *prærubri* sanguinis, qui nempe non solum
 meracior est, sed insuper fervorem nimium, aut vasorum vis-
 ceris ex atonia, laxitatem, aut ruptionem indicat; tum in-
 super ingentem alvi ex diarrhœa exundationem (*in alvi pro-*
luvie) præcessisse, ac comitari declaret; idcirco hujusmodi alvi
 proluvia ita à Dureto explicatur “ Proluvies alvi prærubra,
 certissi-

„ certissimum est argumentum labefactatæ naturalis œconomix,
 „ & hepatis multum effœti soboles. Et alio loco. „ Prærubra id-
 „ est saturata rubro colore à sanioso sanguine, quem conti-
 „ nenter fundit hepatis atonia, facitque dysenteriam hepaticam
 „ vulgò dictam „ Distinguenda autem est dysenteria hepatica
 sanguinea à dysenteria hepatica biliari inferiùs describendâ : Pri-
 ma, seu fluxus propriè hepaticus bilem, aut alium humorem quem-
 libet, & serum præcipuè, in hepatis vasis ab aliis communis mas-
 se partibus disjunctum, non solum sanguini immixtum, sed in
 minimis particulis omnibus intimiùs confusum devehit : Altera
 bilem excernit non integrè suffusam sanguine, sed cum eodem
 variegatam, *ut dicitur* ; ut hoc pacto partes sanguinis, par-
 tesque bilis interstingui non difficilè queant. Sed hæc ab illa
 per doloris, atque mordacitatis rationem in primis discrimi-
 natur. Nam rubida hujusmodi ab hepate proluvies plerumque
 sine ullo dolore, aut irritatione procedit ; præterquàm quodd
 duos, aut tres dies aliquando intermittit, mox deteriùs re-
 erudescit. Quod quidem in biliosa diarrhœa non contingit. In-
 terea biliosa diarrhœa diutiùs provecta, in hepaticum fluxum
 persæpè facessit : ut videre est in *Raym. Joh. Fortis consult. & re-
 spons. Medic. Tom. I. cent. III. Hollerius verò de morb. intern.
 Lib. I. Cap. XXXXV. in schol.* postquàm attulerit sanguineam
 dejectionem in fine quartanarum febrium, in morbis à me-
 lancholia, & aliquando in peste, non esse malam, per se-
 quentia verba symptomaticum, imò lethalem, hepaticum flu-
 xum indigitat “ Si sanguis aquosus fluat, tertia est dysenterix
 „ impropriè dictæ species. Nonnullis etiam *lotivus fluxus* dici-
 „ tur. Læso hepate, ruptâ aut apertâ venâ sanguis niger, velut
 „ crassum atramentum, deindè rubens aliquando excernitur,
 „ & moriuntur ; Quales duos ipse vidi : Uterque vix sentiens
 „ periculum, animi deliquio paulatim extinctus „ Reverà he-
 patici hujusmodi fluxus, crassiores, diutiùs protracti, atque
 colore & consistentia identidem variantes, præcipuè qui in ni-
 gredinem vergunt, cùm certè in vitio organico hepar esse
 N n n testentur,

testentur, funesti ut plurimum evadunt, clanculum, subdolè-
que affectum hominem exterminantes. Ita mihi persæpè obser-
vare contigit; clarissimusque Guidettus noster quatuor ejuscemo-
di dejectionibus correptos ægros observavit, quorum tres vitâ
functi sunt, quartus Taurini degens multâ certè fortunâ ab
orci faucibus evasit: In genere diuturnior hepaticus fluxus ma-
lus semper est; qui celer, brevisque, salutaris esse potest. Ita
Duretus in *Coacis* fol. mihi, 206. "Omnis cruenta dejectio je-
,, cori accepta refertur: sed periodica & fugax virtute illius
,, fit: perennis autem, torminosa, carniū loturę similis exo-
,, luti visceris, penèque dixerim, emortui syllogisticum est
signum:,, Sed cū Duretus fugacem atque periodicam cruen-
tam dejectionem pro critica consideret, concludamus jam,
symptomaticum omnem hepaticum fluxum malum esse, ad
cachexiam, hydropem, tabem, & mortem, ex Hipp. Gal. om-
niumque Antiquorum sententiâ, ducentem.

*Indicationes
in genere,
ad hepatici
fluxus cura-
tionem elici-
end.*

VIII. De Hepatici fluxus curatione quædam primū
in genere memorari possunt. Et sanè si criticus ejuscemodi flu-
xus sit, erit sibi relinquendus; Si verò symptomaticus, læsio
peculiaris hepatis, undè ille nanciscatur originem, respicienda,
eaque propriis præsiidiis, per hanc Historiam ad debita loca
designatis, oppugnanda: si Hepaticus diuturnus fluxus comi-
tem aliquam, aut præviam, in jecore aliisve visceribus ob-
structionem, aut impuri humoris plenitudinem testetur, illa
sunt auxilia præmittenda, quæ ista à peculiaribus cacochyliis,
impurisque stimulis expedire valeant, aut etiam universale san-
guinis, aut solidorum vitium emendent; quòd si jecoris laxitas,
atque imbecillitas oppugnanda simpliciter sit, ab evacuantibus
abstinendum est; atque ad roborantia remedia, & suaviter ad-
stringentia, ut quæ ex Croco martis adstringente, aliisque
similibus chalybeatis, aut herbis vulnerariis alpinis parata to-
num partium firmando, laxantes simul causas, per diuresim,
aut vias alias subducere, aut etiam simpliciter invertere viden-
tur, citò, tutòque confugiendum est. Ita ex præcedenti Bagli-
vii

vii loco, atque sequenti hepatici fluxus exemplo plura, optimaque, quæ quidem specialem curationem adimpleant, haurire clinicus quisque poterit, Præter ea, quæ ex quibusdam selectis authoribus ad omnes hujusce curationis adimplendas partes complexuri jam sumus.

I X. Et sanè *Martinus Carceus* sub auspiciis celebris *Car. Drelincurtii* hæc in specie super hepaticum fluxum quinque curativas indicationes proponit. Videlicet Primam: *Copiosum sanguinis serum diminuendo, justam sanguini consistentiam conciliare*: Alteram: *Hepar nondum corruptum roborare*: Tertiam: *idem à corruptione præservare, atque cadaver, ut ait, hepaticum condire*: Quartam: *in regeneratione corrupti naturam juvare*: Quintam denique *Patientem convenienter cibare*. Cùm verò biliosa ut plurimum cacochymia, obstruentes succi, aliæve in hepate impuræ plenitudines præcedant hunc morbum, aut comitentur, idcirco si purgandi locus sit; primæ indicationi satisfaciunt non quidem hydragoga simpliciter remedia; sed commodiùs cholagoga; quæ quidem, præter feri in hoc morbo redundantis evacuationem, inquilinos hepatis depravatos humores subducunt; hæc inter seligenda sunt, quæ corruptionem valentiùs arcent, ut aloëtica; atque inprimis quæ cum catharticâ, adstringendi simul, roborandique facultatem obtinent; ut rhabbarum myrobalani &c.: in fervidiori morbo pulpa tamarindorum usurpatur; atque cum intensiori febre cassia cum rhabbaro, vel sola, & plurima, longis asinini, aut caprilli lactis feri copiis diluta. Alteram explet memoratus scriptor indicationem per extracta absinthii, cardui benedicti, aristolochiæ rotundæ, centaurii minoris, per conservas rosar. rubr. acetos. trifol. acetos., per condita enulæ campanæ, cydoniorum, nucis juglandis (quibus addunt alii mixturas varias ex spec. aromat. rosar. triasantal. nuc. mosch. macis, mastich. femin. sanguinariæ, & plantaginis, Trochisc. de Carabe, & de spod. balauft. menth. syrup. de myrtillis, de rosis siccis, absinthium, mar-rhubium, myrobalan. citrin. condit. spec. diarrhod. abb. &c.)

Indicationes in specie ad hepatici fluxus curationem: Et primùm ex scho-la Drelincurtiana.

Tertiam, & quartam indicationem (quæ quidem eodem redeunt) absolvit author Balsamicis, atque in primis balsamo quodam terebinthinato, & gummoso ex descriptione Penoti, & Petri Aponensis; tum insuper traumaticis ex vegetabili regno, aut etiam minerali, aut animali elicitis; qualia sunt radices symphyti, angelicæ, aristolochiæ rotundæ, filipendulæ, imperatoriæ, bistortæ, tormentillæ, caryophyllatæ: Herbæ & folia equiseti, centaurii minoris, plantaginis, millefolii, pentaphylli, hyperici, verbenæ. Cortices & lanugo florum salicis &c. sanguis Draconis, sarcocolla, terra sigillata hæmarites, & cornu cervi. Quibus quidem non tantum depurare sanguinem intendit, sed insuper tenuem ichora, hepaticæ carnis functionibus, aut, si deperdita est, generationi nocentem remove; sic plenum ferre naturæ subsidium. Postremam indicationem excipiunt alimenta morbo decrementum, ægro virium augmentum adferentia; quæ quidem nec simpliciter aperientia, nec solum stringentia sint, ne illis sanguis copiosius proliciatur, his verò delinquenti sero præcludatur via. Laudantur Amygdalata, & hordeata consistentiæ spissioris, quàm emulsiones; Pasta analeptica ex carne testudinum memoralium, cancrorum fluviatilium, caponis, perdicis, cochlearum, ex hepate gallinarum, anserum. Præstant pullorum testes, aromatibus variis conditæ testudines, præcipuè alimenta specialiter ad hunc morbum medicamentosa &c. Passule magnis laudibus extolluntur. Aqua pro potu chalybeata sit; vino sobriè utendum, ne ab hoc sanguinis fluxus augeatur.

Curatio hepatici fluxus ex aliis Auctoribus.

X. Lucas Tozzi in altera Medicina parte tradit “Curari hepaticum fluxum per antidyfenterica admista cum hepaticis, quæ scilicet roborent, & calefaciant. Hepati lupi plerique magnam vim in hoc affectu tribuunt, illudque variè præparatum exhibent. Sunt qui aquam ex illo cum aliis simplicibus commisto per alembicum eliciant: alii electuarium: alii pulverem. Apud Prævotium describitur electuarium è radice consolidæ majoris, & saccharo ros. quod expertum dicitur.

„ citur. At aromata quocumque modo exhibeantur , optima
 „ erunt, cinnamomum , galanga, piper , zingiber , caryophylli,
 „ cubebe , horumque essentia , spiritus , aqua. Vinum absin-
 „ thites , aliudve , è ligno guajaco , cinnamomo , & pipere
 „ conditum : conditure , & electuaria è baccis Juniperi, uvis
 „ passis , nuce odorata , ceterisque etiam proficient. Hydrio-
 „ tica moderatè sumpta à nonnullis commendantur ad super-
 „ abundantis seri evacuationem. Tutiora verò videntur diure-
 „ tica, & sudorifera , quæque alcali plurimo constant. Vitan-
 „ da autem sunt humectantia , cathartica valentiora , acida,
 „ pingua , oleosa. Narcotica si moderata fuerint, & cum ro-
 „ borantibus mista, pro rata sua quoque proderunt. „ Hucusq;
 Tozzius. Ab Hepate lupi (quod quidem primus pro specifico
 hujus morbi remedio decantavit Galenus) distillatam aquam
 elicit Ludovicus Mercatus , cui quidem distillationi addit san-
 guinem testudinum, pul. santal. omnium , schrenantum , eupa-
 torium , rasuram eboris, & cornu cervi, terebinthinam abie-
 tis , aromata plurima , ac confectiones in spiritu vini solutas,
 vinum album & rubrum &c. vide hanc descriptionem cum
 apud Authorem tum in Sennerti Pract. lib. III. Part. II. sect.
 II. Cap. VIII. Raym. Joh. Fortis *Consult. & respons. Medic.*
 Tom. I. Cent. III. affert , Thermale aquas , & potissimum
 Villenses , egregiè huic morbo mederi , ratione ferri , & alu-
 minis , quibus istæ constant. In hoc insuper affectu , cui co-
 mitem se addat ingens hepatis fervor , seu calida intempe-
 ries , commendat succum cichorei , & fonchi in decoc. endiv.
 acetos. plantag. portulac. & hepatic. atque insuper tinctur. co-
 rall. solutam in aqua distillata ex tenerrimis quercus foliis.
 Pro potu nucerianam aquam, terræ Samiæ virtute prædita cum
 sit, lubenter adhibet. Galenus in contumaci hoc fluxu Philo-
 nium Romanum per intervalla imperat. Schenckius ligni cydo-
 nii ebullitione cum carnibus utitur. Nos conducere sæpè vidi-
 mus in hoc affectu , universalibus præmissis , opiatam Salo-
 monis , ex Pharmacopœa Lemery , tum agrimonie præpa-
 rata.

rata omnia , cuius usum à Joanne Michaële Fehr didicimus. Optimam pariter hujusce morbi curationem vide apud Petrum Forestum Observat. XX I. lib. XXII. *De Alvi Profluviis.*

HISTORIA SINGULARIS HEPATICI FLUXUS,

Cum malè morata Febre , aliisque succrescentibus Morbis, atque diris Symptomatis.

„ C Asus mihi curandus contigit , à quo quisque & discere
 „ poterit in morbis levibus fidendum non esse. Correptus
 „ febre tertianâ simplici , atque levi jacebat uxoratus quidam
 „ ann. 26. temperamenti calidi , & ficci , qui præviâ purga-
 „ tione, digestivis curabatur , à quibus febrem mitiorem fieri
 „ propè septimum circuitum posse , sperandum videbatur. In-
 „ terea ex adverso in septima ejuscemodi judicatione nullum
 „ exitiale fuit symptoma , quod illum non molestaret: Deli-
 „ rium cum convulsivis motibus , febris intensior con-
 „ tinua , vigiliæ adduxerunt patientem in vitæ discrimen; nec
 „ æger jam ultrò ille erat , qui sub sexto paroxismo videba-
 „ tur. Quâ de re exhibito Peruviano cortice, extracto à venis
 „ sedalibus sanguine, vesicatoriis in cruribus, cucurbitulis uni-
 „ versim admotis , emulsionibus ad satietatem cum sale pru-
 „ nellæ propinatis , ac ultimò pipionibus derafo vertici ap-
 „ positis , delirium sedabatur sub undecima , & febris mitior
 „ deprehendebatur. Sed duodecimâ , species hepatici fluxus
 „ subitò emergebat , scilicet sinceri sanguinis per alvum de-
 „ jectio ultra sex librarum pondus , quatuor horarum spatio,
 „ quâ quidem extremum spiritum effundere videbatur. Tunc
 „ gelatinam C. C. tincturam ros. rub. , conditum ex rhabarb.
 „ usto , spec. trium santal. margarit. præparat. , bol. armen. ma-
 „ cis , theriac. tinct. corall. succ. cydon. cum saccharo rosat.
 „ frequenter sumendum, nec non ptisanam ex hordeo, & ali-
 „ quot

„ quot cochlearia vini rubri austeri, præmittenda duxi; qui-
 „ bus hepaticus constitit fluxus, quievitque omninò delirium
 „ in decima octava: Quâ die novum iterùm symptoma, sci-
 „ licet lienterica diarrhœa apparuit, quâ quidquid assumebatur,
 „ parum, aut nihil alteratum secedebat, comite sanguinis spu-
 „ to cum tussi, febre continuâ, lentâque redditâ; jamque si-
 „ gna imminentis hæcticæ plurima & manifesta aderant. Ex-
 „ hibitis igitur aliquot granis masticis continuatâ gelatinâ C.C.
 „ cum tinct. corall. & theriaca, atque applicato emplastro de
 „ crusta panis *Montagn.* supra stomachum, vinoque rubro ge-
 „ nerofo cochleatim propinato, tandem vigesimâ septimâ ite-
 „ rum melius se habuit, solâ febre continuante. Factâ tunc
 „ temporis alvo durâ, expiatis in mesenterio, & liene non-
 „ nullis tensionibus, ad usum conserv. passular. cum rhab.
 „ Etmulleri illum adduxi. Dehinc jusculum ex decocto te-
 „ studinum, & ranarum cum aliquali portione pul. radic.
 „ chin. & cortic. chinæ - chinæ per 40. dies continuandum
 „ mandavi. Quibus omnibus ad unguem servatis perfectè con-
 „ valuit, *Ex animadversionibus Carol. Ant. Alidii Medici*
Laudensis: Quæ quidem est nuperi ejus Operis sexagesima
quinta.

DE FELLEÆ VESICULÆ MORBIS APPENDIX.

Atque in hac Canones Practici.

I. **P**lurima quidem, & fortè nimia superessent dicenda, si illas omnes hîc loci Fellei Folliculi affectiones recensere instituerem, quæ aut ab universalis humoris, seu sanguinis, aut à liquidi specialis, seu contentæ biliaris substantiæ, aut à solidi, seu propriæ texturæ vitio prodeuntes, triplicem jam, atque unamquamque vastissimam, morborum classem

*Morbi folli-
culi fellei
triplicis ge-
neris sunt:
Primi qui-
dem à vitio
communis
fluidi, seu
sanguinis:*

Alteri ab errore privati, seu iniquitè liquidè, quod nempe biliosum est: Ter-
tium autem ab ipso vesiculari solido.
Et hic primùm de primis, & alteris ejuscemodì morbis.

classẽm adimplent. morbi vesicæ biliaris ab irriguo sanguine emergentes tot sunt, quot in aliis hominis partibus obversantur: Inflammationes, abscessus, erosiones &c. Inflammatio sui generis felleæ cystidis, sive hæc *atro sanguine turgens* exhibetur in Observat. XXXVIII. §. III. Lib. III. Sect. XIV. *Anat. Practic.* Cl. Bonet; Abscessus cystidis fellis, pugni magnitudinem æquantis, prope jecinoris cava pus eructans. Ex Lamoniere *De dysenterico fluxu*. Cap. I. Erosio nobis aliquando comperta fuit in homine, cholera morbo denato, cum bilis in abdominis cavum effusione. De ulceribus hujus folliculi cum purulenta in eodem collectione traditum est superius II. Part. fol. 139. & 140. Sed in his, veluti rarissimis, propriâ diagnosi obscuris, atque insuper ut plurimum insanabilibus non ultrâ immorari continget. Descendentes itaque ad frequentiores hujus excipuli morbos qui nempe à proprio liquido sunt, seu ab introducta bile; quis, quæso, tantas illas in hac parte vitiatæ bilis recognitas à medentibus species annumerare posset, quæ quidem quemadmodum in plurimis morbis primigeniæ causæ naturam induunt (ut totâ hæc Historiâ perspicimus) ita in aliis penè omnibus, etiam non biliosis affectibus facillimè producuntur (cùm ut aliàs indicavimus, nullus sit penè humani corporis morbus, quem aliqua bilis depravatio non comitetur, aut eidem non succrescat) singulæque in hoc folliculo Anatomicorum oculis se porrigunt? Ita celeberrimus, & strenuus cystidis felleæ, aliarumque omnium humani corporis partium indagator Vesalius in *examine observationum Fallopii* hæc tradit. “Longum sanè esset ea, quæ in quibusdam tertianâ, & quartanâ laborantibus, & dein suspendio, aut capite plexis, in furiis, & maniâ obsessis, in melancholiæ morbo affectis, ex variis febrium, (quæ continuæ fuerunt, & rigorum, & ardorum inordinatos circuitus faciebant) generibus extinctis, foedo ictero, eoque vario vexatis, malo habitu diù pressis, & dysenteriâ cruciatis, subindè reperi, modò commemorare: Sive scilicet hîc insignem bilis nunc flavæ,
nunc

„ nunc atramenti , quo scribimus , in modum atræ , sive albi-
 „ cantis propemodum colorem (qui ferè conterminas partes
 „ infecit) sive fluidam , aut luti modo , aut unguenti cujus-
 „ dam ex farinis , & melle , & terebinthina apparati ritu con-
 „ sistentis substantiam , sive varias calculorum effigies , sive
 „ bilis vesiculæ molem instar duorum pugnorum ob conten-
 „ ta tumidam , sive omnis bilis defectum recenserem. Quæ
 „ omnia me de hujus vesiculæ natura adhuc magis , quàm
 „ antè habent sollicitum. „ Hæc igitur Vesalius. Hinc in Theophili
 Boneti *Sepulchreto* , seu *Anatomia practica ex cadaveribus morbo*
denatis , aliisque Observationum operibus fusè illa omnia colli-
 guntur , quæ circa malam cysticæ bilis in colore , consistentia ,
 mixtura , quantitate , sapore , aliisque qualitatibus habitudinem
 in extispiciis hominum per varios morbos defunctorum depre-
 hensa sunt , quæ nempe hanc bilem vel efferatiorem in variis
 calidis morbis , hinc colore saturatiorem , imò viridem , por-
 raceam , æruginosam , atram &c. , atque insuper amariorem ,
 acrioremque respiciunt ; vel in frigidis inertiores , sicque
 in icteris aliquibus sæpè serosam , & vix flavam , in cachecti-
 cis , aut hydropicis magis adhuc aquosam , pallidissimam , in-
 terdum prorsus insipidam , dulcique proximam &c. , ut ipse ab
 his in præsens recensendis supersedere posse existimem : Eò præ-
 cipuè quòd ad biliares in viventibus debellandos morbos , non
 ad superstites lethalium morborum ostendendas in denatis exu-
 vias ; seu ad vivæ , ac depreliantis , non mortuæ jacentisque
 bilis exhibenda indicia , prænunciandas pravitates , atque eli-
 ciendas emendationes nostram hîc totam operam impendimus.
 Cùm verò calculi in felleo folliculo ex limosa , ac tartarea bile
 progeniti , in eoque stabulantes , frequentium , & contumacium
 morborum origines sint ; neque succrescentes hujusmodi affe-
 ctus deleri unquam possint , nisi præcognitâ horumce extra-
 neorum corporum præsentia , iisque ab hoc latibulo , quan-
 tum quidem ars possit , deturbatis ; Cysticorum idèò calculo-
 rum diagnosi , atque curatio pro practico hoc nostro explendo

O o o,

insti-

instituto ad calcem essentialium morborum Hepatis supererunt præcipuè discutiendæ, antequàm ad alteram morborum Hepatis classem, sive ad symptomaticos progrediamur.

De cystis felleæ calculorum differentiis, coloribus, figuris: Et quinam eorum aqua immersi submergantur; quinam verò supernatent.

I I. Priùs verò quædam de cysticorum hujusmodi calculorum differentiis, coloribus, figuris, compositione, aliisque habitudinibus à nobis peculiariter observata, innuere obiter liceat, quæ fortè ad practicam rem non minùs conducent. Calculi vesicæ felleæ duplicis generis sunt; alii nigri, flavescentes alii: His mediorum colorum cæteri quilibet, ut albidii, subvirides cærulei, plumbei, æruginosi, aut pluribus coloribus variati &c. reduci faciliè possunt. Nigri nunquam perfectè cuboidei visi sunt, seu sex lateribus præditi, quidquid aliqui asseverent: Tetraedri ut plurimùm deprehenduntur, seu quatuor triangulis æquilateribus, & æqualibus circumscripti: Paucissimi ad cuboideam irregularem figuram accedunt: diversa magnitudine pollent: Aliquos interdum vidimus milii, alios lentium molem non superantes. Quandoque mediocris unguis diametrum æquantes. Flavescetes verò calculi non quidem tetraedram, sed sphericam plerumque aut ovalem affectant figuram, qui tamen interdum in minores seu componentes alios, irregulari figurâ præditos, non difficili negotio abrumpuntur. Quod si angulosam nanciscantur superficiem, pentagonum ut plurimùm corpus, seu dodecaedrum, duodecim æqualibus, æquilateribus, atque æquiangulis pentagonis contentum imitantur: Ita celebris est illa Th. Bartholini Historia, quæ est LIV. cent. II. *Historiarum Anatomicarum rariorum*, quæ talia describit. “In solemni Anatome Patavina 1642. Joan. Veslingius accuratissimus Professor feminam nobis dissecabat obefam. Vesicula fellis nullo bilis colore tincta, liquorem solum bili dilutæ similem continebat, cum lapidibus quinque, magnitudine nucis avellanæ, figurâ mathematicorum corpora pentagona repræsentante, quorum superficies exterior glabra, color subcineritius, interior verò substantia ligno putri flavescenti persimilis. His infiniti minores addebantur, figurâ femi-

„ seminum Cnici, leves, & molles, ut aliam potius, quàm la-
 „ pideam præ se ferrent substantiam. Asperior ex his unus
 „ ita os biliaræ vesiculæ clauserat, ut omnis bilis denegatus
 „ fuerit transitus. Interim provida natura ad bilem expurgan-
 „ dam alium efformaverat ductum ab Hepate prodeuntem,
 „ poro biliaris à calculis quoque constipato vicinum, qui in
 „ jejunum intestinum terminabatur. „ Hæc Bartholinus. Cæte-
 „ rum nigros felleæ cystidis calculos in aquam projectos statim
 „ immergi, & fundum petere, extra omne dubium est: solidio-
 „ res enim sunt cæteris, quos imo calculis vesicæ urinariæ durio-
 „ res, gravioresque frequenter deprehendi, magisque ad lapidis
 „ naturam accedentes. Alteros verò seu flavescents innatare
 „ plurimi deprædicant. Verùm ex his flavescents fellei folli-
 „ culi calculis, plurimos, hosque diversâ magnitudine præditos,
 „ aquæ immisos eidem primùm supernatare; hinc post aliquam
 „ in aqua macerationem, cum eandem imbibissent, sponte non
 „ minus submergi, & fundum petere, dum Bononiæ, publici in
 „ celebri illa Universitate Professoris dignitate insignitus, com-
 „ morarer, hocque munere fungerer, unà cum præclarissimis
 „ medicinæ doctoribus *Hyacintho Vogli* eruditissimo Scriptore, &
 „ *Daniellio* Juniore in elegantissimo Museo Illustrissimi *D. Cesi*, in
 „ eadem Universitate publici Practicæ medicinæ Professoris, &
 „ collegæ mei Honoratissimi, summâ cum voluptate observa-
 „ bam. Si in aquam projecti hi calculi aded per manum merge-
 „ bantur, ut citius aquam imbibere, citius etiam fundum pe-
 „ tebant, ibidemque degebant; manuque denuò sublatis, & sibi
 „ hinc relictis, citissimè submergebantur. Idem periculum cum
 „ præclarissimo P. M. Valsalva, semel, atque iterùm in ejusdem
 „ ædibus tentabamus; ut jam animo excuterem, veluti non ve-
 „ ram, bonæque observationis expertem, propositionem illam in
 „ genere: *Fellei folliculi calculos aqua immersos, non ut ii, qui de*
 „ *urinaria vesica extrahuntur, in imo subsidere, sed innatare: Quam*
 „ quidem post Bidloum, Fernelium, Riolanum, aliosque, Mo-
 „ derniorum aliqui nimis fidenter, minúsque experti receperunt,

propriisque in Operibus exscripserunt, ut mihi quoque, fateor, aliquando res fuit, qui ante ullum super his calculis acceptum diligentius periculum, horum hominum assertis fidens, scripsi in cap. XI. §. II. secundæ hujus Historiæ partis, ante hos quinque annos jam impressæ: *Biliares calculos aquis projectos supernatare*: Verumtamen horumce cysticorum flavescentium calculorum aliqui, atque vel diutius immersi, eâque quantum velis imbibiti, nunquam in imo subsident: ut illi, quos non ita pridem ab amico quodam dono accepi, tum nonnulli, qui à me ex fellea hydropici cujusdam, vesicula extracti, curiosè inter cæteros reservantur. Sed annoto, calculos hujusmodi valdè adhuc molles esse, facilèque in majora, & minora fragmina friabiles, ut immaturi reverà dicendi sint calculi; ipsamque imitentur naturam illorum per fluminum alveos sæpissimè occurrentium tophorum, qui lapidum principia vulgò dicuntur, atque levissimâ digitorum pressione in arenulas omninò dissiliunt. Ut ut sit; illud interea semper inconcussum est: *Ex flavis ejusmodi calculis plurimos aqua immersos submergi; ex nigris verò prorsus omnes.*

De varia
nigrorum
felleæ cysti-
dis, ac fla-
vescentium
calculorum
compositione:
Atque de
eodem fel-
lei, & urina-
rii calculi
principio.

III. Ex his igitur liquet, nigrorum horumce calculorum substantiam magis esse compactam, eorumque idcirco specificam gravitatem, gravitate flavescentium majorem: ut flavescentes nigris leviores sint, licet his equè solidi, durique persæpè videantur. Reverà calculos hujusmodi flavescentes ex superpositis invicem, numero pluribus, aut paucioribus stratis, veluti supercretis corticibus [ut squillæ, aut cepæ gliscunt, & compinguntur] crescere, & construi, diligenti inspectione deprehenditur. Minimus nucleus, seu potius solidior quædam arenula, centrum occupat. Huic verò solidiusculo principio, quod quidem intra biliosum collectum in cystide liquidum à viscerum motu fus-deque volutatur, ramulosa ejusdem bilis facilè concrescientis corpuscula commodiùs implicantur, hærentque, indèque indurata, molem paulatim amplificant, veluti foliis ad folia superstructis: Quod quidem opificium eodem

ritu

ritu confici mihi persuadeo, quo grana coriandii in liquato saccharo diutius volutata, jactataque plurimis, novisque desuper ejusdem stratis cooperiuntur: quibus inde indurescentibus, duræ, ingentesque saccharinæ glandes evadunt. Hinc calculi hujusmodi bifariam, seu in equales partes secti, aggerimos exhibent elegantissimos circulos, quorum minores à parallelis majoribus usque ad externam faciem continentur. Illa tamen in hujusmodi calculorum stratis concinnitas, & regularis elegantia non cernitur, ut si, ad exemplum, primum stratum ex albo flavum sit, alterum sit viride, tertium rursus ex albo flavum, quartum denuò viride &c. veluti ab aliquibus prædicatur. Nunquam ego certè in tot inspectis cysticis calculis hunc ordinem deprehendi. Quemadmodum igitur arenula à sanguine in bilis vesicam decidens, aut ex tartareis, mucosisque fœderatis principiis in eadem coalita, aliisque, quæ facile concrecant, substantiis magis, magisque incrustata, calculos hujusmodi procreat; Ita si in alias corporis vesicas, ut in urinariam vesicam, aut in renis pelvim, (quæ quidem species vesicæ est) delabatur, & stabuletur ibidem, hærentibusque pariter congeratur & accrescat substantiis; in novos ibidem pariter calculos facesset, non quidem principii, sed supercrescentium dumtaxat corporum ratione à cysticis dissimiles. Undè illa calculorum felleæ cystis, & urinariorum excipulorum repetenda affinitas est; ut calculis felleis obnoxii homines, urinariis etiam facile proclives deprehendantur. Imò renales calculi præcipuè in biliosis procreantur, eorumque genesim biliosi morbi plerumque antecedunt. Notabilis super hac re illa est Binningeri observatio 28. cent. 3. p. 370. de Marco Ponnier bilioso melancholico, cui ab habita in sinistro latere gravitate expurgabantur per artem biliosa, & tenacia, tandemque nigerrima. Accedebat cruciatus circa umbilicum immanis, & continuus, cum singultu, vomituque bilioso; Deinceps secundum dextri ureteris longitudinem prolabi ad pubem visa est omnium cruciatuum causa. Postea propulsâ in corporis habitum morbificâ causâ omnium

membrorum dolor, cum artus movendi impotentia superveniebat. Hinc cum podagra periodica calculi è renibus exercebantur: Ut inde per longum tempus ferè quotidie ingentem horum copiam excuteret. Insignem renalium calculorum consensum cum biliosis affectibus ulterius memoravimus II. Parte fol. 190. per hunc Lentilianæ Epistolæ locum: *Obtulerunt mihi non semel nephritici, qui quamdiu ictero laborarent, tandem calculi dolores cessabant: ictero desinente iidem recrudescebant; reciprocis, ac alternantibus semper his affectibus.* Adeò in diversis partibus, ac sub personis variis agibilis affolet, & ludere. Vid. etiam inferius Can. VII. ex Greulichio. Cæterum arenosa hæc calculorum principia, vel per sudorem foras, è sanguine largissimè effundi visa sunt ab Olao Wormio: ut ex Hist. XXXIV. Cent. I. *Histor. Anat. rarior.* Th. Bartholini. Sed nigri biliosæ cystidis calculi non adeò manifestas nuclei, atque circumductarum fasciarum, seu circulorum positiones exhibent; qui nempe ab homogeneâ, unitâque magis substantiâ compingî videntur: ut hinc verisimile arbitrer, per unicam, simplicioremq; absque nucleo, seu citra præviam arenulam, hinc etiam densiorem, solidioremque biliosarum particularum concretionem omnes eorum partes ferruminari. Id maxime dignum adhuc observatione est, quod calculis hujusmodi in cujuslibet magnitudinis fragmina fortuitò abruptis, hæc tetraedicam adhuc figuram affectant. Hic adhuc memorabo, specificas arenosorum nucleorum undè calculorum primi generis, seu flavescentium genesis æstimanda est, figuras, & singulares habitudines cum publico aliquando communicaturum esse egregium Profectorem, & practicum *Cajetanum Faæonum*, in Bononiensi Universitate Medicinæ, & Anatomix Professore, & collegam amantissimum; cujus quidem ut multæ in dissecandis Cadaveribus dexteritatis, ita plurimarum, earumque gravissimarum observationum, atque experimentorum super cysticis utriusque generis calculis, dum Bononiæ degerem, testis creberrimus extiti.

IV. Quem-

I V. Quemadmodum verò nigri calculi, qui bilis veluti caput mortuum, in lapideam formam compactum, esse, videntur, accensæ candelæ admoti flammam haudquaquam concipiunt; vix aliqui in decedentes guttas sensim colliquantur, levi edito crepitu, ingratoque reddito odore, ita flavi, qui que præcipuè molliores, aut recentiores sunt, ardenti lucernæ appositi flammam faciliè concipiunt, servantque, inter arandum cum crepitu scintillant, in guttas accensas diffuunt. Ita Bononiæ in ædibus D. Valsalvæ perrupti hujusmodi calculi, à cadavere non ita pridem extracti, dabant interiùs flavam saturatam substantiam, faciliè quidem friabilem, sed adhuc pinguiusculam, & levissimam, quæ per os volutata, amara, & valdè hærens, seu glutinosa deprehendebatur. tentata hæc igne substantia liquebatur, atque ebulliebat. hinc cum crepitu flammam concipiebat, eamque ad extremum usque servabat. Odor erat ab hujusmodi flamma exhalans veluti ceræ, quæ ad ob-signandas epistolas in usu est. Hæc autem cera, hispanica dicta, præcipuè à colophonia conficitur: neque hæc substantia, quæ quidem durior resina est, suapte naturâ distinguitur à biliosis calculis, qui ab animali coacto sulphure, seu indurata resinâ compinguntur. Id pariter in aliis ejusdem farinæ calculis, aliisque in locis pari cum successu tentavimus.

*Ex felibus
calculis qui-
nam flam-
mam concipi-
ant accen-
sa candela
expositi; &
qui respuant.*

V. Illud tamen, ad praxim apprimè faciens, annotandum est; multò scilicet in genere difficiliùs flammam concipere calculos cysticos, quàm qui biliferis duntaxat poris infederant. Hinc dejecti per sedes ab ægrotantibus (ut sæpè fit) biliales calculi, quò concipiendæ flammæ, & liquationi paratiores conspiciuntur, eò majorem de eorum, non quidem in cysti, sed in biliaribus ipsis ductibus, sede suspensionem inducunt. Et sanè, calculi in hepaticis ductibus procreati, cum semper flavescunt generis sunt, ideòque ineundæ deflagrationi per propriam naturam proclives, tum ex tenuiori, volatiliorque substantiâ constantur, quæ ideò in flammam faciliùs erumpit. Sed aliud insuper calculorum non in folliculo,

*Ex dejectis
per sedes
calculis quo-
modo inter-
stingui que-
ant, qui fel-
lea cysti, qui-
que biliaribus
duntaxat ductibus
infederint.*

sed

sed in hepaticis excretoriis canalibus degentium indicium elicitur ex figura, atque mole. Quippe ut ductuum hepaticorum calculi oblongi semper sunt, interdum, instar lapidearum fistularum, excavati; ramis aliquot non rarò exasperati: cystici ex adverso ad rotundam plerumque, & conglobatam figuram accedunt. Ita minores calculi hujusmodi ductibus inhabitare quidem; majores verò felleum folliculum duntaxat occupare possunt. Neque rariora sunt in hepaticis poris, quàm in felleo folliculo, biliosorum calculorum latibula. Ex frequentibus hujusmodi calculosorum hominum extispiciis, ut sæpè in sola excretoriarum hepatis fistularum cavitate geniti hujusmodi calculi visi sunt, qui modò crebriores, modò pauciores, aut totam hepatici parenchymatis substantiam, ut in celebri illo extispicio Dodonei ad cap. III. Benivenii de *abditis*, aut partem ejus duntaxat, majorem, aut minorem, libero intereà relicto bilis promptuario, obsidere videbantur; ita non minori certè numero casuum, eadem calculosa corpora nunc memoratum duntaxat tenere folliculum, illasque reliquas hepatis, ejusque excretoriorum ductuum substantiam, nunc biliares simul ductus, nec non folliculum invasisse deprehensa sunt. De tubulosis hepaticorum ductuum calculis sermonem habuimus superius in altera Parte fol. 188. De versicoloribus calculis, durissimis, majores biliares ductus obsidentibus, eosque veluti in varicum formam dilatantibus. fol. 190. De tribus calculis in vena portæ repertis. fol. 191.

Sine aliquo indicio, sive sine noxa aliqua, majori aut minori degere in vivente homine biliares calculi non possunt. Eorum Prognosis hic primò allegatur.

V I. Sed ab excretis per sedem calculis, eorum sedem in felleo folliculo, vel in hepaticis ductibus, vel in utrisque dignoscere, tota Anatomiæ laus sit: Id desuper à perito, laudibilique Practico deposcitur, ut vel ante calculorum per alvum eruptiones, eorundem in hujus visceris partibus præsentia prænotio habeatur: sicque facientia ad eorundem expulsionem auxilia opportunè apparentur. Et licet hucusque à Practicis hujusmodi Scriptoribus Diagnosin hepaticorum calculorum satis adhuc discussa non videatur: hos tamen, quæ nostra est.

est adjuvandis hominibus animi sollicitudo, in eandem, quantum liceat, aperiendam, nervos omnes intendemus. Et primum: cum calculis in fellea cystide, vel hepaticorum ductuum cavitate delitescantibus, illa semper, quæ naturaliter ad primarum coctionum operam exigitur, libera bilis ad intestinum traductio plus minus impediatur: præcipue verò si in folliculo degant; quâ quidem statione uber illa subitaque bilis ab hoc excipulo in duodenum, momento trajectionis chymosæ substantiæ, necessaria effusio infirmabitur, ut patet, horumce calculorum præsentiam chylosis depravationem aliquam consequi necessario oportebit. Quod si corpora huiusmodi calculosa exilia admodum sint, & liberè per continentium vasorum, aut cystidis alveum fluctuent, atque vagentur, absque ullo sensibili inducto hepaticis huiusmodi emissariis impedimento; hæc saltem illius bilis soboles sunt, quæ cum queat tam facile in solidum corpus concreescere, non ideo citò impelli, & moveri, non debitâ celeritate fluere in intestinum poterit; ut jam vel solo hoc de titulo quidpiam semper vitiosum in primis coctionibus contingere necesse sit: atque indè non intelligam, quomodo Gerbesius, & Lospichlerus in *Observationibus Nat. curios. Germ.* aliique alibi, memoriæ tradiderint “Homines, vel à numerosissimis cysticis calculis, quorum aliqui ad piforum, alii ad mediocrium castanearum molem excreviscent, obsessos, citra querelam diu sanos vixisse, propriæque naturalia munia obire incolumes valuisse.” Nam vitiatum plus minus cutaneus color, aut profundæ quædam, lenteque primarum, ut dicitur, viarum affectiones ab his fortè, atque ab ipsismet patientibus fuere non satis perpensæ. Quæ cæterum necessario interfuisse docuerunt ipsimet omnium horumce allatorum hominum improvise obitus, quorum quidem nulla prorsus ratio fuerat cum ipsorum ætatibus, & præcedentibus morbis. Ita refert Gerbesius Principem ab *Aversperg* 22. Julii sub altera invasione febris tertianæ simplicis intermittentis, superveniente apoplexiâ, vitâ subito fuisse defunctum,

in cuius cadavere nihil aliud viciatum deprehensum, quàm quatuor ingentes, veluti marmoreos calculos, totum felle folliculum occupantes. Ipsumque antea tertianas, & erysipellata fuisse frequenter passum. Adjicit in ejusdem Principis Aula cujusdam ephebi ex Ileo præcipitanter pariter defuncti aperuisse cadaver, in cuius fellea vesicula bilis ad calculosam properabat consistentiam. Ita tradit Lospichlerus Abbatem Benedictinum in vigore ætatis morbo quodam gravissimo ex-inopinato correptum intra paucos dies fuisse extinctum, in cuius fellea vesicula 57. calculi angulosi reperiiebantur. Quamquam igitur hujusmodi calculi manifestas adeò noxas non semper excitare, sed potius interdum clandestinò degere videantur, illa tamen eorum malitia est, præcipuè ob sensim compressos ad loca chyloleos tempestivos bilis excursus, ut non solum defœdatos habitus inferant, sed postea palpitationes enormes, pectoris angustias; ut plurimum verò vel tandem post diuturnas stationes in subitaneas neces præcipitent; ut in altera Parte fol. 188. memoravimus; vel insanabilibus cachexiis, aut lethalibus hydropum generibus irreparabilem viam sternant. Hæc in biliosis calculis loco Prognoseos sint. Nunc ad diagnosim, jam prius susceptam redeamus.

*Diagnosim
biliosorum
calculorum,
deducta ex
entis colore,
doloris ratio-
ne, vomitu
urinæ, chy-
loleos depræ-
vatione &c.*

V I I. *Cognoscuntur non facile calculi in vesica felle, & nihilominus varia, & sæpè gravia inducunt symptomata* Sennertus de vesiculæ felle Morbis. & sanè. Qui calculo hepatico, aut cystico, ut ut exiliori, mitiorique detinentur, malo semper, ictericoque plus minùs corporis habitu perfusi deprehenduntur, eoque imò graviore, quò iste icterus, nisi foras exturbentur calculi, se cuilibet medentium industriæ indomabilem præbet; aut si remediis aliquandiu cedat, citissimè recidivus evadit: quod quidem vel Antiquiores docuere; (ut inter plurimos Matthæus Curtius vetustus Mondini interpretes referat in ejus *Anatome* quendam hominem, qui scabiosus erat; fueratque jam decem annos ictericus, in cuius inde cysti choleram in

in modum lapidis obduratam videbat.) De muliere ictero forti periodico, atque insanabili diu affecta, quæ post dejectum à vehementi cathartico cysticum calculum illicò sanabatur: Vid. Part. II. fol. 189. Illi autem dumtaxat non evadunt icterici, in quibus præpedita bilis in aliquod determinatum viscus, ad sævum, & plerumque lethalem peculiarem procreandum morbum, decumbit. Vide in Boneti *Sepulchreto*, tractatum de ictero, & præcipuè Obs. VIII.: Insuper omnes hoc cujuslibet conditionis calculo laborantes, ab assumpto cibo nunc epigastrii, nunc totius ventris, nunc solùm dextri hypochondrii molestas tensiones plerumque patiuntur, cum angustia spirandi: Hinc surdum, profundumque in hepate dolorem persentiunt, acerbiorè verò si ingentiores sint calculi: [de calculis felleæ vesiculæ perpetuum in dextro hypochondrio, ipsoque epigastrio tumorem producentibus vid. superius fol. 189.] Borborigmi in intestinis excitantur; copiosi flatus, ructus acidi, & sæpè nidorosi: fugaces interdum incallescenciæ, non raro nausæ: Alvus frequenter adstricta; aut è converso copiosæ quidem, sed crudæ, pallidæque dejectiones, ut ex his omnibus, simul aut seorsim reverà contingentibus. Præcipuè ex fœderata ratione icteri rebellis, sine manifesta causa vigentis, tum hepatici doloris, qui tempore chylosecos ingravescit, imò ejusdem chylosecos majori aut minori depravatione accedente, plurimum jam præsentia hepaticorum calculorum argumentum deduci possit. Sed alia ulteriùs medentibus porriguntur indicia, quæ prædictis addita, firmiorem adhuc de biliosorum calculorum præsentia conjecturam instituent. Et quidem qui dolor à biliosis inducitur calculis, non tantùm ab aliis omnibus dispar est; sed sibi insuper plerumque secundùm varios ægrotantis status dissimilis est. In aliquibus, si hi in lecto se convolvant, pondus magnum, molestum, & ex una in alteram partem delabens è regione hepatis percipitur. Vid. Fabritium Hild. Cent. IV. Observat. XLIV. Interdum longiùs à pastu, homineque in ediam ferente, ex paucò ad hepar bilis affluxu, parcâque

secretione, dolor obtusissimus est, ilque admodum interval-
latus: post partum verò acrior, interdum tensivus, quando-
que pungens, non rarò dilanians; mox gravativus dumtaxat,
& tandem disparens. non rarò per plures dies continuus; ut
nephriticam, spasmodicam, aut aliam colicam mentiatur. Ita
Ambrosius Stegmannus *Observ. C V I I I. Ephem. Germ. ann. IV.*
describit fortissimum mulieris dolorem, nephriticum creditum,
cum ardenti febre, &c. excretis per alvum calculosis sabuli
frustulis optimè judicatum. Atque Horstius *Lib. I V. Observat.*
X L V I I. annotavit tormina continua sub hypochondrio dextro
à calculo biliarium vesicam replente, & intestinum atterente:
In plurimis intereà calculoso hoc morbo prehensis, colica hu-
jusmodi tormina interpolata sunt, seu brevia, ac crebrò re-
cidiva, febre succedente homotonà, & comitante ictero, quì
deletà colicà admodum imminuitur, redeunte revirescit. Cùm
autem acerbior hic dolor est, sævi cretaceæ bilis ut pluri-
mum, sincerique ab enormi expressione vomitus cum maxima
in consequens ventriculi, imò & jecoris succussione superve-
niunt. Cæterum dolores hujusmodi à cathartorum stimulis,
sæviùs adhuc exacerbantur. Ita atrocissimi ultra omnem ca-
ptum exiitè cruciatus, crebra animi deliquia inducentes,
quibus nobilis illa mulier superiùs fol. 189. commemorata, ob-
stetricæ catharticà potione, biliosum ingentem calculum per
anum pariebat. In genere quò ingentiores sunt calculi, eò
molestiora gravioraque ab iisdem excitantur tormina. Mulier
quædam referente Hildenreichio in *Miscell. Curios. ann. V I.*
& *V I I.* tam atrocibus cruciatibus vexata viperam in intesti-
nis gestare per totos triginta annos sibi suasit, quæ post mor-
tem aperta magnum fellei folliculi calculum exhibuit (Vide
etiam Sculteti *Armam.*) Ab asperiori præterea calculorum fi-
gura acerbior dolorum sensus excitatur. Dolores hujusmodi
à spontaneo naturæ, extranei corporis dejectionem molientis,
conatu excitantur. Ita hæc habet amplissimus Tulpus in *lib. I.*
Observat. Medicar. Cap. L I X. “ Vidua peritissimi alicujus
„ Medici,

„ Medici, annos nata septuaginta, ac plurimum mali ab
 „ acerrimo ventris cruciatu aliquandiu perpeffa, excrevit tan-
 „ dem per alvum calculum, ut oblongum, sic ponderantem
 „ sesquiunciam. „ Morbi præterea alii tum cutanei, tum ner-
 „ vei, aut sanguinei calculis in cystide fellea degentibus succe-
 „ dentes afferuntur superius fol. 188. tum plures alii cysticos, &
 „ hepaticos calculos in muliere comitantes fol. 191. Urinæ in ho-
 „ minibus, bilioso calculo obnoxiiis, inæqualem semper consistentiæ,
 „ ac contentorum rationem præ se ferunt: Nam in his hominibus,
 „ si otiosè degant, pallidæ plerumque, crudæque excernuntur:
 „ Sed si vel leviori quolibet exercitio excutiantur, jam lotium
 „ dejicitur crassissimum, turbidum, lateritium, ictericum, gra-
 „ vioribusque substantiis saturatum; ex quo nempe mucosum,
 „ sabulosum, aut mixtum sedimentum citissimè subsidet, quod
 „ si denuò per agitationem urinæ misceatur, dempto motu, in
 „ fundum illicò decidit. Hæc nos cum accuratioribus amicis,
 „ longâ observationum serie perspeximus: An viderint alii, an
 „ noverint, id certè nobis non referet.

VIII. Viderunt interea, saltem quoad doloris rationem, præter Platerum, & Tulpium superius memoratos, etiam præ aliis Benivenius atque Greulichius. Primus cap. III. & XLIX. *de abditis* &c. hæc scribit. „ Decessit his diebus mulier no-
 „ bilis Diamantes nomine, dolore prostrata calculi, sed cum
 „ nullum antea ex eo percepisset nocumentum, visum est
 „ medicis mortuæ cadaver incidere: & reperti sunt lapides
 „ quamplurimi, non quidem ullus in vesica, ut putabatur,
 „ sed præter unum, qui in tunica fellis coloris atrii, & magni-
 „ tudine castaneæ aride continebatur, cæteri omnes variâ fi-
 „ gurâ præditi in membranæ quâ contegitur hepar, parte de-
 „ cliviori, undè etiam veluti in folliculo longitudinis palmi
 „ penduli facculum effecerant. „ Hæc Benivenius. ex hac
 „ verò Observatione bina veniunt annotanda, & equidem pri-
 „ mum; non minùs interdum in ipsamet parenchymatosa jeco-
 „ ris substantia, ejusque tunicis, quàm in ejus manifestis ductibus,

Ex variis felleorum calculorum Observationibus ampliat eorum Diagnosis: & insuper multa illa biliosorum morborum & calculorum, cum renalibus & urinariis calculis affinitas attingitur.

aut fellis excipulo calculosa reperiri corpora. Memini in viri, longâ macie exterminati maximo, & scirrhuso jecore plusquam trecentos diversæ figuræ, & magnitudinis calculos, per totam hepatis solidiorem substantiam, præcipuè inter parenchyma, & succingentem tunicam dispersos, seu prorsus extra vasa degentes comperiisse. Vid. ulterius in *Sepulchreto Boneti de Hypochondriorum dolore* Observat. XIII. plurima lapillorum, & lapidum in hepatis substantia congestorum exempla: Alterum; calculos hujusmodi non in jecoris vasis, sed in firmiori substantia delitescentes suos etiam dolores licet mitiores inducere: Ita affert observatio, *dolore prostrata calculi*. Interea cum extra bilis semitam ad intestina protensam hi jaceant, (veluti si scirrhusa duntaxat materia foret, majores excretorios ductus non occupans) hinc vix sensibile alimentorum coctionibus afferre incommodum queunt: ut addat idcirco Observationis Scriptor. *Sed cum nullum antea ex eo percepisset nocumentum*. Greulichius verò dissertatione *de Bile* art. V. Hec habet, “Novi matronam „ nobilem annis gravem, quæ præter consuetos renum cal- „ culos correpta fuit colico dolore, vomitu bilis, ac calcu- „ lorum excretionem per anum, quos in folliculo fellis hos- „ pitatos fuisse affirmavi. Huc referri meretur observatio de- „ sumpta à viro annor. 61. Is in ætatis suæ vigore sæpius „ bilem copiosè vomuit, & quidem semel tam crassam, ut „ eam vix summo labore excernere valuerit. Postea verò an- „ no ætatis 55. remisit vomitus bilis, & successit lumbo- „ rum dolor cum dysuria, quam urina propè quâvis octavâ „ horæ parte reddenda infert; Nephritis, inquam, quam „ aliquoties vomitus bilis comitabatur. Calculorum, vel are- „ nularum excretio illi quotidiana est, non per vesicam tan- „ tum, sed & per anum *cum dolore*, ac si acus transirent. „ Tanta est fellis, & calculorum affinitas.,,

Curatio cal-
culorum cy-
stidis felleæ,
aut hepati-

IX. Calculorum, non in jecoris vasis, sed in ipsamet solida substantia degentium curatio nulla est; in cystide stibulantium difficillima; in hepaticis ductibus nidulantium fortasse

tassè non difficilior. Duplici modo cystici, & hepatici calculi ^{corum du-}
 curari possunt, alterantibus scilicet, atque evacuantibus. Al- ^{ctuum du-}
 terantia hujusmodi calculorum illa sunt, quæ illos solvere, at- ^{plex: Alia}
 que liquare valent. Sed licèt aliqua hujusmodi calculos spe- ^{scilicet per}
 ciatim, sive electè frangentia, atque solventia (hepatica li- ^{dissolventia,}
 thontriptica etiam dicunt) ab authoribus plurimis decanten- ^{alia per eva-}
 tur, tuta tamen hujusmodi saxifraga (non secùs ac renalia, ^{cuantia. Pri-}
 aut vesicalia) reperta sunt hucusque nulla. In terebinthinæ ^{mi generis}
 spiritu, quem ad solvendos hos calculos menstruum aliis om- ^{curationem}
 nibus efficacius esse, à non paucis perhibetur, cujuslibet ge- ^{per experi-}
 neris cysticos, atque hepaticos calculos per plures dies immer- ^{menta varia}
 simus, externumque calorem naturali hepatico analogum di- ^{vanam esse}
 ligenter addidimus; neque ullam unquam, vel minimam, dis- ^{ostenditur.}
 solubilem habitudinem eorum quipiam sortiti sunt. Hinc plu-
 rima alia in eundem censum ascripta lubenter omittimus; ut
 quæ Etmullerus in *Coll. Pract. Cap. III. art. IV. De ictero* ad-
 monet videnda in M. A. N. C. Ann. 4. & 5. *Observat. 99. p.*
103. Sed magis appositè idem Author eodem loco hæc tradit.
 „ Calculi in folliculo felleo, & inde natus icterus difficillimè,
 „ raro, ac nunquam curantur; cùm non prostant remedia cal-
 „ culos alterantia, ut ut spiritus nitri dulcis aliquid præstet:
 „ aut curati licèt, crebriùs recidivant, & mortem inferunt.,,
 Aliqui interea pro valenti specifico horumce calculorum sa-
 xifrago commendant oleum Carabes alb., ad gutt. aliquot in
 mediocri haustu vini albi calefacti solutum. Sed hoc non ma-
 jorem præ aliis utilitatem præbere propriâ aliàs experienciâ edif-
 cebam. Th. Bartholinus, atque Franciscus Sylvius *Prax. Med.*
lib. I. cap. XLV. specificorum calculos hujusmodi dissolven-
 tium præsidiorum caput esse succum, aut decoctionem radi-
 cum, atque herbæ graminis affirmant. „ Postquàm, *aiunt,*
 „ notum est multiplici experienciâ oves, & boves, quibus
 „ hyeme alimentum est fœnum, atque concrefcit in ductu bi-
 „ lario lapidea, vel calculosa crusta, ubi Maio mense iterùm
 gramine

„ gramine utuntur viridi, sensim ab illo liberari affectu; Certo
 „ argumento inesse viridi, ac recenti gramine calculos dissol-
 „ vendi vim, quæ perit, quando idem in fœnum exsiccat, „
 Ita superioribus annis peritissimus apud Nostrates Practicus,
 idemque Reverendus Sacerdos D. Caccia ex creberrimæ colicæ
 speciei in nobili Fœmina, cum quâdam imprimis ad dex-
 trum hypochondrium determinatâ profundioris doloris sede,
 succedente homotonâ febre, simulque ictero cum hâc colicâ
 recidivo, eâque deletâ pariter evanescente, cysticum conjiciens
 calculum, graminis succum imperabat; sed hoc præsidii genere
 ab alio medico parvifacito, ægrâque ad catharsim potius pro-
 pendente, validum tandem purgans propinabatur: ex quo acer-
 bissimus ad hepar excitatus dolor, sævam perhibens sensationem
 transversè ab hoc viscere ad usque intestinum protractæ chor-
 dæ. Reverà cathartici stimulo cysticus calculus excussus est;
 Qui per cysticum, atque cholidochum ductum ad usque duo-
 denum transmissus, toto itinere dolorem illum induxit. Per
 sedem dejectus mediocris olivæ magnitudinem equabat, trian-
 gularem, seu trium facierum figuram præ se ferens: ut totus
 hinc suspicioni locus adfuerit, alios simul in illa cysti extitisse
 calculos, qui illius lateribus accommodati, ovalem, aut
 ovali similem figuram, (quæ quidem ovalis, aut ovali similis
 capacitatis excipulo par esset) simul omnes componerent. Sed
 usus succi graminis per 40. dies protractus, rem totam expe-
 diit: Fortè & superstites calculos ex voto solvebat. Nam ab
 illa per catharticum ejectione, longâque specifici hujus reme-
 dii administratione illustris Matrona neque colicas, neque
 icteros, neque ulla unquam latentis aliûs cystici calculi argu-
 menta passa est.

*Curatio se-
cundi gene-
ris, sive per
depellentium
catharticorū
vim, licet
indifferens,* X. Jamque ad alterum præsidii genus devenimus; sive
 ad validioris cathartici concussionem, & stimulum, quibus qui-
 dem, rebelles aliis, ut puto, quibuslibet remediis, atque
 invincibiles calculi hepaticorum ductuum, aut felleæ cystidis
 incolæ, facile quandoque cedunt; cedentesque foras per
 alvum,

alvum, tumultuariè quidem, intereà citò, validèque educuntur; ut ex superius allatis historiis videre est. Hinc licèt hocce præsidii genus, cùm universale sit, atque post inditum ad ventriculi, & intestinorum superficies irritationis momentum cæteras corporis tum liquidas, tum solidas partes indifferenter respiciat, hinc fortuite, atque accidentalis, ut dicitur, adversus hujusmodi calculos operationis esse videatur; validius tamen ad hujusmodi extranea depellenda corpora inventum hucusque præsidium non est: cujus quidem selectionem, modum, & tempus Clinici, calculorum hujusmodi circumstantiam quamlibet sedulò perpendentes, videant. Nos hîc intereà quædam, specificis, atque catharticis intermedia dicenda, remedia, utrisque frequenter opportuniore, adjiciemus, sive quæ validè incidentia, absterfiva, & saponariâ veluti facultate prædita, præcipuè adversus hepar dicuntur. In hunc censum in primis refert radicem curcumæ Hoffmannus in *Clave Schræderiana*. Hæc quidem variis formulis adhiberi poterit, sive solitaria, sive martialibus, aliisve potentibus aperitivis maritata. Adjiciunt alii radices chelidon. maj. petroselin. fragar. urtic. gramin. filicis, taraxac. rub. tinct. rhabarb. monac. folia marrhub. fumar. hepatic. eupator. verben. saponar. parietar. abrotan. anser. summit. absinth. semina petroselin. aquilegiæ, napi, cannabis, card. benedict. flores hyperici, calend. centaur. min. cichor. genist. &c. tum volatilia salia vel sicca, vel liquida: ut sal volat. C. C. viper. fulgin. &c. Spiritum urinæ humanæ sal ammoniac., aut C. C., aut fuliginis, spiritum tartari, spiritum de tribus. Præparationes itidem ex variis animalibus, ut ab asellis, terrestribus lumbricis &c. præcipuè verò elicitos ab iis pulveres vel sales volatiles, & urinosos spiritus: Alcalina volatilia oleosa; ut tincturam croci, spir. sal. ammoniac. juniperinum, spirit. oleos. aromat. Sylvii, liquorem C. C. succinat. & similia: tum fixa alcalina plurima; ut bezoarticum minerale, aut joviale; Arcanum duplicatum, tartarum vitriolatum, cremorem tartari, salia fixa absinthii, tamarisci, genistæ, &c. & tandem illa

omnia, quæ in contumacioribus icteris efficacius adhiberi solent. Valent apprimè, medentium omnium consensu, sanctorisque praxeos testimonio, in hepaticis calculis martialia præsidia, præcipuè quæ volatilliora parantur; atque insuper thermæ aquæ, martialibus principiis aculeatæ. Notatu digna est remedium illa administratio, quâ Marcus Gerbesius Comitem quendam, lapillos cysticos cum alvinis fecibus ferè quotidie excernentem vernali tempore liberavit. Purgabat hominem singulis sextis diebus cum decoct. fol. senn. & rhabarb. additis aliquot granis pul. jalapp. Vacuis à purgatione diebus 3v. ser. lact. hoc pacto chalybeati propinabat. R. radic. graminis, cichor. sylvestr. asparag. polypod. querc. a. 3iij. herbar. cichor. endiv. hepatic. agrimon. a. M.ß. sem. melon. 3iij. concisa infunde in f. q. seri lactis stillati, chalybe per extinctionem imprægnati. Hinc decoque. Adde colat. ʒiij. syrup. de pomis 3ij. crystall. tart. 3ß. rasuræ martis in petia suspensæ 3ij. aquæ flor. citr. 3ij. m. f. potio. ejusque usus ad quindecim dies protrahatur. Biduo semper vel triduo ante novilunium præscribebat VII. ex sequentibus antinephriticis pilulis. R. succ. liquir. ocul. cancr. lapid. judaic. pp. a. 3j. milleped. pp. crystall. tart., nitri depurat. a. 3ß. terebinth. aquâ petrosel. lot. q. s. f. s. a. pilulæ instar pisi, liquiritiæ pulvere involvendæ.

Tertii generis Morbi biliosa vesicæ, seu à folido, atque ab ipsamet propria substantia; quorum aliqui curationem admittunt; alii vero sunt prorsus incurabiles.

XI. Ut denique tertio fellei folliculi morborum genere, siue in ipsamet solida ejusdem substantia exorto, hujusmodi Appendicem absolvamus: Omissâ mentione ejusdem gemini interdum, reperti, aut etiam desiderati, latissimo, tunc amplissimoque ductu hepatico ejus vicibus fungente, aut in insignem naturaliter amplitudinem excreti, aut in molem naturali multò minorem constricti, aut mille naturæ lusibus in figuras varias à naturali aberrantes redacti (hæc enim vitia potius quàm morbos hujusce partis recipiunt) considerabimus primùm, folliculum hujusmodi, vel convulsionis, vel aliûs cujuslibet habitudinis ratione posse interdum adeò contrahi, corrugari, proprioque in sinu angustari, ut debitæ bilis recipiendæ copię impar

impar re iditus , plurimis , in recentium succorum distributio-
 ne , procreandis morbis valere possit , nisi expansa ultra natu-
 ralem statum emissarii sui , seu cystici canalis , aut biliaris du-
 ctus , aut etiam utriusque cavitas amissum excipuli munus ipsa
 præstet : qualis casus inferius in Tab. VI. Lectorum oculis ob-
 versabitur. Fellis vesiculam fuisse ruptam , quandoque com-
 pertum est : Id quod in Nobili quodam , qui diuturno bilis
 vomitu vexatus esset , accidisse , rupturamque hujus cystidis
 vomitus causam fuisse , in sectione post obitum deprehendisse
 scribit Georgius Bertinus *Medic. Lib. X I I. Cap. I.* Ita Joh.
 Matth. Faber. Dec. I I. ann. I X. N. C. ex fellei folliculi rup-
 tura sæpius repentinam mortem fuisse consecutam enunciat.
 Atque Phil. Salmuth. *Cent. I. Observat. III.* puerum X I I. an-
 nor. in scamnum ab iracundiore Præceptore durius projectum,
 felleâ vesiculâ fuisse abruptum , undè effusio fellis per abdo-
 men , atrocissimus dextri hypochondrii dolor , & mors intra
 quattriduum. Sed de felleæ cystidis ruptura à causis variis cum
 bilis effusione in cavum abdominis , diris symptomatibus , &
 lethali eventu conf. I I. Partem hujus Historiæ fol. 140. tum
 de cysticis calculis , per apertum dextri lateris abscessum in
 muliere excretis (quod certè sine folliculi ruptura haberi non
 potuit) fol. 190. Quandoque in excedentem magnitudinem
 (ductu præcipuè cystico obstructo) expansa biliaris vesica non
 quidem fuisse rupta visa est , sed adeò in propriis tunicis ex-
 tenuata , ut per amplos redditos eorum poros contenta bilis
 in ventris cavum ad omnia inundanda viscera liberè , & uber-
 rimè efflueret , calamitosus inductis , atque perpetuis cruciati-
 bus , convulsionibus , aliisque symptomatibus , in mortem de-
 mum commutatis : Quale exemplum videri potest in G. Blasii
Observat. Med. Par. I I. Obser. I V. Osseam notavit hujusmodi ve-
 sicam Rhodius , *Cent. I I I. Observat. I I I.* Alii etiam veluti to-
 tam lapideam descripserunt. Sed hujusmodi fellei folliculi affectus
 nullâ medentium ope deleri possunt. Qui autem aliquam ad-
 mittunt morbi hujusce excipuli curationem , obstructions
 sunt;

sunt; Hæ quidem si à lento dumtaxat, viscidoque comprehenso succo, ut ab amurcosa bile, aut pituita viscida &c. ortum trahant, majorem sanationis spem porrigunt; neque diversam ab illa, quæ superius in jecoris obstructione, & ictero memorata est, præsidiorum administrationem deprecantur: Sin autem ab insidentibus calculis inducantur, minorem probi eventus spem faciunt; atque curativâ methodo, superiori canone pro pellendis calculis propositâ excipiendæ sunt. De biliaris vesicæ vulnere aliqua superius in disceptatione vulneris hepatis *Can. VII.* excussimus.

DE BILIOSA PHRENITIDE,

Et Perfunctoriè

*De aliis Capitis pariter Biliosis, seu à primigenio Bilis vitio
Sympathicis Affectibus,*

Canones Practici.

*Principales
morbi, à bile,
non propriè
in Hepatis
substantia,
sed in aliis
partibus ex-
citati, qui-
nam sint.*

I. **C**UM hætenus proprios, atque Idiopathicos, ut dicitur, Hepatici visceris morbos nostra hæc Historia complexa fuerit; Nunc alios aggredi intendit affectus, qui sunt veluti Hepaticæ passionis symptomata, Imò nec ipsius propriè Hepatis, sed delinquentis bilis germani effectus recensentur; Non in ipsa ulterius jecoris substantia, sed in aliis partibus excitantur: Quales sunt (præter bilarem pleuritidem, suo jam loco descriptam) Phrenitis biliosa, cujus sedes in capite est; Diarrhœa biliosa, quæ quidem intestina occupat; biliosus vomitus, qui ventriculum; Dysenteria biliaris, quæ affectio rursus ab Intestinis excipitur, Colica biliosa, atque biliosus Tenesmus, quorum prima colo intestino inhæret, alter verò recto; cholera morbus, qui ad totum cibarium tubum pertinet; Et demùm biliaris Leipyria febris, quæ naturalia omnia viscera videtur adoriri, totumque indè sanguinem in consensum produ-

producere. Sed hæc morbosæ bilis symptomata, five, si mavis, succrescentes ab ejus erroribus in aliis, præterquàm in proprio foco, & naturali promptuario, humani corporis partibus morbos, non illo, ut hucusque de propriis Hepatis morbis patratum est, prolixiori calamo, sed, quantum liceat, breviori exarabimus, ne in hac Historia evadere infiniti videamur. Cum verò hîc à biliari Phrenitide auspicantes (in alias postea memoratas à vitiosa bile explicandas productiones perrecturi) Ulteriora adhuc à morbosâ bile, Caput ascensâ, vel cum febre vel sine febre, concitari interdum in hac parte mala animadvertamus, varios scilicet diuturnos, aut breves, graves, aut minus graves Capitis dolores, vigilias, vertigines, imò & desipientiæ genus sine febre; Ne *Urcus* in *Amphoram* excrescat, hos omnes Capitis symptomaticos à bile morbos huic pariter Disputationi in Appendicis formam adjiciemus.

II. Hîc igitur de biliosa phrenitide verba facturus, in limine temperare non possum, quin duo quidem in Hippocratis Interpretibus, quibus hi videntur à Præceptore recedere, per ipsa Præceptoris firmissima, clarissimaque asserta admonere, atque emendare contendam. Primum igitur est: Phrenitidem à quibusdam Antiquorum semper essentialem, ut dicitur, seu Idiopathici cerebri morbi sociam considerari. Ita ex Fernellii Patholog. Lib.V. Cap. XIII. hæc habentur. "Desipientia alia, cum febre, alia sine febre consistit. Quæ cum febre, aut phrenitis est, aut delirium. Distant autem, quòd simplex delirium fiat ex bile, aut ex tenui sanguine per cerebrum effuso, aut ex ventriculi, præcordiorum, totiusque corporis calida expiratione, qualis in ardentissimarum febrium vigore suscitatur. Phrenitis semper ex proprio, atque primario cerebri affectu, ut ex inflammatione, ex Erysipelate. Distant etiam, quòd delirium plerumque febris, aut morbi gravioris symptoma sit, Phrenitis verò non symptoma, sed causa sit febris. Adhæc frequens admodum est delirium, Phrenitis verò rarissima." Ita alii plurimi Hippocraticæ scholæ sectatores:

Asserta quorundam Antiquorum, de natura, & causis Phrenitidis, quæ ab Hippocratis sensu disjuncta sunt.

tores : Alterum est : Phrenitidis causam potissimam esse calidiorē, sive biliosum sanguinem, qui è vasis suis effusus membranas cerebri obsideat, ibi accendatur, & inflammationem producat. Ita Sennertus, ejusque abbreviator Riverius, alique. Jamque antea attulerat Hollerius de morb. intern. lib. I. in scholiis pag. 23. “ Phrenitidis causam esse duplicem : unam à bile naturali, idest tenuiore sanguine ad cerebri Meninges affluente, easque inflammante ; Unde Hippocratis deliria securiora, cum risu repetenda sint. Alteram è bile non naturali, idest acri, & adusta, quæ quò acrior est, & adusta magis, eò sæviora, & periculosiora accidentia invehat. Ita etiam Forestus Lib. X. Observat. II. in scholiis pag. 314. Atque Observat. III. in schol. pag. 317. Alique plurimi.

Phrenitin ab Hippocrate sympathicū esse, ut plurimum, in cerebro morbum, atque à recrementitia bilis vitiis oriundum, ostenditur.

I I I. Interea, neque Phrenitidem semper morbum esse cerebri, aut ejusdem membranarum Idiopathicum, imò ut plurimum sympathicum ; neque à calidiori, seu bilioso sanguine, sed à recrementitia ipsa bile, quæ extra sanguinem est, atque ad gignendam phrenitidem intrat in ipsum sanguinem, eandem produci, ex omnibus Hippocraticis textibus manifestè depromitur. Ita II. de morbis fol. apud Foes. 460. “ Phrenitis [quæ est perpetuum cum febre delirium] ad hunc se habet modum. Sanguis, qui in homine existit, magnam partem ad prudentiam confert, ut quidam verò dicunt, totam. Ubi igitur bilis commota & sanguinem subierit, ex solita compage, & motione sanguinem dimovet, & sero diluit, & percalefacit. Qui percalefactus totum etiam reliquum corpus calefacit, & homini mens alienatur, neque apud se est, propter febris copiam, & sanguinis non consuetam dilutionem, & agitationem. Qui verò Phrenitide detinentur, quod ad mentis alienationem, his qui atrâ bile laborant sunt affimiles. Atrâ enim bile vexati, cum à bile, & pituita sanguis corruptus fuerit, morbo corripiuntur, & mente alienantur, quidam etiam insaniunt. Et in Phrenitide similiter contingit. Quò verò bilis pituita est imbecillior, eò minor

tum

„ tum insania , tum mentis alienatio contingit. „ Libro verò
 „ de affectionibus , atque apud Foesium sectione V. fol. 518. Phre-
 „ nitidem describens hæc habet. “ Ubi perpetua cum febre In-
 „ fania , (phrenitis dicta) occupat , primùm levis febris deti-
 „ net , & dolor circa præcordia , magis autem dextera ad He-
 „ par. Cùm autem quartum , aut quintum diem attigerit , tum
 „ febris vehementior , tum dolores majores fiunt , colorque
 „ aliquantum biliosus redditur , & mens offenditur . . . Hic
 „ morbus oritur ex bile commota , ubi ad viscera , & septum
 „ transversum resederit. Judicatur autem , ut brevissimè septi-
 „ mo , ut longissimè verò undecimo. Hunc enim pauci effu-
 „ giunt , ipseque in pulmonis inflammationem transit , ac ubi
 „ transierit pauci evadunt. „ Tum Lib. III. de morbis atque
 „ apud memoratum Foesium Sect. V. fol. 490. ita de phrenitide
 „ loquitur : “ Phrenitides , seu perpetua mentis cum febre acuta
 „ deliria. Phrenitides etiam ex aliis morbis oriuntur. In his sep-
 „ tum transversum adeò dolet , ut ne contingere quidem fi-
 „ nant : Febris accedit , mente alienantur , immotis oculis af-
 „ picunt , aliaque similia efficiunt his , qui pulmonis inflam-
 „ matione laborant , in eaque mente moventur.

I V. Jamque ex his textibus plura , hæcque gravissima
 docemur : Et quidem *primùm* : Phrenitidem non tantum ab hu-
 more , dissimili à quacumque sanguinis specie , seu ab ipsa ac-
 censa furente , & cerebrum impetente , recrementitia bile or-
 tum ducere ; sed ulteriùs à majori , aut minori bilis ad caput
 ascendentis copia , majori , aut minori ejusdem feritate , acer-
 biorem , aut minùs acerbum huic morbo gradum conciliari :
Quò verò bilis pituita est imbecillior , eò minor tum insania , tum
mentis alienatio contingit. Secundò : Non tantum à bile procrea-
 ri phrenitidem , sed à bile , quæ in proprio foco , seu hepate ,
 peculiare vitium contraxerit ; Hinc rectà ab hoc viscere ad ce-
 rebrum per sanguinem attollatur : *Primùm levis febris detinet , &*
dolor circa præcordia , magis autem dextera ad Hepar . . . Hic mor-
bus oritur ex bile commota ubi ad viscera , & septum transversum
rese-

Neque solum
 docemur ab
 Hippocrate
 Phrenitidis
 materialem
 causam bi-
 lem esse he-
 paticam, re-
 ctà ab hoc
 viscere ad
 caput ten-
 dentem, sed
 insuper non
 dari illam à
 diaphrag-
 matis in-
 flammatione
 immediatè
 productam
 Phrenitin,
 quam ideo

Paraphreni-
tidem Medi-
corum vul-
gus appellat,
Phrenitis ra-
rò à menin-
gum inflam-
matione or-
tum ducit:
Quid hac
propriè sit:
& quid De-
lirium in
genere.

resederit. Tertiò: esse igitur phrenitidem sympathicum, ut plu-
rimùm, morbum; Ita Duretus in Coac. fol. 54.: "Phrenitici
autem fiunt, quoniam febris translatio ad cerebrum sympto-
ma facit humoris morbifici proprium. Est autem morbificus
humor & causa efficiens bilis; cujus proprium symptoma in
cerebro est ipsa phrenitis,, esse verò sympathicum ab ipso
hepatis vitio; non autem à diaphragmatis affectione, ut perpe-
ràm plurimi arbitrati sunt ab his textibus intelligere posse:
Nam cùm dicit Hippocrates: *hic morbus oritur ex bile commo-
ta, ubi ad viscera, & septum transversum resederit*, non quidem
ipsam septi, seu diaphragmatis, substantiam intelligit, in qua
quidem bilis non residet, sed illam jecoris partem, seu gibbam,
quæ non solùm accumbit septo, sed ab eodem ambitur, &
comprehenditur. Quod quidem manifestum reddit in tertio
textu: *In his septum transversum adeò dolet, ut ne contingere qui-
dem sinat.* Et certè transversum septum contingi nullo modo in
vivente potest, sed jecoris gibbum duntaxat. Ergo pro hoc
transversi septi nomine Hepar ipsum Hippocrates, atque in pri-
mis ejusdem gibbum intelligit: Quod quidem evidentiùs de-
clarat per alium textum Lib. *de diebus judicat.* ex Foës. Sect. II.
fol. 57. "At verò acuti morbi ex bile oriuntur, cùm ad jecur
confluxerit, & ad caput pervenerit. Sic verò afficitur: je-
cur intumescit, & propter tumorem ad septum transversum
expanditur, statimque ad caput, præcipuè verò ad tempora
dolor ingruit. Cùmque jecur ad septum transversum ma-
gis explicatum fuerit, delirat, sibi que ante oculos reptilia,
& varias cujusvis generis feras ferri existimat, & homines
armatos, cum quibus pugnare videtur, & tanquam ejusmodi
loquitur, irruit, minaturque &c., Hæc repetit Lib. *de int.*
affect. fol. in Foësio 558. Reverà per illud Hippocratis *cùmque jecur
ad transversum septum magis explicatum fuerit, delirat*, indicatur
Phlegmone Hepatis in parte gibba, quæ, ut eâ, quæ in parte
cava congeritur, vehementior est, acerbiori febre, & fero-
cioribus symptomatibus stipata, ita ut plurimùm inducit phre-
nitidem,

nitidem, quæ non ita frequenter à cavæ partis Phlegmone pro-
 gignitur. Quemadmodum igitur non tam consultò Duretus phre-
 nitin hujusmodi, convexarum Hepatis Phlegmoni proximè suc-
 cedentem, phrenitin à diaphragmate nuncupat in Coac. fol. 458.
 sic ista Phlegmone jecoris illa una est, quæ superiùs ab Hippo-
 crate pro causa phrenitidis indigitatur: *Adeò dolet ut ne contin-
 gere quidem sinant*, cum sola ista sit, quæ tactui se proximè
 præbeat. Intereà ubi Hippocrates de diaphragmatis affecti-
 bus manifestè, & nominatim loquitur, nullius indè succe-
 dentis phrenitidis meminit. Ita lib. *de Prisca Medicina* versùs fi-
 nem, postquàm sermonem adduxerit de gravissimis, creberri-
 misque doloribus, suppurationibus, & tuberculis Hepatis, ad
 transversum septum conversus, ejusdem etiam dolores, & tu-
 bercula exprimit, neque tamen de ulla succedente phrenitide
 mentionem instituit. Exulet igitur à saniori praxi Medica illud
Paraphrenitidis nomen, quod sympathicis phrenitidibus, veluti
 à Diaphragmatis inflammatione subortis, arrogare cum Galeno
 ferè omnes Hippocratis Asserclæ consueverunt, nimis litterali-
 ter, ut dicitur, adductum textum interpretati; cum reverà in-
 denatis ab hoc morbo nulla unquam in transverso septo propria
 inflammatio, sed semper in jecore affectio deprehensa fuerit.
 Quomodo ceterùm inflammato Diaphragmate illà ægri uti pos-
 sent respirationis libertate, quâ reverà in his morbis, *Paraphre-
 nitidibus* dictis, ut plurimùm fruuntur? *Quartò* igitur: Phreni-
 tidem non esse plerumque ab ipsa speciali Meningum cerebri
 inflammatione repetendam: Cum sanè in Denatis à phreni-
 tide membranæ hujusmodi sæpissimè non inflammatae depre-
 hendantur, nec imò per hilum à naturali statu immutatae: tùm
 inflammatae fuerint frequenter perspectæ, [ut in terebrationi-
 bus cranii, vulneribus variis capitis, aliisque casibus quando-
 que contingit,] absque eo quòd phrenitidem induxerint. De-
 mùm, si phrenitis ab idiopathico cerebri morbo, seu ab ejus
 membranarum inflammatione ortum duceret, jam ab ipso morbi
 principio febris, & phrenitis, quæ æquè essent hujusmodi

morbi symptomata, necessariò simul accederent; Dum tamen plerumque febris phrenitidem diù antecedit. *Quintò*: Neque igitur tam raram phrenitidem esse, veluti à Fernelio, aliisque decantatur: Ut potè quæ à sola meningum cerebri inflammatione deducenda non est, sed solùm, ut optimè advertit Hippocrates, à *perpetuo mentis cum febre acuta, vigiliis, & ferocitate delirio*; Quid quidem ut frequens satis in acutis febribus, ita tam crebrò ab eodem Sene describitur. *Sextò* tandem: simplicis delirii nomen non esse juxta Fernesium, ejusque affectas, speciatim accipiendum pro *alienatione mentis ex bile, aut ex tenui sanguine per cerebrum effuso, aut ex ventriculi, præcordiorum, totiusque corporis calida expiratione, qualis in ardentissimarum febrium vigore suscitatur*; sed solùm pro desipientia, seu alienatione mentis in genere, aut cum febre, aut sine febre: Ut ab Hippocrate, atque ex ejus documento, à plerisque Modernorum usurpatur.

Alia Præceptoris loca, hepatica bilis à jecore ad cerebrum, aut à jecore ad pulmones, hinc à pulmonibus ad cerebrum, pro excitanda Phrenitide, immediatam translationem evincunt.

V. Alia cæterùm Hippocratis loca memoratam à recreatione bile phrenitidis genesis, simulque ejusdem humoris à jecore immediatè ad cerebrum, aut ab hoc viscere, priùs in pulmonem, atque hinc à pulmone in cerebrum pro hujus morbi origine translationem confirmant. Phrenitis in Hepatide à bile in caput translata describitur à Coe, lib. *de intern. affect.* sect. V. ex Foëssio fol. 548. "Bilis, quæ est in Hepate, pituita, & sanguine referta, velut ratione colligimus, disrumpitur, cùmque disrupta fuerit, citissimè ad insaniam deducitur, indignatur, & imprudenter loquitur, more canis latrat, ungues puniceo sunt colore, oculis cernere non potest, pilis capitis erecti manent, & febris acuta invadit. Plerique intra undecim dies moriuntur, paucique evadunt; Phrenitis ulterius à metastasi in caput ex Hepatis inflammatione habetur in *Ægrot. XI. Lib. I. morbor. vulgar.* seu in Dromeade uxore. Est autem notandum in hac Historia afferri dumtaxat *Hypochondrii dolorem*, non distinctâ parte, an dextrâ, an sinistrâ. Sed opportunè animadvertit Duretus in *Comment. ad Coacas*

Dextro

*Dextro esse eam nominis prerogativam cum Hypochondrii nomen scriptum legitur absolute apud Hippocratem. Præterea Dictator noster Lib. de rat. Vict. in Morb. acut. Phrenitidem à bile in caput à propriis Hepaticis latibulis translata graphicè depingit his verbis. "Interdum etiam cruda à capite attrahuntur, & à thoracis regione biliosa (hinc Hippocrates per thoracem intelligit ventrem, ut legitur lib. de Arte, pag. 6., ubi idem ait: "Nam & thorax dictus, quo jecur concluditur) vigiliæque iis accedunt, ob quas non coquitur morbus, valdeque tristes, & amarulenti evadunt, delirio tentantur, & iis oculi vibranti splendore coruscant; Aures sono implentur, extrema perfrigescunt, urinæ incoctæ, sputa tenuia, falsa, colore sincero tincta, & pauca, sudores circa cervicem, anxietates, spiritus offensans, creber, & magnus valde, supercilia quodammodò amplificantur, pravæ animi defectiones, vestium à pectore rejectiones, & manus tremulæ, atque interdum labii inferioris concussio. Quæ si initiis compareant, gravis delirii significationem exhibent, & plerumque moriuntur,, Neque minùs perspicuè loquitur in principio Libri II. de Morbis, ubi addit hosce phreneticos bilem vomere, cum nimirum ipsa in corpore sit agitata, crassissimam verò vomere, cum tenuissimam caput ad se traxerit. Et rursus incoctas urinas incusat, expertes scilicet bilis, in cerebrum traductæ. Ita ait in Coacis: *In Phrenitide albæ dejectiones, & corporis exolutio grave malum.* Quas quidem albas alvinas dejectiones deducit Duretus in Comment. "A vacuitate bilis translata in Cerebrum, cujus translationis causa est incendium superioris regionis Hepatis., Tum aliam biliaris Phrenitidis speciem ex biliaris pleuritidis Epigenesi ad caput annuit Senex in Prædict. & Coac. *Lateris dolor cum sputis biliosis si absque ratione evanuerit, egros in vehementem, & furiosam mentis emotionem agit.* Quam quidem plerumque esse lethalem in praxi deprehenditur. Et rursus in Coac. *Quibus cum dolore lateris, non tamen pleuritico, levis adest, aut modica perturbatio, evadunt phrenitici.* Quem quidem lateralem*

non pleuriticum dolorem à bilis orgasmo deducendum esse satis evincit Duretus in ejusdem textus Commentario, fol. mihi, 291., ex cujus humoris translatione à pectore ad caput paraphorica cerebri symptomata excitari probat; tum ex levi perturbatione facile iri ad phrenitidem, & insaniam demonstrat, cum effera bilis eò prorepit, ibique feritatem suam exercet. Cæterum Hyppocraticis Observationibus accedit illa cl. Musgravii Angli de Phrenitide à bile ex intestinis in caput translata, quam quidem inferius in biliaris Dysenteriae disquisitione accensebimus.

Idem confir-
matur à plu-
rimis Gale-
ni locis.

V I. Galenus Præceptoris vestigiis insistent, Lib. IV. de Causis pulsuum Cap. X I V. affert, Phrenitin à bilioso humore generari. Primo in Hipp. Prorrh. Comment^o. ait “Phrenitis quæ exquisita est, & nulli alteri morbo permiscetur, fit, cum bilis flava locum, in quo princeps animæ pars residet, prehenderit. In Comment. Lib. II. Hipp. de popular. morb. exhibet ardentium febrium, & Phrenitidis pro loci, quem tenent, diversitate auctorem eundem esse biliarem humorem: Atque 3. de loc. affect. cap. 7. Exemplo Hippocratis designantur ab eodem varii biliosæ Phrenitidis gradus secundum majores, aut minores ejusdem humoris depravationes: *Phrenitis nonnunquam mitior est, quum videlicet à pallida bile ortum contraxit; Interdum vehementior, quum flava bilis eam peperit: Atque insuper alia nonnunquam dementia occurrit ferina, & melancholica, flavâ bile perassatâ.* Quæ quidem omnia locis aliis quamplurimis confirmat: Ut pateat varios esse gradus malitiæ bilis, à viscerum incendio, sicut ait Duretus, genitæ, atque in cerebrum deportatæ.

Signa ex
Hippocrate
imminentis
Phrenitidis,
ex bile, aut
ex jecore aut
à pulmone in
caput trans-
lata: Et qua-
lis sit in

V I I. „ Vehementi insaniâ detenti, tremuli cum crebra spuitione, metus est ne phrenetici evadant. „ In Coacis, “vehementer, & acutè emoti, si febris iterum repetat, phrenetici evadunt. „ Etiam in Coacis; Atque in iisdem, aliisque locis insaniam etiam portendit Senex ex ferociente, truculento, simulque fixo rectoque oculorum obtutu, ac motus perniciousitate, à pervigilio, aut turbulento somno, atque interdum è stilla-

è stillatione sanguinis à naribus ; à linguæ insuper affectibus. Ita in Coacis “Lingua tremula instabilem mentem, & à sede constantiæ deturbatam significat. Linguæ densæ, & peraridæ, Phrenitidem portendunt., Alibi etiam eandem prognosim à nigra lingua desumit, atque etiam ab eadem balbutiente. In Prædict. Lib. I. “Phrenetici parum bibunt, ex levibus strepitibus facile irritantur, ac percelluntur, tremuli sunt., Sed multa inprimis argumenta à Præceptore afferuntur, quæ quidem imminentem simul Phrenitidem, simulque causam à delinquenti bile, mandanteque ad caput Hepate, desumendam esse, perspicue declarant. Hæc in Prorrheth. legimus “Qui in capitis doloribus æruginosos vomitus habent, vigiliantque cum surditate, citò hi vehementer insaniunt., Æruginosam autem bilem, quæ per vomitum ejicitur, à flavæ bilis perassatione produci Hippocratis mens est. Ita in 3. Epidem. memoriæ tradidit “Philistam vomuisse quidem biliosa pauca, flava primum, mox æruginosa plura ; Deinde simul accidisse homini surditatem, atque demùm vehementer insanivisse., Intellige autem hæc omnia in vehementi febre contingere : Quandoquidem, ut pariter observavit Hippocrates, biliosas ejuscemodi phrenitides antecedunt ardentissimæ febres cum linguæ siccitate, & flavedine, atque ut ait Hippocrates, cum densa lingua atque arida, acerrima siti, urinis principio flammeis, simulque lateritiis, hinc statim pallidis, & tenuibus redditis ; In primis dolore ad hepar stabili, & acerbo ; quâdam faciei flavedine, & similibus dominatûs bilis indiciis. Phrenitis biliosa alias omnes ab aliis principiis exortas vehementiâ, & feritate superat : Ita biliosam phrenitidem, insaniam furiosam in libris Epidem. appellavit Hippocrates. Comitantur insuper biliosam phrenitidem vehementes artuum tremores “Phrenetica vehementer trementia finiuntur., ex Hippocrate quæ quidem artuum concussiones ab acerrimæ bilis stimulo nervosis partibus inducto repetendæ sunt : Addit in eodem Prorrheth. Lib. Senex, loquens de ejuscemodi Phreneticis

biliosa phrenitide ferocia gradus.

„ Comatosi inter initia facti cum Capitis, Lumborum, Hypo-
 „ chondrii, Collique dolore vigilantes, „ Siquidem crassitudi-
 nem quandam affectans bilis principio decubitus, malitiam in
 cerebro veluti narcoticam interdum exerit. Afferit insuper Hip-
 pocrates cit. loc. in hisce desipientiis *hypochondria intrò trahi*:
 Quod quidem in dextro signatim hypochondrio, atque ex pro-
 ductâ simul cum phrenitide, & tremoribus convulsione aliquan-
 do per praxim perspeximus. Signa Epigenesis biliosæ pleuriti-
 dis ad phrenitidem elici possunt à loco Galeni in Dynamidiis
 „ Urina tenuis, & saniosa, si in pleuriticis initio ægritudinis
 „ venerit, & per multos dies manserit, phrenitin futuram
 „ nunciat, maximè si eis tussis sicca, & insomnia fuerint. „

Signa immi-
 nentis phre-
 nitidis, præ-
 cipue ex uri-
 nis desum-
 pta.

VIII. Reverà, quod in acutis biliosis, aliisque febribus
 futuram brevè phrenitidem, præcipuè, tutiusque indicat, est
 ipsa urinarum inspectio. Ita si hæ in augmento acutarum cum
 aliquo capitis dolore subito palleſcant, seu derepentè aquosæ
 fiant, hunc morbum tutissimè prænunciant. “ Nam quæ sunt,
 (ait doctissimus Duretus in Comment. ad Coacas Hipp. fol., mihi 510.)
 „ pellucidæ, & aquosæ in acutis morbis urinae, eò certè ap-
 „ parent; Non quatenus portioni concolores, sed biliosæ tin-
 „ cturæ expertes, vel ob anadromem bilis in cerebrum ad phre-
 „ nitidem, & hæmorrhagiam, vel ob derivationem ejus in
 „ alvum ad dysenteriam. „ Ita Hippocrates Aphor. LXXII.
 Sect. IV.: *Quibus urina alba, & perspicua, male præsertim si in*
phreneticis appareant. “ Quem quidem explicans Galenus ait
 „ aquosas urinas, seu albas, & perspicuas magnam cruditatem
 „ ostendere & prætereà flavæ bilis totum impetum fursum in
 „ caput factum fuisse . . . melius est, *addit*, ut sicuti totus
 „ morbus est biliosus, sic & urinae appareant biliosæ “ Adjicit
 „ pessimam prognosim, „ Nullum vidi phreneticum, in quo
 „ talis urina apparuisset, salvatum. „ At verò Galenus non so-
 lum ex tenuibus, & aqueis urinis in biliosis acutis febribus su-
 bitò redditis malè futuræ biliosæ phrenitidis perniciem denun-
 ciat, sed insuper ex saturatoribus, crassioribusque, si diutius
 cum

cum aliis quibusdam symptomatibus perstiterint. Ita in *spur. de Dynamid.* fol. 34. hæc habet. “ Urina rubra, & spissa si fuerit
 „ egesta frequentius, & si dolor capitis, & scapularum affue-
 „ rit, & auditum pariter obtusum habuerit, & hypochondrio-
 „ rum dolorem senserit, futuram Phrenitim denunciat: Quod
 „ si infra septem dies soluta fuerit, ictericum facit: Et si non
 „ fuerit soluta, & in macronoxiam venerit, & nebulae non
 „ bonae in eadem fuerint, ex eadem phrenitide morietur. „
 Similes futurae phrenitidis praedictiones in acutis febribus ex
 urinis tenuibus, decoloribus, & paucis; aut antea crassis, &
 rubris, mox tenuibus, sed nunquam subsidentibus, & saepe hoc
 pacto mutatis, aliisque indiciis erui poterunt ex historiis Hip-
 pocratis Phrenitide denatorum; videlicet ex *Ægrot. XV. &
 XVI.*, atque *Ægrot. II. Lib. III. Morbor. Vulgar. Sect. VII.*
 ex Foessio, aliisque. Ita ex his omnibus sequentia veluti in sum-
 mam colligit Baglivus in *lib. I. Prax. Med. de Phrenitide.* “ Fe-
 „ bres ardentes semper habent urinas tenues, & coloratas; hinc
 „ si tales urinae fiant albidiores, tenuioresque, & adsint vigiliae,
 „ oculorum perturbatio, lingua balbutiens &c. prognosticare
 „ poteris brevi futurum delirium. Urinae subjugales, idest crasse,
 „ & turbidae in acutis morbis, ferè semper morbos capitis post
 „ se trahunt: Ideò si apparentibus illis vigiliae saeviant, dolo-
 „ res capitis, linguae aridae, & ardores viscerum, prognosti-
 „ cato brevi delirium.

I X. In biliosa Phrenitide stillatio è naribus perniciofa *Præsentis*
 est, tum aliàs, tum si quarto coeperit die, ut ait Hipp. lib. *Phrenitidis*
Prorrhet. Nam neque id stillat, quod stillandum esset, nempe *Prognosis.*
 biliosus latex; tum nimiam vasorum plenitudinem, & pressio-
 nem subesse, tum nullam moliri naturam delinquentis humo-
 ris coctionem, aut coctionis principium indicatoriâ illâ diè di-
 gnoscitur. Phrenitide qui intereant elicimus ab Hippocrate lib. I.
de morbis in fine. “ Ex Phrenitide ita perit. In hoc morbo
 „ perpetuo delirio urgentur, cum nimium sanguis corruptus,
 „ & extra solitam agitationem motus sit, cumque desipiant,
 neque

„ neque quicquam effatu dignum eorum quæ offeruntur susci-
 „ piunt. Procedente verò tempore marcescunt, & consumun-
 „ tur, tum à febre, tum quòd nihil nutriantur. Ac primùm
 „ quidem extremæ partes imminuuntur, & perfrigerantur; Dein-
 „ de etiam proximè, „ Signa ulterius lethalis Phrenitidis col-
 „ ligantur ex Historia *Dealcis uxoris*, quæ est XV. Lib. III.
Morbor. Vulgar.

Curatio bi-
 liosa Phre-
 nitidis, ab
 Hippocrati-
 cis præcipuè
 Oraculis eli-
 cita.

X. In biliosæ Phrenitidis curatione non immorabimur;
 Cùm hic ab effera bile symptomaticus morbus eam quoad Phle-
 botomiam, purgationem, atque humectantia, & attemperan-
 tia remedia administrationem depostulet, quam quidem variis
 morbificæ bilis conditionibus, atque errorum motuumque gra-
 dibus accommodari per plurima hujus Historiæ loca retulimus.
 Quædam solùm circa singulas memoratas Præsidiorum Classes
 ex Præceptore obiter memorabimus. Et primùm quod sangui-
 nis missionem spectat: Hippocrates lib. de judicationibus af-
 fert. „ Atrâ bile vexatis, & Phrenitide detentis sanguinis pro-
 „ fluvium per ora venarum, quæ in ano sunt, bonum est,
 „ & causam prosperi eventus ab hirudinum admotione ad hæ-
 „ morrhoidales venas in morbis biliosis omnibus, qui inflamma-
 „ toriam Diathesim contrahunt, superiùs in Phlegmonis disqui-
 „ sitione tetigimus. Quò ad purgationem, diluentia, & hume-
 „ ctantia, loquens Cous de phrenitide Lib. III. *de morbis*, hanc
 curationem proponit. „ Hunc tepefacientibus humidis calefa-
 „ cere oportet, ex potionibus, præterquàm vino, & quoad
 „ quidem fieri poterit, per superiora purgare. Alioqui
 „ alvus inferior, ut dejiciat, præparanda, & potionibus hu-
 „ mectanda, quod conducit, „ atque Lib. *de affect.* Hæc circa
 eandem curationem edocet. „ Alvus curanda, eademque reli-
 „ qua ac in morbo laterali, excepto potu, facienda. Potu quo-
 „ vis alio, præter quàm vino utendum, aut acetum, & mel,
 „ & aqua exhibenda. Vinum autem mente offensâ neque in
 „ hoc morbo, neque in quibusvis aliis confert. In hoc autem
 „ morbo Caput multâ calidâ lavare confert. Molliore enim
 reddito

„ reddito corpore, sudor magis oritur, alvusque, & urina ex-
 „ cernitur, ipseque se ipso moderatior evadit. „ Bina ex his
 textibus annotanda sunt: Primum, Hippocratem phrenitidem
 veluti symptomaticum ex bilis metastasi morbum, non veluti
 ex Meningum Cerebri inflammatione idiopathicum hîc adhuc
 manifestè respicere, cùm purgantia, imò & Emetica tam com-
 mendat, & jubeat; Quæ quidem efferæ bilis orgasmis, atque
 excursibus apprimè, unicèque conveniunt, nullimodè verò
 systrophicis inflammationibus, ut patet. Alterum, Hippocra-
 tem vini usum in quolibet morbo, vel inflammatorio, conce-
 dere, præterquàm in delirio quolibet [ut hîc absolutè se ex-
 plicat] atque in dolore Capitis, contra omnium pe-
 nè medentium usum, vivificum hunc nectarem, atque cor-
 dialium remediorum præstantissimum ab omnibus penè morbis
 quâlibet febre stipatis præscribentium. Cùm igitur affert Cous:
Eademque reliqua ac in morbo laterali excepto potu facienda, vini
potus intelligendus est, quem scilicet vel in laterali morbo con-
 cedit. Quod reliquum: Galenus summi hujusmodi medicinæ
 Artificis præceptis insistens, *lib. de Dynamid.* aliisque suis
 omnibus cholagoga purgantia imperat remedia, non so-
 lùm in ictericis passionibus, atque Hepaticis, & pleu-
 riticis biliaribus; sed in Mania, Cephalalgia, Ophthal-
 mia, Erysipelate, Lepra, Tertianis febribus (quos quidem
 plerumquè morbos à variè delinquente bile habere originem
 accuratiores noverunt Antiqui) atque præcipuè in Phreniti-
 cis. Ita in delirio si superveniat alvi fluxus, præsertim morbo
 ad coctionem tendente, ægri facillè evadunt. De calamitosi-
 in Phrenitide vesicantium effectibus vide plura satis laudabilia
 in Baglivii peculiari loco *de Phrenitide*, atque in ejusdem Tra-
 ctatu *usus, & abusus vesicantium*. Reverà nos superiùs hocce
 remedii genus à calidis bilis affectibus omninò proscripsimus.

A P P E N D I X

*De Bilioso Capitis dolore, seu Cephalalgia,
Cephalæa, & Hemicrania Biliosis;
De Biliosa insuper vertigine; & tandem
De Mania, quæ à Bile est,*

Canones Practici.

*Doloris Ca-
pitis ex bile
Ætiologia
in genere, si-
gna, successio-
nes, Progno-
sis, & cura-
tio.
Ætiologia*

Signa

I. **H** Ippocrates Lib. *de diebus judicat.* causam, & modum explicat biliosi doloris Capitis, quem inter acutos morbos reponit. "At verò acuti morbi ex bile oriuntur, cum hæc ad jecur confluerit, & ad Caput pervenerit. Sic verò afficitur, jecur intumescit, & propter humorem ad transversum septum expanditur, statimque ad Caput, præcipuè verò ad tempora dolor ingruit, neque auribus acutè audit, sæpè verò oculis non videt, horrorque, & febris invadit. Hæc igitur per morbi initia ei contingunt, & quandoque valdè quidem, quandoque etiam minùs Intermittunt, quòque magis morbi tempus processerit, eò corporis dolor major est, oculorum pupillæ dissipantur, eorumque acies hebescit, sique digitum ad oculos admoveris, non percipiet, eò quòd non videat. Istud autem quòd non videat hinc cognosces, quòd admoto digito non nictatur, & floccos ex vestibulis stragulis detrahitis, si quos videat, pediculos esse ratus. " Quæ quidem repetit Senex lib. *de internis affect.* sub nomine *Crassi morbi.* Tum biliaris hujusmodi in Capite doloris signa adhuc diligentiora porrigit Lib. II. *de morbis.* " Si cerebrum bilis vexet, febris lenis, & rigor detinet, dolorque toto Capite, præcipuè verò ad tempora, sinciput, & oculorum regiones, supercilia suspendi videntur, & ad aures dolor

„ lor pervadit , quandoque per nares bilis effluit , oculi cali-
 „ gant , & plerisque quidam ad dimidiam corporis partem do-
 „ lor pervenit, toto etiam capite oritur. “ Addit Galenus II. *de*
Compos. Pharm. S. L. Cap. I. “ Signa in his similia sunt eis, quæ
 „ ex ardore oboriuntur ; accedit his major morsus, & faciei
 „ pallor , & aliquando oris amaritudo. Ætati autem vigoris,
 „ & temperaturis calidioribus , & vitæ curiosæ , & iis , qui fla-
 „ vam bilem congregant hæc affectio præcipuè solet contin-
 „ gere „ In Coacis verò quosdam memorat Senex à biliosa
 comatosa febre capitis dolores , qui in gravissimas tandem pa-
 „ rotides desinunt: febricula cum Comate , & Capitis dolore
 „ mortifera. Viscida biliosa ad aurium magis abscessus prom-
 „ pta sunt „ Quibus quidem hocce Commentum adjicit ac-
 curatissimus Durerus “ Parotidas illas hæc Theoremata docent
 „ à bilioso viscido humore advenire , potius quàm à pituitoso,
 „ vel melancholico : significari autem febricula cum commate,
 „ & Cephalalgia conjuncta. De humore quidem bilioso intel-
 „ lectum est antè , incalescendo glutinosum fieri : Inclinatorum
 „ præterea esse in parotidas , ex Galen. ad progn. 34. lib. 2. „
 In iis autem biliosis Capitis doloribus cum acuta viscerum, at-
 que hepatis præcipuè, affectione , & delirio interdum succe-
 dente , gravissimam prognosim instituere pergit Hippocrates:
 „ Quibus itaque à primo protinus die dolor supervenerit , iis
 „ quarto , & quinto die ingravescit , mox in septimo liberan-
 „ tur : Sunt non pauci qui in tertio die dolere incipiunt, quin-
 „ to maximè molestantur , deinde nono , vel undecimo tuti
 „ evadunt. Sed quos dolor quinto die vexare cœperit , reliqua
 „ ex proportionem respondeant , iis ad quartum decimum mor-
 „ bus judicatur. Hæc tum viris , tum mulieribus , sed in ter-
 „ tianis maximè contingere solent. Junioribus verò cum iis
 „ ipsis , tum præcipuè in Continuis febribus , atque Tertianis
 sinceris „ Quam quidem postremam particulam explicat in
 Commentariis Galenus ex biliosissima in his hominibus , atque
 in his febribus constitutione. *Lib. de intern. affect.* alia adhuc

Successiones.

Prognosis.

hujus morbi prognosis obversatur “ Multis verò ubi jam quie-
 „ verit hic morbus rursus revertitur; quod ubi contigerit, pe-
 „ riculum est, ne æger consumptus pereat. Judicatur autem
 „ morbus septem diebus lethalis sit nec ne, quos si effugerit
 „ ferè non moritur, sed in multis curatus decedit., De do-
 „ lore Capitis bilioso in febribus non acutis asserit Cousin *Pro-*
gnost. verba faciens de spontanea bilis vomitione, eveniente ra-
 „ tione judicationis “ Si quis per febrem non exitiosam dixerit

Curatio.

„ caput dolere . . biliosa vomitio aderit „ Denique Curatio
 hujus affectus si simplex sit, & sine acuta febre, ab eodem
 Hippocrate in memoratis locis instituitur per longas sorbitio-
 nes, & aquæ potus quoad morbus judicatus fuerit; Per refri-
 gerantia capiti admota, & per instillationem succi apii in na-
 res, ubi dolor, & fluxio quieverit: Per levia cathartica, &
 cibos quàmmaximè alvum subducentes. Adjicit itaque in me-
 morato Textu Lib. II. *de morbis*, ubi de hoc capitis dolore,
 lenis febris comite, sermonem complectitur. “ Ac si propul-
 „ satâ fluxione, & dolore, ad supercilia juxta nasum pondus
 „ quoddam ei incumbere videatur, mucusque crassus sit, &
 „ putridus, fomento ex aceto, aquâ, & origano adhibito,
 „ mox calidâ loto, æris florem, & myrrham ad nares admo-
 „ veto. Hæc ubi feceris plerumquè sanum videbis, morbus au-
 „ tem minimè est lethalis „ Sed Lib. *de intern. affect.* ubi de
 dolore capitis bilioso complicato loquitur, seu cum acuta febre,
 & succedente delirio, postquam usum veratri nigri vel in po-
 tione, vel saltem in clysteribus, tum clysteres ex lacte, aut
 Betæ decoctionibus commendaverit, & crebros haustus ex mel-
 le, aquâ, & aceto, aut ptisanæ; ista subnectit “ Cùm verò ces-
 „ saverit morbus, optimâ victus ratione utatur, sensim ad-
 „ jiciens quæ ventriculus suscipiat, ut non exurantur, neque al-
 „ vi profluvium superveniat. Balneo quotidie utatur, & post
 „ cibos moderatè obambulet; Lac, & serum, si anni tem-
 „ pus ferat, per dies quinque & quadraginta bibat. Quæ
 „ cùm fecerit citissimè sanus evadet. Morbus autem difficilis
 est,

„ est, multâque curâ indiget „ Galenus 2. de composit. Pharmac. S. L. Cap. I. his verbis biliaris hujusmodi Cephalalgiae curationem aperit, „ Itaque Balnea temperata, & unctiones, & „ potus dilutus eis exhibenda sunt, omnisque victus ratio li- „ quidior, & boni succi constituenda. Evacuandus item bilio- „ sus humor per absinthii cremorem, aut per aloën, & per „ ipsam picram antidotum, per se datam, aut modicâ ad- „ ditâ scammoniâ; vel per Catapotia ex aloë confecta., Pec- cantem jam igitur in hac bile, capitis dolorem inducente cras- sitiem, atque tenacitatem ex hac vehementium cathartorum usurpatione videtur Galenus recognoscere. Equidem in inve- teratis doloribus capitis sine febre, à limosa, viscidaque bile, aut etiam à lento alio humore quolibet progenitis, mirabile est Catholicum Paracelsi, quod aliquibus sub nomine Pilula- rum Rudii innotescit: Cujus quidem descriptionem, veluti ab aliquibus in secreto habitam, hîc loci proferre non pigebit. R. Colocynthidis 3vj. Agaric. opt., diagridii, ellebori nigri, Turbith aa. 3iv. aloës. unc. i. spec. diarrhod. Abb. unc. 8. Contun- dantur omnia, exceptis speciebus diarrhod. Abb., crasso mo- do, & infundantur ad solem in aq. vitæ opt. per VIII. dies, ita ut aqua vit. super emineat VIII. digitos. Deinde infundan- tur quoque species diarrhod. Abb. in aqua vitæ simili modo per IV. dies: & factâ colaturâ, atque expressione forti utriusque, misceantur illæ colaturæ; & abjectâ fece ponatur liquor, seu infusio in alembico vitreo: & abstractâ per distillationem hu- miditate remanet materia densa instar mellis, ex qua confici poterunt pilulæ, quarum, sæpius devorandarum, dosis erit ad scrup. unum. Cæterum cum hisce expositis doloris capitis cau- sis, signis, successione, prognosi, & curatione, conciliari Dolores Ca- omnes ejusdem affectus species queunt, quæ scilicet nonnisi pitis in spe- per gradus, aut extensionem differunt; seu, Cephalalgia, quod cie. Cephalalgia. quidem nomen accipitur quandoque latè, & in genere pro omni capitis dolore, aliquando strictè pro dolore capitis, qui nec diuturnus est, nec cum magna capitis imbecillitate con- junctus;

Cephalæa

Hemicrania

junctus ; Cephalæa, quæ sumitur pro inveterato, at verò perio-
 dis prædito dolore capitis, ægrè cedente, & pertinaci, à mo-
 dicâ qualibet occasione in vehementes accessiones, invalescen-
 te, multamque capiti imbecillitatem conciliante ; Hemicrania
 tandem, quæ species est doloris capitis, dimidiam circiter ca-
 pitis partem, dexteram, aut sinistram, latera, aut verticem, pup-
 pim, ut dicitur, aut proram, seu occiput, aut frontem dum-
 taxat invadens. En biliosæ cephalææ historiam, quæ est Caroli
 Pisonis Observat. II. Morbor. ab Eluvie serosa Sect. II. Pars I.
 Cap. I. “ Præfectus Basilicis hortis villæ, cui nomen salictarius
 „ Rivus ad primum ab urbe *Nanco* lapidem, anno circiter 1600.
 „ deploravit apud me suam ærumnosam vitam ob pertinacem
 „ insomniam, quam gravis capitis dolor ei annum jam ver-
 „ tentem intulisset ; Qui dolor alioqui tactu exacerbaretur, &
 „ de nocte ingravesceret. Cùm ego Caput contrectassem, ac
 „ stagnantem sub cute humorem deprehendissem, & doloris
 „ præterea acerbitas, pervicaxque insomnia suspicionem alicu-
 „ jus cacoëthias injiceret ; ex adverso autem cum hominis jam
 „ viridi senectâ famam quidem integram, & ab omni inhone-
 „ sti morbi labe alienam prorsus nossem, temperies verò ejus
 „ atrabiliaris, vitæque perpetuæ apricationi exposita ob ocu-
 „ los obversarentur, tùm sanè humorem tumoris illius conti-
 „ nentem causam aqueum illum quidem, sed acri, & bilioso
 „ perfusum esse ichore, qui insomniam, doloremque induce-
 „ ret, sim suspicatus. Nimirum ab iisdem causis, à quibus
 „ in superiori puella, externum caput serosa eluvies opprime-
 „ bat, pungebatque & impetum ejus sursum juvabat plurima
 „ bilis excrementitia sero affusa, & ab hepate præcalido, cui
 „ saturatus rubor in hominis vultu attestabatur, succrescens.
 „ Cùm autem vir bonus omnia remediorum genera frustra se
 „ hætenùs tentasse, eorumque vim perviciâ morbi
 „ elusam esse quiritaretur, jubeo ne desponderet animum, sed
 „ actutum postico occipiti cauterium inuri curaret. Dictum,
 „ factum. Aquâ virore quodam insigni, & bili prassinæ finiti-
 ma

„mâ ubertim per plures dies dimanante acerbam ille, in-
 „quietamque vitam jucundissimâ statim quiete commutavit „
 Hæc igitur Piso : à quo quisque doceri poterit, quo tempore,
 quove bilis ad caput illapsæ, ac veluti per externa integumen-
 ta effusæ, & serpentis, statu, ad eandem derivandam, atq;
 eliminandam præmissis universalibus præsiidiis, hujusmodi aut
 similia artificialia, seu potius morbosa, emissaria inuri, atque
 aperiri queant.

I I. De Hemicranix causis peculiariter loquens Galenus *Hemicrania*
III. de loc. aff. Cap. IX. hæc addit “ Porro ea corpora suapte *biliaris caus-*
 „naturâ idonea sunt ut ipsis caput impleatur, in quibus vapo- *sa.*
 „rosus, calidusque spiritus generatur: aut quibus biliosa ex-
 „crementa cumulantur in ore ventriculi, & dolore mordaci
 „afficiuntur, Reverà Hemicraniam plerumque comitatur car- *Symptomata*
 diognus, seu oris ventriculi morsus; tum tenebricosum quid-
 piam ob oculos obversatur, ob concussionem videlicet ramus-
 culorum quinti, & sexti paris in plexum *Cardia*, sive supe-
 rioris oris ventriculi concurrentium; Quæ sanè concussiones
 ad alias earundem nervearum conjugationum soboles, uberri-
 mè per oculum dispersas propagantur, undè bulbi oculi con-
 cussio, & veluti palpitatio, plus minùs offuscato visu, repe-
 tenda venit. Hinc Hemicranix hujusmodi vel per spontaneam
 acerrimæ bilis vomitionem, vel per Emeticum procuratam, ex-
 templò delentur, ut in praxi videre est. Amicus quidam meus *Casus.*
 strigosus, & pichrocolus ab irâ, aut quocumque acriori, subi-
 toque animi affectu in vehementem hemicraniam ruit, nunc
 dextram, nunc sinistram, cum ventriculi morsu, prostratione
 virium, tenebricoso oculorum affectu, & insigni nausea. Pas-
 sio ad aliquot horas protrahitur; Hinc amarissimè, calidæq;
 bilis copiam non modicam evomit, & statim ab hemicrania
 expeditur. Ab ipso verò excandefacto, efferatoque bilioso suc-
 co oriri in hoc casu hemicraniam patet ex hominibus aliis, qui
 si irâ vexentur, subitâ corripuntur diarrhœâ biliosâ; quæ qui-
 dem si non accedit, accedit febris. Ita qui similes patiuntur
 Hemi-

Hemicranias, seris dumtaxat annis, bile, scilicet per senium defervente, ab hujusmodi habitudine ut plurimum liberantur. Carolus Piso observat. XIII. sui Operis *miorbor. à colluvie seros.* affert, nobilem virgunculam, temperamento calidam, & siccam, subitâ Hemicranîâ ad sinistrum tempus, oculumque, & aurem ejusdem lateris vehementer obstrictam, & laceffitam, succedentibus manuum, & brachiorum torporibus, indéque capitis in postica convulsione, torturâ oris, dentiumque adstrictione, cum resolutione totius corporis; Quæ tamen per haustum ex Medici consilio hydrelæum, redditumque vomitu plurimum biliosum fluidum sibi brevî restituta est.

Vertigo bilialis, seu sympathica ab hepate, aut ventriculo.

III. Galenus pariter III. *de loc. affect.* Cap. VIII. vertiginem, seu scotomiam ab oris ventriculi, aut hypochondriorum consensu cum capite, contractam ex archigene commemorat, signaque idiopathicam ab hujusmodi sympathica affectione interstinguentia pertractat: Nempè in prima aurium sonos adducit, prævios capitis dolores, gravitatesque; Olfactus, vel alterius alicujus sensus indè prodeuntis oblæSIONem:

Ejus signa.

Casus.

In altera verò cordis morsionem, nauseamque. Nec nisi ab excitulante bile has nasci affectiones ubique confirmat. Non ita pridem insignis biliosarum turbarum casus mihi in praxi offerebatur, quas inter biliosam pariter vertiginem recognoscebam. Domina Agnes Castagna, juvenis, carnosa, sanguinea, florida, mense Maio 1723. periodico ventriculi, pulmonis, cordis simulque capitis affectu corripiebatur. Post meridiem dolor ad Epigastrium erumpebat, cum sôda, seu stomachi ardore, jactatione, gravissima spirandi angustia, mox vehementi, & sonora palpitatione, intermittenti pulsu, & quodam nunc lancinanti, nunc solum tensivo dolore capitis, & contumacibus sub noctem vigiliis. In sæviori insultu dolor, & tensio ad usque hypochondria lumbosque protracta, negotium non modicum faceffebant. Nulla febris. Hystericam passionem pluri mi rati sunt. Reverà jam dudum quoque mense accedebat invasio, atque per horas quatuor, aut quinque protrahebatur, forti

forti præcipuè vertigine , (quod ad nostram rem facit) in-
 appetentiâ, ac prostratione virium per aliquot horas præeunti-
 bus. Nunc verò toto quatuor, aut quinque dierum studio con-
 tinua reddebatur, sed manè remissior, vespere veluti in paro-
 xismi formam ingravescens. Cedebat reverà aliquantisper af-
 fectio paregoricis, antispasmodicis, atque etiam anthystericis
 præfidiis; sed mox ferociùs invalescebat. Frequens sed inanis
 excitabatur in accessionis augmento desidendi, aut etiam vo-
 mendi cupiditas cum insigni cardiogmo, nausæ, siti, & ja-
 ctatione: Ut tandem subierit animum, abditam, subdolam-
 que biliarem delinquentiam suspicere. Exhibebam bolum ex
 ℥iij. cathartici passulati, cum 3j. Rhabarbari, & granis tribus
 diagridii. Copiosissimas sedes habuit, quibus insignes ruffæ, ac-
 cerrimæque, simulque crassioris bilis copias foras amandabat.
 Morbus veluti ex incantamento magnâ ægræ, adstantium, meâ-
 que admiratione sublatus. Nil ampliùs morbofi persentiit, sed
 integrè ad hanc usque, quâ hæc scribimus, lucem, abdomi-
 ne, pectore, capite, omnibusque partibus liberrima, convaluit.
 Febris quædam ardens biliosa postremas ejuscemodi affectus *Observatio.*
 invasiones præcesserat; Quæ nempe ad finem Aprilis fuerat
 mulierem egressa, undè tantus fortassè efferatæ bilis appara-
 tus. Quid, si ipsammet Odontalgiam à bile proximè ortam
 vidit, nec non descripsit Greulichius? Hic enim suâ *de Bile*,
 dissertatione art. V. §. XI. Hæc tradit “ Imò verò etiam
 „ Odontalgia mihi nuperrimè in quinquagenaria muliere oc-
 „ currebat, suam bili originem manifestè adscribens. Nam
 „ postquàm Odontalgia per quatuor aut plures septimanas, in-
 „ certâ periodo, recurrisset, tandem insolitis urgentibus se-
 „ cessibus, sed ignotâ causâ, accessit pariter difficilis vomitus
 „ (cum miro faciei pallore, ac pulsus debilitate) toties repe-
 „ tens, donec bis amarissimus humor, ingratus gustui hospes,
 „ rejectus fuerit. Unde dictus dolor deinceps non ampliùs se
 „ protulit. Sic natura intento veluti digito hujus Odontalgix
 „ causam monstrabat. „

IV. Denique Maniam ipsam à bile ortum ducere, manifestum redditur ex Hippocratica hujus morbi disputatione, quam quidem ejusdem ad Democritum Philosophum Epistolis interfertam legimus. In hac præcipuè ista observantur “ Qui ex
 „ pituita insaniunt quieti sunt, neque clamosi, neque tumultuantes (*seu Melancholici*) qui verò ex bile, hi verberant, malefici sunt, neque quiescunt. (*seu Maniaci.*) Et si quidem
 „ continenter insaniant, eæ causæ sunt. Terrores verò, & metus ex transmutatione fiunt, calefacto cerebro à bile in ipsum per venas sanguine plenas irruente. Ubi verò bilis rursus in venas, & corpus disceßit, quiescit. Cùm verò de repente cerebrum à bile calefactum fuerit, sanguine in commemoratis venis ebulliente, horrenda vident insomnia, ac velut evigilato facies incenditur, oculi rubent, mensque aliquid mali agitat. Idque etiam in somno contingit. Ubi verò sanguis rursus in venas sparsus fuerit, quiescit, Porro Hippocrates Democritum in Abdera primùm conveniens, ipsumque in animalium dissectionibus districtum, simulque de *insania* scribentem perspicuens, causamque sciscitatus, ab ipso hæc audiebat verba “ Quidnam verò aliud quàm quid sit, (*scilicet insania*) & quomodo hominibus innascatur, & quānam ratione allevetur? Hæc enim quæ vides animantia hujus certè rei gratiā refeco, minimè Dei opera odio prosequens, sed bilis naturam, & sedem inquirens. Nosti enim quòd hæc ubi redundavit, ut plurimùm hominum insaniæ causa est. In omni quidem naturâ inest, sed in aliis quidem minùs, in aliis verò copiosius. Hujus autem immoderantiâ morbi existunt, velut materia, partim quidem bona, partim verò mala subjecta, Ita affert idem Celsus in Epistola ad Damagetum de rat. propriæ expeditionis in Abderam. Idemque in lib. *de morbo sacro* super biliosâ insaniâ verba faciens prædicta satis confirmat “ Qui ex bile insaniunt, clamosi, maligni, & minimè quieti sunt; semper aliquid intempestivum faciunt, Id pariter pluribus aliis in locis posterorum memoriæ committit.

DE BILIOSO VOMITU;

Et obiter de Ventriculi aestu, ardore, seu Soda, Cardialgia, Singultu, aliisque ejusdem Morbis à Bile productis.

Canones Practici.

I. **V**omitum vel fit à stimulo, alibi quidem quàm in ventriculo, degente, nervorumque laceffitorum consensibus validos in hujus utris motricibus fibris contractionum nisus inducente; Ut qui contingit in capitis percussione, in nephritide, in passione hysterica, epileptica &c. vel à pressione induta ad ventriculum à finitimis, aut etiam non finitimis visceribus; ut vomitus ex variis lienis, hepatis, pancreatis, mesenterii, omenti, aliarumque partium tumoribus; vomitus insuper in graviditate; vel tandem à stimulo, ipsimet ventriculi cavæ insidente: Et hoc pacto vomitus erit, eorum quæ intus ventriculum malè habent, atque molestant à propria ipsius potenti concussione per os exclusio. Causa verò ventriculum vel copiâ, vel etiam, ut dixerunt Antiqui, totâ substantiâ, vel qualitate, vel utrâque, intus molestans, seu in ejus fundo stagnando, aut hærendo, opprimens, vel irritans, indigena accensetur, vel advena. Prima domi, ut dicitur, nata ab eorum præsertim, quæ ingeruntur, qualitate, copiâ, utendi modo, & occasione repetitur. Altera ab aliorum viscerum, vel vicinorum, vel remotorum vitiosis succis, ab his ad stomachum appellentibus æstimanda est. Nos modò ad secundam hanc ab intromissa causa producti vomitus rationem accedemus; Atque insuper inductum à vitiosa bile, in ventriculum affluente, vomitum dumtaxat disquirere annitemur.

*Vomitum
quid sit;
quot ejus
species; &
à quibus
causis.*

Biliofus vomitus vel criticus est, vel symptomaticus, vel intermedius. Et primum de critico vomitu, ejusque conditionibus, in genere.

II. Vomitus igitur à bile in ventriculi Cavum irrumpente, ejusque sensiles tunicas lacescente triplex in genere considerari potest; vel nempe criticus, vel symptomaticus, vel intermedius, aut si mavis, neuter. Criticus seu salubris est, in quo, ut ait Hippocrates, expurgantur *qualia, & sicut decet*; seu qui vi naturæ, hinc tuto levamine vigentis morbi, atque symptomatum, citò, opportunè, sine molestia, atque ad debitam mensuram suscipitur; cujus ideò conditiones omnes videntur sub illo Senis in *Coacis* textu comprehendi: *Vomitus autem multum habet utilitatis, ac securitatis, qui pituitam exhibet acuratè mixtam cum bile; si id quod vomitur, nec valdè sit crassum, nec multum.* Namque per illud: *Qui pituitam exhibet accuratè mixtam cum bile*, ostenditur integritas partis, ut ait Duretus, ubi hi humores miscentur *cum pari conjunctâ virtute caloris nativi, cujus propria est coctio, atque mixtio.* Bilis enim quæ duce naturâ excernitur, minùs flava, quàm fuit, apparere debet; Tum ut notam immixtæ, simulque moderantis, quæ quidem regnat in alvo, pituitæ præseferat, (mera enim excrementa semper sunt, prava, quia non concocta) tum quia, etiam annotante Hippocrate, bilis pepasmo *quodammodo pituescit.* Jam ergo cùm concocta fuerit, *opportunè* ejicietur; Cùmque ab immixta pituita fuerit dilutior reddita, etiam *sine molestia.* Per illud verò: *Id, quod vomitur nec valdè sit crassum, nec multum,* Cæteri vomendi ad sanitatem numeri explentur; seu ut *qualia & sicut decet* vomantur; ut neque scilicet exitus impediatur libertas, neque nimia parti, aut totis viribus molestia inferatur, sive *citò* atque *ad mensuram* sit vomitus. Quippe, ut id quod vomitur valdè crassum esse non debet [sit jam crassities à calore absumentè, sit à componentium particularum inertia] ne nimius, atque diuturnus in vomitu ad discutiendum humorem, verrendum, ejiciendumque labor inducatur; Ita nec *multum* etiam; Quia ventriculi crebra concussio, quâ sæpè, & parùm, aut sæpè, & multum per os rejicitur, multa sibi, & ægio infert incommoda, illinc molestiam, & inflammationem, hinc

hinc verò infirmitatem. Cùm ergo in descripto hocce vomitu omnes adversùs excretam bilem salubritatis conditiones in colore, substantiâ, & mixtione, seu rectâ uno verbo concoctione concurrant, jam adjicit Hippocrates: *Multum habet utilitatis, ac securitatis.* Multum nempè *utilitatis*, quoniam numeris omnibus salubritatis expletis, in fracto penitus morbo reintegrabitur sanitas: Multum verò *securitatis*; Cùm talia in hoc vomitu purgentur, qualia purgari oportet, hinc ipse confert, & ipsum alacriter ferunt agri, ut ait Hippocrates in II. Aphor. Sect. I. & in I. Epidem. par. II., Tum quia demùm hic vomitus omnis expers præsens, aut consequentis molestiæ, celeritatem, opportunitatem, atque moderationem bonæ crisi importat; salutis igitur securitatem ostendit.

III. Ad normam igitur critici vomitus natura symptomatice dignoscetur; qui nempè à morbi maleficio productus, quantumvis ad viscera, aut universum corpus à noxio humore expedienda institutus videatur, tamen aut tardè, aut intempestivè, aut admodum molestè, aut tandem ad indebitam mensuram, vel simul his omnibus deterioribus modis conficitur; Hinc vel morbum adauget, vel ejusdem pravitatem significat. Intermedius verò critico, atque symptomatice biliaris vomitus est, qui à natura, aut à morbo, aut à medico auxilio excitatus, morbum imperfectè sublevat, aut in eadem, ac priùs inerat, conditione relinquit, aut secundùm circumstantias varias nunc criticus, nunc symptomatice evadere potest.

De symptomatico, atq; intermedio vomitu, in genere.

I V. Ut verò horum omnium bilis vomituum critico-rum, symptomatice, atque neutrorum exemplum aliquod in genere afferamus: Biliosa vomitio perfectè erit salutaris, seu critica, quæ in biliosis febribus cum memoratis conditionibus superveniat, atque præcipuè signis ad tempus, & speciem criseos accommodatis indicata, febris finem adferat; eoque magis si non solum febris naturæ, sed & tempestati, & regioni, & ægrotantis ætati, & temperamento, & consue-

Critici biliaris vomitus conditiones in specie, atque ejusdem præsentia ex Hippocrate.

tudini parem se præbeat ; juxta illud Hippocratis , de perturbationibus ventris , & vomitibus in II. Aphor. Sect. I. loquentis : *Inspicere itaque oportet & regionem , & tempus , ætatem , & morbos , in quibus convenient , aut non.* Atque in IV. Aphor. Sect. IV. *purgare æstate quidem superiorem alvum , hyeme inferiorem :* Atque in V I. Aphor. ejusdem Sect. *Graciles , & facile vomentes purgare superius , caventes hyemem.* Hujus naturæ biliosam per vomitum crism indigitare videtur Hippocrates Lib. *Prænot.* versus finem “ Si quis in febris lethali dixerit caput dolere ,
 „ aut tenebricosum quiddam ante oculos obversari , si etiam
 „ oris ventriculi morsus accesserit , biliosa vomitio aderit.
 „ Quod si quoque rigor subortus fuerit , & inferiores præcor-
 „ diorum partes frigidas habuerit , adhuc citius vomitio ade-
 „ rit. Si verò sub id tempus biberit quidpiam , aut ediderit , id
 „ quàm celerrimè evomitur. Inter hos autem , quibus primo
 „ die dolor cœpit , ii quarto , & quinto die potissimùm affli-
 „ guntur , & septimo liberantur. Quin etiam eorum plerique
 „ tertio die dolore vexari incipiunt , conflictantur autem maxi-
 „ mè quinto , verùm nono , aut undecimo periculo defun-
 „ guntur. Qui verò quinto die dolore affligi cœperint , & reli-
 „ qua pro ratione prioribus respondeant , ad decimum quar-
 „ tum diem judicatur morbus. Ita autem viris quidem , &
 „ mulieribus , in tertianis præcipuè contingunt. Junioribus
 „ verò , cùm in iis ipsis , tùm etiam magis in febribus per-
 „ assiduis , & legitimis tertianis. At quibus per hujusmodi
 „ febrem caput dolet , & pro tenebris ante oculos apparen-
 „ tibus visus hebetudo contingit , vibrantesque splendores
 „ obversari videntur , & pro oris ventriculi morsu , in præ-
 „ cordiis dextrâ , aut sinistrâ parte contentio quædam , neque
 „ cum dolore , neque cum inflammatione suboritur , iis pro
 „ vomitu sanguinem è naribus profluxurum expectandum est.
 „ Potius tamen & eo casu in juvenibus sanguinis fluxum ex-
 „ pectato. Iis verò , qui trigesimum annum attingunt , &
 „ senio-

„ senioribus minùs ; sed in his vomitiones expectabis. „ Et
 fanè in hoc nobilissimo , utilissimoque textu , quem idèò to-
 tum hîc referri curavimus , non solùm eruitur ratio optimè cri-
 seos biliaris per vomitum , & febrium , & hominum , quibus
 ista par sit , sed futuræ insuper ejusdem panduntur signa, hæc-
 que à signis critici per nares futuri sanguinis floris discrimi-
 nantur. Quod reliquum : Hippocrates alicubi futuræ hujusmo-
 di criseos signum esse quandam salivationem , attulit : *Qui vo-*
mituri sunt priùs illi salivant. alibi : Internum labrum id ipsum in-
dicat haudquaquam quiescens , sed quodammodo intremiscens : Pro-
 pterea quòd , ut ait Galenus in Comment. hujus textus “ Si
 „ bilis mordeat internam oris ventriculi tunicam , ita & con-
 „ cuti labrum necesse est, cùm una eademque tunica sit ven-
 „ triculi , & œsophagi , ac gulæ , pharingis , & oris caveas,
 „ linguam , & palatum investiens , succrescente autem rigo-
 re , major ex Hippocrate evadet bilis vomitio : Cùm soleat
 rigor concutiens magna ex parte , ut ait Galenus , bilis effi-
 cere vomitionem : Quod reverà in intermittentium febrium in-
 gressu pluries observamus. Vomitus biliarem criticum in affe-
 ctione colica affert Greulichius *dissert. de bile* “ Non aliunde
 „ gravius aliud in humano genere venenum generari puto ,
 „ quàm ex felle corrupto. Cujus rei argumentum nuperrimè
 „ in colico habui. Hic cœpit inopinatò dejicere , & vom-
 „ turire cum frigido manuum sudore , pulsuque tali , ut de
 „ veneno assumpto mihi primitùs obvenerit suspicio. Postquàm
 „ verò sponte bilem flavam , crassamque vomitu rejecisset,
 „ meliùs habere cœpit.,

V. Symptomaticus igitur ex adverbo recensendus erit bi-
 lis vomitus , qui tempore , qualitate , modo , aut copiâ pec-
 cabit. Equidem ratione *temporis* malus erit biliosus vomitus,
 qui in principio morborum , nullâ adhuc initâ coctione con-
 tinget , qui nempè vel bilis orgasmum , vel enormem copiam,
 vel insignem irritationem cum ullo vix levamine dumtaxat
 ostendet. *Qualitate* erit symptomaticus , si bilis vitellina , aut
 ærugi-

Symptomatici biliaris vomitus conditiones in specie , seu species omnes accensentur.

æruginea, aut porracea, livida, aut atra ej'cietur; juxta illud Hippocratis in Coac. *Vomitum autem porraceum nigrum, ac lividum quoque pestiferum; citissimam verò mortem denunciat lividum, & fædi odoris.* Aut simul hæ omnes bilis species immixtæ evomantur, etiam juxta illud Magistri, quod sequitur: *Sin autem colores omnes idem vomendo exhibeat, valdè id quidem pestiferum.* si insuper bilis, quæ excernitur, nimium sit crassa, juxta superius adducta. *Modo delinquet biliaris vomitus, si sincera vomatur bilis, juxta illud Hipp. in Coac. sed ea, quæ vomuntur meraciora; Pejora si vomitus difficilis sit, aut plerumque irritus.* Ita affert Senex in Coac: *Lethalem esse rubrum vomitum, maximèque si agrè vomatur: & rursus ibidem: Qui cum fastidio sine nausea exacerbantur; malo sunt loco; tum lacescit nausea sine vomitu.* Si vomitus exigui sint, vel crebri, & pauci; Juxta illa ejusdem Senis præcepta: *Exigui vomitus biliosi, malè habent egrotos: idque cum aliàs, tum si vigilias agitaverint; annotando quoad vigilias [nam quoad exiguitatem vomitus aliqua inferius adjiciemus]* Duretus in Commentario " Ut enim vigiliæ gignunt bilem; sic illæ rursus à bile gignuntur. Ac symptomatici vomitus biliosi, & febris, mutua conspiratio est in utriusque causam, & incrementum „ Qui crebrò, & parcè biliosi sunt vomitus meri; malè habent egrotos: idque cum aliàs; Tum in multa dejectione, & in prægandi lumborum dolore. Si à vomitu fastidia relinquuntur, aut alia symptomata bilis raptum ad caput, aut alias partes minitantiæ: Ita Cous ibidem: *Quibus à vomitu fastidia sunt, vox clangosa, oculi pulverulenti; furor venit: Ut etiam nuptæ Ermosygi, quæ ab insania voce capta interiit.* Præcipuè verò si succedat singultus, aut convulsio annotante Sene: *In meris vomitibus mortiferè habet singultus: Mortiferè item convulsio. Similiter & in purgationum excessu, quem inferunt pharmaciæ; Aut si in delirante & sitibundo accedat vomitio, post quam mens non amplius sitim percipiat, juxta illud Hipp. In vomitu sitibundum, sitis expertem fieri, malum;*

Aut

Aut in non delirante vomitus sitim relinquat ; Etiam ex illo Hipp. ibidem : *Tum qui subinde revomunt sitibundi ; malo sunt loco ;* cui quidem commentatur Duretus “ Est autem causa pe-
 „ rennis vomitus implacabilis , quam sitis excipit inexplibilis ,
 „ undè nulla levatio est viscerum incendio conflagrantium ,
 „ quæ bilem sitiferam cum ardore fundunt in fundum alvi ,
 „ & indè in stomachum ejus ; „ Dicit autem Duretus *sitis in-*
explibilis : Nam sitis à quacunque purgatione producta si non
 permaneat , sed facilè , brevique expleatur , bonæ potiùs pur-
 gationis indicium est : est enim ratum illud Magistri : *Qui pur-*
gantur finem faciunt sui purgandi , postquam sitiaverint. Mali in-
 super sunt vomitus , facilè relabentes , & qui ex flavo mu-
 tantur in nigrum , & qui tremores inducunt. Sic noster Dicta-
 tor eodem loco : *Crebri , cum vomitu , pari modo relapsus ; ni-*
grum cient vomitum circa crism (intellige malam) sunt etiam
tremoriferi. Mali demùm biliares vomitus , quos enormes, diu-
 que protractæ ventriculi contractiones , aut perpetua vomendi
 cupiditas , insignis nausea , frequentes Cardialgiæ , aut animi
 defectus , aut insignes virium prostrationes stipabunt. *Copia*
 verò hi vomitus deficient , si aut nimium pauci , aut supra,
 aut nimium excedentes sint. Ita symptomaticus est bilis vo-
 mitus in cholera morbo , in quo effusissima bilis vomitio vires
 exolvit , & lethalia invehit symptomata. Uberior insuper in
 hypercatharsi biliosus vomitus. Qui certè lethalis est , si su-
 perveniat frigus , & sudor : juxta illud Hipp. *Si redundanti cui-*
vis purgationi frigus adveniat cum sudore ; funestum &c.

Vol. Intermedia , seu neutra vomitio biliosa est , quæ, ad Neutri, seu
intermedii
vomitum quæ
sit conditio;
& quando
ipse contin-
gat.
 exemplum , in principio paroxismi simplicium tertianarum ac-
 cedit. Ex qua quidem nec ullum morbi levamen contingit, nec
 tamen ipse ingravescit ; Hinc neque critica , neque sympto-
 matica dicenda , quæ à sola validiori solidorum expressione pro-
 ducitur. Similis insuper censenda , quæ excitatur à vehemen-
 tiori aliquo animi affectu , aut à subito alicujus objectæ rei fa-
 stidio , aut à nausea, à fœdo corpore , ab inspecto , aut degustato

medicamento &c. aut etiam à nimium extimulante ingesto pharmaco, bilem ipsam hepaticam succutiendo, & pro concitando vomitu usque ad ventriculum exprimendo. Ejusmodi etiam est biliosus vomitus in calculosa nephritide, aut qui in picrocholis contingit, cum ab inedia, cujus illi impatientes sunt, ut aliàs dictum est, bilis in stomachum exundans, eumque proritando, in vomitus concussiones adigit.

*Symptomati-
ci biliosi vo-
mitus exem-
pla ab Hip-
pocrate ex-
penduntur
varia: &
Primum de
hoc bilioso
vomitu in
variis læso-
num capitis,
aut cerebri
classibus.*

V I I. Jamque ad disquisitionis complementum exempla aliquot biliosi symptomatici vomitus ab Hippocrate elicitattingere, leviterque eorum causas delibare, non ingratum fore arbitrabor. Et primum illa, quæ in vulneribus contingunt: *Si cui à vulnere bilis vomitio est, malè est, idque potissimum à Cephalico.* In Aphor. & in Coacis. atque in iis rursus: *Quibus cerebrum vulneratur, iis ut plurimum febris, & bilis vomitio incidit, & corporis apoplexia. Tales autem sunt desperati.* Quippe si fortiter concussi sint à læsione cerebri nervorum caudices, elongati ad omnia viscera eorum rami, susceptas in cerebro vibrationes eisdem impertiuntur; Undè adaucta fiunt solidorum momenta; Quæ quidem in ventriculo excitare vomitum necesse est; In aliis verò partibus vividiores in appellatione liquida collisiones, & impetus; undè febrium, aliorumque succedentium symptomatum repetenda ratio est. Quod si nervorum trunci, nullâ eis inductâ præternaturali succussione, in origine dumtaxat comprimantur, atque à naturalibus occillationibus impediuntur; Apoplexia partium sub cerebro degentium continget; seu quarundam, aut plurimarum corporis partium ex privatione sensus, & motus exolutio; Quam nempe non quidem cerebri, sed partium sub cerebro sitarum apoplexiam declarat Hippocrates Lib. *de morbis*, hujusmodi apoplexiæ nomen paraplegiæ tradendo, quæ quidem non omnium corporis, sed quarundam solum partium resolutio est: Intelligit autem Paraplegiam graviolem, quæ scilicet, sensus, motusque amissione, cerebri apoplexiam imitatur, non leviolem, in qua horumce dumtaxat alteruter

amit-

amittitur. De cætero non à sola cerebri, aut ejus membranarum sæviori, aut profundiori plaga, vel contusione, vel concussione vomitiones inducuntur; sed à quâlibet aliâ vehementi harumce partium ab internis causis offensione, unde fortes etiam nervorum concussiones, aut convulsiones exoriantur. Ita habet Hippocrates II. Epidem. *Phreneticorum convulsio est, tum æruginosa bilis vomitio; Unde quibusdam eorum cita mors venit.* Tum externis solum quibusdam capitis offensis partibus easdem evenire vomitiones author adhuc idem est Lib. de Fractur. *Musculis temporalibus affectis sopor inducitur, & bilis sincera vomitione rejicitur.* Cur verò gravibus capitis læsionibus non solum vomitus, sed biliosus speciatim vomitus superveniat, id Duretus, alique Interpretes explicare conantur ex febre, quæ semper socia est inflammatae partis cujuslibet, quæ principatum habeat in corpore, atque indè ex bile, non solum ab ipsa cerebri, aut membranarum inflammatione, sed ab ipsamet febre continuo, mutuòque progenitâ. Ita frequens legitur eorum adagium, *Bilis, & febris mutua generatio esse solet.* Sed ipse crediderim potius, bilis vomitum in his cerebri affectibus non à majori hujus succi productâ copiâ censendum esse (cùm reverà sæpissimè in his capitis affectibus ante febris, & inflammationis adventum uberes hujusmodi vomitiones erumpant) sed potius ab ingentiori spasmò nervorum intercostalium, paris vagi, nervorumque vertebralium; Ut hinc non solum ventriculus in convulsivam diathesim adigatur, sed ipsummet hepar, eosdem nervos, præcipuè à superiori stomachi orificio ad proprium plexum tendentes, participans, ejusque emissaria, & Cholidochi ductus versùs pylorum violenter retrahantur: Atque per eandem hoc pacto retractionis directionem bilis eructata, & expressa, sursum potius feratur, undè vomitus. Equidem per eundem contractionum consensum in nephritide bilis frequenter evomitur; Quam quidem neque febris, neque inflammatio produxit, aut multiplicavit.

De sympto-
matico bilio-
so vomitu
dysenteria
supervenien-
te: Et quo-
modo hic à
critico, qui
in eodem
morbo non
raro contin-
git, distin-
guendus sit.

VIII. Alius symptomaticus vomitus ex Hippocrate in Coacis: *Intestinorum difficultate laborantibus vomitio biliosa circa initia malo est.* Quia Dysentericis, ut ait Duretus, nulla inde levatio ex hoc vomitu accedit, sed potius graviorum malorum accessio; Quod nullam exhibet speciem causæ criticæ, quæ dolorificum malum foras exeat, sed nuncia sit prave affectionis, quæ intus inclusa est, tum oppressio à pravis humoribus, eorum multitudinis, & symptomaticæ per qualitatem, & tempus ab intestinis ad nobiliorem partem, veluti ventriculus est, exundationis. Nam cum in dysenteria principio nulla adhuc concoctio sit, quamvis delinquentis humoris portionem videatur vomitio excernere, erit tamen, ut ait Hippocrates, *Critica sine crisi*, quarum quidem excretionum ut ipse adjicit, *alia mortifera sunt*, alia verò *sinistra crisis*. Hinc addit Anutius Foësius super hunc textum, in hoc bilis vomitu (præcipuè si, ut ait Duretus, *spumantis*, & *mera sit*) dysenteria principio superveniente omnia ingravescere; *Vexare acutas febres, extremorum perfrictiones contingere, cibi fastidia, vigilias, graveolentes ructus, nauseas, & tenebrosas vertigines: His accedere crebram virium exolutionem, genuum resolutionem, sitim, aestuationem, corporis inquietudinem, pulsus exiles, & debiles, & magnam tormentorum intensiorem, & perseverantiam.* Sed in concocto morbo res alia est: Quippe, ut ex Aphor. XV. Sect. VI. *A longo alvi profluvio habito spontaneus vomitus superveniens morbum solvit*; Ita biliosa vomitio vel sponte, vel præsidio aliquo excitata, dysenteria, non quidem in principio, sed in statu superveniens, cum hæc non quidem oppressio, aut propagationis peccantis succi, fursum deorsumque confluentis, effectus sit, sed potius, aut multam ejus revulsionem, aut insignem evacuationem instituat, eandem solvit, aut notabiliter sublevat. Sed de his inferius cum de biliari dysenteria.

Symptomatici
biliaris
vomitui

IX. *Vomitui parvi, & frequenter repetentes, biliosi, sinceri, mali sunt, in copiosiore ventris subductione & intenso lumborum dolores.*

dolore; in Coac. Hi certè vomitus jam à nobis superiùs indicati, plurimis de titulis symptomatici, & perniciosi accensentur. Quippe mali jam sunt, quòd parcè vomatur, neque id nisi ægrè: Atque nihil paucum sit criticum; ut nihil criticum esse paucum sapiùs Galenus memoriè mandavit. Præcipuè autem si quod vomitur biliosum sit: Juxta illud Coi in Prorrhet. aliis- que locis positum: *Exigua vomitio biliosa malè habet eum, qui vomit.* Quandoquidem hujusmodi excretiones tùm gravem delinquentis biliosi humoris lentorem indicant, tùm ejusdem copiae haudquaquam respondent; Atque in hoc casu, quo *copiosior ventris subductio* peccantium succorum multitudinem ostendit. Mali insuper, cùm crebrò repetant, juxta aliud Hippocratis effatum illud: *Vomitus cum varietate mali, idque cum aliis, tùm si frequentes fiant.* Cùm repetiti frequenter vomitus morbi contumaciam, viscerum, viriumque imbecillitatem, gravio- remque morbose humoris irritationem, ac feritatem ostendant. Mali præterea, cùm sinceri sint, ut suprà: Non enim dumtaxat vomitiones, sed alvinæ dejectiones, hæmorrhagiæ, sputa, aliaque excreta, si sincera sunt, sunt utique & prava; annuen- te Hippocrate, & confirmante experiètiâ. Mali ulteriùs, quod superadditus lumborum dolor enormem bilis morsum, vastio- rem ejusdem exundationem, contumacemque adhærentiam de- clarat, ut hinc *copiosiori per alvum* subductioni non cedat. Hinc subdit huic textui Foësius “ Vomitiones biliosæ, sinceræ, pau- , cæ, & crebræ damnandæ sunt ob magnam bilis, & corru- , ptelæ copiam, quæ etiam suâ acrimoniâ intestina lancinat, & lumborum dolorem facit , Mali igitur tandem, & ut si- gnum, & ut causa: Ut signum; nempe perennis in alvum affluxus efferæ bilis, atque æstus viscerum in quibus hæc gi- gnitur, & commovetur, & insuper infirmitatis ventriculi, at- que impotentiae excludendi, aut nimiae oppressiois, aut exo- lutionis: Et ut causa; cùm diuturni, & repetiti acrium hujus- modi humorum per ventriculum trajectus eundem quaterere ma- gisque labefactare, neque rarò lethaliter inflammare soleant.

quadam alia
speciales con-
ditiones;
quarum ra-
tione ille, &
ut signum, &
ut causa, sit
malus.

Æruginosi
vomitibus,
quando in-
saniam præ-
nunciant; &
Porracei
quando le-
thales abso-
lutè sunt.

X. *Vomitibus virulentis, & æruginosis cum capitis dolore, surditate, & insomniis, promptam insaniam significant.* Prædict. Lib. I., & Coac. Prænot. ex calido, videlicet, & inflammatorio affectu, à perustæ bilis anadrome in capitis partibus inducto, qui inde hepatis, & ventriculi viscera in consensum ducit: Ut ab hujusmodi per vomitum excretionem, quæ quidem deterrimâ qualitate humoris, copiâ, & excernendi modo calamitosa est, vitiosi solum humoris indoles, affectarum partium numerus, earumque affectionis gravitas depromantur; Non autem morbi concoctio, aut naturæ salutaris nîsus. Brevi autem adfuturam insaniam hujusmodi vomitus denunciat; quoniam humorum qualitate acerrimorum, substantiâ tenuium, temperamento calidiorum, sive incendio conflagentium, cita ad vigorem malorum, quæ ipsi faciunt (ut suprà cum de biliosa phrenitide) expeditio esse solet. Ita habetur in Epidemicis morbis Hippocratis: *Philistam, qui cum primo die flava, & pauca, mox æruginosa plurima vomisset, secundo sub meridie è mentis potestate exivisse; cum eo die obsurduisset.* De proventu æruginosæ bilis, ubi scilicet, & undè illa succrescat, tum de symptomatis, quæ illius naturam sequuntur, consuli meretur Galenus ad *Prorrh.* Neque in adducendis symptomatici biliosi vomitus exemplis, quæ apud artis Præceptores innumera obversantur, diutiùs immorabimur. Id solum adjicere liceat, pessimos fore, citòque lethales biliosos illos vomitus, qui longo, & incurabili Hepatis affectui aliquando succrescunt. Ita præ aliis affert Carolus Piso Observat. sui operis LXX: *Memini Cl. Medicum Franciscum Poirotium Phlegmones Erysipelatodis Hepatis decimo tandem mense violentiâ fractum, morte jam instante, evomuisse non sine summis cruciatibus, & intolerabili cardiogmo meracæ bilis porraceæ libras tres, quatuorve, & porro in ejus cadavere hepar scirrhum, atroque virore totum luridum fuisse repertum.* In hac verò observatione illud *Phlegmones Erysipelatodis Hepatis* non quidem est pro systrophica affectione intelligendum, quæ decem menses

vigere

vigere procul dubio non potuisset. Fortè pro fugaci, instabili, sæpiusque recurrente Phlogosi assumendum est; *scirrhus* autem affectu pro primigenio, & principali, tantæque diuturnitatis morbo, reverà perspecto.

XI. Quidpiam modò de bilioso singultu, biliosa cardial-
gia, æstuque ventriculi ab eadem causa, aliisque similibus hu-
jus partis affectibus attingamus. Singultus ex mente Interpre-
tum est concussio molesta, & irrita ventriculi, molestum cor-
pus non excludentis, sed frustrà in excludendì conatu labo-
rantis. Hinc ab antiquis omnibus singultus à noxiâ, tunicis
ventriculi impactâ, vomitus à natante in ejus cavo substantiâ
explicatur. Licet Celsus ab Aphor. LIX. Sect. V. & XVII.
Sect. VII. aliisque Hippocratis locis eductus tunc asserat Lib.
II. Cap. VII. "*Singultum* frequentem, & præter consuetudi-
nem continuum, jecur inflammatum esse significare, inter-
dum tamen non hujus affectus soboles est, sed accerrimæ bilis,
quâ exæstuans Hepar fœtum est, ad ventriculum effusæ, &
propagatæ. Ita Virginem non hystericam, neque Catamenio-
rum expertem, aliquando invisebamus, contumacissimo, &
clamoso, atque ob id terrifico, sine febre, singultu per sex
menses immaniter conflictatam, quam quidem [post innu-
mera à plurimis usurpata remedia] nos tandem curavimus per
validum antimoniale repetitum emeticum, cum uberrima vis-
cidissimæ, simulque admodum ruffe bilis dejectione. Sequentem
observationem legimus ex Platero Lib. I. *Observat.* pag. mihi,
218. "Chirurgus quidam æger factus mox singultire cœpit,
" adeò continuatis vicibus dies, noctesque, ut nec dormire,
" nec rectè loqui, aut cibum capere posset, ad extremum hoc
" pacto debilitatus. Cùm nil juvisset, & jam quasi in agone
" esset, dedimus illi non sine metu, ipso tamen summoperè
" rogante, vomitorium satis validum chymisticum, quod ad
" manus erat. Undè immensam bilis æruginosæ, & nigre co-
" piam evomuit aliquoties, cessavitque singultus, ipseque sen-
" sim convaluit, Cùm verò hepatis inflammationem sectatur
singultus,

Singultus
quid sit, quo-
modo à vo-
mitu distin-
guatur, &
quando ab
inflammati
hepatis pres-
sione in ven-
triculum,
aut à bile
in eundem
effusa ortum
ducatur. Elu-
cidantia
exempla.
Biliosi sin-
gultus signa
& curatio.

singultus, tunc ab enormi prementis molis magnitudine ingeritur, neque hic idcirco cuilibet astat hepaticæ inflammationi, sed prægrandi dumtaxat, ut ab Hippocrate non ut proprium inflammati hujus visceris signum censeatur, sed ut ejusdem insigniter adauctæ molis, quæ quidem in graviore Phlegmone, aut etiam calidiori hepatitide interdum contingit, atque ad valdè premendum, ac veluti strangulatu afficiendum ventriculum producit. Ita Aphor. XVII. Sect. VII. *In hepatis inflammatione singultus malum.* Biliosus igitur propriè singultus, non quidem ut alii, qui à disparibus causis ortum habent, à *cohibita spiratione*, aut *citato sternutamento* finem facit, ut docet cum Platone Hippocrates; sed forti dumtaxat Cathartico, aut etiam Emetico curatur; Quorum quidem alterutro, aut utroque vellicans, & laceffens glutinosa bilis, tunicis, fibrisque ventriculi impacta, dimovetur, verritur, & tandem excluditur. Ad fervidiorem, mordacioremque, simulque tenuiorem bilem (ut in singultu, qui cum biliosis, & præsertim ardentibus febribus accedit) cicurandam, & infringendam apprimè conducere frigida potum admonet in *Dissert. Pathologic.* Antonius Menjotius, Hippocraticis in quocunque bilioso æstu ejusmodi præceptis edoctus. Signa biliosi singultus ex universali bilis dominatu, aut peculiari hepatis vitio petenda sunt.

Cardialgia, sive Cardiogmus, quid sit apud antiquos, & recentiores: A vitiata bile, ut plurimum, istam nasci probatur.

XII. Cardialgia, seu Cardiaca passio, Cardiogmus, & Stomachica exolutio, quæ ex Galeno l. *de Symptom. causis* Cap. VII. est oris ventriculi infestum symptoma, à mordentibus succis proveniens, cum dolore, interdum cum Apnœa, idest penè abolitâ spirandi functione, frequentius cum dyspnœa, seu respiratione difficili, aut saltem gravi, cum virium prostratione, & præcipuè cum speciali animi deliquio, seu cardiaca syncope; Ex Modernis verò: Vehemens ac propè intolerabilis stomachi, seu orificii ventriculi sinistri *Cardia* dicti, præcordiorumque in genere dolor, cum gravissimis quandoque aliis symptomatibus, cordis nimirum palpitatione, animi deliquio, nau-
sœa, vehementiori vomendi conatu, immoderato sudore thoracis
in

in specie , cervicis , capitis , nec non & inordinata febre , quæ si Cardialgiæ symptoma fit , cardiaca à Sylvio denominatur: Hic , inquam , morbus à vitiata bile ut plurimum ortum ducit. Quippe picrocholi homines , calidi , & sicci , gracilesque præ aliis cardialgiæ sunt obnoxii: Qui diuturnâ , crebrâve Cardialgiâ vexantur , hi in icterum plerumque delabuntur. Frequens est Cardialgia in bilem vomiturientibus ; In iis insuper , qui biliosis diarrhœis obnoxii sunt ; Et insuper fervidioribus exquisitis tertianis , & croceas ut plurimum , imò & quandoquæ lateritias urinas mingunt. Ita habet Duretus in Comment. ad Coacas fol. 173. “ Cardiognus , quem facit bilis acerrimæ
 „ morsus , & vellicatio in ore ventriculi , quod stomachum
 „ latinè expressimus. Hoc nempè orificium apud Anatomicos
 „ *Cardia* dicitur „ Imò ipsemet summus medicinæ Magister
 Lib. IV. *de morbis* postquam de ventriculi dolore ex bile cum critico postmodum biliari alvi fluxu , biliarique urina disputasset “ Locus autem , ait , qui est in hepate quicquid illic biliosum inest , ad se trahit. Et si derepentè copiosa bilis extiterit , hepar homini dolet , & copiosa ex ventre gignitur.
 „ Hoc enim si contingit vetus bilis propter multitudinem ad
 „ ventriculum fertur , & inde tormina in ventriculo oriuntur ,
 „ & ipsius pars quædam per vesicam quidem , pars verò per
 „ ventrem foras procedit , sicque paucissima in homine existit , & dolores cessant „ aliquantò post affinem , fortasse & eundem intelligens morbum , hæc subdit “ Quod verò in loco
 „ quidem , qui est in hepate ex cibis , & potionibus sola bilis
 „ secernitur , ita etiam se res habet. Venulæ cum tenues , &
 „ debiles existant , alium humorem crassiorem , & graviorem
 „ attrahere nequeunt , simulque ea non est loci capacitas , ut
 „ ibi alius humor consistat , hicque locus bili naturâ maximè
 „ familiaris est. Proptereaque nullus in eo alius oritur morbus , nisi quem Cardiognum , hoc est cordis morsum vocant „ Biliosæ nos Cardialgiæ exemplum superius attulimus in loco biliaris vertiginis.

Ardor ventriculi à bile originem frequenter nanciscitur: sympathicū capitis dolorem plerumque comitem habet. De nausea, anorexia, anxietate, cordis angustia, aliisque stomachi passionibus.

XIII. Ardorem ventriculi aliqui *Sodam* etiam dicunt, alii verò à *soda* distinguunt; quo nempe nomine dolorem capitis, seu Cephalalgiam significari contendunt. Sed in ventriculi ardore à bile res quidem eodem recidit; Cùm hujusmodi stomachi à laceffente bile affectio non nisi cum symptomatico dolore capitis plerumque accedat. Ardorem ventriculi à bile originem frequenter sortiri satis evincitur; Quòd hic unà cum Cardialgia, choleram morbum ut plurimum comitetur. Vomitus bilis sæpè aut præcedit, aut consecutur æstus ventriculi; à flava nempe bile, (ut ait Galenus Comment. IV. Aphor. Hipp.) in ipsius tunicis ebulliente genitus, qui si cum Cardialgia in febre accidat, mali ominis est juxta Hipp. Aphorismum: *In febris circa ventriculum, & fortis æstus, & cordis morsus malum.* De ardore bilioso ventriculi ponit Etmullerus Colleg. Pract. Sect. VII. Cap. III. "Ii, qui sunt iracundi, aut quibus facile acrior bilis ex duodeno in stomachum regurgitat, obnoxii semper sunt huic affectui propter effervescentiam bilis cum acido stomachi tunc temporis vitiosi, obortam. Ita eodem loco Cap. II. idem affert, quæ ardorem stomachi patiebatur, semper dicere solitam *ibi malum residet*, qui quidem ardor oriebatur à bile effervescente cum acido: excretâ materiâ dicebat: *Malum evanuit.* Curatio Cardialgiæ, & ardoris ventriculi à biliosa causa repeti poterit à dictis superius in Can. XI. Idemque quoad frequentiore causam, & remediorum administrationem de simplici nausea, seu fastidiosa ventriculi proritatione, quæ tandem scretu finitur, de anorexia, seu ciborum fastidio, anxietate, adstrictione stomachi, angustia cordis, & similibus ventriculi morbis, seu potius symptomatibus, intelligendum est.

DE

DE BILIOSA DIARRHOEA,

Canones Practici.

I. **Q**Uamquàm tùm biliosa, tùm cujuslibet alterius humo-
 ris sincera, aut mixta diarrhœa aliorum affectuum
 symptoma frequenter sit, aut saltem succrescens morbus; sæpè
 tamen primigenii affectus videtur naturam induere, quum qui-
 dem ab aliis morbis neque manifestè oritur, neque stipatur;
 ut quæ, qui probè sani videntur, homines improvisè adori-
 tur diarrhœa. Ut ut verò sit, biliosam hîc diarrhœam ample-
 ctimur; Quæ quidem ab aliis omnibus discriminatur, non so-
 lum ab excretorum colore, & habitudine, sed insuper ex co-
 mitante nausea, frequenti Cardialgiâ, interdum singultu, vehe-
 menti siti, anxietate, habitu icterico, ardore viscerum, lanci-
 nanti intestinorum dolore, febre, si adsit, manifestè periodicâ,
 ingenti virium prostratione, aliisque similibus biliosi domina-
 tus argumentis. Cùm verò biliosorum per alvum fluxuum alter
 artificialis sit, seu à purgantibus remediis elicitus; Alter na-
 turalis, ab internâ causâ productus, hîc nos postremum dis-
 quirendum suscipimus.

*Diarrhœa
 in genere
 quando pri-
 migenia
 affectio dici
 possit: Biliosa
 verò diar-
 rhœa quibus
 phenomenis
 à ceteris al-
 vi fluxibus
 distinguatur.
 Duplex ista
 est.*

II. Diarrhœa biliosa naturalis, non secùs ac vomitus su-
 perius descriptus, distinguitur in criticam, symptomaticam, &
 mediam: Critica, ut ut à salutari naturæ conatu manu ducta,
 ob humoris acrimoniam, atque mordacitatem semper est mo-
 lesta, & incommoda. Intereà quæ non ad solam hepatis, &
 intestinalis tubi, sed omnium vasorum corporis repurgationem
 instituitur criticus per alvum biliosus fluxus, Perirrœa etiam
 ab antiquis vocatus est. Sonat enim apud Hippocratem Perir-
 rhœa *circumfluum humorum effluxum*, quo quidem per aliquod
 solemne emissarium seu effluvium, totum corpus superfluis humo-
 ribus repurgatur.

*Diarrhœa
 naturalis
 triplex est,
 critica, sym-
 ptomatica,
 & media.
 Quid sit Peri-
 rirrhœa:*

Diarrhœa
biliaris, cui
bilis orgas-
mus se comi-
tem addit,
quomodo di-
gnoscentia
sit, & quo-
modo reme-
diis exci-
pienda. De
alvi cum
auribus con-
sensu. Criti-
ca biliaris
diarrhœa ab
Hippocrate
descripta.

III. Quemadmodum pluribus in locis (ut inferius vide-
bimus) symptomaticam biliarem diarrhœam commemorat Hip-
pocrates; Ita criticam in secundo versiculo Aphorismi x x v i i i.
Sect. iv. *Quibus biliosa dejectiones, superveniente surditate cessant:
& quibus surditas, supervenientibus biliosis dejectionibus cessat.* Re-
verà in primo hujus Aphorismi versiculo biliosa excretio non
tam bona indicatur, cum in biliari Orgasmo sita sit, ut hinc ejus-
dem ad alvum fluentis succi translatio, & decubitus ad caput,
& aures, seu anadrome discrimine plena contingat. Idcirco
in hoc casu naturæ viribus non integrè fidendum est, sed eâ-
dem horâ purgandum, seu turgescens bilis validius ad inferio-
ra præcipitanda, ne inde evolet in caput. Dignoscetur autem
unà cum biliosa diarrhœa subesse, & bilis orgasmum, si simul
morsus in ventriculo aliquis, (ut ait Galenus iv. Comment. in
I I. Aphor. Hippocratis) & adsit cibi appetentiæ defectus, ac sitis,
ore amarescente, aut quia tertiana febris hominem habeat, aut ex
ardentibus illa, quæ ex amara fit bili. Adde, si multa ventris
sit tensio, multusque dolor, etsi capitis gravedo cum verti-
ginoso quopiam, atque aurium sibilo persentiat. Nam in his
omnibus (ut prosequitur Galenus) Flava bilis abundat: Atque
idcirco conabimur ipsam educere illis medicamentis, quæ cholagoga,
idest, bilis eductiva ab effectu nominantur. Atque hoc est quod ab
Hippocrate dicitur: si qualia oportet purgari purgentur: Confert, &
leviter ferunt. Ceterum subiti hujusmodi ab alvo ad aures con-
sensus rationem aperire nititur Lucas Tozzius in explicatione
hujus Aphorismi: Fiet autem, ut potius aures in his (bilis diar-
rhœa cum ejusdem Orgasmo affectis) ladantur, quàm sensus
alii, à conditione vitiosi humoris acris, & biliosi: Quippe is mul-
tùm respondet Cerumini, quod aurium recrementum est felleum, &
amarum. Ergo membrum illud Aphor. *Quibus biliosa dejectiones,
superveniente surditate cessant* (aut simile aliud in Coac: *In fe-
bribus enata surditas alvum remoratur, & sistit*) Crisim non be-
nè criticam indicat, ideoque remediis emendandam: Aliud
verò: *Et quibus surditas, supervenientibus biliosis dejectionibus cessat*
crisim.

crisim laudabilem indigitat, quæ ideo sibi, seu naturæ operi
linquenda est, cum motus turgentis bilis à nobilioribus ad minus
nobiles partes, seu à capite ad intestina totis, fumisq; naturæ
viribus conducatur. Quod autem in discusso Aphorismo de bile,
in vehementes Orgasmi motus per ardentem febrem concita-
ta, sermonem instituat Hippocrates, manifestè liquet ex alio
ejusdem textu, qui ejusdem Aphorismi veluti Commentarium
videtur: *Quibus in febribus ardentibus aures obsurdesunt, his non
soluta febre necesse est delirare. Solvit autem inter alia sanguinis è
naribus eruptio, aut alvus biliosa.* Tum alius ejusdem locus cri-
ticam alterius morbi non quidem in aure, sed circa aurem, aut
prope aurem vigentis, ex bilioso alvi fluxu solutionem decla-
rat: *Parotides rubrae, & nimium dolorosae, sive sint participes,
sive expertes suppurationis, periculosa; praesertim si alvus non fluat
biliosa.* Atque ad hunc textum alius in lib. I. Sect. II. *Morbor.
Vulgar.* quadrare videtur: *Quibus febre judicatorie desinente tu-
mores ad aures in febribus cum dolore suborti neque conquiescunt,
neque suppurantur, eos biliosum alvi profluvium, ut intestinorum
difficultas, aut quod in urinis crassis subsidet, liberat.*

IV. Sed multò frequentius de symptomatrica biliosa diar-
rhœa mentionem tradit Hippocrates. Ita in I. Proorrh. *In biliosis sincerisque dejectionibus spumosa efflorescentia mala, tum aliàs,
tum ei, qui lumbis antea doluerit, atque hujusmodi dejectiones in-
testina permearint.* Nam præterquamquod sinceræ bilis dejectio
indicare non potest susceptam à naturâ secretionem, quæ qui-
dem ut paulatim celebratur, atque cum longa per intestinum
mora, ita non fit, sine aliqua feri, & intestinalis mucii com-
mixture (veluti superius, cum de vomitu, explicavimus;)
Sed potius ostendit subitam atque præcipitem sine lege exun-
dationem, seu orgasmum, (quod quidem per illud atque hu-
jusmodi dejectiones intestina permearint, intelligere Hippocrates vi-
detur) id accedit, quod *spumosa efflorescentia*, (ut ait in hujus
loci commentario Galenus) *veluti flos supernè incumbens bilis
hujusmodi fervorem non modicum ostendit.* Tum hi lumbis antea
dolent.

*De sympto-
matica bi-
liosa Diar-
rhœa, quum
ejecta bilis
sincera est,
aut valde
spumosa, aut
nimium co-
lorata. Quæ
quidem ha-
bitudines bi-
lis Orgas-
mum redo-
lent.*

dolent, prætereà quòd bilis per intestina penetrans acris sit, & mordax: tali siquidem excremento per intestina deducto, translatoque, non lumbos modò, verùm quoque, & reliquas partes, dolores subsequuntur. Ideò Senex in Coacis effatus jam fuerat: *Spumans dejectio in acutis undequaque biliosa, mala: mala item præalba.* Quem quidem textum idem explicat in II. de morbis “Hu-
 „ jussmodi autem dejectio sinceræ bilis, atque spumantis, alia
 „ quoque habet mala insignia. Nam hypochondriorum ardo-
 „ rem non extinguit, sed magis accendit, tum anxietudinem,
 „ artuumque jactationem infert: Prætereà intestini, & sedis ul-
 „ cerifica est, Nam sicuti spumans bilis spumat ardore visce-
 ris, unde manat; Ita per illud *undequaque biliosa* intelligit Hippocrates bilem flavo, aut viridi colore valdè saturatam, ut annotat Duretus: Sed hoc pacto vitata bilis cùm sincerior est, jamque mala ut suprà; Tùm admodùm exusta est, ut quæ vitellinæ, aut porraceæ naturam participat: Jam ergò invalescentem morbum, & ad exitium conspirantem, aut certè naturæ, & remediis non facilè concessurum designabit. Ulterius Hippocrates per hunc textum in symptomatica diarrhœa, extremas (quæ quidem sunt semper malæ) bilis habitudines proponit: Quippè ut in acutis spumans, & saturata biliaris dejectio mala est; Mala itidem, & *præalba*, quæ scilicet omnis biliosæ tincturæ expers exhibetur. Cùm enim in acutis cùm tenuis satis, & fluida, ingentique motu rapta bilis sit, tum multa insuper, juxta illud Galeni: *In acutis febribus biliosa gigni sincera per corpus nihil est mirum*, Si jam feces bile vacuantur, vel ejusdem humoris ad caput irruptio jam propè est, juxta illud Hipp. *Phreneticis alba dejectio mala est*; Vel symptomaticus icterus imminet, ut aliàs exposuimus. Contingunt quidem interdum præalbæ aliæ dejectiones, quæ imò diarrhœæ hepaticæ, ab aliis Coeliacæ passiones nominari solent; Atque à non traducta ab hepate in intestinum bile, neque ideò cum chymosa substantia immixta nascuntur. Sed hæ plerumquæ acutæ febris comites non sunt.

V. Alia ex Præceptore in Coacis symptomatica biliaris diarrhoea: *Quibus cum biliosa dejectione premitur morsus pectus, amarescitque os, malum.* Accedit nempe ad choleram morbum, cum bilis in hoc statu soluta admodum sit, acrior, atque per indebitas vias exundans, sive à foco suo non solum per intestinum effusa, sed ad usque ventriculum ascendens, ubi morsum, seu Cardiogmum excitat (pectus enim in hoc textu pro cordis scrobiculo ab Hippocrate accipitur, sub quo jacet ventriculus) atque ex ventriculo per interioris tunicae continuitatem amaros, seu proprios halitus, fauces, & linguam inficientes dimittat; neque biliosarum dejectionum benè à naturæ viribus ductarum conditionem assequatur, in quibus (ut suprâ cum de bilioso vomitu,) bilis pituitâ mixta, atque ab eadem temperata, correctaque exigitur; Et præterea crassescens; quippe ex Hippocrate in Coacis: *Crassescere autem decet ad crism.* Itaque, quemadmodum ex Dureti monito, saturata in hoc casu nimium bilis est, atque spumans, quæ sanè non minùs excernendo, quàm stabulando evadit infesta; Ita per rarò accidit, ut pariter, equaliterque sursum, deorsumque natura sponte suâ cursum inflectat, nisi dominatu morbifici humoris, & efferi teneatur.

De symptomatica biliosa diarrhoea, quæ cum gravi ventriculi affectu contingit.

V I. Alia ulteriùs ex Coacis mala biliosa diarrhoea: *Dejectiones crebræ, & paulatim egestæ, subflava, & glutinosa, partim minutula, stercorosa, cum hypochondrii dolore & lateris, ictero asistente, an subsistentibus illis hi exolvuntur?* affert hîc Duretus *Comment. ad Coac.* in hypothese hujus prognoseos theorema contineri alterationis versæ in alienationem, quæ mutatio semel atque apparet, desperationem salutis ostendit. Vt enim malum est, in ictero præalbas dejectiones diù persistere; Ita etiam pejus, *subflava*, seu vix biliosa, *minutula stercorosa*, seu scybala, *crebræ, & paulatim* excerni cum nulla hepaticæ affectionis remissione, imò cum Epigenesi ad alias partes; Vt ad thoracem per illud *cum dolore lateris* indicatur. Simul enim naturæ in fecer-

De symptomatica biliosa diarrhoea, quæ vel pauca est, pallida, & difficilis, tum nimium glutinosa &c. vel multa, & liquidior &c. Tum insuper de aliis excreta bilis conditionibus improbis, aut

probis, va-
riisque ex-
cretionis lo-
cis.

secernendo, atque excernendo infirmitas, noxii humoris re-
bellis visciditas, contumax, & ferè invincibilis morbus, cum
arida intestinorum, atque, ut aiebat Hippocrates, *hectica* in-
temperie, declarantur. Et alia demùm ex eodem Præceptore
in Coac. symptomatice diarrhœa in jecoris diuturno affectu:
Quibus hypochondria tumore assurgunt alvo suppressâ malum:
Malum est etiam maximè, quibus ex inveteratione morbi ta-
bescentibus alvi profusè feruntur. Quoniam, ut ait in *Comment.*
Duretus, ab inveteratione morbi tabifici succedit atonia ven-
triculi, & jecoris; Easque partes multùm effœtas jam tædet
officii sui: Ac tùm in propinquo mors est, cum nigris ex-
crementis fertur alvus. In diarrhœa biliari in genere, bilis
crocea, rubiginis ferri dissolutæ, aut lateris rubri non ab-
similis apparens; Malum. Excreta bilis si tenuis sit, ut ut nec
spumosa, nec sincera, nec nimis acris, aut mordens, morbi
cruditatem denunciat; Cùm bilem concoctam, criticèque edu-
ctam crassescere oportere, superiùs edoceamur. Quæ sub-
ruffa, atque mediocriter crassa est, omnium optima est; quam-
quàm in febribus crocæ, seu sincerioris, sed simul crassescentis
bilis; optima, & salutaris, cathartorum, aut etiam naturæ,
noxii humoris partem vel præproperanter levantis opere, eje-
ctio sit: Fortasse biliosæ symptomaticæ diarrhœæ classibus ad-
jici alia posset, singularis quidem, nec apud Medentium ob-
servationes insolens; Biliosa nempe per muliebres spermaticas
partes profusio, quâ quidem morbosus, & contumax reddi-
tus uterinus fluor, non tantùm vitiatæ, atque ad hæc organa
translatæ bilis colorem, intensâ inductâ flavedine, sed acridi-
nem insuper & mordacitatem, ardore, inflammatione, exco-
riatione, aliisque ad vaginam, pudendum, & urinarios du-
ctus inflictis molestiis, & calamitatibus, præ se ferre solet.
Crocei floris historiam vide *Ephem. Nat. Curios. Ann. III.*
Observat. CXV. Exemplum pariter secretionis biliaris ad mu-
liebrem vulvam translatæ, indeque ejusdem vitellinæ bili innatan-
tis, videre est apud Tulpium *Observat. Medicar. lib. III. cap. xxxi.*

VII. Diar-

VII. Diarrhœa biliosa intermedia, quæ quidem (ut de bilioso ejusdem conditionis vomitu dictum est) neque critica propriè est, neque prorsus symptomatrica, sed secundum circumstantias varias nunc ad ægri levamen, nunc verò ad detrimentum appropinquat, quæ potissimum morbo quidem adhuc crudo, sed cum aliquâ, ut plurimum, ejusdem remissione supervenit, per exemplum aliquod elucidari poterit. Ita mulier illa, quæ non ita pridem ad Portam Padi dolore laterali sinistro usque ad jugulam prehendebatur, cum vomitu, diarrhœa biliosa, facili sputo, flavescenti, bilioso, nonnihil amaro, rem ad usque quartam diem non malè sustulit. Sed cum hac die cessaret diarrhœa cum vomitu, & frigida incautè epotaretur, parum indè, & difficillimè expuebat cum adaucta febre, & dolore. Quintâ intumescerebat ventre; neglectâque emetici à nobis perscripti administratione, dolore, & spirandi angustia enormiter conflictabatur. Ad sextam in delirium incidit cum integra alvi, sputique suppressione: Principio septimæ postremam diem obiit. Biliosa igitur hujusmodi diarrhœa, gliscens inter initia biliosæ pleuritidis, media fuerat inter criticam, & symptomatricam: Non quidem revera critica; cum morbi principio, ejusque in cruditate erumpens, biliosi insuper Orgasmi soboles fuerit: Non verò symptomatrica; quia multam semper à pectore aversionem, ut dicitur, præstabat: Hinc eadem suppressâ, totus ad pulmonem desæviit bilis decubitus, productâque insuper ad cerebrum Epigenesi, præceps lethum inducebatur. Porro intermedia hujusmodi diarrhœa eandem sanè indolem refert, quam universalis sudor in alterius generis pleuritide accedens, qui morbi principio si contingat, indifferens videtur; Qui nempe neque morbum plerumque remittit, neque graviolem reddit: At verò si ad usque maturitatem morbi constanter protrahatur, sæpissimè tandem fit criticus, ipsumque judicat morbum.

VIII. Has itaque à biliari diarrhœa eliciendas curationis indicationes habeto. Si critica, eaque perfecta sit, duce naturâ, Curativa in genere indicationes
Y y y ejusque

*diarrhœa
biliosa, criti-
ca, sympto-
matica, &
media.*

ejusque omnibus intentis viribus, sibi integrè linquenda est, medicaque sedulitas in uno victus gubernando regimine occupanda: Si verò imperfecta, leviori cathartico, ad necessitatem repetito, aut crebris clysterum ablutionibus, moderatisque stimulis adjuvanda, aut acceleranda. In symptomatica biliosa diarrhœa si ejecta bilis sincerior, & saturatior offeratur, simulque tenuis, & spumosa, ut orgasmi habitudinem præseferat, neque excedens dejectio sit, catharsi subducenda est, aut etiam vomitu avertenda; Quod si enormi copiâ, nimioque impetu erumpat, prius pacanda, atque attemperanda est, aut levi clysterum ablutione eluenda, ut in cholera morbo usu venit. Si cum gravi ventriculi morfu contingat; usurpanda sunt anodina, diluentia, & paregorica, intermixtis temperatis cardiacis; Interdum etiam acidis, aut subacidis nonnihil coecenda. Si pauca, & difficilis glutinosæ simulque mordentis bilis dejectio sit, cum hepatis obstructione, contumaci ictero, aut aliis non frigidis comitantibus morbis; fotibus externis, & internis, emollientibus, humectantibus, atq; Epicrasticis utendum: quibus postea præparato humore, poterunt pro epicratica catharsi interponi purgantia. Si bilis profusè fluat post jecoris morbum in tabem migrantem, incrassantibus, alcalicis, atq; analepticis frænanda venit. Ad summam: in biliari symptomatico fluxu bilis Crocea diluenda est, rubiginosa leniter abstergenda; Effera, & mordicans cicuranda, tenuis incrassanda, & cogenda, ut benè necessariis purgantibus obtemperet. Æstus in hujusmodi fluxibus in intestinis, aliisve visceribus concitatus multum infringi solet à rore vitrioli, iteratis digestionibus à vitriolo abstractum, aut à longis convenientium aquarum haustibus, quibus sensibilem aciditatem infusus vitrioli, aut sulphuris spiritus conciliaverit. Media tandem biliosa diarrhœa servanda est, quæ nempè in crism converti aliquando potest; Interdum etiam & validè urgenda; cum nempè aut Orgasmi soboles est, aut decubitus præcavet.

DE BILIOSA DYSENTERIA.

Canones Practici.

I. **N** Eminem procul dubio accuratorem Medentium latet, Dysenteriam esse frequentem alvi ab intestinorum exulceratione p. n. excretionem, biliosam idcirco, strigmentosam, aut purulentam, interdum & aqueam, vel lymphaticam, cum intermixto quidem sanguine, sed in mistura distincto; in primis cum dolore ventris, superveniente tenesmo, virium prostratione, aliisque symptomatibus; plerumque cum febre, interdum & sine febre; ut ideo ratione excretæ substantiæ distinguatur à simplici diarrhœa, ratione doloris ab hæmorrhoidali excretionem, ratione utriusque à fluxu hepatico, aliisque dejectionibus: Ut nobis in præsens curationi potius, ejusdemque specierum singulari diagnosi, & prognosi, quàm diffusiori ætiologiæ disquisitioni vacare impendeat; qui nempe in hac hepaticæ historiæ parte practicos canones, non verò theoreticas meditationes è limine pollicebamur.

I I. Dysenteria in genere alia proximè à bile est, in proprio, seu hepatico foco vitiata; alia verò à sanguine, seu ab ichoribus per intestinales glandulas, aut etiam absque glandularum concursu per intestinalium arteriarum apices ab ipsomet toto sanguine decidentibus. Excludimus à dysenterico censu alvinos sincerè sanguineos fluxus; ut qui in mensium suppressionibus vegetis mulieribus contingunt, aut juvenibus Viris, si hi fortè careant commodis consuetæ per nares, aut alias partes hæmorrhagiæ. Isti enim fluxus, præterquàm sinceri sunt, cum semper salutare, tum plerumque citra intestinorum dolorem obveniunt. Hanc primam dysentericæ divisionem explicat Duretus in *Coacis*, tradens ex Hippocratis mente *Dysenteriam aliam*

Dysenteria quid sit in genere; & quomodo ab aliis alvi excretionibus discriminetur.

Dysenteria in genere alia proximè à bile est, alia verò à sanguine: Prima criticam rationem obtinet, si ab impæcto stimulo, aut morbo hepatis syphilitico non fiat: Sed crisis hujusmodi ali-

quando bona esse hepaticam, aliam alvinam, seu intestinalem. Dysenteria ab est, interdum vitiosa. Loca aliquot Hippocratis bonam ejusmodi crisin declarantia adducuntur.

hepate, seu à bile ortum ducit, cum efferus iste humor, simulque glutinosus pigro lapsu intestinorum anfractus transgreditur, ipsisque, magis, minusve abradendo, exasperandoque, majorem aut minorem inducit molestiam. Consideranda cæterum ut critica videtur, quoties, illæso hepate, à naturali in hoc viscere secretionem, à sanguine vitiatam, noxique humoris sponte procreatur, ut revera frequentius contingit. Non enim critica est, si à stimulo huic visceri impacto, aut systrophica obsidente affectione, per incessabilem irritationem, aut perpetuam in eodem succorum depravationem, ac redundantiam sortiatur originem. Ita criticus non est dysentericus hepaticus fluxus à calculis felleæ cystidi inhabitantibus productus, ut qui indicatur in *Zodiac. Med. Gall. pag. 95.*, neque qui ab hepatis ulcere, aut carcinomate, aut alio quolibet affectu progignitur. Interea critica ejusmodi dysenteria modò bonæ, modò vitiosæ crisis rationem præ se fert. Bona enim crisis putanda est, quum citra gravem intestinorum, aliarumve partium affectum acutis, ad exemplum, biliaribus febribus superveniens, easdem judicat. Ita præcipue Senes per supervenientem dysenteriam ardentibus febribus defungi pluribus in locis testatur Hippocrates; idemque *Epidem. lib. I. Sect. III.* memorat morbos varios per probam judicationem in dysenterias desisse; ut in *Xenophane, & Critia: Additque Aphor. V. Sect. VII. A furore difficultas intestinorum bonum. Libro I. Sect. II. Eorundem morbor. vulgar. hæc habet: Quibus febre judicatorie desinente tumores ad aures in febribus cum dolore suborti neque conquiescunt, neque suppurantur, eos biliosum alvi profluvium, ut intestinorum difficultas, aut quod in urinis crassis subsidet, liberat.* Circumscribit autem bonam hujusmodi dysenteriam ab hepate hoc pacto: *Quæ cietur profuse, & fortiter, nec longa est; non enim ciborum fastidiosi sunt; nec video cur hic vacuationi operam dare oporteat.* Deducit ergo hujusmodi egestionem à forti naturæ contentione pro pleno morbi-

morbifici humoris exitu obtinendo.

III. Vitiosa verò dicenda Crisis est hujusmodi dysenteria, ^{Vitiosa crisis} quum per ipsam præviæ in sanguine, aut aliqua determinata ^{dysenterica} parte affectiones remittunt quidem, at verò non integrè sol- ^{ab hepate,} vuntur; aut novus, longus, & molestus à trajectorum succo- ^{seu bilaris,} rum morfu intestinalis morbus suboritur; Dolor, abrasio, ^{quando sit} excoiatio, acer tenesmus &c. quæ tamen omnia rectâ præsi- ^{dicenda; &} diorum administratione emendari denique possint, & com- ^{qua frequen-} primi. Ita Hyppocrates lib. 1. *epidem.* Sect. III. post descri- ^{ter sympto-} ptam in peculiari quadam Constitutione morborum syndro- ^{mata pro-} mem, vertit se ad criticam quidem, non tamen sat bonam, ^{creet. Textus} bilarem dysenteriam memorandam: *Quidam, perturbatâ alvo,* ^{aliqui Hip-} *biliosa tempestivè excernebant, aut dysenterici fiebant...* ^{pocratici} *servaban-* ^{hujusmodi} *tur autem omnes, quibus hæc contigerunt.* Ostendens siquidem ^{dysenteriam} per postrema verba, atque per illud *perturbatâ alvo* non sine ^{designantes.} molestia, & discrimine hujusmodi accidisse judicationes. Quam ob rem hanc à bile imperfectè criticam dysenteriam nominat Duretus *evacuationem periodicam*; cùmque persæpè acerrimè lædantur intestina, à transmissa bile, præcipuè ab erratis in victus ratione acerbius excandefactâ ut hoc pacto graviores morbi succrescant, *expressionem* etiam *symptomaticam* appellat. Et sanè non infrequenter contingit, quod idem author subdit in Coacis fol. (mihi.) 332. de hac biliosa Dysenteria „Biliosa excrementa à calidioribus alimentis in biliosis „ excitata, spumantia, tum saturata magis quàm decet, ma- „ gisque fervida non extinguunt hypochondriorum ardorem, „ sed multò majorem accendunt, faciuntque ut penè conflagrent incendio. Tum verò jactationem artuum, & intolerabile ægris adferunt fastidium. Præterea in transitu sedem, & intestina exulcerant. Quæ mutatio est diarrhœæ „ in dysenteriam, juxta illud: *Sincera dejectioni dysenteria supervenit* „ sæviores ejuscemodi dysenterias ab acriori, torridiorique reddito bilioso succo ortum trahere ex eo pater, quòd quum ver, æstasque humida plurimùm sunt & nim-

bosa, dilutâ admodum, ac temperatâ bile, pauci hujus generis fluxus erumpunt: ut hoc anno 1723., qui cum ad verum tempus, & æstatis initium extitisset humidissimus, hoc eodem tempore paucas sanè dysenterias peperit. Sed fine æstatis calidissimo reddito, multæ sanè, exque contumaces dysenterie prodierunt. Quum verò à siccis, calidis, squalidisque tempestatibus suboriuntur dysenterie, efferatissimus, qui ab hepate eructatur, sus-deque fluctuans per totam intestinalem fistulam biliosus humor, dira ubique invehit symptomata: non rarò circa initia vomitiones procreat, sevas quidem, & discrimine plenas, juxta illud in Coacis: *Intestinarum difficultate laborantibus vomitio biliosa circa initia, malo est;* „ quod quidem [ut ait Foësius in hujus textus commenta-
 „ rio] indicat ulcus in tenuibus ac superioribus intestinis
 „ ventriculo vicinis, ipsoque ventriculo suspectum facit,
 „ tuncque vexant febres acutæ, extremorum perfrictiones, ci-
 „ bi fastidia, vigiliæ, ructus graveolentes, nausæ, & te-
 „ nebricosæ vertigines. His accedit crebra virium exolutio,
 „ genuum resolutio, sitis, æstuatio, corporis inquietudo,
 „ pulsus exiles, & debiles, ac magna tormentorum inten-
 „ sio ac perseverantia. Quæ omnia annotavit Aretæus. „ In
 his interdum dysenteriis efferæ, atque impensè excandes-
 centis bilis ab hepate, & intestinis ad caput, pro indu-
 cenda insania, transgressio fit, si illæ conditiones affluant,
 quæ ab Hyppocrate in Coacarum loco exhibentur, *Dejectiones dysentericæ, quæ rubris, limosis, cumulatè ducuntur, si cum facie rutila, & saturo rubore suffusa quiescant; insania est in metu.*

Dysenteria
 revera sym-
 ptomatica
 quæ propriè
 sit; quis hu-
 mor in ea-
 dem delin-
 quens; & un-
 de proficis-
 tur.

IV. Sed illa, quæ non ab hepate, ibidemque secretâ bile, sed ab aliis acerrimis succis, proximè à sanguine per vasa, atque emunctoria intestinalia depluentibus, suboritur dysenteria, symptomatice semper est: Quam scilicet non naturalis aliqua, aut naturali proxima secretio à sanguine, sed indebita, & prorsus morbosa solutio, infestaque ejusdem calamit-

calamitosi succi, qui per ipsam effunditur, redundantia procreant. Hanc ideo intestinale dysenteriam à *concitato*, atque *consistenti rheumate*, alibi à *pituita putri*, *salsaque*, alibi insuper à *colliquamentis febrium tabificarum* originem ducere *Durerus* pronunciat. Atque pravum hunc dysentericum, ex toto sanguine deciduum humorem *Galenus III. epidem. part. III.* comparat cum simili alio, pulmones infestante, ac phthificam luem inducente: *Humoris pravi è capite in fauces effluxu quod in pulmonem prolapsus est, affectionem phthificam excitavit; quod verò in ventrem delatum est, deorsum subeundo, cum morsu perturbationem cievit in ipso.* Illa denique hujusmodi dysenteria est, quam *Cæl. Aurelianus intestinorum cum exulceratione rheumatismum* nuncupavit. Quare ex hoc morbi genere facilis progressus est in dysenteriam, castrensem dictam, aut malignam communiter nuncupatam; tum in illam, quam *Prisci* à lividis ejusdem excretionibus atrabilem non minùs nuncuparunt; atque lethalem *Hippocrates in Coacis, & Aphorismis* pronunciat; Qui insuper de gravissima, à pestilenti aëris constitutione, & internecina dysenteria lib. I. *epidemiorum* sermonem instituit.

V. Signa præcipua, utrumque dysenteriae genus dirimentia, quanta ipse à longa praxi edoceri potui, hæc habeto. In dysenteria, per sanguinis in malos succos fusionem, symptomata, febris adest non apertè periodica, sed plerumque habitualis, & lenta, cum corporis consumptione, ad tabem vergente: Pauca aut nulla fitis: Linguae, & totius corporis pallor. Dejecta sanguinolenta quidem sunt, non verò bilaria, nec crassiuscula, nec revera strigmentosa; sed cruda, aquosa, limpida, aut fusco-tenuia, vel etiam livida: Intermixtus sanguis decolor, cæterisque succis intimiùs immixtus. Urinae tenues, crudæ, interdum oleosæ, & colliquativæ: Intestinorum tormina minùs acerba sunt, sed tetrior excretorum foetor. Plurima alia totius vitii sanguinis se produnt indicia; morbique diversi etiam generis alii ut plurimum

Dysenteria critica quomodo à symptomatologica distinguatur.

mum præcesserunt. Tum omni indiscriminatim tempestate hujusmodi dysenteriaë adoriuntur. Quòd si ex adverso à biliari hepatis, perfectè aut imperfectè critico fluxu dysenteria proficiscatur, febris aut in progressu nulla est, superstite tamen majori aut minori calore, atque irregularium æstuationum habitudine; aut fit manifestè periodica, aliquibus interdum rigoribus stipata. Sitis accedit; oris amaror, lingua sicca, & flava; frequens nausea, & cibi fastidium: Consistens corporis habitus, solum magis, minúsve ictericus; aut saltem flavescent facies. Nimia præcessere exercitia, vel animi fervidiora pathemata, vel esculenta, potulentaque bilem accumulantiæ, aut acuentia; plerumque calidior tempestatis intemperies; ut hac de causa hujus classis dysenterias æstas ut plurimum, aut autumnus excipiat. Præcipuè verò excreta propriè biliosa sunt, magis, aut minùs cocta, & strigmentosa: sociatus sanguis ut minùs commistus est, ita rubidior, & rutilantior; & si pus inerit, laudabilius occurrit, magisque concoctum, & consistens. Urinæ crocæ, aut etiam lateritiæ, crassiores, aliàve quâlibet ratione biliosæ. Juvenes, & vegetos, aut etiam senes, si biliosi sint & robusti, hic morbus invadit, aliis plerumque affectionibus neque præcedentibus, neque consequentibus. Cæterum Galenus *lib. vi. De locis affect.* Cap. II. distinguere satagit intestinales dysenterias ab his, quæ ab hepate profluunt „Ab initio, *ait*, tenuis sanies sanguinis ab hepate dejicitur, deinde aucto malo crassus humor, fecibus vini non absimilis: Præterea in hepatis excretionibus nihil abrasum expellitur: atque interdum duorum, aut trium dierum intervallo supprimitur evacuatio, deinde rursus redit malum, atque excernuntur excrementa prioribus multò pejora. Id verò per intestinorum ulcera haudquaquam apparet: Quippe in iis neque affatim, neque ex longis temporum intervallis laborantes dejicere consueverunt „ Interea fluxum nominatim *hepaticum* dictum per hunc

hunc textum duntaxat describit ; qui licet à plurimis *Hepatica dysenteria* nuncupatus sit , neque ipsi nos à tradendo hoc nomine abstinuerimus , toto tamen cœlo à biliosa legitima dysenteria distinguitur , quæ quidem intestinorum dolorifica est , atque insuper ulcerifica.

V I. Ut verò in dysenteria biliosa feritatis gradus nonnihil perpendamus : Calidiori , sicciorique æstate qui biliosi homines calidis cibis , aut potibus , aut fructuum facile fermentantium ingluvie abutuntur , hi biliosis acerrimis dysenteriiis corripi solent. Hinc cum tradat Hippocrates *part. V. & VI. epidem* : “ Quibus ventres nimium calent iis fortia-
 „ vina , & cibi perturbationem adferunt „ Hujusmodi per-
 „ turbationem flavæ bilis esse ab omnibus summi Præceptoris
 Interpretibus satis evincitur. Etenim in hoc casu “ citata bi-
 „ lis flava , effatur omnium hujusmodi Interpretum princeps Du-
 „ retus in *Coacis fol. 345.* , & velut expressa multum saturata
 „ ex hepate , contumaciter adhærescit ad intestinum , quod
 „ abradendo , & exasperando , primum quidem leviter ,
 „ velut epidermide tenus , mox carne tenus & ultra , exul-
 „ cerat. Alvus primum edit cum difficillima egestione bi-
 „ lem spumantem ; Hinc sequitur excretio adnatarum inte-
 „ stinis partium , sive mucosarum , quas Hippocrates lib. II.
 „ *Progn.* vocat *pauca simul* , & *glutinosa* , & *alba* , & *subfla-*
 „ *va* , & *levia* : Indè fit depopulatio partium intestina consti-
 „ tuentium , quæ cernitur in excretionis interioris membra-
 „ næ , cujus ramenta quædam apparent , velut epidermidis
 „ cujusdam abrasæ. Postremò sæviente malo , & firmiter
 „ fixo , & quod deinceps eradicari nequit , erasa excerni-
 „ tur substantia intestinorum solida , cujus adeò magnæ ex-
 „ cretæ sunt particulæ , ut meritò carnes dicantur. Tunc in-
 „ sanabile malum est , quod ejus mala sit redintegratio ; cum
 „ neque coalescere tantum ulcus , neque obduci cicatrice
 „ possit. Ita edictum illud in *Aphor. XXVI. sect. IV.* *A dif-*
 „ *ficultate intestinorum habito si veluti caruncula exeant , lethale*
 „ *est.*”

est „ Hucusque Duretus. Porro bilem , quæ ad usque hunc terribilissimum , funestumque gradum dysenteriam perducit , atram vocabant Antiqui , seu ab impensè perusta flava productam , accerrimamque ideo redditam , erodenti exquisitè morfu pollentem summâque feritate concitatam : Cui ideo convenire videtur Aphor. XXIV. sect. IV. *Dysenteria si ab atra bile incipiat , mortifera est.* Hæc enim à postrema bilis malitia ortum ducens , ad lethum perducit , Cum , *ut citato loco prosequitur Duretus* , „ præ se ferat speciem , & ideam carcinomatis ulcerati , quod cum extrinsecus insanabile est , „ multò magis intrâ , desperationem ostendit sanationis : Tum „ quia nec ulla est redintegratio sperabilis in tam maligno „ ulcere , quod nullum habet fundamentum ; tum quia non „ est medendi commoditas ; tum quia illud carcinoma perpetuo excrementorum appulsu sordescit , & proritur „ Hæc igitur omnia non solum formalem causam biliosæ propriè dysenteriae respiciunt , sed plurimam insuper ejusdem prognosim aperiunt.

Aliqua ulterius ad prognosim intestinalis, & hepaticæ dysenteriae spectantia.

VII. Porro illa prognosis quæ ab Hippocrate libro *de vict. rat. in morb. acut.* adversus dysenteriam proponitur , intestinalem solummodo videtur concernere „ Intestinorum difficultas si cessavit , vel abscessum , vel tumorem aliquem „ pariet , nisi in febres , vel sudores vertatur , & urinæ „ crassæ , albæ , & leves apparuerint , vel in tertianas , vel „ varicem , vel testem , vel crura , vel in coxendices dolor obfirmetur „ Nam *si cessaverit* biliosa dysenteria , delinquentem omnem humorem superasse intestina , atque per alvum fuisse è corpore delapsum tutò conjiciendum est : Cum bilarem hujusmodi fluxum ex parte sanguinis , à quo , atque hepatis , in quo fit secretio , criticum esse , & salutarem superius ostensum sit , ut hoc cessante , nullum alium superesse noxium humorem , qui aliò corrivatus novos alat morbos , putare oporteat ; incommodam verò , aut perniciosam evadere ex fortuita duntaxat ratione intestinalis moræ , seu

ex majori, aut minori intestinorum, quæ trajicit, tunicis herendi habitudine. Quæ igitur ab origine bilares dysenteriae sunt, quò ad mandantem partem tendentes semper ad crisim sunt; licèt interdum, vel ob acriorem eructatæ bilis indolem, vel ob intestinorum imbecillitatem, aut sociatam succorum intestinalium à mala victus ratione depravationem, & cacophragiam, vel tandem ob malè adhibitam curationem, pravæ ex accidenti evadant, diuturnæque intestinorum incendiariæ, hinc summè quandoque perniciosæ, interdum mortiferæ. Non diffiteor tamen, hepaticas non rarò dysenterias contingere, quæ symptomatice suapte naturâ sunt, malignæ, atque plerumque lethales. Sed simul adnoto, ut suprâ, hujusce naturæ dysenterias non esse revera bilares, at purulentas, tabificas, ab ulcere hepatico, post hujus visceris inflammationem, & succedentem abscessum insanabili superstitie procreatas, quarum absolutam prognosim instituit Celsus lib. II. cap. VIII. *ex jecinore si pus cruentum exit mortiferum est.* Ita in denatis ab hoc morbo erosum plerumque hepar, taboque diffuens offendimus. Distinguere autem videtur Hippocrates per Aphor. XXI. sect. IV. persistentes hujusmodi ab hepatis corruptione lethales dysentericas dejectiones, ab his quæ semel, & fortuitò per varias ab assumpto Pharmaco inductas misturas quandoque contingunt: *Dejectiones nigrae, spontè venientes, sive cum febre, sive sine febre, pessima; & quanto colores magis pravi fuerint plures, pejus: Cum medicamento verò melius; & quanto colores plures, non pravi.*

VIII. Maximi præterea in biliari dysenteria momenti est textus ille in Hippocratis Coacis: *Dysenteria, quæ in-tempestivè sistitur, abscessum facit vel in lateribus, atque visceribus, vel in articulis. An biliosa quedam in articulis? Cruentæ autem in lateribus, atque visceribus.* Præcipuè verò in illa, quæ instituto respondet, particulâ *an biliosa quedam in articulis?* Hæc certè suspicio Hippocratis de translatione bilis facileque ab

Facilis consensus dysenteria cum artuum doloribus, ob peccantem bilem facile ab intestinis ad artus translata, facilèque ab

artibus ad
intestina re-
pulsam.

lis ab intestinis ad articulos, quam non nisi gravissimas observationes in obscuro illo quò ad motus sanguinis, aliorumque succorum sæculo, Præceptoris nostro intulisse putandum est, ab accuratissimis clariorum nostrarum ætatum Practicis, bilem circuitu sanguinis ab intestinis ad artus per imperfectas crises propulsam, atque etiam ab iisdem ad intestina denuò per palindromem repulsam persæpe animadvertentibus, etiam, atque etiam confirmata fuit. Hinc tradit Baglivus, *lib. I. Praxeos medicæ*, arcanum quendam, ac inexplicabilem consensum observasse inter morbos ventris, & morbos cutis; dolorem vidisse colicum in arthriticum mutatum, & è contrà arthriticos dolores per supervenientem colicam, aut diarrhœam solutos. Hinc illud Hippocratis in mentem revocat, *Alvi laxitas cutis densitas, cutis raritas alvi densitas*. Atque ideo in praxi observasse testatur, quòd diuturnæ diarrhœæ, irritis præsidiiis aliis, per diaphoretica promptissimè sanari soleant. Idem plures alii scriptores observarunt; quos quidem brevitatis gratiâ omitemus. Consentaneam interea huic rei clarissimi Musgravii observationem, suæ *De Symptomata Arthritide* nobilissimæ dissertationi concessam, superiùs in *Biliose Colicæ* disputatione non reticuius.

In biliaris
dysenteria
curatione
lis multa
medentes
detinet.

IX. Nunc ad biliaris dysentericæ curationem properantes, percipimus è limine, in nulla alia hominis morbosa affectione medicam scholam erga principale hujus curationis instrumentum, seu in præscribendo, aut proscribendo cathartico, tam acriter disputasse, aut adhuc disputare: & veluti de pleuritide fieri vidimus, singuli adversæ doctrinæ scriptores experientiam secum adducere, sibi que Hippocratis, aliorumque seniorum Artis Magistrorum sententiam arrogare conantur. Sed, ut nobis de pleuritidum generibus, & statibus feliciter contigit, potuissent hi omnes optimi viri varia dysentericæ genera, & tempora, quibus varia medendi ratio, & opposita Hippocratis, aliorumque conciliantur præcep-

cepta, interstinguere. Ut igitur in bonam lucem res vergat; Hippocratica illa super hac re diligenter sensa expendamus.

X. Et primum; biliarem in genere dysenteriam, Hippocrates non solum validioribus interdum purgantibus, sed etiam vomitoriis aggredi, atque restinguere non veretur. Ita lib. II. *epidem.* sect. VI. purgans in hoc morbo vehementius non semel tantum, sed etiam bis, terve præproperè propinandum jubet: *A ventris turbatione aut tussi oborto Cancro os amarescit; dandum autem in potu elaterium bis, aut ter.* Per illud *ventris turbationem* Senex ut plurimum dysenteriam significat: Per illam verò particulam *A ventris turbatione oborto Cancro*, ulcera intestinorum *Cacoethe* intelligit: Nam hîc comparat intestinale ulcus in dysenteria cum inveterato in phthisi asperæ arteriæ & pulmonis malignoque ulcere, quod ideo in utroque morbo *cancrosum* denominat; ut perbellè Vallesius ad hunc locum commentatur. Addit *os amarescit*: Quo quidem signo utitur Hippocrates in locis innumeris, ut cacochymiam biliosam exprimat: Quod etiam ibidem optimè animadvertit Vallesius, afferendo, ex hac oris amaritudine significari, non solum redundare bilem in corpore, sed etiam per intestinales partes scatere. Adjicitur *dandum autem in potu elaterium bis, aut ter*: Cujus validissimi purgantis mentioni ista subdit gravissimus Interpres eodem loco „Elaterii Historiam, & vires apud omnes, qui de materia medicinali scripserunt licet legere, utque is succus sit valde purgans. Quem quidem ego aliis omnibus medicamentis expurgantibus ad dysentericos potiore esse non existimo, sed fortè aliis minùs commodum. Verùm antiquus mos est Hippocratis expurgationem præcipere, nominato semper aliquo medicamento, eorum quæ sibi erant familiaria, ut elleboro, elaterio, aut cnico. Perinde ergo tu intellige, ac si diceret, *expurga*. Illud bis, aut ter festinationem continet, quasi diceret, *expurga citò*, ac si opus

*Hippocratis
sententia,
ususque cir-
ca purganti-
um in bilari
dysenteria
administra-
tionem.*

„ sit , repete medicamentum sine mora „ Atque ipse inter
 quamplurimas Hippocratis observationes , quæ in dysenteria
 biliari salutare à purgantibus eventus declarant , ne infinitus
 sim , unicam adducam ex *Epidem.* lib. VII. decerptam , cu-
 jus sensus hic est “ Cratolai filius dysenteriam manifestè biliosâ
 „ correptus , cum febre post primos sex dies non ampliùs ma-
 „ nifestâ , linguâ interim siccâ , siti , nausæâ , calore , & in-
 „ somniis perdurantibus , usque ad quadragesimam in pejus
 „ semper ruebat , corporis robore in extremam colliquatio-
 „ nem , atque impotentiam degenerato , ut surgere ampliùs
 „ non valeret vel alio sublevante. Cùm per duos dies bibis-
 „ set novem circiter heminas atticas lactis asinini excocti,
 „ biliosa purgatio exorta est vehemens , & dolores cessa-
 „ verunt , & ciborum appetentia accessit &c. „ erat autem
 Veteribus familiaris usus hujus lactis ad expurgandam bilem,
 ut affert commentator Vallesius ; nosque alibi persæpe retuli-
 mus. Interea ex his liquet , nullum esse in hoc morbo pro
 instituenda catharsi delectum temporis adhibendum ; sed in
 ea quamcitiùs festinandum. Nam in memorata historia signi-
 ficare velle videtur Hippocrates , ideo *dolores* , *nauseam* cæ-
 teraque symptomata ad usque quadragesimam diem , cum pe-
 joribus semper ægri rebus perdurasse , quòd *biliosa purgatio*
 celebrata non fuerit : Quâ quidem impetratâ , illa omnia
 depellebantur : Hinc fortè medicus non nisi post quadrage-
 simam diem ad illius ægri curationem acciebatur : Quemli-
 bet enim , vel in cathartorum administratione religiosiorem,
 non præterit , longissimo illo morbi curriculo amplum fuisse
 vel sæpiùs purgandi locum.

Hippocratis
 sensus, repro-
 bans in prin-
 cipio bilaris
 dysenteria
 vomitionem;
 qua tamen,
 turgente bi-
 le, seu in

XI. Sed in vomitoriorum usu ad hoc dysenteria genus
 videtur cautiorem se gerere Hippocrates per textum illum
 in Coacis : *Dysentericis vomitio biliosa initio , grave malum.*
 Explicat tamen Duretus , malam in hoc casu vomitionis ra-
 tionem non esse , sed temporis vomitionis : Quippe cùm vo-
 mitio inter ipsa statim morbi initia critica esse non soleat ,
 sed

sed solum ex nimia morbidi humoris redundantia, atque exundatione; Decretoria enim ex eodem Hippocrate tam cito praesto esse non debent: Idcirco praesidium emeticum non quidem in biliaris dysenteriae principio, seu in morbi cruditate, sed quum aliqua elucescit concoctio, eximio cum fructu usurpatur. Verum enim vero, quantumvis nos ad ipsa etiam dysenteriae exordia, vel ab efferi, & morae impatientis humoris pervicacia, vel ab ejus multitudine, aut turgescencia compulsi, in propinandum emeticum festinaremus; non jam malus ille, ab Aphorismo prolatus, expectandus eventus foret: Alia enim censenda est vomitionis conditio, quae ab interna morbifera laceffante causa, oppressa enormiter, atque irritata natura, excitatur, quaeque ideo delinquentis humoris copiam, feritatem, graviorumque inde malorum praesentiam ostendit; alia vero, quae ab artificiali, externoque stimulo, seu propinato remedio cietur; Quaeque procul dubio ad non paucam noxiorum turgentium laticum ejectionem, plurimamque superstitum extenuationem perducere valet. Ita ait Duretus in *Coac.* ad laudati textus commentarium “ est igitur biliosa vomitio circa initia dysenteriae, ejus amplificatio. Secus dicendum de illa vomitione, quam sua sponte natura ciet ad remoram diarrhoeae vetustae. Haec artificium praebet Medico ad imitationem naturae comparandum. Ejus adjumentum in revulsione positum est, quemadmodum praedictae vomitionis biliosae noxa, & calamitas in coëffusione per propagationem materiae, sursum, deorsumque confluentis, ”

orgasmo constituta, etiam in principio valde proficua est.

XII. Quamobrem, ut divinus Senex à spontaneo vomitu, qui crudae adhuc biliosae dysenteriae, seu statim in ejus principio superveniat, mala deducit auspicia, ita praestolatur optima ab eodem maturiori tempore, seu in statu morbi accedente. Quam ob rem non nisi post decem dies à dysenteriae ingressu esse emeticum remedium propinandum praecipit “ Ubi calefacto corpore acrimoniae purgantur, & intestinum

ubi igitur bilis non turgescat, quo tempore in hujusmodi dysenteria per Hippocratis monitum ciendus sit vomitus.

num

„ num raditur , ac exulceratur , cruentaque per alvum de-
 „ mittuntur , hoc dysenteria , hoc est intestinorum difficul-
 „ tas appellatur , tum gravis , tum periculosus morbus. Ve-
 „ rum consilio prospiciendum est, prandiumque detrahendum,
 „ & cænæ tertia pars. Cùm verò dies decem præterierint ,
 „ cibi detracti dimidium apponendum , & vomitus ciendus ,
 „ atque quatuor diebus, cibus sensim offerendus. Ubi verò
 „ alii decem dies advenerint , tum reliquus cibus adjici-
 „ endus , tum vomitus faciendus. Et sensim ad cibum addu-
 „ cendo , intra hoc tempus sanitati restitues , De victus ra-
 „ tione lib. III. aliisque locis. Sub hac igitur conditione lib. De
 morbis ait : Vomitus vehementi alvi profluvio detento succedens ,
 bono est : eamque insuper conditionem aperte exigit Aphor.
 XV. sect. VI. : A longo alvi profluvio habito , spontaneus super-
 veniens vomitus morbum solvit. Ut ideo quæ mala initio judi-
 cata vomitio est , nunc bona , progressu , statuque morbi ,
 seu post longum profluvium adveniens , ab eodem decerna-
 tur : confirmatque laconismo Celsus lib. II. cap. VIII. Lon-
 gas dejectiones supprimit vomitus. Idcirco libro De affect. cura-
 tionem hujus morbi haberi per vomitum repetit Præceptor ;
 & textu insuper illo , quem profert Duretus in comment. ad
 Coacas De dysenteria “ si quem Dysenteria vis occuparit ,
 „ huic toto ventre dolor est , atque tormentum , ac bilem,
 „ pituitam , & sanguinem ipsis permistum egerit: Huic pur-
 „ gato capite pharmacum dato potui , quod pituitam sursum
 „ expurget , Hanc verò pituitæ sursum , seu per vomitum
 expurgationem bili etiam referri censeo ab Hippocrate, qui
 nempe bilem in hoc morbo , ob contractum in intestinis
 lentorem , quodammodo pituitescere ait , ut ibidem idem
 Duretus annotat.

Quæ emetica
 penes moder-
 nos in usu
 sint ad dy-
 senteriam,
 præcipuè bi-

XIII. Hippocraticæ Doctrinæ quotidiana suffragatur ex-
 perientia , quâ nempe per spontaneos vomitus , aut per re-
 media excitatos, dysenterias , in primis biliales , illico , tutó-
 que deleri perspicimus. Ita cultiori hoc sæculo radix hipec-
 cuanhar

euanhæ specificum in dysentericis biliosis fluxibus celebre
 præsidium est, quæ quidem non solum vomitum promo-
 vendo opitulatur, sed non opitulatur si ingesta parum, aut
 nullimodè vomitum promoveat (Hic autem intelligo, reme-
 dium hujusmodi ab excitando vomitu sponte abstinere: Nam
 si per artem illam, Præclariissimo Helvetio tam benè perspe-
 ctam, omnis quidem emetici violentia, non virtus ab hac
 radice tollatur; ut hinc quæ per vomitum revulsionis gratiâ
 excutienda ab eadem fuerant, præcipitata per sedes, ean-
 dem adhuc rationem, cum placidiori tamen motu, majo-
 rique hinc egri commodo retineant, quis inficiabitur, vom-
 itum fuisse quidem suppressum, sed omnem vomitus superesse
 utilitatem? Interea Medentes quamplurimi non tantum hujus-
 modi dysenterias profligant, vomitu per hipecacuanham in-
 ducto, sed per alia insuper vulgariora emetica, ut per ra-
 dicem asari, per vinum ipsum emeticum, aut aquam bene-
 dictam Rul. &c. Dixi radicem hipecacuanhæ biliosis dysente-
 riis directè præsidio esse. En fanè quibus pluries repetitis
 observationibus suffultus hoc mihi in animum firmare valui.
 Hipecacuanha non prodest, cum sincerus cruor per dysente-
 riam excernitur; neque cum alvinus fluxus merè mucosus
 est citra sanguinem, quicumque sit intestinorum dolor, ir-
 ritatio, desidendi difficultas, ardor, & frequentia. Multum
 autem potest in dysentericis excretionibus, mucosis simul &
 ramentoso-sanguineis. Quod si muci hujusmodi dysenterici
 flavi ulteriùs sint, seu manifestè biliosi, impensius proficua
 est, quàm si cum mistura sanguinis simul perlucidi, albi-
 dique sint, seu cum bile non manifestè commixti. Ob hanc
 potiore ad bilis sedandas ametrias hipecacuanhæ potesta-
 tem, eandem calidâ tempestate adhibitam animadvertimus
 valentiorē, quàm frigidiori: Juvat igitur magis æstate,
 quàm hyeme, magisque calidiori æstate, quàm tepidiori.
 Major autem hujusmodi radicis curativa facultas in biliari,
 quàm pituitosa dysenteria (quam ideo postremam debellare

liosam, pro-
 fligandam:
 Propriæque
 Authoris
 circa sele-
 ctius ejusce-
 modi emeti-
 cum obser-
 vationes:

plerumque non valet) primæ , non autem alterius , criticam indolem , atque rationem confirmat. Et fanè quocunque tempore in non biliari dysenteria crassiusculæ , seu aliquomodo subactæ , & concoctæ bilis dejectio superveniat , illico mitescit morbus , atque ad judicationem disponitur: Et plures dysenterię ex turbatissimo statu in salutarem exemplò componuntur , cùm ex pellucido fluxu , mucoque albescente , simulque per partes cruento , in flavescentem crassiore , sanguineis ramentis non minùs immixtum , faciunt.

*Curativa
methodus
in genere dys-
senteria bi-
liosa.*

XIV. Itaque ad purgans , aut emeticum in dysenteria adhibendum , aut rejiciendum , respicienda non est major , aut minor præstita intestinorum turbatio , irritatio , abrasio , excoariatio , aut exulceratio , aut magis , minùsve cruentata dejectio , aut sevirior , mitiorque cruciatus , aut egestio varia , sed unicè causa dysenteriam efficiens : Quippe quòd , si à totius sanguinis labe suam hæc obtineat originem affectio , neque vomendum , neque purgandum , sed alià , inferius memorandâ methodo insistendum est. Quòd si à bile , jam in hepate , ceu suo naturali colo , secreta , atque ab eodem in intestinalem fistulam vel criticè vel quasi criticè effusâ ; purgandum quidem , & vomendum ; sed variis præterea consulantibus circumstantiis consulendum est. Nam si bilis ab hepate in intestinum expressa , ut ut redundans , citra notabile discrimen uberius deturbetur , cur remediis extimulanda , aut fermentanda ? Cur non potius initæ spontaneę eruptioni aliquandiu relinquenda ? Hoc præcipuè de febrili bile , in subitum dysenterię modum ad intestina non infrequenter depositâ intelligendum volo. Sed si turgens dysenterica bilis sit , eadem horâ per catharsim dejicienda. Si autem nimium acris , mordicans , & convellens deprehendatur , ante purgationem clysteribus , fotibus , aliisque similibus cicuranda. Huic usui supra aliud remedium quodlibet mirè confert amygdalinum oleum , aut lini , aut ex melonum seminibus extractum ,

lar-

largéque propinatum ; sæpiusque repetitum ; cujus ideo opera in biliosis diarrhœis efficacissima pariter est. (ut inferiùs ex cl. Guidetti Animadversionibus videri poterit) Fervidior bilis diluentibus , atque etiam refrigerantibus per longas potiones , clysteres , & fots temperanda. Tandem si crassior , viscidiorque extet , incidentibus , deterfivis , seu saponariis præfidiis extenuanda ; sed præcipuè quàm citiùs eliminanda per catharsim , & vomitionem ; quæ quidem præstantissima hujus morbi remedia sunt ; cætera verò adminicula.

XV. Ut verò in his dysenteriis , quæ quidem frequentiores sunt , seu neque acutiores , neque vehementiores , specialis curationis specimen Tironum in normam proponam: Ex quo ad invisendum dysentericum ex bile hominem accitus sum , primùm Phlebotomiæ indicationem (inferiùs attingendam) perpendo , cui quidem , si præsens sit , statim prospicio : Hinc modicum paregoricum ex diascordio , aut philonio romano , cum hyacinthina aut simili confectio-
*Curativa
methodus in
specie dysen-
teria biliosa.*
 ne , aut ex guttis aliquot liquidi laudani cum aqua violarum , aut camæmelina , aut cardiaca aliqua , ad bilis attemperandum morsum , noctu usurpandum præscribo : Huic tamen clysterem præmitto ex lacte , interdum chalybeato , cum vitellis ovorum , & veteri rosarum conserva. Manè catharticam potionem , aut bolum impero ex pulp. tamarind. diaprun. simpl. aut solut. cum rhabarbaro , interdum cum syrupo rosarum solutivo &c. Quod quidem maximi momenti præsidium frequenter , imo alternis quandoque diebus repetere , intermixtis per majorem , aut minorem frequentiam , majoremque , aut minorem dosim , juxta circumstantias varias , paregoricis , in usu habeo. Temperata cardiaca , præcipuè ex testaceis elicita plerumque non omittimus. Quaque die memoratum enema ut plurimùm usurpamus , cui non rarò Theriacæ Andromachi convenientem dosim superaddimus. Si alvi profluvium naturæ vires exsuperet , adhibitâ
 Aaaa 2 suffi-

sufficienti catharsi, ustum indè rhabarbarum purgantibus aliis præferimus; Quem interdum gelatinæ variæ ex c. c. rasurâ eboris, extremitatibus vitulorum &c. comitari solent. Scdò, & rarissimè ad validiora adstringentia confugimus: Namque constanti hâc methodo sublatas brevi dierum intervallo hujusmodi dysenterias perspicimus; quas quidem, si contumaces sint, post decem, aut duodecim dies tutò, citòque per hipecacuanham debellamus. Potum ordinarium constituit decoctio c. c. cum radic. bystort. aut tormentill. aut semin. acetos., interdum cum vitulorum pedibus, quandoque per candentis ferri extinctiones alterata. Tandem in fervidioribus dysenteriis, *sub cane, & ante canem* debacchanribus, illo quem D. Butler memorat apud Sydenhamium, modo, quo *liquoris diluvio submerguntur Dysenteria*, optimo cum eventu quandoque usus sum.

De sanguinis missione in dysenteria.

XVI. In Diarrhœis, aut dysenteriis biliosis non habere locum videtur phlebotomia, nisi hujusmodi excretiones in acutiori febre ita infrugiferè superveniant, ut neque parum morbo crism despondeant; neque idcirco febris ab iisdem mitescat; aut his vigentibus, intestinorum, aliorumque finitimorum viscerum imminens inflammationis discrimen, aut præstita jam inflammatio dignoscatur. Interea in his casibus aut hirudinum applicationem sedalibus venis cum liberali sanguinis detractione, aut dextræ salvatellæ sectionem aliis quibuslibet phlebotomiis lubenter præferrem; nisi universalioris evacuationis urgentius indicans eluceret. Epidemica maligna dysenteria, quæ ab improba aëris constitutione progenita, inflammatorias sanguinis in visceribus stases secum plerumque conducit, neque quidem ex una bile, sed ex omnibus corporis impensè alteratis humoribus ortum obtinet, sæpè Phlebotomiam inter initia depostulat. Ita habet Duretus ad *Coacas* fol. 344., in epidemica illa maligna dysenteria, quæ in hominum vitam invasit *Lutetia Parisiorum* ann. 1578. detractionem sanguinis ex majoribus venis multis ingen-

ingenti auxilio fuisse. Imò tamen si Dysenteria maligna non sit, sed duntaxat epidemica, videtur principio phlebotomiam exigere, ad revellendum quendam humorum impetum, ab ipsa constitutionis communi causa versùs intestina concitatum. Ita Sydenhamius in epidemica quatuor annorum dysenteria, quò primùm arcescebatur, tundendam cubiti venam suadebat. Vide cap. III. sect. IV. *Observat. medic. circa acut. morb. hist. & curat.*

XVII. Verùm alterius generis memorata in disquisitionis limine dysenteria, quæ potius ab universali colliquatione sanguinis, ad intestinalia indè incernicula se manifestante, quam à critica biliaris substantiæ per hepaticam secretionem expurgatione, proficiscitur, neque emeticis, neque catharticis, ut ut levioribus, neque quibuslibet aliis extimulantibus præfidiis tentanda est, ut ipse Hippocrates admonet, sed solis subadstringentibus, & postmodum etiam absolute adstringentibus, traumaticis, balsamicis, edulcorantibus, incrassantibus, interdum & anodinis; iisque demùm remediis omnibus, quæ in liquamine, ac solutione sanguinis, tum in Hæmoptysi, aliisque inveteratis hæmorrhagiis, utilia deprehenduntur. Conveniunt itaque clysteres prædictis facultatibus præditi, præcipuè si per iteratas candentis ferri immersiones, atque extinctiones adstringenti facultate magis adhuc muniantur. Serum caprillum, aut vaccinum vulnerariis, aliisque convenientibus remediis alteratum. Denique lac ipsum cum probo regimine usurpatur. Verum tamen est, in manifesta impurorum succorum, per intestina redundantium colluvie blanda admitti Cathartica, quæ insimul adstringentia sint, simulque intestinorum tonum firmantia; ut Myrobalani, rhabarbarum benè tostum, Rhaponticum &c. Pilulas de cato, post universaliora remedia, non tantùm ad alvinum fluxum, sed insuper ad intestinorum & sanguinis laxiorem stringendam compaginem multum semper in hoc dysenteria genere subvenire comperimus. Cautè, sobrièque

Curativa
methodus
symptomati-
ca dysente-
ria.

in colliquativa , & maligna dysenteria opiata adhibeto. Interea vegetale bezoarticum pluries in hoc morbo bene , faustèque conducens experti sumus.

Curatoria
methodus
in mixta,
ex critica
& sympto-
matica, dy-
senteria.

XVIII. Interdum mixta ex ambabus prolatis causis dysenteria obversatur : Quæ ideo , ut alterutra præpolleat , atque insuper juxta ætatis , sexus , virium , climatis , habitus corporis , atque imprimis tempestatis discrimina , nunc primam , nunc alteram ex descriptis curatoriam methodum , nunc mixtim , nunc interpolatè suscipiendam deponit. Hujusmodi dysenteriarum indoles quemadmodum arduo illo Celsi monito innititur : *Contraria facere , & interquiescere* (quod quidem in obscurioribus morbis prudentissimum consilium est) ita clinicum judicio , simulque experientiâ refer- tum exigit.

Omnes in
genere velu-
ti per epi-
logum modi,
ab Hippo-
crate elicti,
quibus de-
linquentis
bilis oppu-
gnationem
aggredi me-
dentes que-
ant.

XIX. Bina adhuc, eademq; à Præceptore desumpta, monere liceat ad hujus disputationis de bilari dysenteria coronidem; quæ quidem præterea cuilibet alteri curando bilioso morbo accomodari possunt : Alterum quod in peccante, atque effe- ratâ bile conducendâ in genere versatur : Alterum verò , quod in victus regimine pro biliosis hisce morbis situm est. Itaque quò ad primum : Nobilissimus Textus ab Hippocra- te lib. de Prisca Medicina posterorum memoriæ traditur, quem alibi pariter (quæ ejusdem dignitas est) per nostram hanc historiam memorabimus “ Si amarus humor aliquis , quem „ bilem flavam nuncupare solemus , effusus fuerit , quænam „ anxietates , æstus , & impotentia detinent ? Quibus inter- „ dum liberati vel spontaneâ purgatione , vel medicamento, „ si quid horum tempestivè contingat, doloribus planè & ca- „ lore defunguntur. At quandiu ista sublata , incôcta , & „ minimè contemperata fuerint , nullâ arte neque dolores, „ neque febres finientur. Et quibus quidem acuti , acres , „ & æruginosi humores instant , quinam furores , & vis- „ cerum ac thoracis lincinationes , animique abjectio indè „ oriuntur ? Neque prius hæc quiescunt , quàm emaciati , de-
deje-

, dejecti , & aliis permisti fuerint. Multis autem , variisque
 , modis concoqui , permutari , tenuari , & in humorum na-
 , turam crassescere possunt , In hoc quidem textu illi om-
 nes recolliguntur per epilogum modi , quibus Medica Facul-
 tas delinquentis bilis oppugnationem moliri queat. Præci-
 pue verò postremis particulis in hoc loco attendendum est.
 Quippe si vitiosa bilis *spontanea purgatione , vel medicamento*
dejici non possit , diligenter concoquenda , & contemperan-
 da est : Quod quidem opus absolvitur , si quidquid in bile
 hærens est , & crassescens (quæ quidem primaria est in dy-
 senterico affectu aliisque morbis bilis culpa) solvatur , &
 in naturalem fluorem redigatur , seu *humores emacientur* , at-
 que *tenuentur* : Aut quod tenuitatem nimiam induere valuit,
 in crassitudinem revocetur (ut in cholera morbo præstan-
 dum est) seu *in humorum naturam crassescere possit*. Quod si
 tam facilis inducendæ concoctioni locus non sit , Tertium
 superest Hippocraticum præceptum. *Permutare , atque aliis*
humoribus permiscere. Addit enim : *Quiescunt si aliis permix-*
ti fuerint ; atque hujus rationem inferius proponit : *Quæ in*
homine insunt quò pluribus permiscuntur , eò mitiora , & melio-
ra evadunt . . Nihilque in eo existit , quod propriâ facultate præ-
polleat. Ita gravissimum in aliis locis ejusdem monitum est:
Misce , atque inconspicuum redde. Hoc autem miscendi delin-
 quentem bilem , atque inconspicuam reddendi præclarum
 opus in variis febribus , aliisque ab eadem productis morbis
 præcipue Peruviani corticis usu persæpe obtinemus ; ut in Fe-
 brifugi tractatu palàm fiet. Neque supervacaneum inter-
 dum est in biliosa legitima dysenteria , quæ contumaciam
 affectat , atque diutius protrahitur , hujusmodi præsidii
 genus.

XX. Qui verò ad victus rationem in biliosa hujusmodi ,
 aliisque insuper ab eadem causa affectionibus refertur Hip-
 pocratis locus , is quidem à lib. I V. de Morbis elicatur : *Quæ*
eduntur , & bibuntur alia aliorum sunt medicamenta. Ubi
vero

victus ratio
ab Hippo-
crate insti-
tuta in bi-
liosa dysen-
teria, aliis-

que biliaribus morbis.

verò ex his, quæ in ventriculum illabuntur alia bilis corpori accesserit, inde morbus oritur. Quo quidem præcipua biliorum morborum remedia in recto victus regimine sita esse Legislator noster decernit: Præcipitque hoc pacto ne à bilioso homine, & bilis ametriis obnoxio alimenta ingerantur biliosa; seu quæ præviæ, vitiatæque bilis acuendæ intemperiei, aut augendæ copiæ, aut utrique præstando se paria per propriam indolem præbeant. Ita in biliosis morbis cibus in genere quâcunque acrimoniâ, falsedine, & aciditate, In calidis verò, omni in primis pingui, aut aromaticâ habitudine careat, omniſque ad frigidum declinet. In vacatione febris, morboque in chronicum vergente, vescendum est carnibus animalium potiùs sylvestrium, quàm domesticorum, & potiùs volatilium, quàm quadrupedum, ut turturum, perdicum, turdorum, leporum, capreolorum &c. Carnibus verò volucrum ait Hippocrates de vict. rat. lib. III., utatur asis, palumbis quidem, & columbæ elixis, perdicum verò, & gallorum asatis sine condimento. Leporinis verò in aqua coctis, & ferinis omnibus. Utiles sunt ovorum vitelli, quos facilè in bilem faceſſere vana est aliquorum sententia. Præstant juscula hordeacea, avenacea, & similia, lac amigdalaram dulcium cum aqua carnis elicium &c. Quod verò in specie ad victitandi rationem attinet in biliosa dysenteria, cibi illi seligendi sunt, qui glutine quodam, emplasticâ insuper, atque humorum acrimoniam obtundente facultate pollent; quales fiunt ex oryza, amylo, extremitatibus vitulorum, aut vervecum, gelatinis &c. Proficuum insuper interdum vaccinum lac est, si febris absit, & nihil ejus usum prohibeat. Optimum sanè ad hujusmodi dysenteriam remedium diæta in genere tenuior est, non verò biduana Avicennæ Fames. In fervidiori dysenteria biliosa, præcipuè in juvene firmis atq; valentibus visceribus prædito, à copioso frigida potu (veluti in calidis aliis biliosis morbis contingit) multum solaminis impetratur.

HISTORIA BILIOSÆ DYSENTERIÆ

*A Bile viridi è Cysti manante , unde Ilei , &
Coli corruptio.*

„ **E** Rat Fœmina 40. annorum , pinguis , & optimi cor-
 „ poris habitus ; quæ 20. Augusti Dysenterica obiit
 „ Amstelodami : Hæc ante tres septimanas inciderat in flu-
 „ xum dysentericum , qui tum temporis epidemicus erat:
 „ quæ rejiciebat in principio morbi erant nigra , subsequen-
 „ te tempore rubescere incipiebant , aliquâ tamen intermi-
 „ stâ albedine : dolebat ventrem , diverso tamen modo ,
 „ nam vel dolor ad umbilicum hærebat , tuncque deprime-
 „ batur venter : vel si hic attolleretur , cinguli instar circa
 „ umbilicum movebatur : Sitis ipsam urgebat intolerabilis ,
 „ quam quocunque volebat potu sedabat , spiritus vini , &
 „ aquæ vitæ usu nunquam intermisso : Medicamentorum ni-
 „ hil sumere volebat præter decoctum aliquod alterans , &
 „ pillulas de Laudano Amstelodamensium , ex quorum as-
 „ sumptione dolor sedebatur , & somnus , qui aliàs abe-
 „ rat , obrepebat. Cùm dejiceret , sentiebat dolorem circa
 „ anum insignem : Purgata fuit aliquoties tempore morbi ,
 „ partim pulvere Rhabarbari solo , à quo nihil aut parum,
 „ sine levamine movebatur : partim cum rad. Jalappæ mix-
 „ to , à quo multum cum euphoria dejiciebat : Clyster eti-
 „ am injectus est , à quo pessimè habuit , neque etiam ferre
 „ poterat inunctiones , undè postmodum horum usus inter-
 „ missus est : Tempore morbi ter sedatus fuit fluxus cum
 „ optima spe ; sed cùm pessimo uteretur victus regimine , re-
 „ cidivam passa tandem fatis concessit. Cadaver apertum

B b b b

hæcce

„ hæccē dabat observanda, 1. omentum justē quidem erat magnitudinis, sed sphacelatum, colore atro-lividum, 2. Intestinum Duodenum, & Jejunum repletissima erant bile, unde sitis intolerabilis causa derivari poterat, 3. Ileum, quo ad Cæcum tendit, cubiti unius longitudine corruptum, & sphacelatum erat. 4. Colon quatuor transversos digitos à Cæco sanum erat, post ad 8. digitos corruptum, 5. Folliculus fellis maximus erat, & bile repletissimus: Bilis, quæ in eo reperiēbatur, viridis erat sicut gramen: Cætera optimē erant constituta: In Intestino Recto nihil notari poterat, nec in aliis visceribus: Hepar, Lien, Pancreas sanissima erant. *Alardus Hermannus Cummenus in Miscellaneis curiosis anni 1672. Observat. 116.*

DE BILIOSO TENESMO.

Canones Practici.

*Descriptio
Tenesmi
biliosi.*

I. **Q**Uandoquidem dysenteriam, præcipuè bilarem, Tenesmos, latinè Tenesmus comitari plerumque soleat, quædam idcirco de hoc morbo ad calcem dysenteriae delibare liceat. Describi igitur potest biliosus Tenesmus: Urgens, & ferè assiduum excernendi per alvum desiderium, cum dolore, præcipuè in extremo ano, & pauca interea, neque excitato desidendi conatui respondente excretionē, quæ cæterum mucosa est, subcruenta, interdum & purulenta; ortum ducens à reliquiis acrioris per intestinum effluxæ bilis, recto intestino, ejusque sphincteri præsertim hærentibus, & impactis, proindeque exulcerantibus. Interdum verò exulceratio recto non infidet, sed ex eo potius calamitosa hujusmodi, assiduaque ad hunc locum irritatio excitata est,

est , quodd intestina prius à bilis irruptione laceffita , quibus gradibus vires resumpserint, iisdem etiam morbificas has omnes quisquillas , per criticum veluti impetum, deturbaverint in rectum ; quod quidem hoc pacto indefinenter proritatum , mucosam illam materiam , quâ ex summa providentia intestina duplicantur, elidit.

II. Signa , & curationem hujus morbi profert Hippocrates lib. de affect. “ cum crebra , & inanis egerendi voluntas , prehenderit (tinesmum dicunt) sanguis , & mucus per alvum secedunt , dolorque in inferiore alvo oritur , idque præcipuè , ubi ad secessum devenerit. Huic alvum madefacere , pinguem reddere , ac levigare convenit , quæ intus sunt subducere , & calidâ, excepto capite , lavare. Hic autem morbus plures cibos insumere consuevit (*quasi quod ex assiduo ad desidendum stimulo veluti levitatem intestinorum secum ducat*) vacuato enim ventre à sanguine , & mucosâ transeunte , dum ad intestina illabuntur , tormina fiunt. Intus autem existentibus cibis , minorem morsum intestino exhibent (*seu acribus extimulantibus succis ab alimentitia substantia implicatis , atque irretitis,*) Ac ex iisdem quidem , ex quibus etiam intestinorum difficultas contingit , & imbecillior tamen , & brevis, minimèque lethalis.

Diagnos,
Prognosis, &
Curatio Tinesmi, ab
Hippocratis
textu elicita.

III. Galenus 3. de symptomat. causis cap. 2. post explicatas dysenterias , ab hepaticis præcipuè vitiis productas , descendit in tinesmi symptomata , quorum quidem præcipuum adducit , seu urinarum suppressionem , aut malam evacuationem , quæ quidem alterutra , aut etiam vicissim utraque ob recti intestini , ejusque sphincteris cum vesicæ cervicæ connexionem , & continuitatem produci in medium facile possunt. En Galeni textus “ Est autem ex eodem , quo jam dicta dysenteria genere , & qui tinesmos dicitur , cum ulcus in recto intestino est factum. Is cætera quidem symptomata infert dysentericæ similia , nixus tamen multò vehementiores. Urinarum autem tum suppressio , tum mala

Aliqua proponuntur
singularia
Tinesmi
symptomata, & quædam utiliora remedia.

„ vacuatio , ventris excrementorum retentioni , & alienæ
 „ à natura expulsionì , ad proportionem se habent. Retinen-
 „ tur enim , vesicâ vel excernere non valente , vel ejus collo
 „ occluso , Cæterùm biliaris tenesmus dispares à biliaris dysen-
 teriæ indicationibus curandi scopos plerumque non videtur
 proferre. Interea si valde urgeat tenesmi cruciatus , & velu-
 ti intolerandus reddatur , mirè prodest potus distillati liquo-
 ris verbasci , magisque sessio in ejusdem herbæ decoctione ;
 tum si frequenter anus cum eadem abstergatur : Præterea suf-
 fumigatio ex Terebinthina , ardentibus prunis injecta ; & si-
 milia alia curationi multùm tribuunt : Licèt Fodus , Infessus ,
 Suffumigia , Clysteres , Suppositoria , aliaque topica , qualia-
 cunque fuerint , inutilia esse in hoc morbo , à plurimis de-
 cantentur , veluti , cùm alienum quid sint , affectæ parti ap-
 plicata , contactu molesto , debilitatem magis adferant ,
 quàm robur , atque hinc , discussoriam morbi vim submini-
 strare non valeant.

Historia Biliosi Tenesmi Critici.

D. Hyacinthus Bertonus Venetus Vitriarius inter elapsæ
 hyemis initia Taurini legitimâ Tertianâ correptus ad quar-
 tum paroxysmum ab usu Peruviani corticis liberabatur. Su-
 periori Maio revertebatur febris, sed duplex tertiana; hæcque,
 efflagitante Ægro , per febrifugum iterum comprimebatur.
 Jamque ferocior post 12. aut 15. dies recrudescebat , cum
 vomitibus , & sedibus biliosis uberrimis. Morbus longâ al-
 terantium , atque purgantium epicrasi oppugnabatur ; ut ce-
 dere tandem , non advocato febrifugo , absumptoque ali-
 quando radicitùs fomite , & penitùs deleri videretur. Sed
 vetus adhuc biliosum delituit ignitabulum. Vix 15. aut 20.
 superatis diebus redit ipsa duplex tertiana febris ; novæque se
 præbent biliales eruptiones : Novo epicrasis opere plurimæ
 adhuc viscidæ saturatæque biliales copię subducebantur ; sed
 diu

diu vigeat febris, frigidulis quotidie ad vesperras ingressibus excepta; manè mitior, & placida. Tandem biliaris tenesmus spontè, subitèque supervenit, seu assiduus dejiciendi, urgensque stimulus cum dolore ad solum anum infixò, excretionè paucâ, sed creberrimâ, in qua crocea bilis, atque ab eadem solutus intestinalis mucus discernebantur: iis quidem nihil cruentum intermixtum vidimus: quod tamen tenesmi rationem non immutabat. Ab hoc biliari tenesmo, quatuor, aut quinque dies vigente, morbus integrè judicabatur. Adeò liquet, bilem quò diutiùs comprimitur, eò tandem efferatiorem è latibulis erumpere, atque interdum (ut superiùs indicavimus) totam præcedentium morborum vim critico penè modo in rectum intestinum, ad procreandam tenesmi rationem, decumbere.

DE BILIOSA COLICA AFFECTIONE.

Canones Præctici.

I. **N**on de solius intestini coli dolore cum excrementorum alvi suppressione, gravibusque interdum supervenientibus vomitibus, intelligi volumus, quum de biliari colico affectu in præsentiarum loquuturi sumus; sed latiùs de intestinorum, aut tenuium, aut crassorum, aut omnium dolore; cum in utroque casu colici morbi, nomen usurpari soleat: Tum illam duntaxat examinandam colicam passionem amplectemur, quæ à bilis vitio procedit, indèque biliosa dicitur. Alias igitur colicæ affectionis species, nimirum vel humorosas alias, ut pituitosam, mucosam, aut stercoreariam; vel flatuosam, vel convulsivam &c. (quæ quidem idiopathicæ omnes sunt) vel nephriticam, herniosam,

Colica affectionis nomen strictè ad solum colon intestinum, latè verò ad intestina omnia arrogatur. Varia affectionis colica species.

B b b b ;

hyste-

hystericam, [quæ quidem sympathicæ] vel ab internis causis ingenitam, vel ab assumptorum vitiis adventitiam, vel stabilem, vel fortuitam &c. in hac disquisitione prætermitemus.

Biliofa Colica graphica descriptio.

II. Sed Nobilissimum Anglorum expertissimorum Scriptorum Par nuperis temporibus accuratas adeò de biliosa colica passione observationes memoriæ mandavit, ut ab altero, sive à Præclarissimo *Musgravio* hujus morbi ætiologiam, ab altero verò, sive à famigeratissimo *Sydenhamio*, diagnosim, & curationem elicere, & in hunc locum inserere consultum duxerimus: En itaque, quam Primus differt. de *Arthritide Symptomata* cap. X. apponit, graphicam hujusce morbi descriptionem “ Alia igitur Colica à materia peccante biliosa dicitur, & ei, qui proclives sunt ætate adultâ, maximè verò si naturâ viscerum malâ constitutione sunt præditi, & cœli æstus, aut iniqua victus ratio præcessit, torminibus primùm, deinde nausæâ, sapore ingrato, amaro, & vomitione postmodùm *cholericâ* premuntur. Alvus his diebus astricta, at incommodè. Urina ruffa; faciei, sed oculorum præcipuè, quod album esse debuerat, fit luteum. In bilis per os ejectione peculiare aliquid notandum, quod in scrupulis positum nonnumquam ægrum malè habet. A sumpto quippe Emetico, nifus, & conatus inter robustissimos, bilis sæpè ne hilum ejicitur, quæ tamen prompta aliàs, & absque stimulo liberè solet exterminari. Bilis hæc incerta per os emissio, ejus in duodenum, vel saltem in ventriculum impulsio flumini, similiter incerto videtur respondere. Quum intestinis inhaerendo ea diu laceffivit, ab alvi duritie suppressa, & re-tenta, sanguinem redux per Lacteas subintrat, eumque tam incendit, ut hoc tempore febriculam, æstu, sitique immodicâ, urinâ ictericâ ex luteo rubenti, cute aridâ, & densâ, pulsu frequenti, & elato, manifestam liceat observare. Per sanguinem materia ad caput usitatè fertur, & ce-

„ & cerebrum atrocissimè imperens , aut ægrum apoplexiâ
 „ perculsum derepentè interimit , aut in nervos se insinuans,
 „ eos resolvit „ Hucusque Musgravius. Adjicit in *Colicæ dis-*
quisit. Ettmullerus “ Colicam lethalem esse ubi abest bilis ;
 „ aut si biliosa observetur colica , à bile porracea, seu æru-
 „ ginosa originem eandem habere : acorem biliosum in sub-
 „ jecto plus minùs viscido hæere ; indéque elevari flatus, hu-
 „ morosas colicas inferri „

III. Quod verò præterea in Musgravii observationibus memorato capiti insertis insigne memorandumque reperimus, biliaris Colicæ in arthritidem conversio est , biliari ipsâ cau-
 sâ ab intestinis in artus translata , ut ex adverso in affini de *Arthritide Anomala* sive *Interna* tractatu cap. III. eleganter describit idem Author Colicam cum nausea , & materia plerum-
 que biliosa vomitu , à repulsa , atque intromissa arthritide in-
 ductam. Hujusmodi ab intestino ad artus , & vicissim , trans-
 lationes compertæ jam fuerant Hippocrati ; Quorum quidem exemplum innuit in VI. Epidem : Cui intestinum in dextra par-
 te dolebat , is quum articulari morbo laborabat , levius se habe-
 bat ; postquam autem hic curatus fuit , magis dolebat. Nec
 rarò hujusmodi phænomena observantur in Praxi. Musgra-
 vius igitur cit. Loco descriptis bilaris colicæ moribus, eique
 superveniente febriculâ , hæc adjicit “ Aliquoties , certè plus
 „ semel notavi , post istiusmodi , quam modò dixi , dierum
 „ aliquot febriculam , dolere , tumereque , interdum etiam
 „ ardere partium extremarum articulos ; idque signorum, si-
 „ ve complexum ponderibus suis , sive ordinem examinemus,
 „ more prorsus *Arthritico*. Quâ verò proportionem fulget, ef-
 „ ferturque hæc Arthritis , se ad rectæ Arthritidis normam
 „ per artus , & articulos extollens , eâdem planè caput de-
 „ fenditur : ut ea quàm faustè , quantâque ægri cum utili-
 „ tate oriatur illis solùm innotescit , qui ex hac parte Ar-
 „ thritidis mala , tametsi gravia , tolerabilia tamen ; ex
 „ illa verò bilis caput invadentis sævitiam ; ab eaque hujus
 peri-

Facilis bi-
 liaris Colicæ
 in Arthriti-
 dem conver-
 sio. Quinam
 facilius in
 hujusmodi
 conversio-
 nem inci-
 dant; atque
 in hoc casu
 quibusnam
 prædiis isti
 sint excipi-
 endi.

„ periculum intimè perspectum habeant ; qui , inquam , hæc
 „ cum illis opposita conferant , æquâque lance perpendant.
 „ Quin etiam de capite conservato , quæ à nobis traduntur ,
 „ de intestinis item proponi poterunt ; eatenus certè , ut ,
 „ quemadmodum materiam peccantem Artus suscipiant , ad
 „ eundem modum eâ liberentur intestina ; & ex eadem
 „ translata , & pro ejus mensura levetur *Colica* ; quôque plus
 „ ægri dolent Articulis , eò minùs Interaneis. *Colicæ biliosæ*
 „ cùm adnascitur Arthritis , in eo medicam locari decet
 „ operam , eam præferri indicationem , quâ externis quibus-
 „ cunque materia foras electetur. Quæ ad hanc rem auxi-
 „ lia , nostris hominibus explorata profuere , per ea , ro-
 „ ties hoc Scripto passim memorata , non est hoc tempore
 „ ut percurram. Sed , quæ hujus curationis quædam proprietas
 „ est , cardiaca interna , ut ut aliis curationibus ad paroxys-
 „ mum conciliandum idonea , hîc loci vel prorsus omitti ,
 „ vel cautè admodum usurpari par est ; ne , incitatâ febre ,
 „ & mutatâ simul inclinatione materiæ , confertim ea in ce-
 „ rebrum impellatur. Quem utique impulsus eò magis per-
 „ horrescas , quòd huic affectui primario (*colicæ nempe bi-
 „ liosæ*) jure quodam avito proprius esse reperiatur , tum
 „ quòd istius materiæ in artus expressio non ita familiaris
 „ sit , aut morborum ordini tam conveniens , imò potius
 „ fortuitu facta , & facillimè abscindenda , Superiùs autem
 „ docuerat , quinam faciliùs ex colica in arthritidem facebant :
 „ ii nempe , quibus *colica diuturna est , alvo plerumque durâ
 „ creberrimis interdum dejectiunculis solutâ , dolore potius con-
 „ stanti , & obtuso , quàm acri , & acuto signatâ : Iique , qui-
 „ bus intestinalis fistula muco parum oblita ; vel quibus illius fibræ
 „ tenuiores : Quique huic morbo homines à natura proni sunt ex
 „ pravo victu , frigore , vel difficili concoctione. Addi possent ,
 „ & qui frigidis , imò adhibitâ glacie gelidis nimium , potibus
 „ abutuntur : Quos quidem , saltem sub nostro cœlo , non tan-
 „ tum in bilares colicas , coactâ , impactâque nimium bile , sed
 „ & in*

& in choleram morbum, aut, si lentior inducatur impressio, in contumacissimos icteros frequenter delabi, quotidie animadvertimus.

IV. Diagnofis igitur biliofæ Colicæ paſſionis comparari poterit ab his omnibus, quæ ſolertiſſimus Muſgravius expoſuit, tum ab aliis, quæ expertiſſimus Sydenhamius ſect. IV. cap. VII. *de Colica Bilioſa* ann. 1670: 71: 72: evulga-
vit; tum etiam ab his, quæ nos pluries in hoc morbo obſervavimus. Hæc itaque tradit cit. loc. Sydenhamius “ ani-
„ madverti morbum huncce eadem planè præceſſiſſe ſymp-
„ tomata febrilia, quæ *Dyſenteriam* per illa tempora regnan-
„ tem præcedere ſolebant; atque eundem etiam aliquando
„ [quod ſupra notavi] *dyſenteriam*, quæ poſt diuturnos cru-
„ ciatuſ ægro tandem valedixiſſe videretur, fuiſſe inſecu-
„ tum. Ubi *dyſenteriam* diutinam non excipiebat, plerum-
„ que à febre ordiebatur, quæ per horas aliquot tantùm af-
„ ſigens, in hunc morbum ſolebat deſinere. Juvenes ut
„ plurimùm temperamento calido, ac bilioſo præditos,
„ æſtate præſertim adoritur. Intesti-
„ norum dolor atrociſſimus
„ eſt, & præ cæteris omnibus, quibuſcum mortalium ca-
„ lamitoſiſſimi committuntur, maximè intolerabilis. Intef-
„ tina nonnunquam quaſi injectâ faſciâ conſtringit, nunc
„ in punctum contractuſ quaſi terebello perforat. Subinde
„ remittitur dolor, mox reſci-
„ deſcit Paroxyſmuſ, quem
„ æger præſentiens, vultu miſerabili, atque ejulatu, ceu
„ præſentem exhorret, & averſatur. Sub initio hujus mor-
„ bi non ita certò ad unum aliquod punctum determinatur
„ dolor atque in ejuſdem progreſſu; neque tam crebra eſt
„ vomituri-
„ tio, neque alvuſ ita pertinaciter Cathartico-
„ rum vim eludit; quò autem magis augetur dolor, eò obſti-
„ natiùſ in puncto figitur; vomituri-
„ tio ſuccedit frequentior,
„ & major alvi adſtri-
„ ctio; donec tandem ab ineluctabili
„ horum ſymptomatum vi totaliſ perſtaltici intesti-
„ norum mo-
„ tuſ inverſio (niſi maturiùſ quiſ tulerit ſuppetias) atque

Diagnofis
bilioſæ Coli-
cæ.

„ iliaca passio procurantur ; in quo morbo cathartica me-
 „ dicamenta omnia in emetica statim transeunt : Enemata
 „ enim injecta unâ cum alvi fecibus per omnem intestino-
 „ rum ductum sursùm lata , vomitu ejiciuntur. Quæ hoc
 „ modo excernitur materia, sincera si fuerit, viridis aliquando,
 „ aliquando etiam flava , aut insoliti cujusdam coloris spe-
 „ ctatur,, Hactenus Sydenhamius , Cujus diagnosi hæc addimus.
 In biliosa Colica habitus excitatur ictericus, qui sanè si mor-
 bo hujusmodi non illico se comitem addit, huic facilè , præ-
 cipuè non benè judicatæ , paulatim succedit , Ardor in to-
 to abdomine ; ingens oris amaror , cum lingua flavis , &
 viscidis perpetuò imbuta : Enorme ciborum , carniū præ-
 cipuè , & jusculorum fastidium : Virium enormis *prostratio*,
mens interea , ut cum Hippocrate loquar , *audacior* : Bilis,
 quæ per vomitum excernitur , amarissima , vitellina plerum-
 que , aut glastea , aut fusca. Dolor biliosæ colicæ pette-
 rebrans , & rodens est. Spiratio sectatur frequentior , at-
 que *acervatim attracta*.

Biliosa Co-
 lica ab hys-
 terica dis-
 crimen: &
 quomodo hy-
 stericæ re-
 mediis sit
 excipienda ;
 præcipuè ic-
 terus eidem
 frequenter
 superven-
 iens.

V. Laudatus cl. Sydenham in *Processibus ad morbos fere om-
 nes curandos* , atque in cit. *biliosæ colicæ* loco admonet hy-
 stericam in fœminis Colicam biliosæ vultum interdum indue-
 re , quamquàm ut utriusque dissimilis causa est , ita dispar
 curandi methodus. Quamobrem non inutile putabo tex-
 tum hîc authoris referre , atque indè specialem remediorum
 administrationem ; ut nempe tum colicæ hujusmodi Hysteri-
 cæ natura , tum ejusdem à biliosa colica discrimen aperia-
 tur “ Fœminarum nonnullas (*ait igitur Sydenham. cit. colicæ*
 „ loco) vexat affectus hysterici species quædam , *colicam bi-*
 „ *liosam* ita ad unguem referens , tam doloris acerbitate ,
 „ quàm situ , tum etiam humoribus coloris flavi , viridif-
 „ que vomitu rejectis , ut mihi obiter tractanda veniat ,
 „ ne à quopiam pro jam dicto morbo hæc habeatur. Quæ
 „ habitu corporis laxo , crudoque sunt mulieres cum hoc
 „ malo præ cæteris conflictantur , quæque alio aliquo af-
 fectu

„fectu hysterico jam pridem laboravere ; aut (quod sæpe-
 „numerò fieri solet) quæ à partu difficili ac laborioso ob-
 „natum infantem Grandiusculum , qui vires , & natu-
 „ram maternas nimis exhaustit , vix evasere. Regionem
 „ventriculi , nonnunquam , & paulò inferiorem , dolor
 „haud mitior quàm in passione colica , iliacave primùm
 „obsidet , quem vomitiones sequuntur enormes , nunc vi-
 „ridis materiæ , nunc verò flavæ. His accedit (quod se-
 „pè observavi) major animi dejectio desperatioque , quàm
 „in morbo alio quocunque : Post diem unum , alterumve
 „faceffit dolor , qui post paucas septimanas revertitur , ni-
 „hilo leniùs sæviens , quàm antequàm solveretur Paroxys-
 „mus ; Icterus quandoque satis spectabilem comitem sibi
 „adsciscit intra dies pauculos spontè evanescentem. Ces-
 „santibus jam symptomatis omnibus , ubi Ægra sibi satis va-
 „lere videatur , levissima animi commotio , sive ab ira ,
 „sive à dolore ea fuerit excitata (quibus hoc in casu prom-
 „ptissimè afficiuntur Fœminæ) dolorem ferè revocat ; quod
 „etiam , & de ambulatione , & de alio exercitio , quolibet
 „præmaturè nimis suscepto dicendum est ; cùm ab hujus-
 „modi causis eleventur vapores in habitu corporis laxo ,
 „atque imbecilliori. Vapores cum vulgo dico , cùm sive
 „istiusmodi sint , sive convulsiones particularum partium ,
 „utrovis pariter modo solventur. Hi vapores , sive con-
 „vulsiones hæ , ubi hanc , illamve corporis regionem in-
 „vaserint , pariunt symptomata , ei , quam invasere , parti
 „accomoda ; ac proinde licèt unum , atque eundem ubi-
 „que morbum faciant , plerosque tamen , quibus miseri
 „cruciantur affabre simulant ; quod vel ex hoc liquet affe-
 „ctu , qui cùm partes *colo* adjacentes insederit , *colicam bi-*
 „*liosam* ad amissim imitatur „ Hęc Sydenhamius , aliaque,
 „quę omittimus , de hysterica Colica , *biliosam* mentiente , In
 „qua quidem aliter , ac in *biliosa* Colica , si vitiosorum hu-
 „morum colluvies in ventriculo stabuletur , magnâ quantitate

liquoris possetici vomitionem ciet; hinc *anodynis uterinis*, & præcipuè *narcoticis* largè, diuque utitur. In sanguinea constitutione cum valentibus viribus, præcipuè in ejus orgasmi discrimine sanguinem primùm è brachio detrahit: cæterùm venæ sectionem, repetitas purgationes, tum ipsa enemata, quæ utique *in colica biliosa incipiente apertissimè*, ut ait, *indicantur*, vix hîc locum habere ostendit: aliisque tandem, & in primis chalybeatis præsidiis, clavum hunc hystericum delere studet. Supervenientem huic colicæ sæpissimè icterum vix cathartici aggreditur, *ne à catharsi novi tumultus cieantur, ac proinde symptomata omnia postliminio occurrant.* Vix rhabarbarum, vel mollius aliud solutivum concedit. Quod si hujusmodi Icterus brevi temporis spatio non evanescat, ut ferè assolet, sed longas nectat moras, confugit ad apozemata amara, & aperitiva, ex radic. rub. tinctor. & curcumæ, ex foliis Chelidon. maj. cum toto, & summitat. Centaur. min. coctis in vino Rhenano, & aqua fontis, solutoque in colatura syrup. de quinque radicibus &c. diù, manè, & ferò sumenda. Tandem ad ferreas aquas.

Biliosa Colica à nephritica colica, atque à convulsiva discrimen; tum ab aliâ quâlibet, sympathicâ, aut idiopathicâ, legitimâ, aut spuria.

VI. Discriminatur Colicus biliosus dolor à nephritico Colico; quod in hoc ultimo, primò vomitus plerumque biliosus non fit, sed ingestæ cujuslibet indiscriminatim substantiæ, aut in hujus defectu, vix tenuis feri per solam spasmoticam expressionem elicit. Secundò, in eodem nulla plerumque febris, nulla sitis, nulla constans nausea, aut ciborum fastidium; nulla, uno verbo, se produnt delinquentis bilis indicia. Ita à pastu Colicus biliosus dolor augetur, ob morbidam bilem acrius à cibariis commotam: minùs verò nephriticus. Tertiò, renalis dolor ad renum alterutrum aut etiam utrosque, determinatus & fixus est, stabilis, immotus, distendens, & veluti disrumpens, ad testem, ut plurimùm, secundùm longitudinem ureteris exporrectus: interea magis adhuc quàm in bilari colica periodicus; magis insuper posticus cum majori flectendi, atque erigendi corporis

poris impotentia ; interdum cum stupore femoris affecti lateris : Virga plus minùs dolorem compatitur , aut ejus apex molestè , cum teste affecti lateris retrahitur , aut pruriginè , aut aliis modis afficitur , aut saltem à trajiciente urina , per propriam naturam , aut per contenta , acriori , fervidiorive reddità , mordetur , & laceffitur. Sed biliosa Colica vaga est , aut in medio abdomine , aut supra , aut infra renes aut ad totum abdominis ambitum , cinguli instar , exspatiatur. Quartò , etsi libera alvus evadat , & profluat in nephritide , adhuc tamen desævit dolor , donec impacta reni , aut vrenteri noxia substantia ad vesicam deturbetur. At in biliosa colica ut alvus adstrictior est , ita vel leviùs aperta sublevat. Quintò , urinæ , in nephritici doloris principio sunt insigniter tenues , perspicuæ , percrudæ , aqueæ , atque ut dicitur , percolatæ , & parcæ vel etiam nullæ ; Longo verò morbi progressu interdum crassissimæ , valde opacæ , summè saturatæ , subjugales , lateritiæ , lividæ , & non rarò nigrae , sine febre , aut alio universali affectu ; cum nempe arenulæ , muci , sanguis , aliave extranea corpora eisdem intermixta , rubedinem , aliasve tincturas , variumque consistentiæ gradum largita , unà à corpore deturbantur ; in biliosa verò Colica quæ inter initia crassiores urinæ excernuntur , in eodem constanter statu perseverant. Tum præcipuè quòd nephriticum dolorem indicia alia renalis morbi , in urinis , aliisque circumstantiis conspicua sectantur , quæ quidem in biliosa colica non occurrunt. Distinguitur verò biliosa intestinorum passio à spasmodica colica , quòd ista siccus sit morbus ; nullæ in hâc biliosæ vomitiones , aut dejectiones appareant ; intereà crebriores , sed plerumque inanes vomitus : minor æstuatio viscerum , imò , & frequentius algores , qui in primis in lumbari regione , mesenterici nervei plexus principio , centroque correspondente , persentiuntur ; ubi etiam acerbior cruciatus cum tremulo spasmus percipitur. Insuper in convulsiva colica astrictio alvi

pertinacior est , quæ etiam si liberetur , parum exinde commodi assequuntur ægri ; secus in humorosa. Pulsus in convulsiva depressior , & obscurior est , inæqualis insuper , interdum & intermittens sine magno ægri discrimine , plerumque haudquaquam febrilis. Tormina contorquentia sunt , veluti lacerantia , lacinantia , & abdomen subinde contrahentia , nunc in duritiem tendentia , nunc vaga , nunc quodam in loco crebrius fixa &c. Sed de hujusmodi colicarum passionum differentiis consuli poterunt Willisius , Sylvius , Aliique , fusè de convulsiva Colica , cæterisque hujus morbi speciebus scribentes. ut ex his pariter per propria singulis argumenta , biliosa affectio ab alia qualibet humoralis , pituitosa , mucosa , stercoraria , tum flatuosa , herniosa &c. disparari facile poterit : Dolores abdominis , biliosam legitimam Colicam indicibus omnibus mentientes , interea in apertis cadaveribus , vel à jecore in scirrhum indurato , vel ab hujus visceris inflammatione , & gangræna , vel ab ejusdem lobo , posteriori ventriculi orificio , diaphragmati , & circumscitis partibus affixo , vel à cavæ ejusdem partis abscessu , vel ab eodem adeò magno , ut infra umbilicum descenderet , totamque anteriorem hypogastrii partem occuparet ; vel tandem à meatu cystici coalitu , ac bilis in cystide cohibitione , aut ab eadem cystide lapillis referta , procreati visi , legi poterunt in Boneti *Sepulchreto* , seu *Anatom. Pract.* lib. III. sect. XIV. A Riolano , Thom. Bartholino , Platero , Blasio , Joh. Frid. Hildenreichio , aliisque descripti ; ubi etiam signa plurima , spurias hujusmodi colicas à veris dirimentia , ex iisdem Authoribus exscribuntur.

Biliaris Colica Prognosis. Perfecta, imperfecta, pessimaque hujus morbi judicatio exhibetur. Historia bi-

VII. Ut modò ad bilialis Colicæ prognosim descendamus: Hic morbus , qui interdum epidemius extat , perfectè judicatur , si citius crassa bilis , eaque flava , non viridis , aut fusca , per inferiora dejiciatur , parum inclinatis viribus , deletò vomitu , atque imminutis doloribus , qui ceterum constantes non sint , neque uno loco pertinaciter herentes ; imper-

imperfectè verò, cùm in dorsi dolores mutatur, vel in icterum, vel in omnium artuum paralyfin, ex observatione Car. Drelincurtii, aliorumque; quam quidem paralyfin cæteris ab alia causa productis sanabiliorem esse, tradit cum aliis authoribus Ægineta, vel in articulares dolores, juxta Hipp. & Musgravium. Pessimè tandem judicatur, si in epilepsiam faceſſat, ex quo quidem succrescente morbo plerofque periſſe idem Ægineta testatur: Pessimè insuper, si æger ex Colica in Iliacam passionem delabatur; quo quidem casu æger conclamatus est, ut in Praxi non rarò deprehendimus. fit autem iliaca affectio, cùm ex nimia biliari irritatione contorquetur intestinum, & fursùm (ut ait Duretus) revellitur; aut adeò inflammatur, ut ejus intercipiatur trajectio. Prævus est colicus hic dolor, ubi crebrior, ac difficilior sit vomitus, potus retineri nequeat; nihil vel parum infra excernatur, multa febris, cum debili pulsu, modicoque ad extremitates calore. Lethalis verò, si dolor acerbissimus sit, uno loco fixus, perpetuus, & constans, cum omnimoda alvi suppressione & retracto podice, enormi vomitu, contumaci vigiliâ, superveniente singultu, delirio, raucedine, extremorum frigiditate, sudore frigido, & syncope. Colica Biliosa nonnunquam in intestini, aut etiam mesenterii abscessum degenerat. Mense Septembris anni 1720. D. Carbonerius Cherienſis, atrabilaris constitutionis, ætat. suæ annorum 40. post malam victus rationem, immodicum fructuum horariorum esum, & longum in primis per totam æstatem abusum vini, vitium quoddam in dolo passus, in gravissimam biliosam colicam incidebat. Febris aderat principio validior, cum bilioso vomitu, linguâ siccâ, nausæâ continuâ, forti intestini cruciatu, ventris tensione, & tumore, astrictâque alvo. Clysterum, fotuum, emollientium, demulcentium, oleosorum, & paregoricorum remediorum auxilio remitti omnia videbantur. Jamque alvus biliosa plurima viscida, saturataque excernebat, præcipuè

biliosa Colica, in intestino- rum, & me- senterii abs- cessus dege- nerata.

cipue à forti inter tertiam, & quartam diem usurpato cathartico, institutâque deinceps epicrasis specie. Post septimam diem febris cum dolore exacerbescibat, & reddebatur homotona. Venter tumidior, atque instar tympani extensus; Missione sanguinis subortę intestinorum inflammationis suspicioni prospiciebamus. Cætera, ut suprâ adhibita præsidia sunt, propriis intermixtis Cardiacis. Respondebat votis alvina dejectio, cruda tamen, & sincera febris continuo vehemens cum subdelirio nocturno, vigiliæ perpetuæ. Superatâ undecimâ morbi die, & insuper decimâ quartâ, improvisò remitti febris cum liberiori mente visa est (peracta enim fuerat suppuratio) atque vix sensu doloris superstite abdomen mollescere. Sed pulsus insigniter intermittens reddebatur, cum cordis ingenti palpitatione; conflictisque adeò viribus, ut neque in lectulo moveri ager posset. Accedebant ad decimam nonam singultus frequentes, Leipothymia, animique defectus sine causa manifesta cum respiratione gravissima; & protinus livida, & hippocratica evadebat facies: hinc Asphyxia: ad vigesimam venter in subitum denuò tumorem attollebatur cum vagis doloribus. Horâ septimâ pomeridianâ æger quandam in ventre veluti explosionem percepit, (ruptionem abscessus) cum elatiori ventris tumefactione, quæ tamen brevî ad pristinam reducebatur mensuram; atque ab intestini exolutione quædam adhuc biliosa deiecit, [ut etiam ante necem in sphacelatis iliacis contingit] hinc brevis rigor: horâ nonâ, amissâ visus functione, firmâ intereâ voce, constantique animo misellus fruens, forti syncope correptus, frigidoque sudore perflatus subitò animam efflabat. In aperto Cadavere præter Ileon intestinum ad intervalla sphacelo percitum, plurimi diversæ magnitudinis se se folliculati abscessus obtulêre, quorum aliqui crassa, & tenuia indiscriminatim intestina tenebant, alii verò crepidinem Meserei & Mesocoli, eadem intestina nectentem. Ex his postremis grandior quidam abruptus fuerat,

fuerat, ex coque uberrimum fetidissimumque, & alicubi virescens pus, per ventris indè caveam, extimasque intestinorum facies effusum eruperat; unde syncope, subitaque mors repetenda. mecum affuit hujus morbi curationi, denatque hominis spectaculo, ornatissimus D. Pacchiaudus R. C. Regis Matris Medicus à Cubiculo, & Consiliarius. Similem propè casum, præter quàm alii authores, refert Guilielmus Fabricius Hildanus Cent. II. Observ. LXXIV. In quo ruptio abscessus ad intestini cavitatem præstita est, ut indè non parum puris per alvum efflueret. Quod superest ad prognosim: Biliosa Colica, ut & alia humoralis quælibet, mitior convulsivâ videtur, præcipuè quæ diuturnior evadit; eaque faciliùs curatur, si tempestivè discerni à Clinico, propriisque debellari præsidiiis queat.

VIII. Invisum medentibus non est, biliosas Colicas, præcipuè diutinas & chronicas, tum quæ in primis in hypochondriacis, & confirmatis ictericis eveniunt, per lividas, aut nigras per criticam rationem copiosè ejectas urinas feliciter judicari: Quod quidem in aliquibus authoribus legere, & semel, iterumque animadvertere in Praxi mihi datum est. An fortè æruginosa, an atra ipsa Bilis in censum causæ morbi, faustè à natura subactæ, subductæque advocanda erit? Revera frequentem atræ ipsius bilis in morbidis hominibus præsentiam negare nemo poterit, qui conscius sit, in pluribus morbis nigram bilem in ipso fellis folliculo frequenter reperiri. Id certum non minùs est, in longis, diuque contumacibus viscerum hypochondriorum, & præcipuè lienis obstructionibus, nigras has, summèque crassas urinas optimis egrotantium auspiciis quandoque profuere; Quas quidem si Veteres nostri à Liene per transmissionem in renalia parenchymata, proximè ejectas prædicabant, à Modernis medentibus propriæ succenturiatorum renum excretioni imputari, non semel in medicis ad egro-
rum lectulos consultationibus audiivi. Utri rem acu tetigerint,

D d d d

runt,

*De biliosa Colica, præcipuè diuturnioris, non rarè per lividas, aut nigras urinas judicatione. Atque obiter de nigris opacis urinis, secundum varias morborum, atque egrotantium habitudines, nunc bonis, nunc malis, nunc lethali-
bus. Tum de viridibus urinis observatio superadditur.*

rint, lectores viderint. Contumax interdum icterus per crassas, turbidas, nigrasque urinas criticè solvitur. Vide Schenckium lib. III. *Observat.* aliosque. Pleuritidem in septuagenaria muliere cum gravissimis symptomatibus per lotium, colore scriptorium atramentum referens, judicatam habet Petrus Rommelius in *Observat.* XIII. *Ephemerid. nat. curios.* ann. iv. Interdum nigra ex ingestis urina redditur. Ita idem Rommelius Observatione aliâ, quæ memoratam sequitur, refert, urinam in vetula à coctis, & comestis damascenis prunis semper nigerrimam fuisse redditam. Hoëferus in *Hercul. Medic.* pag. 142. memorat icterum nigrum, in quo ex usu lapidis Bezoar urina nigra, & instar atramenti fuit excreta. Adeò incertum est nigrarum urinarum judicium. Adcite urinas nigras, quæ à menstruorum, aut puerperiorum suppressione redduntur in acutis morbis, nihil mali portendere, sed contrà prodesse sic ipsas reddi. Criticam hanc nos plumbeæ, turbidissimæque urinæ excretionem vidimus olim in Domina *Isaia à Camerano*, atque non ita pridem in viro quodam *Judeo*. Sed post nigras hujusmodi, crassas, summæque opacas, deturbatas urinas, nisi istæ in statu, seu maturitate morborum, atque inter criticos naturæ conatus contingant, paucissimos ægrotantium evadere, omnibus etiam compertum est; cum in cruditate morborum symptomatologica hujusmodi urina, aut summam bilis, aliorumque humorum adustionem, & veluti cinesactionem, aut partium, undè profluunt exolutionem, atque ad necrosim proclivem habitudinem ostendat (ut de livido pariter, nigroque sputo in maligna, & lethali pleuritide cum principio necrosis pulmonum aliàs indiximus) Ita perspeximus ante hos decem annos in robusto homine acutâ, & malignâ febre correpto, in ædibus amicissimi D. *Rex* decumbente; ita in Dom. de *Courtenais*, aliisque: Ita in lib. I. *Epidem.* Hipp. Philiscus acutâ febre correptus, tertiâ, quartâ, & quintâ minxit nigrum, sextâ obiit. Interea in ardentis, & acutæ febris

febris principio cum orgasmo sanguinis , ejusque ad pectus, simulque & ad caput raptu , urinas summè nigras , opacissimas , crassissimasque vidi ante hos 18. annos in Domino *Bassecourt* Belga , Pannorum opificiis præfecto , robustissimo viro , qui post decimam quartam diem à morbo evasit ; mecumque vidit , in curationis operam simul accitus , Illustrissimus , omnique medicarum facultatum genere spectatissimus , optimèque de me meritus D. Joseph Antonius Manzini S. R. M. Medicus , & Consiliarius. Carolus Piso de *Morbis à serosa proluvie*, *Observ. CI.* affert , vidisse in binis mulieribus , nephritide valde semper exercitis , ichorum biliosorum , & prassinorum magnam vim urinæ adeò immixtam , ut ipsa crassesceret ; & insigni virore tota splenderet. Neque interea hanc modicam de atris, imò & viridibus urinis digressionem curiosis Lectoribus ingratam fore arbitrabor.

IX. Atque ut postremò cum eodem Sydenhamio, sive potiùs cum ipsa genuina naturæ lege, biliosam colicam expediamus: Duplex in hoc morbo curativa princeps indicatio elicienda , se præbet , quarum altera humorem in sanguiferis vasibus antecedentem , tum in visceribus conclusum , seu continuentem dictum , evacuandum prospicit ; altera ad compescendum anodynorum usu humorum eò tendentium impetum, atque immanissimum demulcendum dolorem apprimè dirigitur. Quò ad primam, vel potiùs indiscriminatim ad utramque : Si febris , & ardor urgeant , & vasorum adsit plenitudo , neque prava bilis minitetur orgasmum , sanguis mitendus erit , è brachio. Post horas aliquot à phlebotomia , anodynum exhibet Sydenhamius : postero die catharticum quodpiam lenitivum præscribit , atque juxta delinquentis humoris copiam , aut indolem , bis aut ter diebus alternis repetit. Interdum turgentibus ventriculi quisquiliis , priùs eundem eluit. In doloris vehementia , & vomitione validius catharticum adhibet , quod quidem per obistentes intesti-

Colica biliosa curativa methodus, duplici quidam indicatione suffulta, quomodo sit explenda juxta Sydenhamii Methodum.

norum canales efficaciter sibi viam aperiat : cæterisque ejus-
 cemodi purgantibus antefert potionem ex infusione tamar-
 rind. folior. fennæ , & rhei , cum dissolutione mannæ , &
 syrupi rosacei sol. Vomitu potionis trajectui obluctante pilu-
 las in subsidium advocat , inter quas *cochias*. In nimia ven-
 triculi debilitate , aut contumaci vomituritione , ut nec pi-
 lulæ , aut ejuscemodi solida cathartica retineri queant , re-
 medium primò anodynum imperat , deinde catharticum , eò
 tamen utriusque interjecto temporis spatio , quò vis narcoti-
 ci facultatem purgantis non infirmet ; dum assumpto alvus
 ægriùs respondere , atque non nisi operosius solvi videatur
 “ Cum autem hic (ait idem Sydenhamius) uti in aliis ple-
 „ risque morbis , in quibus indicantur *Narcotica* , *Catharti-*
 „ *cum* semper dolorem intendat (saltem finitâ jam opera-
 „ tione , quâ quidem vigente mitius nonnunquam cum egro
 „ agitur) ideo solenne mihi est *Anodynum* ingerere , ubi
 „ primùm expiravit cathartici operatio. Quale quidem ma-
 „ nè etiam , & serò quotidie hauriendum impero , spatio
 „ scilicet omni inter purgationes medio , quò certius dolo-
 „ rem consopiam , donec catharsis debitè fuerit celebrata,
 Quamobrem satis elicitò cathartorum opere , ad alteram
 confugere indicationem contendit nobilissimus Scriptor , com-
 pescendo extimulantium succorum turbas , inductosque dolo-
 res , atque solidorum tensiones , anodyno bis , interdum
 sæpiùs per diem , largiùsque usurpato ; eo nihilominus in-
 terjecto temporis spatio , ut compertum sit , quid à præce-
 denti dosi sperari debeat , antequàm altera superaddatur.
 Familiare illius (ut nobis omnibus) paregoricum est *Lauda-*
num liquidum , in aqua cardiaca , aut etiam anodyna so-
 lutum. Carminantia cæterùm repudiat enemata ; cum non
 quidem , (ipso iudice) humores acres exterminent , sed
 irritent , & concitato eorum tumultu diuturniorem reddant
 morbum. Sepe intereà , præcipuè in imbecillioribus , aut
 ob prægressam ægritudinem aliquam copiosiores antea eva-
 cuationes

uationes passis, aliisque in casibus, omiffa phlebotomia, & catharsi, à paregoricis curationem orditur, iisque tantummodò profequitur. Neque tunc solùm, sed quum in biliosa Colica *hectica* viger (ut ait Hippocrates) *intestinarum intemperies*, seu nimium adauctum in iisdem fibrarum momentum, aut solemnis ariditas inducta est, à quocunque cathartico remedio absolutè cavendum præcipit. Deleto morbo, hunc, qui revera non difficilè recidivum se præbet, præcavere jubet Vir cl. anodyno bis quotidie ad dies aliquot propinato.

X. Porro, cum idem semper non sit bilis Colicam inducentis ingenium, expedit interdum, secundum circumstantias varias, declinatâ nonnihil Sydenhamianâ Methodo, ad alias remediorum administrationes transire. Ita si morbilis non tantum acriorem, sed tenacem nimium, aridamque manifestius se prodat, præstabit summoperè, eandem prius copiosis tepidulis diluentibus, atque emollientibus haustibus ex longo, insulsoque jure carnis, aut pulli, cum emollientibus herbis alterato, oleosis insuper, præcipuè hydroleo, aut pinguibus jusculis, tum cremore lactis, aut etiam recenti butyro, copiosè, horisque præsertim matutinis ingesto, cicurare, & abluere. Fotibus præterea, cum externis, toti ventri impositis, tum internis, seu emollientibus, atque lotoriis, iisque sæpius repetitis anodynis Clysteribus: Quibus postea, si satis infractam fuisse bilis acrimoniam dignoscatur, carminantes, & discutientes, quinimo fortissimis purgantibus, atque emeticis aculeati, subrogari opportunè poterunt. In forti, simulque pertinaciori dolore valde proderit semicupium aquæ dulcis cum ebull. malvæ, althææ, betæ, mercurialis &c. sem. lin. fænugr. &c. In pertinacissimo, olei balneum, aut frequenter repetita omenti vervecum recens mactatorum, oleo imbibiti, applicatio conducit. Quod si tenuior Bilis, & impensè ferociens, orgasum affectans his omnibus compesci non queat, atque

Alia biliosa Colicam, secundum varias ejus circumstantias, & morbidam bilis indolem, curandi Methodus.

ulteriores ex propria accensione calamitates minitetur, hinc fitis ingens defæviat cum assidua oris amaritie, urinæ ardor accedat, febris, icterus calidus, aliaque incandescentis bilis symptomata; transeundum est non solum ad liquidorum propriè refrigerantium, sed frigida ipsius aque potum, docente Galeno lib. XII. Meth. cap. VII. atque docente Ægineta lib. III. cap. XLIII; Cujus quidem excellentem usum, subitumque illatum auxilium, ut non semel Amatus Lusitanus, Forestus, Septalius, Th. Bartholinus, aliique Practici, ita & nos sæpenumerò suspeximus. Neque minùs idcirco in hoc casu subveniunt frigida Epithemata ex succis endiv. semperviv. cichor. sonch. lactuc. acet. rosac. &c. frigidaque aquæ forus, aut lintea eadem imbuta, ventrique sæpiùs admota. Temperatâ his præsiidiis furente bile, ejusque retusis aculeis, densatâ tenuitate, atque exaltatione depressâ, nonnulli eliminare illam contendunt per largas, & repetitas doses amygdalini olei addito Hispanico vino, Cretensi, aut generoso alio malvatico, interdum etiam & spermate Ceti. Plerique verò remediis propriè catharticeis hoc opus moliuntur: Quod utique obtinetur commodiùs per longas, atque iteratò exhibitas mediocrium purgantium, ut syrup. rosat. aut solut. de cich. S. mann. aut meri rhabarbari, solutiones, tincturas, & expressiones, quàm per fortiorum modicam dosim, siccamque, aut solidiorem administrationem. Ita rarò utimur pilulis, extractis panchinagogis, aut extracto rhabarbari, agarici &c. rariùs adhuc mercurio dulci cum diagridio: Quæ tamen remedia à Plurimis summoperè in hoc morbo commendantur. Balnea, vel in ipsa hujus colicæ declinatione valere interdum poterunt. Paregorica ex seminibus frigidis, & papav. alb. ex viola, sempervivo, nymphaea, portulacâ, lactucâ, pomis redolentibus, lacte amygdalino, mucilaginibus feminum variis, gelatinis, testaceis, aliisque similibus parata, tum ipsa opiata, sæviente impensius dolore, remediis aliis intermiscenda sunt. Ad efferatiorem calidior-

lidioresque in Colico morbo infringendam bilem, deprimendam, densandam multum tribuendum est acidis variis, fortioribus, aut mitioribus, mineralibus, aut vegetabilibus, ut spiritibus sulphuris, aut vitrioli, succis granatorum, berberis, limonum, acetosæ; aceto, omphacio &c. Tandem mitesciente morbo ea omnia in usum vocanda, quæ excretoriis referendis viis, atque bilis proventui minuendo apta nata sunt. Minerales aquæ acidulæ, aut vitriolatæ ad solvendas morbosæ bilis reliquias, atque per urinam pellendas multum quandoque possunt. Specificorum quorundam, & veluti secretorum ad arcendum hunc morbum, quæ plurimi decantant authores, nondum nobis perspecta facultas est. Arcet revera bona methodus, quâ nec nimis bilem acuamus, calefaciendo; neque nimium figamus, refrigerando.

„X I. Diætam (adjicit laudatus Sydenhamius) si junior fuerit æger, & calidioris temperamenti, refrigerantem atque incrassantem impero, putà hordei cremorem, Panatellam &c. & tertio quoque die, si latret adhuc stomachus, pullum teneriorem, merulamve, piscem coctum: Potum non alium concedo, quàm cerevisiam tenuem, mitemque, vel lac cum aqua coctum... Porro ut in morbi curatione, ita etiam eodem jam depulso, diætâ tenuis adhuc aliquandiù est observanda. Cum enim morbus hic recidivam præ aliis omnibus affectet, atque insuper sedem sibi delegerit, præcipua coctionis instrumenta (viscera intelligo jam ab eodem infirmata) vel levisimus hujus generis error malum non leve confestim apportabit. Quocirca tam in hoc, quàm in cæteris omnibus viscerum affectibus, eâ tantum sumendi quantitate cibi sunt, quæ ad vitam sustinendam possit sufficere... Neque ulterius quidquam indulgeo, nisi equitatio ad redintegrandam sanitatem necessaria, plenioris victum, & generosioris postulet

*victus ratio
in colica biliosa
passione.*

„ let liquorem , quibus rependantur spirituum exercitio ex-
 „ hauriendorum damna. „

*Cur exerci-
 tium, equo,
 vel vehente
 curru acri-
 ter habitum,
 sananda
 pertinaci
 biliosa Coli-
 ca admo-
 dum possit.
 Atque de
 aliis in hoc
 morbo præsi-
 diis, prophylactis, aut
 curativis.*

XII. Reverà in biliosa valde pertinaci aut sæpiùs recru-
 descende Colica , quemadmodum à vino abstinentia cæteris
 omnibus præsiidiis præstat , ut plures solo hoc regimine ab
 hoc morbo evaserint , relapsi autem sint , cùm vini usum re-
 sumserint ; ita debitis vacationibus , aliisque incassum ten-
 tatis , non invenitur , (authore eodem Sydenhamio , nostrâ-
 que confirmante experienciâ) præstantius restituendis ægris
 remedium , quàm exercitium , equo , vel saltem curru ve-
 hente factum , atque per dies aliquot , primùm ad stadia ,
 deinde ad multa milliaria matutinis horis , & apricante cœ-
 lo institutum. Hoc enim motu materia morbum commit-
 tens in corporis habitum deducitur : Sanguis perpetuâ agita-
 tione comminutus proprias depurationes meliùs aggreditur :
 roborantur succussionibus intestina , aliaque abdominis secre-
 toria viscera , eorumque contractili adaucto momento impa-
 ctæ morbi reliquæ vividius pressæ facilè , citòque excutun-
 tur. Ita hocce exercitii genus aliis etiam Chronicis morbis, ut
 obstructioni , ictero frigido , mensium difficultati , feбри albæ ,
 cachexiæ , asthmati , phthisi spuria &c. egregiè prodesse , fre-
 quenter animadvertimus. Omittam plurima confirmatæ bi-
 liosæ Colicæ , facilèque idcirco revertentis prophylactica , aut
 chronicæ , & contumacioris curativa , ab authoribus non
 paucis decantata præsidia ; ut castoreum , cinnab. nativ. aut
 antimon. Tincturam aut magisterium succini , oleum , aut
 syrup. cinnamom. , aquam carminativam , spirit. nitri , aut tar-
 tar. aut cephalicum dictum , ex tinctura radic. valerian. &
 pœon. , visc. quercin. & succin. cum vini spiritu elicita , aut
 extractum laudani aromaticum &c. Id quidem revocare ad-
 huc in censum par est , quòd quemadmodum biliosa Colica
 hominem , probâ constitutione , firmisque , sed fervidis vis-
 ceribus præditum invadens , largò frigide potu tutò , citòque
 debellatur ; ita qualem , quantamque eidem opem conferre
 valeat

valeat opportunè quandoque propinatum emeticum, ex illis, quæ mox adjicientur, Præclarissimi D. Nottæ observationibus etiam, atque etiam liquebit.

HISTORIÆ ALIQUOT BILIOSÆ COLICÆ.

Historia ex Hippocrate Biliosæ Colicæ, in Lethalem Iliacam passionem desinentis; sive
Ægrotus IX. Lib. III. *Epidemic.*

„ **M**ulier, quæ decumbebat juxta Tisamenum. Huic
„ Volvulosa molestè concitabantur, vomitibus mul-
„ tis torquebatur, potum continere non poterat, dolores
„ aderant circa hypochondria, & in inferioribus secundum ven-
„ triculum partibus dolores & tormina continuò affligebant,
„ non erat siticulosa; incalescebat. Extrema frigida usque ad
„ finem; fastidiosa sine somno. urinæ tenues, paucæ; non erat
„ remedio locus. mortua est. In hac Historia licet Hippo-
crates non exposuerit vomitus speciem; cum tamen specia-
les indicet *circa hypochondria* dolores, conjiciendum est cum
Interprete *Vallesio* hunc morbum ex vitio hepatis fuisse geni-
tum, ideoque biliosum Colicum, indeque volvulosum. Re-
verà in sincero volvulo nihil omninò solent Ægri per sedem
emittere: sed hæc Mulier dejectiones habebat.

De fausta Emeticorum, validiorumque Purgantium
in biliosa Colica administratione, Observationes,
Authori à cl. amicissimoque D. Notta, apud
Alexandrinos celebratissimo Professore, commu-
nicatæ.

„ Nobilis vir, mediæ ætatis, laudabilis temperamenti,
E e e e morbis

„ morbis haudquaquam obnoxius, post improbam totâ æsta-
 „ te victus rationem, incessabili nausæa corripiebatur, cum
 „ perpetua anxietate, variisque excitatis excretionibus, præ-
 „ cipuè per vomitum flavis, & amaris, cum summâ totius
 „ abdominis, dextræque in primis regionis tensione, feris-
 „ que torminibus, constanti præterea intercedente tenesmo,
 „ cum minima liquidarum fecum dejectione; urinæ aderat
 „ difficultas. Pulsus parvus, durus, frequens, & identidem
 „ intermittens: Acerrimo, siccissimoque calore percita to-
 „ ta corporis superficies obverfabatur: Artus verò ex adver-
 „ so frigeabant. Acerbissimus capitis dolor, præcipuè ad an-
 „ teriora: ut omnia, ad summam, imminentis necis indi-
 „ cia se proderent. Ad tertiam morbi diem, quibuslibet
 „ methodicis præsiidiis, fortibus, plurium generum clysteri-
 „ bus, narcoticis, solutivis remediis, pilulis, pulveribus,
 „ bolis incassum adhibitis, cochleare unum vini Emetici,
 „ quasi fortuito propinatum, instar miraculi, placidissimum
 „ illico somnum ad horam, & ulterius, conciliat: hinc bi-
 „ nis, aut tribus accitis vomitionibus, Ægrum perfectè re-
 „ stituit. Et tertius hic fuerat, novem, aut decem anno-
 „ rum intervallo, in eundem morbum relapsus. Neque ul-
 „ teriora suspiciendæ reversionis argumenta ad hanc usque
 „ diem passus ille est. Similem eventum in alio suspexeram.
 „ Idem in *Moschena* Domûs Patritio, post innumera alia
 „ usurpata remedia, ab Emetici opere contingebat. Idem,
 „ veluti per incantamentum, in Nosocomio, & Plebis ædi-
 „ bus, tum in utriusque sexus Cœnobiis millies mihi com-
 „ pertum fuit. Cùm aliquando Capucinatorum Fratrum *Vi-*
 „ *carius* quidam omnem inutiliter medicinæ operam in pro-
 „ priæ affectionis auxilium profudisset, demùm in sola in-
 „ fusione *Algarot*, per vinum habitâ (quod licèt communi
 „ emetico vino vehementius sit, tutò tamen suas exerit vi-
 „ res) sanationem repererit, ansam dedit, ut modò Cœno-
 „ bitæ omnes, præcipuè si biliosâ Colicâ, contumacibus
 „ capi-

„ capitis doloribus , aut diuturnis aliis affectibus se confli-
 „ ctatos perſentiant , ad hocce remedii genus , veluti ad ſa-
 „ cram Anchoram , fauſtiſſimis plerumque eventibus confu-
 „ giant ; quorum utique plurimi , febre non tentati , hocce
 „ remedio vel pluries utentes , ſacris adhuc conſuetis mini-
 „ ſteriis dant operam : ut in celebri concionatore P. *Odeſcal-*
 „ *cho* , aliisque obſervabam. Qui è converſo hujusmodi præ-
 „ ſidii operam in his morbis declinabant , aut , translato in
 „ caput improbo humore delirantes , vel apoplectici , occi-
 „ debant ; ut nuper in quodam militum duce perſpicere li-
 „ cuit ; aut in graviores morbos cum magis , minùſve præ-
 „ cipiti nece labeabantur ; ut ille Patritius , 22. annos natus ,
 „ ex memorati generis Colica in ferum Hydropem ruens , ex
 „ quo , ut prædixeram , ante quadrageſimam à decubitu diem
 „ ſuffocatus cedebat fatiſ. Virgo , nunc probè valens , &
 „ vegeta , ante hos duodecim annos ſimili paſſione Colicâ
 „ affligebatur , quâ tamen ab inviſentibus medicis neglectâ ,
 „ in tetrum , graviſſimumque hydropem degenerabat , ut ,
 „ veluti ad cœlum iter jam propè factura , ſacris omnibus
 „ viaticis muniretur , meo intereâ conſilio inſtitutâ paracente-
 „ ſi , viginti plus libræ aquarum effluxêre : Doſim deinceps
 „ baſami noſtri *de Tartaro* propinabam : uberrimæ ventris ,
 „ ac veſicæ dejectiones ſubſequutæ ſunt ; ut vix alterâ obla-
 „ tâ remedii doſi ſcœmina convaleſceret. Olitor juvenis , &
 „ fortis poſt aliquot dierum tertianam , ſimili Colicâ prehen-
 „ debatur. Neglecto , quod fuerat præſcriptum , Emeti-
 „ co , in univerſalem hydropem , ut prænunciaveram , mi-
 „ gravit , cum peſſima jecoris habitudine. Cùm me hominis
 „ miſereſceret , adhuc opem attuli. Sex *Tartari emetici* gra-
 „ na fauſtiſſimo ſucceſſu exhibebam ; poſtridiæ ſcrup. 2. rad.
 „ jalappæ cum ſale tartari : utrumque pharmacum ter alternis
 „ vicibus uſurpabat. firmè adedò revaluit , abſumptæque aqua-
 „ rum , noxiorumque humorum ſcaturigines ſunt , ut omni
 „ aliorum auxiliorum ablegato uſu , nunc poſt quatuor annos

„ à morbo robustissimus vivat. Plura adhuc ejusmodi suppe-
 „ terent exempla , quibus non nisi per validiora purgantia
 „ primigeniâ in his Colicis dejectâ biliosâ morbi causâ , suc-
 „ crescentes , breviores , aut diuturniores morbos dele-
 „ tos iri palàm fieret ; ni hæc modò suffectura esse cen-
 „ serem &c.

HISTORIA ARTHRITIDIS ,

Quæ Biliosæ Colicæ secundaria extitit , productæ
 scilicet à Colica Bile, ad artus translata ; ex
 laudato Musgravio.

„ **F**emina quædam , constitutione post hominum memo-
 „ riam maximè *Cholericâ* , nunquam secunda præstita , sub
 „ ætatis flexum Colicâ pertinaci biliosâ cum ingrato sapore,
 „ inappetentiâ , vomitu bilis frequenti , dejectionibus raris,
 „ & parum coloratis , urinâ ruffâ , ore luteo , & lentâ quâ-
 „ dam febriculâ premebatur. Horum autem malorum proca-
 „ tarticam habuit errorem in victu assiduum , utpotè cras-
 „ sorum , & *dyspeptorum* , ut dicitur , seu coctioni difficilium
 „ estrix. ubi alvum inanientibus (præsentissimo illi remedio)
 „ plus semel levaretur colica , ex bilis incremento , constan-
 „ tiâque , & acrimoniâ , menses post aliquot , iterùm , &
 „ sæpiùs recidiva est. Fugiente sæculo superiori , cùm affe-
 „ ctui gravi tollendo tempus aliquod apud nos impenderet,
 „ præter *colicam* memoratam , pedum item orta est debilitas,
 „ quæ primo aspectu paralyfin , hujusmodi *colicæ* facilè suc-
 „ cedentem , prædicere videretur. Quò per anum Bilis exu-
 „ laret , neque se in nervos insinuare permetteretur , cathar-
 „ ticum adhibui. Iterum insecutus est utriusque (sed potis-
 „ simè dextri) pedis tumor , malleolum , & pedis conve-
 „ xum , Hallucem autem præcipuè distendens ; quem comi-
 „ tabatur

„ tabatur hujus majoris articuli teneritudo mirifica , dolor
 „ pungens , rubor , ardor reverà *arthriticus*. Peræquâ verò
 „ proportionē increfcit *Arthritis* , quâ minuitur *Colica*. Cùm
 „ de fuis exindē interponerem, matre admodum *cholericâ*, &
 „ demum *Arthriticâ* fuiſſe prognatam , veterique *Arthritico*
 „ diutiùs junc̃tam accepi; fic, ut vitium partim hæreditarium,
 „ partim contagioſum eſſe ſuſpicari liceat. Rectè ſe habent
 „ muliebria , & copioſa ſunt. Ad medicinam morbi genio
 „ accomodandam in eo fui, ut materiam , quo poſſim artifi-
 „ cio , extrà dimoveam , ideoque internis eam protrudenti-
 „ bus , externis eam invitantibus, diverſis ſcilicet diverſo mo-
 „ do idem operantibus , inſiſto , ut & toti malleolo , & dex-
 „ tri pedis ſummitati, *Epifpaſticum* imponi , finiftrum pedem
 „ laneis involvi, calidèque veſtiri : & paulò poſteà foccos ex
 „ cerato illo viridi , quò fiunt *Petaſothecæ*, perpetuò geſta-
 „ ri jubeo. Undè exſudavit humor , nec inutiliter : Quan-
 „ diu enim perduravit iſte fluxus , reſceſſit uſque *Colica* &
 „ viſa eſt declinare. Erat autem iſta, per articulos, criſis imperfec-
 „ ta : Quod reliquum erat materiæ , finitâ re *Arthriticâ* , &
 „ ejus ſpe fallente omni , avitos intra limites ſe recepit , mo-
 „ reque proprio agens , Caput eſt adortum : Ideoque de hujus
 „ Ægrotæ malo non eſt quod ampliùs addam : unum iſtud
 „ volui ; ex *Colica bilioſa* poſſe *Arthritidem* exoriri. „

HISTORIA ALIA

Bilioſæ Colicæ annuatim revertentis , & demum
 in Arthritidem converſæ; ex Greulichio
difſert. de Bile.

„ **V**ocabar ad uxorem viri cujuſdam litterati , quæ jam
 „ tunc per quatuor ſeptimanas pro Hyſterica tractata
 „ fuit , omnibus remediorum formulis in auxilium vocatis.

Ego,

„ Ego , historiâ morbi perceptâ , Colicam à bile esse , ita
 „ testantibus signis pathognomonicis , pronuntiavi. Quaprop-
 „ ter eductâ , quâ datâ portâ , bile flavâ , restituitur Ægra.
 „ hinc elapso anno , eodem , ut priùs , mense revertitur Co-
 „ lica , quæ annuâ periodo novies reversa , semper exone-
 „ ratâ bile , superata fuit. Interdum adeò ferociebat bilis ,
 „ ut ante evacuationem , alterantibus demulceri debuerit.
 „ Anno decimo fiebat Colica ; sed post aliquod temporis *Ar-*
 „ *thritica* in infimum pedem , ejusque calcem præcipuè ,
 „ contendebat defluxio. Arguere licuit , eam à bile fuisse
 „ inductam alterationem , ut à causa *Colicæ* transierit illa in
 „ causam *Arthritidis*. „

H I S T O R I A

Biliosæ Colicæ Periodicæ , in Artuum Paralyfin
 interdum conversæ : ex dictatis cl. *Caroli*
Drelincurtii.

„ **N**ihil certè verius Fernelii doctrinâ de febribus inter-
 „ mittentibus , quæ degenerant in Colicam , ad febris
 „ typum periodicè recurrentem. Imo stupore quodam me
 „ percutit immanis ille cruciatus , sponte conversus in omnium
 „ artuum paralyfin indolentem , & hanc aliquoties aqua-
 „ rum Borbonensium potu , & embroche miratus sum ve-
 „ getè sanatam ; verùm unus ex iis febrientibus Colicæ tor-
 „ mento exenteratus est , & morte mihi subductus præ-
 „ viâ paralyfi nullâ ; & tunc certè laudatissimus mihi fuit Ci-
 „ cesius *de Colica Puerorum*. Ejus quippe ductu intestina re-
 „ peri hîc , & illic per areas quasdam bile suffusa , & per
 „ modum tincturæ sparsim vel flaventia , vel viridantia ,
 „ vel atrata ; prout scilicet Bilis multiplicis aculei se se tu-
 „ nicis

„ nicis intimiùs infixerant. Bilem enim intestinis impactam
 „ sedulus observavi, hîc vitellinam, hîc verò porraceam,
 „ hîc demùm atram; & ab ipsa spiculis hamata dolores il-
 „ li suscitabantur rabidi, ne quidem vel Homérico *Nepen-*
 „ *the*, vel ipsius Phœbi paregoricis ullis placabiles.,

HISTORIA ALIA,

Bilioſæ Colicæ, in Paralyſin degenerantis :

ex *Volchero Coitero Lib. Observat.*

Anatom. & Chirurg.

„ **V**Idi juvenem mulierem, quæ primò ex hepaticæ, &
 „ vesicæ bilis obstructione in Tertianam notham, dein-
 „ de in Colicam passionem incidit; paulò pòst Paralytica
 „ reddita, integrum annum vixit: Quæ tamen usu therma-
 „ rum aliquâ ex parte sublevata, ad extremum delirio, ac
 „ epilepsiâ correpta, occubuit. Paralyſis à principio occu-
 „ pavit brachiorum superiores partes, sensim ad extrema-
 „ tes manuum, ultimò ad crura descendit. Ægra atrophîâ
 „ contabescebat: De ventriculi ardore, siti, appetitus eden-
 „ di prostratione, alvi difficultate, & dolore sinistri ilii ten-
 „ sivo, gravique (sentire enim se se inquiebat in illo loco
 „ pondus aliquod grave, tanquam plumbi massam) conque-
 „ rebatur. Hanc mulierem aperui, & reperi jecur pro
 „ corporis ratione nimis magnum, obstructioneque mini-
 „ mè vacans; vesicam bilis bile crassâ, ac nigrâ turgi-
 „ dam: Ventriculum humore plenum viridi, atque ex-
 „ tensum.

DE COLICA PICTONVM,

Appendicula.

Quæ igitur in his binis ultimò positis Historiis Paralytica affectio, Colicæ biliosæ succedens, describitur, genuinam illam colicæ speciem adducit in medium, à Riolano *Pictonum*, *Pictonicam*, aut *Pictaviensem* dictam, quòd fortè in Pictavia familiarior hæc fuerit affectio. *Est enim*, ait in Processibus integr. in Morb. omn. Cur. Sydenhamius, *species quædam Colicæ, quæ degenerare solet in Paralyfin, & motus omnimodam manuum, ac pedum depravationem: Apud insulas Caribum notissima, utpote quæ magnam vim hominum infestat.* Riverius *Prax. med. Lib. 1. Cap. de Paralyfi* affert *Pictonum Colicam ab humore Bilioso produci apud omnes in confesso esse; Idcirco lib. X. ejusdem Praxeos cap. I. eandem sat graphicè describit* “ Est alia Colicæ species, ait, quæ in Paralyfin degenerat, Veteribus parum nota, quæ fit ab humore bilioso, non in Colon intestinum, quemadmodum prædicta, sed in abdominis membranas repentè effuso, qui eò transfertur à cystide fellea, vel mesenterio in crisi diuturna febrium, aut à vehementi iracundiâ, aliâque causâ externâ, quando propter obstructions ad vias communes effundi non potest, sed motu præpostero ad prædictas abdominis membranas repentè excutitur. Hinc dolor exoritur crudelissimus, colicum imitatus, qui tamen neque clysteribus, neque fomentis, neque aliis remediis cedit, ad plures menses perseverans. Hinc corpus contabescit, febris interdum, alicujus ex intermittentibus typum referens, molestat; estque interdum, idque sæpius, continua, ac lenta; ac tandem doloribus remittentibus *paralysis* succedit, humore illo per abdominis membranas in spinam dorsi sensim

„ sim irrepente. Illa tamen Paralysis partes superiores ma-
 „ gis occupat. Crura verò & tibiæ plerumque dolent, in
 „ paucis resolvuntur omnino, bile scilicet ob levitatem su-
 „ periora petente. Imò verò interdum in ipsum cerebrum
 „ irrumpit, & convulsiones epilepticas producit, undè mors
 „ ut plurimum solet succedere, „ Hactenus Riverius: Cui id-
 „ circò suffragans Lucas Tozzius *Pract. Part. II. de Colic. affect.*
 Colicos hujusmodi dolores, quos cum Fernelio Nothos, cum
 Riolano Pictonicos nominat, peritonæum potius, omentum,
 cæterasque membranas, quæ abdominis, ventrisque partibus
 obtenduntur, obsidere, atque excruciare declarat. Cæterùm
 huic Colicæ affinis esse illa videtur, quam per universam Ita-
 liam fuisse aliquando vagatam P. Ægineta meminit; tum illa,
 quam ex validiorum, neque bene defæcatorum vinorum abu-
 su endemicam in Moravia, Austria, Franconia, se addere, Sen-
 nertus memorat. Ad instituendam colicæ Pictonum curatio-
 nem paucis se expedit laudatus Sydenhamius cit. superiùs
 Loco: *Hunc dolorem, addit, atrocissimum sanat Balsamum Pe-*
ruvianum frequenter, ac in magna dosi exhibitum, nempe si ejus
gutta XX. XXX. vel XL. Sacchar. albiss. cochl. i. instillentur,
& bis vel ter in die dentur. Succrescentem verò Paralyfin huic
 remedio non cedere ingenuè fatetur. Tozzius in hac Colica
diuretica, & sudorifera, optima esse, in genere asseverat;
 neque ulteriora excutit. Riverius cit. loc. remediis locupletio-
 rem se porrigit. Alvo variis clysteribus, præcipuè ex lacte
 paratis, cum additione cassiæ ol. violac. & lilior. solutâ, pri-
 misque viis cathartico apertis, demitti ægrum jubet in te-
 pidum balneum, ex decocto emollientium paratum bis, ter,
 quater, quinquies quâque die, ut acrimonia humoris tem-
 peretur, ac pori membranarum aperiantur: Hinc catharti-
 cum repetit, hinc balneum; atque ita alternè se gerit, do-
 nec expurgatis humoribus, sedatoque dolore, æger in tu-
 to sit. In usu clysterum toto decursu morbi perseverat: un-
 ctiones ex oleosis, & butyraceis abdomini imponit. Ab ipso

morbi principio phlebotomiam purgationi præmittit; & iterat, si sanguis inflammatus sit, aut dolor rheumatismi particeps esse videatur. In fine morbi ad seri lactis, & acidularum usum confugit. In ejusdem pertinacia, aliisque omnibus doloris vehementiâ oblucente, potionem ex syrupo fimi equini, aliove simili remedio cum aqua papaveris rhead; & spir. vin. confectam propinat (cui tamen selectiora opiata subrogari commodius possunt) affectu demum in paralyfin vergente, præter galbanetum Paracelsi, spinam dorsi, partesque paralyticas lenit resolventibus balsamis, oleisque nervos roborantibus cum lana succida &c. Idemque Author lib. I. suæ Præxeos cap. V. meminit Pauli, qui lib. III. cap. XXVIII. & XLIII. proponit Paralyfin ex biliosa colica, cui refrigerantia maximè conferunt: Additque exemplum, à lib. X. *Observat. Foresti* desumptum, cujusdam adolescentis, cum partium extenuatione, & atrophia: Qui cum calefacientium, & exsiccantium medicamentorum usu ab aliis Medicis præscriptorum, in pejus continuò rueret; tandem solis humectantibus assumptis, & admotis, ab eo restitutus est. In Riverrio verò reformato commendantur ad hujus morbi curationem, præter attenuantia, resolventia & sudorifica, spirituosâ pariter, & volatilia, valida præterea purgantia, atque in primis generosa vomitoria in potionibus, & clysteribus, minùs verò narcotica, nisi vergat in convulsionem affectio: Tum missiones sanguinis præsertim imperantur. Neque (cum utique brevitati studeam) cæterorum super hac curatione Scriptorum sententiam inducam; cum revera in practicos memoratos scopos collineare hi omnes videantur. Id certum est, Pictaviensem hanc colicam dictam morbum esse gravissimum, pertinacem, diuturnum, atque curatu difficillimum, præcipuè si nervosum genus, ejusque in primis caudices, & medullia cerebri in affectionis partem abrepta jam fuerint. Conf. Franc. Citesius Pictaviensis in *Diatriba de novo, & populari apud Pictones, Doloze colico bilioso.*

DE CHOLERA MORBO.

Canones Practici.

I. **Q**Uamquàm Trallianus , aliique rerum medicarum Scriptores , Cholericæ passionis nomen ab affecto intestino , & fortè potissimùm à *Colo* deducere annitantur ; nos inter genuinos à bile morbos cum Hippocrate , Galeno , Celso , Cælio Aureliano , & Cnidiis Magistris hujusmodi affectum annumerabimus ; qui nempe , præcipuè si humidus sit , non sine enormi bilis vitio contingit. Cholera morbus in genere est subita cibarii totius tubi contentio , atque indignatio , cum dolore acerrimo , inflatione ac distentione , & violentis eruptionibus cum maxima difficultate , & angustia , ventriculi morfu , virium prostrationibus , depresso , parvo , celeri quandoque intermittenti pulsu , interdum convulsionibus. gravioraque præterea ducunt symptomata deteriores Cholerae (veluti epidemicæ sunt , quæ observantibus Willisio , Sydenhamio , Riverio , aliisque , semper plus minùs extant malignæ , hinc theriacalibus , sudoriferis , & malignitati resistantibus remediis expugnandæ) ut ingentem præcordiorum anxietatem , extremorum refrigerationes , crebras lipothymias , inextinguibilem sitim , intolerabilia cumprimis intestini tormina , & convulsivos ad ventriculum singultus , aliasque feras , vehementesque utriusque partis passiones. In hoc siquidem affectu æquè stomachus , atque intestina lacerari , ac perturbari videntur ; ut sursum deorsumque , sive per os , & podicem , eruptiones fiant. Hinc Celsus Lib. IV. Cap. XI. tradidit : *Cholera inter intestina , stomachumque versatur , ita ut cujus potissimum partis sit , non facile dici queat.*

Cholerica Passio , humidaque præcipuè , biliosis morbis arroganda est. Quid sit hac in genere.

Ffff 2

II. Cho-

Duplex Cholera in genere, humida, & sicca. Viriusque Definitio, & symptomata: Unde Diagnos.

II. Cholera, docente Hippocrate, duplex est, altera humida, alteraque sicca. Primam, seu humidam sæpius in popularibus morbis Senex descripsit: ut in *Ægrotante LXXVIII. lib. V. sect. VII. Eutychides ex Cholera morbo in cruribus nervorum distentionem sensit cum inferna alvi dejectione. Bilem abundè saturatam, multam, & vehementer rubram ad tres dies, noctesque vomitione rejecit cum corporis imbecillitate, & incontinenti jactatione. Nihil verò continere poterat, neque cibi, neque potionis quicquam &c.* Insuper in illo Athenis degente; in Biante, in Chartade, in Larissæ Onesidemi famula &c. alteram, seu siccam explicat lib. de victus rat. in morb. acut. versùs finem: *In Cholera sicca venter inflatur, & strepitus insunt, & laterum, ac lumborum dolor, nihilque infra dejicit alvus, sed adstringitur.* Designat itaque Galenus I. Progn. 1. 25. Choleram primi generis, sive humidam, quæ quidem vehemens est efferi, indomitique biliosi humoris, aliorumque supra, infraque excretio cum gravi cibarii tubi cruciatu: *Cholera est acutus affectus cum vomitibus biliosis multis, alvi que dejectionibus, suris quoque se contrahentibus, ac frigescentibus extremitatibus. Fiunt in his agris & pulsus minores obscurioresque, quin etiam ore ventriculi humoris acrimoniâ demorso, nervis contentionem laborantibus, aut resiccatis, velut etiam redditâ æruginosâ bile Cholericiis adesse convulsiones scribit idem Galenus comment. ad Aphor. 1. lib. V. signa alia adjicit Celsus cit. lib. IV. cap. XI. quibus quidem hujus morbi gravitatem indicat. Præter ea verò, quæ supra comprehensa sunt, sæpè etiam crura, manusque contrahuntur; urget sitis, anima deficit. Quibus concurrentibus, non mirum est, si subito quis moritur. Neque tamen ulli morbo minori momento succurritur. Reverà nausæ, cardialgiæ cum clamorosa siti, atque animi deliquia plerumque comitantur hunc morbum, cum æstu, & jactatione perpetua: Pulsus parvus est, celer, frequens, inæqualis, qui, si extrema perfrigerentur, veluti formicans evadit.* Ita Galenus, ut lib. de art. curat. ad Glauco. Cholera morbo

morbo affectos sæpe animo deficere prædicat ; ita de præ-
sag. ex puls. lib. II. cap. IX. scribit, vermicularem pulsum huic
morbo succedere solere. febris interdum abest : sæpius exci-
tatur ; aliquando acuta ; imò & non rarò maligna. sudor in-
terdum diaphoreticus ut dicitur (præcipuè si algeant exte-
riora) cum crurum , atque brachiorum contractura : Quæ
quidem postrema si contingant , æger sub 24. horarum spa-
tio ut plurimum jugulatur. Alterius generis Cholera , seu
sicca , in qua scilicet acrium duntaxat flatuum non humo-
rum , aut fecum , dolorifica , & laboriosa sursum , deorsum-
que eruptio est , cum febris plerumque vacuatione , sed atro-
ciori ventris dolore , tensione , & duritie , quæ quidem ma-
gis ad latera , atque ad coli speciatim regionem percipiun-
tur , ex allata Hippocratis definitione suam satis superque
diagnosim aperit.

III. Utraque Cholera in suas rursus species dividitur.
Atque quò ad humidam choleram , hæc duplex à Practicis
recognoscitur : Altera enim quæ legitima dicitur ; altera ve-
rò , quæ spuria. Prima , quæ à genuino bilioso humore , per
sævas gravesque externas , aut internas causas adeò depra-
vato , ut furibundus supra , infraque erumpens , non minùs
labem arguat visceris undè manat , quàm partibus ipsis , quæ
fertur , calamitosus sit. Hanc graphicè depingit Hippocra-
tes in V. Epidem. *Athenis virum cholera corripuit, vomebatque,
& deorsum dejiciebat & dolebat, & neque vomitus, neque de-
jectio sisti poterat; & oculi caliginosi, & cavi erant. & convul-
siones detinebant, ab alvo, & intestino profectæ, & singultus;
dejectio autem multò major erat, quàm vomitus... frigidus fa-
ctus est, & lavatus est multà valde calidâ à pudendis infernè,
donec superiores partes incalescerent.* Altera, quæ quidem me-
moratâ remissior est , ortum habet ab esculentis , aut in ven-
triculo ob causas internas , externalve per accidens vitiatis;
aut ex se vitiosis , qualia sunt pingua , oleosa , mellita ;
tum coctu difficilia , ut suille carnes , aliæque : aut nitrosa ,

*Vtriusque
Cholera spe-
cies varia.
Cholera hu-
mida alia
vera est,
alia spuria:
Vera, seu
legitima
rursus qua-
druplex;
nempe flava
simpliciter,
porracea,
aruginosa,
& nigra.
Ita Cholera
sicca alia
gravior est,
alia levior.*

aliterve salina , ut ervum , porrum , brassica , bellaria , dulciaria &c. aut corruptioni obnoxia , ut fungi , vel nimium humidi fructus , fugaces , præcoces , horarii ; Pepo , ficus , persica , cucumer ; Lac: Demum exurentia , aut enormiter fermentantia ; ut ova barbi , aromata , mustum , vinum meracum , generosum , aut non ritè defæcatum , aut Ponticum &c. Quæ quidem omnia , corruptâ naturali digestionem , in biliosum nidorem degenerare possunt &c. Hæc omnia , & alia insuper recolligit Hippocrates textu illo epidem. lib. VII. sect. VII. „ Cholera morbus contrahitur ex carnis esu , maximè verò suillæ crudioris , & ex cicere , & ebrietate vini odorati veteris , & insolatione , & usu sepia , locustarum , & gammarorum , olerum , maximè porri , & caparum , verum etiam lactucarum coctarum , & brassicæ , & lapati crudioris , & à placentis , & mellitis libis , & à fructibus horariis , & cucumere , pepone , & potione paratâ ex vini , & lactis mixtione , & orobis , & polenta recenti. Æstate præcipuè Cholera morbus , & febres intermittentes grassantur , & hæc quibus horrores superveniunt , sed cavere oportet. Tales autem morbos præcipuè quinta , septima , & nona judicant ; melius est verò ad decimam quartam usque observare. „ Hæc itaque spuriam Choleram respiciunt , cui ortum præbent in genere *alimento- rum humidorum cruditas , & acrimoniam quandam habentium corruptio* , ut scribit Galenus *comm. in lib. de rat. vict. in morb. acut.* Confirmatque Aretæus : Nam legitima Cholera non tam diu protrahitur. Hæc autem rursus est multiplex secundum varios biliosæ depravationis gradus. Nos commodè eandem dividimus in Choleram simpliciter flavam , in porraceam , in æruginosam , & tandem nigram. Flava , ut cæteris frequentior est , ita mitior ; quæ quidem ad auctæ cum vomitu biliosæ diarrhœæ malitiam non videtur transcendere. Deterior autem fit , imò ut plurimum lethalis , si cum sanguinis ejectione copuletur. Ita *Chartades* in VII. *Epidem.* cum

cùm bilis vomitui , & per alvum dejectioni recentis sanguinis excretio supervenerit , eâdem die mortuus est. Porraceæ, æruginosæ , aut nigræ Cholerae omnium deterrimæ sunt , atque ut plurimum , lethales , & ab externis , iisque ingestis vel inflictis , aut etiam (ut appositè satis loquebantur antiqui) intus genitis venenis , bilem à naturali statu enormiter remonentibus , originem ducentes : Quarum quidem singularum exempla inferiùs attexemus. Denique Cholera sicca duplicem non minùs in classem discriminatur : alia enim levior est , flatuum (ut ait Menjotius differt. *de Cholera*) è materia miti , incocta , ac pituitosa , à languido calore suscitatorum soboles ; alia acerbior , cujus flatus non modò , ut illi , tensivum suâ copiâ cient dolorem , sed acredine insuper partes sensibiles mordicant ; fiuntque vel ab alimentis , vel à flammea ventriculi dispositione vel ab ejus , atque adjacentium viscerum cruditatibus.

IV. Revera quemadmodùm alimenta plurima in flatus suop-
te ingenio abeuntia , ut ova frixa , cæpæ &c. sicca Cholerae
foventem , conjunctamque causam procreare possunt ; Ita ca-
lidæ viscerum intemperies , & phlogoses cibos vel ipsos lau-
dabiles , aut etiam hærentes veteres , vel recentes , crudita-
tes expandere in mordaces , & nidorosas particulas , inter-
no indè aëri innatantes , sive in morbidiores flatus permuta-
re valent , atque *ut igne lebetibus subdito* , inquit Hippocra-
tes lib. de flatibus , *copiosus vapor ab aqua ebulliente evellitur ,*
sic corpore concalesceto spiritus instar turbine convolutus , & vi
quadam sursum latus per os erumpit. Tum fervidi quoque hu-
mores acrium flatuum materiam suggerunt : Ipsam enim bi-
lem in flatuosam attolli habitudinem monstrant biliosæ deje-
ctiones , quibus flos spumeus innatat. Et sicuti si calci vivæ
aqua , aut cretæ , variisve testaceis acetum , aut sali tartari
spiritus vitrioli affundatur , ab hostili contrariorum congres-
su , vel , ut aliis placet , à subito motu similium ad se invi-
cem , fortis ebullitio excitatur , rarescunt effervescentes sub-
stantiæ,

*Causa utri-
usque Cho-
lerici morbi
leviter , &
quantum
ad praxim
suppetat , at-
tinguntur.*

stantiæ, atque in vapores tam citò dilatantur, ut sæpe continentia vasa disrumpi contingat; Ita si similes internis activioribus succis effervescentiæ, totaque subtilioribus eorum particulis, ulterius rarefactis, ad agminatim evolandum, subitéque displodendum, indatur conditio, causas mente assequemur sicciorum illorum flatuum, qui in sicca Cholera, præcipuè fortiori, à liquidis acriter excandescantibus, veluti per torrefactionem erumpunt. De bilis vitio in Cholera humida legitima, seu propriè biliosa, jam plura superius protulimus in II. Partis Cap. VI. §. III, præcipuè autem eam esse biliaris tincturæ efficaciam, ut pauca vitiiati, efferique hujus humoris quantitas, plurimos alios dissimiles succos, in secretionis, atque expressionis partem adactos, proprio colore inquinare valeat, hique postmodum sub eadem bilis Persona excreti, veluti homogenum enormis copię biliosum corpus astantium oculis obversentur; tum hujus morbi primigeniam causam bilem ipsam accensendam esse, ex statu bilis in felleo folliculo denatorum ab hoc morbo, manifestè compertum esse; & quidem quò ad primum: neminem latet ab humoribus fœdis, in aliqua determinata sede latentibus, probos succos, quibus illi commiscantur, vel ex universo corpore advocatos facillè contaminari. Ita venena assumpta, mochlica cathartica, aut deteriora alimenta non modò ventriculum, atque intestina lacerando, ac recrementorum colluviem violenter alliciendo, sed alibiles quoque succos potissimum corrumpendo, eosque cum incitata pariter bile confundendo, Choleram frequenter inferunt, ut brevissimo temporis intervallo multæ, meracæque bilis libræ sursum, deorsumque ingenti cum impetu erumpere videantur: undè etiam ratio videtur petenda procacis Cholæræ recursus; nempe à malè avulsa, è visceribus primigeniæ Cacochemiæ segete, oblitoque veluti fermento, puriores postmodum humores labefactante, cujus quidem actio ad usque totam sanguineam massam diffunditur;

funditur ; quam quidem ut plurimum eliquat , atque in cholericam ejuscemodi colluviem pervertit. Ita animadvertit Galenus lib. VII. *meth. med.* Cap. XI. hunc morbum non solum quibusdam accidere certis intervallis , omnemque corporis redundantiam educere , sed unà cum vitiosis humoribus magnam quoque bonorum partem evacuare. Quò ad alterum verò : non solum in hoc morbo interemptis fellea cystis easdem præ se fert contentæ bilis habitudines , respectu ad colorem , consistentiam , aliaque omnia , quæ in eadem , supra , infraque prius erupta , visa sunt ; sed insuper in iis , qui cholera passione , præcipuè legitimâ , extincti sunt , fellea vesicula multâ bilis copiâ præternaturaliter saturata deprehensa est. Ita in cholericâ affectione intra quatuor dies (ideoque legitimâ) denatis turgentem valdè hujusmodi folliculum , ac dilatatum bilarium porum vidisse refert Riolanus *Anthropogr. lib. II. cap. XX.* Ita etiam Diemerbroeckius *Anat. lib. I. cap. V.* , & in Sepulchreto Theophilus Bonetus , aliique : Aut ex adverso in horumce hominum ab hoc affectu extinctorum cadaveribus mala se protulit bilariorum ductuum conformatio ; qui nempe , vel nimis prope ventriculum se exonerarent , ad eundem facilè pro hujus morbi genesi exundandum , ut ex observatione *Anat. VI. Barthol. Cabrolii* ; vel adeò extarent angusti , ut bilis ad regurgitandum , ut dicitur , densoque aliquando agmine in intestinalem tubum irrumpendum adigeretur ; ut ex *Th. Bartholino cent. II. Histor. VIII.* Præceps cæterum , & ferè subita cholerae invasio , tum perniciosissimus in hac , simulque furibundus bilis per intestina , & ventriculum trajectus evincunt satis , humorem hunc ad hujusmodi inducendam affectionem insigniter solvi , simulque ingentem acredinem inducere. Ita affert Sylvius lib. I. cap. VII. §. xxxv. fluidam , vel fluxilem ultra naturalem statum , aut etiam turgentem bilem autorem esse cholerae , & diarrhoeæ , qualem etiam per purgantia fortiora gigni , & expelli constat ; at-

G g g g

que

que alibi *volatilisatam*, & tanquam *spiritualisatam*. Hoc pacto cholero huic humori dysenterica deest conditio; videlicet tanta tenacitas, per quam hærens intestinorum facibus, easdem exulceret. licet quæcunque sit ejusdem tenuitas, adhuc tamen intestini cellulis, mucisque irretiri potest, ut ejusdem proritandis superficiebus, atque hinc uberibus succorum promovendis expressionibus non imparem fore, in II. Parte dixerimus. Quâ verò ratione Bilis hæc, aut in sanguine, aut in hepatis promptuario, aut etiam in intestino, ex depravatorum alimentorum permissione, aut veneni ingesti aut intus geniti malitia, morfu, stimulisque sævissima evadat, ex aliis hujus Historiæ locis elucidari potest. Vult. Galenus lib. *de opt. sect. cap. xxiii.* Choleram, & arquatum ab eadem causa procedere; at verò astrictum hunc esse morbum, illum verò fluxilem; hinc similem ferè curationem postulare.

Prognosis
humida, &
sicca Chole-
ra.

V. *Bilis si suâ sponte aut infra, aut supra proruperit, difficilius sedatur.* Hippocrates *de locis in homine*. Hic textus ingens Cholericæ passionis discrimen patefacit. Revera Cholera in genere peracutum, & celerrimum morbum esse, eumque periculosa plenum alexæ, Hippocratis, Galeni, omniumque medentium sententia est: in specie verò *legitimam, acutissimam pariter, & periculosissimam esse, plerumque primo quaternario finire, rarissimè superare septimanam, ac fortasse nunquam.* ex iisdem oraculis, & praxi, Vallesius in *comment.* affirmat. Plurima sunt deterioris cholerae indicia, quæ ab epidemiis Hippocratis elici abundè possunt. Virium magnus, præcepsque lapsus, ut arbitrarii motus impotentia sequatur: Vocis insuper defectus: Caligo, atque excavatio oculorum: extremorum frigus: convulsiones, singultus cum assidua anxietate, nec non urinæ suppressione: acuta febris. Quodd si sanguinis pariter ejectio superveniat, aut ephidrosis cum syncope, aut animi frequenti deliquio; aut ardens febris, aut vigiliæ cum spirandi angustia, & fre-

frequentia , mentis alienatione , & delirio , linguâ asperâ , siccâ , aut nigrâ ; vehementiori jactatione : Præcipuè verò si strepitus descendens potus circa pectus , & ventriculum obaudiatur ; vermicularis pulsus se præbeat , aut intermittens , aut solummodò inæqualis : si cum interceptione pulsus frigidum sudaverit ; tum quæ evacuantur , pejora fiant : Conclamatus sanè æger est , ruitque ad citissimam necem. Ita *Chartades* , in quo plurimorum hujusmodi symptomatum congressus extitit , præcipuè verò *strepitus descendens potus circa pectus & ventriculum* (quod quidem symptoma Hippocrates *pestimi* nomine ab aliis distinguit) sub uno die mortuus est. Cholericæ passio à flava simpliciter bile ortum ducens , minùs in genere periculosa est porraceâ : Hæc verò deterior est æruginosa : Livida tandem & nigra omnium pessimæ , atque ut plurimum lethales. Pessima insuper , quæ in maligna febre , & pestilenti contingit ; quæ à veneno profecta est ; illaque ulterius , quæ loturæ carnis simile quidpiam excernit. Cholera humida non nisi in Lypiria biliari critica , & salutaris dignoscitur , quam quidem exolvit , ut inferius videre erit , cùm hujusmodi febrem excutiemus ; atque ad solum hunc casum quadrat Aphor. II. sect. I. : *in perturbationibus ventris , & vomitibus , quæ spontè fiunt , si qualia oportet purgentur , confert* : de cætero , semper toto genere symptomata dejectio est , atque à vehementi irritatione progenita sursum , deorsumque humoris concitatio hujusmodi , atque commotio. Sed sicca Cholera ex se minùs , quàm humida , discriminis habet , cùm tanta ab erumpentibus suis deque flatibus , quanta à crebra per alvum , & ventriculum dejectione , non immineat calamitas : atque cùm primigenius plerumque hic morbus non sit , at prævios alios pro causa morbos recognoscat , id certè omne quod erit in hoc morbo metuendum , à primariæ affectionis ratione æstimari continget.

Curativa,
mixtaque
indicationes
in genere
Cholera hu-
mida legiti-
ma simplicis.
In specie ve-
rò Curatio
ex Hippocr.
per emetica,
astringenti-
bus inter-
mixta, cali-
dosque fatus.

VI. In hoc igitur morbo, per quem simul evertitur super-
nus, & infernus venter, neque continere se possunt
ægroti, quin simul dejiciant, & vomant, frustra, neque
sine magno periculo tentatur astrictio, antequàm copia ex-
crementi vacuata sit. Quum ergo, ut ait Vallesius, evacua-
tiones videntur processisse satis copiosè, & vires non ad-
huc labascunt plurimùm, neque cohibendum, neque pro-
vocandum est, sed occurrendum solùm aliis symptomatis:
Sin autem jam videtur processisse plusquàm pro excremen-
torum in corpore abundantia, aut plusquàm pro virium
robore; sistendum: Sin autem irritatio, dolor, & anxie-
tas sit major, quàm pro magnitudine evacuationis, & eva-
cuatio minor quàm pro multitudine excrementorum; ex-
purgandum est; ut copiâ affatim vacuatâ valeas occurrere
symptomati, quod in nimia expulsione est. Verùm quia sym-
ptoma vel à principio urget, & irritatio nunquam per hunc
morbum omninò tollitur; neque cùm expurgamus symp-
toma negligere, neque cùm cohibemus irritantis succi obli-
visci debemus. Idcirco mixta semper est hujusmodi morbi
curativa indicatio, quæ scilicet expurgantibus, & extergen-
tibus, simulque cohibentibus, tum delinquentis succi sub-
tilitatem incrassantibus, mordacitatem hebetantibus innita-
tur. Quamobrem Hippocrates ad perniciosissimum hunc mor-
bum, quò ad febrem, æstuationes, dolores, convulsiones,
singultus, perfrigerationes, virium læsiones, & præcipuè vo-
mitus, & alvi fluxus majores, vel minores, in diversis æ-
gris dispari symptomatum conditione stipatum, imò in iis-
dem ægrotantibus non rarò antipræxiis obnoxium, præci-
puè juxta varia anni tempora, varium medelæ genus ad-
hibuit. Ita cùm in viro Athenis cholera præhensio dejectio
multò major esset quàm vomitus, intestinaque magis essent
affecta quàm ventriculus, ratione revulsione emeticum ex
elleboro propinabat; nitens hoc pacto præter copiosam, su-
bitamque peccantium succorum ejectionem, ut per magis
affectam partem corpus non expurgaretur. miscuit verò elle-
borum

borum cum succo lentium, ut expurgans adstrictorium faceret; qui nempe succus, docentibus Dioscoride, & Galeno, adstringendi vi pollet, valdeque ad choleram, & dysenteriam præstat. Idcirco maximam, expletâ vomitione, hujus succi epotandam copiam exhibuit; undè ambæ excretiones sedatæ sunt. Cùm autem ægrotans frigidus fieret, & convulsiones desinerent, usus est multo aquæ valde calidæ fotu à pudendis infernè, donec superiores partes incallescere; & servatus est. Partium autem inferiorum ex aqua calida fatus non quidem ad balneum referendus est, cujus usum immodicum hoc in morbo Asclepiades, atque Praxagoras usurpabant; sed refrigeratarum, & contractarum partium remedium accommodatum est, citra ullum, quod fortè à balneo gliscere posset, discrimen. Quòd si balneum adhibendum sit, hoc certè post integram duntaxat expurgationem utendum, juxta illud Galeni *Isagog.* fol. 56. *Remedio contractionibus sunt perfusiones calidæ: in iis, quæ contrahuntur, balneum post expurgationem.*

VII. Quòd si in Cholericâ passione tantus accedat bilis fervor, & acedo bilioso succo, ut hic intestina exulcerare valeat, undè sursum, & deorsum prodire cum eodem sanguis videatur; præstantius nullum remedium invenit Senex copiosissimo aquæ frigidæ potu, & insuper refrigerantibus & frigidis succis, per os, atque clysteres usurpatis. „ Larissæ Onesidem famulæ, *affert ille V. Epidem.* exulceratus est venter, & intestinum à bile spontè commota; & bilis, sanguisque sursum, & deorsum prodibant, febrisque detinebat. Huic debili datum est in potu medicamentum deorsum purgans, debile, aquosum, & paucum, ex quo multum vomuit, & plura prodierunt per inferna, & vesperi redierunt. Postridie verò febris aderat, sed debilis. venter autem exulcerabatur, eademque adhuc egerebat. Tertiâ autem die mortua est sub vesperam, febre admodum vehementi correpta. Hæc autem

Curatio Cholera humida legitima cum exulceratione cibarii tubi, atque inde effusione sanguinis sursum, & deorsum, per potum aqua frigida, atque omnigenum summè refrigerantium usum.

„ videbatur omninò moritura , minimè verò quandiu epotâ
 „ aquâ frigidâ vomitus detinuit. Postquàm autem refrigeratus
 „ est venter superior , & aquâ perpurgatus, succus frigidus pro-
 „ pinatus est , idemque per Clysterem infusus „ Hæc Hip-
 pocrates. Ubi animadvertendum est , in hoc insigni vene-
 norum , quæ in nostris corporibus sponte gigni solent ,
 exemplo , in quo nempe ob deleteriam bilis indolem tan-
 ta repentè exulceratio facta est , Divinum Senem digitum
 intendere potissimùm ad potus aquæ frigidæ utilitatem. nam
 cùm asserat *Tertiâ die mortuam esse hanc famulam sub vespe-
 ram , febre admodum vehementi correptam. Addit Hæc autem
 videbatur omninò moritura , minimè verò quandiu epotâ aquâ
 frigidâ vomitus detinuit.* Id est morbus hic erat insuperabi-
 lis , quoniam non ob frigide , & omninò refrigerantium
 usum , qui accommodatissimus extitit , ægra vitâ defuncta est,
 imò verò hâc fuisset servata , si servari potuisset. Verum fe-
 cit humor morbum incurabilem , antequam repugnare pos-
 set ars medica. Ita tam ardens bilis refrigerari non potuit,
 atque fœmina vel *detento* ab aqua frigida vomitu , à febre,
 ejusque tertio vehementissimo accessu jugulabatur. fuit enim
 febris tertiana continua , quæ primâ die eam tenuit , po-
 stridie debilior aderat , tertiâ autem rursus vehemens, com-
 munem idcirco bilis conditionem sequuta. Interea curatum
 est , antequàm peccantis succi qualitati succurreretur , ejus-
 dem copiam minuere , assumpto pharmaco deorsum pur-
 gante ; Pharmaco verò *debili* , cùm ægra esset debilis ; non
solido , ne fortè partibus hæreret , sed *potabili* , & *aquoso* ,
 hoc est multâ in aqua dissoluto , ut facilè elaberetur ; Pau-
 cò autem , quòd multum , non videretur posse sustinere. Ut
 jam cluceat , quàm diversa Magistro fuerit ratio curandi hanc
famulam Onesidemi , atque illum superiùs adductum virum
Athenis degentem ; cùm hi eodem quidem morbo , sed di-
 versis accidentibus stipato laborarent. Annotandum tamen
 venit,

venit, febrem, Cholerae morbo adjectam, frigidae potionis usui per plurimum Interpretum sententiam adversari, ut solum hoc affectu citra febrem laborantes respicere videatur Galeni consilium *lib. de remed. parat. facil.* frigidae potum prebendi: Qui insuper author (supposita semper vacuatione febris) optimè addit eodem loco: *Si is, qui affligitur, quadrato sit habitu, in frigidum inducito lavacrum in quo diutius permaneat.* Ut hinc inferendum sit, Hippocratem ideo in memorata aegrotante frigidae, & summè refrigerantium usum fuisse amplexum, quod tantum perniciosae bilis fervorem, & impetum alio remedio quolibet oppugnari non posse censeret: seu in raræ vehementiæ morbo raro quoque medelæ genere fuisse usum; Quo quidem tam ardentis bilis occursum æquali refrigeratione itum est. In hypercatharsi acerrimæ bilis cum febre, ventri multâ frigidâ affusâ alvi fluxum sedabat in gravida muliere Hippocrates; cujus historia inferiùs habebitur sub tit. Historiæ V.

V I I I. Celeberrimus inter modernos practicus Thomas Sydenham animadvertens, æquè in genere periculosum esse, principio Cholerae morbi acres, simulque crudos humores cathartici perturbare, novos eorum, ac concitiores excitare tumultus, atque omnia, sus deque vertere, quàm ex adverso medicamentis narcoticis, aut astringentibus in ipso limine humorum impetum compescendo, noxium, invitumque humorem detinere, sicque intimiùs visceribus affigere; nec non ex advena planè inquilinum reddere; intermediam viam, tutiorem idcirco, expeditioremque, amplexus est, solemnem videlicet totius cibarii tubi ablutionem; quâ quidem hostilis humor partim blandè, tutoque evacuatur; partim etiam diluitur, simulque à viscerum implexu verritur, atque abstergitur. Longum tenerioris pulli jusculum præparat, hujusque (vel defectu ejus, liquoris possetici) Capaciores aliquot cyathos ut æger tepidè exhauriat, jubet; eodemque tempore bonâ ejusdem quan-

Curatio hujusmodi Cholera morbi per largam eluvionem, & paregorica.

quantitate pro concinnandis *enematis* successive injiciendis uti docet ; donec quâ per superiora, quâ per inferiora , tandem omne jusculum absumptum , ac denuò rejectum fuerit. Hisce haustibus pariter , ac clysteribus interdum , violam , lactucam , portulacam , & similia intermiscet. Ita ventriculo insigni liquoris quantitate sæpiùs onerato , & veluti subverso , ac reiteratâ enematum injectione , humores acres , virulentosque , vel foras eliminari , vel retusâ acrimoniâ ad debitam temperiem revocari pollicetur expertissimus Author. Revera quemadmodum viscerum hujusmodi in Cholera morbo abluvium fuisse Antiquis comprobatum testatur illud Hippocratis lib. II. de morb. vulgar. *vomitum sedat Calida in potu adhibita , & vomitione reddita* ; ita largâ , atque creberrimè reiteratâ calidæ , seu potiùs tepidæ epotatione , vel citra aliud remedii genus , ferocissimas cholericas passiones comprimi non rarò conspeximus. Ne tamen interea visceribus noxa fortè aliqua ab aquæ cruditate induci queat , hosce ipse morbos jure pulli per nymphææ , & althææ radices alterato abluere consuesco. Pergit indè , cl. Sydenhamius per novum , idque efficacissimum remedii genus Cholerae curam absolvere : exantlato enim eluvionis hoc penso (quod tres vel quatuor horas sibi vendicat) medicamento aliquo paregorico præcipuè Laudano liquido , secundùm symptomatum , præcipuè doloris , vomitus , & dejectionis vehementiam variis dosibus , tum crebriùs , aut rariùs per debitum vehiculum exhibito , curationi coronidem imponit. „ At verò , *Addit vir accuratissimus* , diligenter est animadvertendum , quòd si non accesserit medicus , nisi postquam æger , vomitu , ac dejectionibus ad horas aliquot protractis , exhaustus fuerit , & jam frigescant extrema membrorum ; hoc , inquam , casu , omissis aliis quibuscunque auxiliis , recto cursu ad sacram hujus morbi anchoram , *laudanum* intelligo , confugiendum est ; quod non tantùm exhibendum est urgentibus symptomatis , sed „ etiam

„ etiam cessantibus vomitibus , ac diarrhoeâ manè , & se-
 „ rò quotidie repetendum , donec pristinas vires æger, ac sa-
 „ nitatem tandem receperit „ & demùm annotat , hujusmo-
 di Choleram morbum legitimum , si epidemicus sit (qua-
 lem reverà per ann. 1669. ipse describit) rarissimè Augusti
 mensis, quo primùm cœpit , terminos excedere : Qui au-
 tem Epidemicus non sit , & præcipuè ab ingluvie , crapu-
 la , horariis fructibus &c. excitatus affectus , nullo tempo-
 ris discrimine accedere ; at verò propriis phænomenis satis
 ab alio distingui.

IX. Ex his itaque omnibus tota effulgère poterit humi-
 dæ , legitimeque Cholericæ affectionis exquisitior curatio ,
 ut omittenda censeam remedia varia , quæ pro specificis in
 hoc morbo , ab authoribus plurimis decantantur : Qualia
 sunt serum lactis ad efferum diluendum humorem : tinctu-
 ra rosarum , aut conserva rosar. rubr. vitriolata ad attempe-
 randum : Tinctura corall. bolus armenus , Terra Lemnia ,
 aliaque fixa alcalica , aut etiam testacea , pro indomitâ bi-
 le edulcorandâ : Aqua mulsa pro ciendo vomitu : Decoctio-
 nes myrobalanorum ad astringendum , atque insuper gelati-
 næ eboris , C. C. & similium : Acida varia ad palantes fi-
 gendos succos , ut quæ per expressiones , syrupos &c. para-
 ri possunt è limonibus, citriis malis, cidoniis, melpillis, gra-
 natis, agresta , ribibus , berberis & cumprimis oxycraturum
 &c. insuper ad eundem scopum santali , crystallus , Tro-
 chisci de thure , aut charabe , tum in vacuatione febris
 mentha in vino sumpta , summooperè à Galeno commendata,
 præsentè verò febre ejusdem succus : Ad refrigerandum aqua
 aut succus portulacæ, acetosæ, plantaginis, acetosellæ &c. De-
 nique ad purgandum aloë ; ad purgandum , simulque ad-
 stringendum rhabarbarum tostum , aut etiam crudum. Id
 tamen hîc loci opportunè de rhabarbaro memorandum cen-
 seo ; remedium hujusmodi , in calidioribus bilis morbis ,
 calidâ præcipuè , ficcâque hepatis intemperie comite , valdè
 noxium

H h h h

*Plura ab
 Authoribus
 in hoc mor-
 bo pro speci-
 ficis habita.*

noxium deprehendi. Ita Hollerius de morb. intern. lib. i. cap. XXXVIII. de oppilat. Hepat. in schol. *Rhabarbarum aiunt hepatis vitam esse. Calidiore tamen, & sicciore hepate, mors potius dici debet.* Quod quidem effatum assidua praxis confirmat. In Cholera igitur morbo cum simili jecoris affectu erit ab hoc remedio prorsus abstinendum.

*Vitæ ratio
in Cholera
humida.*

X. In Cholera morbo tenui victu utendum est, non vigente solum, sed quiescente morbo. Ita vir ille ex Hippocrate Athenis Cholera correptus, cum jam à morbo evaderet postridie tenuem adhuc polentam bibebat, seu aquam, in qua pauca farina soluta fuerat. Et sanè cum in hoc morbo summè, subitoque ab enormibus ejectionibus atterantur vires, & stomachi præcipuè functio exolvatur, & concidat, aut à noxii humoris irruptione, atque exundatione impediatur, tenuis, & exiguus cibus à debili etiam facultate commutari potest, plenus verò eandem obruere. Lentus insuper, & dulcis: monente Vallesio, adhibendus est cibus, ut lentore hæreat, retineaturque, aliaque retineri faciat; & si quid reclusum, aut excoriatum maneret, obturet, & obliniat: dulcedine verò, si quid superesset irritans, obtundat. Ita macris juribus ad alendos ejuscemodi ægrotantes, exiguis quidem, sed frequentibus utimur. Vix amyla, seu succos carniū, præcipuè assatarum, aut pullorum, aut hordei cremorem, ad reficiendas suaviter vires, interdum intermiscemus. Vinum angue pejus fugiendum est, præterquam in forti, & contumaci deliquio, aut imminente syncope. Somnus in hoc affectu valde proficius est, ut temperatus aër.

*Curatio
Cholera hu-
mida spuria,
ex Hippo-
crate.*

XI. Cholera humida spuria, seu à comessatione, ebrietate, aliisve ciborum erratis progenita curationem ipse describit Hippocrates lib. de affectionibus: quam idè referre operæ pretium arbitror, " cum ex vino, aut comessatione Cholera prehenderit, aut alvi profluvium, ad alvi quidem profluvium jejunium confert, & si sitis detineat, vinum dul-

„ dulce exhibendum (*intelligit ut puto Hippocrates deesse fe-*
bem, ut revera in nothâ hâc Cholera plerumque non micat) aut
 „ uvarum dulcium retrimenta. Sub vesperam autem ea-
 „ dem danda, quæ à medicamento purgatis dantur. Quòd
 „ si non sedetur, sedare autem velis, vomitum post cibum
 „ aut lenticulæ decoctum excitato, confestimque per infe-
 „ riora secessus sursum revellitur, sique lentium, aut cicc-
 „ rum cremore eliceris, sic quoque quodammodo sedabitur.
 „ Ad Choleram autem confert, siquidem dolor detinet, ea
 „ dare, quæ in medicamentorum tractatione dolorem se-
 „ dare, scripta sunt. Venter autem tum superior, tum in-
 „ ferior potionibus madefacientibus curandus, corpusque,
 „ excepto capite, balneis calidis emolliendum, sicque fa-
 „ cilius vomitus contingit; & si quid humidi subierit, quæ
 „ molesta sunt sursum revomuntur, & per inferiora secef-
 „ sus magis prodit. Quòd si vacuus fuerit, cum vi evo-
 „ muntur, & violentius secedunt. Sub vesperam autem eti-
 „ am ei exhibeto, quæ ei, qui medicamento purgante usus
 „ est, exhiberi solent. At verò dolores, qui ex vini po-
 „ tione, aut comestatione contingunt, oriuntur cùm cibi,
 „ & potus solito copiosiores in ventriculum subierint, quæ-
 „ que foris corpus supra modum calefacere solent, bilem, &
 „ pituitam agitant.

XII. Denique Præceptor, Cholera citra ventris fluorem, *Curatio*
 & vomitum, seu à flatuoso duntaxat supra, & infra erum- *Cholera*
 pte acerrimo spiritu productæ (quam siccam dicimus) *sicca, ex eo-*
 curationem instituit *dem Hippo-* *crate.* *Ita affe-*
 „ ctus, ait postquam allatam superius hujus morbi descriptionem
 „ attulerit, ne vomat videto, verum ut alvus subducatur.
 „ Infuso igitur per Clysterem calido, & perquam pingui
 „ quàm citissimè utitor, perunctumque in calidam quam-
 „ plurimam in folio collocatum, calidâ sensim affusâ demit-
 „ tit. Et si cùm calefactus fuerit, alvus subducatur, mor-
 „ bus solutus est. Huic etiam dormire confert, & vinum

„ tenue , vetus , ac meracius bibere. Oleum quoque exhi-
 „ beto , ut quiescat , & alvus subeat , ac solvitur morbus.
 „ Ac cibus , atque omnibus aliis abstineat. Quòd si dolor
 „ minimè remiserit , lac asininum , donec purgatus fuerit ,
 „ propinato. At si alvus liquida fuerit , & bilis subduca-
 „ tur , torminaque vexent , vomitiones , & suffocationes ,
 „ iis optimum est quiescere , aquam mulsam bibere , ac
 „ minimè vomere , Hæc Hippocrates. Plurima adjici hîc pos-
 sent circa rationem curandæ febris , quæ interdum hunc
 morbum sectatur (quam etiam tradit Galenus VIII. *meth.*
med. cap. V.) tum circa specifica remedia flatus discuten-
 tia , atque educentia , usumque præcipuè paregoricorum ,
 quæ quidem in hoc morbo non minùs proficua deprehen-
 duntur. Sed nos humidam , legitimamque , seu biliarem
 præcipuè Choleram , describere aggressi fuimus.

HISTORIÆ

Cujuslibet CholERICI morbi Speciei.

HISTORIA I,

*Legitimam ex flava ; sed colorationi Bile , Cholericam
 passionem exhibens , ex Hippocrate V. Epidem.*

„ **E**Utychidem ex Cholera morbo distentio nervo-
 „ rum in cruribus corripuit cum inferna alvi de-
 „ jectione. Bilem impensè coloratam , multam , & valde
 „ rubram per tres dies , noctesque evomuit , & impotens erat ,
 „ & anxius. Nec quicquam ex potu , aut cibo continere
 „ poterat , & urinæ multa aderat suppressio , & meatus in-
 „ ferioris. Per vomitum fex mollis prodiit , & deorsum
 „ erupit. »

HIS-

HISTORIA II.

Cholera morbus porraceæ Bilis, à veneno pro-
genitus, & à nobis feliciter curatus.

JUvenis mercator Judeus ad finem Julii 1723. noctu si-
tiens, multam aquæ, loco sacchari, septem circiter drach-
mis arsenici per errorem in tenebris saturatæ, copiam po-
tabat. cito viscerum torminibus, intensoque ardore cum siti,
& enormi vomitu conflictabatur. Vomebat acria, & ama-
ra. Atque uberrimis aquæ haustibus ventriculum abluvendo,
opportunos indè, ad ingesti veneni expulsionem, vomitus
fortè fortunâ per totum noctis reliquum provocabat. Ma-
nè ipse accersitus Cholericâ passione, seu creberrimis viri-
dissimæ bilis per vomitus, & sedes dejectionibus, cum in-
tenso ventris cruciatu, acerrimâ siti, cardialgiâ, febre,
depresso pulsu, simulque celerrimo, nec non sensibili ex-
tremorum perfrigeratione correptum Juvenem deprehende-
bam. Jamque diluculo largissimam olei amygdalarum dul-
cium, lactisque quantitatem alternatim assumpserat, simulque
per vomitum rejecerat; tum gelatinam quandam à Phar-
macopeo exhibitam ingesserat, quam pariter vomitu red-
diderat. novam amygdalini olei quammaximam dosim, la-
ctisque Caprilli similem impero: CrySTALLI syrupum, spe-
cificum, huic veneno præsidium, mente volvebam usurpan-
dum; cùm Illustrissimus, expertissimusque D. Petrus Paulus
Richa S. M. Confiliarius, & Primarius medicus in confi-
lium pariter accitus, in hujus remedii celerem, frequentem-
que indè usum urgebat. Clysteres inditi sunt ex vitulorum
intestinis, aliisque pinguibus, atque emollientibus compo-
siti, qui alvum biliosis excretionibus abundè madentem fa-
cilè ulterius ducebant. Dolebant Epigastrium, & Caput: suf-
fusi

Hhhh 3

fusi oculi : ardentissima sitis : Lingua rubicundissima , inflammata , & quaquaversum æqualiter dura : Ingens gutturis ardor. Cholericæ porraceæ saturatæ bilis per vomitum , ac sedem ingentes ejectiones primâ , alterâque die incessanter sæviebant. Copiosis diluentibus , ac lubricantibus crebrò calica ex pul. margarit. & ocul. c. pp. intermiscebantur. Ad finem secundæ , graviter habuit : exteriora enim omnia perfrigerata impensius sunt , usque ad quartam non amplius recalescentia : Interna verò urebantur cum vehementissima febre. Vigilabat ; Clamosè sitiebat ; nihil alimentorum præter ovorum vitellos retinebat. Tumebat venter , & dolebat acerbius. Quædam liquidi laudani Dosis aliquoties repetita pacare omnia extemplò videbatur ; Dormiebat eger, Parùm vomiebat, vixque dejiciebat : Tormina veluti per incantamentum comprimebantur : emollitus venter est ; lingua mollior minúsque rubra ; Placidior sitis ; febrisque sat levior reddita. Ad finem tertiæ , porraceæ dejectiones, ejusdemque generis vomitus recrudescebant : Omnia tamen quàm in principio tolerabiliora. Noctem interea laboriosè transigit. Quartâ , ad utrumque cibarii tubi extremum , seu ad guttur , & anum , infestissimus ardor erumpebat, manebatque , gravem inflammationem minitans , qui licèt topicis demulcentibus variis exceptus , contumax adhuc furebat , vigebatque ad usque decimam quartam. Totus hujusmodi cibariæ fistulæ tractus , præcipuè epigastricus , internè , & externè ab epiceraisticis , & oleosis leniebatur assidue , ut ab hoc inflammationis , indèque fortasse necrosis discrimine removeri posset. Quintâ , sextâ , septimâ , & octavâ , tensio , inflatio , & durities ventris , nunc majores , nunc minores occurrebant : Dolor interea ad ventriculum acerbior ; manebat febris , interdiu mitior , noctu vehementior : somni aliquot exigui , contumacibus vigiliis intermixti. Rarè vomiebat. Tenesmus aderat perpetuus , qui nunc clysterum opere , nunc etiam spontè in profusas evacuationes solvebatur.

batur. Neque virides his diebus quisquiliæ, sed saturatè flavæ, sinceræ per sedes depulsæ, cibariis verò substantiis per vomitum intermixtæ, eæque satis copiosæ habebantur. Vulnerariæ potiones adhibitæ sunt. Constans erat faucium, & podicis inflammatio. Modicæ per totum morbi curriculum urinæ. Nonâ dormiebat. excretiones modicæ: Remissior febris cum molliori ventre. Cassiæ uberioris tincturâ ex lib. IV. feri lactis elicita ad decimam diem eluebantur ægro-
 tantis ventriculus, & intestina. Venter, pulsus, febris, memoratique extremorum œsophagi, & recti intestini ardores, cæteraque omnia, copiosis accedentibus excretionibus, valdè melius habuerunt. Concoctas in primis urinas dedit, & multas. Undecimæ principium, calidiuscula febris excepit, ut omnia nonnihil exacerbata viderentur; sed finis placidus erat, atque tranquillus: minima sitis: vix febricitabat: Biliosa multa spontè dejecta sunt. urina pariter multa sed tenuis, bonâ tamen hypostasi instructa. Ani ardor ferè deletus erat, sed gutturalis adhuc sensibilis. Duodecimâ ex cassiæ ꝑss. feri lactis depurati lib. iß. nova eluvio instituebatur. Res optimè cessit. Decimâ tertiâ novę excretiones, hæque virides cum levamine apparebant. Decimâ quartâ nocturna extabat febricula sine ullis symptomatis. Decimâ quintâ serum lactis largè propinabatur. Decimâ sextâ, pulsus ferè ad apyrexiam redactus erat; sed adhuc fervidæ illæ ab oculis eruptiones vigeant, quæ similibus ex utraque nare eruptionibus successerant. Quippe, cum in morbi vigore viderentur ægrotanti binæ igneæ columnæ è naribus per expirationem, ceu bina accensæ interiùs fornacis spiracula, erumpere (tanta est arsenicalis ignis, vel in ipsismet viscerum, & sanguinis penetralibus, potestas) hoc symptoma ad decimam quartam cesserat, locumque dederat simili, sed quidem mitiori, ad utrumque oculum veluti erumpentis igniculi sensationi. Ulcuscula cæterùm ad os & ad linguam, quæ à die duodecimâ erupta fuerant, sen-

sensim, dissipabantur. Sed ad finem decimæ sextæ è lecto dis-
 filiens egrotus, huc, illuc per conclavia juvenili permotus
 impatientiâ versabatur adeò, ut per nimiam agitationem,
 novam quandam sibi febris periodum compararet. Decimâ
 septimâ virides adhuc, fervidasque sedes, summæque fe-
 tentes habebat. Caput plenum, grave (ut toto contigit
 decursu morbi) atque admodum infirmata visio. Paucula
 adhuc febris. Decimâ octavâ purgabatur cum syrupo aureo
 rosar. solut. & ebul. Agarici. Plurima flavi, & concocti
 evacuatio. Desinebat febris ad decimam nonam; Vigesi-
 mâ tamen restitui aliquantulum videbatur. Per singulos hos-
 ce dies serum caprilli lactis largè epotatum intestinalem mi-
 rè abstergebat fistulam, crebrasque dejectiones, ut plurimum
 flavas, interdum adhuc viridiusculas promovebat. Vigesi-
 mâ primâ viridia adhuc dejecta sunt; clariora verò ad vigesi-
 mam secundam; quâ quidem die postrema catharsis submi-
 nistrata fuit: Ultra quod tempus æger à morbo jam satis
 expeditus, probo victus regimini traditus, paulatim reva-
 luit. Notabilis igitur extitit ille veluti flammeæ exhalatio-
 nis sensus, prius è naribus, mox ex oculorum hiatibus.
 cum enim arsenicalis ignis, gliscens in sanguinem, fervo-
 rem suum non minùs in liquida, quàm in perluta à liqui-
 dis solida propagare valuisset; Primum exhalabat, & velu-
 ti displodebat accensio ex ventriculo, & intestinis, quibus
 quidem prima indebatur impressio; fortasse etiam & à pul-
 monibus, in phlogosis partem advocatis: secundò verò ex
 capite, ubi à perluyente sanguine altera præstita fuit impres-
 sio. Revera postremum Symptoma, cæterisque superstes ex-
 titit gravedo capitis plurima, cum visu debili, tenebroso
 &c. à quo non nisi post longum tempus evadebat. Imò quan-
 dam ulteriùs super nervos, ipsosque musculos fuisse indu-
 ctam à veneno deleteriam pravitatem ex eo patet, quòd
 manus contrectando scriptorio calamo, aliisque obeundis
 muniis vix diu pares se fecerint. Ille interea in morbi vi-
 gore

vigore ad utramque cibariæ fistulæ extremitatem excitatus fervor intensior, boni certè ominis fuit; Qui nempe criticam venefici stimuli ad exteriora inchoatam protrusionem indicabat: Veluti cùm criticus dysenterix Tenesmus supervenit.

HISTORIA III.

Sen Observationes Cholerae Morbi ab Æruginosa Bile.

„ **I**lla Bilis, quæ in Cholera, & infantium multorum diar-
 „ rhœis copiosa ejicitur, est acris, & plerumque eru-
 „ ginosa, eaque talis in apertis hujusmodi ægrorum ca-
 „ daveribus semper admodum copiosa à me inventa fuit in
 „ folliculo fellis, & paucissima, vel nulla in ventriculo:
 „ Quod certum indicium est, eam effervescentem ex fol-
 „ liculo erumpere in intestina, & ventriculum, non ve-
 „ rò in hoc generari, De Diemerbroeck *Anatom. Lib. I.*
Cap. V.

HISTORIA IV.

Cholera Morbus ex Bile atra, Lethalis.

„ **A**ppositè ex Hippocrate Cornelius Celsus: & is con-
 „ sumitur, cui protinus in recenti morbo, Bilis atra vel
 „ infrà, vel suprà se se ostendit. Cujus effatì veritatem de-
 „ monstrat, non quælibet succi melancholici excretio: ut-
 „ potè quæ interdum ex usu est. sed potissimùm illa Bi-
 „ lis atra, quam produxere vel lienis atonia, ventriculi in-
 „ temperies, vel intestina, sive inflammata, sive sydera-
 „ ta. Quæ autem à dissoluto lienis tono, illa præfagit
 „ lentam, ut quæ ab inflammato intestino, citam mortem.

„ Auri fabrum Brabantinum , diu vexatum , à præcordio-
 „ rum angustia , pancreatis obstructione , liene indurato , &
 „ novissimè ab effera atre bilis ebullitione , invasit tandem
 „ tam impetuosa , ejusdem bilis supra , infraque excretio ,
 „ ut dejectis indè viribus , cogeretur ante mensem secun-
 „ dum , vitam cum morte commutare. Effluebat autem hæc
 „ bilis per utramque viam tam effusè , ut omnes mirare-
 „ mur , hinc ejus copiam , illinc verò vires , tanto profluvio
 „ pares. Erant quippe dejectiones hæ sine ullâ fermè in-
 „ termissione , & ita nigræ , ut atro sanguini , ac luto
 „ paludis cœno forent simillimæ. Quibus tamen indefinen-
 „ ter , ut fluctus fluctum , se se trudentibus , excessit tan-
 „ dem æger , haud invitus , è vita , Nic. Tulpii Observat.
 medicar. lib. II. cap. XXI.

HISTORIA V.

*Cholera mortifera Viellina Bilis , ab Hypercatharsi
 in Gravida : Estque à V. Epidemiorum
 Hippocratis deducta.*

„ Uxor Antimachi Larissæ uterum gestabat quinquagin-
 „ ta circiter diebus , & reliquo tempore præ fastidio
 „ à cibo abstinebat , & septem diebus uteri , & oris ven-
 „ tricoli dolore afficiebatur , & febris eam corripuit , ex
 „ quo tempore nihil dejiciebat. Huic propinatum est me-
 „ dicamentum purgans , vehementius quàm oportuit ; &
 „ evomit bilem adustam propter cibi abstinentiam , & fe-
 „ brem , neque enim ullo utebatur potu ; paucam autem ,
 „ & violenter vomuit , & grumofam. Ac postquàm com-
 „ mota est , eam dejiciebat , & debilitata videbatur , nec
 „ epotâ aquâ voluit evomere. Postea autem ventrem infe-
 „ riorem vehemens dolor corripiebat , exulceratus enim
 fue-

„ fuerat à medicamento , & statim post stercus subcruentum.
 „ quid ramento simile deiecit. semper autem augebatur &
 „ debilitas , & anxietas , & usque ad quinque cotylas ex-
 „ purgata erat. Substitit autem alvus multâ aquâ ventri affu-
 „ sâ , nihil quippe aliud poterat admittere. mortua est cir-
 „ ca mediam noctem. vivere autem posse videbatur , si po-
 „ tuisset aquam bibere , & statim ante medicamentum epo-
 „ tum vomere ,

HISTORIA VI.

Humida Cholera , sed spuria ; Descripta ab
 Hippocrate *De morb. vulgar.* Lib. V.
 Sect. VII.

„ **B**las pugil , suapte naturâ vorax in Choleram morbum
 „ incidit ex carnum esu , præcipuèque suillarum cru-
 „ diorum , & vini suavis ebrietate , ex bellariis , ac dulcia-
 „ riis , cucumere , pepone , lacte , & polenta recenti ,

HISTORIA VII.

Cholera Sicca.

Vir quidam hypochondriacus studiis , simulque victus in-
 temperantiis deditus , annum nunc agens quinquagesi-
 mum , æstate , & autumnò siccâ Cholera frequenter corri-
 pitur ; præcipuè si ira , aut fervidus alius in animum affe-
 ctus ingruat. Tumet illico abdomen , atque in enormem
 tensionem quaquaversum adigitur , cum cruciatibus maxi-
 mis , præcipuè ad ilia , & epigastrium : Ad quemlibet vel
 levissimum tactum dolores adeò intenduntur , ut æger ad
 deliquium accedat. Collum veluti in thorace absconditur ,

atque immergitur : Oculorum radices ad interiora retrahi, & veluti laniari videntur. Idem ad linguam phenomenon est. nausea, singultus, sitis, suspiriosa spiratio, ejusque enormis angustia. Deglutationi difficilis locus est. Ex flatuosis ab ore, & ano vehementibus, longisque, & ferè continuis eruptionibus, cum forti sonitu displodentibus, viventem *aolipilam* diceres. Neque aliud præter flatuosum hunc spiritum ex his ostiis egreditur. Sed erumpentes ejusmodi flatus acres adeò, calidique sunt, ut ipse ægrotus in tanto insultu ignea ardentis veluti fornacis educi spiracula juraret. De præcipiti, ni succurratur, suffocatione conqueritur. Pallefcit vultu, interdum & livescit. Invasio ad aliquot horas protrahitur. Sed largâ lini, amygdalini, aut olivarum olei per os, quantum possibile, assumpti, ut per Clysteres injecti copiâ, hinc multâ ingestâ paregoricorum dosi non difficilè sublevatur. Proficit interdum anisorum distillatum oleum cum chamæmelina, aut simili aquâ propinatum. Deleto insultu per dies aliquot universè dolet. Flatulenti ambulonis speciem esse decrevimus.

Historia Cholerae nigrae, seu ab atræ Bilis sursum, & deorsum ejectione, apud Rod. Foesecam *lib. I. Cons. LXXXIV.* legi poterit; quam quidem hîc loci brevitatis gratiâ prætermittimus.

Cholera sanguineam, qualem observasse refert Panarolus *Pent. I. Observat. XI.* difficilè in *Cholerae morbi* censum admittimus.

DE BILIOSA LIPYRIA.

Canones Practici.

PÉracuta illa febris, seu inter acutas eximia, quâ quidem exteriora veluti marmoreâ frigidine, algidâque sudatiunculâ percipiuntur ab Astantibus suffusa, interiora verò uri ægrotantes persentiunt; seu ardent viscera cum affiosis artubus, insuper cum siti perpetuâ, siccâ, aridâ, asperâque linguâ, interdum & nigrâ, cum pulsu perceleri, parvo, inequali, minimo, interdum vix sensili, faciei squalore, prostratione virium, gravissimoque decubitu, facitque homines, ut ait Duretus in Coacis fol. mihi 66, amarulentos, & mœstos, fastidio, & contumaciâ insolentissimos, anxietudine miserabiles, omnis figuræ, & loci impatientissimos, somni expertes, cum elisa in faucibus respiratione, seu respiratione offensante, ascensu crebra, & valde magna: Nonnunquam etiam labrum inferius cietur, unâque manibus contremiscunt; hæc inquam febris, Lipyria dicta, ab acerrimæ, teterrimæque bilis vitio non infrequenter sortitur originem, quam imò ab hac Causâ semper exortam statuit Duretus in Coac. fol. 66. *Quam facit bilis, morsu, & stimulis savissima stomacho, qui sensus acerrimi est. Nam Lipyria materia biliosa focum habet in alvo, undè prohibetur exitu à contumaci obstructione, partiumque obsessarum languore.* Eandemque originem annuere videtur Hippocrates in Coac. lib. 1. *Febres Lipyria non nisi per choleram effusâ bile solvuntur.* Quem commentans Duretus; Lipyria, ait, *symptomatum plena gravissimorum, propriâ humoris morbifici, & solâ excretionem sanescit, neque aliter curationem recipit.* hæc febres

*Graphica
Lipyria fe-
bris descrip-
tio; quam
quidem à
bile potissi-
mum exoriri
ex Hippocra-
te, atque
interpreti-
bus ostendi-
tur.*

ex Bile ortum ducere præclariùs adhuc declarat Hippocr. Lib. de affect. sect. apud Foës. V. fol. 518. *In febre ardente febris & sitis vehemens detinet, lingua aspera, & nigra, spiritus sanè caliditate redditur, color aliquantulum biliosus fit, & sputa biliosa. In agro partes exteriores frigida sunt, interiora verò admodum Calent...* Hic morbus oritur ex bile com-mota, ubi in aliquam interiorem Corporis partem incubuerit. Consuevit etiam in pulmonis inflammationem transire.

*Lipyræ in
Iuvenibus,
atque æsta-
tum fervori-
bus cum ma-
ximis effer-
ta bilis indi-
ciis plerum-
que debac-
chantur.
Exemplum
biliosa le-
thalis lipy-
riæ.*

II. Ita fervente ut plurimum ætate adoriuntur Lipyræ, atque inclementioribus æstatibus; nec non in pleniori hujusmodi tempestatis æstu, ut sub Cane, & ante Canem, crebriores sunt, tum etiam cum plurimis efferatæ bilis indiciis invadere homines plerumque solent. Robustus Juvenis 18. annos agens, mense julii superioris anni duplici tertianâ continuâ cum ingenti, & assiduo Capitis dolore corripiebatur: Ad undecimam diem delirat. decimâ tertiâ Lipyræ succrescit, quæ sequenti die prosequitur, ad finem decimæ quartæ, atque in ingressu decimæ quintæ accedit universale biliosum Erysipelas cum subita, per totum corpus Epidermidis à cute separatione, hinc vasorum Cutis sanguinoducorum apices aperiuntur, ut universalis hæmorrhagia, plurimo flavescente ichore intermixta, succederet. ad finem decimæ septimæ vitam æger cum morte commutabat.

*Et alia ex-
empla bilio-
sarum Lipy-
riarum, de-
jectâ oppor-
tunè peccan-
te bile cura-
tarum; aut
per calida
exhibita re-
media le-
thalium
præstitarum.*

III. Augusto fervidissimo mense anni 1719. Quadragenarius per largam spontaneo vomitu eruptam biliosam colluviem à forti Lipyræ evadebat. Junior alter per validum propinatum emeticum, superiùs, & inferiùs multam æruginosam Bilem excrevit, similique morbo judicatus est. Ju-dæus senior aromaticis, calidisque remediis potionatus, fa-tis cedebat. Moriebatur pariter fœmina simili morbo la-borans, quæ cum Hystericâ passione prehensa, crederetur, castoreo, succinatis, volatilibus urinosiis salibus, aliisque ex-citantibus præsidiiis infauستè curata est.

IV. Bilis itaque, quæ propter tempestatis intemperiem, simulque improbum rerum non naturalium usum, non tantum acerrima evadat, sed insuper deperdito phlegmate, dissipato subtiliori sale, fluidiorique oleo, & amissâ hoc pacto blandâ illâ naturali, suavique saponariâ, sive solvente facultate, turpem, infestissimamque ad internas Hepatis, Intestinorum, atque ventriculi superficies adherentiam, fixiorisque stimuli malitiam induat, viscidissima igitur redita, & resinoso-austera, seu vitriolico-caustica, & ut dicebant Antiqui, atra, à flava superaffata bile producta, narcotici deleterii, sive, juxta eorundem Antiquorum effatum, intus geniti veneni naturam induit. Hinc propriâ, enormique tenacitate non solum in angustis hepaticorum vasorum, sibi præstito ad secretionem impedimento, profundè implicatur, sed, ulterius in universi sanguinis particulis irretita, easque non minùs illaqueans, quemadmodum in viscere gravissimum ad tensiones, & contorsiones vasorum, fibrarumque irritamentum est, ut hinc adnexæ intestinales partes in obnormes pariter rapiantur consensus; Ita in sanguinis alveo atrocia circuli impedimenta, invehit, & stasibus ansam exhibet; ut hinc tum sanguinis fluxus, motusque per vasorum cutaneorum capillamenta, tum indè salivariæ, aliæque aliæ plurimum, aut penitus, impediuntur principales secretiones: undè repetenda sunt memorata omnia hujusmodi affectionis symptomata. Quamobrem decantata à plerisque in Lipyria febris ventriculi inflammatio, pro ejusdem potissima, fomentèque causa æstimanda non est, sed Bilis ut plurimum tam perditus stimulus, ut partes Hepati affines ferociter laceffens, in sevérrimas dyscrasias, atque tensiones tenue intestinum, nec non ventriculum inducat, quibus profectò instar aquæ stygiæ suffunditur. Reverà genuina ventriculi inflammatio singultu nunquam caret; Neque frequens est in Lipyriis hoc symptoma: Cum autem comitatur hunc morbum, tunc quidem non diffiteor, ventriculum

Explicatur obiter modus depravationis bilis in hepate, & in sanguine ad lipyriam febrem, ejusque symptomata inducenda, atque atræ Antiquorum bilis conditionem induendam. Bilem, non verò ventriculi inflammationem, esse causam lipyria primigeniam per ipsosmet Antiquos ostenditur.

culum vehementer à bilis morbo vastatum, atque convulsum posse in symptomaticam inflammationem facessere. Cæterum Lipyriam febrem affabrè satis agnoverunt Antiqui, pro ejus causa supputantes *bilis cursum circa sua emunctoria interceptum, ibidemque effervescentem, inductamque ex ea parte, quâ jecoris cavum propè fellis vesiculam respicitur, Erysipelatosam ventriculi inflammationem, jecinoris cavo, felleæ vesiculæ, atque etiam mesenterio communicatam; ut ex foco acris biliosæ materiae irritetur ventriculus acerrimi sensus viscus; ob cujus irritationem frigeant exteriora, interiora urantur; Prohibeaturque bilis exitus à contumaci obstructione, & languore partium obsessarum ab inflammatione.* videantur super hac re Duretus in Coacis, Hollerius, aliique accuratiores Hippocraticæ doctrinæ Commentatores. Ex quibus igitur intelligendum est, hos omnes partium biliari emunctorio finitimarum affectus ex consensu fieri, sive ex bile à propriis focus primùm delinquente.

*Angens inter
siccam, seu
inflammato-
riam lipy-
riam, atque
humidam
seu biliosam
discrimen, in
antecedenti-
bus, adjun-
ctis, & suc-
cedentibus.*

V. Nihilò tamen minùs cùm lipyria febris symptoma quandoque sit Intestinorum, aut ventriculi Phlegmonis, aut etiam Erysipelatis, seu morbus inflammationi succrescens; Jam igitur essentielles, & symptomaticæ lipyriæ medentibus internoscendæ supersunt. Inflammatoriam propriè lipyriam præcedit acuta, & aperta febris; acerrimus abdominis dolor, cum insigni tensione, & ardoris sensu, singultu, irritoque ad vomitum nisu comitatur; ardentissima insuper, & clamosa sitis; & cùm externa perfrigeratio post aliquot dies succedit, facies priùs accensa, mortali statim pallore, atque hippocratico, ut dicitur, squalore suffunditur; omnisque illico interni ardoris sensus amittitur. Siccus semper aridusque persistit corporis habitus. In biliosa verò lipyria, externa perfrigeratio è morbi limine accedit, pulsusque immersus, & absconditus: Nullus ad ventrem præcedens, aut inhærens dolor, aut saltem obscurus: minor interni ardoris sensus, interdum vix in ventre tensionis apparen-

parentia : Rariſſimus ſingultus : Et ſi niſus ad vomitum excitetur , bilis facili , plenoque gurgite educitur : ſitis minus ardens ; neque facies tam lurida , proſtrataque obverſatur ; Tum ephydroſes , ſive leves ſudatiunculæ , morbum perpetuò comitantur. Præterea uſque ad judicationem morbi , interni ardoris ſenſus moleſtus eſt. Ita prima lipyria ſiccus videtur morbus , alter verò humidus. Hæc inſuper à manifeſtis cauſis , ab irâ , aliove acriori animi affectu , à nimio tempeſtatis eſtu , aut vehementiori exercitio ab horariorum fruſtuum edacitate , à muſtei vini bibacitate , aliisque ſimilibus utplurimum excitatur. Idcirco potius æſtate , aut autumnò , quàm aliis temporibus contingit. At verò propriè inflammatoria ab occultâ cauſâ improviſè proficiſcitur ; Hieme plerumque invadit ; Nunquam in Choleram prorumpit , cùm revera ſemper lethalis extet , atque à viſceris aliqujus abdominis , aut plurium , inflammatione , in necroſim vergente , ortum ducat : Hinc biliari lipyriâ multò brevior eſt , ægrum aliquot horis ante obitum in aſphyxiam conducens , atque indè mentis adhuc compotem jugulans. Lipyria interea biliaris , ſi mortifera ſit , non niſi cum mentis alienatione , formicantique pulſu ad extremum uſque perducto , miſellos de medio tollere conſueſcit.

V I. Venæ ſectio in lipyria biliari nunquam proficua eſt : neque in principio validâ purgatione utendum , ob indurctam ventriculi & inteſtinorum ſpaſmodicam habitudinem , atque interdum inflammationem , niſi bilis valdè copioſa in his caveis exundet , & turgeat ; In quo ſtatu intelligendus eſt ſuperiùs expoſitus Hippocratis Textus. Bile verò non exundante , ſed veluti in latibulis tenaciter coactâ , Hippocraticum oraculum morbi maturitatem , & ſtatum , habitamque jam bilis coctionem ſignificat. Quippè Hippocrates per illud *ſuperveniente Cholera exolvuntur* , non quidem intelligit ipſum , in propriâ naturâ conſtitutum , Choleram morbum , quem quidem ſuperiùs deſcripſimus ; Quo caſu peracutus

*Curatio
biliaris Lei-
pyria febris
quò ad phle-
botomiam, &
purgatio-
nem. Quomo-
do intelli-
gendus ſit
Hippocr. tex-
tus de Cho-
lera morbo,
qui in Lipy-
ria ſit criti-
cus. Qua ul-
teriùs in hoc
morbo uſur-*

K K K K

mor-

panda remedia sint, quæ vitanda.

morbis ; alii non minùs acuto succedens , & fœderatus , ægrum è vivis citò deleret , sed bilis quidem vitiata , at verò per rectam naturæ contentionem è propriis latibulis dimota , & secreta , prægrandi , citâque perturbatione alvi , sursum , deorsumque pariter æqualiterque citatam copiam ; Hoc itaque pacto biliaris hujusmodi in lipyriis excretio modum quidem morbi Cholerae refert , non verò genuinam naturam , quæ in turbatissimo , & promiscuo quorumlibet humorum motu , non verò in perducto à naturâ conatu , propriâque morbifici humoris per alvi concutionem vacuatione , sita est. Idcirco cautè , prudenterque intelligendum est Hollerii placitum , memorato Hippocratis monito suffultum ; *Diarrhœam nempe semper conferre posse , imò brevè desperatum iri ægros , nisi irritatâ naturâ promoveatur fluxus* : vomitus idcirco , & dejectiones arte vel naturâ provocari jubente hoc Authore. Quapropter bile haudquaquam manifestè turgente in lipyriæ principio imperare soleo largos , & repetitos hydrolei haustus , frequentes , tepidasque potiones ex aquâ carnis , aut pulli cum adject. C. C. rasp. & rasur. ebor. atque ebull. Radic. nymph. , & alth. sonci , endiv. violar. , & agrimon. cum floribus bellidis , hypericon. & tribus cordial. adjicimus emollientes , & lotorios clysteres , pluries etiam quâque die injiciendos ; emollientes frequentes fatus ; temperata cordialia cum aquâ totius citri , ac violarum diluta. In progressu morbi serum lactis tamarindatum , aut etiam levi aliquo cathartico maritatum propinamus , si aliqua bilis ex urinarum , & linguæ inspectione appareat concoctio ; aut etiam longos solutæ recentis cassiæ haustus ; & tandem biliosis succis , & continentibus visceribus per emollientia , & epiceraistica laxatis , atque ad ineundos , aut concedendos exitus paratioribus redditis , in delinquente per inferiora , aut etiam superiora , secundum Coi Senis monitum , elutriando succo curam omnem impendimus. Vitanda sunt fortiora Alexipharmaca , diuretica præ-

præcipuè, ac diaphoretica, quæ quidem morbosæ causæ indoli, ac motui imparia sunt, fortassè & noxia. Ita ait Baglivius lib. I. Prax. medicæ. cap. 13. *Observavi lepyriam febrem superveniente Cholera statim ac prorsus feliciter pluries cessisse; Non ita apparentibus sudoribus, aut urinâ. Cautè igitur procedendum cum diaphoreticis, & diureticis in tali febrium genere: Hipp. lib. de affect. postquam descripserit hujus morbi speciem (ut suprâ attulimus) addit pro curatione: Huic refrigerantia, & alvo, & exteriori corporis parte admoveere convenit, & cautione adhibita, ut ne inhorrescat; (intellige non esse frigida, clysteres, & balnea, ne inhorrescat, usurpanda) Potiones quoque, & sorbitiones crebra, & paulatim quàm frigidissima exhibenda. (Per illud paulatim quàm frigidissima, intelligendum est non esse in principio, sed morbo jam valde imminuto frigidas potiones propinandas.) Alvus verò curanda; & si quidem quæ in ea continentur non subeant, subluenda, & per infusa quàm frigidissima vel quotidie, vel tertio quoque die refrigeranda. Victus summè tenuis in hoc morbo imperandus est: Vinum rarè usurpandum.*

HISTORIA

Biliofa Legitimæ Leipyria.

„ **I**ngentem Cystis Biliaræ intumescenciam à bile viridi
 „ saturati coloris vidi anno 1677. Mense Augusto in
 „ puero decenni, filio Dom. Bruyere mercatoris Lugdunensis,
 „ quem extinxit febris leipyria ab inflammatione hepatis,
 „ cujus extremi lobi omninò nigricabant, præcedente Cho-
 „ lerâ morbo. Cystis fellea ovum gallinaceum magnitudine
 „ exequabat, bile viridi coloris olivaris turgida, eâdem
 „ distenti cholidochi pori, quâ etiamnum oblita erat tota
 „ pars hepatis cava, præ visciditate, & lentore ibi subsi-
 „ stens

stens., Theoph. Bonetus *Anat. Pract.* lib. III. sect. IX. *De Cholera Morbo.*

HISTORIA

Biliofa spuria, seu imperfecta Leipyria.

Mercator Antonius Oliverius 15. Julii 1723. ob nocturnum latronum invadendi tentamentum forti terrore perculsus, postridie in febrem incidebat, quæ duplicis, sed intermittentis tertianæ indolem retulit, cum insomnibus noctibus, virium prostratione, oris amarore, nausæâ, & bilioso identidem vomitu. Sextâ die febris erat continua cum siti intensa, linguâ bilioso pigmento oblitâ, urinâque ictericâ. Propinato cathartico multa, saturatissimaque biliosa dejiciebat, crassa, atque in primis spumosa. melius habuit. Ad finem septimæ ingravescibat, cum urinis impensè croceis, simulque flammeis. Inter octavæ initia Phlebotomia instituebatur, cujus interea diei terminus turbatissimus extitit. Nonè principio exteriora omnia frigida facta sunt, immersus enormiter pulsus vix micare videbatur, celerrimus cæterùm, summè frequens, & inæqualis, cum lingua sicca, nigraque, squalida facie, & opacis urinis. Accedebant profusæ per alvum seri tenuis & crudi, ferè sinceri, vix subflavi dejectiones: sudavit frigidum, & lentum: mente non bene constabat: spiritus aderat gravis. Validissimæ ad totam cutem frictiones præstabantur: Ad dorsum, scapulas, lumbos, & femora cucurbitularum, uberius indè atque profundius scarificatarum agmina affigebantur, fortiterque divellebantur. Valentiora propinabantur cardiaca, diaphoreticis alexipharmacis intermixta: diluentia multa ex scorfonæræ, scabiosæ, contrayervæ & similium additione animata calidè epotabat; Ut ad finem ejusdem diei dilutâ
satis,

fatis ; cicuratâque efferatâ , simulque in visceribus concrefcente , eâdemque deleterio penè more laceffente bile , redditâque ad corporis habitum æquiori sanguinis undâ , extremitates corporis recalescerent , pulsus æqualior , vividiorque redditus elevaretur ; & facies naturali fimilior evaderet. symptomaticæ dejectiones defisteabant. Decimâ dormiebat. Aperta vigeat febris : Jamque biliosis crassis , & ferè concoctis profluebat alvus. Undecimâ valida febris cum universali calore fervebat. Quædam ad dextrum Hypochondrium renitentia. Duodecimâ purgatus est. Multa deiecit partim à cathartici stimulo expressa , & cruda , partim verò concocta biliosa. Decimâ tertiâ febris adhuc vehemens cum assidua ad alvum irritatione crudorum. ad decimæ quartæ principium pauca sed concocta per alvum fluebant : Hinc critica universalis sudatiuncula cum levamine videbatur ; somnoque identidem blandissimo perseverabat febris usque ad decimam nonam cum largis , concoctisque biliosis dejectionibus : Vigestimâ tandem per opportunum catharticum coctis biliosis uberrimè excretis , judicatus est. Ægrotantem hunc mecum aliquando invisebat Cl. D. Pacchius Regiæ Matris Consiliarius & Medicus. Nunc expedit , ad reliqua Guidettianæ Dissertationis loca reditum facere , atque in eadem Scholiis , nostrisque Animadversionibus adhuc exornanda sedulò pergere. Hæc quidem , præcipuis hepatis , & bilis hætenus exaratis Morbis , eorumque interpositis in prolixam seriem disputationibus locum dantes , longissimo certè omisimus intervallo , ac ferè fuisse obliti , videri possemus. *Cortex Peruvianus quacumque formulâ adhibitus in hisce morbi stadiis nullius efficacie mihi semper visus est , & sæpe noxius ; ad quem è contrâ veluti ad sacram anchoram confugio , quoties post elutriatam bilis cacochymiam , cutis mollitiem suam , & perspirabilitatem adhuc servat , & quando exquisita magis , & mitior est Tertiana indoles.*

*Admonitio
de febrifugo.*

Adhibendas in omnibus Biliosis febribus, eorumque diversis temporibus cautiones in nostro de occasione febrifugorum Tractatu fusiùs recensimus.

15. *Quamvis autem singulis ferè annis, ut diximus, febres hasce biliosas aestate, vel autumnò remigrari videamus; aliquando tamen epidemica debacchantur, magis exitiales, ut observabam anno 1711. in oppido Sanbenigni. Febres tunc erant in quovis subjecto Tertianæ vel simplices à principio, & inde duplices, vel ab initio duplices remittentes, & inde continuæ. Stipabantur omnes symptomatibus jam recensitis, idest anxietate, hypochondriorum molestiâ, lumborum gravitate ad dorsum propagatâ, capitis dolore pulsativo, nausæ, vel vomituritionibus, & similibus. Et nisi in morbi primordiis per superiora evocaretur biliosa colluvies, tractu ægritudinis excitabantur diarrhææ biliosæ agrè sanabiles, sæpè lethales, pacantium, & narcoticorum freno reluctantes. Mirabile dictu, quantum profuerit illis avertendis emeticum tempestivè datum; quotquot enim eo utebantur cum copiosâ biliosorum expressione, paucis impo-sterum egebant ad salutem, nec diarrhæis conflictabantur; vel si fortè urgebat ultrò febris, per sectionem venæ malleoli, vel salvatellæ ut suprâ innueram, vel per hirudines ano affixas, decocta amaricantia; cathartica cholagoga, & demùm per febrifuga tutò evadebant. Qui hoc ritu, præsertim emeticis tractari non patiebantur, ferè omnes peribant. Huc ideò non pertinet vulgatum illud Clinicorum axioma: "emetica citiùs, cathartica verò tutiùs operantur. enim verò quum biliosa cacochylia per æstatem evocanda occurrit, non modò "citiùs, sed & "tutiùs, opitulantur vomitiones; nam per breviora ventriculi, & œsophagi itinera, accitis musculorum comprimentium potentiis eliminantur vel è penitioribus viscerum latebris recrementa hujusmodi resinosa, quæ, si catharticis ad anum ducantur per longas, atque anfractuosas intestinorum vias solâ actione, heu debiliori virtutis peristalticæ, ut ut stimulis purgantibus*

ribus sollicitate, elutriari difficillimè poterunt, vel non, nisi cum dolorosis tunicarum, plexusque nervosi irritationibus, spas-
mis, atque ataxiis, quæ multa, eaque gravissima inferunt præ-
judicia, à recensitis diarrhæis indigitata.

S C H O L I U M I.

CAve, ne subcontinuae febres, quæ in his constitutio-
nibus, & post manifestas intermittentes irrepere con-
suecunt, tibi sub personâ essentialium continuarum impo-
nant, ut neque genuinam earundem naturam, & indica-
tiones assequi, neque pretiosas febrifugi occasiones ample-
cti valeas. Clar. noster Guidettus hoc rectè animadvertit,
proprioque periculo admonet per hæc sequentia.

*De subconti-
nuis ab essen-
tialibus con-
tinuis di-
stinguendis
admonitio.*

16. Inter has febres pullulabant nonnulla accidentalem ser-
vantes anomaliam, quæ tamen essentialiter eandem redolebant
biliosarum naturam, iisdemque virgis erant plectendæ. Per id
temporis mense scilicet Junio me quoque aggressa est hujus indo-
lis Tertianæ, quam in ipsis incunabulis suffocavi absque ullâ phle-
botomiâ; nam epoto ante tertium paroxysmum emetico, adhibi-
tis alterantibus hepaticis per biduum, exinde ell. lenit. 3x. Rhab.
Dij. crem. tart. ʒi in bolis, & demum febrifugo in fine quinqu-
ti assumpto sanus evasi.

Scriptor noster obesum habitum ducit, & pituitoso-san-
guineam constitutionem exhibet; attamen de calore in vo-
lis manuum perenni queritur; à calidis, acribusque alimen-
tis in sodam, seu flatulentam stomachi acredinem facilè ad-
ducitur; ut ipse fatetur.

*Admonitio
de scriptore.*

17. Vix autem aegrotorum lectulis restituebar, quum
die 28. ejusdem mensis cæpit febricitare frater meus Canonicus
in Ecclesiâ abbatiali ejusdem oppidi, ætatis suæ sextum agens lu-
strum, constitutionis sanguineæ; cujus febris à vulgaribus ablu-
dere viabatur; nam licet ad morem duplicis Tertianæ repete-
ret, paroxysmos tamen non precedebat rigor, non sequebatur
sudor,

sudor, nulla urina intensa rubedo, non capitis dolor [quem tamen instar cephalalgia paucis ante febrim diebus passus erat periodicum à primâ luce usque ad meridiem quotidie repetentem, & à prandio evanescentem] non aestuatio vehemens, bene tamen sitis, anxietas, & lassitudo cum calore sicco, semelque sudatiunculâ nocturnis horis post levem somnum. Fugum morbosum quaterere satagebat, lecto abstinebat, & aurâ liberiore fruebatur. Quartâ die oris amarorè tentatus, hausit propriâ sponte syr. aur. ros. ℥iij cum aquâ cichor. quo serosa tantum pauca deiecit. Quintus reliquis gravior accessit paroxysmus majorem præseferens anxietatem, lassitudinem, pulsus celeritatem, sitim, vigilias &c.; quare coactus decumbere, medicam admisit opem jam nimium crastinam. symptomatum feritate motus, adultam febrim chirurgico gladiolo feriendam duxi mane sexti diei, extractusque sanguis gelatinosam referebat substantiam promiscuè concretam ramentulis cruorosis punctillatam citra ulum bilis vestigium, quod rarò in cæteris agrotantibus dabatur, quorum eductus sanguis ut plurimum floridus apparebat, aut flavescebat. Metuens nihilominus ex jam datâ cunctatione periculum, & quòd soluto per auctam effervescentiam lymphæ lentore crudeliùs inde irrueret biliosum virus epidemicum, sequenti die diluculo, horis scilicet octo ante periodum septimam bilis emporium vomitorio concutere sum aggressus. Repetitis vomendibus, eruperunt viscida multa, pituitosa, mox crocea, & porracea cum palmari lumbrico, & successivè per inferiora adhuc plurima seroso-biliosa. Hac solenni evacuatione ex voto completâ duabus horis ante recursum febrilem, jam valdè latabar; ast fortasse quia serotina, vel ob peculiarem in eo contractam lymphæ visciditatem non potuit subitaneum ferre levamen, quod permultis attulerat. symptomata septimi diei licet aliquantulum mitiora quoad anxietatem, adhuc tamen erant verenda. Quare mali moris suspitione adductus, cucurbitulas, quarum applicatio aliis superfluerat, huic affigendas opportunum duxi die octavo, tum quia præclusa toto ferè morbi cursu sudoribus

via

via has suadebat, tum etiam quia, præter epidemicam causam biliferam, acceſſerat tamquam procathartica nocturna per apertas fenestras refrigeratio ante aegritudinem sapius captata. His applicitis, nec suffragantibus, urgebant ulterius febris, cutis calor deurens, anxietas, jactatio, vigilia, urina coloratiores, & similia. Injiciebantur clysteres, non omiſſis alexiteriis, & pargoricis diligenti servato regimine. Die decimo missus est sanguis de saphena ultra libram, nec - dum apparuit salutis radius. Noctem egit insomnem cum mentis emotione, & hypochondriorum tensione per totam undecimam. Ut ut autem nihil intentatum relinqueretur ad cohibendum delirium, & ulteriorem ataxiam, non datum est avertere; imò sequentem noctem aequè vigilem peregit, & de ridiculâ conspicuæ per mentis alienationem dignitatis possessione ovans, lecto contineri vix poterat per robustum assistentem. Unum tandem par omnibus fuit cassia dilutum tribus haustibus amicorum industriâ deliranti propinatum horis matutinis duodecimi diei, quo, licet sedes aliquas Biliosas habuerit assumpto vix respondentes, cœpit tamen sub vespertas minùs febricitare, mente constare, & noctu quiescere; sic nullo ulterius superveniente paroxysmo, nullâve crisi, omninò convaluit. Ad præcavendam recidivam usus est per dies aliquot pul. chinae chinae ℥i. sal. absynth. ℥i. in ℥iiij. aq. scorzon. bis in die.

Historia hæc est legitimæ perniciosæ Tertianæ ex effera-
tâ bile, atque per vasa omnia plurimis pervicacię modis
excandescenti. Exempla aliquot perniciosarum hujusmodi
Tertianarum habeas inferiùs in Epidemiâ Biliosâ anni 1718.
Ceterum insontem in quibuslibet hominum morbis Lumbricorum in intestinis hospitantium præsentiam, vel præviam, vel succedentem stationem luculenter demonstrabimus in peculiari dissertatione, quæ prelis parata jam est: de Tæniâ hominis, aliisque ejus vermibus.

18. Verùm ex hac historiâ posset quis objicere, me febris malè moratæ ex coagulatione sanguinis exemplum adduxisse potiùs,

Admonitio
de tertiana
perniciosa,
& humoralis
lumbricis.

quàm biliosa. Nec jam confessa diffiteor, cùm ex accidentibus, & concaussis emergat paritas aliqualis. Attamen hoc asserere non erubesco, quòd, si malignitatis larvâ adductus remedia tantùm alexipharmaca apposuerim, non evocatâ Bilis viscidâ illuvie, pessum erat itura tota vitalis machina; particula etenim bilis aciores etiam atque etiam per febriles effervescentias extricata, fracto lymphæ lentescentis compede per universam fluidorum massam palantes symptomaticam irruptionem, aut funestam metastasim attulissent, non dubito (datâ epidemicâ constitutione) quoties tumidiore torrente datum foret excurrere.

SCHOLIUM II.

De perniciosissimis Tertianis ab exquisitè malignis distinguendis Admonitio.

REverà febris hucusque descripta illarum naturam fortitur, quæ (ut superius innuimus) apud vulgum malignæ legitimæ, incautè satis deprædicantur, quum evincat contrarium universalis in crebriori earum dominatu febrium dumtaxat intermittentium constitutio; tùm hæ à leviori quocumque cathartico, aut opportunè exhibito febrifugo, citò, tutòque deleantur; nec nisi à majori, aut minori in ægrorantibus liquidorum, aut solidorum irritabili indole, mobilitate, elasticitate, aut Bilis delinquentis copiâ, aut ejusdem majori, minorive momento, majores etiam, aut minores sint, earundem febrium, & symptomatum feritates, & pervicaciæ. Quamobrem eadem febris, quam nempe ejusdem naturæ causâ progignit, & fovet, nunc veluti simplex intermittens obversatur, nunc duplex evadit; in aliquibus simplex subcontinua fit, in aliis perniciosa &c.

19. Porro non datum est pari successu opem ferre difficulter vomentibus, aut uterogredientibus, ideo nec ipsi uxori meæ charissimæ, quæ pari febre, parilibusque symptomatis ultimâ Julii die ejusdem æstatis correpta, supparia exigebat auxilia, ni provec̃ta nimis gestatio obstitisset. Hanc usque ad diem quintum mitioribus remediis levare curabam; sed in consilium vocato Doctore

Etore prestantissimo, ejus voto celebrata est die sexto phlebotomia de cubito dextero. Postridie, idest septimo ingruente paroxysmo, enixa est puerum octimestrem (qui adhuc biennio vixit) & die morbi decimâ, à partu tertiâ, suborta est diarrhœa biliosa pertinacissima, freni qualiscumque à Chirurgiâ, & Pharmaciâ deprompti nescia, cum lochiorum suppressione, febris acutâ, & pulmonicâ inflammatione. Perrexit hæc adusque decimam octavam morbi, ac undecimam puerperii, & solo miselle interitu maximo omnium mœrore terminabatur.

SCHOLIUM III.

Antipraxis, seu contrarietatis ratio in curatione se præbuit. Celere, promptumque primis morbi aleis febri-fugi auxilium præceptis nimium pro morbi infantiâ visum est. Interea procurata à phlebotomo succussio sanguinis Bilis excursions augebat. Tum ab adultâ jam redditâ ægritudine, atque à superaddita partus violentiâ ociorique à retracto utero contenti sanguinis in communem alveum restitutione, undè majores impetus, & collisus morbosæ Bilis cum aliis liquoribus, & præposteri ad pectus, & alvum decubitus, redditum inutile febrifugum est; quod quidem lochiorum suppressio magis adhuc renuere visa est. Mors igitur fores pulsabat, heu quantum irreparabilis!

De antipraxis, ut dicitur, seu opposita curationis ratione.

20. Commendatâ methodo per vomitoria, diluentia, paregorica, lenia cathartica, decocta cichoracea, & aliquando febri-fuga, centenos eo temporis tractu curabam infirmos felicissimo successu, quorum perpauca (illi præsertim, qui minus vomuerant) relabebantur, non obstante autumnî maleficio. Quòd si Antimonium mulieribus induceret sterilitatem, ut nostrum clamitat vulgus, profectò magni criminis reus fuisset, talione repercussus; mulieres attamen antimoniali emetico à me tractatæ vigent adhuc fecundissimæ, ipseque post-ter sumptum hujusmodi remedium numerosæ proles author fio.

Anno 1707. hic in Patriâ vigeat ipsissima, ut ita dicam, Epidemia biliosa, quâ affectæ prægnantes, alibanthas adibant. Una superstes fuit Domina Laura Pignoca athletici habitus recens tunc vidua, quæ gestationem ignorans, valida quavis admisit remedia, tam emetica, quàm subductoria, etiam repetitam de saphæna sectionem, hirudines applicitas, & similia cum euphorîâ citra abortum. Exactâ decimâ quartâ, suscepit usum corticis peruviani ad ʒij bis in die per triduum, exinde ad ʒj pro dosi semel in die cum conser. flor. cichor. Mox eruperunt menstrua copiosa, & bene colorata, quæ per dies quadraginta, quibus utebatur cortice dicto, fluxerunt citra virium labem; imò cum earum restauratione augebatur in dies carnosus, ac floridus totius corporis habitus, sed & venter tumebat, adeò, ut ipsa hydropem à nimio fluxu abortum pertimesceret non sine amicorum cachinno, qui eam pancreaticè valentem aspiciebant. Hujus rei particeps factus, eam diligenter interrogavi, cumque nil prorsus animadverterem saluti oppositum monui, ut china china usum jam satis iteratum omitteret absque timore recidivæ; quo factò, statim sufflaminatus est fluxus, & elapso semimense, certior fuit gravidationis suæ per fœtus gestulationes, quem ad consuetum tempus nonimestre salubriter gessit, favente Deo omnipotente, cujus imperscrutabili iudicio ducta est manus medica; nam proculdubio, si curationis tempore innotuisset conceptio, à validioribus remediis abstinere tenebar, fortasse malis agræ rebus.

Hoc tamen exemplo non ducor ad credendum, posse audacter in usum vocari allata præsidia uterogredientibus indiscriminatim; nam reapse ex millibus una ferendo par esset citra abortum. Singulare hujus mulieris robur in fovendis, sustinendisque fœtibus jampridem mirabar, cum contigerit anno 1702. hanc dysenterîâ nonimestri vexatam, quasi syntecticam concepisse, novemque adhuc mensibus inde sequentibus gestationem cum torminibus dysentericis (imò & pleuritidem secundo conceptionis mense abortam, cujus gratiâ bis de cubito missus est sanguis) sustulisse usque

usque ad maturum puerperium, cujus beneficio plenè convaluit; quod Celso observatum legimus lib. 2. cap. 8. „ Acria tormina „ quidem periculosa non sunt, si sanguis, & strigmenta des- „ cendant, dum febris, ceteraque accessiones hujus morbi ab- „ sint, adeò ut etiam gravida mulier non solum reservari possit, „ sed etiam partum reservare.

S C H O L I U M I V.

Quemadmodum in Gravidis, quæ biliosâ febre præcipuè *Aliqua de inspectione gravidarum.* de genere intermittentium conflictantur, Peruvianum corticem, alio non obstante, quàm citius adhibendum esse, inferius in epidemicæ febris descriptione exponemus; ita in iisdem catamenia regularia, aut irregularia absque ullo discrimine perfluere interdum posse ex anatomicâ inspectione compertum est, quâ quidem instruimur, uterina sanguinis emissaria non tantum ad fundum uteri, sed quædam ad cervicem vaginamque aperiri. Cæterum non est medentibus insolens gravidarum, diuturnis dysenteriis cum gestationis incolumitate afflictarum, inspectio.

21, Cum de provocatis menstruis à cortice peruviano incidere- rit sermo, conticere non debeo me tres alias observasse mulieres inter usum dicti corticis abortum passas. An id à summâ illius amaritie, vel aloëticâ virtute referendi vasorum oscula proces- serit; an ab aliis internis causis, utique nescio; Mihi tamen adeò imposuit, ut illum Gravidis vix audeam proponere, nisi urgeat necessitas. An id ipsum fuerit aliis compertum, ignore. Hac obiter dicta sunt.

S C H O L I U M V.

Uterinis, aliarumque etiam partium hæmorrhagiis opitu- *De variis peruviani corticis usibus An- madversio.* lantem aliquando peruvianum corticem perspeximus: quod ideo directæ ejusdem ad menses, & abortus provo- candos

candos efficaciam suspicionem delere posse videtur. Non infior tamen (quod Praxis me sæpius edocet) corticem huiusmodi pallidis virginum coloribus , indeque , & mensium suppressionibus prodesse , illis tamen , quibus non frigida , languida , mucosa , aut obstruens causa , sed vasorum contractio , illaqueatio , & , ut dicitur liberiori vocabulo , *crispatura* , adauctum uno verbo solidorum momentum incubula præbuit. Revera stimulis cicurandis spasmodicis , solidisque hoc pacto strictioribus redditis relaxandis in hypochondriacis , hysteriis , colicis , stomachalibus , ipsisque epilepticis , doloriferis , aut non doloriferis , fixis , aut vagis , universalibus , aut particularibus affectibus , in ipso insultu , vel ante , aptè succurrit Peruvianus cortex ; ut in nostro de febrifugi occasionibus Tractatu liquere poterit. In spasmis abdominis universalibus , aut solum intestinalibus clysteres ex infusione Chinæ-chinæ in aquâ cerasorum nigrorum faustè sublevantes non semel observavimus. Quod autem antispasmodicum est paciferum est , & componens , non vero solvens , aut impellens.

22. Sed jam ex instituto est , ut redeam ad allatam observationem sanguinis extracti per exploratricem phlebotomiam initio febrium biliosarum. Si itaque non sincerus , floridusque appareat concretus sanguis liberâ incisione eductus , sed variegatus , aut lentescens ferè gelatinosus (quod rarò æstivis temporibus , aliquando per autumnum) efferos adeò non metuo biliosi recrementi raptus , sed vel à phlebotomia celebrata , aut repetenda levamen accedet , vel saltem morbus inducias dabit , ut queat medicus cum minori sollicitudine suppetias ferre. Vomitorium tamen non omitto , nisi agri naturalis constitutio ferendo non sit , vel vomendo sit impar , tuncque catharticum cholagogum subrogo , reliquisve remediis alterantibus utor juxta indicationum exigentiam servato delectu.

SCHOLIUM VI.

ET sanè gelatinosas crustas, aut intimum liquamen rarissime æstatis, & autumnì tempore, plerùmque verò Hyeme, & Vere sanguis extractus exhibet: illis autem tempestatibus lucidus solum, durus, compactusque obversatur; frequenter absque innatante sero, præcipuè in juvenibus, & bilioso dominatu constitutis: aut si serum innatat, id flavum, & biliosum est, seu tamquam urinosum saturatum.

*De varia
extracti
sanguinis
habitudine.*

23. Quòd si febris in subjectis non admodum plethoricis, atamen Picrocholis accendatur, in quibus inanis sit metus, ne vasa per repetitas vomitorii pressuras nimium distendantur, aut rixim patiantur, tunc abstemius sum à sanguinis detractione, utpotè quâ recrementa biliosa semel à sanguinis consortio rejecta postliminiò revocari satis superque sine expertus decursu annorum ultra viginti praxeos meæ; quæ recrementa, tamquam exotica non amplius sortiuntur intimam cum sanguine miscelam, sed ab hoc veluti bajulata varias impetunt partes, & nisi assiduis in eas illisibus discerpantur, & validis naturæ conatibus in febrili effervescentiâ comminuantur, & dissipentur, viscus aliquod, præsertim pulmones adoriuntur, in eoque suam ludunt tragædiam eò sæviorem, quò graviolem inierint virulentiam à prægressâ in latibulis suis fermentatione, ita ut (si ab animatis ad inaninata liceret aliquando arguere) dicerem vidiſſe nunquam excitatas ab alveario suo apes, aut vespas turmatim irruere in truncum aliquem, vel parietem rapidiori volatu, ac soleant ipsæmet biliosa particule ab infernis latebris excentrata in superiores erumpere partes per concessum in sanguine spatium, & citatiorem circuitum. Nec ineptè sunt effati Arabes medici vetustiores, quum dicerent "sanguinem esse frenum bilis", Malo idcirco vomitorium dato intervallo repetere, interponendo diluentia intus sumpta, & applicitos foci, atque per vices subsidia

san-

sanguinem instaurantia, quàm totam evertere fluidorum massam incautâ phlebotomiâ, quæ si semel fuerit instituta, necessitatem affert eam repetendi progressu morbi, cum virium jacturâ, & incertâ aleâ.

S C H O L I U M VII.

*De vario
missionis
sanguinis in
biliosis mor-
bis eventu.*

EQuidem nullum in medica scientiâ auxilium est, cui, supra missionem sanguinis, tam varii, iidemque oppositi effectus in biliosis morbis debeantur. Biliosæ siquidem febres, earumque graviora symptomata nunc per phlebotomiam vehementer exacerbescunt, & in subitum æger, atque inexpectatum vitæ discrimen quandoque projiciatur; nunc ambo promptè expeditèque sublevantur, nunc ambo intacta, sibi que, ut prius, æqualia relinquuntur. Promovet in deterius phlebotomia, quum, acutis extantibus symptomatibus, & febre, delinquens bilis non adhuc displosa, sed facilis, promptaque ad explosionem, inducto per missionem sanguinis liberiori in arteriis, & venis spatio, & tantâ fluendi semotâ resistantiâ, quantum est emissi sanguinis momentum, vasa omnia liberiùs discurrit, & prætergreditur usque ad facillimam per peculiare partes incundam exundationem. Subvenit Phlebotomia quum jam antea rarefacta, & displosa bilis sanguineum volumen tumefecerat; ipsumque ad eò naturalibus vasorum perimetris impar reddiderat, ut ultra ordinariam mensuram turgens, urgensque in eorum latera, eruptiones aliquas per corporis partes minitaretur. Tunc sanè opportunè imminutâ per missionem sanguinis totius universalis liquidi mole, depletâque quâdam ejusdem copiâ, superstitis cujuslibet liquidi expeditiores evadunt per omnes circulos gressus: aut modo opposito quum nimis compressus à vasorum tensione biliosus humor, consuetæ collectioni, ac secretioni obluctatur; quæ inde obtineri possunt, inarmatâ per phlebotomiam dictorum vasorum
resi-

resistentiâ , seu , quod idem est, imminuto solidorum adau-
cto nimium momento. Non adversor interea proficere suo
modo posse missionem sanguinis , vel per revulsionem in
præsenti bilis palindrome , aut epigenesi à naturalibus vis-
ceribus ad pectus , vel ad caput , undâ hoc pacto vehentis
sanguinis ad partes v. g. inferiores per phlebotomum deter-
minatâ ; vel per derivationem in ejusdem bilis , partem jam
nobiliorem aliquam obsidentis , lentâ simpliciter indole ;
quo quidem præsidio ad hanc rationem usurpato plures re-
moveri possunt resistentiæ ad ejusdem humoris refluxum in
universalem circuitum. Erit autem indifferens phlebotomia,
sive nihil noxæ , aut utilitatis inducens , quum febrifera bi-
lis , nec rarefacta sit , nec valeat rarescere ; quæ ideò per
vasa majora , & per viscera æquali ordine confusa , post
extractam sanguinis portionem eundem adhuc cum super-
stite mixture modum servabit. Ad summam: in biliosis af-
fectibus missio sanguinis mala est , quum ex antiquorum
effato biliosorum effervescentiam inducit. Quamobrem fi-
cuti varius vitiata bilis status phlebotomiam nunc postulat,
nunc rejicit , ita & alia medica auxilia. Quippe bilis dun-
taxat acrior alkalibus fixis , aqueisque simplicioribus , aut
epiceraisticis cicuranda est , atque eluenda ; combusta , ex-
succa , & accensa serosis refrigerantibus , & attemperantibus
corrigenda ; lentior excitanda , attenuanda , abstergenda ; fri-
gidior , crudior , sive inertius viscida calefacienda , seu sa-
lino-sulphureo-volatilibus , aut amaris aromaticis exaltanda ;
vel tandem resinosa cum enervatâ propriorum salium sapo-
nariâ potestate nitroso-tartareo-diluentibus emollienda est ;
sulphura enim nonnisi interventu salium aquoso latici im-
miscentur , atque cohærent , ita olea saccharo , aut sale im-
buta solvuntur in aqua communi , quæ aliàs separatim flui-
darent. Quòd si morbosa bilis concocta sit , aut turgescens,
catharticis promptè expianda venit , aut si per febriles cir-
cuitus ferociens , febrifugi incantamento coarcenda.

24. *Antimonii nomen horrendum , vomendi actio nimis incommoda , inconcinna , & inurbana , nobilibus personis adeò sunt exosa , ut piaculum sit medicis id remedii genus eisdem proponere ; interea plurimi eorum moriuntur , qui , si per datum ap-
to tempore emeticum permisissent gutturi suo concussiones nonnul-
las , orci fauces teterrimas evadere potuissent,*

S C H O L I U M . VIII.

*Pro vehe-
mentiori
moderando
vomitu præ-
sidium à
cucurbitula
admotio-
ne.*

IN vomitibus per artem vehementius excitatis , aut ex-
contumaci internâ causâ præcipuè biliosâ acrius exsti-
mulante , opportunum , faustumque semper auxilium exper-
tus sum ab admotione , horis aliquot protractâ , cucurbi-
tulæ ad epigastricam regionem : quod etiam remedii genus
catharticiis potionibus , aut alimentis , si facile per vomitum
rejiciuntur , in ventriculo asservandis præstantissimum extat.
Et sanè distentis , atque elevatis à cucurbitulæ opere com-
munibus integumentis , conclusus ventralis aër rarefactus , ac
diductus suum ad ventriculi latera pressionis momentum val-
de deperdit ; Hinc hæc stomachalis utris latera à validiori
ejus accubitu liberata , commodius ad exteriora se dilatan-
do statum induunt oppositum vomitui , qui nempe in retra-
ctione ad interiora consistit. Cessat ideò ad illud tem-
pus tota actio vomendi , ut ut superstes sit vomendi sti-
mulus.

25. *Expiatis per superiora choledochis , saltem quantum dari
potuit , satago per repetitos alterantium haustus subsidentem ad-
huc cacochyliam disponere ad evacuationem alvinam per catharti-
cum exhibendum , ut brevè possim peruvianum corticem , aut
aliud febrifugum implorare , dummodò urine saturatiores , aut
ulla ex antedictis conditionibus usum ejus ocycorem non vetent.*

SCHO-

SCHOLIUM IX.

Quibus in casibus febrifugum præsidium ad febres exi-
gatur ante extranei succi præparationem, imò & vi-
gente urinarum saturatione, in tractatu de occasione febrifugi abundè discutiemus. Quòd si cæterùm prolonganda veniat febrifugi administratio, fert omne curationis punctum alternatio præparantium remediorum, atque cathartico-
rum.

Alia de febrifugo admonitio.

26. Febrifugi formula mihi familiaris hæc est, vel parum absimilis conser. flor. cichor. ℥ij pul. china-china ℥j theriacæ Andr. ℥i℥ sal. absynt. & card. bened. ā. ℥j cum syr. è succo cichor. vel endiv. f. electuarius, de quo cap. æger ℥iij pro dosi bis, vel ter in die horis ij ante cibum, vel horis electis juxta ordinem paroxysmorum. Sæpè immisceo salem cent. min. vel pulv. ejusdem centaur. min. exsiccatur, imò aliquando in gratiam pauperum hoc solo pulvere cum conservis, & Theriacâ in electuarius redactò feliciter usus sum, sicut & pulvere gentianæ.

SCHOLIUM X.

Sola totius substantiæ febrifugi corticis usurpatio efficax
est, cùm tota potestas in toto corticis composito consistat. Ita inutilia deprehenduntur salia china-chinæ, spiritus, phlegmata, aliaque ejus principia per Chemicam
Analysim, elicitæ; atque idcirco febrifugi pensum absolvent
corticis hujusmodi extracta, tincturæ, & infusiones, quia in-
tegras adhuc, neque in essentialibus principiis solutas ligni
hujusmodi particulas secum addunt, & in sanguinem defec-
runt. Non ita tamen res est de lignis aliis, radicibus, seminibus, fungis, aut productis à ligno resinis, purgandi facultate præditis; quorum quidem determinatis duntaxat
particulis, putà resinosis, tota agendi ratio demandata est:

Facultas febrifugi corticis non in determinatis partibus, sed in toto, earumque omnium servatâ unione consistit.

Mmmm 2

ut

ut in jalappa, elleboro, carthamo, agarico, scammonio &c. ex quibus igitur extracta, magisteria, aliaque in minorem dosim, quam totum mixtum adhibeatur, usurpanda conficiuntur. Cæterum febrifugis ex peruviano cortice misturis solidiusculis efficacissimo successu Ammoniacum sal, interdum & Tartarum vitriolatum, camphoram insuper & myrrham in complicatis præcipuè mulierum debellandis febribus, foederamus. Frequenter convenientiora purgantia, præcipuè rhabarbarata adjicimus, quum nempe ante purgationes radicitus instituendas ocyus adhibetur febrifugum.

27. *Pleuritides, vel Peripneumonias, imò melius Pleuropneumonias febribus antedictis supervenire gravissimas non semel advertimus, quæ licet aliquando pseudopleuritides audiant, vel apparentes peripneumonia cum dolore vago ad alterutrum latus, vel ad costas nothas, vel nullo; tussi sicca, & inani, aut cum sputo tenui, albo & spumoso, aliquoties subcruenta, aut subflavo, & similibus, reapse tamen vera sunt biliosi recrementi exorbitantia, & metastases, ferè erysipelatoſæ, quæ brevi interdum agrum de medio tollunt. Hæc hisce oculis ego met vidi in dissectis cadaveribus, ut infra enarrabo. Inflammationes hujusmodi non modò pectoris, sed & capitis, & abdominis internas partes afficiendo illæ eadem sunt, quibus imputandum est malignarum febrium plerarumque ingenitum venenum, non aliunde delatum. Bilis etenim à naturali suâ crassi deflectens, si à fluidorum massâ abscedat, nec statis temporibus, morulisque per secretoria vasa elutrietur, aſt immorari cogatur, ideoque & fermentari, deleteriam adeò naturam sæpè acquirit, & furorem, ut tamquam virus exoticum summè veneficum non modò interna viscera pervadendo conficiat, sed & non rarò è choledochis suis rupto aggere affatim erumpens horrenda infligat pathemata, ut observavi in aliquibus febricitantibus annis 1704, 1705, 1707, qui in ipso Tertianæ paroxysmo bilis sincera vomitu, vel cum simultaneis alvi irritatio-*

tationibus correpti, à morte revocari non potuerunt, quovis ap-
 tato subsidio; " Hinc Hippocrates de loc. in Hom. Bilis si sua
 „ sponte aut infrà, aut suprà proruperit difficiliùs sedatur. „
 Quod sanè in emetico millies exhibito nunquam evenisse affirmare
 jam possum; vel saltem si vomitiones ab hoc excitata modum ali-
 quando exceſſerint, mox ingesto uno, vel altero cochleari mix-
 turæ ex Theriac. 3j sal. absynth. 3j elixir propriet. & laudani
 liquidi ã. gut. xvj in aq. totius citri, vel alterius gr. 5. brevi
 sistebantur cum ingenti agrotantium euphoriâ, & commodo; ut
 suadet laudatus Cous de locis in homine pag. mihi 419. 30.
 „ Quod si vomitu affectus debilis fuerit, à vomitu medi-
 „ camentum somnum concilians exhibeto. „

SCHOLIUM XI.

AD finem Septembris 1719. D. Andreis ætat. ann. 47. *Historia*
 vehementi irâ, mœrori conjunctâ corripiebatur; atque *pleuritiidis*
 gravissimum prius cibi fastidium, hinc febris periodicæ na- *biliaris ab*
 turam simulans suboriebatur, quam ad secundi circuitus fi- *ira.*
 nem dexter subscapularis punctorius dolor ad posteriorem
 hepatis regionem protensus, atque identidem sub mamma
 correspondens excepit; subitaque bilis cum pulmonico mu-
 co implicatæ multoque sanguine immixtæ facilis, & larga
 per tussim ejectio cum pectoris angore, & notabili angu-
 stiâ visa est. Ad imminentiam, imò potius principium
 symptomatici phlegmonoso-bilioſi decubitus in pulmones,
 sanguinem detraho. viget cruentum, mucosum, biliosum spu-
 tum, tussis tamen conatibus uber, atque facillimum. Mi-
 rescit febris, atque evanescit dolor; sed simul angustia spi-
 randi usque ad stertorosam attingendam orthopnoeam inva-
 leſcit. Huic tamen uberrimis oleosis præſidiis prospicio;
 Horumque subsidio largâ pleuriticæ bilis procuratâ anaca-
 tharsi, imò, & leviuſculâ ſuccedente per alvum, atque sub-
 flavâ excretionem, febri ante septimam judicatâ, sputoque
 Mmmm 3 usque

usque ad undecimam perdurante, pulmo tandem à quolibet morboſo effectu expediebatur. Sola ad aliquot dies superſtes inappetentia fuit. Ita morbus eò deſiit, undè cœperat. Ite jam medentes viri, bilioſas metaſtaſes, palindromes, anadromes, epigeneſes ſuper antiquorum conſumatiffimas præceptiones ad ægrorum lectulos, ritè aptèque perpendite, & in bonam praxim redibitis.

28. *Pulmonica affectiones hujus farina à bile præſervidâ impingi poſſunt citra medentis culpam; attamen ſapè ſapiùs Chirurghi lanceola, ut jam dixi, illis reſeravit fores, quando nempe non promotâ priùs ſufficienti eructatione bilioſorum in morbi exordio, inſtituitur venæ ſectio in bilioſis cacochyliis, quod facile adeò non continget per etiam iteratas phlebotomias dictæ expiationi poſtpoſitas, ubi fiat opus, & indicata videantur.*

SCHOLIUM XII.

In biliari morbo quando ſit miſſio ſanguinis inſtituenda.

CUM igitur in principio morborum, Bilis inſurgentes æſtuationes, aut copię, attemperantibus, vel blandè laxantibus proſpiciendæ ſint, non autem ad excuſus, & impetus per vaſa ſanguinis adigendæ ablatione reſiſtentium, atque obturantium ſanguinearum particularum per phlebotomias inſtituta, opportunè referendus videtur textus ille Avicennæ: *Phlebotomia multoties facit febrim, & multoties facit putrefactionem*: & ille Zacuti Luſitani: *In febris bilioſis venæ ſectio, extracto ſanguine, qui ſuâ benignitate, & temperie humoris bilioſi acrimoniam retundebat, cholericoſum ebullitionem facere poſteſt*: Repeto, quod ſuperiùs in genere animadvertēbam. Bilis, quæ poſteſt metaſtaſim facere, nullo modo miſſione ſanguinis movenda eſt: quæ facit, aut fecit, phlebotomiâ moveri poſteſt. Cave à bile poſt pulmonicum decubitum adhuc turgeſcente, & caput minitante: *Lateris dolor cum ſputis bilioſis temerè, ac præter rationem evaneſcens,*

nescens , agros in vehementem , & furiosam animi commotionem agit: Hippocr. Prædict.

29. In curandis affectionibus hisce peracutis non Doctorum hypothetica ratiocinia , sed cautum me fecerunt experientia , & ocularis inspectio , neque mihi satis probata est Doctorum quorundam traditio , quæ solis spiritibus peculiari veneno infectis , aut salium acidorum , & alcalicorum luctæ per tumultuariam ex primorum aculeis in alterorum poros , & sinulos vi inductis aggressionem , & succussionem , febrim , & quodlibet exurgens symptoma , aut phlogosim deberi docet , ablegatis humoribus ; quare herculeo corticis peruviani antidoto profligandas iri indiscriminatum hujus notæ agritudines suadet , præviâ tantum venæ sectione ad delendam spirituum , aut efferationum salium spasmodicam ataxiam. Enim verò subtiliores fluidorum particulas (quæ spiritus audiunt , & salia volatilia) utpotè activiores , magisque mobiles , esse paratiores ad concipiendam deflagrationem , & excalescentiam , atque impetus promovendos non inficior ; causa tamen continens harum febrium & morborum ab ipsis dependentium (in hoc censu non veniunt febres ab insolatu , & animi pathematis , aut verè malignæ , aut pestilenciales , aut ab assumpto veneno , & similes) humerosa sat est , magisque adhuc materialis , incendii tamen capax , cujusmodi bilis est præ cæteris omnibus. Quare ad earum curationem rectè dirigendam utiliores sum expertus Veterum Humoristarum animadversiones praxi meæ magis respondentes , quarum nonnullas ad rem hanc omnino pertinentes non tædeat recensere. Hippocrates hæc habet in Coac. Prænotionibus sect. 3. num. 491. „ Lateris „ dolores in febribus tenuiter consistentes , & absque ullâ significatione venæ sectio ledit , sive aversum à cibis animum , si- „ ve sublata præcordia æger habeat. Quin etiam in corporis per- „ frictione torpescens , non sine febre sanguinis detractio ledit , „ & cum videantur levius habere moriuntur.

SCHO-

SCHOLIUM XIII.

*De Vana
acidorum,
& alcalium
ad explican-
dos natura-
les hominis,
& præterna-
turales sta-
tus Hypothe-
si: & quomo-
do accipien-
da sint eo-
rum potesta-
tes.*

INdoles acidorum, & alcalium, quæ quidem salia archi-
tectonica à plurimis naturalium omnium, & præterna-
turalium rerum instrumenta reputantur, rota hucusque non
bene comperta fuit; aut saltem non rectè explicata eorum
discordia. Si pugnant apposita Alcalicis Acida, cur alte-
rutra homini intromissa, propriis, iisdemque efferatis con-
trariis conciliare pacem, profertur? Et si pacem ineunt oc-
cursantia in homine alcalicis acida, veluti quod à primis
altera tamquam gladii, novaculæ, acus, aut cuneoli, abs-
condi, & involvi queant; Cur igitur extra hominem lu-
ctant cum alcalicis acida? Non igitur sanum est conjicere,
salia, acida, & alcalia dicta, seu salia propriè hosti-
lia, fixa, volatilia, aut media, quum fluorem adepta, ac
debitâ statione, debitoque spatio donata in se invicem oc-
currunt, depræliari inter se, quod primorum cuspides in
alterorum poris intricentur, tamquam in vaginis gladii;
nam sic amborum potiùs quies, & pacifica iniretur compo-
sitio, omnisque ulteriorum motuum facultas adimeretur:
sed potiùs totius dissidii causa repetenda est à diversis am-
borum figuris, & molibus, diversâ in consequens superfi-
cie, diversoque coherendi nisu, & vario compositionis mo-
mento centripeto, ut hoc pacto nec situs, aut ordo æ-
qualis comparari ab utrisque possit, neque alia juxta alia
locari. Hinc utraque variis laterum modis juxta posita,
variasque per lineas motuum obliquè, aut oppositè se invi-
cem impingentia, eò usque digladiantur, quò variè invicem
in propriis superficiebus immutata, jacere simul queant, vel
attrita nimium, & confracta, tamquam faucii milites è
prælio, & acie procidentes, ob dirutas cum molibus vi-
res, non ob initam pacem confusa simul præcipitentur,
arque impotenter quiescant. Ita post quandam acidorum,
& al-

& alcalicorum salium luctam, immixta amborum fragmina in tertiam enixi salini corporis speciem tacitè coalescunt. Quòd si contrarii fautores salia alcalina, non minùs quàm acida, esse naturaliter cuspidata depromunt, placitum nostrum magis adhuc confirmant: interea notatu dignum est, duplex extare alcalium genus, alterorum scilicet, quæ obtusa, vacuaque simpliciter sunt, alterorum, quæ solidiora, rigidiora, & aspera: Illa terrea corpora, ac merè passiva: hæc propriè salia, acidis non secùs activa, sæpe & activiora. Prima quidem se acidis in quendam, ut suprà, vaginæ modum fortasse præbere non dissentirer; ut quum corallorum pulveri superfunditur acetum. sed altera, ut sal Tartari eliquatum cum superaddito vitrioli spiritu immaniter effervescent, alio modo se gerere, neque dissimili à propositâ hypothesi explicari posse, omnino putandum est. Hanc digressiunculam famosis salium hujusmodi per praxim, & Chimiam discordiis, eisque toto numero superductis paradoxis debebam. Sed de invalentiâ horum principiorum ad naturales, aut præternaturales res perficiendas, aut explicandas consulantur David de Beke, Barnerus, Tachenius ipse, ipseque Bohnius, & alii.

Cæterum ut eò redeam, undè digressus sum, atque Hip- ^{De tempore} pocraticam à Guidetto allatam sententiam cum aliis ejus- ^{non mittendâ} dem Præceptoris textibus confirmem; In morb. vulgar. lib. ^{sanguinis in} 6. sect. 7. ista leguntur: *Incruenta spuentibus sanguinis detra-* ^{biliosa pleu-} ^{ritide.} *ctionem prohibet anni tempus, lateris dolor, bilis*: Dicit Senex: *Incruenta spuentibus*; non verò in cruorem spuentibus, quippe sputa simpliciter cruentata suo jam pollère possunt coctionis gradu: quòd si meracus sanguis à pulmonibus per sputa ejiciatur, tamquam ab inflammatoriâ Hæmoptysi, aut etiam phlegmonosâ pleuritide ortum ducens, subitam sanguinis missionem deponit. Prohibet igitur *bilis*; quæ scilicet facilè, & copiosè in principio morbi cruenta spuentium è pulmone ejiciatur: nam idem affert in 2. Prognost.

Flavam bilem sputo admodum permixtam apparere intra initia bonum : Quo quidem effato flavam Bilem cruentis in sputis inter initia apparentem celere jam coctionis principium, aut plurimam ad coctionem aptitudinem exhibere, proindeque missione sanguinis non esse interrumpendum naturæ inchoatum opus, intelligit. Prohibet insuper lateris dolor, si quidem, ut supra effatus Hippocrates fuit, tenuiter consistens, seu levior, & vagus appareat, neque acutus, & punctorius. Prohibet denique anni tempus, si nempe æstivum sit, cum bile ad subitos, efferosque (ut alibi innuebamus) ex detractone sanguinis ineundos impetus, & orgasmos aptissima. Symptomaticam autem hujusmodi biliosarum pleuritidum à vitiato hepatico bilis fonte naturam designare Hippocrates non dubitat per illa: sive aversum à cibis animum, sive sublata præcordia ager habeat.

30. Hujus sectator Martianus inter Veteres expertissimus hæc addit : “ Præfatos dolores sæpius observavimus in praxi modo illam partem pectoris infestantes vagè aliquando desinentes, & paulo post insurgentes (id, quod importare verba illa Hippocr. tenuiter consistentes, puto) in quibus alii cibos fastidiebant, biliosam materiâ os ventriculi infestante, & his dolores partem sinistram lateris plerumque occupant. Alii hypochondrium dextrum in tumorem elevatum sine manifesto dolore ad contactum invenimus, & his dolor partes dextras potius infestare solet, utrosque levi purgatione sedatos esse vidimus, non dubitantes à vena sectione ledendos fore, utpotè per eam in venas evocaretur humor biliosus, undè majus malum. Hæc ille Antiparalog. fol. 21. Feliciorem eventum ex vomitione biliosa pollicetur Riverius Prax. med. lib. VI. cap. II. pag. mihi 104 : “ Vomitus biliosus, & copiosus in principio pleuritidis salutem prænuntiat. Levata enim natura ab illa evacuatione biliosæ cacochimie morbum faciliùs superat.

31. Doctissimus Ballonius Epid. lib. I. pag. 78. habet : “ Major est pars pleuritidon, & dolorum lateris tum à congestionem

„ stione cujusdam excrementi in pulmonem , & thoracem , tum
 „ ob recursum tenuioris humoris per orgasmata à ventre inferio-
 „ re &c. , quod diligenter videndum , quoniam plerique non au-
 „ dent purgare , & solvere ventrem ; at sapè hoc plus con-
 „ fert , quàm phlebotomia , imò tunc sectioni locus non est ,
 „ nisi fortè semel id fiat.

32. Inflammationes pulmonicas biliosis febribus supervenientes
 prapedire potis est proposita medendi methodus , quâ explorato
 semel , in re dubiâ , sanguinis statu per phlebotomiam , biliosa
 colluvies initio febris per vomitum magnam ad partem evoca-
 tur , nisi quid obstat , ferè ante tertium paroxysmum , & su-
 perstes in corpore cohibetur memoratis auxiliis diluentibus cicho-
 raceis , paregoricis , anodynis , & cortice peruviano &c. His
 tempestivè institutis , si nihilominus suboriri videantur meta-
 stases pulmonica , aut hujusmodi , tunc profectò à venæ sectione
 non abhorreo , sed hanc pro morbi acutie repetendam volo. Et
 reverà sanguis , non ut antea , sincerus extrahitur , sed vel qua-
 lis aliàs extrahi solet legitimâ pleuritide affectis , vel gelatinoso-
 flavus , vel glastens , vel plumbeus.

SCHOLIUM XIV.

Pleuriticas inflammationes biliosis febribus , & bilis ir-
 ruptioni in pulmonem supervenientes facilè per alvinas Alvina bi-
 liares excre-
 tiones quan-
 do in pleuri-
 ticis biliari-
 bus inflam-
 mationibus
 evadant
 proficua.
 excretiones easque biliares retrahi affirmat Hippocrates in
 Coac. prænot. Quibus in febribus dolore Lateris fiente , alvus
 multa aquosa , & biliosa egerit , hi alleviantur. Sed hîc est
 annotandum , Hippocratem dicere dolore lateris fiente , non
 autem factò ; ut distinguat hoc pacto biliosas pleuritides ,
 quæ vel ab irritatione noxii humoris , in primis viis degen-
 tis , & ab his ad Thoracem ascendentis excitantur , vel ab
 eodem humore , pulmonibus quidem jam impactò , sed ad-
 huc mobili , turgente , in orgasmum adactò , ab illis , quas
 arcta nimis ejusdem humoris in eodem viscere systrophica

concretio cum inflammatoriâ simul sanguinis habitudine comitatur; in quarum quidem principio à quibuscumque purgantibus abstinendum esse in IV. Acut. docet: *Quicumque ea, quæ inflammata sunt statim in principio morborum medicamento solvere aggrediuntur, hi de intento quidem, ac inflammato nihil auferunt; non enim remittit affectio, quæ adhuc cruda est; quæ verò morbo resistunt, & sana sunt, colliquefaciunt.*

Quomodo biliosa, essentialia, aut symptomatica pleuritides à sanguineis, aut aliis quibuslibet diversis generis, aut pleuritides in genere ab hepaticis affectibus, interstinguenda sint.

Cæterum, multâ medentibus sagacitate opus est ad interstinguendos lateris dolores cum febre; cum hi nunc à phlegmonosa exquisita, nunc à biliari pleuritide; interdum ab essentiali, quandoque à symptomatica, neque infrequenter infonte pulmone, aut vix in irritationum consensus perducto, ab hepatis phlegmone, aliove etiam minori affectu originem ducant. Et sanè vel ab ipso Hippocrate primo intuitu videntur confundi: Nam cum à Senis oraculis sæpe prolatum sit, dolores lateris cum acutâ febre, & spirandi angustia, quò magis ad superiora versùs claviculam, & jugulum ascendunt, eò systrophicum magis, seu primarium pulmonis morbum patefacere; quò plus ad hypochondrium extenduntur, eò primariam in naturalibus visceribus affectionem indicare, &, si quâ sit in thorace vitium, ab illis per irritationem propagari; hinc pleuritides in ascendentes, & descendentes dirimantur, quarum primis phlebotomia, alteris purgatione prospiciendum veniat; interea ex eodem Hippocrate dolores laterum cum febre ad jugulum, & claviculam cum spirandi difficultate protenduntur, totam mentientes pleuritidem, qui verè systrophes pulmonicæ non sunt, sed hepatici phlegmonis, aut hepatitidis symptomata. *Morbus hepaticus: dolor acutus in hepar incidit, & sub ultimas costas, & in humerum, & in claviculam, & sub mammam: & fortis suffocatio tenet &c.* ut in jecoris phlegmonis, atque hepatitidis Tractat. superiùs attulimus. Attamen divinus Senex in hoc statim, aliisque plurimis locis pleuriticum

ticum ab hepatico dolore internoscendi modum infinuat. *Aliquando lividam bilem revomit, & rigor, & febris primis diebus debilior habet, & dum tractatur hepar, dolet.* Quamobrem, quemadmodum hepatitides, licet principio per dolores, tensiones, & stimulos ad adnexas, attiguas, aut etiam diffitas membranas protractos, pleuritidis speciem mentiantur, per varia in primis viis biliosa tripudia, æstuationes, lumborum ardores, sitim, assiduam oris amaritiam, croceas, aut etiam lateritias urinas, saturatas biliales alvinas excretiones, aliaque similia, & propria insuper symptomata abundè manifestantur; ita ad biliosam essentialem, aut symptomaticam pleuritidem à sanguinea, aut aliâ quâlibet diverſi generis interſtinguendam, videndum est, num in agro acutum affectum biliosa præceſſerit cacochylia cum pleno, gravique corporis habitu in lurido-ictericum vergente; Aut naturalium coctionum delinquentiæ, in flatuosas dyscrasias faciescentes cum adstrictâ alvo, inappetentiâ, nausæ, hypochondrii dextri tensione ac veluti conglobatione, & similibus.

Ex his igitur varia etiam signa deduci possunt, quibus proclive sit, symptomaticam biliosam pleuritidem ab aliis diversæ naturæ, præcipuè ab essentiali, & inflammatoria discriminare. Ita Doctissimus Sennertus Tractat. de pleurit. hæc signa profert biliosæ symptomaticæ pleuritidis: *Si bilis adsit, sputum est subflavum, dolor admodum pungens, febris est acuta, & ardens (intellige in progressu morbi) quæ ferè typum Tertianæ servat, sitis est vehementior, pulsus durior, & velocior, vigilia, & anxietates majores, urina citrina, tenuior.* Duo insuper ab optimo Sene adducuntur propria biliosæ symptomaticæ non exquisitæ pleuritidis; rigor nimirum, & febris primis invasionis aleis valdè mitiores. Hæc siquidem in exquisitâ pleuritide vehementissima protinus sunt: & sicuti rigor inopinatò adoriens, & affectionem inchoans, quò ingentior est eò majorem inflammationis gradum testatur,

Nnnn 3

ita

ita & acutior febris rigorem statim excipiens. Neque deficiunt in symptomaticâ biliari pleuritide tensio quædam ad dextrum hypochondrium, & subobscurus ibidem dolor, præcipuè à contrectatione sensibilis. Atque hæc, post diffusiora alia, quæ proprio tractatu superius collegimus, dicta sunt de symptomaticâ biliosâ pleuritide, cujus principium, & augmentum, seu ante quartam diem, & septimam, non solum tolerant, sed apprimè exigunt purgationem, contra ac exquisitæ, seu essentielles, & phlegmonosæ, imò & catharrhales systrophicæ, quæ ut plurimum in principio, aut augmento per catharsim tentatæ violentius concutiuntur, atque in fortiores stases adiguntur.

*Habitudo
extracti
sanguinis
in erysipela-
te.*

Quod spectat ad inspectionem extracti sanguinis fateri possum non minùs in bilioso pulmonum, quàm alio quolibet per alias hominis partes erysipelate inspectum ejusmodi sanguinem striis biliosis, flavis, viridibus, ærugineis magis minùsve in superficie variatum plerumque vidisse.

33. *Quando metus est ne pulmonibus inflata jam sit phlogosis, quamvis nulla sit facta biliosa eructatio per superiora, malo tunc parcere vomitoriis ne per violentos nifus, atque ad superiora impetus altiùs agatur inflammatio: sicque præviâ de inferioribus venis phlebotomiâ leve catharticum exhibeo ex decoctione tamarind. & Rhei in decoc. pectoral. addit. cassiæ rec. extrac. ℥vi syrup. rosat. solut. ℥ij; vel cassiæ dilutum repetitis haustibus, prout major, vel minor viscerum fervor indicare videtur. Mox bol. ex conf. hyacinth. rob. sambuci cum granis aliquot camphoræ, nec non emulsiones ex semin. frig. sem. pap. alb. sal. prunel. cum syrup. papav. rhead. & laudan. liquid. in aqua convenienti propinari jubeo. Fuscula herbis pectoralibus, & hepaticis medicata non omitto; ut nec mitiora cardiaca antipleuritici immixta.*

SCHOLIUM XV.

IN fellea pulmonum phlogosi, præ aliis omnibus, pro-
desse egregiè videntur oleosa præsidia, cumulatim, vel
partitè propinata. Hæc sanè resinofam bilem placidè & pa-
catè solvunt, exstimulantem infringunt, atque ab ejus cu-
neolis intentum solidum emolliunt, ferventem temperant,
abstergunt impactam; tum per inferiora, aut etiam blandè
per vomitum deturbare apta sunt. Quod si pleuriticus do-
lor nonnihil sub transverso septo descendat, emollientes fo-
tus plurimâ cum utilitate adjiciuntur.

*Oleosorum
præsidiorum
ac fortium
utilitas in
biliari pul-
monum ac-
censione.*

„ 34 Paucis repeto: ubi præsens est Bilis orgasmus in vis-
ceribus abdominis, huic statim delendo omnino studen-
dum puto per idoneas excretionum vias, videlicet per su-
periores, si nausea, anxietas, cordis molestia, jectigatio,
hypochondriorum, lumborumque gravitas, aut similia
comperiantur, & naturalis ægroti dispositio obsequatur;
Per inferiores verò, si intestinorum murmura, humo-
rum turgescencia, aut divergentia ad alvum id suadeant;
magis adhuc si præluceant pepasmi, aut fluiditatis mate-
riæ signa; maximè si naturalis resistantia ad vomendum
dehortetur emetica. In quibus omnibus religiosè servan-
da sunt magni Senis præcepta sect. 4. Aph. 4: 6: 7: 10:
18: & sect. 1. Aph. 21, & 22. Secundo loco compescen-
dus est motus, & castiganda acrimonia bilis superstitis,
quæ per febriles commotiones appulit sanguini, vel ap-
pellit; Id assequimur paregoricis, demulcentibus, dilu-
entibus, & abstersivis. Hæc si opportunè præmiserit Me-
dicus, poterit curationem in reliquis perficere quavis me-
thodo rectè institutâ cum, & sine phlebotomiâ, sæpè
etiam solo cortice peruviano. Quod sanè haud asseque-
tur, si ipso febris principio symptomatum syndrome per-
territus

„territus chirurgicis ictibus dimicando nitatur morbum
„confodere, ut videre est in historiis sequentibus.

„35. Anno 1709. Mensibus Februario, & Martio (quos
„precesserat gelidissima Januarii constitutio oris etiam ma-
„ritimis propagata) in oppido Sanbenigni, ubi tunc medi-
„cinam faciebam, truculenta febrium, pleuritidumque so-
„boles populariter grassabatur (eandem luem ad idem tem-
„pus per totam Italiam, aliasque regiones diffusam, refe-
„runt); ad cujus profligationem repetita venæ sectio, ut
„mos est, de brachio implorata aliquibus erat valde pro-
„ficua, aliis indifferens, pluribus noxia; sic & sanguis ex-
„tractus diversam in hac triplici ægrotantium specie exhi-
„bebat superficiem, & consistentiam; Quibus missio opi-
„tulabatur, fibrosa sanguinis portio in disco concreta for-
„titer compacta duro obtegebatur chorio, puris colorem
„emulante, innatabatque expresso circumquaque sero instar
„fungi vetustioris lixivo immersi, ut oppidò conspiciamus
„in veris atque exquisitis pleuritidibus: & reverà hujusmo-
„di pleuritici dolorem in alterutro latere magis fixum, ma-
„gisque acutum percipiebant cum duritiæ pulsantis arteriæ,
„tussi, sputo cruento, & similibus; pariterque remedia an-
„tipleuritica, paregorica, bechica, & venæ sectionem, ut
„jam dixi, bene ferebant.

36. Quibus venæ sectio erat indifferens, sanguis eductus
„gelatinosam æqualiter & promiscuam consistentiam asserva-
„bat: dolores eis in pectore obtusiores, tusses magis stre-
„pentes cum catarrhali anacatharsi, forti spirandi angustia,
„potissimum sub vespas, & per noctem, paribusque symp-
„tomatibus pleuritidem notham, & catarrhalem denunci-
„antibus; quâ tamen perpauca, senes ut plurimum, aut
„phlegmatici homines afficiebantur, iique melius remediis
„incisivis, aperitivis, pectoralibus, seu expectorativis tum
„internis, tum externis, calidè adhibitis, quàm per phle-
„botomiam sanabantur.

„ 37. In tertio tandem ordine constitutis à cruoris scilicet missione in deterius positis (hic erat major ægrotantium numerus) sanguis tam primâ , quàm alterâ incisione evocatus , eleganter rubellus post ejus concretionem remanebat ; dolores erant vagi , tussés inanes , & molestæ , vel cum pauco sputo seroso , vel subflavo , aut subcruento per vim expresso ; pulsus celer , & frequens , intensus calor ; genarum color roseus , anxietas vehemens , sitis ingens , vigiliæ , & jactationes assiduæ ; quodque pessimum erat , hujus classis pleuritici diem quintum non superabant , erantque omninò supervacanea quævis antipleuritica remedia , sic etiam topica applicantes , canebamus surdis , mortem , ne hilum retardantes. Qui nullâ tractabantur sanguinis missione , ad septimam , nonnam , ad summum decimam protelabantur , ast itidem peribant. Hâc pleuritidis specie tenebantur corpora utriusque sexus vegetiora , in primis picrochola , floridioris ætatis , consistentem non excedentis.

„ 38. Ægrotantium internecione perterritus , seniorum adhibui consilium , librosque volutabam ; sed nequidem his doctior factus , harum pleuritidum anomaliam sedulus meditabar ; Cùmque harum genesis Boreæ immodicè constipanti , & stringenti , mox austro improvisè laxanti , & solventi esset imputanda , tamquam causæ universalis procatarticæ , atque indifferenti , certissimum hinc duxi unumquodque corpus juxta internas sui dispositiones phlogosi , aut systrophe correptum iri , vel phlegmonode , vel catarrhali , vel erysipelatode ; cujus postremæ naturam porrò referebant pleuritides truculentiores tertię distinctionis adductæ. Quum itaque ad egrotos accerserbar , symptomata singula , diligenti criterio , unicuique speciei respondentia perpendebam , & distinguebam. Quòd si forent æquivoca , unicam phlebotomiam explorativam de cubito ad aliquot uncias præmittebam : Si verò satis signa

O o o o

„con-

„ concluderent affectionem esse erysipelatofam, five biliofam,
 „ omninò interdictâ venæ fectione, præsertim è venis supe-
 „ rioribus, clysteres emollientes, & detergentes primitè
 „ suadebam (vomitorium in iis, fateor, casibus propinare
 „ non audebam, cùm de inflammationibus peracutis agere-
 „ tur per hyemem debacchantibus, febris contemporaneis,
 „ in subjectis juvenibus, si potissimùm aliqualis vasorum
 „ depletio non fiebat. Quibus autem phlebotomia explorativa
 „ præponebatur, & facilem habebant ad vomendum dispo-
 „ sitionem, magno cum fructu illo utebar ex pul. rad. asa-
 „ ri ʒß, sal. vitrioli ʒj oximel. simpl. ʒj in haustu decocti
 „ pector. tepidi, vel ex aq. bened. Rulandi, & oximell. scyl-
 „ lit. ā ʒj vel ʒjß cum aq. flor. sambuc.) mox dabam rob.
 „ sambuc. ʒß sal. prun. ʒj camphoræ gr. v, bis in die ho-
 „ ris duabus ante cibum, vel quatuor ab hoc elapsis, super-
 „ bibendo aq. scabiosæ, & flor. sambuc. ā. ʒij frequenter
 „ per diem, & noctem haustus calidi ex decoctionibus rad.
 „ cichor. alth. scorfon. scab. flor. pap. rhead. & nitro: In
 „ plethoricis saphena aperiebatur; In omnibus Clysteres le-
 „ nientes laudati horis matutinis repetebantur, & post cœ-
 „ nam emulsiones ex sem. mel. pap. alb. sal. prunell. in di-
 „ ctis aquis, addit. syr. viol. vel de nymphaea, cum guttis
 „ aliquot laudani liqu. vel tincturæ anodynæ. quartâ morbi
 „ die [morbus jam dabat inducias] exhibebam lene ca-
 „ tharticum ex cassiâ, & syr. ros. in decocto prunor. dul.
 „ & pulpæ tamarind. tartar., vel cum sale polycresto, addi-
 „ tâ persæpe infusione rhabarbari, queis ejiciebantur excre-
 „ tiones copiosæ bilioso-serosæ, vel resinose. Tantum in
 „ dictis præsidiis emanabat levamen, ut ægris palpabile, &
 „ adstantibus evidens præberetur. Ad tussim siccam, & tra-
 „ cheæ irritationes compescendas singulare erat bechicum
 „ ol. amygd. dul. rec. sine igne expressum, & ol. sem. lini,
 „ addito sale prunellæ, & camphoræ parvâ dosi; vel etiam
 „ syr. viol. viol.. Hoc eclegmate alioquin ingrato utebantur ægro-

ægro-

„ agrotantes, velut nectare ob ingentem utilitatem, quam
„ hinc reportabant.

„ 39. Quibusdam febris vigeat adeò perennis cum in-
„ genti exæstuatione, & minitâtâ ad caput epigenesi, ut
„ post aliqualem usum supradictorum ad quintum circiter,
„ aut sextum morbi diem, non dubitaverim iterare sectio-
„ nem saphænæ cum fructu, si semel fuerat instituta, vel
„ tunc instituere, si nondum celebrata. Tandem aliquando
„ hoc ritu diligenter servato, sedatis irruentiis humorum,
„ motibusque omnium compositis, aliud mihi non supere-
„ rat, quàm juscula ex cichoraceis, scabiosa, capillaribus,
„ & flor. pap. interponere, ut præparatâ ad cathartici repe-
„ titiorem viâ curationem absolverem.

„ 40. Dum hæc ex voto agebantur, mortuum audio mili-
„ tem robustissimum Regiminis Draconum *Genevois* in dicto
„ loco tunc commorantis, qui dolore dexteri lateris va-
„ go, tussi siccâ, & reliquis symptomatibus memoratis cum
„ acutâ febris vexatus, solâ phlebotomiâ quater, vel quin-
„ quies iteratâ, ad libitum sui Chirurgi de venis brachii,
„ absque alio remedio intus sumpto, fuerat quinto die mor-
„ bi extinctus. Arripui causam disseccandi ejus cadaver, quod
„ mihi lubens concessit Illustrissimus Dominus de *Grimotie-*
„ *re*, qui Regimini præerat [quod antea nunquam à nostra-
„ tibus, impetrare potueram,] statimque ad opus manum
„ apposuit D. *Gattus* Chirurgus noster, & aperto thorace,
„ patuit vel lippis, & tonsoribus fellea conspurcatio, quæ
„ totum pulmonis dexteri lobum obduxerat, velut crusta ex
„ ovi luteo plasmata, & pulmonibus concremata, cujus cro-
„ ceo colore inquinabantur pleura, mediastinum, Pericar-
„ dium, & quidquid pulmonem attigerat, imò & cor ipsum
„ in dexterâ sui parte. In thoracis cavitate ejusdem lateris
„ effusam conspeximus quantitatem feri lixivi, & interna
„ pulmonis substantia, quam totam deglubere curavimus,

„ atro cruore æqualiter imbuta livebat. Sinister pulmo ,
 „ & reliquæ partes naturaliter se habebant.

S C H O L I U M XVI.

*De biliosa,
 qua ab anti-
 quis decan-
 tatur, mor-
 borum causa
 non quidem
 calidiori
 sanguini, sed
 ipsimet re-
 crementitia,
 jam in hepa-
 te elaborata
 bili impu-
 tanda.*

JUvat hîc incusare inexcusabilem plurium modernorum al-
 lucinationem, qui nempe suadere sibi contendunt, Hip-
 pocratem cum antiquis pro febrili, aut determinatas partes
 præternaturaliter invadente bile, variosque in iisdem mor-
 bos ciente intellexisse, non quidem bilem illam recremen-
 titiam, aut excrementitiam, sed quemlibet humorem cali-
 dum, atque ad ineundas effervescentias proclivem, præci-
 puè sanguinem ipsum calidiorem, & siccum, biliosum idèò
 dictum. Enim verò non solum propositum hujusmodi à D.
 Guidetto extispicium contrarium evincit; quo nempe mani-
 festè ostensum fuit, pleuritidem militis fuisse ex genuinâ bile,
 quæ à bilioso sanguine, aut alio quolibet calido, siccoque
 humore distincta erat, flavâ, imò croceâ, recrementitiâ, seu
 si mavis excrementitiâ, progenitam; sed ulterius plures Hip-
 pocratis, aliorumque principalium Scriptorum textus abundè
 confirmant. Ita ne infinitus sim, aliquot duntaxat loca, ab
 Hippocrate in hunc censum elicitâ adducam. Primum ex
 lib. de nat. muliebr. decerpimus: *Si caput, venter imus, &
 lumbi doleant, bilis uteros infestat. Huic igitur medicamentum,
 quod sursum, & deorsum purgare potest, exhibere oportet, cali-
 dâ lavare, & quæ bilem purgent in subditis apponere.* Jam ergo
 intelligit Præceptor bilem à sanguine calidiori, aliove quoli-
 bet humore distinctam, sive propriè recrementitiam, ali-
 quando à sanguine secretam, postmodum eidem ad ciendum
 descriptum morbum refusam: Quippe cùm medicamenta pro-
 priam bilem signatè purgantia imperet, atque phlebotomiæ
 mentionem haudquaquam instituat.

Alter locus lib. I. de Morbis occurrit: *“Febricitanti quidem,
 „ & bilioso, si bilis suo tempore extrâ dispersa fuerit, bono est,
 sub*

„ sub cutem verò effusa , ac dispersa ægroto toleratu faci-
 „ lior , & medico curatu promptior. effusa autem , ac diffi-
 „ pata , & in unam aliquam corporis partem incumbens ma-
 „ lo est. Nonne textus hujusmodi multa medentibus notatu
 digna proponit , causam scilicet febrium in biliosis bilem ef-
 se ; perfectas ejusdem crises per ejusdem integras à corpore
 amotiones opportunè elicitas ; imperfectas verò per eandem
 bilem debito pariter morbi tempore secretam à sanguine ,
 atque in cutem diffusam , malas denique , sive bilis ad deter-
 minata viscera decubitus ? Sed quod rei caput est , de ipsâ
 recrementitiâ bile totum institui ab Hippocrate sermonem
 aperte liquet , cùm ista certè , non verò biliosus sanguis ad
 procreandum icterum effundatur.

Pariter ex lib. 1. de Morbis : “ qui verò priùs inest , ut-
 „ potè naturâ calidissimus in corpore sanguis existens , cùm
 „ ex carnibus , & ventriculo incaluerit supra eum , qui jam
 „ inest , amplius adhuc à bile , reliquum etiam omne corpus
 „ calefacit. Tandem lib. de Prisca Medicina hæc docet :
 „ Si amarus humor aliquis , quem bilem flavam nuncupare
 „ solemus effusus fuerit , quænam anxietates , æstus , & im-
 „ potentia detinent ? quibus interdum liberati vel spontaneâ
 „ purgatione , vel medicamento , si quid horum tempesti-
 „ vè contingat doloribus planè , & calore defunguntur. At
 „ quandiù ista sublata , incocta , & minimè contemperata fue-
 „ rint nullâ arte neque dolores , neque febres finientur. &
 „ quibus quidem acuti , acres , & æruginosi humores instant ,
 „ quinam furores , & viscerum , ac thoracis lancinationes ,
 „ animique abjectio indè oriuntur ? Neque priùs hæc quies-
 „ cunt , quàm emaciati , dejecti , & aliis permixti fuerint.
 „ multis autem , variisque modis concoqui , permutari , te-
 „ nuari , & in humorum naturam crassescere possunt. Ideo-
 „ que in istis & judicationes , & temporum numeri magnum
 „ pondus habere mihi videntur. „

Itaque in his textibus (qui certè gravissima ad practicam

doctrinam, majestatemque recolligunt, atque recludunt præcepta, eruntque hæc à nobis, si otia suppetant alio Opere explicanda) non solum Hippocrates bilem ipsam hepaticam, atque recrementitiam, singulari idcirco *amari* nomine indigitatam, pro causâ morborum potissimâ recognoscit; sed insuper inter morborum principia primo loco hujusmodi humoris meminit, seu eorum caput instituit.

Io. Math.
Hyacinth.
Guidettus
med. scrip-
toris geni-
tor cum
laude com-
memora-
tus.

41. Eodem tempore ridiculus quidam ejusdem Regiminis Chirurgus junior commilitonem suum simili erysipelatosâ pleuritide lethaliter captum ab interitu revocandum gloriabatur per inflictam paracentesim (quam fortè proficuum viderat in pleura phlegmone suppuratâ) sed diloricatis musculis intercostalibus, & pleurâ, sola effluxit saturatioris Seri copia citra solamen ullum, & die sequente mors accessit. In cadaveris pulmone, & attiguis partibus biliose pariter irruptionis stigmata observavimus, qualia in priori subjecto. Vivit inter nostrates incolumis vir quidam cognomine Joannetus, cui ob desperatam pleuritidem cum signis suppurationis sectum fuit latus affectum jussu Patris mei, Hippocraticæ medicinae, & Peripateticæ scholæ propugnatoris acerrimi, quem præmatura mors [acerbo heu nimium fato!] mihi, atque reipublicæ medicoliterariæ eripuit triginta ab hinc annis. Ejusdem nervosissima adversaria contra modernas sui temporis theses philosophicas, nec non medicas hypotheses exarata custodio, ac veneror.

Extispiciis his mecum adfuerunt præstantissimus Doctor Mirolius, ingeniosissimi D. D. Palea, & Alliberti medicinae studentes, & turba curiosorum; quibus omnibus patuit veritas præconceptæ opinionis; cujus certior jam factus, perrexi in laudatâ methodo cum tanto egrotantium commodo, & sanorum letitiâ, ut popularibus exciperer gratulationibus, velut Hydra victor Alcides.

SCHOLIUM XVII.

De paracentesi in Hydropse pectoris.

PAracentesim thoracis non quidem in memoratis morbis pleuriticis (in quibus quidem nullum locum habet hæc pun-

punctio) sed in recenti pectoris hydrope , & juvene athletico audacter profectò tentatam , sed interea salutarem , aliquando nobis animadvertere concessum est. Is ego tamen non sum , qui sæpiùs eandem revocare in usum aude-rem. Paracentesis usus in empyemate pectoris nemini ignotus est.

42. Ex illis , qui per epidemicam constitutionem pleuritide phlegmonode , non verò biliosâ , vel erysipelatode tenebantur , duos vidi suppurato , atque per superiora expurgato abscessu , præter omnium spem feretro , ita dicam , ereptos. Primus erat Nicolaus Pittetus annum agens trigesimum , temperamenti sanguinei. Hic , inquam , post iteratas venæ sectiones , adhibita antipleuritica , & emollientia ex oleo amygd. dul. , oleo , sem. lini ; sperma ceti , sang. hircin. linctus bechicos ; decoctiones scab. herbar. pector. & pap. rub. unâ cum externis illitionibus , fotibusque calidè ministratis citra solamen ullum ; die decimo vespertinis horis deglutivit bolum ex cons. ros. theriacâ , & croco Or. Undecimâ luce bronchiali stertore gravatus ad agonem præcipiti gressu properare videbatur. Circa meridiem molestâ præter morem tussî , atque inani vomitu identidem urgebatur cum sudore circa pectus , & faciem guttatim expresso , & genarum rubore saturato , instar præfocatorum. Tandem aliquando assidentium brachiis suffultus , prono corpore , demissoque capite ad vomendum compositus tantam [urgentibus ultro tussî , vomitu , & assistentium ictibus sive succussionibus ad dorsum] materie obolentis , ac purulenta copiam eructavit , non sine suffocationis periculo è disruptâ vomicâ , ut sola recordatio stomachum moveat. Ab undecimâ ad undecimam quartam frequenter tussiebat , & purulenta spuebat. Potiones ex hydromele , & pectoralibus abstersivis propinabantur mox terebinthinata , & inde traumatica. Febris ad apyrexiam vergebat circa vigesimam , sed vires , optimo licet regimine analeptico restaurata , non ante diem quadragesimum vigeant.

In eadem damnatione versabatur vidua quædam de Locchis quinquagenaria , vegeta tamen atque plethorica. Hæc itidem post ter
insti-

institutam phlebotomiam, præscriptaque anodyna, pectoralia, oleosa, & specifica antipleuritica, ut supra absque congrua sputi excretionem ad usque septimam. eo die ab assumpto pomo, Quercetani dicto, sive curtispindulo excavato, pul. olibani repleto, excocto, & perquam calidè devorato, post aliquot horas in affluentem sputi purulenti copiam adigebatur, atque apto servato victus regimine, adhibitisque abstersivis, & vulnerariis decimo quarto die triumphum canebat.

SCHOLIUM XVIII.

*Loca ex Hippocrate, quæ probant, suppurationem non fieri ex rubicunda propriè parte sanguinis, à rubro in album conver-
sa, sed ex pituita, seu lymphâ sanguinis, ipsi adhuc immixta, vel ex eodem jam separata, & in aliquam partem, per defluxionem, seu in rheumatis formam, delabente.*

Hippocrates in lib. I. *De morbis* potissimum suppurationis sermonem instituit: Quot verò locis istam in medium adducit, totidem certè pituitosam, seu albam sanguinis partem in ejus materiale principium accersit, bile quidem interdum in suppuratione implicatam, non verò ejusdem participem recognoscens. Ita in pagina hujus libri 451. (intelligo hîc loci Hippocr. Opera ex versione, & digestionem Fœsii) ait “ Nam cum pituita multa è capite confestim in superiorem ventrem confluxerit, putrescit, & pus evadit, putrescit autem maximè diebus uno & viginti „. . . Pagina 450 “ si pulmonis inflammatione detentus diebus, qui talia decernere creduntur, non purgetur, sed sputum, & pituita in pulmone remaneat, suppuratus fit „, inferius eadem paginâ “ Fit quoque suppuratus, si ipsi pituita ex capite in pulmonem defluerit „, paginâ 451 “ Pusque crassum, ab accedente pituita intus putrefacta expuitur „, Hæc quidem quò ad suppurationem, in qua sola pituitæ mentio habitata est. Nunc ad Hippocraticas pariter suppurationes procedamus, in quibus cum pituita (quæ semper apud Senem materialis est causa suppurationis) bilis etiam implicatur. Eodem igitur libro pag. 453 “ At verò inferiore ventre suppurati evadunt, præcipuè quidem cum pituita & bilis inter carnem, & cutim affatim collecta fuerit „, eadem paginâ in

in fine “ Cùm pituita aut bilis collecta fuerit , putrescit...
 „ & siquidem pus quàm citissimè maturuerit , eruperit , sur-
 „ sum vergat , ac totum expuatur , venterque in quo pus
 „ erat confidat , ac resiccetur , prorsus sanus evadit „ sequen-
 ti pag. 454 “ In latere autem tubercula quidem oriuntur ,
 „ tum à pituita , tum à bile non aliter quàm in pulmone „
 Idem in pag. 458. in fine , postquàm de pituita & bile ad
 latera impactis alloquutus fuerit , hæc addit “ Cùm verò quæ
 „ ad latus impacta sunt , putruerint , & per sputum reddita
 „ fuerint , convalescunt : Quòd si & antiquum multum ad
 „ latus impingatur , & aliud insuper accedat , statim mo-
 „ riuntur „ Paginâ 459 “ cùm verò ad se traxerit , tùmque
 „ bilis , tùm pituita sedem in pulmone fixerit , putrescit , &
 „ in pus vertitur „ tum pag. 461 “ ex morbo autem laterali
 „ intereunt , cùm circa exordia , copiosa quidem pituita &
 „ bilis ad latus impacta fuerit , multaque ex reliquo corpo-
 „ re præterea affluerit , quam neque spuendo propter copi-
 „ am , neque putrefaciendo superare possit „ in Principio li-
 bri II. *De morbis* memorat morbum Hippocrates , in quo
 carnes putrescunt , atque ulcerantur , hinc *advenientem pitui-
 tam & bilem putrefaciunt , pusque gignitur.*

Cùm igitur tot locis asseveret Senex , fieri ex pituita sup-
 purationem citra concursum cruoris , seu sanguinis purpureæ
 substantiæ ; atque cùm in toto sanguine sua semper delites-
 cat pituita , quæ imo potissimam ejus partem constituit ; Jam
 igitur quum idem Hippocrates alicubi asserit *effusum sanguinem
 putrescere* , hinc *pus gigni* , intelligendus non est *rubrum ip-
 sum* sanguinem suppurari velle , sed *albam* duntaxat , seu *pi-
 tuitosam* partem.

Bilis verò suapte naturâ non suppurat , ut aliis locis pro-
 bavimus , licet in suppuratione , quæ per pituitam confici-
 tur , implicari non difficilè queat , atque hinc flavum suum
 colorem , interdum & amarum saporem exhibere. Fortè etiam
 per propriam misturam , & activitatem suppurativi motus in-

citamentum evadere. Ita pag. 450. cit. lib. I. *de morbis* ait, in suppuratis in pulmone *sputum solito amarius existere*: & in Coac. *Qui cum sputo bilioso purulentum expurgant, diductumque fuerit aut permistum* &c. Jam ergo per ipsum distinguitur in sputo suppuratum à bile, quæ revera non suppurat.

Cæterum in pulmonibus (ut diximus cum de *Pleuritide*, & cum de *Hepatis abscessu*) suppurationes, quæ quidem per sputum judicantur, esse plerumque suppurationes primi generis, seu speciales quasdam coctiones, veluti pepasmos, ex quibus non quidem verum pus, sed puri duntaxat simile liquamen progignitur, ex quodam Hipp. textu de *victus rat. in acut.* satis confirmatur: *Cocta autem sunt sputa, cum puri similia fuerint; hæcque coctionum genera alibi suppurationes* apertè nominat. Tum suppurationes in hepate, aliisque abdominis visceribus (ut suis locis discussimus) esse semper secundi generis, sive non revera à pepasmo, sed potius à corruptione; tum præcipuè folliculatas evadere, atque genuinos abscessus procreare, patet ex alio textu ejusdem Senis lib. I. *de morbis* fol. 451 “ effusum autem pus in inferiore „ ventre generari haudquaquam poterit, velut in superiore „ ventre fieri dictum est, sed in tunicis, & tuberculis in- „ nascitur, velut à me dictum est „ Licet interdum etiam (rarò tamen) suppurationes hujusmodi, quæ nempe celerius in summè acutis obtinentur, per visceris substantiam effundantur; juxta illud Hipp. in Coac. “ suppuratorum autem „ quæ sursum sunt [*Intelligit de hypochondriacis visceribus*] „ alia quidem in tunica stabulantur collecta, alia verò sunt „ in visceribus ipsis diffusa.

„ 43. Anno 1713. mense Junio in oppidulo Fellecti epidemica febris Tertiana duplex cum comite pleuritide jam „ plurimos enecaverat. Hæc, inquam, eodem symptoma- „ tum satellitio stipabatur, ut mox adducta hyemalis anni „ 1709, sed prætereà excernebantur etiam ægritudinis tractu „ per alvum lumbrici in copiâ, ita ut cuidam medico placuerit

„ cuerit febres illas purè verminosas indigitare , pariterque
 „ dolores lateris vagos à lumbricis excitatos effutire , & vul-
 „ gatis oggannire susurris contra sententiam doctissimi D. Doct.
 „ Gulielmetti , cujus nutu pendebant ægroti , quive longâ
 „ edoctus praxi optimè callebat inflammatorias esse affectio-
 „ nes illas absque lumbricorum culpâ , vel levissimâ ; idcir-
 „ cò à venæ sectionis auxilio recedere non patiebatur ; pia-
 „ culum esse ratus præcipiti morbo promptum adeò negare
 „ subsidium , ut est phlebotomia ab universâ Practicorum
 „ republicâ tantoperè commendata. Imò peracuti morbi
 „ celeritate adductus totam sanguinis quantitatem , quam fer-
 „ re vires valebant repetitis vicibus ante diem quartum edu-
 „ cendam præscripserat , nihil omittens quò ad reliqua an-
 „ tipleuritica optimo regimine ministrata. Hoc tamen stu-
 „ dio morbi acutiem infringere , aut enervare minùs valuit.
 „ Quare solertissimus Doctor ignotum virus apertione ali-
 „ cujus cadaveris explorare decrevit, in consilium vocatis D.
 „ Verluca Medico seniori doctissimo , D. Augusta Doctore
 „ præstantissimo , & me ipso. Electum est autem ad specta-
 „ culum cadaver hominis annorum circiter triginta epide-
 „ micâ phlogosi denati , quem generosior Chirurgi mucro à
 „ fatali falce eripere haud potuerat. Dissecto hinc indè , &
 „ elevato sterno per D. Bertam celeberrimum nostri tempo-
 „ ris , nostræque regionis chirurgum , pulmones ambos spe-
 „ ctabamus croceâ , ut astantibus prædixeram , & crustosâ ,
 „ ut jam innuimus antecedente historiâ , crematos sôrde , to-
 „ tumque mediastinum , totam pleuram , vasorum tunicas , dia-
 „ phragma , & quævis contigua corpora fulvo inquinamento
 „ polluta cum effusione feri in utroque pectoris cavo. Disse-
 „ cto abdomine hepar invenimus in naturali ferè statu , cy-
 „ stum tamen felleam inanem , cysticosque ductus , & bilarios
 „ omnino flaccidos , & exuccos ; lienem turgidum , & ob-
 „ structum (cujus tamen paulatina obstructio acutum mor-
 „ bum præiverat familiaris , & tolerata à pluribus mensibus ,

„ fortassis & annis) Quod autem signatè mirabamur ; ex
 „ avulso utroque pulmonum lobo , corde , & hepate ne tan-
 „ tum quidem sanguinis per amplissima vasa effluxisse visum
 „ est , quod serosæ , biliosæque thoracis cruentandæ exunda-
 „ tioni par esset. In intestinis palmarium lumbricorum copi-
 „ am perspeximus ; quorum genesi favisse liquet biliosi re-
 „ cimenti à biliferis ductibus ad pulmones translati su-
 „ brepta secretio præter ordinem naturæ. Hæc omnia ob-
 „ servata sunt die festo S. Joannis Baptistæ 24. Junii , ut
 „ supra.

44. Dum autem unanimes novam experimentalem me-
 „ thodum statuere , & prosequi intendebamus , mutatâ con-
 „ stitutione favire desuit vulgare malum , Fellectensibus cru-
 „ dele , & infensum. Hoc tamen effari adhuc possum , plu-
 „ res eâdem æstate , & subsequente autumno curasse felici-
 „ ter ejuscemodi pleuriticos , servatâ illâ remediorum tesserâ ,
 „ quam mihi proposueram in præcedente dicti anni 1709.
 „ hyemali , atque vernali constitutione. Veruntamen , cum
 „ per æstatem , & autumnum graviores in corpore conge-
 „ rantur cacochymia , opus erat hoc tempore vomitionem
 „ ciere initio morbi ; & sub finem vias infernas exactius ter-
 „ gere per repetitam catharsim ; tandemque & peruviano
 „ cortice in pluribus uti ad absolvendam febrium curatio-
 „ nem , quæ sanè hyemalibus , atque vernalibus superflue-
 „ rant.

SCHOLIUM XIX.

*De diversa
 civium , at-
 que agrico-
 larum ca-
 cochymia.*

IN agricolis , & pauperculis alius certè quàm in civibus ,
 & delicatulè victitantibus per æstatem , & autumnum ca-
 cochymia genius apparatur : In illis enim fructuum esui in-
 temperanter deditis , tum minùs subactò pane , leguminibus ,
 aliove minùs expeditæ digestionis alimento abutentibus , mo-
 dico vino , eoque pontico , vappido , aut aliter depravato
 epotatis , ultiores etiam , præter biliosas , improborum suc-
 corum

corum quisquiliæ , & cruditates accumulatur per viscerum naturalium anfractus : ut hinc demùm displodentes eorum morbi vomitoriis facilius , & per superiora ducentibus obtemperent. Verum enim verò quò sinceriores morbidæ bilis apparatus excitantur, eò cautiùs sunt , ob alias adductas rationes , per emetica pharmaca concutiendi.

45. *Nec semper epidemico gressu solent incedere memoratæ superiùs accensiones pleuritica , aut pulmonica , sed ferè quotannis sporadico more biliosis febribus immiscentur , aliquando clanculum pullulant absque ullo , ut dicitur ab antiquis , syllogistico pleuritidis signo. Plurimos ex his , qui inter æstatis initia æstuosâ febre corripiebantur , si largè biliosa per sedem , aut vomitum ad septimam , nonam , undecimam , aut decimam quartam non excernerent , aut criticis pariter diebus hæmorrhagiâ non cierentur , aut copiosis sudoribus , prævio rigore , hæud maderent , non sine aliquâ ad pectus biliosâ excursionem , aut aliquali saltem irritatione judicatos animadvertimus. In aliquibus autem , quibus certa , & manifesta non aderant biliosa cacochylia indicia , enormes , atque ultra communem mensuram ejectas bilis copias inspeximus , ut mirari subierit , quàm valdè , citòque biliosus humor sui multiplicationem ineat. Nonnullos etiam videre datum est , tantâ adeò bilis feritate , & affluentia obsecos , ut post diuturnum icterum , & contumacem febrem bilioso alvi profluvio correpti , hæudquaquam sublevarentur , quin potiùs pejùs haberent.*

SCHOLIUM. XX.

PRimæ D. Guidetti observationes confirmantur à Galeni *De crisi-
sententiâ , qui 3. de Crisibus cap. 3. loquens de crisi-
febrium biliosarum ait “ Si fit febris ardens , vel sanguis è
naribus profluet , vel post vehementem rigorem sudor mul-
tus , & calidus per totum corpus emanabit , aut per vo-
mitum , aut per alvum biliosa excernentur. Ita & Ter-*

Pppp 3

„ tiana

„ tiana vomitibus , & excrementis alvi biliosis , & sudori-
 „ bus multis toto corpore fluentibus judicabitur „

De bilis ge-
 neratione
 à febre.

De pessimis,
 atque mortifi-
 feris Ictericis.

Quoad alteras Observationes valet illud commune Antiquo-
 rum effatum : *bilis , & febris mutua generatio esse solet.*

Denique ad illas de icteris symptomaticis à biliosa egestio-
 ne haudquaquam judicatis quadrat illud Hippocratis in Coa-
 cis. “ Quicumque icterici , nec indè admodum quid sentien-
 „ tes , oborto singultu , iis alvi prorumpunt ; fortassis autem ,
 „ & ipsæ sistuntur ; virore saturo colorantur „ Revera , cùm
 Duretus in hujus textus commentario , inter symptomatici ic-
 teri causas orgasmum annumeret , atque hepatis oppilationem ,
 inflammationem , aut scyrrhum (quæ quidem tria hepatis vi-
 tia duritatis nomine intellexit Hippocrates : *Ictericis hepar du-
 rum , esse pestiferum* , nosque in icteri tractatu discussimus) jam
 bilis diffusio per cutem , à qualibet ex his causis exoritur ,
 deducet quidem morbifici humoris quidpiam , sed vel multò
 uberius subesse , vel fixas , & contumaces causas consuetam
 bilis per propria itinera præpedire trajectionem testabitur.
 Ita si in his ictericis , imbecilibus præcipuè , & longâ mor-
 borum morâ languidis , & hebetibus præstitis , sensuque , &
 motu perfractis (*madefcente scilicet* , ut ait Duretus , *in his
 ictericis nervorum principatu , quoniam diffusâ bile per totam
 compaginem , defraudatur cerebrum suo elementari calore , & sa-
 le ;* quod quidem per illud *nec indè admodum quid sentientes*
 intelligendum est , ut revera idem commentatur Duretus *in
 movendo pigrum , & sentiendo hebetem*) alvi profluvium acce-
 dat , ut ut biliosum fuerit , morbo tamen auxilio non erit , imò
 pertinaciam causæ , ac multitudinem , adauctam insuper ab ef-
 fusione in ventriculum , diroque morfu ejusdem feritatem reve-
 labit , si alvi fluxui se comitem addat singultus. Hos autem
 Ictericos ad lethum properare Hippocrates per illud *virore
 saturo colorantur* declarare videtur. Nam quemadmodum ic-
 terus quò symptomaticus magis extat , eò saturatiorem in
 cute bilem præ se fert , ut è contrà dilutior magis bilis conf-
 picitur,

picitur , quæ criticum magis icterum constituit ; sic virescens bilis saturatissima censenda. Quare idem Cous lib. 3. *de Morbis* moribundi icterici talem esse colorem pronunciat. „ Hujusmodi morbus regius acutus est , & citò necat. Color totius malicorium maximè refert , viridis ad instar la- „ certorum : Ejusmodi , inquam est color , atque in urina „ est hypostasis orobea. & in Coacis confirmat : “ Icterici „ multum foedati pereunt. „

46 *A diarrhœis perperam curatis , vel ocys suppressis , plures vidi exortas pleuritides , vel peripneumonias cum agrotantium anxietate , pulsus intermissione , vel constrictione , praesertim annis 1710. , 1716. , & astate nuper elapso 1718. , quæ per spontaneam diarrhœæ repetitionem , vel leviora cathartica remittebant , dummodò Medici opera non deesset , qui demulcentibus , & attemperantibus auxiliis sanguinis , viscerumque fervorem , & irritationem leniret. His cassia , & serum lactis ad miraculum profuisse vidi , & tædiosum nimis esset exempla adducere singulorum , qui hoc ritu à morbi tyrannide fuerunt vindicati. Duo , aut tria ex recentioribus adducere sat sit.*

SCHOLIUM XXI.

IN contumacibus , æstivis , aut autumnalibus , Biliosis diarrhœis , medium quidem inter criticas , & symptomaticas tenentibus , & facilè recidivis , nil sanè vulnerariis præsidii experti sumus præstantius. Hæc siquidem citò , & mirificè sanant , elicita tum ex herbis nostratibus balsamico-vulnerariis , ut symphito , plantagine , hederâ terrestri , veronicâ , alchimillâ , stellariâ , hyperico , millefolio , bursâ pastoris , centauro minori , bistortâ , equisetis , pentaphylo , cortice , & lanugine flor. salicis &c. præcipuè cum absterfis aliquot , & saponariis foederata , ut imperatoriâ , aristolochiâ , angelicâ , gentianâ , verbenâ , caryophilatâ &c. tum ex vulnerariis Alpinis , ut absinthio tomentoso , aut minimo

De vulnerariis remediis usu in diarrhœis biliosis.

Lobe-

Lobelii, chamædryos montano, gnaphalio &c. Hæcque non tam per succos, decoctiones, aut infusiones adhibita, quàm per clysteres injecta, aut etiam in bile acriori, ardentiori-que per fœtus usurpata.

47. Uxor Solutoris Antonii Rubei picrochola, gracilis, ætatis consistentis, adibus meis proximè inhabitans diarrhœâ biliosâ torminosâ, ferè dysentericâ à diebus aliquot angebatur mense Junio superioris anni 1718., ast nullo servato delectu, vescebatur cibis quibuscvis etiam dissepitis, nec non exercitiis domesticis, laboribusque rusticis indiscriminatim vacabat. Imò cum aliquando sudore maderet, cryptam subterraneam ingressa, ibi per semihorium immorabatur; hinc acriter constipata sub vesperras ejusdem diei de dolore punctorio ad latus sinistrum, querebatur cum suppressione diarrhœæ. Ob allatam constipationis recentis causam, statim missus est sanguis de cubito partis affectæ, qui visus est omninò insons, & purpureus. Prescripta sunt antipteuritica, & pectoralia intus sumpta, & pectori illita. Nocte quievit, febris erat remissa, dolor evanuit, & nulla pectoris apparebat angustia, quare sequenti die ulteriora sprevit remedia usque ad diem quartum, quem præcessit nox insomnis cum anxietate, jactatione, siti, tussi siccâ, febris intensâ, calore urente, respiratione anhelosâ, voce depressâ, genis collapsis, & similibus, ita ut die ipso quarto hanc invenerim malè adeò moratam, ut de ejus salute conclamatum esse pronunciaverim; nihilominus celebratâ statim saphæna sectione generosâ præscripsi cassiæ ℥ij solutas in ℥ij seri lactis tartarisati sumendas partitis haustibus post elapsas horas duas à sanguinis missione. Hoc cathartico facta est sollemnis evacuatio fœtentium excrementorum biliosorum adeò ferventium, ut ipsa in excernendo fateretur ignitas percipere faces. Interim liberales diluentium haustus sitienti concedebantur, postque absolutam catharsin laudata aliàs præsidia ex sambucinis, nitratis, camphoratis anodynis, in bolis, syrupis, eclegmatibus, & emulsionibus interposita sunt; fluxitque per tres sequentes dies promota bilio-

biliosorum excretio alvina cum ardore, & fœtore, quorum ope post septimum paroxysmum secura triumphavit.

S C H O L I U M X X I I.

Diligenti Practicorum animadversione dignum extat, *De consensu morborum bilis cum cutaneis, aliisque habitus corporis morbis.* quod in reciproca bilis, & habitus corporis, seu propriè cutis alteratione contingit. Quippe in illâ cutaneâ affectione, quam propriè impeditam transpirationem, sive constipationem nuncupamus, à variis quidem ambientium corporum, ut & interiorum conditionibus productam, bilis motus, & habitudo supra alios humores quoslibet ita confestim alterantur, ut nausea, & cibi fastidium cum oris amaro, & doloriferis interdum molestiis, aut tensionibus ad epigastrium, intestina, aut totum ventrem, interdum cum biliosis frequentibus sedibus eodem nascentis morbi momento non minùs nascantur, licèt ante constipationis exortum nulla fuerint delinquentis bilis indicia. At verò sublatâ constipatione, & pristinâ respiratione restitutâ, defervente bile, suasque in sedes compositâ, sive in naturali statu repositâ, omnia memorata symptomata, absque ullo adhibito speciali auxilio non solùm mitescunt, sed penitus evanescunt. Ita pariter in essentialibus à bile contractis morbis, seu quando hic humor, vel ex præcedenti malitiâ, vel ex superductis ab aliquâ sex non naturalium rerum erroribus ad ineundas inordinationes evehitur, in plurimis hoc pacto ægrotantibus species illicò susceptæ constipationis illudit, doloribus, defluxionibus, lassitudine, tensione, rigiditate ad cutem, ad artus, ad extima membra omnia, aut plurima insurgentibus. Quæ tamen omnia per superficiem corporis debacchantia citissimè etiam delentur, prospecto, atque emendato ejusdem corporis centro, sive vitio in biliosis fodinibus contracto, per opportuna cathartica, aliaque præsidia debellato, & extincto. Hinc inter bilem, & insensilem hominis

Qqqq

trans-

transpirationem ingens elucet consensus; ut intestinorum cum artubus, aut artuum cum intestinis conspiratio, quoad biliares itus, & reditus, atque reciprocos ab unis ad alias partes excursus, & translationes superius abundè compertum fuit.

„ 48. Religiosissimus D. Joannes Matthæus Barberi hujus
 „ oppidi sacerdos scientiâ, & morum præstantiâ spectatissi-
 „ mus, constitutionis sanguineo-bilioſæ, robustæ, & floridæ
 „ habitudinis, ac primæ senectutis limina vix attingens,
 „ incunte Augusto acri diarrhœâ tenebatur absque insigni vi-
 „ rium labe. Incommodi potius, quàm morbi pertæsus, &
 „ amicorum consilio motus, remedium illud herculeum con-
 „ tra Leonis rugitus, aut Caniculæ latratus, æstivasque pu-
 „ tredines à vini potorum cœtu venditatum lubens implora-
 „ vit, vinum scilicet meracum, quo profectò sufflaminata
 „ est ex voto diarrhœa. Attamen elapsis aliquot diebus ab
 „ ejus suppressione, die nempe 15. ejusdem Augusti febrî
 „ captus est cum horripilatione in accessu, exinde anxietas
 „ te, siti, æstuatione, hypochondriorum pressione, & vigi-
 „ liis, similibusque. Attentâ ægri constitutione, & causis
 „ procatarticis enarratis mane sequentis diei, videlicet 16.,
 „ & morbi secundo phlebotomia de cubito (præviâ evacua-
 „ tione per clysterem) instituta est ad ℥viii superepoto syr.
 „ ex acid. citri in aq. cichor. cum sale prunellæ horis dua-
 „ bus ante cibum. Sanguis extractus saturatâ rubedine æqua-
 „ liter florebat in totâ superficie, & horis pomeridianis ir-
 „ repfit paroxysmus alter absque manifesto horrore; jecti-
 „ gationem præseferens, & præcordiorum angustiam cum pul-
 „ sus inæqualitate, & interceptione. Quare præpositis hau-
 „ stibus diluentibus ad ardorem paroxysmi compescendum,
 „ sternendamque emetico viam, vomitorium propinari jussi
 „ sub vesperras ejusdem diei ex infusione croci metallor., &
 „ oximell. scyllit. ā ℥iſſ. tart. vitriol. ʒj in aq. scabiosæ. Bilio-
 „ so-viscida vomuit, non quidem affluenter, sed cum immi-
 „ nutione

„ nutione symptomatum , præsertim jectigationis , & anxie-
 „ tatis. Per horam ante cœnam hausit ℥jss aquæ Theriacal.
 „ frig. cum tantillo salis absynth. & nocte sequente laudabi-
 „ liter quievit. Mane tertii diei assumpsit decoctionem ex
 „ herbis cichoraceis , & sale prunellæ , accessitque horâ con-
 „ suetâ febrilis accessus cum molestâ , ac inani tussiculâ , &
 „ repetitione singulorum symptomatum. Datus est urgente
 „ febris æstu syr. de succo cichor. cum aquâ ejusdem , sale
 „ prun. &c. nocturnis horis conf. hiacynth. 3j camphoræ gr.
 „ vj. superbib. emulsionem ex sem. frig. sem. pap. al. sem.
 „ citri in aq. card. ben. cum syr. pap. rub. sal. prun. & gut-
 „ tis aliquot spir. sal. armon. Quarto die præscripsi catharti-
 „ cum ex ℥jss. cassiæ rec. extractæ dissol. in q. s. feri lactis
 „ depur. , & tartar. Plures habuit sedes cum levamine , sed
 „ nocturnam interturbavit quietem tussis molesta cum exiguâ,
 „ & laboriosâ anacatharsi subflavâ , & cruentâ. Quinto die
 „ certior factus de invalescente pulmonum phlogosi , sangui-
 „ nis detractionem absque ulteriori cunctatione repetendam
 „ jussi ad ℥x de altero cubito , è cujus incisione eductus san-
 „ guis longè alius ab eo , qui in principiis fuerat evocatus in
 „ glasteam , tenellamque pelliculam superficialiter cogeatur,
 „ & subsidens portio seroso-cruorosa omninò fluctuans , &
 „ ferè soluta livebat. Quare sæpiùs laudata remedia ex flor. , &
 „ gran. sambuci , nitrata , & cardiaca , unâ cum pectoralibus
 „ in usum liberaliorem vocavi , & vespertinis horis sanguis
 „ iterùm ad ℥viij missus est ejusdem omnino conditionis , &
 „ consistentiæ. Post hæc die sexto excitata sunt abdominis
 „ murmura , & ineunte septimâ periodo , reſerata sunt alvinæ
 „ viæ ad serosam , biliosamque diarrhœam , quam prorsus
 „ inutilem crediderit quivis ad mentem Hippocratis Aph. 16.
 „ sect. vj cùm potissimùm pessundatę viderentur ægri vires,
 „ pulsus suam servaret interceptionem , nullumque ex deje-
 „ ctionibus perciperetur evidens solamen. Jam ægroti vita
 „ versabatur in angusto , & suborta in astantibus formido

„ extremum unctionis sacramentum imploraverat ; nihilo-
 „ minus diarrhœæ vigentis motum sistere constanter renue-
 „ bam , consideratâ acuti morbi origine & causâ, cum præ-
 „ terea nulla pateret via ad utiliore excretionem , & ip-
 „ sa deficeret trachealis expurgatio non inde speranda. Flui-
 „ dorum tamen acrimoniam nonnihil compescere studebam
 „ jusculis alimentitiis gelatinosis ex pedibus vitulinis , & ra-
 „ surâ cornu Cervi confectis ; ita & pulveribus testaceis ,
 „ ac absorbentibus ex ocul. cancr. pp. c. c. phil. pp. ras.
 „ dentis apri , & eboris ; cum flor. pap. rub. bis in die an-
 „ te pastum oblatis. Horis matutinis , & tertiâ pomeridianâ
 „ hauriebat decoctum cichor. tussilag. tormentillæ, scab. mal-
 „ væ , & althææ, ras. c. c. sem. mel. & flor. cord. ex jure
 „ pullæ insulso ; nocturnis horis emulsionem demulcentes &
 „ identidem è cochleari toto diei decursu julap. viol. violac.
 „ pro linctu. Hoc regimine fidenter servato usque ad un-
 „ decimum morbi diem , paulatinam obtinuumus symptoma-
 „ tum remissionem, tandemque dejectiones seroso-biliosæ fla-
 „ vedinem suam, suamque liquiditatem in meliorem stercora-
 „ tionem commutarunt , ita ut ab undecima usque ad de-
 „ cimum quartam sensibili profectu œconomiam vitalem na-
 „ turaliter restitutam admiraremur , & post aliquot dies , da-
 „ to ad ægri quietem congruo intervallo , curationem no-
 „ stram feliciter absolvimus medio levi cathartico ex deco-
 „ ctione pulpæ tamarind. ꝑb. rhab. el. ʒj. in f. q. aq. mal-
 „ væ cum additione syr. aur. ros. ʒijß. Nullam passus est re-
 „ cidivam, imò brevè est restitutus integræ salutis , quam-
 „ vis memorata pulsus interceptio primis diebus inducta ad
 „ usque confirmatam convalescentiam indefinenter perrexerit,
 „ novo sanguinis proventu , novoque circulationis ritu exin-
 „ de deleta.

SCHOLIUM XXIII.

Vernâ hac tempestate martii mensis, quâ hæc scribimus, alterius naturæ, aliisque accidentibus stipatæ pleuritides, quæ imò pleuro-pneumoniæ potius dicendæ sunt populatim deprædantur, ut inferiùs, quum de biliosis constitutionibus, attingemus.

*De diversâ
pleuritidum
naturâ se-
cundum di-
versas ver-
na tempesta-
tis constitu-
tiones.*

„ 49 Porro non defuerunt momi, qui vomitorii exhibitio-
nem primo curationis die, tamquam intempestivam car-
pere tentarunt, utpotè in Plethorico viro. Prudentes ta-
men examinent ea, quæ antea notavimus circa morbos,
& phlogoses hujus farinæ; perpendant, hortor, an illius
loco repetita pro more phlebotomia in primo morbi stadio,
in expositâ, atque exploratâ semel sanguinis conditione,
& abdominis statu post diarrhœæ restitutionem prægressam,
profuisset melius præ servatâ methodo? an itidem subdu-
ctoria explere emetici vices potuissent aptius. Quantum
hactenùs observare mihi datum est in biliosis apparatus
æstivis, vix unquam cholagoga cathartica, quantumvis
selecta parem excretionem per longas intestinorum vias ad
anum promoveri comperta sunt, quàm pellere visa sint ip-
samet emetica per breviora à choledocho ad œsophagum spa-
tia cum tanta naturæ tolerantia, etiam in peracutis, ut ali-
bi monebam; dummodò, si fuerit opus, vasorum sufficiens
depletio mox præcesserit ad præcavendam vasorum rixim,
quæ rarissimè contingit; vel inhibendum appulsum peni-
torem in partem phlogosi tentatam, qui ab iuductis pres-
sionibus haud infrequenter solet augeri. Considerent de-
nique, an quâvis evacuatione posthabitâ, solis esset epice-
rasticis, anodynis, aut febrifugis ludendum in biliari or-
gasmò. Concludent, opinor, ob mitiorem fortasse vomitio-
nem inde fuisse prognatum ad pectus epigennema, quod
avertere nil æquè potuisset ac affluentior bilis eruptio per

Qqqq 3

supe-

„ superiora juxta allatam sententiam §. 30. hujus differt. ex
 „ Riverio prax. med. lib. VI. c. II. &c. nisi obstitisset natu-
 „ ralis in ægroto vomendi difficultas. Quòd si quis addat
 „ potuisse utiliter celebrari sanguinis missionem de venis in-
 „ ferioribus post tentatum emeticum : hic profectò non inep-
 „ tè hariolari mihi videtur.
 „ 50. Simillimam ægritudinem ab iisdem caussis inductam
 „ pridem curabam in D. Gatto Montanariensi, cui pulsus in-
 „ termissio cum reliquis gravissimis symptomatibus accesserat.
 „ Ad integram tamen hujus solutionem nedum biliosa diar-
 „ rhœa, sed & inde ictericæ urinæ affatim erumpentes judi-
 „ catoriæ fuerunt. Id autumnali tempore.

S C H O L I U M XXIV.

*De urinis
 biliosorum.*

QUemadmodum in ictero urinæ, quæ bile saturatiores sunt, & medentium aspectui injucundiores esse plerumque solent, non sanè quòd plurimam istæ morbidæ bilis copiam è corpore non eripiant, atque subducant, sed quia, signorum more, uberrimum ejusdem bilis superstitem perennè apparatus testantur; Ita in aliis omnibus biliosis morbis ictericæ urinæ, quæ scilicet absque icteri præsentia crocæ, crassæque sunt, rubentes, saturatæ, atque etiam in æstuosis febribus lateritiæ, cum ipsum morbificum humorem eliminant, neque in cute, aut in hepatis foco, aut in aliis visceribus implicari plurimam ejus partem, stabulari, atque ex diuturnâ statione novas adhuc contrahere dyscrasias concedant, boni semper ominis, criticæque indolis non expertes dijudicantur. Quamobrem è converso pallidæ in iisdem affectibus, & tenues urinæ, quæ nempe bile vacuæ sunt, ejusque permissione non coloratæ, indomabilem à natura hunc humorem, seu per consuetas vias haudquaquam ductilem, atque hinc in aliquod viscus perneciter, perniciosèque irrum- pentem, aut irrupturum significant. Ita habet Galenus in

Quæ-

Quasit. in Hipp. spur. 113. “Mingitur urina tenuis, & alba,
 „ etiam in æstuosis febribus, quæ causi nominantur: signifi-
 „ catque amentiam imminere: Causus namque febris copiam
 „ significat bilis: at diuturna urina non est, manifestum-
 „ que facit in vasis bilem non manere, sed suâ ad cerebrum
 „ evolvi, ac volitare levitate: ac si amens non sit, hinc no-
 „ ris fore: quod si jam est, mingitque tenuem, & albam
 „ cum interclusâ febris mortem proximam fore prædicit:
 „ neque enim cerebri vires sustinebunt per febrem æstuosam
 „ immissem bilis acorem, & discerptionem putrescentis. „ Ita
 etiam Duretus in Coacis fol. 510. loquens de urinis hæc jun-
 git “Nam quæ sunt pellucidæ, & aquosæ in morbis acutis;
 „ eò certè apparent, non quatenus potioni concolores, sed
 „ biliosæ tincturæ expertes; vel ob anadromen bilis in cere-
 „ brum ad phrenitidem, & hæmorrhagiam; vel ob deriva-
 „ tionem ejus in alvum, ad dysenteriam, denique Hippo-
 crates lib. 1. de Morbis urinæ biliosorum mentionem instituit:
*Quibus autem ad vesicam bilis aliquid confluit, iis urina crassa,
 idque à pituita redditur, biliosum verò deorsum secedit, eò quod
 exusta sunt quæ in ventre insunt.*

§ 1. Hoc autem notandum quod in adductis accensionibus pecto-
 ris erysipelatosi, sive biliosis sputa effatu digna non apparebant:
 Urgebat autem tussis, quæ ad plures dies tracheam inaniter per-
 cellebat. In fine morbi humidior facta modicas promovebat excrea-
 tiones catarrhales, spumosas, albicantes & tandem mucosas. Id
 ipsum narrat “Hippocrates lib. VII. epidemiorum accidisse Me-
 „ toni post Pleiadum occasum febris, lateris dolore, & inflamma-
 „ tione correpto ex causâ biliosâ &c. „ ut videre est apud eun-
 dem loco citato. Hoc equidem provenire reor ex eo, quod bilio-
 sus humor acer, resinofus, atque retorridus pulmonum vesiculas,
 glandulasve obsidet, crispat, ac in temporaneas adigit ariditates;
 opus ideo systalticum, nutritium, & excretorium præpediens, so-
 li muco familiari, areis trachealibus oblinito exclusionem concedit
 inter frequentes tussis conatus. Aliter evenire comperimus in ex-
 quisitis

quisitis pleuritidibus, quæ per liberalem anacatharsim judicari solent, nisi tempestivus sudor opportunè prospexerit. Cum etenim istæ producantur ferè à stagnatione sanguinis, à quo lymphæ dimittuntur, & per visceris non adeò contracti glandulas, & ductus ad bronchia transcendunt, copiosa hinc materies excreationi suggeritur.

52. De memoratis affectionibus pectoris à biliosis cacochyliis originem ducentibus egisse videtur verioris praxeos dictator Hippocrates lib. de Affectionibus, ubi de pleuritide, lateris dolore, & febre ardente tum per hyemem, tum per æstatem ex bile commotâ, ad viscera, & septum transversum residente provenientius sermonem faciens, inquit, & repetit " Si ad pulmonis inflammationem transierint, pauci evadunt, Ad curationem earum commendat diluentia, & potiones ad vomendum (quibus reverà usus est in curatione præfati Metonis) vel infusa ad alvum subducendam : Et de iisdem tractans lib. 3. de Morbis fomenta, diluentes potiones, emetica, bechica, & fluido-facientia optimo regimine suadet his verbis " Tepefacientibus humidis calefacere, oportet & potionibus, præterquàm vino, & quoad fieri poterit per superiora purgare. Per tussim etiam, & spiritum sursum educere oportet. Alioquin alvus inferior, ut dejiciat præparanda, & potionibus humectanda, quod conducit, & paulò inferiùs hæc addit " Quòd si juxta rationem spueri nequeat medicamenta, quæ sursum educunt exhibenda ; Primis quidem quatuor, aut quinque diebus paulò magis alvum subducere oportet, quò febres retundantur, & dolores leniantur &c.,

53 Cavendum semper à validioribus dejectoriis (maximè in iis, quibus affluit sputum, vel ut promoveatur, necessitas poscit) ne sequatur intempestiva hypercatharsis cum pulmonum exsiccatione, & virium jacturâ, quibus mors præcipiti passu accersitur, ut mox innuit citatus Senex ibid. his dictis " Nam si multus humor per inferiora secedat, post quintum diem mortem adfert, succedente enim per inferiora humore, superiora siccet-

siccescunt, neque sputum per superiora repurgatur, Ita contigit paucis ab hinc diebus fabro murario Bugellensi, cognomine Capellarius, qui, titulo rheumatis, peripneumonicus erat cum rauce- dine, & affluentia sputi sanguineo-biliosi citra ullum sensibilem lateris dolorem. Inducta ex arte superpurgatione, obiit quinto morbi die. Ob id suspecta quoque sunt emetica in data sputi afflu- entia; Prosunt difficulter spuentibus, si per superiora vim exe- rant suam; saepe nocent, si ad alvum impetuosius irruant. Qua- re ad praecavendas irritationes, & irruptiones alvinas expertum habeo ciere vomitum hora altera, vel tertia post assumptam pa- natellam, aut aliud leve alimentum hujusmodi; ex inde inter vo- mitiones diluentia tepida, & emollientia proponere pitissima, ut, quod reliquum est, felicius vomatur absque nimia stomachi vio- lencia, & liquidorum profusione inferna, semper in acutis veren- da (ut etiam observat expertissimus Sydenham de febris, & ma- xime in pectoris morbis.

54. *Maximi autem interest anodyna, hypnotica & refocil- lantia cum delectu exhibere post emetici absolutum opus, saepe ete- nim sunt necessaria, ut fluidi morborum motus compescatur, aut uti- lium laticumeductio supervacanea sistatur, tum etiam ut resti- tuatur solidis alterna requies, qua possint novis succis irrorari, tonumque suum resumere. In his eligendis prudens sit Medicus, & simul misceat cardiaca temperata, aut theriacalia. Si vero ab epoti emetici concussione, vel etiam sponte sequatur sputi per ana- catharsin extricatio nonnisi leviora paregorica competunt e. g. tin- ctura, vel syrupus flor. papav. rub. emulsiones ex sem. pap. alb. & similia; nunquam validiora narcotica.*

SCHOLIUM XXV.

ID certum est, emeticos stimulos, aut merè catharticos, ^{De incom-} laceffendo naturalium viscerum, quibus affiguntur, super-^{modis ab} facies, eorum meatus adeò interdum intendere, & coarctare, ^{emetico re-} ut impeditis, aut imminutis consuetorum liquidorum fluxibus,

R r r r

ipsa

ipsa diutiùs siccescant, aut doleant, ut inde pro secretionibus propriis renovandis copioso diluentium remediorum usu emolliiri debeant, ac relaxari, aut saltem anodynis obtundi, & cicurari. Ita qui cathartici copiosa diluentia intermiscent, se optimè gerunt; optimè etiam, qui paregorica adjiciunt, aut præponunt.

55. Si per inferiora in difficulter vomentibus, aut ob alias causas præstet purgare, non equidem tantum irritativis, sed & mannâ, similibusque abstinere soleo in biliosis agnitionibus hujus nota, vigente æstivo calore, utpotè seri copiam detrahunt, & sitim afferunt cum agri incommodo. Clysteribus congruis utor, & blandis cholagogis sæpe jam laudatis, nempe cassiâ, syr. rosac. syr. de cich. Gul. pulp. tamarind. el. lenit. &c. ut in adductis exemplis exponebam, similiterque moneo, ut inter dejiciendum diluentibus non parcant.

HISTORIÆ

Aliquot Biliosarum Pleuritidum superioris anni 1722.

Emetico remedio faustè curatarum, aut sine emetico lethali.

I. JOseph Berardi adolescens ann. 14. Junio mense hîc Taurini decumbebat, cum dolore ad mammas punctorio, acutâ febre, pulsu duro, spirandi difficultate, ferinâ tussi, & creberrimâ, sæpiùs irritâ, interdum non sine longa difficultate, nunc liquidiora, nunc tenacia, nunc etiam cruore suffusa sputa, sed semper flava, imò & aliquando crocea ejiciente. Inter tussis tentamina animo sæpiùs deficiebat. Sitis aderat, & lingua arida, aut flavo quandoque crassamine oblinita: Ardor abdominis, & præcipuè dextri hypochondrii, cum urinis flammeis, adstrictâ alvo, & assiduâ jactatione: Vexabant insuper contumaces vigilæ, quibus quidem leniendis
fi itum

si itum esset paregoricorum opere, somnus aliquis conciliabatur leviusculus, sed vehementiori citò excitato dolore, subito quodam subsultu excitabatur infirmus. Ad quartam nausea nata est, cibi fastidium cum inclinatione ad vomitum, tensio abdominis, atque in primis epigastrii, ubi jam exquisitior ardoris sensus percipiebatur. Propinatum fuit emeticum, ex quo plurima, variaque, sed præcipuè biliosa, mucilagini cuidam intermixta ejiciebantur. Melius habuit. Concocta spuebat, atque dilutiùs flava. Jamque remissa febris est, restituta respirationi libertas. Morbus per anacatharsim, simulque perennes biliosorum sedes ad undecimam judicabatur.

II. Mediolanensis advena vigesimum agens ætatis annum, degens in ædibus D. Philippi Rubei, autumnò ejusdem anni subito rigore corripiebatur cum respirationis angustia, ferrino pulsu, pungente ad dextras legitimas costas dolore, sanguineo sputo, & biliari, amarore oris, inflatione abdominis, stomachique fastidio. Sibilabat pectore, in orthopnoeam jam properans. Celebratâ semel Phlebotomiâ, antimoniali remedio ad tertiam diem excitabatur vomitio. Hâc multa liquidiora, biliosaque propulsa sunt. Dormivit liberiori cum respiratione, atque dolore vix sensibili. Sed quartâ die omnia recrudescent. Novum imperatur vomitorium. Plurima adhuc, & rursus biliosa, sed viscidiora, obscurioraque deturban-
tur. Ad septimam sanus evasit. Constitutio ad atrabilem vergebat.

III. D. N. N. Biliosus, Picrocholus, Vere 1721. exquisitâ pleuritide correptus cum assidua tussi, interdum convulsivâ visâ, sanguinolento sputo, & mucoso, quartâ die subflavo, cum vehementissimo terebrante dolore, gravi spirandi difficultate, vigiliis, & acutiori febre, ad faustam judicationem, quæ quidem undecimâ die elucebat, disponi haudquâquam potuerat, nisi inter initia morbi per mediocre vomitorium ex asari radice paratum largè fuisset expurgatus. eidem

indè per longos amygdalini olei haustus multis, sed crudis biliosis alvus diffluebat: Atque octavâ morbi luce per validum propinatum catharticum multa etiam, sed crassiora, faturationaque biliosa eliminabantur. Qui in cujuslibet generis pleuritidum principiis crebriori, molestiorique, ac simul validiori tussi infestantur cum aliqua assiduè urgente excretionem, quælibet ista sit, hos citius, tutiusque judicatos perspeximus. Et sanè vividus ille, & veluti cujuslibet moræ impatiens, tussis conatus firmam indicat, atque naturæ robore conductam, pulmonarium solidorum ad noxios inherentes excutiendos, atque pellendos succos concussionem; citra quam nulla pleuritis sanabilis esse potest.

IV. Domina *Antonia La Francia* trigessimum quintum fortè annum nata, parcè catameniis potita, non procul ab ædibus meis decumbens, pectoris angustia ad hyemis finem prehendebatur cum cruentato sputo, dolore ad veras costas punctorio, acutâ febris, pallorè linguæ, & faciei (hysterica diu, atque indè penè cachectica existerat) frequentibus insuper lypothimiis, gravissimoque ad septimam stertore obsessa. oblatus è vestigio vomitorium pertinaciter renuit. Oleosis, humidisque diaphoreticis sublevari interea videbatur. Cruda, paucaque tussi profundâ excreabat. Undecimâ lenius habuit, angore ventriculi & pectoris nonnihil recreatis. Atqui viscidulum sputum, sed paucum, cum anxia tussi, noctuque præcipuè, atque spirandi labore, & sudore pectoris supererat. Postea non cessante tussiculâ, neque vacuâ febris à remediis omnibus abdicabatur. Tussiebat igitur, febriebat, atque aliquando rigebat usque ad Maii mensis exordia. Tunc sævior, & arida febris, periodica tamen, accendebatur, quam pectoris angor acerrimus, & coacervata respiratio excipiebant. Dextrum Hypochondrium ad primum novæ febris ingressum valde tumebat, tactui simul duritiem, atque dolorem exhibens; in quo quidem mixta systrophica Hepatitis, propriis signis stipata, congerebatur. Crescebat in dies hepatica op-

pilatio.

pilatio cum extensione ad epigastrium, ipsumque umbilicum, facie luridâ, & hippocraticâ redditâ, immerso pulsu, exteriori frigidity, anxietate perpetuâ, ciborum fastidio, & universali resolutione: Jamque ubicunque viscerum impeditis secretionibus, cumulabantur humorum stases, ut tumor totum ventrem cum ingenti dolore, & repleto invaderet, diruta his omnibus, simulque spirandi oppressione suffocata moriebatur misella, uteri, atque animi curis jam dudum conflictata.

V. Domina N. N. annor. 54. animo hilaris, & vegeta; molliori interea corporis temperamento, atque ad cachectico-ictericum labente prædita, ciborum fastidiis assueta; hypochondriorum viscerum doloribus, atque meteorismis non infrequenter obnoxia; intra quatuor annorum intervallum tribus, iisque disparibus pleuritidis speciebus divexata fuit: primum quidem lymphaticâ; ex qua non nisi fortium & sæpius usurpatorum cathartorum auxilio, atque hinc institutâ epicriticâ purgatione evadebat, morbo ad maturationem lentius perducto, sive ad quadragesimum duntaxat diem per blandè suppuratum sputum judicato. Altera pleuritis biliofolymphaticam se præbuit; calidior idcirco, breviorque, binis primò sanguinis missionibus excepta, hinc repetito emetico, sublata. Tertiam, quam hîc proferre cogitavi, biliosam fuisse, Phenomena omnia, adjuncta, & consequentia, abundè restabantur. Die quintâ Junii 1723, frigidâ, humidiorique, post prævios calidissimorum austrorum afflatus, vigente constitutione, dolore ad sinistras costas punctorio corripitur Matrona, cum tussicula quâdam non siccâ: Succedit rigor, febrili quidem, sed leni calore exceptus. Tussis hinc rara, mediocris respirandi angustia; sed ingens anxietas, cum febre manifestè periodicâ, manè mitiori, sub vespas citra ullam perfrigerationem exacerbata. Spuebat statim viscida, flava, pallidoque sanguini immixta: Undè jam non malè præsagiendum fuerat juxta monitum Hippocratis lib.

Prænot : In omnibus pulmonis & laterum doloribus sputum celeriter , promptèque expui convenit , sputoque valde flavum permixtum apparere. Præcipuè cum bilis à tempestatis fervore aliquando excitata , superveniente frigore , in pulmone , aliisque visceribus concreascit , hæreatque ; etiam juxta illud Hippocratis de loc. in hom. sect. 4. *Ubi in thoracem ob frigus defluxerit bilis , existit.* Secundâ die fitis aderat continua , sed noctu molestior , & contumaces vigilæ , cum majori spirandi angustia : Febris interea non vehemens , & calor ad exteriora mitissimus. Secta brachii vena est. Tertiâ die dolor molestior , nausea cum acerrima jactatione : tussiebat , biliofaque & sanguinea liberè , & copiosè expuebat. emeticum cathartico sociatum propinabatur. Pauca superius ejecit , plura inferius , atque exquisitè biliosa : omnia interim remissiora fiunt ; sed quartâ die recrudescent , cum habitu corporis non calido , sed potius frigidiusculo. Clamora fitis ; assiduus oris amaror , cum nausea , & ingentiori anxietate : tum subita ad cutim erumpens icterica effusio. Repetitum inter quintæ initia cum cathartico emeticum multa inferius ejecit biliosa crocea , undè valde levata est. Dormiebat : parum spuebat , commodèque respirabat. Evanescente symptomatice ictero æqualior , vividiorque cuti redditus color est : Dolor vix sensibilis : Febris , & anxietas minuebantur. Sextâ die Febris recaluit , qualis nempe concoctionis morbi videretur occasio , sed cum celeri , vibranteque simulque intermittente pulsu , atque vehementiori jactatione. Turbatam prius noctem transegerat. Clystere alvus emollita est , undè scybala primum , sed summè flava , sive potius biliosa duriora tomenta dejiciebantur , dein liquida plurima non minùs biliosa fluxere. Urinæ copiosæ , pallidulæ , sed crassæ , post aliquam moram laudabile enæorema exhibentes. Quodpiam tensionis indicium ad dextrum Hypochondrium prodibat. Sæva fitis , cum arida lingua , & oris intolerabili pravitate ; jactatio imprimis , sub eâque angor assiduus , cum flatuosa , ferè perpetua

tua comitante eructatione, frequentesque ad vomitum stimuli egræ negotium faceſſebant: nec deerat ex adaucta febre productus ingentior quoque univerſi corporis calor. Sextæ noctem non minùs inſomnem egit: manè placidiuſculo ſomno indulgebat; atque imminutâ febrî aſſidua eructatio, frequens alimentorum vomitus, cum bilioſis largè per alvum eliminatis, pulſusque intermittentia ſupererant. Diluentia calidiuſcula epotabat. Urinæ adhuc copioſæ, ſed coloratiores, & craſſæ, multa concoctionis indicia laudabili ſuſpenſo perhibentes. Ad ſeptimam febris, & calor mediocres: Nulla tuſſis: Maniſteſtior dextri hypochondrii tenſio, & ad tactum ſub-obſcurus dolor: Urinæ denſæ, multæ, & ictericæ; nec non creberrimæ, ſimulque flaviffimæ, & tomentofæ alvinæ dejectiones. Dormiebat. ſitis cum anxietate minor. Octavâ omnia ſimilia. Longum cholagogorum purgantium dilutum propinatur, idque copioſiſſima ruruſ, atque ſaturatiſſima biliaria viſcidula, imo ad uſque purgationis finem valde crocea, deturbavit.

Pulſus mollis, mitiſſimus calor; nulla anxietas, limpidus cutis color; atque deleta omnis in pulſu intermittentia. Ad Nonam bene habuit: Saturatas urinas, atque inſtar bilioſi olei craſſiores, pingues & unctuoſas reddebat, tum novas, mediocriter viſcidas, biliares excretiones: Neque penitus evanuerat dolor ad hypochondrium dextrum ex tactu ſe pro-dens. Pauca ſitis, lingua mollior, & humidior: Modica febris: optima reſpiratio; ſublataque tandem anxietas.

Decimâ & undecimâ exilis adhuc momenti febris aderat, mollis pulſus; neque ampliùs ſenſibilis prior illa in dextro hypochondrio ad tactum moleſtia: Urinæ pallidiores, ſed ſimul multæ, craſſæque, cum alvinis, ſpontè, & à clyſtere uberibus, continuò tenacibus, bilioſis, croceiſque profluviis, purgabatur duodecimâ, biliaribus plurimis ſolutis per ſedem copiis. Ita poſtea res ad uſque decimam quartam diem procedebant, excernendo, meliùsque habendo; quo tempore mor-

morbus ; uti ante septimam prædictum fuerat , judicabatur. Sequenti verò die alvus cathartico extimulata novas adhuc saturatorum biliosorum perfectè concoctorum quisquiliis deponebat. Urinæ tandem naturales , & copiâ mediocres ; optimèque restituta valetudo fuit. In hanc ipse curationem quartâ à morbo die superductus eram. Clinicus fuerat Accuratissimus D. Moreni, Aulicus medicus; Illustrissimusque D. Fantonus noster semel in consilium adhibitus.

„ 56. Frequentissimè à bile, vel sanguine bilioso fieri pleu-
 „ ritides , & habere periodos tertianarias ex Galeno , &
 „ Avicennâ colligit Hieronymus Mercurialis vir doctissimus
 „ Prælect. Bonon. de rat. victus in morbis acutis pag. 394.
 „ Summi itaque momenti est , quod observabam de sangui-
 „ nis missione, quam Hippocrates commendat in verâ pleu-
 „ ritide, cui non competit purgatio , cùm sit inflammatio ex
 „ sui naturâ , ut scitè advertit laudatus Mercurialis loco ci-
 „ tato super Hippocratis textu : “ *siccum autem fomentum &c.* „
 „ & pag. 403. & textu sequente “ *si verò dolor ad claviculam &c.* „
 „ & pag. 405. , ubi admirandi Senis mysteria in curatione
 „ pleuritidis perpendens , hæc habet “ *Dicendum est negotium*
 „ *mittendi sanguinis tanti momenti esse, ut si rectè administre-*
 „ *tur , protinus salubritatem : Si error quispiam committatur*
 „ *exitium , aut detrimentum maximum afferat. Quapropter di-*
 „ *ligentissimus voluit esse Hippocrates in proponendâ missione lo-*
 „ *co , mensurâ &c.* „ & infra repetit “ *Si ulla res est in medi-*
 „ *cina faciendâ , quæ judicium Medici requirit , & insignes dif-*
 „ *ficultates habet , certè est negotium hoc mittendi sanguinem.* „

„ 57. Porro detestabilis est imprudentia eorum , qui in
 „ morbi limine desumptâ indicatione à dolore , tussi , & fe-
 „ bre phlebotomias affatim repetunt, nullo servato discrimi-
 „ ne etiam iis , quibus extractus sanguis insons observatur.
 „ Autumant complures duræ cervicis Empirici , pleuriticos
 „ morbos , cujusvis nature sint, qui acutiem aliqualem præ-
 „ seferant

„ seferant generosis sectionibus jugulandos esse, velut in in-
 „ cunabulis; jugulant autem pleuriticos homines. Enim ve-
 „ rò, si hujusmodi liberales sectiones initio fiant in pleuri-
 „ tide, ut aiunt, sympatheticâ, & quando tota sanguinis
 „ massa morboſo fermento nondum est inquinata, manife-
 „ stus est error ex jam antè probatis; si verò labem contra-
 „ xerit, adhuc moderatione utendum; sancita etenim est cor-
 „ datorum sententia, satius esse multiplicare numerum effu-
 „ sionum, quàm quantitatem, ut quibuscvis morbi recru-
 „ descentiis occurratur cum virium tolerantia. Contingit enim
 „ sæpiſſimè, ut pleuritis, aut peripneumonia, imò & ipsa
 „ sanguinis compages intensius accendatur, elapsis aliquot
 „ morbi diebus, dato in vasis majori spatio, ut alibi nota-
 „ vimus, aut recrudescant periodicè, ut ut copiosæ præmis-
 „ sæ sint phlebotomiæ, (quod non rarò evenire conspiciamus
 „ in præadductis biliosis; quæ Tertianarum more solent exa-
 „ cerbari) & in progressibus necessitas urgeat mittendi san-
 „ guinem, & repetendi missiones, si potissimum jam ex-
 „ tractus densum in superficie chorium repræsentet. Quo-
 „ modo autem id assequetur Medicus, si vires non fe-
 „ rant?

„ 58. Nec è converso probari potest panicus Medicorum
 „ timor, qui, cùm viderint in principio morbi inutilem phle-
 „ botomiam, hanc toto morbi decursu sibi proponunt fore
 „ noxiam. Super his plurima offeruntur exempla hâc ipsâ
 „ vernali constitutione frigidâ post hyemem calido-siccam.
 „ Variatis hoc anno temporum vicibus nostro climati con-
 „ gruentibus, non tamen variatâ consuetudine victus plenio-
 „ ris, & ob vindemiam nobis copiosam, vinosioris, bruma-
 „ lem tempeſtatem suaviter evasimus, curis afflatam absque
 „ frigoris incommodo. Ast superveniente Vere ventis borea-
 „ libus, & aliquando pluviis interturbato constipata corpora
 „ orgasmis gravari experimur; undè plures exurgunt ægri-
 „ tudines, præsertim Tertianæ pertinaces instar autumnalium,

„ pleuritides viscido-bilioſæ tertianariis periodis exacerbatae ,
 „ & viſcerum infarctus cum febre ejuſdem genii. In primis
 „ pleuritides hujus conſtitutionis initium ducunt à quadam
 „ rheumatis pectoralis ſpecie , quibus febris cum rigore, la-
 „ teris dolor , & reliqua pleuritidum ſymptomata accedunt.
 „ Harum initiis venæ ſectiones , ſi rubello ſanguine repetan-
 „ tur , morbum augment , in progreſſu ſanant. Ut harum ſpe-
 „ cimen habeatur , exemplum quoddam adducam.

„ 59. Illuſtriſſimus D. Alexander De Liſola ex Comitibus
 „ montis Acuti à Pado ; primus in urbe Clavaſii Conſiliarius,
 „ ac civis annorum 43. conſtitutionis ſanguineæ , obefe , &
 „ laxæ texturæ, poſt diutinas animi curas , & habitudinem hy-
 „ pochondriacam , inappetentiâ , membrorum gravitate , ac
 „ capiplenio tenebatur cum rheumate pectoris, tuſſi , & ſpu-
 „ to catarrhali viſcido. Tandem Solis ardore itinerando per-
 „ cuſus , & exercitio immodico fatigatus febre corripitur
 „ die 24. Martii nuper elapſi ante auroram , cum levi perſfri-
 „ gatione , turgelcentiâ dextri hypochondrii , dolore in
 „ ſepto tranſverſo , & regione lumborum ad dorſum produ-
 „ cto , ſuccedente calore , & ſudore graveolente. Nocte ſub-
 „ ſequenti dormiebat cum madore. Altero die non febrici-
 „ tabat , naſcabundus erat , renes adhuc dolebant , ſed ex
 „ alvi dejectione levabantur , magis inſuper ob excitatum co-
 „ die ardorem , ruboremque cum efferis minutiffimis in utra-
 „ que coxendice ; hinc nocte adveniente placidè quievit. Ter-
 „ tio die anorexia , & coxendicum phlogofiſ vigeant , non
 „ febricitavit. Veſpere ante cœnam ſumpſit bolum ex caſſiæ
 „ ʒiij cum cremore tartari, cujus ope binas habuit ſedes. No-
 „ ctem egit cum ſomno turbato , & purpurea coxarum efflo-
 „ reſcentia evanuit. Quarto die horâ alterâ ab ortu ſolis fe-
 „ bris reverſa eſt cum rigore ad tres horas perſeſerante , do-
 „ lore obſcuro in latere dextro cum tuſſi , & aliquo ſputo
 „ exiguo ſubcruento , mox flavo-viſcido abſque cruoris ve-
 „ ſtigio cum difficultate , vel potiùs impotentia decumbendi
 in

„ in latus oppositum. Incalescente corpore, statim scatebat
 „ sudor, qui videbatur dolorem minuere, attamen cum an-
 „ xietate, & jactatione. sudore remisso circa tertiam noctis
 „ horam sagacissimus Doctor Capra, vir natalium splendore,
 „ & doctrinæ meritis clarissimus, præfati Dñi concivis,
 „ phlebotomiam de cubito instituit; sanguis extractus erat
 „ floridus, & postliminio revocatus est sudor per totam no-
 „ ctem effluens cum tædio. Quinto die dolor adhuc perci-
 „ piebatur absque sputo. Infusus est clyster leniens, quo
 „ pauca dejecit, febrilis accessus repetebat horâ quartâ ma-
 „ tutinâ absque rigore, pergente dolore obtuso cum majo-
 „ re anxietate, æstuatione, & siti. In expansione hujus pa-
 „ roxysmi iterata est phlebotomia de eodem cubito; san-
 „ guis erat paulò absimilis, referens pelliculam tenellam. Ite-
 „ rum sudabat cum anxietate. Urinæ rufo colore satura-
 „ bantur, quales in autumnalibus Tertianis. Anacatharsis
 „ nulla, pulsus depressus, & accessit vomitus amarorum. Hoc
 „ ipso die consultationis causâ accersitus ad ægrotum, & enar-
 „ rata singula scrutatus, indictâ epochâ ad posteriores phlebo-
 „ tomias, emeticum propinandum duxi vespertinis horis,
 „ idque lubentiùs, quia à spontaneo naturæ conatu indicabatur.
 „ Post horam ab assumpto haustu vomuit viscida, & amara;
 „ paulò post dejecit, & per vices vomebat, intercalando de-
 „ jectiones, & vomitiones cum euporiâ. Excretiones alvi-
 „ næ erant seroso-flavæ, vomitu autem rejectæ è viscido vi-
 „ rescebant. Diluentia interponebamus, & nullo exinde re-
 „ currente evacuandi nisu dedimus mixturam ex conf. hya-
 „ cinth., & theriac. ā. ʒss sal. absynth. ʒss aq. scabiosæ ʒj Laud.
 „ liquidi gutt. XV., tranquillus quievit usque ad horam se-
 „ cundam sequentis diei. Sextus paroxysmus fuit mitissimus
 „ absque incommodo, & æstu; Tussis erat humidior cum
 „ doloris obliteratione, & cum facili eruptione sputorum glu-
 „ tinosorum, quibus identidem ramenta quædam commixta
 „ prodibant livescentia, aut sanguinea subacta, coloris ma-

„ licorii. Urinæ minùs coloratæ aliqualliter deponentes, &
 „ omnia mitescebant. Nox diem septimum præcedens fuit
 „ insomnis cum febris recrudescentiâ, jactatione, tusſi ina-
 „ ni, & ſiti; idcirco primâ luce phlebotomiam revulſivam
 „ elegimus de ſaphenâ dextrâ, ut naturæ obſequeremur, quæ
 „ initio morbi ad infernas partes eruptiones tentaverat, &
 „ deleta ſunt hoc præſidio enata ſymptomata abſque ſuper-
 „ venientiâ manifeſtâ novi accéſſus diurni. Paratæ ſunt ci-
 „ choracæ potiones, & emollientes; lingebat interdium è
 „ cochleari julap. viol. violac. cum ol. amygd. dulc., & no-
 „ ctu emulſiones demulcentes. Octavo die hauſit ꝑiiiij ol.
 „ amygd. dulc. in jure carnis inſulſo, quo remollita eſt al-
 „ vus aliquot excretionibus flavo-crassis. Declinante ſole,
 „ querebatur de univerſali laſſitudine, ſed præſertim de do-
 „ lorosâ quadam hypochondriorum ſenſatione, ac ſi anteaſtas
 „ vomendi preſſuras tunc ſolùm perciperet. Urinæ videban-
 „ tur pepaſmum indicare, & in matulâ alterabantur, ita ut,
 „ cùm eo die Taurino acceſſerit pro tertio doctiſſimus, or-
 „ natiſſimusque Doctor Richa Junior, Archiattrorum germen
 „ digniſſimum, non de morbo potiùs, quàm de morboſis
 „ reliquiis diſſerendum nobis ſupereſſet. Sed & anguis late-
 „ bat in herbâ, quandoquidem febris noctu recrudit cum
 „ vigiliis, tusſi moleſtâ, crudo ſputo flavo-ſanguineo, & re-
 „ divivo lateris dolore acutiore ad ſcapulas, & dorſi cen-
 „ trum propagato. Jamque ſyſtrophica viſa eſt nono die la-
 „ teralis affectio. Ob eam rem unanimi voto venam cubi-
 „ ti retundendam cenſuimus ad effuſionem ꝑviiij ſanguinis,
 „ qui fortiter coaluit, exhibens durum chorium, & flavum
 „ ad diametralem digiti altitudinem denſum. Urinæ ruſum,
 „ intenſumque colorem reſumpſerunt. Poſt phlebotomiam
 „ ſudor affatim fluebat cum ægroti tædio, & gravi moleſtiâ.
 „ Circa meridiem remittebat ſudor, non remittente anxietate;
 „ hinc ſitis ingens cum tali jactatione, ut decumbere
 „ pertæſus æger lecto exurgere niteretur veluti phreniticus.

Potio-

„ Portiones ex decocto pectorali sitienti concedebantur ad
 „ libitum , & horâ pomeridianâ incisam venam reseravimus
 „ ad emissionem rursus 3viii sanguinis impetuosè effluentis
 „ ejusdem omnino conditionis , & urgente tussi spuebantur
 „ sanguineo-flava , febris efflagrabat cum reliquis symptoma-
 „ tibus. Vires nihilominus constabant , ita ut ab iis , &
 „ ab exaltatâ morbi acutie indicationem desumentes , veriti
 „ non sumus venam iterum relaxare ineunte nocte pro ter-
 „ tiâ unius diei effusione sanguinis impetuosius adhuc profili-
 „ entis absque sensibili virium jacturâ. Post elapsam horam
 „ à postrema phlebotomia alvus turbata est , & biliosa de-
 „ posuit viscidula. Eâ nocte ægrotus noster laudabiliter quie-
 „ vit , & decimo die ex diluto cassiæ tribus haustibus epoto
 „ excrevit cum eximio levamine magnam bilis flavæ , &
 „ viscidæ copiam. Prosperum auspicatus eventum , Infirmo
 „ Domino valedixi , in patriam redux ; ast post dies aliquot
 „ relatum habui à præclarissimo Assistente , opportunitatem adhuc
 „ fuisse septimam phlebotomiam ad superandam undecimi
 „ paroxysmi vehementiam , nocturnis horis similiter repeten-
 „ tem , viribus id permittentibus ; nec minoris malitiæ no-
 „ tas exhibuisse extractum sanguinem. His peractis , evictus
 „ est morbus , pulsus percipiebatur validior , & interpositis
 „ ad aliquot dies alterantibus ex rad. & herbis hepaticis ,
 „ amaricantibus , & capillaribus , datum est opportuno tem-
 „ pore catharticum pro repurgatione eradicativâ : & æger op-
 „ timè convaluit.

„ Viden ergo , quomodo curationis processus juxta indi-
 „ cationes versari debuerit primò ad minuendum orgasmum
 „ vasorum ; secundo loco ad exturbandam per superiora ca-
 „ cochyliam viscido-biliosam è visceribus epigastrii. Tertiò
 „ ad cohibendum revulsivâ evacuatione impetum morboşi hu-
 „ moris ad sanguinem rapti , & superiora petentis. Quartò
 „ ad demulcendam bilis acrimoniam diluentibus , & epice-
 „ rasticis , vias alvi leniendas emollientibus , & sputi erup-

„ tionem bechicis promovendam. Quintò ad præpediendas
 „ phlebotomiis iteratis efflagrationes, explosiones, & me-
 „ tastases sanguinis morbido biliari fermento sollicitati, &
 „ ad pulmones, caputve novis recrudescentiis febrilibus ap-
 „ pulsi. Sextò ad excernendas per alvum feces viscido-bilio-
 „ sas à natura subactas. Septimò ad extinguendum penitus
 „ omne febris suscitabulum. Octavò tandem ad expiandas cum
 „ toto vias omnes excretorias ad omnimodam morbi, & caus-
 „ sæ morbi exterminationem?

S C H O L I U M XXVI.

*De miro in
 aliquibus
 orgasmis
 missionum
 sanguinis
 numero, ea-
 rumque ne-
 cessitate.*

QUemadmodum quum Bilis orgasmo non adhuc cietur, sed cieri potest, detractionem sanguinis, plenam esse discriminis superiùs attulimus; Ita si in orgasmum jam concita sit, & sine lege per vasa, & viscera debacchari contingat, phlebotomiâ non minùs ac in orgasmo sanguinis, sæpiùs, si opus sit, repetendâ, frenari eandem, compesci, distrahi à laceffitibus partibus, atque ad regulares motus componi oportet. Hinc contumax ejuscemodi in descriptâ ægrotatione biliaris turgescencia phlebotomiam septies repetitam, non solùm citra virium notabilem jacturam passa est, sed necessariò depostulabat. Vivit hîc Taurini Virgo quædam, quadraginta annos nata, degens in ædibus amicissimi mei D. Tabassii Rectoris Ecclesiæ S. S. Annunciationis ad Padum, cui ratione mixti orgasmi, seu felleo-sanguinei non minùs frequenter, quàm improvisè etiam absque febre ingruentis, atque cum cephalalgiis enormibus, spirandi suffocatione, & sputis biliosi sanguinis, pectus, caput, aut utrumque præcipuè infestantis septingentæ circiter ex variis partibus missiones sanguinis solo quatuordecim annorum intervallo, ut plurimùm ad unius libræ dosim, celebratæ sunt. Hæc interea mediocris ad hos dies valetudinis potitur, gracilis quidem, sed vegeta, neque nimis pallida, tum redditis uberius catameniis

tamen iis diras illas liquidorum excursions tam crebrò non passa. Neque quò ad orgasmi ingenium, ejusque irruptionum modum, tum etiam sanguinearum missionum copiam disparem valde fuisse observationem in Cherienti cive, quem insuper, vel expleto septuagesimo anno ad singulos menses levi phlebotomiâ excipi oportebat, mihi olim retulit oculatus testis præclarissimus, omnique virtutum genere ornatissimus, apud nostrates senior Medicinæ Professor Josephus Pisellius. Tum à præstantissimo apud Alexandrinos Medicinæ Doctore, amicissimoque D. Nottâ mihi non ita pridem relatum est, nobili cuidam Moniali Alexandria commoranti, neque adhuc ad senilem ætatem properanti, ob similes causas phlebotomiam millies, & quatercenties fuisse per octo annorum curriculum adhibitam; cujus quidem præsidii ipsemet pluries auctor extitit. Atque ex his Casibus, ut quanta sit in orgasmo impetus ratio, & phlebotomiæ necessitas quisque viderit, ita eosdem, veluti rarissimos, & insignes hîc loci in gratiam Curiosorum recensere non absolum fuisse profectò existimabit.

60. *Hæc autem præcipuè observabamus in hac agitudine: Pulsus assiduam cordis anxietatem ostendebat, & inæqualitatem maximam, non arteriæ duritiem, non vibrationem; (quod luctantium fluidorum lentescentiæ tribuebamus, partæ videlicet ante morbum à causis non naturalibus, & universalibus præadductis; in morbo ab inutili, & symptomaticâ sudorum emanatione.) Febris, quæ initio videbatur ephemera ab insolatu, & exercitio, reverà fomitem habuit biliosum, ut ut ab eruptione cutaneâ ad tempus quiescentem, qui per esserarum palindromen reexcitatus ad periodicas effervescentias pleuritidem statuit symptomaticam. Sputa, quæ post emetici succussiones primò glutinosa cum ramentulis lividis, & cruentis obscuris viscidis phlegmatis inhaerentias arguebant, nono die sanguineo-flava intensè colorata bilis exaltationem supra lymphæ lentorem per febriles effervescentias tertianarias promotam accusarunt. Denique pulsus sub finem morbi ob restitutum elaterem*
vali-

validior vitalem igniculum, superato morboſo ſufflamine emicantem teſtabatur.

61. Plures alios pari morbo agrotantes pari curamus eventu, habitâ ratione ad uniuſcujuſque idioſyncraſiam. Lumbricorum copiam tum per vomitum, cum per dejectiones excerni ſæpe videmus in iis, quibus minor eſt excretio bilis pituitoſas inteſtinorum ſordes verrentis.

62. Ab iisdem cauſis ſimulatas inſuper pleuritides offendimus, quæ cæteroquin hepatitides eſſe comperimus, in aliquibus acutiores, quibus nempe hæc adſunt: Gravativus, ut dicitur, dolor in dextro hypochondrio cum tenſione turgido, atque inſuper in toto latere tenſivus uſque ad claviculam, & in ſtomachi regione moleſtus: Febris tertiana duplex intenſior: Tuſſis ſicca: ſputum nulum: difficilis anhelitus, præſertim ex decubitu in latus oppoſitum: Oris amaror, linguæ ariditas & ſitis; in aliis ſpurias, quibus nempe ſupradicta omnia remiſſiora extant, & major eſt lenteſcentia lymphatica. Acutiores curantur fomentis externis, diluentibus internis, clyſteribus, phlebotomiâ, potiſſimum de venis inferioribus, hirudinum applicatione, atque cholagogis catharticiſ. Spuriæ iisdem præſidiis, præterquàm miſſionibus ſanguinis, delentur; faciliùs adhuc ſi addantur emetica, & in decoctionibus amarican-tia, præ cæteris fumaria, hyſſopus, ſcabioſa, abſynthium. Neutræ ultra decimam quartam diem perſiſtunt, rarò ad vigefimam protrahuntur.

De Hepati-
tidum ſpe-
ciebus, &
curationibus
Animad-
verſio.

De diverſa pleuritidum, atque hepatitidum diagnoſi ſuperiùs in Hepatitidis peculiari diſquiſitione abundè egimus; ubi pariter diſcuſſæ ſunt tres hepatitidis ſpecies, videlicet calida, frigida, & mixta, quas quidem Guidettus acutam, ſpuriam, & neutram non inferiori ratione nominat. Singularum inſuper naturam, extensiones, & curationis ſcopos non minùs explanavimus.

63. Nec in omnibus hepatis regio, ſed in aliquibus ſiniſtra pari modo afficitur acutè, vel remiſſè, cum ſtomachi dolorifico ſenſu; neque diverſam poſtulat curationem, ſed diuturniorem. Signa
verò

verò peculiaris affectû visceris , atque determinata affectionis , à diagnosticis antiquorum probatissimis fontibus sedulò petenda sunt.

S C H O L I U M XXVII.

C Alidi, frigidi, humidi, sicci hepatis, tum simpliciter, aut complicatis morbis aliis, patientis, habitudines in Galeni art. medecin. seu Isagog. abundè consulantur. *De Fecoris intemperiebus apud Galenum.*

„ 64. Obstructionibus affecti hoc tempore malè torquen-
 „ tur. Vir ann. 30. de familia Peretti à Marcenasco ob in-
 „ veteratas lienis obstructions cute luridus, pectoris rheu-
 „ mate nuper gravabatur cum spirandi difficultate, tussi, &
 „ sputo catarrhali viscido. Febre captus tertio die curari po-
 „ stulabat. Inveni æstuantem hominem, sitientem, anhelan-
 „ tem, dyspnœâ correptum cum exiguo pulsu, summâ rau-
 „ cedine, duris hypochondriis & turgidis, linguâ viscido-
 „ flavâ, obtusoque dextri lateris dolore. In tanto morbi
 „ apparatu, ut urgentiori succurreretur, missus est sanguis de
 „ cubito iteratâ sectione ad unc. VIII. viscido-flavus, veluti
 „ purulentus. Quartâ die leve catharticum sumpsit, quo plu-
 „ res excernebantur lumbrici teretes cum liquidis fœcibus.
 „ Oblato bolo ex theriaca & conf. hyacinth. ā. 3ß: Campho-
 „ ræ ʒß: sudores quintâ die scatebant cum languore maxi-
 „ mo, & voce depressâ. Post alterum bolum sextâ die pa-
 „ ratum ex pul. belzoin. 3ß: theriac. ʒj confer. rosar. ʒij, at-
 „ que potiunculam alterati juris ex scabios. altheâ, & hyssop.
 „ valdè angebatur in pectore, & præcordiis, aded ut mori
 „ videretur. Ast levamen egregium sortitus est per copiosam
 „ eruptionem sputi, primùm lividi, exinde flavi, imò & cro-
 „ cei, nonnihil cruenti à boli repetitione per totam septimam
 „ liberalioris. Assumpto octavâ die oleo amygdalino viscida
 „ dejiciebat cum vivis lumbricis, quorum duos vomitu reje-
 „ cit. Febris die nonâ urentiorem ad externas partes ca-
 „ lore

„ lorem effudit cum pulsus vibratione, & icterico colore sa-
 „ turatissimo. Demum per alterantia ex supradictis herbis
 „ addito cichorio, indè epicraticis deicientibus res melius
 „ in dies procedebant. Qui hunc convalescentem vident,
 „ mortis repudium, aut cœmeterio profugum vocant.
 „ 65. Dubium mihi enatum est in supradictis ægitudini-
 „ bus curandis: An scilicet oleosa intus sumpta quo tempore
 „ biliosum recrementum in effervescentias agitur, ignem ad-
 „ dant? In pluribus observavi, post exhibitum in jure amygdalimum oleum, intensiorem impofterum febricitationem:
 „ An quia oleum biliosæ accensioni addere, atque intendere
 „ pabulum aptum sit, propter substantiæ analogiam? Non-
 „ dum satis superque compertum habeo. Id tamen innuisse
 „ videtur Hippocrates VI. epidem. his verbis: „ *quod autem*
 „ *biliosum est venit à pingui. & insuper quibus est ipsum pin-*
 „ *gue, iis etiam bilis:* „ atqui bilis, & febris mutua ge-
 „ neratio esse solet; ergo &c. Attamen recludendis viis ad
 „ morbosæ materiæ excretionem hoc oleum conduxisse satis
 „ innotuit. Hoc ipsum ad sedendam tussim siccam, atque
 „ molestant in epidemicâ constitutione pleuritidum biliosarum
 „ anni 1709. profuisse visum est, ut suo loco innuebam. Ve-
 „ rum nitrata, sambucina, & camphorata non omittebantur.
 „ Problema hocce in re therapeuticâ exactius perpenden-
 „ dum conjicio. Juvat huc adducere mirabilem istius olei
 „ efficaciam in sedandis diarrhœis ab acri materia excitatis,
 „ si eadem primariæ sint potius, quàm symptomaticæ, sive
 „ productæ à febre acutâ, vel peculiari inflammatione; &
 „ præsertim si sufficientes viarum absterfiones præcesserint ope
 „ enematum, & congrui alicujus eccoprotici ex decoctione
 „ tamarind. rhab. &c. cum syr. ros. vel cassiâ rec. extr. &c.
 „ Hoc nobile paregoricum non modò irritationes compescit,
 „ sed simul irritantes particulas obtundit, involvit, & per
 „ lubricatas intestinorum semitas leniter educit, quod æquè
 „ tutò à quovis alio anodyno, vel hypnotico non impetramus.

In

„ In dysenteriis autem , si fortè diabroscos , vel ulcerosæ
 „ tunicarum lésionis indicia se præbeant illud implorare non
 „ assuesco , ratus per oleosa hujus generis linimenta præpedi-
 „ endam iri , vel retardandam læsæ partis consolidationem;
 „ huic itaque lubentiùs gelatinosa, atque traumatica substituo.
 „ quòd si torminosæ hujusmodi intestinorum difficultates fo-
 „ veantur à præsentia acris materiæ continuò refricantis ,
 „ quid vetat ne ab oleo hocce emolliente demulceri saltem
 „ queant , si obliterari non possint ? Non idèò ad vulnera-
 „ ria , & balsamica intercipientur processus.

S C H O L I U M X X V I I I .

QUædam in mentem subeunt ad hunc locum non reti-
 cenda , de variis juxta varios bilis errores , & dispa-
 rem habitudinem, remediorum administrationibus, quæ aliàs
 in Francisco De le Boë Sylvio legisse memini. Celebris ita-
 que hic author *lib. I. Prax. Medic. cap. 46. & 48.* aliisque
 abundè locis , Bilem nimium fluidam austeriusculis gratiori-
 bus ad laudabilem , & naturalem consistentiam sensim con-
 ducit : si solito crassior est , volatilibus salibus , & præcipuè
 oleosis aromaticis fluidiorem reddit , quibus etiam narcoti-
 cam in eadem progenitam facultatem emendare studet : A-
 dauctam acrimoniam usu spiritus nitri edulcorati , aut salis
 dulcis , aliorumque , sed vegetabilium , acidorum ; ut ompha-
 cii , succorum berberorum , granatorum , aut similium ob-
 tundere edocet : Bilis terrestrior , atque ad lapidescendum
 prona rursus per dulcem nitri spiritum , ex vino , aut alio
 liquore desumptum ab eodem corrigitur : Bilis pinguedine
 peccans per temperatiora acida , & lixivum salem , tum pu-
 riorem ex absynthio , carduo benedicto &c. tum magis terre-
 stre ex oculis cancrorum , coralliis , conchis &c. elicatum,
 per aromaticas insuper , & amaricantes plantas ; per salem
 tartari vitriolatum , & similia. Cùm verò præcipuè , bili ni-
 mium

*Varia ex Syl-
 vio de le Boë,
 juxta varia
 bilis vitia ,
 remediorum
 usurpationes:
 atque
 hinc de oleo-
 sorum præsi-
 diorum usa
 in efferves-
 centiis bilio-
 sis.*

miùm spirituosæ , & solutæ oleosis , & pinguibus , semine insuper cannabis , sapone , opio , & croco (quæ quidem omnia pinguia , atque oleosa stabilit) mineralium , ac metallorum fixo , & anodyno sulphure occurrat hic author , tum denique salinæ nimium , & acriori aliquando per viscosa , aliquando per spirituosæ , aut per blandiora acida , frequentius etiam per oleosa prospiciat ; non video cur de oleosorum remedium usu in biliosis effervescentiis dubium aliquod superesse possit , cùm oleum irretiendis , infringendis , subducendisque quibuslibet volatilibus , impetuque majori percitis , humanorum liquidorum particulis aptum , natumque sit ; neque idcirco incrementa febrium oleosorum usurpationi imputari ullo modo queant ; sed potius propinationis fastidio , ut arbitratur Galenus 2. de simpl. medic. facult. cap. XI. , ubi postquàm dixerit : *Oleum neque refrigeratos excalefacere , neque excalefactos offendere* , exinde addit : *non tamen obscure iis , qui ex ardore febricitant fastidii cujusdam causa est , caloremque augere apparet*. Cautè igitur intelligendum est aliud ejusdem Galeni effatum loco citato , ubi loquens de olei facultatibus in morbis subdit : *ceterum ledere omnes , quæ ex purâ bile sunt fluxiones vel maximè est notum : at quæ ex sanguine illi permixto constant , has quidem minùs , non tamen vulgariter*. Non negamus in erysipelatosi affectibus oleum applicitum proficuum haud esse , ipsoque ideò nullum esse utendi morem. Ita quoque adnotavit laudatus Author ibidem : *In exquisitis erysipelatis , quæ biliosæ sunt fluxiones manifestè calorem adauget , etiamsi applicetur frigidissimum*. Ita in his morbis activiora repellentia , & disgregantia usurpamus. Intereà Galenus ipse lib. I. de comp. medic. per Gen. cap. IV. *oleosa erysipelati præcipuè phlegmonoso admovenda monet*.

Cæterum , quos omnes morbos bilis status in superioris Prodromi §. II. accensuimus , hi certè memoratis Sylvianarum curationum classibus , aut similibus , accomodari possunt.

66. Biliaria hac sunt, quæ vernali hac tempestate invalescentia, nobis insueto more obversantur. Non inficiabor interea biliares hujusmodi exacerbationes minùs efferas esse, ac sint interdum æstivæ, & autumnales; tum quia bilis tantam acrimoniam, tantamque torrefactionem à mitiore hyemis constitutione concipere haud potuit, qualiscunque fuerit victus plenus, atque vinosus; tum etiam quia recrementum hocce pituitosis visciditatibus irretitur. Nihilo tamen minus identidem audio è vivis discedere citra oppidi nostri confinia; qui catarrhali rheumate, vulgò infredore, laborare dicebantur. Quo pacto hi à medentibus pertractentur profectò me fugit. Quocunque tempore timenda est exorbitans bilis.

67. Verùm antequàm dicendi finem imponam, liceat mihi retrogrado calamo funestos nonnullos casus recensere, quos quidem elapsis annis æstivo, atque autumnali tempore observabam.

Tres homines vidi robustissimos simplici tertianâ affectos, qui per institutam phlebotomiam die febrilis recursus, ingruente hinc paroxysmo in horrendam choleram inciderunt, animamque bilis torrente ereptam efflarunt. Mulierem validam utero gerentem quinquemestrem post detractum è cubito sanguinem ab incauto chirurgo in simplici autumnali tertiana tertius adoriebatur paroxysmus cum maximo ad plures horas rigore, & rigida periit, irritis theriacalibus, spirituosis, aliisque cardiacis ad excitandum calorem propinatis. Conterraneus noster D. Cignetti Doctor Medicus consistentis ætatis, picrocholus, gracilis, duplici tertiana mitiore afficiebatur mense septembr. 1711, cujus paroxysmos ingens præcedebat ptyalismus horis ferè meridianis cum aliquali molestia in epigastrio. Quinto die proprio nutu celebrata est de cubito missio sanguinis rubelli, post moram aliquam bile saturatum serum exprimentis; atque horâ paroxysmi, præviâ consuetâ salivatione facta est præcordiorum contractio cum atrocissima mesenterici plexus convulsione, & ut dicitur, crispaturâ, velut ex inflicto acutissimo clavo in umbilici centro, accedente alvi fluxu seroso-cruento instar loturæ carniū, hepatico dicto, nec non febre leipyriâ,

dirisque cruciatibus, necem modico horarum spatio inferentibus. Huic propinatum apto tempore emeticum succurrere potuisse meum sanè judicium erat; "Febres etenim leipyriæ non nisi per choleram effusâ bile solvuntur: ex Hippocrate Coac. Præn. 120. „ergo & effusâ per emeticum bile de subjecto, ut dicebam, picrocholo, non modò tertiana citò curari, sed & leipyria præcaveri optimo jure poterat, unâ cum suis accidentibus. Diarrhœas acerrimas, atque inde subortas dysenterias æstivis, vel autumnalibus febribus ab iteratis præproperè phlebotomiis frequentissimas inspicere datum est, nequaquam iis, quibus opportunè emetica, vel saltem efficacia cholagoga, anodyna, diluentia, & pæregorica cum adequato regimine fuerant ministrata.

Monitum
Authoris.

Medicæ ad choleram morbum, autumnales tertianas, hepaticos fluxus, leipyrias febres, diarrhœas, atque dysenterias biliosas (qui quidem morbi hîc obiter à Guidetto innuuntur) administrationes per sua peculiaria loca, huic dissertationi intertexta, abundè medentibus se porrigunt.

„68. Sed toties commendatis emeticis stomachum tibi excitare jam videor, *Præclarissime Bianchi*, quemdam fortasse animi genium ostentans ad hujus generis præsidia fidenter nimium, usurpanda ultra præfinitam à prudentioribus methodum; ac si, pro susceptâ liberiori medendi consuetudine, morbo cuivis, levi quâ datâ occasione convenire isthæc affectarem. Attamen si minùs cautè unquam egissem in hisce administrandis, non satis perpendens ægritudinum ingenia, causas, & tempora, ægrotantium indoles, atque temperies, hujusmodi demùm præsidii exhibendi modum, regimen, & dosim, id certè, quod in numeris hominum testimoniis probatum fuit, modò tibi lætè, tutòque testificari non possem; nempe ab emeticorum propinatione quidpiam ægrotis meis pœnitentiâ dignum contigisse nunquam; me potiùs timoris non semel pœnituisse, quo quidem perculsus in morbis quibusdam incer-

„ incertioris alexæ ab hoc remedio abstinuerim, veritus, ne
„ morte, quam morbi vires inducerent, importuno imputa-
„ tâ remedio arti nota inureretur: cujusmodi formido vel
„ ipsos medicinæ coryphæos angere perhibetur, si nobilium
„ saluti reparandæ interfint. Cæterum exturbandis, extir-
„ pandisque biliosis cacochyliis, æstivo tempore præcordia,
„ & epigastrium præcipuè obsidentibus vomitoria apprimè
„ conducere peritum neminem latere oportet monitu magni
„ Senis Aph. 4. Sect. 4: “ *Medicari æstate superiores ventres*
„ *magis; hyeme verò inferiores.* „ Pro diversa quoque ægro-
„ tantium habitudine diversum exhibendi regimen suadet præ-
„ fatus Cous *de sal. victus rat.* 338. 40. “ *Obesi, & minimè te-*
„ *nues jejuni vomant; graciles autem, & imbecilliores à cibis*
„ *vomitum cieant.* „ Dixi: æstivo potissimum tempore; nam,
„ quamvis raturum sit æquè convenire per autumnum emetica
„ ad rectè auspicandas vulgarium morborum curationes, ra-
„ rò tamen illa sufficere comperiuntur ad has absolvendas,
„ quin ulteriùs ad plures dies epicraticis subductoriis sit di-
„ micandum ob majorem, crudiolemque hâc tempestate
„ materiæ heterogeneæ congestionem, altiolemque inhæren-
„ tiam. Intereà valdè miror quòd præcepta isthæc Hippo-
„ cratica rationi omninò consona, atque per secula tantoperè
„ venerata, nostris hisce temporibus flocci fiant, imò in-
„ culta prætereantur. Post innumera experimenta quot-
„ annis feliciter habita circa morbos æstivos, & autumnæ-
„ les jam possum constanter asserere nullam invenisse dubitan-
„ di causam super allatâ methodo medendi per superiora.
„ Repeto tamen in adhibendis emeticis me nunquam fuisse
„ nimium, sed maluisse quâ datâ indicatione moderatam
„ repetere dosim, quàm validiorem audacter tentare.

„ 69. Neque sicco pede prætereundæ omninò sunt super-
„ stitiosæ quorundam urbanorum hominum opiniones, af-
„ ferentium primitùs: emetica esse summa remedia, haud
„ propinanda, nisi in summo morbo, summâ necessitate,
„ sum-

„ summoque vitæ periculo, quando nempè cætera non suf-
 „ fecerint. Secundò: non convenire valida hujusmodi præ-
 „ sidia civilibus delicatisque personis, ast tantummodò ro-
 „ bustis athleticis, nervosisque plebeis rudem vivendi normam
 „ servantibus; hinc familiaria hæc haberi in militum contu-
 „ berniis, in xenodochiis, & pauperum tuguriis. Tertio:
 „ Medicos emeticorum fautores, illos potissimum, qui li-
 „ beram praxim longè, latèque professi sunt in suburbiis, &
 „ oppidis, ablegandos esse ab urbium pomœriis, quòd vide-
 „ licet morbos, & medelam urbanæ gentis indigenam non
 „ calleant.

„ Objectionibus, five potius objurgationibus adductis ref-
 „ posum daturus, in primis non diffiteor emetica esse qui-
 „ dem remedia generosa, non tamen indiscriminatim; va-
 „ riæ etenim dantur eorum classes, & cathegoriæ, in qua-
 „ rum delectu potest Medicus pro re natâ rationem habere
 „ ad ægroti idio-syncrasiam, materiæ morbificæ conditionem,
 „ quantitatem, & inhærentiam, nec non ad morbi magni-
 „ tudinem. Hinc aliquando solos haustus aquæ tepidiusculæ
 „ simplicis, vel mixtæ cum oleis, aut syrupis imperabit; ali-
 „ quando radicem, vel folia asari pulverisata, aut infusa;
 „ nunc radicem ipecacuanhæ; aliàs salem vitrioli, gum-
 „ mi guttæ &c. præscribet; nonnunquam decoctum folior.
 „ nicotianæ, elleborum, aliaque hujus generis sat valida.
 „ Præ cæteris autem antimonialia apud vulgus æstimantur po-
 „ tentissima, cum vel ipso nomine terrorem inducant. & re-
 „ verà si isthec minùs ritè sint præparata, vel congruam ex-
 „ cedant dosim, vim sanè maximam inferre solent. Ob eam
 „ rem haud satis fidendum iis est, quæ in substantiâ ad gra-
 „ na duntaxat præscribi solent, uti sunt tartarum emeticum,
 „ mercurius vitæ, vitrum, hepar, crocus antim. aliaque hu-
 „ jusmodi; cum etenim minima esse debeat eorum quanti-
 „ tas ad ritè operandum, v. g. à granis iij ad vi circiter,
 „ non erit minimus error, si qui fiat in excessu. Præterquàm
 „ quòd

„ quòd ab unaquâque præparatione semper aliqualis emer-
 „ git in præparato disparitas quo ad energiam , quæ medi-
 „ cum etiam cautum potest decipere, ut ut familiarem, at-
 „ que probatam authoris cujuscpiam descriptionem signatè im-
 „ ploret, quando præscribit. Si verò eorum tincturæ, aut
 „ infusa, qualia sunt vinum emeticum, & aqua benedicta Ru-
 „ landi adhibeantur, quorum dosis ab $\mathfrak{z}\mathfrak{ss}$ vel $\mathfrak{z}\mathfrak{j}$ adusque
 „ $\mathfrak{z}\mathfrak{iiij}$ extendi potest, non ita facilè errare continget medico
 „ experto, cùm possit ea vel sola, vel aliis commixta præ-
 „ scribere juxta ægroti dispositionem, & morbi exigentiam;
 „ Quòd si inter agendum aliquando excedant modum, anti-
 „ doto ex paregoricis, & cardiacis desumpto sistuntur fa-
 „ cillimè, ut jam notavimus experienciâ dictante; adeoque
 „ non malè tuta sunt, uti minùs peritis videntur.

„ Sæpè vomendi conatus laboriosi, & divellentes contin-
 „ gunt ob fluidi laxantis defectum; quare inter vomitiones,
 „ ut alibi monebam, exhibere expedit haustus decocti emol-
 „ lientis infusi, saltem aquæ tepidæ, ut proritantium par-
 „ ticularum spicula sensim leniantur, atque humorum ab eis-
 „ dem provocatorum, bilis potissimùm, acrimonia per vi-
 „ ces demulceatur, & diluatur; nec non stomachici villi
 „ aptè laxentur, ut possint cum minori incommodo, &
 „ majori excretorum copiâ stimulis obtemperare. Cavendum
 „ insuper, ne roborantia, vel paregorica, vel narcotica præ-
 „ properè adhibeantur, antequàm recrementa à primis viis,
 „ & viscerum ductibus accersita, sufficienter ejecta videantur,
 „ dummodò virium, & animi robur cunctationem permit-
 „ tat. Post tepidos haustus vomitionibus interpositos, post-
 „ que laudabilem humorum depletionem propinanda adhuc
 „ est sub finem aqua magis calida, ut viscidum phlegma re-
 „ siduum, acri bile intinctum, è ventriculi, atque intesti-
 „ norum parietibus abstergatur, & omnis vomendi prorita-
 „ tio imposterùm deleatur. Hoc medio vomitiones absque
 „ labore feliciter absolutas pro voto impetramus, nullâ ple-
 „

Vuuu

,,rumque

„ rumque roborantium subsequente occasione. Methodum
 „ hanc vel inter Praxeos meæ primordia ab expertissimo Coo-
 „ traditam accepi *lib. 2. de morbis vulg.* hoc laconismo :
 „ *“ Vomitum sedat calida in potu adhibita, & vomitione rejecta ”*;
 „ Jamque innumeris confirmatam experimentis candidè propala-
 „ re non pertimesco.

„ Quòd emetica in summa tantùm necessitate, atque extremis
 „ morbis sint imploranda; respondeo falsam esse, & detesta-
 „ bilem sententiam; nam quando dantur hæ summæ neces-
 „ sitates, atque extremi morbi, jam ægri vires vel sunt at-
 „ tritæ, vel oppressæ; si sint attritæ, nullimodè admittunt
 „ vomitoria, vixque dejectoria; si verò oppressæ, possunt
 „ quandoque eorum actione relevari, ast sæpè sæpiùs ultrò
 „ pessundari; Hinc est quòd antimonialia emetica hisce mor-
 „ bi periodis adhibita dicuntur remedia periculosæ nimium
 „ alexæ. Si autem temporius administrantur, dum nempè
 „ viget insitus solidorum tonus, & naturæ operantis vir-
 „ tus, ad miraculum prodesse quotidianâ docemur experi-
 „ entia.

„ Ad secundam; quòd nempè vomitoria non convenient
 „ delicatis subjectis, sed robustioribus athleticis, atque ple-
 „ beis, respondeo errorem esse non levioris momenti; quan-
 „ doquidem strigosæ exercitatorum, atque agricolarum fi-
 „ bræ tam membranosæ, aut nerveæ, quàm carnosæ, aut
 „ musculares non nisi post maximam resistantiam in antipe-
 „ ristalticam vomendi actionem inflectuntur; ideò nec nisi
 „ in summa necessitate urgeri debent, & laceffiri, quin oleo-
 „ sis, ac diluentibus fuerint antea emollitæ. Hinc majus sæ-
 „ pè commodum iisdem accessisse animadverti ex epotâ se-
 „ milibrâ olei olivarum (ut mos est apud ruricolos) vel bu-
 „ tyri recentis & eliquari, quàm ex quovis dato stimulante
 „ præsidio emetico, vel subductorio. è converso stomachici
 „ delicatiorum villi molliusculi, magisque flexiles, saltem mi-
 „ nus rigidi titillationibus emeticis non adeò reluctantur, ast
 citius


„ citiùs obtemperant , & leviori negotio antagonistas supe-
 „ rant resistantias. Insuper plebei rudioribus , simplicioribus-
 „ que alimentis frugaliter victitantes minorem bilis copiam
 „ sensim congerunt , ideò non ita facilè ejusdem exundantiis
 „ gravantur. Nobiles verò opiparè viventes lautis dapibus,
 „ sapidis , pinguibus , & multigenis biliferum penus notabi-
 „ liter augere assolent , unde orgasmos ineunt , sæpè chole-
 „ ricos per superiora evocandos. Non tamen inficiabor dari
 „ quoque in agricolis quibusdam nidorosos sæpè apparatus
 „ per æstatem , & autumnum ob immodicas exercitationes,
 „ improbosque labores , queis chyloseos , vel biliariæ secre-
 „ tionis opificium alteratur ; magis adhuc ob comestionem
 „ carniū salitarum , leguminum , aliorumque eduliorum
 „ oleis incongruis , vel lardo conditorum , addito fructuum
 „ horæorum abusu , & similium , quæ omnia , ut dicebam ni-
 „ dorosas in primis viis cacochimias solent congerere , lau-
 „ datis emeticis sine mora oblitterandas , dummodò non ob-
 „ stet insuperabilis ad vomendum difficultas , quam , cæteris
 „ paribus , majorem semper observavi in robustis , quàm in
 „ delicatulis ; Hæc autem positâ ad cathartica confugiendum.
 „ Ad tertiam : quòd videlicet medici emeticorum fautores
 „ (hi potissimùm , qui praxim suam diutissimè extra conspi-
 „ cuas urbes liberè coluerunt , non ægrotis morem geren-
 „ do , sed quotidianas observationes , atque Hippocratis mo-
 „ nita auscultando) ignorent methodum medendi nobiliores
 „ personas : negatur suppositum , cùm credant adversarii nul-
 „ lum dari subjectum verè delicatum extra urbium mœnia ,
 „ vel nullum rationalem medicum emeticis utentem in ur-
 „ bibus , dum ipse plurimos recensere possem præclarissimos
 „ viros nobilissimos , atque matronas delicatissimas his præsi-
 „ diis fausto semper omine à me tractatos in urbe , & ex-
 „ tra urbem , quando morbus , vel morbi causa id remedii
 „ genus expostulabat. Nec desunt Professores Hippocratici
 „ famigeratissimi in civitatibus celeberrimis , qui ab emeticis

„ quâ datâ occasione non abhorrent, panicum excutientes ter-
 „ rorem, etiam quando de Principum vitâ tuendâ contenditur.
 „ Verùm enim verò in hac medendi aleâ, uti etiam in reli-
 „ quis solemnioribus remediis ritè administrandis, semper est
 „ necessaria versati Clinici prudentia, non audacia, non timor.
 „ Addam postremò veram medendi praxim rationalem
 „ non aliundè haberi, quàm à multiplicatis, atque interstin-
 „ ctis ægritudinum remediorumque observationibus, neque
 „ has ullo modo obtineri, nisi per liberam medendi facul-
 „ tatem, plurimos invisendo cujuscunque conditionis ægro-
 „ tos ubique loci, per annos successivè plures, habitâ ratio-
 „ ne ad temporum vicissitudines, vitæ genus, victusque re-
 „ gimen &c. “ *Quare Celsus lib. 1. inquit: Quantum in vivis*
 „ *cognosci potest ipsa curatio ostendat. Verumque est ad ipsam cu-*
 „ *randi rationem nihil plus conferre, quàm experientiam.* „
 „ Vereor itaque ne medentes urbanissimi, nobiliorum gratiam
 „ aucupantes, eorumque geniis obsequentes, illi, inquam,
 „ qui longè à Xenodochiis, militum contuberniis, & pau-
 „ perum tuguriis versati sunt, Hippocraticæ praxeos jejuni
 „ consenescant. Non etenim auratos sibi delegit experientia
 „ toros, ut assideret docens, sed pauperum lectulos; Hinc
 „ scitè repetit præfatus Celsus lib. 1. “ *Nemo in splendida per-*
 „ *sonâ periclitari conjecturâ suâ voluerit: ne occidisse, nisi ser-*
 „ *vasset, videretur.* „ Quòd si nihilominus delicati, & me-
 „ ticulosi hujusmodi nobiles adversarii allatis rationibus non
 „ acquiescunt, audiant, precor, nec ignorent adagium, quod
 „ de ipsis circumfertur: “ *Vivunt ut volunt; curantur ut ju-*
 „ *bent; moriuntur ut debent.* „

„ 70. Sed jam prolixior est sermo, quàm deceat episto-
 „ licam dissertationem: ne ideò proritandæ potius, quàm
 „ castigandæ bili videar consuluisse, lubens manum auferam,
 „ & filebo; dum nominis tui, quod ubique cluet recanendis
 „ plausibus, tuæque extollendis sapientiæ præconiis, se rotam
 „ præbet orbis eloquentia. Vale Subalpinorum decus æternum.

strambini in Salassiorum Provinciâ, pridie Kal. Junii 1719.

EPI



EPIDEMICÆ BILIOSÆ CONSTITUTIONES,

Annorum 1711, 1712, 1713, 1714, 1715, 1716, 1717,
1718, 1719, 1720, 1721, 1722, 1723.

*Exactè autem tenere oportet propriam cujusque temporum
anni conditionem, & statum, morbumque ipsum, &
quidnam boni commune sit constitutioni cum morbo,
quidnam & mali constitutio, aut morbus inter se com-
mune habeat. Et quisnam morbus diuturnus sit, &
exitium afferat, aut quisnam diuturnus, & ex quo
agri evadunt. Et quisnam præcept, & exitialis,
aut quisnam præcept, & salutaris. Hippocr. de
Morb. vulg.*

JOANNES THOMAS L. GUIDETUS,
LECTURIS.

INter assidua praxeos exercitia ad rem medicam augen-
dam spectantia placuit consultissimo, & oculatissimo D.
Bianchi tempestatum habitudines, morbosque ab illis pro-
motos, Post primam Hepaticæ Historiæ editionem, seu ab
anno 1711, singulis annis contemplari, atque diariis anno-

Vuuu 3 tare,

tare, & custodire, more Veterum optimatum, ut præternaturales humorum redundantias, vel alterationes per suas causas depromeret, monente Hippocrate de humoribus: *Humores quibus anni temporibus efflorescant noscere oportet, & quales in singulis morbos efficiant, & quasnam in unoquoque morbo affectiones pariant.* Hoc inquam utile institutum prosequutus indefessus atque Illustrissimus Vir, vulgares morbos plurimum annorum disjunctis schedulis adumbravit, in primis epidemicam constitutionem Biliarem anni 1718, quam super cæteras Observationibus refertissimam peculiari quâdam, concinnâque capitum serie distribuere novissimæque editioni Historiæ Hepaticæ præcipuam & ampliorem attexere decreverat: Hanc tamen in pluteis adhuc indigestam, conficere ad hos dies neutiquam potuit, gravioribus certè curis distractus, atque districtus, præcipuè à solempni illo novæ in humanum corpus ostendendum Methodi invento, quod his diebus tanto omnium hominum applausu, tantâque litteratorum utilitate in publico Anatomico cursu feliciter tandem aperuit. Per id temporis ego dignis adductus causis ab Eporodiensi provincia in hanc Taurinorum Augustam migravi; quare datâ consuetudinis opportunitate amicissimus Doctor publicis, privatisque rebus anatomicis, & practicis graviter, jugiterque vacans, Schedas suas Biliambus epidemiis aspersas ab anno 1711. adusque novissimè elapsam 1723. mihi familiariter communicabat, & pro illâ, quæ nos à pubertate devinxit, necessitudine hortabatur, ut eas historico stylo in ordinem revocando, deinceps succisivis horis conscriberem. Exiguum hocce amoris symbolum præclarissimo Viro detrectare non debui: tēdebat intereà pretiosa isthæc nobilioris Operis prælibamina rudi meâ, incomptâque minervâ exarare; cūm maximè haud me lateat, quantum pudoris aucupaverim in præhabita dissertatione, cujus numeros innumeris erroribus scatentes antehac typis editos, atque doctissimis cl. Authoris nostri commentariis interpositos, non sine

mœro-

mœrore perspicio. Quòd si nullam de illis veniam sperare mihi licet, saltem liceat, humanissimi Lectores, de novissimorum obtinenda confidere, si Epidemicas hujusmodi historias expositurus ab Authoris instituto, & observationibus ne hilum recessero, quemadmodum fideli calamo me facturum polliceor. Dum itaque hirsutos nævos passim offendere vobis obtinget, hos meos esse recognoscite, atque ignoscite. Utiles verò animadversiones Authoris sunt. *Manus quidem sunt Esau, Vox autem Jacob.* Dabam Taurini Kal. Febr. 1724.

INTRODUCTIO AD CONSTITUTIONES EPIDEMICAS.

POpularibus morbis nihil est familiarius, sed & iisdem nil magis incultum. Ferè quotannis grassantur, & per intervalla recrudescunt variis aspectibus ludentes juxta varias caussarum, regionum, & incolarum conditiones, ac temporum vicissitudines; Medici intereà sat arti prospectum existimant si monuerint verno tempore sporadicos excitari morbos, estate, & autumno epidemicos ad hyemem deferrentes. Vix ideò de eorum principiis, & successuum causis, nihil de eisdem præcavendis solliciti, accuratiorem spernunt indaginem. Fugit hos aureum Hippocratis seculum, quo vulgares ægritudines, etiam pestilenciales obviæ arcebantur, vigentes delebantur. Hypothesi locum cessit observatio, confusio hypothesis; & dum de internis, atque abditioribus morborum causis, quas nemo unquam attinget, disceptatur, generales magisque perviæ negliguntur. Causæ in hominum labem potissimum conspirantes externæ sunt; ex his excitantur internæ innuente Hippocrate lib. de morbis: *Morbi oriuntur partim quidem ex his, quæ in corpore insunt pituita, & bile, partim verò ex his, quæ extrà obveniunt laboribus, & vulneribus, quin & à calido supra modum calefaciente,*

lesfaciente, à frigido supra modum refrigerante, & sicco plus æquo siccante, & humido plus æquo humectante. Idem repetit libr. de Affect. Bilis, & pituita morbos excitant cum in corpore supra modum vel resiccantur, vel humectantur, vel incalescunt, vel refrigerantur. Hæc verò pituita, & bili contingunt ex cibis, & potibus, laboribus, vulneribus, odoratu, auditu, visu, rebus venereis, calore, frigore.

Missis jam ad Chirurgorum praxim vulnerum morbis, salacibusque relictis, ut sibi ipsis religiosè consulant, quis effluviis per aëra volitantium qualitates à magno Sene per odoratum indicatas, vibrationes per auditum, spectra, & luminarium phasas per visum indigitata perpendit? quis, inquam, inordinatas frigoris, & caloris intensiones, tempestatum mutationes ventorumque afflatus internoscere didicit ad firmandas pathologicas disquisitiones? Non satis est medico curiosè perquirere solidis ne, an fluidis morborum impressiones contingant, sed ultrò inquirendum unde, & quomodo eadem habeant determinari.

Ad artis sacraria nobis est redeundum, Doctores practici, quibus vita hominum demandatur. Illinc genuinæ morborum origines repetendæ, ut eisdem avertendis aut emendandis reluceant Hippocratici dies.

Quæ in primis ad res hominis naturales, vel morbidas faciunt docente optimo Coo sunt Regionum positiones, ventorum mutationes, & tempestatum transmutationes, annique conditiones. lib. 3. de vict. rat. Quodve attinet ad morbos ex tempestatum vicibus, vel peculiari earundem constitutione dependentes præfatus Senex lib. de Aëre, locis & aquis hæc habet: Si hyems quidem sicca, & aquilonia, ver autem pluvium, & austrinum fuerit, æstatem febribus abundare, & lippitudines inducere necesse est. Inde rationem adducit: ac siquidem sub canicula exortum aqua, & hiberna tempestas supervenerit, etesiaque spiraverint, quietis spes est autumnum salubrem fore. Alioqui periculum est ne pueri, & mulieres moriantur, minimè verò

verò senes, aut ne qui evaserint in quartanas tandem incidant, & ex quartanis in aquam inter cutem. At si hyems quidem austrina, pluviosa, & placida fuerit; verò verò aquilonium, siccum, & tempestosum, primum quidem mulieres, quæ prægnantes extiterint, & quibus partus in ver imminet abortionem facturas est verisimile; quæ verò etiam pepererint adeò imbecillos, ac morbosos fœtus parituras, ut aut statim pereant, aut tenues, debiles, & valetudinarii vivant. Atque hæc quidem mulieribus, reliquis verò intestinorum difficultates, & lippitudines siccæ, nonnullisque defluxiones à capite in pulmonem. Si verò æstas pluviosa fuerit, & austrina, & autumnus similiter, morbosam esse hyemem necesse est, iisque, qui pituitâ abundant, & quadragesimum annum exceßerunt, febres arden-tes contingere æquum est, biliosis verò morbos laterales, & pulmonum inflammationes. At si æstas sicca, & aquilonia fuerit, autumnus verò pluvius, & austrinus sub hyemem capitis dolores, & cerebri syderationes fieri par est, ac præterea raucedines, gravædines, & tusses, & nonnullis quoque tabes. Quod si aquilonius, & siccus fuerit autumnus, ac neque sub canem, neque sub arcturum pluviosus pituitosis quidem, præcipueque naturâ humidis, & mulieribus confert, biliosis verò hoc est maximè adversum. Admodum enim resiccantur, iisque lippitudines aridæ contingunt, & febres acutæ, ac diuturnæ, quibusdam etiam melancholiæ. In bile namque quidquid est humidissimum, & aquosissimum consumitur, quod verò crassissimum, & acerrimum remanet, quod in sanguine eadem quoque ratione accidit, unde hi morbi illis contingunt.

Monet Hippocrates epidemicas ægritudines variis per anni tempora aëris affectionibus primitus imputandas esse, non cibo, non potui, non exercitationibus, aliisve causis huiusmodi inter non naturales similiter adscriptis, quæ cæteroqui suum ad suscipiendas atmosphæræ injurias symbolum conferre valent. Ubi complures uno morbo eadem tempestate vexantur in id, quod maximè commune est, quove omnes utimur

Xxxx

potif-

potissimum rejicienda causa est. Id autem est, quod in spirando trahimus. Quod enim vivendi cujusque nostrum ratio in causa non sit, jam liquido constat, cum morbus omnes continenter attingat, & juvenes, & senes, & mulieres, & viros, proindeque temulentos, & abstemios, tam eos, qui mazâ, quam qui pane victitant, & eos, qui multis, quam qui paucis exercitationibus utuntur. Non igitur victus rationi assignanda causa est, cum cujusvis generis victu utentes eodem morbo corripiantur.

Quod autem rei caput est Hippocrates per varias etiam ventorum, aut pluviarum habitudines in quibusdam tempestatum cardinibus, tum syderum quorundam exortu, & occasu iteratis præceptis sparsim positus futuros, vel non futuros deinceps populares morbos per anni tempora prænunciare, eisque idcirco opportunè prospicere docet: De annis autem hoc modo consideratione adhibitâ quis statuât qualisnam annus futurus sit, numne salubris, an morbosus. Siquidem secundum rationem in syderum ortu, & occasu signa appareant, si per autumnum pluat, & hyems sit moderata, neque admodum blanda, neque præter modum frigida; & vere ac æstate aquæ tempestivæ eveniant, sic annum saluberrimum esse, consentaneum est. De aëre, loc. & aq.

Superius etiam addiderat: „qui temporum mutationes, astorumque ortus, & obitus, ut horum quæque eveniant, tenuerit, is utique futurum anni statum prævidere poterit. „ In genere autem, ad libri principium: „ Qui artem medicam rectâ investigatione consequi volet, is primum quidem anni tempora in considerationem adhibere debet, quid horum quodque possit: neque enim quidquam habent simile, sed cum inter se plurimum differunt, tum etiam propter varias, quæ in eis contingunt mutationes. Deinde verò ventos tum calidos, tum frigidos, præcipuè eos, qui omnibus sunt communes, ac deinceps eos, qui cuique regioni sunt familiares.... Qui verò ista rectè cognoverit, is cujusque temporis impendentis, & anni statum præ-

„ prædicere poterit , & quinam morbi tam æstate , quàm
 „ hyeme in urbe communiter sint grassaturi. „

Imò nec perspectis peregrini aëris , seu ventorum rationi-
 bus , aut influentiis ex solis tempestatum vicibus , statuque
 aëris per easdem duntaxat immutato , humores diversimodè
 ad delinquendum dispositos interstinguit , unde communes
 morbos enascituros indigitat : “ Per hyemem verò augetur
 „ in homine pituita quòd autem hyeme corpus pituitâ
 „ repleatur , hinc constat quòd per hyemem homines maxi-
 „ mè pituitosa tum expuunt , tum emungunt , hocque anni
 „ tempore præcipuè tumores laxi , & albi , & reliqui mor-
 „ bi pituitosi oriuntur. At vere adhuc quidem in corpore
 „ viget pituita , sed sanguis increfcit , quòd & frigora re-
 „ mittant , & imbres succedant. Tuncque sanguis augetur
 „ tum ex imbris , tum ex dierum calore. Æstate verò san-
 „ guis adhuc viget , & bilis in corpore attollitur , & in au-
 „ tumnum protenditur. At per autumnum modicus quidem
 „ sanguis gignitur , quòd illius naturæ autumnus adversatur.
 „ Bilis autem æstate , & autumno in corpore obtinet. quod
 „ his indiciis cognoscas , cùm hac tempestate homines suâ
 „ sponte bilem evomant , & per medicamentorum potiones
 „ biliosa repurgentur. Id quoque ex febribus , & hominum
 „ coloribus patet. ast ineunte hyeme bilis perfrigerata
 „ pauca gignitur , & pituita rursus augetur Cùm igitur
 „ hæc ita se habeant , oportet morbos , qui hyeme augen-
 „ tur , æstate desinere , & eos , qui æstate increfcunt , hye-
 „ me cessare , nisi intra certum dierum circuitum solvan-
 „ tur morborum verò , qui vere oriuntur liberatio ad au-
 „ tumnum expectanda est , & autumnalium morborum dis-
 „ cessum vere fieri necesse est. Quòd si quis hæc anni tem-
 „ pora morbus superaverit hunc annum fore sciendum est.
 „ Atque ita medicum morbis mederi convenit , adhibitâ ho-
 „ rum cujusque consideratione. Quod in corpore prævalet
 „ pro anni temporis ratione &c: „ *De natura hominis.*

Sunt & alia per libros Hippocratis loca quamplurima, quæ bilem ob ventorum potestates tempestatibus familiares, vel adventitias delinquentem, morborum in genere, præcipuè febrilium parentem accusant. Alia non pauca affectiones peculiare ex bile progenitas enunciantia per praxim hanc sæpiùs referuntur. Nunc textus unicus instar omnium vota nostra confirmet, qui librum de Natura hominis concludit:

„ Febres magna ex parte ex bile oriuntur, quarum genera
 „ sunt quatuor, præter eas, quæ dolores eximios comitan-
 „ tur. Earum autem nomina sunt Continens, Quotidiana,
 „ Tertiana, & Quartana. Quæ continens appellatur ex co-
 „ piosissima, & meracissima bile provenit, & per quam bre-
 „ vi judicatur: Corpus namque vehementi calore incales-
 „ cens, neque unquam refrigerescens celeriter colliquescit.
 „ Quotidiana secundum continentem ex plurima bile ortum
 „ habet, & præ aliis citissimè liberat, at Continente eò lon-
 „ gior, quò ex pauciore bile provenit, quòdque in ea cor-
 „ pus quietem habet, quod in Continente nullo unquam
 „ tempore quiescit. Tertiana verò quotidianâ longior, & à
 „ pauciore bile fit, quò que diutius in ea, quàm in quoti-
 „ diana corpus quiescit, eò diuturnior hæc febris est, quàm
 „ quotidiana. At quartanæ in reliquis eandem rationem ob-
 „ tinent, sed tertianis tantò longiores sunt, quantò minùs
 „ bilis calorem exhibentis obtinent, tum quia in his corpus
 „ liberaliùs refrigeratur, iisque ab atrabile is cumulus acce-
 „ dit, ut non nisi ægrè depelli possint. Bilis enim eorum
 „ omnium, quæ in corpore insunt, cum sit glutinosissima,
 „ maximè diuturnas stationes facit.

Hæc itaque magni Senis oracula, quæ praxis quotidiana post tot secula confirmat, in annorum constitutionibus, quas evulgare ratus sum, tamquam prolegomena, imò totius operis archetypos mihi vertenda decrevi; ut ideò exactè transcripserim; tanta licèt prolixitas in citatis operibus hodierno scri-

scribendi stylo haud consentanea videatur. Sed quosnam his utiliores codices in praxim advocarem?

Sed quoniam biliosas duntaxat epidemias exarare statuimus, ideò prætermisissis hyemalibus morbis, qui à pituita originem ducunt (non tamen omisissis brumalibus præcursionibus, quatenus in succedentes influunt tempestates) à vernis constitutionibus, & morbis auspicabimur, ad æstivos progrediendo, & autumnales, quibus reverà biliosæ ægritudines, diætante Hippocrate fiunt, gliscunt, & diversimodè ludunt. Speramus intereà lucubrationes has, quæ biliales morbos principaliter tradunt, & praxim non contemnendam Clinicis exhibent, perutiles fore quibusvis Apollineæ facultatis studiosis, atque medentibus, maximè quia ne dum nostris, atque amicorum fidis observationibus innituntur, sed etiam Hippocraticis expositionibus ad amussim respondent.

CONSTITUTIO ANNI 1711.

HYems ante solstitium frigida, post solstitium frigidior, & nivosa huic anno prælusit. Ver aquilonium fuit, & pluviosum; æstas succedens humida, & vix non frigida; hinc constitutio ejus sub cane, & ante canem temperata imbribus frequenter decidentibus. Vigebant per æstatem febres intermittentes vix ullæ, hæque irregulares, & spurix, cæterum mitissimæ, rigoribus, atque æstuationibus solito remissioribus stipatæ; Febres continuæ familiares magis, eæque potius continentes videbantur cum mitioribus symptomatibus. Sitis, vomitus, anxietates, dolores capitis, jactationes, fervores, oris amaritudo, vel nidor, aliaque æstivarum febrium satellitia ab hisce omnibus ferè exulabant. Autumno perraræ quoque exquisitæ intermittentes, quæ præcipuè regulares periodos ducerent, visæ sunt. Rarissimæ ideò quartanæ. Febres tertianæ duplices inordinatæ non verè intermittentes, sed remittentes, sive subintrantes continuæ prima-

tum obtinebant, & stationariam autumnalium indolem ostendebant per distinctos circuitus, rigores, æstuationes, & sudores periodicos quotidie reperentes. Ad curationem cathartica optimè instituta cum pallidis biliosorum excretionibus summè erat proficua, & interpositis alterantibus iterata febrilem commotionem sedabat. Phlebotomiâ, & febrifugis vix opus fuit. Hinc deducendum febres hujus constitutionis fomitrem suum traxisse à bile adhuc fluidâ, & solutâ, nec tam facilè à paroxysmalibus coctionibus in específicas moles congestâ, idèòque nec levi negotio à reliquis humoribus criticè separabili, utpotè à leni æstatis fervore non coctâ, vel coactâ, seu in densioris compositionis cohæsiones adactâ, neque ad secretionum vias aggestâ, prout è converso in sequentibus, atque oppositis annorum constitutionibus facile est animadvertere.

CONSTITUTIO ANNI 1712.

PRincipium hyemis ante, & post solstitium jugiter nubilum fuit, & frigidum. Ad januarii principium nebulæ adhuc conturnaces in tenuem pluviam liquecebant, & statim inter morbos catarrhales varios, putà tusses, raucedines, & ptyalismos irrepere febres frequenter soporosæ proVectis æquè, ac juvenibus infensæ cum frigido ad caput decubitu, quem febris quidem imminuta prosequabatur. Ægri interim lentè moriebantur, vel comatosi, vel cataleptici, vel aphorici. Plurimi ante obitum convulsionibus torquebantur.

Ver summè pluviosum, & humidum usque ad æstivum solstitium perrexit, exinde verò æstas fervidissima fuit, & *calido latravit Sirius astro.*

Interea per illius, & autumnus decursum civicarum febrium copia defecit, earumque vices expleverunt creberrimæ diarrhœæ, & dysenterix. Soli milites in castris, coloni in agris, & artifices sub dio laborantes, ut fabri murarii æstivis

vis fervoribus assiduè expositi febres per autumnum passi sunt intermittentes. Enim verò per longam veris humectationem diluta bilis ad torridam illam, viscidamque conditionem, quæ febribus producendis intermittentibus apta nata est adduci per æstivos, quicumque fuerint, fervores haud potuit in civibus placidè viventibus, potuit tamen in cæteris sub dio versatis. Nec tamen insens omnino fuit urbanis viris æstus vigens, nam irritatæ, & fluorem adeptæ salinæ bilis particulæ, atque ad alvinas vias devolutæ, excretionum profluvia, vel intestinorum difficultates attulerunt; quòd autem morborum quorundam æstivorum, vel autumnalium originem aliquando bilis salibus, non integræ substantiæ tribuere videamur, non hinc animus est vitium biliosi recrementi quæ talis prætermittere; cum non possit alterari præter naturam pars ulla ex componentibus bilem, quin bilis ipsa morbosa evadat. Nec assentiri possumus modernis Hypotheticis, qui non modò humorum specialiter peccantium nomina obliterare, sed & Humoristarum sententias proscribere toto contendunt nervo. A verâ praxi, atque à veris medicinæ Parentibus discedere pro aucupandâ novatoris gloriolâ, piaculum esto. Morbi omnes, de quibus agere nostrum fuit institutum bilem vitiatam ubique redolent sub variis tamen respectibus; bile etenim per corpus vagante, aut vigente, vagantur, aut vigent hujusmodi ægritudines; depulsâ, vel correctâ cedunt illicò. Earundem crises spontaneæ, vel artificiales, perfectæ, vel imperfectæ per urinam, per alvum, per vomitum, per ipsamet sputa, & sudores interdum merè biliosæ exeruntur; symptomata itidem ferociora temperantibus, & anodynis obsistentia persæpè vomitu, vel secessu bilioso sedantur. His autem obiter delibatis è divericulo redeamus in viam.

Præfati itaque morbi verè biliosi per hujus anni æstatem, & autumnum, qui ficcus notabiliter fuit, idest per totum octobrem viguere. Successit november borealis, & frigidus,
sub

sub finem varius ob astrorum , & aquilonum alternos afflatus , queis aër ad principium decembris valdè inæqualis thermometra per horas diei in ascensum , & descensum sæpius urgebat. Hinc epidemia rheumatica inæqualiter , sed celeriter per totam Italiam , & ultrà protendebatur simillima ei , quæ anno 1709. desæviera , saltem quo ad naturam , & invadendi modum , levior tamen , & brevior ; nam ad decembris medietatem invalescens , eodem finiente suum attingit apicem. Notatu dignum est quod observabamus die 25. ejusdem mensis Dominicæ nativitati sacro : ante Solis ortum aër tepidus erat , ad ejus ortum rigidus flante boreâ ad usque horam nonam horologii Gallici ; mox australis per horas duas , & dimidiam ; rursus borealis per horam ; iterum australis usque ad primas tenebras , iterumque per noctem gelidus. Hac inquam die quicunque libero aëri se se indiscriminatim commiserunt quibuslibet horis , præsertim vespertinis , raucedinem extemplò inierunt cum tussi , & ardore tracheæ ; permulti sævioribus gravabantur catarrhis , ita ut sequente mane quinquaginta , & ultrà homines mihi cognitos dirâ hac invasione vespertinâ repentè correptos sciverim , qui antehac optimâ fruebantur valetudine. In epidemiæ primordiis multi egrotabant , pauci verò interibant , morbo simplicem rheumatis conditionem haud excedente ; In progressu , & statu penitiores supremi , & medii ventris partes invasit affectio , hinc ferè lethalis. In declinatione constitutionis perpauca ægrotabant , sed ut plurimum ante septimam vitâ periclitabantur ob gravem ad interiora decubitum.

CONSTITUTIO ANNI 1713.

PEractâ aquilonum vicissitudine humidus vigeat æqualiter , & temperatus austrorum afflatus mense januario cum nivibus constanter per dies aliquot decidentibus ; Hinc morbida prægressi anni constitutio mitescebat. Nonnulli attamen,
præ-

præsertim senes , & phlegmatici , vulgò *fluxionarii* , vel aliter valetudinarii adulto hoc mense , tum & februario per frigoris incrementum catarrhalibus orgasmis , interdum metastasi correpti supremum agebant diem , vel qui fortè evadabant longâ tenebantur tussi , aut arthriticâ affectione universali vel particulari , adeò ut uno die ad finem februarii sex ægroti repentinâ ischiade correpti consilium nostrum adierint. Nihil exinde memorabile ad hyemis finem observatum est , præter variolas , & morbillos non infausti ominis , ut ut siccâ , & violentâ tussi cum febre , vel ardente , & synochali , vel obscurè periodicâ angerentur affecti.

Ver æquè temperatum fuit absque ventorum altercationibus , & absque pluviis. Æstas inde sicca , & aquilonia; quare biliales morbi , tam universales quàm particulares filere visi sunt. Mixtæ potiùs affectiones emergebant lymphaticosanguineæ per æstatis decursum usque ad autumnii progressum. Hujusmodi erant gutturis destillationes , & phlogoses , tusses , pleuritides spurix , dolores potiùs intercostales , capitis gravitates , & dolores ; febres scarlatinæ , & purpureæ , aut aliter mixtæ , juxta ægrotantium ætatem , vel idiosyncrasiam. Itidem rheumatismi , & arthritides , præsertim ischiades. Genus etiam nervosum spasmodicis insultibus , inò & convulsionibusangebatur , præcipuè in collo ad originem spinalium. Ad profligandos hujusmodi morbos tempestati dissentaneos venæ sectio opportunè celebrata solenne erat præsidium , nec nos fallebat eventus , quandoquidem detractâ sanguinis congruâ quantitate facillè solvebantur lentores sanguineo-pituitosi , & ad debitas oscillationes restituebantur vasorum extensorum perimetra. Reverà bilis quemadmodum in humidioribus veris , vel æstatis , vel utriusque constitutionibus una cum frigore à borealibus deducto iners , & depressa jacet , nec vires exerit suas , ut hyeme observamus ; ita in humidis constitutionibus cum adjecto calore diluta tandem acuitur , & alteratæ pituitæ commixta mixtas similiter affe-

ctiones procreat; In sicca constitutione cum frigore, ut in hoc casu sæpè concentratur, & sub lympharum iusceptis affectibus latitat, vel leviter cum iisdem sociatur. In sicca demum, & calidâ, ut in describendâ anni 1718. per propriam virtutem excandescit.

CONSTITUTIO ANNI 1714.

B Rumales dies præcociter aquilonii, & rigidi extitère. Ver frigidum, siccum, & undequaque ventosum. Ideò creberrimæ fluxiones ad fauces, ad pectus, ad corporis habitum cum febre, & sine febre catarrhales. Ad aprilis principium biduo, vel triduo afflantibus intensis aquilonibus austrino spiritu vix interceptis peracutæ excitabantur pleuritides; illis silentibus cessabant & istæ. Medio Aprili iterum boreas recrudit sævior, iterumque pleuritides legitimæ frequentiores, & contumaciores, ita ut die 17. ejusdem quatuor unâ horâ pleuritici me ad curationem accerferint. Harum pleræque per sudorem judicabantur, etiam absque præviâ venæ sectione. Sudor, inquam, in earum principio spontaneus, quandiù particularis, vel interceptus scatebat, inutilis; in progressu autem continuus, copiosus, & universalis judicatorius fiebat quartâ, vel quintâ die. Per sputum vix ullæ judicabantur, fortasse propter summam in humoribus visciditatem ab aëris siccitate contractam. Rarò itidem solvebantur per venæ sectiones ut ut istæ desumptâ ab acutissimis symptomatibus indicatione repeterentur in pluribus usque ad septimam detractionem absque levamine, imò nec retardato pleuriticorum interitu. Harum pleræque solâ catharsi expugnabantur, eâque validâ ne dum ante septimam, sed quandoque ante quintam, aut quartam. Hâc ad miraculum levabantur ægroti: Fæces excernebantur cretaceo-biliosæ, & simul ardentes, argumento præclaro inductæ ab aëris siccitate in humoribus lentescentiâ. Cùm etenim verno tempore vi-

ven-

ventium fluida ad quamdam turgescientiam, five rarefactionem naturaliter promota majorem exigant in canalibus diametrum, & in cute perspirabilitatem, si fortè inter hos nifus utrâque frustrentur, reliquum est ut in oppositam consistentiam postliminio redigantur, & condensati, coactique humores, præsertim bilis majorem, quàm antea ad inhærendum visciditatem nanciscantur, & minorem ad iterum rarescendum aptitudinem, quid quid natura per excitatas commotiones, & febres, quid quid ars per detractas lanceolâ copias, vel implorata diaphoretica præsidia eorum attenuationem moliantur. Id unum ferè assequitur febris, ut inducâtâ viscidis, præsertim biliosis effervescentiâ acrimoniam augeat; id unum ars, ut dato in canalibus spatio, vel addito per diaphoretica humoribus acrefactis motu, major fiat à locis secretionis ad nobiliores partes impetus, præcipuè ad organa respirationis, quibus aër, ut suprâ frigidus, & siccus peculiarem attulit rigiditatem, nisi vel sponte, vel catharticiis adhibitis per alvinas vias deturbentur morbosa recrementa, in primis biliaria, quæ vel, primas vias obducendo, comprimunt præcordia, & pectoris affectionem idiopathicam augent, vel per ductus secretorios non eructata sympathicam confirmant, aut statuunt per anadromen, ut mox dicebamus. Optimo itaque consilio in morbi principio semel, aut iterum institutâ venæ sectione idiopathicæ affectioni occurrebatur, statimque per cathartica morbidus fomes delebatur. Quo facto evidenter levabantur ægroti, & ad septimam circiter criticis sudoribus judicabantur. Hoc ritu plurimi ab orci faucibus liberabantur.

Rarè visi sunt ejecti lumbrici, & quamvis per similes aliquando morbos sæpiùs excerni videantur, non ideò dicendi sunt causa pleuritidum, ut multi perperam hariolabantur, sed earundem socii, quippè his excretis non solvitur affectio pleuritica.

Cùm itaque epidemica hujusmodi constitutio ab intensâ

humorum crassitie, & ab notabili solidorum rigiditate proficisceretur, mitescere visa est advenientibus longis pluviis, queis humores dilui, solida laxari, & acria demulceri potuerunt. Æstas inde, & autumnus non valdè torridi fuisse, sed inæqualiter vel ad calidum, vel ad humidum deflectentes, hinc triplicis notæ morbi ex bilioso delicto emergere, scilicet primò febres intermittentes, secundò ardentes spurias, & tertio dysenterias, singulæ tamen haud nimis contumaces, ut conjicere fas sit ex flore bilis exaltato ardentes spurias, ex sedimento illius intermittentes, ex visciditate, & acrimonia Dysenterias fuisse productas. Primæ per unicam, vel alteram phlebotomiam, & consueta refrigerantia defervebant; Alteræ per corticem peruvianum cicurata filebant; postremæ velut criticæ paucis erant tractandæ, nam cum ægrorum tolerantia aliquandiu vigeant, suâque sponte terminabantur, vel usu ipecacuanhæ mox à cruenta effusione declinabant, & ulterius in diarrhœam migrantes salubriter desinebant.

CONSTITUTIO ANNI 1715.

Non ultra congruum, & climati nostro respondentem frigoris gradum excessit hyemalis constitutio hujus anni. Ver siccum fuit, & æqualiter temperatum, hinc tertianæ legitimæ typum exquisitè depuratorium servantes, benignæ ideo, & brevissimæ aprilem non prætergressæ. Devergente maio calor ingens austrorum flatibus succendebatur, ideoque tertianæ ab anteriorum indole deflectentes insurgent validæ, diuturnæ, nec remediis facillè cedentes. Inunte junio ventus spirabat frigidus, mox pleureses; angina, rheumatismi, genarum fluxiones, odontalgia, & catarrhi huic tempestati haud consentanei; quare jure meritò aptari potest Hippocratis observatio: *Cùm ver hybernium fuerit, & extrema hyemis frigora senserit, hyberni etiam morbi fient, & tusses, & pulmonum inflammationes, & angina.* De humoribus.

Sup-

Suppressio boreæ afflatu calor invaluit cum australibus ventis, similiterque tertianæ validiores, & contumaces cum assiduīs capitis doloribus, quēis phlebotomi lanceola feliciter prospiciebat. Per julium æstus major febres intensè biliosas in aliquibus periodicas, in aliis homotonas cum acuto capitis dolore, cutaneis efflorescentiis, vomitibus, aut diarrhœis biliosis fuscitavit, cæterum breviores rarò septimam, rarissimè decimam quartam excedentes unicâ sanguinis detractiōe, unâque catharsi curabiles. Inter has febres anomali quoque morbi ex pituitæ vitio bili commixto emergebant, quorum fortasse causa procatartica fuit prægressa junii frigida intemperies; hujusmodi erant gravativi capitis dolores, articulares cruciatus, odontalgia &c. Huc pertinere videtur Hippocratis doctrina de internis affectibus: *Cùm pituita, & bilis in corpore mixta fuerit in ventrem defluit, cùmque ibi coacervata fuerit attollitur, sursumque ac deorsum velut unda discurret, rigor, & febris prehendit, dolor ad caput decumbit, cùmque ad viscera pervenerit strangulatum adfert.*

Plurimi per hunc febrium decursum, præcipuè juvenes vividioris constitutionis, aut vinipotæ febre correpti enormibus deflagrationibus simul, & gravissimis virium prostrationibus prehendebantur cum biliosis exundationibus undequaque, nempe linguâ croceâ, urinis exquisitè croceis, croceo pariter extracti sanguinis sero immersos linteos flavedine inquinante, tandem & croceis dejectionibus; hinc faciliè post unam, aut alteram catharsim in criticos, saturatosque icteros migrabant, qui sensim evanescebant cum febre ipsâ post aliquot imminutos accessus finiente. Alii post aliquot intermittētis tertianæ, vel duplicis paroxysmos cum dolore acuto, & pulsante ad oculorum radicem febris assiduo comite per institutam catharsim (exceptis plethoricis, quibus venæ sectio erat præmittenda) & sumptum ad quartam, vel quintam periodum peruvianum corticem convalescebant, in exulcerationes perruptâ labiorum crepidine. Plerique repetitis

purgationibus, & excretionibus materiæ exquisitè biliosæ in leniores paroxysmos deducebantur, & brevi in integram apyrexiam, nullo ex febrifugis petito auxilio. Nonnulli ob superadditas causas ex biliosis in alias diversi generis febres incidebant, vel mixtas. Operarii nimis laboribus dediti, & viatores improbis itineribus sub acuto, & assiduo insolatu fatigati, atque neglectis sudoribus refrigerati febribus biliosis per dies aliquot laborabant, mox in anginas, aut pleuritides legitimas, vel mixtas, aut in acutas arthritides incidebant; aut iteratis venæ sectionibus, calidisque potionibus diaphoreticis versùs undecimam judicabantur. Inter cæteros quidam simplici tertianâ captus cum vomitibus in principio, & cardialgiis ad quintum paroxysmum minùs febricitabat, iterumque minùs in sexto, ita quòd videretur septimo judicandus, sed auram captans frigidiusculam dolorem lateralem accersivit cum spirandi difficultate, tussi &c. Per haustus blandè diaphoreticos sudavit, & convaluit. Infantes & pueri suos etiam patiebantur bilis errores, atque excessus, unde vomitus, & diarrhœæ biliosæ creberrimæ. In pluribus biliare vitium ad cutim erumpebat per herpeticas pustulas, vel papulas ardentes, aut mordaces, aut puncticula aggerima culicum moribus similia, aut miliares quasdam asperitates, aut maculas per universum corpus hepaticas, vel saltem ephelides febre non productâ; quod etiam in adultis frequenter vidimus.

Hæc, ut monebam, à fine junii ventis australibus perflato, ideoque calidissimo, adusque julii medietatem dicto modo sequebantur. Tertianæ simplices, quæ per hoc tempus ad septimum communiter circuitum producebantur, & super alias febres vulgariter vagabantur, duplicibus tertianis locum præbuerunt post aliquot imbres, fortasse quia bilis febrifera nonnihil diluta crebrioribus cum sanguine circuitibus absolvendis par exinde fuit. Hæ nihilominus tertianæ duplices citiùs solvebantur, quàm simplices.

Cæterum in subiectis fervidiori liquidorum constitutione præditis febres nascebantur assiduæ typum duplicis tertianæ continuæ servantes à prolixo rigore plurium horarum semel auspicatæ , & in reliquis circuitibus à solo quodam momentaneo horrore repetentes ; aliter in densis constitutionibus , queis utplurimum intermittentes adveniebant , quandoquidem bilis delinquens in primis subiectis fluxilior , & tenuior , alioquin accensa & asperior fomitem intermittentibus proprium producere non valebat , bene tamen in alteris ob majorem visciditatem , & siccitatem.

Ut autem redeamus ad capitis dolorem jam supra adductum velut ordinarium sectatorem istarum febrium , cum continuarum , tum intermittentium , qui nempe acutus , pulsatorius , velut perterebrans frontem potius , imò orbitarum fundum instar pertinacis hemicranie invadebat , quive communiter in plerisque solâ catharsi demulcebatur ; si plethoricos nonnullos tensiori fibrâ præditos excipias , queis phlebotomia præmissa utilis fuit : Hoc inquam doloris genus hemicranie analogum animadvertens conjicio vulgarem hemicraniam produci forsitan posse à bilioso morfu nerveis intestinorum , & stomachi superficiebus inflictæ , à quibus inde per nerveos funes molestæ ascendant irritationes adusque eorum originem , quæ cum plurimis frontis , & oculorum nervis medio intercostali communicat. Profectò hemicrania ferè solet excitari quo tempore coctior bilis , & copiosior ad duodenum , fortasse etiam ad ventriculum exundat , quum nudæ , ideoque irritabiles extant eorundem tunicæ , seu ante prandium ; quare diluti alicujus alimenti assumptio in pluribus ferocientem dolorem minuit ; Alii per tempestiva jentacula , aut matutinas epotationes eandem evadere didicerunt. Ipsemet hemicraniam alias frequenter appellentem bihorio ante meridiem , aquæ calidæ matutino potu cohibebam. Tandem hemicrania morbus ex biliosorum stirpe est , ejusque prodromus plerumque est vomitus , vel nausea , vel etiam cardiogmus.

mus Juvenes potius , quàm Senes invadens , ideoque communiter creditur validam sanitatem significare.

Toto augusto calor defebuit , & febres biliosæ pari ritu otiabantur , sed sobolevit nova rursus catarrhalis affectio , quam aura frigidiuscula fervoribus intermixta, nocturno præsertim tempore gliscens attulerat. Interceptâ itaque pluribus clanculùm transpiratione novæ anginæ , & pleuritides vernalium emulæ occurrebant ; tusses siccæ , destillationes , dolores artuum , vel intercostalium , aliaque hujusmodi.

Adventante autumno, & temperatis per imbres ventorum peregrinorum insidiis , tum emollitâ fluidorum crassi exurgere nihilominus visi sunt biliosi igniculi copiis lymphaticis intermixti , novum quoddam febrium , & symptomatum genus statuentes. Tunc febres continuæ explodentes , vel periodicæ cum orgasmis compositis , impetu ad caput , nocturnis ideò subdeliriis , jactationibus , calore sicco , faucium ariditate , cutis squallore , leipothimiis , anginis symptomaticis , linguæ fœditate , siti , virium & appetitus dejectione vigeant. In quibusdam ictericis , & quibus viscerum naturalium , hepatis præsertim infarctus prævii , vel in febribus producti assidebant , frequentes narium hæmorrhagiæ in viris , uterinæ in foeminis observabantur ; circa sextum morbi diem turbidæ urinæ quales jumentorum subjugales dictæ , acres , & crassæ mingebantur , divulsum tamen , & grave sedimentum deponentes , & clarescentes ; Non tamen has febres malignarum titulo obsignare placuit , nam manifesta origo bilioso-lymphatica nomen iisdem mutuare debebat. Reverà superatâ septimâ turbæ omnes sedabantur , præcipuè post congruas catharses biliosam , mucosamque excretionem affatim promoventes , aut post spontaneas hujus notæ diarrhœas. Quòd si quædam adhuc reliquæ superessent faustè febrifugis profligabantur. Novæ interim ad septembris finem pluviarum alluviones repetebant , quibus ultrò dilutâ bilis resinâ, ejusque acri-

acrimoniâ sufficienter rerusâ lætior, tutiorque fors febribus, cognatis morbis, eorumque productis præluxit.

Febres ideò superstites, aut noviter accedentes ad intermittentium classes reducebantur cum symptomatum lenitate; Dolores capitis paroxysmales exulabant; urinæ croceo, & lateritio colore deposito clarescebant mediocriter coctæ; cessarunt biliosi vomitus in febrium ingressu; leviores uno verbo, brevioresque circuitus, & morbi universum dociliores methodicis purgantibus, alterantibus, & febrifugis cedebant nullam exigentes phlebotomiam, nec ullum post se trahentes recidivæ fomitem. Rarissimæ quartanæ in his tantum, qui malè per æstatem victus, & ambientis ratione utebantur, vel qui anteactas tertianas neglexerant.

Porro in æstivis fervoribus, quos præcipuè calidi ventorum afflatus multiplicant, imbres copiosi, aut repetentes præsto sunt minuendis, vel avertendis morbis stationariis; his nempe diluitur succensa bilis, & in mansuetos motus composita, spiculisque suis facilè dedolata turbas inde leviores, minusque frequentes suscitât. Quare per ejusmodi constitutionem impetus febrium, aliorumque æstivorum morborum sæpiùs exuperans, toties per pluviarum adventum reprimebatur; ita ut factò per æstatem, & autumnum morborum nunc insurgentium, nunc cedentium, nunc deficientium calculo non ingens Taurinensem urbem, ejusque ditionem epidemia vexarit. Aliter evenisse percepimus in Pedemontanis quibusdam, & ulterioribus Italiæ, & extra Italiam regionibus, quas nulla, vel modica mulcebat pluviarum irroratio; biliosæ etenim affectiones epidemicæ ibi sæviores plerosque hominum adortæ per nulla intervalla mitiores, imò ex diutinis siccitatibus ferociore factæ remediis quibuscunque obsistebant, vel in peiores degenerabant morbos v. g. arquatos diuturnos, obstructions, asthmata, ischiades, cachexias, hydropes &c. In dictis, inquam, regionibus siccissimum ambiens infestam adeò habitudinem induerat, ut convenientes advenæ

post breves moras , velut contagio perciti in febres bilio-
sas inciderent. De his nonnulla videantur in prodromo
morborum biliariorum ad calcem secundæ partis Historiæ He-
paticæ.

Notandum autem pluviam , si modica sit , post longos
æstatis fervores semel , aut iterum decidentem biliosas incen-
siones , ut plurimum augere potius , quàm demulcere , factâ
videlicet assatæ bilis per levem irrorationem subitanæ , ut
ita dicam , calcinatione instar calcis per aquam desuper as-
persam.

September ob pluvias , ut dicebamus mitescens in frigi-
dum , humidumque octobrem desinebat ; ideoque morbosos
tumultus deposuit bilis præcociter repressa ab pituitosis latici-
bus in morborum dominatum succedentibus. Hinc per eun-
dem , & per novembrem catarrhales ad caput , pectus , ven-
trem , & articulos morbi vulgariter emergebant.

Omnes hujusmodi mutationum series , & morborum vi-
ces , nec non appositæ remediorum classes varios indignant
bilis status secundum diversas primarum qualitatum , atque
ambientis habitudines , nam si consideretur jam vernalis æther
potestatum renovationem in cunctis viventium liquidis inten-
dens , vel idè bilem simpliciter cum liquidis aliis ad majores
inordinationes excitans , vel quodpiam liquidi ejusdem
biliaris vitiatum per æstatem præcedentem , nec exantlatum
ante hyemem , idè compressum , & concentratum jam sus-
citans , & impellens ; quomodocunque sit , in specialibus quibusdam
casibus biliales affectiones jam venient. Consideretur ulterius bilis jam , ut supra verno æthere excussa , atque
estate adaucta , & deflagrans , vel nova veteri superaddita
(æstas enim bilem gignit ex Hippocrate) & intempestivâ
frigidityte compressa , aut siccitate intensius concrescens ,
aliis fluidorum delinquentium copiis intermixta , non ne pro-
prias , aut communes turbas in subjectis dispositis excitabit ?
sit ardens & fluida jam continuè , vel per intervalla turgescet ,

cet, & vagabitur; sit resinosa, & cretacea, partes varias fixè obfidebit, & lædet. Ventis aliquando calidis laxata, & promota; frigidis constricta, & percussa; pluviis interdum mitioribus explosa, affluentibus enervata, ferociam acuet suam, vel abscondet, & deponet. Similiter ab actuosis irritata, à diluentibus cicurata, per phlebotomiam ab invasionibus revocata, per purgationem eliminata, febrifugis tandem irretita facillimè concipietur.

Nec sola bilis verno tempore ad varios affectus morbosos excitatur; multa alia morborum diversa principia in subjectis dispositis per idem tempus expurgiscuntur. Sic plurimæ ineunte Vere nasales, uterinæ, hæmorrhoidales, aut pulmonicæ erumpunt hæmorrhagiæ; Sepulti per hyemem rheumatici affectus exurgunt; Phthises, hydropes, hæcticae tabes in pejus ruunt; passiones denique quæcunque hypochondriacæ, scorbuticæ, venereæ, maniacæ, ut & cutaneæ eruptiones, vel destillationes excutiantur. Adeò verum est ventia omnia ut in macrocosmo, ita & in microcosmo per vernum tempus moveri, aut sopitis jam motibus renovari ac veluti extincta per hyemem activa liquidorum principia, seu elateres reviviscere. Anni tempora morborum reversiones ciere plerumque solent, vel novas afferre ægritudines. *Illud prætereà spectandum est quomodo affecta sint corpora, cùm ab anni temporibus accipiuntur.* Hippocr. de humorib. Quod præcipuè de verno tempore prædicandum esse quotidiana experientia docet.

CONSTITUTIO ANNI 1716.

HYems præcessit aquilonia, & glacialis cum uberrimis nivibus, adeò ut à fine novembris adusque principium martii triginta septies in Pedemontio nixisse observatum fuit. Hinc capitis, faucium, & pectoris affectiones variæ, raucedines contumaces, aliique hyemales morbi. Ad principium

Zzzz 2

janua-

januarii flantem prius Vulturum regelans excepit Auster humorum compagem, solidorumque texturam laxans. Hinc fusiones, & stases sanguinis inflammatoriæ. Ver temperatum fuit favoniis, & ornithiis aliquandiù eventilatum; siccum deinceps usque ad medietatem aprilis; tunc alternis imbribus largè perfusum, non insalubre. Vergiliarum exortus austri nos afflatus, & æstus præseferbat vigentes cum incremento usque ad julium. Febres idè exurgebant biliosæ, continuæ, vel intermittentes, vel remittentes non valdè à descriptis in superioribus epidemiis dissimiles. Intermittentes remediis leniter obtemperabant, nec, sibi ipsis relictæ, septimum excedebant circuitum. Homines durioribus addicti exercitiis, & laboribus, iis præsertim, qui ad ignem, vel solem exantlantur, v. g. Pistores, & fabri murarii, in primis juvenes, vehementiùs ab hisce febribus corripiebantur cum siti intensâ, exæstuatione, urinis flammeis, anxietatibus, capitis dolore, totiusque corporis internis, externisque ariditatibus; interdum biliosis orgasmis, etiam ad cutim efflorescentibus. Crebræ in pauperibus, & exercitatis cholera tam sicca, quàm humidæ; crebriora alvi profluvia, & tenesmi cum, aut sine febre haud infeliciter desinentia. His aptari non immeritò visum est Celsi effatum: *alvum fluere sæpè pro valetudine est, dummodò intra septimum quiescat, & sit sine febre; expurgatur enim id, quod noxium latebat in corpore.* Fluxibus hujusmodi biliosis aliquando urinæ difficultates sociabantur per stimulos biliares ab intestino recto ad vesicam propagatos.

Finiente julio, & ineunte augusto inter austros latè peragrantes subdoli reperebant euro-boreales flatus vespere præsertim noctuque frigidi, cum nocturnis similiter, aut matutinis imbribus. Post initium Augusti venti exquisitè boreales matutini cum pluviis, quibus post meridiem intermiscebantur australes; eapropter intermittentibus, continuive febribus, nec non diarrhœis adhuc vagantibus lymphatici accedebant

cedebant affectus , tusses contumaces , in pueris convulsivæ , arthritides simplices , anginae , pleuritides spuriae , asthmata , oedemata , & hydropes. Quæ autem per æstatem ante eorum , & borealium afflatum in febribus , aliisve biliosis affectibus ab æstu præcoci excitatis eluxerat placiditas , & facilis morborum resolutio , aut curatio , aperto , & repetito euro-borealium insultu in acriorem conditionem , & contumaciam degenerabant. Febres , earumque periodi , & symptomata vehementiora , & diuturniora evaserunt , nec remediis facile cedebant. Difficillimæ ideo judicationes , eæque , ut plurimum , imperfectæ ansam dabant recursibus , vel viscerum infarctibus , tumoribus , & fœdo cutis colori.

A cane ad arcturum , & æquinoctium autumnale , dum austri jam quiescebant , vicesque eorum sumpserant favonii cum aquilonaribus pleuritides aliquot insuetas [præter spurias & incruentas] spectabamus , siccas , obscuras cum dolore profundo , quasi ad centrum diaphragmatis , tunc manifesto , & acuto , quum ægri se se in latus alterutrum devolverent ; respiratione ferè naturali ; febre acutâ cum pulsu vix duro ; sputo albo , & viscido nonnihil cruento. Pleuritides hujusmodi non sudore , non sputo , sed repetitis duntaxat largis phlebotomiis expugnabantur. Rati fuimus phlogisticum decubitus ad eam pulmonaris lobi faciem insidere potuisse , quæ lambit diaphragma , & per concavam figuram suam ejusdem convexitati respondet , quam idè cabalinum unguem vocant Anatomici.

Notatu dignum est quod hoc anno , equè ac omnibus elapsis observabatur , nempe mulieres popularibus quibuscunque morbis biliaribus , aut lymphaticis minùs tentari , quàm viri. Reverà fœminæ , utpotè humidiori pollentes idiosyncrasiâ , & violentis laboribus non resiccate ad quandam mensuram bilis fervores concipiunt , & biliaribus morbis non adèd gravibus sunt proclives ; tum etiam inter privatos domi cancellos vivendi morem servantes rigidis , aut aliter infensis

aëris percussionibus non adeò exponuntur, ideòque nec tam facile in cataribales, aut alios hujusmodi affectus incidunt. Muliebria isthæc in familiaribus epidemiis privilegia nostro etiam Hippocrati innotuerunt. Sic in statu tertio sect. 2. lib. 1. de Morbis vulgaribus in epidemia æstivâ: *Mulieres præterea multa egrotarunt, minùs tamen, quàm viri, nec ita multe obierunt.* & lib. 6. eorundem Epid. sect. 7. in epidemiâ catarthali hyemali: *Cæterùm mulieres non aequè ac viri tussi conflictabantur, sed pauca etiam febricitarunt, earumque valde pauca ad pulmonis inflammationem devenerunt. Eaque grandes natu, & omnes evadebant. Cujus rei causam esse existimabam quòd non perinde, atque viri in publicum prodirent, & quòd nequaquam pariter ac viri morbis tentantur.*

CONSTITUTIO ANNI 1717.

HYems initio mitis, vix nivosa, interdum austrina, post solstitium rigidiuscula, per januarium, & usque ad æquinoctium lenibus perflata aquilonibus, nonnihil asperior, & sicca, vix tamen gelida anni hujus constitutionem feliciter auspicabatur. Ver temperatum succedebat gradatim tepidiusculum. Ornithiæ leniter, & diutiùs spirabant. Æquinoctiales dies salubres, & tranquilli. Ortus pleiadum imbribus perfusus, mox serenus, & lætis favoniis stipatus. Tardus austrorum adventus, hisque quotidie subsolani, & Boreæ interpositi, adeò ut solstitium æstivum vix ultra veris temperiem positum perciperemus. Æstas itaque breviter, & in remisso calida fuit, & inæqualis. Sub cane, & ante canem aquilones solitarii spirabant cum sensibili, præcipuè ad noctem frigiditate; Ad Augusti medietatem mediocris, sed brevis. Arcturus humidus, cum austrorum suscitatione effervorem recolligente. Frigidus inde, humidusque autumnus usque ad vergiliarum occasum.

Febres vernas perpaucas adnumeravimus, lenes cæterùm,
& po-

& potius lymphaticas ; caufones nullos. Duplices tertianæ continuæ per æstatem viguere , fed placidæ , & ad feptimam , aut nonam per fudorem facile diffabiles ; quod etiam animadvertit Hippocrates lib. de humoribus : *ubi Aestas Veri similis extiterit sudores in febris , eaque faciles , neque peracuta erunt , neque linguas vehementer aridas habebunt.* Per breve Augufti interstitium nonnihil fervidum febres aliquot biliofæ exurgebant ex tumultuariis continuis , quas ex quorundam symptomatum ftrepitu malignas vulgus medicorum perperam nominat. Veruntamen non anxietates , non deliria , non oppreffiones virium paroxysmales , non cardialgiæ , ariditates , æftuationes , non papulatæ , aut puncticulares eruptiones cutanæ , non centum alia ex Proteiformi perversæ bilis indole germinata symptomata veram malignæ febris naturam constituunt ; hæc siquidem omnia vel in simplicibus tertianis intermittentibus occurrunt , præsertim æstivis. Quod autem verè malignum est intimiores partes etiam majoris usus clanculùm invadit , & cum minori ftrepitu conficit , antequàm pateat ; principium quidem , ut cum Antiquis loquar , deleterium vix fenfile , non extensum , non consuetum , remediis obluctans. Cæterùm faciles in dictis febribus curationes , etiam subitanæ , vel per catharsim , aut opportunum febrifugum , vel modicum etiam paregoricum , aut aliud qualecunque alterans , facilesque coctiones. Nec virium nimia à paroxysmis dejectio malignarum nomen malè arrogatum decernit.

Intermittentes æstivæ raræ fuerunt , mites , atque facilis solutionis ; rariores ad autumnii limina , fed contumaces , & fixæ ultra morem superioribus epidemiis observatum. Ad medium , & finem autumnii contumacissimæ , ut plurimum complicatæ. Duplices tertianæ anomalæ frequentiores erant cum ingente rigore , & æftuatione inæquali diù satis protractæ , imò post aliquod exilium postliminio revertentes ; paroxysmales capitis dolores mitiores quidem , sed sitis ardentior , &
anxie-

anxietas major. Urinæ leviter saturatæ, frequenter pallidiores, & crudæ. Diarrhœæ, & dysenteriaë hoc anno rarò visæ sunt, eæque mitiores, & curatu faciles. Plurimæ lienis obstructions autumnalem constitutionem claudebant. Bilis etenim ab æstiva rarefactione tumens nec à constanti imposterum fervore congruenter disgregata in mucidam, & cretaceam naturam, facilè idcirco per lentos lienis anfractus irretiendam migraverat. Morbi insuper regii contumaces non pauci aggerebantur ex nimia inequalitate caloris, & frigoris. quibus omnibus sat est textus Hippocratis in lib. de Humoribus: *Pro anni autem temporis varietate similes, aut dissimiles erunt morbi, qui hoc tempore oriuntur. Quod si similiter procedat; aut ejusmodi morbi erunt, aut ad tale quid deducuntur, velut ad morbum regium autumnalem, cum frigus calori, & calor frigori succedit. Si verò æstas biliosa extiterit, bilisque increpescens intus remanserit, etiam aliquantulum lienosi erunt.*

CONSTITUTIO ANNI 1718.

Post hyemem aquiloniam, & siccani veris initium temperatum fuit. Ad aprilis finem Australes spirabant venti borealibus mitioribus aliquando intermixti. Maio, & junio invalescebant austri ut plurimum sinceri, quandoque favoniis intercepti. Julius, & augustus cum septembris initio australibus, atque ethesiis jugiter infestabantur. Vix tamen austro-
rum humiditas, & pluviae exigue sub æstatis finem decidentès maximam horum temporum siccitatem leniebant. Veruntamen in hac nostrâ Pedemontana regione nulla dari potest certa ventorum exploratio, quâ exactè possint uniuscujusque afflatus exactè discriminari, cum singuli refringantur, variisque metamorphosis turbentur; hinc aliquando ab australi plagâ aquilones, ab aquilonari autem noti spirare perhibentur, aliàs calidus percipitur, qui frigidus ab ortu suo esse deberet, & vicissim. In hac inquam, nostrâ ditione
edi-

ædificiorum parietes aquiloni expositi eo ferè læduntur modo, ac lædi solent Romæ [ex relatu celeberrimi Lancisii lib. de nativis, & adventitiis Romani cœli qualitatibus] vergentes ad austrum. cæterum per hæc tempora epidemicæ febres indolem tertianæ intermittentis essentialiter servabant, ut ut sæpè continuæ ardentes, vel subcontinuæ accidentaliter audirent. Nec defuerunt complicatæ ægritudines, vel sporadicæ, imò & febres symptomaticæ, quæ ad particulares affectus relationem habebant. Hinc & visæ dysenterix, nec non quædam biliosi scorbuti soboles cum phlogosi vagâ, cutaneis maculis, & gingivarum erosione &c.

Ineunte septembri criticæ excretiones biliosæ ad alvum die septimo, quandoque etiam quarto judicatoriæ fiebant præter morem, atque excreta bilis ne dum crassa, & limosa, sed & intensè crocea, atque ardens erat. Emetica quoque proficua, iis præsertim, qui nausæâ, oris amaritie, & vomitione urgebantur. Dysenterix, quæ per julium, & augustum sævierant hoc mense sedabantur. Ictericæ frequentes superveniebant, illis potissimum, qui febribus de intermittentium naturâ afficiebantur. Lippitudines quoque biliosæ inflammatoriæ non raræ.

In ejusdem mensis progressu febres pleræque continuarum naturam induere visæ sunt, nullum in accessu rigorem, vel horrorem præ se ferentes, sed assiduum capitis dolorem, jactationem, lassitudinem, sitim, vigilias, linguæ ariditatem, mentis emotionem, & similia malum morem simulantia, semper tamen suam servabant periodum. In febribus etiam intermittentibus longa deliria velut paroxysmalia intercurrent. Multæ insuper tertianæ cardiacæ legitimæ, & spurix. Inter complicatas ægritudines hujus constitutionis aliæ quidem febrilem distinguebant periodum respectu biliosi suscitabuli, sed & insimul phlogisticum quid exhibebant cum idiopathicâ sanguinis accensione, adeò ut etiam post notabi-

Aaaaa

lem

lem paroxysmi remissionem accederent narium hæmorrhagiæ, tusses &c.

Ægritudines aliæ pectoris affectionem cum sanguinis sputo idiopathicam effingentes, periodicam, biliosamque febrim unâ obsignabant; difficillimum idcirco negotium erat internoscere an particularis, an universalis affectio primaria foret; nam distinctus paroxysmi recursus quotidianus, ejusdemque manifesta remissio cum urinis croceis, & lateritiis (quæ urinæ procul dubio pectoris affectui, etiam inflammatorio non competunt) essentialem duplicis tertianæ ideam significabant. Dolor initio morbi ad scapulas punctorius cum pulsu serrato, tussi, respirationis angustia, & sanguinis sputo legitimam indicabant pleuritidem. Mixtum itaque dixisses morbum ex duobus æquè primariis, haud alterutro symptomatico.

Harum variæ species insuper apparebant, nempe febris biliosa cum hæmophthisi, vel cardialgiâ, vel dolore epigastrii; internoscebatur tamen in quibusvis vitium bilis præ reliquis humoribus ex siti intensâ, summâ oris amaritiæ, linguâ flavâ, vomitu bilioso, exulceratione labiorum, atque urinis, ut suprà dicebamus, lateritiis.

Febres denique ad extremos ejusdem septembris dies omnes primariæ biliosæ, omnes continuæ cum delirio paroxysmali; in aliquibus cum longo sopore. Quod ad paroxysmorum invasiones in hac constitutione res maximè inæqualis fuit, & insueta; nam in quibusdam ingruerat accessus cum rigore apparenter notabili, attamen egrotantes nullum frigoris, sed caloris sensum percipere afferebant; quare stragulas (ut mos est in rigore paroxysmi) superadditas recusabant, utpotè ab his horrorem, simulque calorem velut suffocantem patiebantur, & in progressu spasmodicos cruciatus ab anterioribus ad posteriora, à trunco ad artus, ab hoc artu ad alium vagantes; è contrâ qui levioribus utebantur lodicibus spasmodicas hæc ambulantès irritationes cum minori mole-

molestiâ ferebant. Aliis paroxysmus sine frigore & horrore accedebat, ut ut febris de legitimâ intermittentium tertianarum familiâ foret; in ipso tamen accessu sitis ingens, oris amaritudo maxima, anorexia, & cardialgia, dolor angens, & ardor intensus ad epigastrium, & ad lumbos, diarrhœa acerrima, quasi dysenterica, dolor capitis acutus, lingua arida, & nigra, jectigationes, deliria, & similia superveniebant. In utroque casu bilem adustam, acrioremque culpandam arbitramur, servato tamen discrimine: nam bilis in primo casu à propriis incerniculis ad solidas partes translata, ipsas occasione paroxysmi spasmodicè laceſcebat; in altero autem ad secretionis vias, antrumque intestinale deturbata, præfatos tumultus, sævaque excitabat symptomata, argumento sanè præclaro biliosum hunc febrium fomitem ab excretionibus consuetis præpeditum haud semper in viscerum anfractibus stabulari, sed quandoque indifferenter deferri ad alias corporis partes, in quibus commotus suum servat irritandi morem, suasque periodos. Huic sententiæ circa bilem nunc ad alvum, nunc ad articulos irruentem adaptari videtur Hippocratis textus Coac. Præn. num. 462, ubi magnus ille Præceptor de dysenterica affectione sermonem instituens, eamque supponens, vel biliosam, vel sanguineam, innuit à suppressione ejusdem prout biliosæ fieri abscessus ad articulos his verbis: *Intestinorum difficultas intempestivè suppressa abscessum in costis, aut visceribus, aut articulis inducit; Ac fortè biliosa quidem articulis, sanguinea verò in costis, aut visceribus, abscessum facit.* Hoc autem loco illa vox *abscessum* non videtur intelligi strictè pro tumore collecto, sed pro *abscessione*, idest translatione materiæ abscedentis ab una parte in aliam, ut in pluribus aliis locis videre est. Nec à secretoriis ductibus ad articulos, aliasve partes citiùs transferri queunt biliosa recrementa, quàm occasione febrilium apparatusum.

Enimverò parem huic nunquam observavimus biliosarum

februm epidemiam , quâ ægroti viribus adeò destituti forent , & anxii in paroxysmorum accessibus , quasi verâ laborantes cholera. Quòd autem bilis acrior præ cæteris fluidis vera sit harum februm conjuncta causa ex hoc evidentiùs liquet , quòd pueri , quibus bilis inertior est , lymphaticisque copiis temperata , non æquè febricitant , vel saltem consanescunt citiùs : præter id , quod ab Hippocrate in genere dictum est : *Omnes febres à bile fieri , diversimodè tamen affectâ* , lib. de Nat. hom.

Notabiles fuere paroxysmales diarrhœæ , queis plerique ægrotantium torquebantur ex motu periodico bilis irritativæ maximè acris ab fervida tempestatis constitutione torrefactæ. His humectantia , & epiceraistica frequenter propinata , ut serum lactis affatim epotum , prospiciebant , cicurato bilis hujusmodi acrioris stimulo. Profectò copiosi diluentium haustus , non potiunculæ pitissatæ eximiam bilis feritatem superare queunt ; quandoquidem , ut alibi notavimus (præsertim Constit. 1715.) humidum exiguum ferventi , & alkalinae bili superadditum eam potiùs accendit , quàm extinguat ; non secùs ac igniculi in calce latitantes per simplicem aquæ irrorationem deflagrant , & explosivi evadunt ; per alluvionem subiguntur. Hinc à modicis pluviis inter , vel post eximios æstatis ardores decidentibus majores exurgunt biliosorum morborum strepitus , uti hoc præ cæteris annis observavimus ab adventu imbrium sub finem æstatis post diuturnas quatuor , aut quinque mensium siccitates. Ab allatâ fervidæ æstatis constitutione præcoces vegetantium fructus suas quoque depravationes acceperunt. Hinc racemis septembri ante pluvias collectis , utpotè præmaturis , non vinum , sed acetum post brevia octiduanæ fermentationis spatia hauserunt incauti œconomi. Qui verò vindemiam ad ulteriora post pluvias tempora distulerunt , domesticis rebus sapienter consuluerunt.

Notan-

Notandum autem sæpè accidere ut in unâ plagâ permultæ excitentur febres epidemicæ, in proximâ verò, & attiguâ nullæ, quamvis eadem concurrat rerum non naturalium usura; unde hoc petendum? an ab universali temporum constitutione? nequaquàm; tanta enim haud est inter ipsas distantia, ut non habeat utraque æqualiter affici: an ab intrinsecis causis, & præcipuè à peculiari totius sanguinis statu, ex cujus diversâ constitutione diversæ quoque ametriæ, hinc & diversæ febrium rationes sint repetendæ in colentibus regionem alterutram? Profectò quamvis hujusmodi causæ alias conferre plurimùm possint, ut infra dicemus, in nostro tamen problemate non satis evincunt; quippe eandem supponimus in utrâque plagâ climatis conditionem, atque, ut ita dicam, ipsissimum victus regimen, & temperamentorum analogiam. Ergo ab aliqua peculiari causâ procatartica, sive excitativa, qualis esse potest miasma quoddam putidum, vel aliter infensum, quod videlicet propius attingat hanc, quàm illam regionis partem, cujusmodi sunt effluvia è locis palustribus, vel subterraneis emanantia. Quare in Vercellensi ditione satis fœcundâ frequentissimæ quotannis exurgunt febres æstivæ, & autumnales ob lutosas aquarum stagnationes, & sterquilinia passim cumulata ad fermentandum. In Sanbenigni oppido singulis omninò æstatibus, & autumnis familiares itidem sunt hujusmodi epidemicæ, vel potius endemicæ febres cum obstructionibus viscerum; idque ob similes prorsus causas procatarticas, sive, ut diximus excitativas: & primùm quia stramina, & quisquiliæ post frumenti, aliorumque fructuum triturationem aliis usibus superflua, vel redundantia per vicos coloni spargunt, & ex industria humectant, ut putrescant, præter fimeta ad exteriora domorum cumulata: Secundò; quia oppidum illud inter duo flumina situm est, Orcum nempe, & Malonem, quorum alterum mœnia lambit, & devergente angusto immersæ cannabis fœtidas

tingulas, aliasque olentes mineralium ablutiones è montibus advehit, & aërem inficit. Porro epidemicas Taurinensium febres hoc anno post immerfas in Pado cannabes exordium duxisse multorum est observatio. Eiusdem generis ægritudines epidemicæ per eadem æstiva, & autumnalia tempora observabantur in diversis locis provinciæ Eporediensis, præsertim humilioribus versùs oras Balteæ Duria, ubi malè sana agricolarum œconomia de saginandis agris sollicita magis quàm de salute tuendâ præfato utitur more.

Hanc effluviolorum vim excitativam comprobant binæ observationes per eiusdem æstatis decursum habitæ. Quoad primam: Padus, qui mœnia urbis præterfluit, ad eam aquarum penuriam hoc tempore devenit, ut parem viderint nunquam seniorum Decani: ob eam rem foveæ permultæ ab undarum illisionibus deserte in paludes abierunt. Resiccatis inde sub dio earum stagnis, herbe, pisciumque reliquie in dies fermentate, & putrescentes gravem cœperunt redolere mephitim. Quare homines utriusque sexus, qui ad fluminis oras habitabant in epidemicas febres inciderunt, periodicas quidem, sed diurnas, atque difficiles. Ægrotantium plurimè remediis, & apto regimine destituti, in obstructions, cachexias, & icteros deciderunt. Qui verò à fluminis littore nonnihil distabant, ut ut eiusdem suburbii incolæ, eiusdem constitutionis, eodem utentes victu, iisdemque exercitiis &c. minus valde, & in minori numero ægrotabant. Observationem alteram implent egroti plurimi, qui in recentissimis amplificate urbis ædificiis ad portam Secusianam habitare delegerant; eorum enim ægritudines non ab aliâ procatartica causâ profectas credendum, nisi ab humidis, simulque nidorosis calcarii camenti effluviis per æstivos fervores emanantibus; nam cæteroquin ædificiorum situs ille acclivis est, atque salubrior quovis alio in toto urbis ambitu. Fortasse non tanta fuisset, nec tam generalis febrium epidemia in dictis

dictis habitatoribus, si temperatior fuisset æstas, ut aliàs observatum.

Huc autem revocare juvat observationem peculiarem ab admodum Rev. D. Georgio Clarentono Rectore Ecclesiæ parochialis S^{ti} Marci trans Padum nobis post experimenta plurium annorum communicatam. Observabat religiosissimus Vir tertianas febres tam simplices, quàm duplices excitari, atque aggerrimè grassari iis æstatibus, queis sicca, & calida constitutio adeò viget, ut flumina notabiliter exsiccentur; & quâ littoris parte major sit aquarum recessus, relictis stagnis putrescentibus, eâ febres potissimùm pullulare; quare exurgentibus in Padi suburbio per fluminis imminutionem inter æstivos ardores hujusmodi epidemicis febribus, quamvis utriusque ripæ habitatores afficerentur, sæviùs tamen, & in minori numero affectos observabat suburbanos suos ad montis radicem, sive ad ripam citeriorem degentes, quàm urbanos ad ulteriorem: quandoquidem fluminis decursus hanc alvei partem, utpotè decliviorē, semper alluit, stagnis in oppositâ remanentibus. Observavit insuper in fortioribus epidemiis minorem semper extitisse ægrotantium numerum in suburbii parte superiori, quæ extenditur versùs *Montem Calerium*, quàm in inferiori versùs *Stum. Maurum*, quòd scilicet illic fluminis undæ, antequàm pontem subeant, ripam citeriorem irrigant, hic autem, idest infra pontem, ad ulteriorem oppositam devolvuntur. Cùm autem consueta fluminis lentitudo, ejusque alvei exsiccatio, & palustris eacoëthia à situ pontis per milliarii distantiam adusque templum nuncupatum *La Madonna del Pilone* continuentur; hinc memoratus sacerdos narrabat, nullam ferè domum suburbii, nullasve rusticantium casas à ponte ad prædictum templum per altitudinem dimidii milliarii à ripâ fluminis ad altiores surgentis collis sedes fuisse ægrotantibus vacuas. Ubi igitur observandum est colonos super hanc altitudinem inhabitantes elatis à
flu-

flumine morbiferis effluviis haudquaquàm fuisse obnoxios. Ad explicandam autem excitativæ causæ efficaciam suscitabulum aliud determinativum meritò incusabat sagacissimus Vir, aërem nempè impetuosum à Secusiani montis faucibus, vulgò *Cona-ba di Susa* assiduè expirantem adversùs suburbium, totamque extensionem adductam, quo profectò rapta miasmata ad suburbanos, cæterosque ejusdem directionis incolas facile devehuntur, ibidemque ob collis ad suburbii tergum existentis sublimitatem reverberantur, sufflaminato ipsiusmet aëris impetentis progressu. Ab eadem fermè causâ repetendas arbitramur biliosas ægritudines eodem anno epidemicas ab eruditissimo Doctore *Pignono* significatas. Referebat Vir præstantissimus eas mensibus Septembri, & Octobri in quodam agri Cuneensis tractu ad oras fluminis *Stura* tunc æstivis ardoribus exsiccata vulgariter adeò sæviisse, ut habitantium nemo immunis evaserit. Febres erant de intermittentium genere, quarum plurimæ ab intermissione mox desciscentes in subcontinuas convertebantur, & priusquàm delerentur in pristinum morem redibant. Occasionalem causam laudatus Doctor apricitati illius regionis, utpotè vento à vicinis montibus jugiter impetenti magis expositæ tribuebat, quandoquidem habitantes ad humiliorem fluminis ripam minùs ægrotabant, quàm qui alta colebant loca; imò degentes in circuitu prædefiniti tractus, vel in urbe servabantur incolumes; quare effluvia à stagnis emanantia, vel quævis devedta miasmata nequaquam culpanda censuit; sed ventosum aërem, qui corpora ab intenso æstatis calore rarefacta jugiter percellens condensabat. Veruntamen si sola habitus intempestiva constrictio morbifera fuit, quo potiori jure biliosas febres vulgares, non verò pleuritides, anginas, articulares affectus, aliasve sporadicas ægritudines inferre valuit? arguendum itaque jure meritò à peculiari principio exotico per aërem delato excitatas fuisse hujusmodi epidemicas febres, non secùs ac evenisse diximus suburbanis Padi. Ast
quam-

quamvis febribus epidemicis hujus notæ obnoxii magis fiant habitantes æstivo tempore prope flumina, vel paludes; haud tamen immunes fuerunt eo anno habitantes apricos, & sublimiores colles; nam ab intensissimo solis ardore diuturno evocati ex intimioribus terræ latebris per apertos hiatus sulphurei, bituminosi, vel aliter infesti habitus sat aptè naturam febrilis fermenti induerunt; quod evidenter observare est in locis iis, ubi tellus profundis foditur caveis, atque ædificandi gratiâ pluribus revolvitur modis cum salutis detrimento eorum, qui propiùs inhabitant, præsertim æstivis temporibus.

An autem præter excitativas causas, & quævis determinantia incitabula, adhuc diligenter contemplanda sit sanguinis habitudo, velut causa conjuncta evidenter patet; nam per eandem siccitatis, & ardoris constitutionem æstivam quidam febricitant, alii nequaquam; Nonnulli intermittentem, alii continuam, hi ardentem, illi mitiorem concipiunt effervescentiam. Præ aliis autem ii, qui exercitiis vehementibus, vel aliter sanguinis ramosam substantiam exasperantibus utebantur, sæviùs eo anno febricitabant; Hujusmodi fuerunt Pictores, fabri murarii, Tinctores, alique activioris, & laboriosæ vitæ homines. Qui emissario cuipiam naturali, vel morbofo, vel artificiali assueverant, ut sputatores, catarrhosi, & cauteriis muniti, vel ulceribus affecti, haud epidemicis febribus vexabantur. Egomet antehac tertianæ autumnali obnoxius, post susceptum familiare rheumatis pectoralis incommodum illâ immunis evasi, quamvis causis eam producentibus æquè expositus. Hi tandem qui autumno anteacto tertianâ laborarunt, hoc anno immunes fuere, licet apparenter valetudinarii degerent. Consequenter ad ineundas febres, etiam populares certa quædam, & proportionata requiritur humorum dispositio, atque morbosus apparatus. Ast si quidem, ut diximus, etiam dato hoc apparatu, non semper excitantur febres, nisi ab externo fomite succendantur;

ita sæpè incitamenti vices gerunt effluvia ab uno infirmo in alium traducta, quamvis hi morbi inter contagiosos non connumerentur, nec debeant merito connumerari. Interea observamus frequenter non solitarias ire febres in numerosis familiis, quando epidemicæ vigent, ut ut tertianas, sed ab uno ad aliud subjectum sæpè migrare, præcipuè in pauperum gurgustis, ubi plures infimul cubare assuescunt, inter quos analogi viget sanguinis idiosyncrasia, & susceptibilitas ad morbos; exemplum præclarum obtulerunt conjuges Pisani mense octobri. Ægrotare cœpit uxor correpta frigore repentino nocturnis horis. Tunc maritus concumbens optime se habebat, sed post semihoram febricitare & ipse cœpit cum pari frigoris, exinde caloris, & sudoris successione usque ad absolutum paroxysmi terminum. Æqualis in ambobus fuit febris intermissio, & alternâ nocte recurrebat utrique paroxysmus, eadem semper in omnibus circumstantiis servatâ proportionem, semperque retardato per semihoram accessu in viro, ut ab initio. Reverà quidpiam simile inter se se quo ad naturale temperamentum sortiti fuerant. Febris tam in paroxysmorum extensione, quàm in symptomatum majori, vel minori gravitate, & vicissitudine valdè inæqualis erat, sed eandem in utroque servabat inæqualitatem. Quare eadem remediorum methodo, iisdemque electis diebus regebatur uterque. Post universalia præsidia sufficienter celebrata, interpositis alterantibus, corticem peruvianum ambobus exhibere statuimus; sed ante hujus exhibitionem concumbentibus separationem præcepimus, ut clariùs elucesceret, an interdita reciprocorum halituum conspiratione disparitas ulla in morbi processu emergeret; nam cæteroqui matura ægrotantium ætas, & ingenua utriusque asseveratio lubrici erroris suspicionem excludebant. Profectò, sejunctis hoc modo ægrotantibus, febrilis accessus virum corripuit horâ ante meridiem, uxorem verò horâ tertiâ pomeridianâ. Cortex peruvianus utrique sub forma boli oblatus febrem in viro penitus

extinxit, in uxore autem leves adhuc periodos permisit sine rigore. Post aliquot dies solâ utebantur corticis tincturâ cum rhabarbaro in æquis partibus vini, & aq. stillat. scorfoneræ ad præcavendum ne febris recrudesceret, quæ ut plurimum post dies quindecim solet repetere. Hoc regimine vir in integrum fuit restitutus, ast uxor viro senior integram victoriam non obtinuit, quamvis leviter febricitaret distinctis accessibus ad longum tempus. Id observasse Hippocratem legimus lib. I. de morbis vulg. sect. 2. *quod verò ad judicia attinet, ea ut satis perspicere licet, aut sunt inter se similia, aut dissimilia, velut in duobus fratribus apparuit, qui ad theatrum Epigenis habitabant, quibus, cum eadem simul horâ morbus cœpisset, ætate proveciori sexto die, juniori verò septimo decrevit, reversus utrique eadem simul horâ dies quinque intermisit, atque ex reversione uterque simul in totum die decimo septimo est judicatione liberatus.*

Ex hisce epidemicis febribus tam mixtis, quàm simplicibus nulla crisis perfecta apparuit unquam. Venæ sectiones etiam iteratæ, servato ægrotantium delectu proficua videbantur, ast insuper haud erant procraftinanda diluentia, & subductoria, ut cassiæ tinctura in sero lactis, aut simili vehiculo largis haustibus epota, vel alia cholagoga, queis bilis vitellina, & cretaceæ copia excernebatur. Alvinæ itaque dejectiones utiliores fuere; exinde suum etiam ad salutem suffragium sudores contulerunt. Picrocholi, strigosi, & laboriosi homines per cathartica sollicitati in hypercatharsim facile adigebantur cum immodicâ serosorum expressione, cardialgiâ, leipothymiâ, asphyxiâ, extremorum frigiditate, interno ardore, & vomitu, ad instar cholæræ, vel lipyriæ. Hinc urinæ mingebantur aliàs crudissimæ, aliàs saturatissimæ juxta diversas irritationum vices. His diluentia, & paregorica semper optima.

Ad sedandum paroxysmalem tumultum à bile in visceribus furente excitatum, vigente hac epidemiâ, nil æquè profi-

cum fuit, ac paregoricum v. g. ex diascordio, reg. Nicolai &c. in ipso paroxysmi furore usurpatum. Ad hoc persæpè fuit confugiendum pro impetranda citius, & tutius symptomatum, ægrotorumque quiete cum admirando levamine. Acida ex malis citris, limoniis, arantiis, vel oxalide, & similibus desumpta ad temperandos febriles ardores non ignobilis emolumenti fuerunt, sed præsertim nitrata.

Cortex peruvianus post universalia præsidia, etiam ante septimam exhibitus, dum febrilis fomes nondum erat edomitus aliquando profuit, plerisque tamen incendium adauxit, summamque attulit ariditatem universalem, sed præsertim linguæ cum asperitate, & scabritie, cui respondebant urinæ saturatiores, & flammæ. Per Clysteres emollientes, & refrigerantes tunc impositos biliosæ fæces velut ignitæ reddebantur. Febrifuga quædam alia ab aliquibus venditata ex cortic. arantior. lap. pumice, sal. absynth. vel semine atriplicis in pulverem redactis huc usque minus tuta comperimus, nec ideò cortici dicto anteponenda, nec ejus vicibus explendis substituenda ducimus. Morbo ad declinationem vergente revocatus chinæ chinæ usus optimè contulit; ab hoc urinæ semper uberiores, & concoctæ; quibus autem istæ post aliquot dies recrudescebant, hi citò recidivam patiebantur. Complures absque cortice, aliove febrifugo curati, & aptum servantes regimen adhuc relapsi sunt. Qui peruvianum corticem cum adjectis purgantibus sumpserunt, difficilius, quàm superioribus annis ad alvum movebantur, potius tumebant ventris emphysemate, emollientibus, & epicrasticis deprimendo.

Taurinensis ager, sed præsertim urbs ipsa quotannis febribus hisce epidemicis autumnalibus magis, vel minus infestari solet, fortasse pluribus de causis, & primum quia humili condita solo inter duo flumina, *Padum* & *Dariam* hebetiori fruitur aëre. Secundò propter usum vini meracioris, vel subdulcis, & crassi. Tertiò propter corruptos halitus à
quif-

quisquiliis, & sordibus in atria, vicis, & plateas projectis, æstivo potissimum tempore, ut ut avertendis hujusmodi præjudiciis sedulam præstent operam almæ urbis Præfecti per edita frequenter promulgata, & viros ad hoc officium demandatos. Quartò propter consuetas terræ motiones pro adstruendis ædificiis, & urbe amplificandâ, vel erigendis castrensibus propugnaculis. Quintò tandem propter familiarem quandam caliginem, quæ non solum urbi, ejusque agro impenderet, sed à Pado consurgens producitur obliquè versùs Lanzii Alpes ad plura milliaria, latitudinem, tamen unius miliarii non excedens, quâ Taurinum peculiariter excipitur à mense maio ad octobrem singulo indefinenter vespere usque ad tertiam, vel quartam noctis, horam. Hæc, inquam, caligo à suspicientibus in urbe non benè percipitur ob ejus raritatem, sed eminùs prospicientibus evidens est, eamque spectant optimè vicini montis incolæ, præcipuè faventibus Lunæ splendoribus. Huic profectò tribuendam ducimus Taurinensis cœli infalubritatem post solis occasum, vulgò *La Sere-na*, quam cauti homines evadere student se se sub tecta temporius recipientes. Ab hac insuper, præ cæteris causis, repetendæ veniunt morbosæ dispositiones plurimæ catarrhales, & tabidæ, tum etiam præmatura mulierum senectâ, mensium inordinationes, fluores albi, capillorum defluvia, odontalgia &c.

Denique, ut summatim loquar, epidemia isthæc initium duxit mense julio post vernaes tertianas, invaluit mense augusto, eodemque finiente summum attigit gradum, in quo viguit per integrum septembrem. Circa nonas octobris post frequentes pluvias valdè mitior evasit, & pedetentim in dies terminabatur; ita ut mense novembri ferè tantum recedentes agrotarent, quorum paroxysmi majorem servabant extensionem, quàm in primariâ ægritudine, nec verâ terminabatur apyrexia. Primas hujus epidemiæ impressiones susceperunt biliosi, & graciles mensibus Junio, & Julio. Inter

maiores æstatis ardores affecti sunt plethorici, & joviales, alique sanguineo præditi temperamento. Ad autumnum tandem melancholici. Nec defuerunt sporadicæ ægitudines, præter biliales, æst in minori numero. Et sicuti versùs *Padium* plures, & contumaciores grassabantur febres biliosæ, ita in superiori urbis parte ad *portam Secusianam*, ad *castrum* &c. plures numerabantur dysenterici. An fortè effluvia *Padi* ad præcavendas has intestinorum difficultates quid contulerunt? Probabile quidem; nam degentes in alterâ urbis parte versùs *Duriam* flumen, vulgò à *porta Palazzo* hoc morbo vix laborarunt. Hujusmodi autem Dysenterici per excretionem bilis flavæ, & crassæ feliciter convalescebant; qui verò fæces virescentes, vel nigras, vel strigmentosas, aut simpliciter serosas ejiciebant, plerumque interibant, nisi in biliosas, & crassas mutatio fieret; & vicissim hi, quibus excrementa biliosa, & crassa in viridia, nigra, vel serosa commutabantur peribant colliquati, vel resoluti cum intestinorum atoniâ, vel necrosi. In primo ordine constitutis non fuit opus *ipecacuanhâ*, morbus enim spontè judicabatur; in altero adscriptis nocua; æst utilis iis, qui mucosa egerant; utilior autem quum in principio morbi implorabatur; nec solum hanc in pulverem adhibitam, sed & levem ejusdem decoctionem cum tincturâ rhabarbari, & tamarindorum profuisse comperimus. Raræ ac fervidiori æstate in pueris diarrhœæ, plures è contrâ æstate superiori magis temperatâ, quod est insuetum. Febrientes complures per hanc constitutionem post quartum paroxysmum convalescere, factâ ad cutim eruptione pustularum instar scabiei, quibus affrictis flavus scatebat ichor. Cæterum plerique convalescentium hoc anno diutinos languores, anorexias, pallores, vel icteros patiebantur, antequàm in pristinam redirent salutem. Circa novembris idus consuetæ febres epidemicæ ab indele sævâ notabiliter declinabant, quartanis tum duplicibus, cum simplicibus locum cedentes. Eodem finiente, & ineunte

De-

Decembri leves aquilones cum nebulis in scenam prodire morborum hyemalium prodromi. Quare autumnales febres residuæ cum aliis morbis, præcipuè catarrhalibus foederatæ novâ ludebant facie. Hinc angores catarrhales, auræ apoplecticæ cum oris torturâ, & inde decubitu ad pectus lethali, Pleuritides, angina non inflammatoriæ, variolæ confluentes, & malignæ, *constipationes*, hydropes, tympanitides &c. præter nonnullas febrium autumnalium recidivas, inter quas notabilem Pisani recidentis historiam infra recensibimus. Quartanæ quædam in subcontinuas migrabant cum manifestâ acutie, & delirio in paroxysmis, siti, ardore, capitis dolore &c. etiam post methodicum usum opiatae febrifugæ, prout cuidam Recutito accidit, qui simplici quartanâ laborans, post integram consuetæ opiatae, sive electuarii febrifugi massam partitis dosibus per plures dies adhibitam incidit in quartanam simplicem continuam perniciosam cum delirio, & decubitu pessimo. Ab institutâ phlebotomiâ non nihil levaminis reportasse videbatur, sed periodus subsequens pessima gravem ad caput anadromen minitabatur, quam revellere curavimus apposis ad crura epispasticis. Interea humectantia, cardiaca, & cassiæ dilutum ex usu fuerunt. Horis aliquot ante diem novi paroxysmi, scilicet noctu sensuum quædam insueta stupiditas accessit, mox comatosus affectus cum resolutâ deglutitione, ceu levis apoplexia sine stertore per horas quinque, & ultrâ. Per divulsas cucurbitulas, & vesicatorium cervici applicitum excitabatur, & deglutiebat sal. volat. cornu C. & succini cum spir. fal. armon. in paucâ quantitate aq. cerasor. nigr. & per aliquod temporis taciturnus, veluti semifatuus, seu aphonus assidentes intuebatur. Tandem resipuit, & reperito corticis peruviani infuso cessarunt singula cum febre symptomata, superstite extremâ lassitudine à morbo, & remediis inductâ. Vir erat maximè melancholicus, non modò ex naturali temperamento, sed etiam ob adversas rerum suarum vicissitudines. Huic profectò

fectò in morbi ingravescentiâ duplex præsidii genus congruere poterat , hirudines nempe ano affixæ , & emeticum apto tempore exhibitum. Sed Author noster cl. tardiùs advocabatur. Optimè tamen per servatam methodum convaluit.

Pisanus , qui , ut suprà allatum est , à spuria tertiana febre per peruvianum corticem evaserat , lentè , nec non cum virium notabili imbecillitate , febrilis reversionis facilè prodromâ , convalescebat. Vir 55. annorum , strigosus , biliosus-melancholicus , ac mentis turbationibus plurifariam obnoxius. Post septem , aut octo dies à febris solutione conferens se ad urbis remotiorem regionem , die vehementer aquiloniâ , turbatâ , frigidâque , quendam conveniens amicum hominem , eumque vividè de propriis rebus alloquens , domum fatigatissimus redit ; atque intensissimo statim rigore corripitur ; postmodùm intenso calore , seu forti febrili paroxysmo , qui totâ sequenti nocte ferociens , manè quidem remittebatur. Rigor ad vespertas diei sequentis supervenit , vehementissimus , & convulsivus , ad quoslibet artus protensus ; tonicus tamen , atque per repetitos insultus furens ; enormis præcipuè in tendinibus utriusque carpi , & singularis in inferiori mandibula , quæ identidem strenuè quassabatur , & subsiliebat , ut qui per hyemem vehementissimo corripitur , atque percellitur frigore. Lurida , & dejecta facies , collapsa tempora , oculi concavi. Ad initium paroxysmi pulsus parvus , immersus , & tardus : Algor in cute , & frigido : Lingua scabra & nigra : Suppressæ urinæ , quæ priùs copiosæ fuerant in convalescente homine , neque ingrâtè concoctæ : Supinus , & pessimus decubitus : Sed inprimis mentis quædam singularis alienatio. Quandoquidem interrupta , cum intermixta per vices aphonía , se præbuit ratiocinatio. Noscere res , atque assidentes interdum , interdum verò non noscere videbatur ægrotans. Interrogatus modò alloquebatur , modò verò prorsus tacebat. Rescissa pariter videbatur reminiscentia , ut rerum species benè interdum comparare ,
atque

atque percipere valeret ; interdum tamen confunderet , aut prosequi ulterius non posse ipsemet fateretur. Interea cerebrosi ejuscemodi affectus causa videbatur fortuita : Tunc enim obumbrari ægrotantis judicium percipiebamus , cum actutum convulsivi sæviebant motus , præcipuè fortiozem in inferiori mandibula convulsivam insultationem major mentis alienatio consuebat. Non ideo arduum erat conjicere , mentis , atque memoriæ alterationem à solis nervorum concussionibus originem deducere ; Quæ quidem in externis nervorum propaginibus inchoantes , & ad usque grandiores nervos , eorumque caudices delatæ , in fibrillis pariter medullaribus cerebri , quæ quidem illorum origines sunt , insculptaque simulacra sensibilibus rerum propriis in sinibus recondunt , genuinam perturbationis inducebant rationem. Cæterum hujusmodi symptomata morbi naturam redolebant , periodicam videlicet , atque intermittentem : Ad distincta enim intervalla se invicem excipiebant nervorum concussionibus cum comite mentis læsione , atque per æqualem mitescebant circuitum. Novum hunc spasmodici symptomatis stimulum rigidiori æquilonio aëri tribuere licuit , undè reverà in plurimis cum externis , tum internis partibus constrictio exorta , atque corrugatio fuerit ; ut ex naturalibus præcipuè suppressis evacuationibus adamussim evincebatur. In tanto insultu famosiora antispasmodica per cordiales portiones diluta usurpabantur : Præterea non ad spasmos duntaxat , sed & suppressam alvum , & quandam cum dolore ventris emolliendam tensionem copiosus olei amygdalarum dulcium haustus multâ cum utilitate adhibebatur. Debachatus cum horrendâ convulsivâ seditione per quinque , aut sex horas paroxysmus , denique deferbuit. Venter emolliabatur ; & alvus ab oleo bis per noctem copiosè fluebat. Imminutis sensim convulsionibus mens tota restituebatur : Reviviscebant facies ; ut manè ægrotantem invisens ferè à morbo solutum offenderim ; Cum vix sensibilis inferioris mandibulæ , & artuum intervallata

commotio superesset, ut potius nervorum prius quassatorum, jam verò adhuc debilium, leviusculi rarique tremores, quàm veri, ut prius aderant, subsultus occurrerent. Prorsus igitur pacata omnia videbantur. Interea sequenti vesperscente die novus illicò, subitusque paroxysmus invadit cum mediocri spasmodicorum symptomatum stipatione, seu non tam feroci ut in superiori paroxysmo contigerat: Interpolatæ pariter convulsiones, præcipuè ad inferiorem mandibulam cum mentis & memoriæ correspondente periodico errore. Post binas horas externus calor universale gelu excepit, & sanguis in ipso paroxysmi statu majorem adhuc acquirens diametrum, versùs auroram excutere febrilem motum videbatur (quod etiam in primo paroxysmo accidisse memini) ad mensuram surgentis caloris firmari animum, & fortius à viribus regi convulsiones advertebamus. Tertiâ die recens post meridiem paroxysmus sed multò acerbior, ideoque cum primo correspondens ingruerat. Pulsus inter initia omnimodè immersus, celerrimus insuper, vagus, & intermittens; Hippocratica facies, incessabiles convulsivi subsultus, immobilis decubitus, lingua nigra, sicca, & aspera; aphonia; universale per corporis habitum gelu; Vox ad momentum aliquod elicitâ, sed profunda, tremula, convulsa, balbutiens, jamque intelligibile nihil exprimens; integra mentis alienatio; omnisque in ægro recipiendis remediis aut alimentis præclusus aditus. Jam ergo ad latum digitum morti proximus exstabat D. Pisanus, ut mihi intranti (ait præclarissimus Author) obviantes Domestici mortuum illum esse, irritamque visitationem meam enunciarent. Sed ego summiter assero non adhuc mortuis cooptandum esse hominem, eumque sanandi volui adhuc in animo spem, mihi patentiori redditâ per tertium hunc paroxysmum, cum primo correspondentem genuinâ naturâ morbi, à primigenia febre non dispari, ut ut vehementius symptoma fortuito casu succreverit. Ægrum accedo, video, concutio, ad aliquem sensum revoco: Ecclesiasticos

fiasticos stolis & ritualibus libris armatos jamque triste illud *Proficiscere* religiosè parantes, nonnihil removeo; juris cyathum afferri jubeo, ipsumque ægro patienter atque per vi-ces sorbillandum exhibeo (mihi enim uni, quâcumque men-tis alienatione teneretur vir, plurimam adhuc propriique of-ficii compotem servaverat observantiam) cordialis inde mi-stura terque quaterque porrigitur; postea fotibus, atque fri-ctionibus suscitatur, hinc modico recreatur mero, ut novo infirmi, emicanteque jam pulsu Presbyteris funeri intentis ex-posito, eosdem illo vespere abdicere à lectulo tutò valerem. Paroxysmus horis aliquot suum tenuit vigorem cum vehemen-tissimis convulsionibus, marmoreâ ad externas partes frigidi-tate, menteque miserrimè nutante. Sed tandem calor ali-quis paulatim emicabat, dilatabatur pulsus, & veluti sen-sim impleri videbatur. Corpus ex cadaveroso decubitu in aliquos voluntarios motus restituitur: Apertior vocis sonus, manifestior sensus: Hinc ex novo, tenuique cibo mentis & virium reparatio major, ad mediam noctem valentior. Tunc præscriptus bolus opportunè offerebatur ex ℥ij Kin-kin. cum 3ß. sal. ammoniac. & gr. vi. sal. vol. viper. & s. q. con-fect. alkerm. cum vini potentis haustu. Post bihorium cya-thus propinatur ex tinctura ℥iij ejusdem peruviani corticis cum quadam rhabarbari dosi in ℥ij vini hispanici & totidem aquæ scorfonæræ. Horâ sextâ matutinâ bolus alius exhibetur ex 3i corticis cum s. q. confect. alkermes. Horâ octavâ ci-bus tenuis. Decimâ repetitur bolus; ad meridiem jusculum cum vino & pane dulciario. Horâ tertiâ pomeridianâ dosi ex memorata febrifugi corticis tinctura. En divini hujusce opportunè administrati præsidii potestatem. Imminens, at-que per quamlibet certè conjecturam lethifer futurus paro-xyismus adeò diffractus est, ut neque febris, neque symp-tomatum præcipuè convulsivorum vigesima præcedentis pa-roxyismi accederet pars. Mens firma, atque hilaris, proba facies &c. sola kinæ-kinæ tinctura ad noctem & succeden-

tem diem iteratò usurpatur. Quid tandem? Nullum prorsus sequentis paroxysmi, cum vehementiori necessariò correspondentis, vestigium: Ideoque febris perfectè judicata est. Usus interea tincturæ corticis ulteriùs protrahebatur. Æger optimè convaluit, solùm ob enormes convulsiones diù viribus attritus; quæ demùm & in integrum restitutæ sunt. Cum igitur tanti radicem mali ab elapsa intermittente febre animo constanter deduxerim, ipsumque ab aliorum medicorum placitis minimè deviatum specifico genuino remedio aggressus fuerim, tutam palmam assequutus sum; & quamquàm post 30. à febris judicatione dies seu ad xv. Id. Decembris in duplicem remittentem tertianam inciderit; Hanc tamen nulla spasmodica affectio, solus febrilis rigor, at certè fortis, comitatus est. Febris hæc postrema quinque aut sex dies emensa, per repetitas aliquas purgationes citra ullum reditum deleta fuit. Neque lectoribus ingratum sit, me in hac describenda ægritudine longiùs, quàm fortè instituto par esse videatur, fuisse divagatum. Hoc quidem operæ pretium fore ratus sum, ut nempè numeris omnibus absolutam tertianæ legitimæ perniciosæ febris ideam porrigerem, tum ut miram peruviani febrifugi aptè usurpati efficacitatem aperirem.

D. Pisani uxor à memorata febre, kinæ-kinæ aliorumque præsidiorum virtuti obsistente diù conflictata, hinc gravibus viscerum obstructionibus obsessa, postea cachectica, ac tumida reddita, & veluti in Hydropicam diathesim vergens, cum lingua perpetuò aspera, & nigra, paulatim à diuturno morbo evadebat per diuturnos usus aquæ rhabarbari cum intermixtis amarioribus febrifugis. Vix levis ad finem decembris eaque erratica vigeat febricula: sed demùm linguâ ad naturalem statum restitutâ, maloque habitu, & crudis viscerum tumoribus emendatis, ad optimam valetudinem profecta est.

Ad finem hujus anni recidivi homines in periodicas febres,

bres , peruviano cortice antea profligatas , quamplurimi ex-
citare. Ingens illicò in his ferè omnibus videbatur acuties
excitari cum dolore capitis atrociter pulsativo , siti , æstua-
tionibus , delirio in ingressu febris , pulsû duro & celerri-
mo , undè plena emicaret necessitas mittendi sanguinis ex
brachio , & salvatella , etiam in gravidis , picrocholis , &
imbecillibus. Interea omnes hæ febres utplurimum subcon-
tinuæ præstitæ , & quamdam mentientes continuitatem , non
nisi revocato peruviani corticis usu comprimebantur.

CONSTITUTIO ANNI 1719.

TOta hyems austrina fuit vix levibus aliquot per januarium
aquilonibus noctu , & manè inæqualiter , vel alterna-
tim spirantibus exasperata. Frequentiores ad februarium Bo-
reæ austris pomeridianis intercepti. Martio leves ornithiæ
inchoarunt , ast itidem austris post meridiem sociati , indè
per dies aliquot frigidiores. Sicca interim hyemis , & veris
constitutio viguit. Morbi ab Januarii fine per totum februa-
rium catarrhales plurimi ad guttur , ad tracheam , pectus ,
dentes , capitis interiora , & exteriora ; ad habitum corporis
cum febre acutâ , aut non acutâ , vel etiam sine febre. Men-
se martio pleuritides , seu potius pleuro-pneumoniæ popula-
riter sæviebant cum febre , & rigore inchoantes. Sputa san-
guineo-pituitosa copiosè erumpebant cum pectoris angustia ,
pulsu maximè duro , & urinis à naturali habitudine non ablu-
dentibus. Acuti hujusmodi morbi non nisi per iteratam qua-
ter , vel quinquies phlebotomiam cedebant. Alterius gene-
ris pleuritides ferè symptomaticæ prodire non dissimiles iis,
quas anno 1716. pro insuetis annotavimus , nec nisi tertio ,
vel quarto febris die manifestabantur absque sensibili dolore
punctorio , sed tantùm obscuro , & profundo occasione mo-
tus totius corporis ab uno latere in aliud decumbentis. Re-
spiratio primo egritudinis die vix læsa ; Tussis ab initio
Ccccc 3 irrita,

irrita, & sicca, vel tantummodò mucosum quid, spumofumque sine cruore ad anacatharsim promovebat. Altero die difficilior respiratio cum sputo cruento, silente adhuc dolore. Tertio die, qui septimus circiter erat totius morbi, gravior adhuc anhelitus cum obscuro, & centrali dolore. Pulsus durior, & urinæ perspicuæ. Moriebantur nonnulli versùs septimam, aut nonam symptomatico sudore madentes, atque improvise stertore correpti, quibus videlicet sputum difficile, aut febris acutior ab initio fuerat, aut gracilis habitus, vel debilis pulmonum constitutio. Evadentes judicabantur ad decimam quartam post largas, & repetitas sanguinis detractiones, & ejecta sputa mucoso-sanguinea; Nullus eis obveniebat purgandi locus; Sudor ferè nunquam judicatorius. Affectiones has velut totidem metastases ex imperfectâ febris judicatione arbitrabamur, non verò systrophicas, legitimasve pleuritides, vel peripneumonias. Earum dolorificam, obscuramque phlegmonis tensionem in pulmonum areâ versùs pericardium, vel diaphragma statuendam censuimus. Hæ profectò affectiones de biliosarum genere non sunt, ideoque methodo longè diversâ pertractandæ.

Æstas siccissima extitit, ac supra omnes transactos annos fervidissima. Hinc creberrimi bilares morbi debacchabantur; in primis tertianæ legitimæ, atque iis intermixtæ synochales, causones, & ardentes insuper illegitimæ; crebræ, furentesque dysenteriae, biliosæ leipyriæ, ictæ cum acuta febre. Pervagatæ præcipuè sunt Maniæ quamplurimæ, à torrida, atque efferata bile profectæ, quorum quidem affectuum in marinis finitimis, præcipuè Genuensibus plagis pululasse segetem audivimus. Peruvianus cortex post largum refrigerantium, & diluentium usum in biliosis ejuscemodi sedandis anomaliis summopere triumphavit.

ADMO-

ADMONITIO PRO ANNO 1720.

PRæclarissimi Authoris ad finem hujus anni è Taurinensi patria discessus, atque ad Bononiensem acceptandam, implendamque Cathedram migratus, nec nisi ad finem maii mensis sequentis anni in hanc urbem reditus, ut missam ex parte biliosæ Epidemiæ anni 1719. fecere historiam, ita nullas principii, multique progressus hujus anni 1720, cœlo huic nostro accomodatas observationes passi sunt. Ut tanto igitur de titulo excusatum habeant Lectores Epidemicorum hujus anni laudati generis morborum defectum petimus, ac deprecamur. Interea Cl. Biancus post reditum suum nihil singularis momenti fuisse hoc anno divagatum, quod Bilis morbos respiceret, ab amicis intellexit, nisi quòd hyeme plurimæ ex coagulatione, ut dicitur, malignæ febres ferè de more grassatæ fuerint; Vere sporadici acuti mediocri strepitu prodierint morbi. Ad maium mensem à fervidissima aëris ex calidis ventis intemperie ingressus intermittentium febrium fuisse præmaturè advocatos ipsemet jam redux recognovit: Atque hæ febres totâ æstate, totoque autumnno ultra morem contumaciores seviebant. Plurimæ ad hyemem aut protrahabantur, aut recidivæ fiebant: Non paucæ febrifugo semel iterumque involutæ, & hoc pacto inconspicuæ redditæ, vere sequentis anni reversæ sunt.

CONSTITUTIO PLEURITICA ANNI 1721.

Valdè inæqualis, & præpostera fuit hujus anni constitutio, præsertim vernalis; quandoquidem austrinæ hyemini ver boreale, & hybernum successit mense martio; hinc pleuritides excitari cœperunt. Aprili mense Austri, & Boreæ vicissim intercipiebantur cum siccitate. Ineunte maio rigor adfuit borealis, & successivè imbres copiosi cum vento
frigi-

frigidò. Ad hujus medietatem diurnæ pluvix cum eadem ventorum indole, & toto mense pleuritides peracutæ seviræ visæ sunt. Dolor in scapulis ordiebatur ad collum protensus, mox altero, vel tertio die ad mammas extendebatur, in aliquibus fixus, in aliis vagus, in quibusdam intermittens. Sanguinis sputum vel sincerum, vel mixtum cum febre acutâ, pulsu duro, quandoque serrato, & vibrante. Sudores tam in morbi principio, quàm in progressu lenti ut plurimum, atque intercepti, ideoque nil decernentes fortasse ob frigidi ambientis repugnantiam; Quippe temperatâ per aliquot intervalla à solaribus radiis atmosphërâ copiosior scatebat sudor cum sensibili egrotantium levamine, & rursus invalescente aëris rigiditate reprimebatur. Neminem profectò criticis sudoribus sanatum vidimus, nisi post longas, atque iteratas effusiones ad nonam, vel undecimam protractas. Qui cruorem ab initio sincerum, exinde ad quartam diem, vel ultra, livescentem expuebant, hi omnes die septimâ periclitabantur. Nonnulli ante nonam stertentes interibant. Qui mixtum catarrho sanguinem temporius spuebant, à morbo felicius, & brevi judicabantur, non ultra nonam. In aliquibus quinto die per sputi velut suppurati copiosam excretionem à periculo evadebant. Plerique tamen non sudore, non sputo, sed potius biliari diarrhœâ sanabantur, quæ circa quartam superveniebat penè omnibus, cum nausæâ, interdum vomitu amaro, & bilioso, periodicis in abdomine æstuationibus, febre ipsâ periodicâ, & remittente, interdum cum aliquali in accessu horripilatione. Quare sicuti hujusmodi pleuritides mixtas, seu sanguineo-biliares non infauisto omine judicavimus, ita æquè feliciter ægrotantes penè omnes ante septimam cathartico subduximus, quo bilio-
sæ excretiones affluenter, & cum levamine fiebant. Id ipsum pariter impetrabatur ex Clysteribus purgantibus sæpè injectis, vel ex oleo amygdalino affatim epoto. Pleuritici hoc ritu conducti feliciter convalescebant, dum reliquos aliter
à di-

à diversis medicis curatos , præsertim iteratis venæ-sectionibus occumbere frequenter audiebamus.

ÆGROTUS PRIMUS.

FAber lignarius vir senex mense februario pleuritide captus cum acuto dolore , & febre sanguinem mixtum spuebat. Per phlebotomiam bis institutam extractus cruor exquisitam esse affectionem significabat. Ad quartam , & quintam sputum affluenter ejectum livescebat cum sudatiunculis ; septimâ die alvus spontè humectata emolliebatur ulteriùs oleo amygdalino frequenter ingesto. Judicatus est die nonâ , & integrè convaluit undecimâ.

ÆGROTUS ALTER.

Pleuriticus annorum 30 , qui habitabat ad plateam Serenissimi Principis Cariniani sputabat sanguineo-flava ; sed ob temerariam frigida potationem suppresso sputo nullâ arte præpediri potuit quin septimâ die orthopnoicus , & stertore oppressus interiret. Celticâ lue inquinatus dicebatur.

ÆGROTUS TERTIUS.

Judæus annorum 24. acerrimo sub mammâ dolore ad dorsum correspondente angebatur cum febre acutâ , siccâ tussi , pectoris angustia , nausæâ , siti , ventris tensione , & vomitionibus. quartâ die soluta est alvus cum borborygmis , nausæâ , & virium labe. quintâ sanguis è naribus stillabat ; dolor erat acutior , & tussis molesta cum sputo seroso , & crudo. Potionatus levabatur septimâ , & judicabatur nonâ. Sudores primis diebus apparentes periodicè repetebant , sed lenti , & vix ullius momenti. Dejectiones alvinæ ex bile exquisitè porraceâ , & vomitus ejusdem conditionis toto morbi

Ddddd

decursu

decurfu recurrentes majoris emolumenti fuere. Pleuritidem hanc fuisse bilialem quis inficiabitur?

ÆGROTUS QUARTUS.

Juvenis annorum 21. habitans in ædibus Nosocomii Charitatis post tertianam febrem cortice peruviano extinctam corripitur dolore punctorio sub finistrâ mammâ cum acutâ febre, sanguinis sputo sincero, cum sudore in principio inutili. Quarto die biliosa excitatur diarrhœa cum euporiâ. Pergit sudor cum febris intensissimâ, facie hippocraticâ, & subdelirio nocturno. Quinto die repetit diarrhœa; sextâ autem febris ardentissima. Septimâ sudores, & spumosa dejectio biliosorum. Hoc ipso die sputum sanguineo-purulentum emittitur; octavâ, & nonâ sputum, & lenti sudores evocari pergunt, cum febris imminutione. Purgatur decimâ, & integrè judicatur undecimâ. Circa decimam quartam œdematosus tumor in facie, & manibus manifestatur, brevi per diuresim dissipatus.

ÆGROTUS QUINTUS.

Pistor dolore laterali, & febre affectus assiduâ tussi, & sputo materiæ catarrhalis crudæ concutitur. A principio adusque septimam sudat per intervalla. Eâdem die tussis exacerbatur cum sputo itidem crudo, & incruento. Purgatoricis noctu mitescunt omnia, manè recrudescent. Purgatur octavâ cum levamine, iterumque noctu revocatur tussis, quæ sudore superveniente demulcetur; magis tamen per excretiones aliquot alvinas devertente nonâ erumpentes castigantur dolor, tussis, & febris. Noctu quiescit. Rursus decimâ die tussis cum pulsu duriusculo, sed novus sudor singula recreat. Undecimâ alvi fluxus, sequente die cathartico adauctus judicatorius evadit.

ÆGRO-

ÆGROTUS SEXTUS.

Vir propè *Padum* inhabitans siccâ pleuritide captus post quinas phlebotomias ab extera regione traducebatur sexto pleuriticae affectionis die, & sexta iterata fuit venæ-sectio; pulsus enim erat sensibilibiter durus cum sanguinis sputo.

Septimâ leni sudore prehenditur cum aliquali symptomatum imminutione. Octavâ per epotum catharticum omnia sedantur, & nonâ die fuit optimè judicatus.

ÆGROTUS SEPTIMUS.

Flliola quatuor annorum pleuritidem semel passa denuò corripitur dolore punctorio, sputo sanguinis, febre validâ, pulsu duro, & tussi. Misso sanguine venter tenditur, & vomitus excitatur. quarto die manna exhibetur, quâ biliaris excretio copiosa promovetur; & quinto convalescit infans.

Complures lateralibus doloribus simpliciter affecti à primâ invasione sudatiunculis madebant ad aliquot dies; tandem per leve catharticum exsiccatis sudoribus perfectè evadebant.

Alii simplici afficiebantur tertianâ cum dolore in febris invasione punctorio, & tussi. Hi solâ methodo tertianis congruente, idest alterantibus, cathartici, & febrifugis sanabantur.

ÆGROTUS OCTAVUS.

Faber ferrarius sputo sanguinis, febre acutâ cum pulsu duro, respiratione difficili, & tussi afficitur. Alterâ die dolor se prodit ad scapulam obscurus, atque sepultus, apud Italos *punta coperta*. Ast tertiâ die exacerbatur. Detracto sæpiùs sanguine non minuuntur symptomata, nec cedunt sudori universali quotidie repetenti. Sputum semper cruentum,

vel sincerum, vel mixtum. quintâ, & sextâ dolor identidem acutior cum stertore, pulsu vibrante, & leni sudore universalis. Stertor tamen aliquando per sputum supprimitur, iterumque exurgit. Septimâ per sudoris repetitionem levare videtur, ast sputum amissâ cruoris tincturâ livescit. Devergente septimâ per totam octavam respiratio elata, & suspiriosa cum adaucto stertore, pulsu duro, & celerrimo, febre acutissimâ, sopore, mentis alienatione, sputo quandoque intense cruento, & facie hippocraticâ. mortem obiit in ingressu nonâ.

Æ G R O T U S N O N U S.

JUvenis puerpera eodem partus die pleuritide acerbâ corripitur cum lochiorum suppressione. Missio de saphenâ sanguine purgamenta refluunt die tertio, parca tamen. quarto die tussis, dolor punctorius, sputum sanguinis, & febris acuta vigent. quinto sudat, & expuit catarrhum sanguine mistum. Circa septimum alvino fluxu proritatur cum levamine, simulque lochia affluenter erumpunt, & sputum incrementum emittitur. Oleo amygdalino pectus, & alvus lubricantur. Hinc Puerpera nono die judicationem obtinet salutarem.

Adulto Maio fiebant pleuritides; Constitutio tamen adhuc erat frigidiuscula cum imbribus inordinatis; quare die ejusdem 25. & 26. thermometra ad gradum 15. sistebant.

Æ G R O T U S D E C I M U S.

INeunte Junio, austrisque jam leviter spirantibus cum imbrium imminutione Juvenis annorum 22. febris prehebatur acutâ cum pulsu duro, dolore satis punctorio ad mammam sinistram, & respirandi angustia. Sputum emittebat grandinosum, nullimodè cruentum, atque è vestigio liberum. Ter sanguine detracto dolor evasit acutior. Alterâ die levis sudor febrem, & anhelitum leniebat, non tamen reliqua symp-

symptomata, quæ usque ad quartam æqualiter sæviebant. Ad finem quartæ suborta biliaris diarrhoea febrim ultrò mitigabat, & dolorem tantisper leniebat. Ad quintam novus sudor, & alvi profluvium cum sputo jugiter gelatinoso, & incruento. Desinente quintâ nullus sudor, sed copiosa alvi dejectio per totam sextam cum maximo levamine, & euphoriâ. Ad finem sextæ adhibito cathartico multa excrevit biliosa cum morbi, & symptomatum notabili imminutione. Ineunte septimâ febris, & dolor leviter intendebantur. Novus eo die sudor scatebat cum eruptione acrium efferarum, sed insimul alvus biliosa deponebat. Octavâ, nonâ, & decimâ sudor exiguus cum alvi excretionem perrexit, & sensim dolor, tussisque mitescebant. Duodecimâ per repetitum catharticum excernebantur iterum, iterumque biliosa; hinc ad decimam quartam integra judicatio accessit.

CONSTITUTIO ANNI 1722.

Singulare vix quidpiam (ut ad digerendas ipse meas biliosarum constitutionum schedas, ab anatomicis laboribus expeditus, revertar) in singulis hujus anni tempestatibus quò ad frigoris, aut caloris, imbrium, aut ventorum habitudines contigisse visum est. Precedens autumnus in genere temperatus, & placidus fuerat, in specie verò Octobri, ac Novembri mense tepidis, & frigidulis ventis se se invicem excipientibus non insalubri successu afflatus. Subsequens hyems temperata pariter, quandoque suaviter australis, rariùs, nec nisi ad finem, borealis, vix interdum pluviosa. Inconstans verò, plerumque frigidulum. Æstas non nimis calida, interea admodum sicca. Autumnus rursùm temperatus, & amœnus. Vere Pleuritidum quidem frequentia inerat, sed catarrhalium, aut sanguineo-catarrhalium, non biliosarum, quibus dissimilis, quàm in biliosis, curandi Methodus conducebat. Ex harumce Pleuritidum genere paucae accendentes, plures verò

descendentes fuerant. Primæ siquidem accensentur hæ, quæ à prima morbi invasione ad hypochondrium duntaxat alterum, aut utrumque, cum epigastrii, vel sine epigastrii consensu, dolorificæ, cum vix sensibili spirandi angustia, parvâ tussi, modicâ febre, cæterisque vix obviis veræ pleuritidis symptomatibus sensim invalescente morbo ad veras costas ascendunt, atque sub mammis, sæpè etiam sub scapulis, proprii doloris figentes sedem omnia tandem symptomata legitimæ pleuritidis induunt: Alteræ verò, quæ prius sub mammis prodeunt, maximoque furentes impetu, sensim postmodum mitescunt, & versùs hypochondria descendentes disparere tandem videntur: Id circò Hippocrates primas alteris deteriores, & acutiores, varioque præsidiorum ordine, selectuque oppugnandas decrevit.

Æstate, & autumno tertianæ simplices, duplicesque non paucæ eruperunt, sed regulares, & breves. Similis indolis & copię biliosæ, aliorumque generum dysenterię invadebant. Ad finem æstatis, & autumnii principium, usus febrifugi corticis superiorum annorum fortunam vix assequi videbatur: In plerisque enim ægrotantium simplices, aut duplices tertianas febres kina-kina non difficilè comprimebat, quæ tamen post 14 aut 15 dies plerumque continuæ redditæ, revertebantur. Harumque non paucæ spontè, ac citra febrifugi usum rursùs judicatæ, vix aliquot superatis diebus recrudescentes, ad simplicis tertianæ naturam, leviolem tamen, mitioremque, quàm inter initia exhibuerint, restitutæ videbantur. Et sæpè in continuâ, quæ intermedia fuerat, febrili deflagratione plurimum fomitis absumptum fuisse liquebat. Hujusmodi verò reversionum vices ab intermittenti febre in continuam, à continuâ rursùs in intermittentem, rarò superioribus annis configerant.

Ad autumnii medium plurimæ perniciosæ tertianæ visæ sunt; nostræque in praxi cæteris solemnior extitit, quæ in D. *Philippo de Rubeis* curanda committebatur. Primus hujus febris circui-

circuitus summum rigorem protulit cum enormi anxietate, & *Cardiagmo*: succedens calor vix emicabat: Paroxysmus non in sudorem profecto, sed in enormem virium prostrationem, lassitudinem, impotentiam arbitrarii motus, faciei pallorem, imò squallorem vergebat, ac desinebat: septem, aut octo horæ febrilis intermissionis numerabantur. Altera febrilis insultus ingressio cum perpetuo animi deliquio, soporoso insuper, ac veluti comatoso affectu, facieque hypocraticâ se prodidit; Pulsus profundus, immersus, inæqualis, celerrimus, & veluti formicans: In caloris exitu delitium cum immobili prorsus decubitu: paucus ad finem sudor. Febrifugum renuens, in maximum æger se vitæ discrimen coniecit; nam tertius paroxysmus prolixam syncopem cum memoratis aliis symptomatibus sibi comitem addidit, ut mortuum plurimi *D. Philippum*, mortique saltem proximum alii crediderint. Sed hic ab insultus vehementiâ tandem exsurgens, & valentiorum cordialium usu à veterno excitatus, multoque opere in febris remissionem delatus, & demùm propriæ conscius aleæ, certusque mortis, in ipso quarti paroxysmi adventu imminens, nostris aliquandò consiliis obtemperans, peruvianum corticem cum sale ammoniaco, sale volatili viperino, rhabarbaro, atque gentianæ extracto singulis brevis intermittentiæ horis assumebat. Redit febris, sed nullo prædictorum symptomatum, vix levi horrore stipata. Succedens calor æqualis, & brevis aderat; hinc largus sudor: dormiebat placidè; Plurima per alvum ejiciebat, avidèque vescebatur æger. Quinta febris non rediit; & proba sensim valetudo restituta est. Post mensem erratica quædam irrepebat febricula, cedens aliquando; atque ad verum sequentis anni tempus repullulans. Sed hæc tandem, debitè administratâ epicrasi, deleta est: Atque *D. Philippus*, ut ut molli pituitosâ constitutione donatus, ab elapso Vere ad hanc usque diem incolumi valetudine fruitur.

CONS.

CONSTITUTIO ANNI 1723.

PRecedens Autumnus placidus, at siccus; atque in ipso tertianæ duplices, & simplices, numero, & vehementiâ mediocres: Hyems indè sicca, ac diuturna, boreali constitutione continuò perflata; Hinc longæ tusses, rauces contumaces, rheumata pulmonum, hæmoptyses, arthritides frigida, nec non arthritice Paralyfes, laterales dolores spurii, asthmata, alique pituitosi morbi perhyemabant. Ver pariter frigidum, & boreale; sed ante æquinoctium brevis, subitæque austrinæ constitutionis dominatus aderat, ventis denuò borealibus interspersus. Hinc frequentes repentinæ mortès, uberrimæ rheumaticæ ægri tudines, & gutturis inflammationes; Puerperarum acutæ febres, & strages, plurimæ etiam in aliis malignæ ac lethales; Senum, atque picrocholorum excidia. His itaque diebus nullus aderat legitimarum tertianarum, aliorumque ex bile morborum ingressus. Aprilis pluviosus; atque in ipso tertianæ aliquot jam emergabant præcedenti autumnno compressæ, jamque ad vernum tempus recidivæ; Plurium generum Hepatitides addebantur, & in fœminis hystericae passionès. Borealis habitudo usque ad Junium vigeat, licèt Maio mense calida, & australis intemperies aliquandiu prodierit cum continuis tertianis & synochalibus febribus, calidisque artuum doloribus. Ab Aprilis interea initiis ad usque Junium imbres ferè assidui visi sunt. Nullum morbidæ affectionis distinctum genus suboriebatur, præter lethales apoplexias non paucas, quæ senes valerudinarios, aut obesos, humidos, vinosos, aut crapulentos homines invadebant, atque, lèteros post longas obstructions repente prodeuntes, ventriculi insuper, & hypochondriorum dolores. Phtisici, ac hydropici postremam diem obibant. Lymphaticæ destillationes, viscidulæ, & interdum falsuginosæ aliquorum guttura, & pulmones prehendebant: Sudores
no-

nocturni plurimi, in quibusdam contumaces lienis obstructions, vertigines. Principio Junii levis austrinus afflatus imbribus intermiscebatur, valdeque irregulares caloris, frigoris, atque humiditatis vicissitudines invicem accedebant; hinc novæ raucedines, tusses, laterales dolores, hæmoptyses, præcipuè verò biliales Pleuritides modò sinceræ, modò etiam lymphatico-biliares, quarum primæ per valida cathartica, aut emetica, copiosissimis, & saturatissimis biliosis ejectis sordibus, ad decimam quartam diem judicabantur; alteræ verò ad vigesimam post copiosas pariter mixtas dejectiones, & interdum cum leviori ad pectus suppurato. Tertianæ aliquæ prodibant, præcipuè quæ fuerant præcedenti autumno suppressæ, aut imperfectè judicatæ. Ad Junii medietatem dissipatis imbribus austrina illico erumpebat constitutio, cum nimium præcoci inducto in ambientem aërem fervore. Jamque non solum ardentiores tertianæ, sed plurimæ febriles continuæ æstuationes excitabantur: Nonnullæ synochales ardentes cum maximâ siti, anxietate, & dolore capitis; plurimæ periodicæ cum notabili rigore primùm invadentes, hinc vix leviusculis, brevibusque perfrigerationibus propriorum circuituum rationem interstinguentes. Occurrebant quædam tertianæ simplices continuæ cum enormi anxietate, vigiliis, multaque in agris impatientiâ morbi: crebriores aderant tertianæ duplices continuæ, exquisitè biliales: Quippe vomitus acerrimæ bilis increbescebant, dolores capitis punctorii, hinc dirè lancinantes, sitis intensa, lingua sicca, & flavâ, oris assiduus amaror, cum nausea, ciborum fastidio, ac perpetuâ, querulâque anxietate, enormes sub vesperras, & ad noctem fervores frequenter cum delirio, totius corporis præcipites exsiccationes; sæpè narium hæmorrhagiæ, capitis quidem dolorem lenientes, sed morbum haud quaquàm solventes; angustia pectoris, & jactationes cum virium prostrationibus; nec nisi à biliosis saturatis ejectionibus solamina habebantur. Tertianæ aliquæ perniciosæ obversabantur

bantur, quarum aliquæ acutam indolem usque ad vigesimam protrahebant, aliæ ad decimam septimam, aut trigesimam per largos ex biliosis concoctis quisquiliis alvi fluxus judicabantur. Aderant insuper ardentiora faciem, aut artus occupantia erysipelata, quæ quidem catharticis facile, citòque cedebant. Nonnulli quintâ die subito rigore corripiebantur, hinc uberi, universali, criticoque, sed lento postmodum præstito sudore perfusi ad septimam evadebant. Alii toto corpore dolentes, neque in latera decumbere præ nimiam musculorum omnium externorum tensione, & rigiditate valentes, multum adhuc ad septimum usque diem conflictabantur. Ad solstitium acrius intendebatur austrinus fervor. Quæ primùm tertianæ simplices invadebant, in duplices indè migrabant; quæ duplices inter initia fuerant, continuæ fiebant, licèt valdè remittentes, & periodicæ, cum dolore capitis penè assiduo, siti, oris amarore, & jactatione, longisque ad finem accessuum sudoribus. Qui noctu in paroxysmi fervore delirabant mane imminutâ febre placidiores aderant, menteque consistentes. Iis, qui quintâ, aut sextâ die in æstuosis hisce febribus validè purgabantur multis, crassis, saturatisque biliosis recrementis, statim omnia non expectatâ morbi judicatione remittebantur. Quæ ad solstitium accendebantur biliosæ febres, assiduum capitis lancinantem dolorem ducebant comitem, atque sudoribus ut plurimum sed inutilibus principio diffuebant. Qui ante septimam hæmorrhagiâ narium videbantur sublevari, post septimam adhuc biliosa plurima per catharsim excernebant, & integrè solvebantur: Qui verò ante septimam purgati sunt, biliosa quoque post septimam plurima excernebant, iisque tum biliosi vomitus aliquandò contingebant, tum frequentius cardialgiæ, & cordis angustiae, profectò à bilis morfu estimandæ. Colicæ quædam, præsertim in pichrocolis, intermiscebantur, post dies aliquos à bilis ejectionibus solutæ. Intereà prompta sanguinis missio tertianas ferventes aliquas insigniter temperabat, quasdam de-

delebat funditus. Quæ continuæ erant febres, eundem in omnibus quò ad ingressum, progressum, symptomata, & judicationem, servare ordinem videbantur, seu, ut suprà, cathartici cholagogis ante septimam mitigabantur, atque vel ad septimam judicabantur, vel usque ad nonam placidiores protrahebantur. At dominante austro creberrimi quidem nimbi advocati sunt, sed aër fervens supererat: Hinc dilutior bilis in ferociiores tertianas erumpebat, in quibus catharses crocea semper, copiosa, fervida, spumosaque purgamenta biliosa movebant: In iis insuper croceæ, & saturatiores fluebant urinæ, tum fervidissimum tactu abdomen occurrebat. Plurimæ febres peruviano cortice compressæ solito celerius, seu multum ante consuetos quindecim circiter intermissionis dies redibant, plerumque duplicatæ, aliæque insuper primitivæ agminatim excitabantur. Has febres præter alia symptomata enormis lassitudo cum artuum doloribus comitabatur: alios solitaria quidem, sed sævæ lumbagines cum nausæ, & inappetentiâ adoriebantur, biliosis ex catharsi excretionibus non difficilè cedentes.

Cum verò inter aëris æstuationes, subdolæ quædam ex imbris factæ perfrigerationes per intervalla irreperent, hinc qui plurimis, largisque sudoribus, aut uberi transpirationi assueti fuerant, facilè ab occlusis improvisò cutis spiraculis constipatione corripiebantur; undè rheumata per artus prodibant, tusses, raucedines, anginae calidiores, dolores pectoris, & præcipuè dolores ossis sacri, in Ischiades interdum degenerantes. Eandem ob causam nonnullos lymphaticæ febres corripiebant sub vespèras, quæ ad noctem cum modico calore, multâque dolorificâ lassitudine ingravescebant, atque cum quotidianis æmulabantur: quibus accedebant flatus, doloriferæ ventris tensiones cum frequentibus *borborigmis*, & largâ flatuum ad inferiora eruptione.

Ad Junii finem australis iterum constitutio dominabatur. Qui tertianis duplicibus continuis febribus laborantes, ad

septimam morbi concoctiones non attingebant, octavâ & nonâ gravissimas pectoris angustias cum ventris tensionibus patiebantur : iisdem deprimebatur pulsus , vigiliæ aderant , & assiduæ jactationes ; lingua biliari crustâ. perpetuò infecta , crebræ alvi dejectiones veluti diarrhœam affectantes , sed tenues , & crudæ. Noctu delirabant , atque per totum œsophagum ad usque ventriculum , intensissimo velut flammeo ardoris sensu vexabantur. In aliquibus noctu fauces , & œsophagus adeò exsiccabantur , ut neque liquores deglutire valerent. iis venter inflabatur , respirationem idcirco opprimens cum inexorabili lassitudine : Cùmque copiosæ , sed tenues , & crudæ biliosæ excretiones mederi ancipitem fecerint de fortiori cathartico , aut etiam emetico propinando , tandem in aliquibus eadem præcocius non adhibuisse pœnitebat ; ut etiam ad decimam morbi diem emetico firmiori jam animo exhibuerim cum fausto eventu ; nimirum ventre illicò detumesciente , copiosissimis crassæ bilis , & summè crocæe succedentibus excretionibus : hinc quies , & febris remissio. Cessante cathartici stimulo crudæ iterum duntaxat materiæ , tenues , & pallidæ secedebant : In iis si quidpiam per vomitum prodibat , amarissimum erat.

Hæc autem protrahebantur ultra septimam in quibus morbus initio ficcus fuerat ; ut sanè in multis contingebat. Bilis enim hujusmodi est , ut quò diutiùs comprimitur , eò tandem vehementiùs erumpat , atque displodat. Ita in aliis tempestatibus vernis , quæ sub initio calidæ fuerant , & tales servabantur , crescente sensim calore , bilis non adeò deflagravit.

In hujusmodi creberrimè sævientibus tertianis cùm nimium efferata esset , atque exaltata bilis adhibitum febrifugum non tam citò , nec adeò liberè eas comprimere poterat , ut in aliis temporum vicibus ; sed ut ut longis , atque repetitis præmissis universalibus catharticis , atque præparantibus , tardè suum in aliquibus munus præstabat ; in quibusdam nonnisi
dupli-

duplicatis dosibus exhibitum subveniebat ; in aliis irritum prorsus extabat , donec per repetitos paroxysmos satis biliosus humor deflagraret : In nonnullis verò per corticem compressis febribus adhuc post dies aliquot à cessatione febris, subiti amarissimæ bilis vomitus excitabantur cum virium , & appetentiæ restitutione , quæ quidem prius , licet deleta jam febre , valdè adhuc languebant.

Hos inter *Carolus Miglior* ætatis 50 annorum , carnosus , & melancholicus , decumbebat cum febre tertianâ duplici continuâ , sed valdè periodicâ , atque manifestè biliosâ ; ut ex ventris tensione , nausæâ , crustâ linguæ flavissimâ , siti , anxietate continuâ , & clamosâ , corporis habitu subflavo compertum aderat : sed biliosus febrilis humor diu , summâque contumaciâ crudus persistabat. Principio pauca biliosa, simulque tenuia excreverat ; hinc cruda & pallida veluti per diarrhœam continuè ejiciebat : solo cathartorum stimulo biliosa crocea movebantur , quo non inducto , rursus cruda, & tenuia ac velut serosa deturbabat. Usque ad duodecimam, imò & decimam quartam contumax morbi cruditas persistebat , ut vix per Clysteres biliosum aliquid educeretur. Ad octavam venter turgens cum summâ pectoris angustia , & molestissimâ tussi , sed sympathicâ : Cathartico forti multa biliosa excernebantur , venter deprimebatur cum leviori spirandi angustia ; sed ad nonam hic iterum tumescebat cum subdelirio , præcipuè nocturno , ingenti aurium sonitu , & aliquâ mentis stupiditate : Per novum catharticum emetico sociatum biliosa ad inferiora subducens , sublevabatur æger : sed undecimâ major abdominis inflatio , & durities vigeat cum sævâ tussi interdum humidâ , & plurimâ pectoris angustia , perpetua insuper anxietas , virium enormis prostratio. Multam olei amygdalini per intervalla dosim assumpsit , unde aliquot , sed crudæ excretiones. Interea febris suis viribus consistebat , cum aliquâ interdum levi periodica perfrigeratione : Pauca , & tenues erant urinæ , lingua flavâ con-

tinuò crustâ suffusa. Ad duodecimam exhibitâ cathartici simulque vomitorii potione, adhuc biliosa plurima ejiciebat per sedes, numquam per vomitum, (ciuda enim semper extabat bilis, & validioris impetus nescia) *simulque pisa jam ante 20. dies comesta, integraque excernebantur.* Venter tandem visus est detumescere, febris imminui, cessare delirium; & licet crudus adhuc foret morbus, interea ex quammaxima (quod quidem alternis ut plurimum diebus habebatur) excretâ bilis peccantis copiâ tanta vis morbo subtrahebatur, ut in necessariam iste declinationem vergeret. Liberè, deletâ tussi, respirabat æger; copiosæ simulque ictericæ erumpebant urinæ; mentis autem hebetudo usque ad decimam octavam persistebat. Vigesiinâ die purgationem adhuc suscepit: mixta excrevit sed cocta: integrè tandem sanus evasit.

Ad Julii principia constitutio frigidula revertebatur, identidem pluviosa, atque circa decimam ejusdem mensis diem tota bilis in dispositis hominibus displosisse satis, aut deflagrasse videbatur; ut paucæ tertianæ, aliæque biliosæ febres denuò excitarentur, veteribus jam defervescentibus: fortè solùm compressa fuerat bilis; nam paulò post nonnullæ tertianæ febres, jam plenè deflagratæ, & sine febrifugi usu extinctæ, vividius renascebantur.

Ad Julii medietatem tempus denuò nebulosum inerat, hinc nimbosum, ac flantibus boreis frigidum. Sani homines ob imminutam transpirationem viribus magis constabant, ad motum aliaque officia agiliores. Sed rursus laterales dolores, & gutturis affectus invadebant, febres ex *constipatione* variæ, eæque anomalæ; morbi plurimi in chronicam migrabant diurnitatem; hydropes, & contumaces viscerum obstructions; Rheumatismi, dolores pectoris, tusses. Excitabantur hoc tempore renales dolores atroces ex mucoso potiùs principio, cum molestissimis, atque creberrimis vomitibus: Acerbæ insuper, atque contumaces odontalgia per plurium ora exspatiabantur.

Circa

Circa finem Julii adhuc tertianæ tum simplices tum duplices , cum paroxysmis sibi invicem de tertio in tertium quoad intensiorem , atque extensionem respondentibus , exsurgabant : Febres aliquæ continuæ acutæ , sed pariter biliales : Diarrhœæ in infantibus plurimæ ; rarissimæ verò dysentericæ ; cæque facile per leve catharticum judicatæ : Synochales trium , aut quatuor dierum , & ardentes spuria cum dolore capitis , & artuum , quæ unâ sanguinis missione , propinatoque cathartico , non difficilè , sine sudore , aut cum levi sudore , solvebantur. In causariis , & senibus , præcipuè mulieribus , apoplexiæ non fortes , cum levi , neque insanabili , succedente indè emiplegiâ , & linguæ paralyfi.

Cùm verò à pluviosa constitutione Padus aquis hâc æstate uberius turgesceret , idcirco licèt ad finem Julii acerrimus debaccharetur calor , incolæ suburbii hujus fluminis vix illas tertianas experti sunt , quibus tam epidemico more superioribus æstatibus conflictabantur : In his enim , ut ut minor calor vigeret , tamen siccissimâ dominante constitutione , siccabatur (ut alibi dictum est) hîc illic fluminis alveus , undè memorata aliàs palustria effluvia ; hinc febres &c.

Versus medium Augusti austrorum afflatus , vexabat ; hinc calor intensus. Creberrimæ erumpebant tertianæ ingentem in sanguine fervorem , ac *turgescientiam* inducentes ; undè dolores capitis , anxietates , vigiliæ &c. Hinc febres hujusmodi , præter catharsin , etiam phlebotomiâ erant principio excipiendæ : quas indè diutiùs protractas febrifugum non difficilè delebat. Superveniebant dysentericæ , tenesmi , diarrhœæ contumaces. Senes ex intestini sphacelo à dysentericiâ moriebantur. Ad finem hujus mensis frigidula denuò spirabat constitutio , cum multis imbribus , humidoque cœlo. Anginæ , tussis , odontalgia creberrimæ cum tumoribus ad alterutram genam : Rheumatici affectus hâc tempestate non solùm Taurini , sed in omnibus Pedemontii provinciis desæviebant , ut Amici mihi retulerunt. Tenesmi : Tertianæ du-

duplices remittentes (à diluta ex pluviis bile) sine rigore aut ulla perfrigeratione in paroxysmorum ingressu. In his, aliisque superioribus biliosis epidemiis tantâ sæpe nausæâ, ciborum, omniumque rerum aversione obsessos homines comperi, ut non tantum alimentarias substantias ipsis per clysteres frequenter injicere necessum fuerit, sed & remedia tum febrifuga; tum etiam motus varios juxta morbi necessitatem excitantia. Ita pro sudore in hisce ægrotis, & acutis quandoque febribus opportunè, largèque promovendo non raro usus sum ebullitione Gratiolæ seu Gratiæ-Dei in aqua comm. additâ, cum liquidum in siphone excipitur, spiritus vini camphor. mediocri quantitate: Calidumque satis enema immittendum imperabam. Mirum quàm faustam hocce præsidii genus salutarium sudorum eruptionem eliciat.

Principium Septembris placidissimum extitit. Paucae febres, eæque ut plurimum tertianæ duplices, per *subintrantiam*, ut dicitur, continuæ. Viri ut plurimum in hac, aliisque constitutionibus ab hisce tertianis prehendebantur: mulieres enim naturâ humidiores difficilius ad hunc veluti torridæ bilis statum perveniunt. Dysenteriae interea grassabantur non paucae, tenesmi, & diarrhoeæ vehementes, ac contumaces; plurimi, iique pertinacissimi, interdum & lethales, gutturales tumores: Lentæ nonnullæ, atque diuturnæ parotides. Ad 7. 8. & 10 Septembris, intermixti austrinis flatibus boreales venti irrepebant: Hinc anginae cum febre, odontalgia &c.

In hisce biliosis febribus, atque in earum fervidiori statu sæpè urinæ prodibant saturatissimæ, summè crocæ, & lateritiæ, per aliquot dies perseverantes: sed exhibitis validis catharticis, eorumque vi copiosis crocæ, & saturatissimæ bilis dejectionibus impetratis, statim urinæ clariores fiebant, illaque tincturæ habitudine exuebantur. Quod certè nostram de urinarum à bile tincturâ confirmat hypothesim. In genere
ad fi-

ad finem hujus æstatis innumeri ex diuturno, aut etiam rapido universali hydrope moriebantur.

Disploſis, atque deletis jam penè omnibus ante æquinoctium tertianis, dysenteriis, aliisque æstivis morbis, circa æquinoctium pauciſſimæ vigeant ægri tudines, atque universalis ridebat ſanitas, non ſine multis gregariorum Medicorum querelis; annotabam tamen, in recentiori urbis regione, in quâ quidem longiùs à Pado, atque in eminentiori, magisque aprico loco poſitâ, noviffimè conſtructæ ædes ſubtiliori aëre potiuntur, febres hujusmodi bilioſas crebriores, & vehementiores hoc tempore fuiſſe, quàm in regione ad Padum vergente. Elabente Septembri uberrimi imbres cadebant. Tuſſes plurimæ, colicæ rheumaticæ affectiones in mulieribus plurimæ, cum ſubitis acerrimis vomitibus; quæ tamen poſt paucas horas, vel abſque remediis, evaneſcebant. Nullæ hujusmodi in viris affectiones; in quibus ex adverſo tertianæ furebant, non verò in fœminis.

Octobris principio, & progreſſu dolores laterales cum ſuffocativo ad pectus catarrho, & mors veluti ſubita. Plurimos etiam vel fortes, & etate valentes legitima ſubitanea mors ſuſtulit. Medio octobri tertianæ aliquæ, ſed raræ; ſpaſmodici affectus præcipuè ventriculi, cum artuum conſenſu: *Conſtipationes* aliquæ, Rheumatismi nonnulli. Sed in genere minimus ægri tudinum numerus. Ad finem hujus menſis aliquot adhuc æſtivarum tertianarum, præcipuè poſt uſus corticis redeuntium, reliquæ; recentes etiam nonnullæ. Febres continuæ plures; acutæ aliquæ, imò & malignæ cum methaſtaſi ad caput, & nece. Variolarum in pueris præludia: Arthritici affectus. Cùmque frigida proluderet conſtitutio hyemalem propè redolens, bilioſi morbi aliquando coerceri ac ſupprimi, atque hyemalibus ſeroſis, & catarrhalibus locum jam cedere videbantur.

November caliginofus, & humidus. Principium Decembris frigidum, hinc nonnihil australe, & pluvioſum, mox

F f f f f

rigi-

rigidulum; versùs finem ad plures dies micabant austri cum constanti serenitate. Decembri mense tertianæ duplices febres adoriebantur, tum mali moris, & petechiales, plurimæ: rheumatici affectus, morbilli, variolæ invalescentes; puerperarum acutæ febres miliares funestæ.

APPENDIX CONSTITUTIONIS

Anni 1724. ad usque Vernal tempus.

P Rincipio anni 1724. die nempe 2 Januarii desiere austri, leni succedente boreâ, hinc aliquantùm frigida constitutio, die 3^a. frigidior, semper tamen cum serenitate; sed prosequente mense, indeque & sequenti februario, austrinus plerumque dominatus extitit, ut vernum tempus præmaturè emeruisse, atque hyemis tenuisse locum visum sit. Hinc bilis non satis compressa in periodicas febres cum distinctis invasionibus, atque rigoribus non difficilè erumpebat: Sed cum nec satis soluta fuerit, atque ad coctiones, debitasque secretiones, aliasque habitudines disposita, febres hujusmodi contumacissimam indolem exhibebant, nec quibuslibet opportunè administratis præfidiis cedentem, nec peruviano aptè adhibito cortici ut aliàs, obtemperantem: ut hinc ad finem Februarii & succedentes menses, febres ejuscemodi diuturnas ad 40 & 50 dies, atque ulteriùs protractas, acutis interea ingressibus vix destitutas, vel in juvenibus, ac vegetis maribus, & foeminis, cuilibet obluctantes remedio, neque ullam maturitatem patientes, quotidie datum fuerit perspicere: Harum plurimæ vix tandem evadebant, diuturno relicto cum longo virium, & concoctionum languore causario statu: Aliæ in tabem, aut hydropem degenerabant.

Ad Martii principium usque ad 12 diem finiebat hyemem aut potius renovabat, sicca, & frigida aquilonia constitutio asperrima, undè multa glacies, & excessus frigoris, qui certè neque ad penitiora elabentis hyemis tempora fuerat ullo modo

per-

perceptus. Nec sine gravi viventium pernicio tanta novitas extitit. statim tusses populabantur, angina, pleuritides ab impedita transpiratione, sed catarrhales, hæque à pulmonalium, aliorumque solidorum rigiditate, corrugatione, crispataque diathesi, per validum frigidi transmissi aëris stimulum inducunt; aliique rheumatici affectus ad collum, artus, imò & interiores partes, ac viscera. Plurimos dolores ad mammam, & scapulam vexabant cum spirandi angustia, febre, tussi, & sputo sanguineo. Sed sputum hocce celebrata missione sanguinis post binos plerumque dies evanescebat, remittebatur febris, aliquà vix tussi superstite, neque ad quartam usque diem protrahebatur dolor: ut illud magis firmaretur indicium, affectus hujusmodi, Pleuritidem genuinam mentientes, non quidem fuisse systrophicos, sed ex solâ pulmonicarum superficierum à subito ictu rigidissimi aëris stimulantis, & lacerantis contractione, & *crispaturâ*, ut dicitur, procreatos; undè ab aliquibus, qui pressi magis aut contracti fuerint, sanguiferis canalibus aliqua sanguinis per tussim ejecti præstita fuisset expressio. Ita contigisse vidimus in Advena ad edes D. Francisci De Nasis: in Dom^a. Antonia Senta: In Dom. della Valle: in D^o. Josepho Perini, aliisque plurimis curæ nostræ commissis. In hac autem Thoracis affectuum constitutione, super alias omnes, perniciosissimi usus erant catharticæ purgationes, ob stimuli nimirum facultatem augendis solidorum rigiditatibus aptissimam. Opem omnem attulit emollientium laxantium, atque oleosorum copiosæ, tepidæque potationes. Se comites his morbis addebant mali moris variolæ, frequenter confluentes, quarum quidem improbitas plurimos, præsertim ætate provectiores, plerumque ante maturitatem, de medio sustulit.

In hac Vernâ sporadicorum Morborum constitutione, quæ plurimas tertianas duplices, continuas, atque remittentes, synochas fortes, scarlatinas, aliasque febres, præcipuè anomalas rheumaticos pulmonum affectus, ventriculi dolores,

erysipelata , calidas ad faciem , collum , & artus distillationes , Tympanites , asthmata cum sicca , tum humida , contumaces denique capitis dolores , attulit , mirum dictu , quantum hujusmodi morbi , supra alios omnes superiorum quarumcunque , & præcipue vernarum tempestatum eventus , missio sanguinis subvenerit : sive id frigide perflantis aeris habitudini tribuendum sit , quæ cutaneam transpirationem valde minuit , dum interea , qui verno tempore solent excitari liquidorum intestini , sive , ut vocant Willisianæ scholæ , fermentativi motus , ad majus in propriis canalibus spatium nituntur ; sive ad eorundem morborum naturam referendum sit. Verumtamen id certum est , non tantum catarrhales febres , aut peculiare affectus plus , minusve inflammatorios , Rheumatismos insuper , tum puerorum morbos magis , aut minus acutos cum acidis à stomacho spirantibus halitibus , communiter verminosæ ægitudini adscriptis ; sed ipsasmet hystericas , & hypochondriacas passiones , aliaque morborum genera , at potissimum morbillos , & variolas , quæ modò grassantur , à sanguinis missionibus , vel inter eruptionum initia interdum urgente affectu celebratis , felicissimo eventu judicari contigisse : adeò ut à variolis , vel deterioribus ægrotautes convaluerint , quibus tempestivè missio sanguinis instituta , aut etiam juxta morbi vehementiam reiterata fuit ; dum è contrà postremam plerumque diem obire contigit iis , qui phlebotomiam non susceperunt. Rarò hæcenus animadverti dissolutum , nigricantem , & cum innatante velut oleo sanguinem , quemadmodum in aliis solet constitutionibus adnotari. Aprili eductus sanguis , perpetuò ad tomenti superficiem striis , atque areis plerumque flavis , & subatris variis apparebat , multamque à se se turbidi ; & albicantis ; instar chylaceæ substantiæ , feri copiam exprimebat ; superiori verò mense gelatinosam , universè albidam , flavam , aut viridem superficiem plerumque obtulit. Quò purior , & floridior extat , qui ab ægrotantium venis educitur sanguis , eò minus

Phle-

Phlebotomia prodesse solet : Oppositum autem in missione corrupti , ut loquuntur , & putridi ad oculum sanguinis experimur ; licet id ipsum non ritè circulationis legibus respondere videatur , quibus innixi recentiores affirmant , sanguinem in vasis residuum , eâdem , quâ gaudet extractus , habitudine donari. Falluntur tamen. Sed hanc , sicut & similes cæteras disquisitiones maximi in praxeos administratione momenti hic loci pertractare non est animus , atque opportunis aliis meis studiis servatas facio , quemadmodum etiam præsentis anni 1724. constitutionem ; cùm præsertim ob frigidam , quæ adhuc Aprilis medietatem tenet , aëris habitudinem , compressa nimium Bilis nondum pro consuetis gignendis morbis deflagraverit ; simulque tertianæ , aliæque periodicæ febres , similium in anteaactâ æstate , & autumnio morborum progenies , crudam , coactam , nec adhuc exaltatam bilem præferentes , non solum diuturnæ admodum sint , verum etiam remediorum omnis generis administrationi , præcipuè cujuscunque speciei febrifugis , ipsi quoque peruviano cortici ut supra , pertinaciter resistent.

Medio Aprili borealis adhuc aderat constitutio , dum totâ penè hyeme australis viguerit : Hinc novæ tussés , gutturis distillationes , uvulæ tumores , odontalgia , mandibularum dolores , catarrhales febres , nulli adhuc intereà biliares morbi. Atqui à medietate ad finem Aprilis invalescens solis accessus jam plurimam viventibus , cum augescente in dies liquidorum , & habitus corporis rarefactione , perspirationem conciliabat : sed subdolæ adhuc frigidulæ intermixtæ auræ afflatus internis hisce Verni temporis motibus extrinsecus vim faciens , fugientes è cute halituum undas in plurimis ad internas superficies non difficilè repercutiebat ; hinc mirum , quantæ his diebus homines invaserint raucedines , coryzæ , gutturales distillationes , tussés humidæ , aut siccæ ; oculorum , & aurium dolores , pseudo-morbillosæ eruptiones , & similes à subitis cutaneis retrocessibus affectiones.

Postremis Aprilis diebus boreali quolibet deleta tandem afflatu calor vehementer grandescerebat, ut sensim ablegatis catarrhalibus morbis, vix variolarum jam in genere non adeo deteriorum, ac morbillorum vestigiis persistentibus primos biliosorum morborum nuncios praestolabamur.

Ineunte Maio, cum calidus simulque turbidus esset aer, atque tempestuosis jactatus nimbibus, incredibile, quanta morborum inopinata genera erumperent, omnia quidem irregulari, insuetoque cursu jactata versipellis indolis Pleuritides prius vix spasmodice, hinc inflammatoriae, mox subito evanescentes, cum superflite acutissima aperta febre, atque inanibus sudoribus: Harum plurimae ex decubitu ad caput, & delirio versus septimam lethales erant: nonnullae in praecipitem vergebant tabem, praecipue si incaute inter initia catharticis excipiebantur. Variolae anomalaе rursus saevissimae, simulque eodem tempore aequali ferocia grassantes, (quod raro contingit) morbillorum, aliarumque ad cutem acutarum, rubentium & asperarum effluentiarum copiae. Puerperae adhuc gravissime habebant: Plurimae emoriebantur. Rheumatici dolores in fortes, & difficiles febres, hemiplegiae vero statim in lethales apoplexias desinentes. strumosi celeres, & acuti tumores: Homotonae febres: Nonnullae Pleuritides siccae tandem per haemoptysin (quod quidem & insolitum) paulatim judicatae: Maniae plurimae, aliaeque amentiae subortae sunt: Pectoris creberrima rheumata cum febre praesertim nocturna, atque praecipue in phthisicam indolem ex tussibus, & febriculis progressus. Tertianae duplices continuae non sine aliqua pectoris irritatione debacchabantur, summamque contumaciam servabant. Acutae pariter in pueris, & infantibus febres, frequenter mortiferae. In morbis omnibus, qui ad salutem vergebat, vel levioribus, aut etiam intermittentibus febribus, incredibilis aderat pertinacia, atque remediis omnibus oblectatio: Tum hyemales morbi, soliti ad vernum tempus solutionem, atque judicationem suscipere,

cipere, immaniores evadebant. Plurimi præcipitanter ruebant in interitum. Vertigines etiam tenebrosæ non paucos invadebant. Laterales ad costas, atque intercostales musculos dolores vel aliquando deleti, identidem cum erraticis febribus revertebantur. Pleuritides in obscuros atque improvisos abscessus facientes, multam ægrorum medicorumque spem septimâ aut nonâ die brevissimo novæ febris curriculo jugulabant. Dolores insuper aderant lumbares, epigastrici, atque totius ventris creberrimi, sub noctem ingravescentes quaquaversum acuti. Gibbosa ad summam fiebant cœmeteria: atraque luctus viduorum conjugum, aliorumve propinquorum signa ubicumque per urbem obversabantur. Sed denique certior, firmiorque illuxit hujus mensis progressus, citoque synochales biliosæ genuinæ febres erumpere visæ sunt, quibus jam non modicum subveniebant cathartica. Accedebant Diarrhœæ biliosæ, longiusculæ quidem, sed repetitis interea purgantibus, undè biliosa plurima nonnihil viscida subducebantur, aliquando cedentes: Jamque biliarem indolem induebant pleuritides, quæ quidem à valido purgante ante quartam, aut sextam exceptæ, post septimam, aut nonam feliciter decernebantur; tussi, sputo, dolore purgantis virtute sedatis, aut deletis, vix aliquâ superstite pectoris angustia; rebelles ex adverso, & discrimine plenæ, si purgans post fuit. Ita his diebus Dominum de *Champagne* 15. aut 16. annorum adolescentem pleuritide, & acutâ febre correptum, calore acerrimo, pulsu admodum duro, punctorio sub mamma dolore, quàm maximâ spirandi difficultate, tussi ut plurimum inani, interdum cum modico sinceri sanguinis sputo, vigiliis, & assiduâ jactatione ad usque quintam morbi diem vexatum catharsis hæc die instituta repentè sublevabat; atque ad usque septimam ejusdem propinati remedii vis plurima semper biliosæ deturbans, pristinæ ad nonam incolumitati ægotantem feliciter reddidit. Tertianæ horum dierum excitatæ febres diuturnæ

turnæ non sunt, quæ quidem unius, aut alterius purgantis operi non difficilè obsequuntur.

Atque hîc denique à biliosis plurium annorum Constitutionibus manum, & operam subducens, videor meam satis fidem liberasse in illis edendis observationibus, quas quidem fueram jam ab anno 1711. in Præfatione primæ editionis hujus Historiæ pollicitus: Cùm nempe *de Morbis vernis, æstivis, autumnalibus, & hyemalibus sub Taurinensi cælo vigentibus, eorum curationibus, aliisque ad dictæ urbis medicinam spectantibus*, verba me aliquandò facturum enunciaui: Ex hâc enim Hepatis, & Biliosorum morborum absolutâ Historiâ hæc omnia abundè satis elicere, passim dignoscere, atque invicem distinguere cuicumque Medentium licebit.



171. mel.

